


Bëngbe Bëtsa
Cabëngaftaca
Entsoyebuambna



New Testament in Camsá

Bëngbe Bëtsa Cabëngaftaca Entsoyebuambna

New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 18 Apr 2025 from source files dated 29 Jan 2022
19104c0e-9046-5ff3-82fb-eb838c88dcf9

Contents

San Mateo	1
San Marcos	77
San Lucas	123
San Juan	200
Hechos	257
Romanos	330
1 Corintios	370
2 Corintios	408
Gálatas	433
Efesios	448
Filipenses	461
Colosenses	470
1 Tesalonicenses	480
2 Tesalonicenses	487
1 Timoteo	492
2 Timoteo	503
Tito	510
Filemón	515
Hebreos	517
Santiago	548
1 San Pedro	558
2 San Pedro	569
1 San Juan	576
2 San Juan	585
3 San Juan	587
San Judas	589
Apocalipsis	592

San Mateo

Jesusbe bêts taitanga
(Lc 3.23-38)

¹ Quemënga immamna Jesucristbe bêts taitanga: Jesucristna Rey David y Abrahambentsana entsá inamna.

²⁻⁶ Abraham yojamna Isaacbe taitá;

Isaacna Jacobëbe taitá

y Jacob, Judá y chabe catšátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabëbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaibe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entsanga chë israelitënga tmojánishëche y chocha imo-
janëtámena ora, Josías chë básenga yojánabamna.

¹²⁻¹⁶ Ya Babilonioca ndutámenënga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadoche taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobëbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámana Uabuayaná, chë Cristo ca uabainá.

¹⁷ Chcasna, Abrahámbentsana Davidbentscoñe bnëtsana canta bëts pamíllanga imojëftsemna. Davidbentsana y chë israelitënga Babilonioca imojanëtamënëtsuana inÿe bnëtsana canta bëts pamíllanga; y inÿe bnëtsana canta bëts pamíllanga chë Israeloca entsanga imojanëtamënëtsana, chë Cristo tojanonÿnãntscoñe.

Jesucristo tojanonÿná

(Lc 2.1-7)

¹⁸ Jesucristo jónÿnanamna mëntsá tojanopasá: María tbojanšbuachená Josëftaca jobouamayama, pero cabá ndoñe cánÿiñe ibontsiyena ora, tojanopasá Mariyna ngomamaná yojoquéda chë Uámana Espíritbe obenánaca.

¹⁹ José, Mariybe boyá, canÿe nÿetsca soyënguiñe tšabá jamama bošá inamna. Cha ndoñe yontseboše entsangbe delante cha mal jaquédana; chíyecna tojanjuabó nÿe iytëcana Mariybentsana jtsojuánañana.

²⁰ Y chca yojtsejuabnantscuana, mo otjenayoquécá canÿe Bëngbe Bëtsabe ángel tbojáninÿe y chana Josëbioye tbojaníyana: “José, Davidbentsana entsá, ndoñe matenócochinÿenana Mariáftaca jobouamayama, er chë bochántseboamna šešona chë Uámana Espíritbe obenánaca cha bochántseboamna.

²¹ María canÿe šešona bochántseboamna y cha Jesús ca cochjuabaye. Chca echantsabaina er cha chabe entsanga chëngbe bacna soyënguentšana echanjátsebacaye ca” —chë ángel tbojaníyana.

²² Lempe chca tojanochnëngo, cachcá chaotsemnana ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntsá tojánayana:

²³ Chë cabá boyabása nduabuatmá ngomamaná echanjoquéda y canÿe šešona boyabásetema bochántseboamna, y cha mochanjuabaye Emanuel ca.

(Emanuel endayana “Bëngbe Bëtsá bëngaftaca ca”).

²⁴ José chë otjénayentsana tojanofšená ora, tojanma ntšamo chë Bëngbe Bëtsabe ángel tbojanmandacá y Mariáftaca tojanobouamá.

²⁵ Pero ndoñe cánÿiñe ibontsaníyena, sinó nÿe chë šešonatema tojanonÿná orscana. Chë šešonatema tojanonÿná orna, José chábioye Jesús ca tbojanabaye.

2

Reyes Magos Jesúsbioye tmojána

¹ Herodes judiëngbe rey yojamna ora, canÿe pueblo Judeoca, Belén ca uabáinentše Jesús tojanonÿná. Chentsana, báseftanga, estrellënga uatsjëndayënga, magos ca uabáinënga, canÿe bëts puebloye Jerusalén ca uabáinoye tmojánashjajna. Chënga tmojánabo shinÿe bocanoye luarëngocana.

² Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnana tojonÿná cha ca? Bëngbe luarëngoca shinÿe bocanoye chabe onÿnana estrella fsënjinÿe y as muentše cha jaboadórama tifjabo ca.”

³ Rey Herodes chca tojanuena ora, corente yojtsenócochinÿena, y nÿetsca chë Jerusalenentše oyenëngnaca.

⁴ Chentsana chë rey tojánachembo nÿetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama.

Měntsá tojanatjá: —¿Ndayentse chë Běngbe Bětsabe Uámana Uabuayaná, chë Cristo ca uabainá, jónýnama ibomna ca?

⁵ Chěnga tmojanjuá: —Judeoca, Belén pueblentse ca. Bayté entsemna chë Běngbe Bětsabe juabna oyebuambnayá Miqueas mēntsá tojanábema:

⁶ Y tšěngaftanga, Judeoca Belenentse oyeněnga, canýe mandayá tšěngaftangbentšana echanjabo.

Cha nýetsca chë Judeoca mándayěngbiana más uamaná echántsemna, y atšbe entšanga Israeloca echántsanýena.

Chýyeca tšěngaftangbe pueblo ndoñe nýe batsá uámana pueblo quenátsměna ca. ⁷ Chora Herodes iytěcana chë maguěnga tojánachembo y cuedádoca tojanatjá ntseco ora chë estrella tmojáninýama.

⁸ Herodes chë soyěnga yojtsetátšěmbo ora, Belenoye chë maguěnga tojanichamó, y mēntsá tojaněyana: “Choye motsajna y tšabá chë šešona šmochjanguango. Chašmójnýena ora, šmochjaběuenaye, as átšnaca chay-obená jama chë šešona jadórana ca.”

⁹ Rey Herodes chë soyěnga tojáněyanentšana, chë maguěnga tmojtsatanoñe. Chora cachiñe tmojtaninýe chë chěngbe luarěngoca tmojáninýe estrella y yojtsanebnatsana chë šešona yojtsemněntscoñe. Chentša juatsbuacá chë estrella yojójajiyi.

¹⁰ Chë maguěnga chë estrella tmojáninýe orna, corente oyejuayěnga imojtsemna.

¹¹ Chë yebnoye tmojánamashjna ora, chë šešona tmojáninýe chabe mamá Mariaftaca. Chorna, tmojanoshamentšé y chë šešonatema tmojanadorá. Chora chěngbe cajontéměnga tmojanětsēcaca y tmojanatštá castellano, incienso y canýe botamana uanguětšě soye, mirra ca uabáiniye.

¹² Chentšana, mo canýe otjenayoquécá Běngbe Bětsá chë maguěnga tojanabuayena rey Herodesbiajana ndoñe chamondeshěcuanama. As chěnga chentšana inýe benachějana cachěngbe luarěngoye tmojěsanshěcuana.

Egiptó luaroye tmojtsanachá

¹³ Chë maguěnga tmojtsatanoñe ora, otjénayoca José canýe Běngbe Bětsabe ángelbioye tbojáninýe y cha mēntsá tbojanianyana: “Motsbaná, chë šešonatema y chabe mamá mesěbiatše y Egiptoye motsachá. Herodes chë šešonatema bochanjanguango jtsóbama, chýyeca choca cochtsoquedañe atše chacochjábuaenantscuana ca.”

¹⁴ As José tojantsbaná, chë šešonatema y chabe mamá tojesaněbiatše y ibeta Egiptó benache tojěftsanbocna.

¹⁵ Y choca imojtsanomñe Herodes tojanóbaněntscuana. Chca tojanopasá, cachcá chaotsemnama ntšamo Běngbe Bětsá chabe juabna oyebuambnayabijana tojanayancá. Chë oyebuambnayá mēntsá tojánayana: “Egiptocana atšbe uaquiñá sěnjanchembo ca.”

Herodes tojanmandá basetéměnga jtsěbáyama

¹⁶ Chë maguěnga tmojtsanিংñema Herodes tojántatšěmbona ora, puerte tbojánetna, y tojanmandá lempe jtsěbáyama base boyabaseteměnga uta uata bomněnga y cabá uta uata ndbomněnga, Belén y chë juachañe pueblěnguentšěnga. Uta uatama cha tojanjuabó, er uta uata yojtsemna chë maguěnga chë estrella tmojáninýama.

¹⁷ Ntšamo chë Běngbe Bětsabe juabna oyebuambnayá Jeremías tojanoyebuambacá, cachcá tojanochněngo:

¹⁸ Ramá ca uabaina pueblentše canÿe oyebuambnayana tmojanuena, ngménaca ošachiyana y becá tsetšanánaca oyebuambnayana. Raquel yojamna chabe básengbiama ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

¹⁹ José cabá Egiptoca yojtsomñe ora, Herodes tojanóbana. Chentšana, otjénayoca José canÿe Bëngbe Bëtsabe ángelbioye tbojáninÿe y cha mëntšá tbojaniyana:

²⁰ “Motsbaná, chë šešonatema y chabe mamá mesébiatše y Israeloye cochtá. Chë šešonatema jóbama bošënga ya obanënga montsemna ca.”

²¹ As José tojantsbaná y chë šešonatema y chabe mamá Israel luaroye tojtésanébiatše.

²² Arquelao Judeoca yojanmánda chabe taitá Heródesbe cuentiñe, y José chca tojántatsëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána.

²³ Choye tojánashjango ora, José tojána canÿe pueblo Nazaret ca uabáinoye chentše joyénanama. Chca tojanochñëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

3

Juan chë Ubayaná entšanga yojanabuayiyná (Mc 1.1-8; Lc 3.1-9, 15-17; Jn 1.19-28)

¹ Chë tempo, Juan chë Ubayaná, entšanga ndoyena luaroye Judeoca tojánbocna, Bëngbe Bëtsabe soyëngama jábuayenama.

² Mëntšá cha yojanëtsëtsnaye: “Bëngbe Bëtsabe amëndayana ya echanjóshjango. Ngménaca šmochtenójuaboje tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canÿa ndabiamá chë Bëngbe Bëtsabe juabna oyebuambnayá Isaías mëntšá tojánayana:

Entšanga ndoyena luaroca canÿa enduáyebuache:

“Bëngbe Utabná echanjabo ca;

mo nda canÿe benache tojtseprontacá canÿe uámana entšá jashjanguama, tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” —cha tojánayana.

⁴ Juanbe entšáyá inauapormana camellbe stjënashëca y bobache yojanasnana. Cha inasaye chapulinatémënga y tjoca tjouangbe méloye.

⁵ Jerusalenoca entšanga, nÿetsca Judea luarentša entšanga y chë Jordán ca uabaina béjaye béconana oyenënga imojánbocana Juan joyeunayama.

⁶ Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

⁷ Pero Juan tojáninÿe ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanëyana: “¡Mëtscuaye entšanga! ¿Nda tcmënjáyana chë echanjóshjango uabouana castigüentsána šmochjotsbocá ca?

8 Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtsajbanama.

9 Y ndoñe šmattsejuabnaye cach tšëngaftangbiamá jayanama: ‘Abrahámbentsána entsánga fsëndmëna ca’. Er atše šcuayana, Bëngbe Bëtsá quem ndëtsbëngacnaca Abrahámbentsána entsánga nanjábiamá.

10 Chë tatsnía ya entsaprontana chë betiyeshënga tbëtëjëngocana jtse-shatëtsetsama. Ndaye betiye ndoñe tontseshajo, jtseshatëtšana y iñoye jt-satmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

11 “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamá máš obenana bomná comna, y atše merecido taitsatobuajoñe ni mo chabe shecochëtjonëshe jtsámabñama. Chë chabe benache aifñe chamojtishachëngbiamá Bëngbe Bëtsá echanjama chë echanjabábeyeca, chë Uámána Espíritu chëngbe ainaniñe cháuamashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnna, mo iñeshequécá.

12 Canýe entsá chabe mëtštá cucuatšíñe jiyëbana, chabe trigo jtsóbobemana y chë ndoserverna shácuanënga jtsejashtsëtsana. Chabe trigo chë grano uaquëcjnaye tsañe jtsabuájuana, y chë ndoserverna shácuanëngna iñoye jt-satmetšana. Cachcá, chë atšbe ústonoye echanjabana, chë tšabe entsánga echanjúbuaja, y chë bacna entsánga canýe iñeshiñe echantsacastigaye, y chë iñe ndocna te queochátsfsana ca” —cha tojanëyana.

Juan, Jesúsbiyoe tbojanabaye

(Mc 1.9-11; Lc 3.21-22)

13 As Jesús, Galileocana tojána Jordán béjayoye, Juan yojtsemnoye, cha chabuábayama.

14 Pero Juan ndoñe yontseboše Jesús juabáyama, y mëntšá tbojanianyana: —Atše šontsemna aca chašcuabayey, y ¿más atše aca cbochjuabayey ca?

15 Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan vojouena Jesús juabáyama.

16 Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontješiyey y tojáninýe chë celoca atëfñiñey y chë Uámána Espíritu mo canýe palomatemcá chábiyoye yojtsastajuana.

17 Chora celocana Bëngbe Bëtsá mëntšá tojánayana: “Mua atšbe bonshana uaquiná endmëna. Chabiamá corente sëntsoyejuá ca.”

4

Jesús tojanobená Satanás jayëñjanama

(Mc 1.12-13; Lc 4.1-13)

1 Chentšana chë Uámána Espíritu entsánga ndoyena luaroye Jesús tbojanánatse, as Satanás chauábama cha jisháchichiyama.

2 Chentšey canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëtsena.

3 As Satanás tbojanobëbeconá y tbojanianyana: —Aca ndegombre Bëngbe Bëtsabe Uaquiná tcomnëse, momandá quem ndëtsbënga tandëse chaobiama ca.

⁴ Pero Jesús tbojanjuá: —Bëngbe Bëtsabe uabemana palabrénguiñe mëntšá endayana: “Entšá nÿe tandëseca ndoñe vida ntsebmmana, sinó entšá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

⁵ Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá.

⁶ Chentše Satanás mëntšá tbojaniana: —Aca ndegombre Bëngbe Bëtsabe Uaquiñá tcomñese, muentšana fshantsoye montsénja, er Bëngbe Bëtsabe uabemana palabrénguiñe endayana:

Bëngbe Bëtsá chabe angelënga echanjichamuá, chacmotsinÿenama.

Chënga buacuatšëngaca cmochanjishache, shecuatše ndëtšbeñe ndocá chacodomama ca —cha tbojaniana.

⁷ Chora Jesús tbojanjuá: —Cach Bëngbe Bëtsabe uabemana palabrénguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

⁸ Cabana, Satanás tbojanánatse canÿe bëts tjoye y betesco nÿetsca quem luarentša amëndayëngbenache y chentša nÿetsca uámana soyënga Jesúsbioye tbojaninÿinÿé.

⁹ As Satanás tbojaniana: —Aca chacojoshëntsamentšé y chašcojadorase, lempe chë soyënga cbochjatštaye ca.

¹⁰ Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrénguiñe mëntšá endayana: “Bëngbe Bëtsá cochtsadorana y nÿe cha cochtseservena ca.”

¹¹ As Satanás cachcá tbojanonÿá. Cachora Bëngbe Bëtsábiocana angelotëmënga tmojánabo Jesús jtseservënama.

Jesús tojanontšé Galileoca chabe trabajo jamana
(Mc 1.14-15; Lc 4.14-15)

¹² Juan chë Ubayaná cárceloye tmojanëtámiaama Jesús tojanuena ora, Galilea luaroye cha tojtaná.

¹³ Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyéanama, chë uámana bëts taitata Zabulón y Neftalibe luariñe.

¹⁴ Chca tojanochnëngo, cachcá chaotsemnana ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

¹⁵ Zabulón y Neftalibe luare, Jordán bėjaye chenguánoica, uafjajónaye tsachañe;

Galilea luariñe, ndoñe judío entšanga oyenentše.

¹⁶ Chë mo ibetiñe cuafsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábioye nduabuatmëngbiama,

y chë causa chabiama imomma mo obanëngcá, ndoñe binÿniñe jtsiyenëse ca —cha tojanábema.

¹⁷ Cach orscana Jesús tojanontšé entšanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuas-tama

(Mc 1.16-20; Lc 5.1-11)

¹⁸ Canÿe te, Jesús chë Galilea uafjajónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiešhangá ibnetsashbuétsetšaife, er beonga ashebuánayata ibnamna.

¹⁹ Jesús tojanëyana: “Atšeftaca mabata; atše cbochanjábiamna Bëngbe Bëtsabiamna entsanga anguayata, y morscana nÿe beonga ashebuánayata ya ndoñe quešochátsmëna ca.”

²⁰ Cachora chatbe atarraiešhangá cachcá tbojésanaboshjuana y Jesús tmojanasto.

²¹ Y más chcoye, Jesús inÿe uta catsátata tojánanÿe: Santiago y Juan, chë Zebedeobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiešhangá atapórmayifne. Jesús tojánachembo,

²² y cachora chë barquësha tbojésanaboshjona, chë taitá cachentše imojéseboshjona y Jesús tmojanasto.

Jesús ba entsanga yojanabuatambá y yojánashnaye

(Lc 6.17-19)

²³ Jesús nÿets Galilea luarëjana yojánana, chentše judiëngbe enefjuana yebnënguenache abuátambaye. Chë tsabe noticiënga Bëngbe Bëtsabe amëndayama entsanga yojanabuayiyiná y nÿetsca šocanëngama y tsetšanëngama yojánashnaye.

²⁴ Nÿets Siria luarëjana entsanga cha imojtsebáyana. As entsanga nÿetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nÿetscanga yojánashnaye.

²⁵ Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanocana Jesús imojústona.

5

Ndayá Jesús tjoca tojanabuatambá

¹ Jesús chë mallajta entsanga tojánanÿe ora, batsjoye tojántsjua y tojanótbema. Chabe ústonënga tmojanobobeconá y

² Jesús tojanontsé mëntšá jabuátambana:

Ndëmuanÿenga imomna chë ndegombre oyejuayana bomnënga

(Lc 6.20-23)

³ “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsanga mochántsemna chë Bëngbe Bëtsabe amëndayoca mochtsiyenënga.

⁴ “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngmënaca ndoñe chamondëtsemnama.

⁵ “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjóyëngacñe.

⁶ “Puerte oyejuayënga mochántsemna chë nÿetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe

bošancá. Chë nyetsca soyënguïñe tšabá jamama bošënga mochanjobenaye jëftsinÿana lempe ntšamo tmojtsebošcá.

7 “Puerte oyejuayënga mochántsemna chë ínÿengbiamá ongmiaÿënga, er Bëngbe Bëtsá chëngbiamá bochanjóngmia.

8 “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

9 “Puerte oyejuayënga mochántsemna chë nyetscanga natjëmbana chamot-siyenama amënga, er chënga Bëngbe Bëtsabe básënga ca mochantsabaina.

10 “Puerte oyejuayënga mochántsemna chë ínÿënga tmojama chamot-sesufrinënga, ntšamo Bëngbe Bëtsá yobošcá bëtsamama; chca entšanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entšanga chacmojoyánguango y chacmojtšëcamena ora y nyetscna soyëngaca chacmojtšëbuayatsenaye ora, atšbe ústonënga bëtsemnama.

12 Móyejuanga, puerte móyejuanga, tšëngaftanga celoca becá šmochanjóÿëngacñe. Er ntšamo entšanga tšëngaftanga cmëcamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjaniyëngbioye entšanga monjanëcamena ca” —Jesús tojánayana.

Ošbuáchiÿënga jtsemnana mo tamocá y binÿnayënga quem luarentša entšangbiamá

(Mc 9.50; Lc 14.34-35)

13 “Tšëngaftanga, quem luarentša entšanga jtsëjabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiamá šmochántsemna mo chë mëntšëna ndoñe chaondónbëmama tcojatboto tamocá. Pero chë tamó fténana tojtsóbëmëse, ndoñe ntsopodénana tempcá sanana cachiñe jtëtmënanana. Chca, ya tondayama ntsoservénana; chíyeca chë tamó tsáshenoye jtsëtšënanana y entšanga jtsebotájayana.

14 “Tšëngaftanga, ntšamo tšabá yomncá šmojtsiyenëse, as quem luarentša entšangbiamá šmochántsemna mo chë ibetiñe tojtsebínÿna soycá. Canÿe bëts pueblo batsjo juatsbuañe tomnëse, ndoñe ntsopodénana iytëmencá jtsemnama.

15 Canÿe uajuinÿanësha tcojuajuinÿëna ora, ndoñe cajonëshe tajsoye jtsabuájuama, sinó tšbanánoca juajájuama, chca, nyetsca entšanga chë yebnentše tmojtsemnëngbiamá chaotsebínÿnama.

16 Cachcá tšëngaftanga, entšangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bëtsemnama ca” —Jesús tojánayana.

Chë Moisesbe leyama Jesús tojanabuatambá

17 “Ndoñe šmattsejuabnaye, ntšamo Moisesbe leyinÿe iuayancá y chë Bëngbe Bëtsabe juabna oyebuambnayënga tmojanayancá jabëtsepochocama atše tijabo ca. Atše ndoñe chiýatabo chë soyënga jabëtsepochocama, sinó jabábuayenama ndayá chë soyënga ndegombre bëtsayanama.

18 Ndegombre šcuayana: Celoca y quem luare chaojëftsemnëntscuana, ndocná queochatobenaye ni canÿe punto, ni canÿe letra chë leyënguentšana jtsejuánana, lempe ntšamo jochnënguama yomncá chaojtsemnëntscuana.

¹⁹ Chíyeca, nda n̄ye mo can̄ye mando ch̄e leȳenguĩñe ndoñe tonjoyeuná cha, masque n̄ye base soye ch̄e mando tojtsemna, y ch̄e in̄yenga cachcá tojtsabu-atambá, cha B̄engbe B̄etsabe am̄endayoca ch̄e más nduamaná echántsemna. Pero nd̄emuan̄yenga tmojtsama nt̄samo B̄engbe B̄etsá tojam̄endacá y ch̄e in̄yenga cachcá chamotsamama tmojtsabuátambase, ch̄enga B̄engbe B̄etsabe am̄endayoca uáman̄enga mochántsemna.

²⁰ Ch̄e soȳengamma m̄entsá šcuayana: Ts̄engaftanga ch̄e leȳ abuatambaȳenga y fariseúngbioye ndoñe šmotsaȳenjanase, jtsamama nt̄samo B̄engbe B̄etsá tcmojam̄endacá, ndocna te B̄engbe B̄etsabe am̄endayoye quešmochátamashjna.

Ndayá ch̄e in̄yengaftaca tbojetnama Jesús tojanabuatambá

²¹ “Ts̄engaftanga šmojouena nt̄samo B̄engbe B̄etsá ts̄engaftangbe b̄ets taitanga tojanam̄endacá: ‘Ndoñe catj̄oba ca. Chca ochjajnayá bontsemna jobuambayana ch̄e ent̄šangbiama t̄šabá o ndoñe t̄šabá tmonjamama endbayanabe delante, ndáyeca chca ca.’

²² Pero at̄se šcuayana, nda cachabe cat̄šaftaca tbojetna, chánaca bontsemna jobuambayana ch̄e ent̄šangbiama t̄šabá o ndoñe t̄šabá tmonjamama endbayanabe delante, ndáyeca chca ca. Nda cachabe cat̄šatbioye puerte tbojtsáboȳenja, cha bontsemna ch̄e Sanedrín ca uabaina mándaȳengbe delante jobuambayana ndáyeca chca ca; y nda cachabe cat̄šatbiama opjema ca tojayana, nt̄samo cha b̄etsamama, cha bontsemna ch̄e infernoca iñeshoye jama.

²³ “Chíyeca, nderado ndayá B̄engbe B̄etsabe b̄ets yebnoye tcojuamba B̄engbe B̄etsá j̄etschuayama y chora tcojenojuabó acbe cat̄šata ácaftaca etonaná yojtsemna ca.

²⁴ as ch̄e tcojiȳebo soye ch̄e altarent̄ša natsanoica cochj̄eseboshjona, cochtá y acbe cat̄šaftaca cochtenoyántsia. Chent̄šana cocayé altaroye cochjá y ch̄e tcojuamba sóyeca B̄engbe B̄etsá cochj̄etschuaye.

²⁵ “Nderado nda tcmojademanda y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, ch̄e demandayá mandádbioye cmochanjúshjango, ch̄e mandado josticīengbe cucuat̄šine cmochanjábohjna y ch̄enga cárceloye cmochanjutame.

²⁶ Ndegombre ch̄eyana: Chent̄šana ndoñe quecocht̄etsbocna lempe candesopagantscuana ca” —Jesús tojánayana.

Ch̄e boyá o sh̄embioye in̄yaftaca in̄gñayama Jesús tojanabuatambá

²⁷ “Ts̄engaftanga šmojouena nt̄samo B̄engbe B̄etsá tojanmandacá: ‘Acbe boyá o acbe sh̄embioye in̄yaftaca ndoñe catj̄aingña.’

²⁸ Pero at̄se ch̄eyana: Nderado can̄ye boyabása nd̄emuan̄ye shembásabioye tbojin̄ye y tojajuabó ‘malaye cha ca’, ch̄e boyabása chca tojajuabose, ainanoca ya ch̄e in̄ye shembásaftaca cachabe sh̄embioye tbojtseingñe.

²⁹ “Chíyeca, nderado acbe cat̄šbioica bomín̄yeca bacna soye tcojin̄ye y cachca soye tcojam̄ese, más t̄šabá nántsemna ch̄e bomín̄ye cochtsenobuchjats̄eca y cochts̄ets̄ena. N̄yets cuerpo jtsebomnana y l̄empeca infernoye jama chacmots̄ets̄enamna, acbiama más t̄šabá nántsemna n̄ye can̄ye soye acbe cuerp̄ts̄ana chacoperd̄e.

³⁰ Nderado acbe cat̄šbioica cucuat̄seca bacna soye tcojam̄ese, más t̄šabá nántsemna ch̄e cucuat̄se cochts̄enástjango y cochts̄ets̄ena. N̄yets cuerpo jtsebomnana y l̄empeca infernoye chacmots̄ets̄enamna, acbiama más t̄šabá

nántsemna nÿe canÿe soye acbe cuerpentšana chacoperdé ca” —Jesús tojánayana.

Chë bouamnata enëtšana Jesús tojanabuatambá
(Mt 19.9; Mc 10.11-12; Lc 16.18)

³¹ “Mëntšana leyíne enduábemana: ‘Ndëmuanÿe boyá chabe shémaftaca tbojtsenëtšana, chë boyá bontsemna chabe shema canÿe tsbuanácha juiyiyana, ndayëchañe chaotsayana cha ya ndoñe chabe shema yontsemna ca.’

³² Pero atše cbëyana: Nda chabe shémaftaca tbojtsenëtšana y chca tojopasá ndoñe chë shema ínÿaftaca tbontseingñe causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë ütšana shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

Chë entsanga júrayama Jesús tojanabuatambá

³³ “Tsëngaftanga šmojouena ntšamo tsëngaftangbe bëtš taitángbiyoe tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’

³⁴ Pero atše cbëyana: Todayama šmattsejúraye; ni celocama, er choca Bëngbe Bëtsabe tbemaniñe endmëna.

³⁵ Ni quem luarama, er Bëngbe Bëtsabíama mo tšenëtemcá endmëna, chiñe chabe shecuatsënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëtš pueblo.

³⁶ Ni tsëngaftangbe bestšašama cach ndoñe, er tsëngaftanga ndoñe quešmátobena ni mo canÿe stjënashé ftsenguëshe o fjantsëshe jabemana.

³⁷ Tsëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe. Ndayá chentšana más šmojatichamo soye, Satañásbiocana jtsóbocanana ca” —Jesús tojánayana.

Chë entsanga mondbátenachnënguama Jesús tojanabuatambá
(Lc 6.29-30)

³⁸ “Tsëngaftanga šmojouena ntšamo tsëngaftangbe bëtš taitángbiyoe tmojanëyancá: ‘Nderado nda tcmojtsebuchjatsëca, ácnaca derecho contsebomna canÿebé cha jëtsbuchjatsëcama ca; y nderado nda canÿe juatsaše tcmojtsásiye, ácnaca derecho contsebomna cánÿëse cha jtašiyama ca.’

³⁹ Pero atše cbëyana: Ndoñe matsbošana chë ndayánaca tcmojaborlábíoye jtachnënguama; chamna, ndánaca catšbioica tcmojajuebjäntšetase, cochjomíyie chë ínÿoica cachcá chacmomama.

⁴⁰ Nderado nda tcmojademandá y tojtseboše acbe shabuanguañjua jtsabocñama, cha molesenciá acbe quëfsaíanaca chauetsácñama.

⁴¹ Nderado nda tcmojuasamá y tcmojamandá bnëtsana cuadroca juyambama, inÿe bnëtsana cuadro cochjuyamba.

⁴² Nda ndaye soye tcmojotjañëse, cochjatštaye; y nda ndaye soye tcmojuatjase, cha ndoñe stëtšoye catjaquëda ca” —Jesús tojánayana.

Chë uayayëngbíama bonshánana jtsebomnana
(Lc 6.27-28, 32-36)

⁴³ “Tsëngaftanga šmojouena ntšamo tsëngaftangbe bëtš taitángbiyoe tmojanëyancá: ‘Acbe amigo cochtsebobonshana y acbe uayayá cochtsaboyënja ca.’

⁴⁴ Pero atše chëyana: Tšëngaftangbe uayayënga šmochtsababuánÿeshana, y chë cmécamenëngbiam Bëngbe Bëtsá šmochtseimpadana.

⁴⁵ Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entsángbeñe chabe shinÿe chaotsebinÿnayama, y endbëtsama chë nÿetsca soyënguñe tšabá jamana bošënga y ndoñe chca entsángbeñe chauaftema.

⁴⁶ Tšëngaftanga nÿe chë tšëngaftanga tcmojtsababuánÿeshanënga šmojttsababuánÿeshanëse, ¿Bëngbe Bëtsábíocana ndayá šmochjuacaná? Romocama crocénana entsángbioye atjanayëngnaca chca monduamana.

⁴⁷ Y nÿe chë amiguëngbioye šmojttsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama.

⁴⁸ Tšëngaftangbe Taitá, Bëngbe Bëtsá celoca endmëná, nÿetsca tšabe soyënga bomná y amá endmëna. Tšëngaftángnaca cachá šmochtsemna ca” —Jesús tojánayana.

6

Jesús tojanabuatambá ntsamo tšabe soyënga ínÿengbiam jamana

¹ “Cuedado šmochtsebomna ndoñe ntsamama entsángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtëtátšataye.

² “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nÿetscanga chamotsetatšëmbuama, mo canÿe trompetëfjua cuafstajätëtanca, chë caridá šmojábemama chaotsótatšëmbuama; chca monduamana chë bacna entsanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenãñe. Ndegombre chëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tšabá chëngbiam tmojtsoyebuambná ora.

³ Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama,

⁴ chca, acbe caridá iytëcana chaotsemnama. As, tšëngaftangbe Taitá, nda bominÿe endbëtsequëcnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

Jesús tojanabuatambá ntsamo Bëngbe Bëtsáftaca jencuëntana

(Lc 11.2-4)

⁵ “Bëngbe Bëtsáftaca šmojttsencuënta ora, ndoñe šmattsama chë bacna entsanga ntšamo ndegombre tmojuabnacá ndinÿinÿayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuëntayana, chca, nÿe entsanga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtsama ca entsanga tmojayana ora.

⁶ Pero aca Bëngbe Bëtsáftaca jencuëntama orna, acbe tsoye cochtamáshëngo, bëšása cochtatame y cháftaca cochjencuënta. Chánaca chë iytëmentse ácaftaca echántsemna. Bëngbe Taitá lempe bominÿe endetsequëcná, masque cánÿenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuënta ora, cachá acbe uacanana soye cmochántatštaye.

7 “Bëngbe Bëtsáftaca šmojtseñcuénta ora, ndoñe ñje cachcá ndoservena palabrenga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana beca chca tmojtsichámësa, Bëngbe Bëtsá chënga más yochjóyaunaye ca.

8 Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá.

9 Chamna tšëngaftanga mëntšá cmontsëtocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

10 Acbe amëndayana chaóshjango.

Celoca yojtsemna ntšamo icobošcá;

quem luariñnaca cachcá chaotsemna.

11 Mënté šmiyatšatá cada te šnetsëjaboto tandëse.

12 Bacna soyënga bënga fsënjama: šmotsaperdónaye;

cachcá ntšamo chë bëngbiama bacna soyënga amënga fsëndbetsaperdonaycá.

13 Bacna soyënga jamama šojocochëngo ora, šcochjufabuache chca ndenobuiyama.

Nyetsca bacna soyënguentšana šmatsebacaye.

14 “Chë tšëngaftangbiama bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye.

15 Pero chë tšëngaftangbiama bacna soyënga amënga ndoñe šmotsaperdónasna, Bëngbe Taitá cachcá, tšëngaftanga ndoñe quemochátaperdonaye ca” —Jesús tojánayana.

Chë Bëngbe Bëtsáftaca jencuéntama tondaye ntjascá

16 “Y nderado tšëngaftanga inye ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entšanga chë ndegombre tmojuabnacá ndinýinýnayënga mondbetsamcá, as chca, chënga imojtsayúnama entšanga chamuinýama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiama tmojtsoyebuambná ora.

17 Aca nderado tcojtsayúna ora, cochtsojuejbabebye y aceitíyeca botamana cochtenochquëca,

18 as chca, entšanga ndoñe chamondëtsetatšëmbo aca tondaye ntjascá cojtsemna. Nye acbe Taitá, lempe chë mo iytëmencá yomna soyëngama tatšëmbuá, chama echántsetatšëmbo. Y cha, chë iytëmencá tcojama soye bominye endbetsequëcñayá, acbe uacanana soye cmochántatštaye ca” —Jesús tojánayana.

Chë celoca bomnana (Lc 12.33-34)

19 “Bomnana quem luarentse ndoñe šmattsëjuabaye. Muentšna chë mejojón y inye pochócaye soyënga lempe jtseñdbiamana, chë atbëbanënga jtšamashjnana y chë juabana soyënga jesatbëbana.

20 Más tšabá tšëngaftangbiama entsemna, mora quem luarentse tšabe soyënga šmojtsamagna, uacanana soyënga celoca chaotsójuabaye. Chentše ni chë mejojón, ni chë inye pochócaye soyënga acbe soyënga quemochatpochóca, ni atbëbanënga quemochátamashjna jatbëbama.

21 Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

Chë cuerpama uajuinÿanëshsa
(Lc 11.34-36)

22-23 “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsoobenana ntšamo tcojtsamcá chë bominÿeca jtsonÿayana. Chë bominÿe ndoñe tšabá tontsemnësna, chë bominÿe tondaye ntsoobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

Chë Bëngbe Bëtsabiana bonshánana o chë nÿe quem luarentša soyënga jtsebošana
(Lc 16.13)

24 “Ndocná ntsoobenana uta mandayata jtsaservénana: cánÿabioye bochantsáboÿenja y chë ínÿabioyna bochántsebobonshana, o cánÿabiana tšabá echántsetrabajaye y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnana yapa tcojtsebošëse ca” —Jesús tojánayana.

Bëngbe Bëtsá chabe básenga jtsanÿenana
(Lc 12.22-31)

25 “Chcasna atše šcuayana: Ndoñe šmattsenócochinÿena ndayá šmochjase o šmochjofšiye vida jtsebomnana, ni ndaye entšayá šmochjuichëtjuama cach ndoñe. Ndegombre, vida chë sanama más enduámama y cuerpo chë entšayama más.

26 Šmochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnat-squëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšetëmëngbiana puerte más šmonduámama!

27 Masque chca endmëna, canÿa masque tša tojtsenócochinÿena, ¿ntšamo nanjobenaye jamana chë ntsachetsá vida yochtsebomnentšana, canÿe hora vida más jabotiyana?

28 “Y ndayá šmochjuichëtjuama, ¿ndáyeca šmojtsenócochinÿena? Šmochjinÿe chë jajañe lirio uantšëfjushangá jtsajuajnana: ndoñe ntsetrabájayana, ni ntseshabiamnayana.

29 Pero atše chëyana, ndegombre ni mo Rey Salomón nÿetsca chabe bomnánaca nÿetsá botamana mo chë lirio uantšëfjushangacá quenjat-spormana.

30 Bëngbe Bëtsá tša botamana shácuana tojuama, y chë shácuana mënté jajoca jtsamnana, yéfsana iñoca. Chca chë shácuana cha tojamëse, ndegombre tšëngaftangiámnaca Bëngbe Bëtsá echanjana entšayá chašmotsábomnana, jentšanga nÿe batsá Bëngbe Bëtsábeñe ošbuáchiyënga!

31 Ndoñe šmattsenócochinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofšiye?’ o ‘¿Ndayá mochtichëtjo ca?’

32 Chë soyëngama, chë Bëngbe Bëtsábioye nduabuátmënga mondbétsenocochinýena, pero tsëngaftanga ndoñe. Tsëngaftangbe Taitá, Bëngbe Bëtsá, ndayá cmojtsëjajotama endétatsëmbo.

33 Chíyeca, tsëngaftangna natsana smochjshétseboše Bëngbe Bëtsá tsëngaftangbe ainaniñe chaotsemándama y lempe ntšamo cha tojamandacá smochtsama. Chca šmojamëse, Bëngbe Bëtsá lempe ntšamo cmojtsëjajotcá cmochanjátataye.

34 Ndoñe matenócochinýenana ndayá yëfse yochjochnënguama. Yëfse luare cochántsebomma chë soyënga jinýama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

7

Ndoñe ntsichámuana chë ínýenga tsabá o ndoñe tsabá tmonjamama (Lc 6.37-38, 41-42)

1 “Ndocá ínýengbiamá smattsichamo chë ndoñe tsabá tmonsamama. Chca, Bëngbe Bëtsá ndoñe queochátichamo tsëngaftanga ndoñe tsabá smonjama ca.

2 Chë ntšamo tsëngaftanga ínýengbiamá smojtsichamcá tsabá o ndoñe tsabá tmonsamama, cachcá Bëngbe Bëtsá tsëngaftangbiamá chë ntšamo šmojamama echántsichamo. Y ntšamo ínýengbioye chašmojábiama, uabouana o ndoñe jabuache soyënga, cachcá Bëngbe Bëtsá tsëngaftangbioye cmochanjábiamá.

3-5 “Nderado canya chabe bominiñe canye niñëfja tojtsebomñese, cha ndoñe ntsobenana chabe catšata jauyanama: ‘Acbe bominiñentsana canye polvështema jtsebuchjatsëcama šmolesenciá ca’. Natsana cha bontsemna cachabe bominiñentsana chë niñëfja jtse nobuchjatsëcana tsabá jinýama jobenayama, chabe catšatbe bominiñentsana polvështema jtsebuchjatsëcama. Cachcá entsemna acbiamá, ¡bacna entsá chë ntšamo ndegombre tcojuabnacá nd-inýinýayál, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenouaboycá; y chca, aca jamana canye bacna soye. Natsana cmontsemna chë cach aca ndoñe tsabe soyënga cojtsamama ngmënaca jshatenójuaboyana y chca amana jtsajbanana, y chentsana cocayé cochantsobena acbe catšata juajabuáchana ntšamo tsabá yomncá chaotsamama.

6 “Chë Bëngbe Bëtsabe soyëngama josértama ndëboše entsanga ndoñe smattsabuayiyayae. Aíñese nántsemna mo chë Bëngbe Bëtsabe bëts yebnoca uátsëmbona mëntsena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtëmënga cotšëngbioye cuaftsëtsancá, chënga nýe jtsebotájayana ca” —Jesús tojánayana.

Smochjotjañe, smochjáanguo y smochjachembo (Lc 11.9-13; 6.31)

7 “Smochjotjañe y Bëngbe Bëtsá cmochanjátataye; smochjáanguo y smochanjinýena; smochjachembo y bësáša cmochanjëbëtafjo.

8 Er ndánaca tojtsotjanañá, jóyëngacñana; y nda tojtsenguá cha, jónýenana; y nda tojtsechembuanábioye jebiatëfjuana.

9 “¿Ndëmuanyë boyabása tsëngaftanguentsá, canye tandëse chabe uaquiniá tbojtsotjanañe ora, canye ndëtsbé chábioye buanjatštaye?

10 ¿O canye mëtscuaye buanjatštaye, beona tbojtsotjanañe ora?

11 Y chca, tsëngaftanga, bacna soye amënga, tsëngaftangbe basetëmënga tsäbe soyënga jatšatayama šmojtsamanëse, imás tsëngaftangbe Taitá, Bëngbe Bëtsá celoca endmëná, chë tmojtsotjanañënga tsäbe soyënga echanjátšataye!

12 “Inyëngaftaca šmochtsama ntšamo chë inyënga tsëngaftangftaca chamot-samama šmojtsebošcá. Chca endmëna ntšamo Moisesbe leyinë y chë Bëngbe Bëtsäbe juabna oyebuambnayëngbe buatëmbana soyënguïñe endayancá ca” — Jesús tojánayana.

Chë base utëntsä bësásä

(Lc 13.24)

13 “Chë base utëntsä bësásäjana šmochjámashjna. Chë utëntsä bësásäjana y chë paselo jóyënama benache, infierno y cmochanjuánatse y banga chëjana mondámashjuana.

14 Chë tsäbe vida binyño y jamna base utëntsä bësásäjana endmëna y ndoñe paselo jóyënama benache, y chiñe báseftanga mondbínýena.

Chë Bëngbe Bëtsäbe ndoñe ndegombre juabna oyebuambnayënga

(Lc 6.43-44)

15 “Cuedado šmochtsebozna chë Bëngbe Bëtsäbe ndoñe ndegombre juabna oyebuambnayëngbiama. Chëngna mo oveshëngcá tsëngaftangbiöye mochan-jabo, pero ndegombre chënga mondmëna mo tsátjaye tjañe quešëngcá.

16 Tsëngaftanga betiyënga jtsabuatmana ntšamo cada ona tojtseshajcá; cachcá tsëngaftanga chcanga šmochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátäbebiama, ni higuëbé cardo betiyentsana.

17 Chca, nyetsca tsäbe betiyiñe tsäbe soye jashájonana; y chë ndoñe tsäbeshiñna podësca soye.

18 Canyë tsäbe betiyiñe quenátopodena podësca soyënga jashájonana, ni canyë ndoñe tsäbe betiyiñe tsäbe soyënga jashájonana.

19 Ndaye betiyë podësca shajuanëshe jtseshatëtšana y iño y jtsatmetšana.

20 As chca tsëngaftanga chënga šmochantsëbuatma, ndayá chënga mochtsamama ca” — Jesús tojánayana.

Bëngbe Bëtsäbe amëndayoye ndoñe nyetscanga jamashjnana

(Lc 13.25-27)

21 “Ndoñe nyetscanga chë ‘¡Utabná! ¡Utabná ca!’ atše šmojtsatsëtšnanga, Bëngbe Bëtsäbe amëndayoye quemochátamashjna. Nyë ntšamo atšbe Taitá, celoca endmëná, tojtsebošcá amëngna aiñe.

22 Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácbëñe betsošbuáchemä, bënga fsëndoyebuambná, y ácbeyeca bacna bayëjëngbe juabna entšángbentšana fsëndëtabocana, y ácbeyeca bëts soyënga fsëndama ca.’

23 Chora atše chanjójuaye: ‘Ndocna te checbaisëbuátmana. Atšbentšana mojuánanga, bacna soye ama entšanga ca’” — Jesús tojánayana.

Chë uta ucuatjoniñe

(Mc 1.22; Lc 6.47-49)

24 “Chcasna, nda atše sojoyeuná y chë ntšamo sëntsichamcá tojtsama, endmëna mo canyë tsäbá juabnaye boyabasacá. Chë boyabásana ndëtšbeñe chabe yebna yojajëbo.

²⁵ Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca.

²⁶ Pero nda atsbe palabra tojouena y ntšamo sentsichamcá ndoñe tontsama, endmëna mo canýe ndëjuabnaye boyabasacá. Chë boyabásana chabe yebna cascajuñe yojajebo.

²⁷ Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

²⁸ Jesús chë soyënga jóyebuambayama tojanpochocá ora, chë entsanga ojanánënga imojtsemna ntšamo cha tojánabuatambama.

²⁹ Jesús tojanabuatambá nyets obenánaca, mo canýa mando bomnacá y ndoñe nýe mo chë ley abuatambayëngcá.

8

Jesús, canýa bacna nguayanánaca šocábioye tbojanshná (Mc 1.40-45; Lc 5.12-16)

¹ Jesús tjoicana tojtantsmá ora, ba entsanga tmojanasto.

² Chora canýe boyabása bacna nguayanánaca šocá Jesúsbioye tojanobeconá, chabe delante yojoshamentsiye y tbojaniyana: —Utabná, aca tcojtsebošëse, catjobenaye atsbe šocana jtsebojuánana ca.

³ As Jesús tojanacuenýanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe.

⁴ Jesús chë shnanábioye tbojaniyana: —Mouena, ndocnábeñe cattse-cuëntaye; nýe chë Jerusalenoca báchnëbioye motsa, y cha cochjinýinýiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamot-atsëmbona mora aca ya ndoñe šocá contsemnama ca —Jesús tbojaniyana.

Jesús canýe Romano soldadëngbe amëndayabe bochichnayábioye tbojanshná (Lc 7.1-10)

⁵ Jesús Capernaumoye tojánamashëngo ora, canýe Romano soldadëngbe amëndayá Jesúsbioye tojanobeconá canýe pavorama jaimpádama.

⁶ Jesúsbioye tbojaniyana: —Utabná, atsbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷ Chora Jesús tojanjuá: —Cha jáshnama chanjá ca.

⁸ As chë soldadëngbe amëndayá tbojaniyana: —Señor, atsbe merecido tait-satobuajoñe atsbe yebnentše chacuamashënguama; nýe mayana y atsbe bochichnayá tšabá echántatsmëna.

⁹ Atšbioye mándayënga atsë sëndábamna y átsnaca soldadëngbe amëndayá sëndmëna. Atšë canýe soldado stjauyana “motsa ca”, cha cachora jana; y inýa stjauyana “mabo ca”, cha cachora jabana; y nderado atsbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

¹⁰ Jesús chca tojanuena ora, tojanenjaná y chë ústonënga tojanëyana: —Ndegombre cbëyana, ni mo nyets Israelentše ni canýa quem boyabasacá Bëngbe Bëtsábeñe nyetsá ošbuachiyá chiyátinýena.

11 Y šcuayana, shinje bocanoicana y shinje uenatjembambanoicana bëtscá entsanga mochanjabo, y Abraham, Isaac y Jacob, chë judiëngbe temp-sca uamana bëtš taitãngaftaca mochanjotbiama Bëngbe Bëtsabe amëndayoca, cãnyĩne juasama.

12 Ba Israeloca entsanga, chë ndëmuanjëngbiana Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna luaroye, infernoye. Chentše puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

13 Chora Jesús chë soldadëngbe amëndayábioye tbojaniana: —Acbe yebnoye motsatá y chë ntšamo cojtšošbuachecá cachcá chaotsemna ca.

Cachora chë bochichnayá tšabá yojtšatsmëna.

Jesús, Pédrëbe uambén mamábioye tbojanšná

(Mc 1.29-31; Lc 4.38-39)

14 Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca yojtsejutsnajona.

15 Chora Jesús chë uambén mamabe cucuatše tojánbojajo y cachora chë calentora tbojtšanóbojuanañe. Chorna chë uambén mamá tojtantsbaná y tojanontšë chënga jobuácuedana.

Jesús ba šoquënga tojanashná

(Mc 1.32-34; Lc 4.40-41)

16 Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná.

17 Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

Chë Jesús juastama bošënga

(Lc 9.57-62)

18 Jesús tojánanÿe mallajta entsanga chabe šhëconana; as tojanmandá uafjajónaye chenguana jama.

19 Chorna, canÿe ley abuatambayá Jesúsbioye tbojanobobeconá y tbojaniana: —Buatëmbayá, atše sëntseboše aca juastama, ndëmoye chacojtsá choye ca.

20 As Jesús tbojaniana: —Chë zorrënga mondbomna cuevëšhënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

21 Chora inÿa, cach uatsjendayënguentsá, Jesúsbioye tbojaniana: —Bëngbe Utabná, šmolesenciá atšbe taitá chjshesabotbontsañe ca.

22 Chora Jesús tbojanjá: —Nÿe šmasto. Chë Bëngbe Bëtsabiana mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

Jesús chë binÿia y chë béjaye bonguana yojëtsbema

(Mc 4.35-41; Lc 8.22-25)

23 Chentšana Jesús canÿe barquëshoye tojánamashëngo y chabe uatšjëndayënga imojtsetjëmbambnaye.

²⁴ Ndeolpe tša jabuache binýia chë uafjajónaye béjayiñe yojóshjango; nyëtsá jabuachana yojtsemna, chë olëshënga barquëshu imojtsétsbotsana. Y Jesús chora inétsomañe.

²⁵ As chabe uatsjédayënga tmojána Jesús jetsefšenama y tmojanianyana: — ¡Bëngbe Utabná, šmatsebacá. Montsenatjëmbambana ca!

²⁶ Chora Jesús tojanëyana: —¿Ndáyeca tša šmojtsauatja? ¿Tša batsatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binýia y chë býeshe bonguana chaotsatsmënema, y lempe natjëmbana yojtsatsmëna.

²⁷ Chabe uatsjédayënga ojnanánënga imojtsemna y mëntsá imojtsichamo: “¿Nda quem boyabása yomna? Cha tonjayana y chë binýia y chë býeshe tmonjoyeuná ca.”

Chë Gadara luaroca entsata, bacna bayëjbe juabna uambayata

(Mc 5.1-20; Lc 8.26-39)

²⁸ Jesús uafjajónaye chenguana tojánashjango, canýe luare Gadara ca uabáinentše. Chorna chë utabuantsánëngbentsana útata, bayëjbe juabna uambayata, tbojánbocna y Jesúsbiöye tbojanobobëconata. Puerte tšatjayata ibnamna, chíyeca entsanga ndoñe ntsobenana chëjana jtsachñëjuanana;

²⁹ y chora tbojanontsé chë bacna bayëjëngbeyeca mëntsá uayebuáchana: — ¿Ndáyá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufriima, chama cabá ndoñe chë tempo yontsemna ora ca?

³⁰ Chentša bëconana ba cotšënga imnajena y chënga imnétsosañe.

³¹ Y chë bayëjënga Jesús tmojanimpadá: —Muentšana jésecbanama aca tcojamëse, cochjama bënga chë cotšëngbeñe fchayamashjna ca.

³² Y Jesús tojanëyana: —Motsajna ca.

Chora chë bayëjënga chë boyabásatbentsana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetse y yojtsatajo.

³³ Chora chë cotšënga anýenënga tmojtsanacheta, y chë puebloye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca.

³⁴ Chora nyëtsca entsanga chë pueblentsana tmojánbocana y Jesús yojtsemnoye tmojána. Chë entsanga Jesús tmojáninýe ora, tmojanimpadá chë luarentšana chaueseocnana.

9

Jesús, canýe jama ndobenábioye tbojanshná

(Mc 2.1-12; Lc 5.17-26)

¹ Chca tojanopasá chentšana, Jesús canýe barquëshoye tojánamashëngo, uafjajónaye chenguana tojána y cachabe puebloye Capernaumoye tojtánashjango.

² Chora, canýe jama ndobená, tjuashiñe jajoná, Jesús yojtsemnoye básefta boyabásënga tmojanamba. Jesús tojáninýe chënga tša imojtsošbuáchema chë šocábioye jáshnama cha bëtsobenama; as chë šocábioye tbojanianyana: “Sobreno, añemo matsca; ace bacna soyënga tcbontseboperdoná ca.”

³ Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiama; mo chábioye cuafjoyenguangcá entsemna ca.”

⁴ Pero Jesús yojtsetátšëmbo ntšamo chënga imojtsejuabnacyá; chíyeca tojanëyana: “¿Ndáyeca nyëtsá bacna juabnënga ainaniñe šmojtsebmna ca?

⁵ ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca?’

⁶ Atše cbochanjínyanýiye ntšamo chë Bëngbe Bëtsá Entšá tbojanbemá quem luarentse mando yobomnama, entsanga bacna soyëngama jáperdonama ca” — Jesús tojanëyana.

As chë jama ndobenábioye tbojanianyana: “Matëtsbaná, acbe tjuashe mesocñe y acbe yebnoye motsatoñe ca.”

⁷ Chorna chë jama ndobená tojtantsbaná y cachabe yebnoye yojtsatoñe.

⁸ Chca tmojáninýama chë entsanga auatjanánënga imojtsemna y Bëngbe Bëtsá imojtsatschuanaye, cha chca obenana entsanga tojánatsatama.

Jesús, Matéobioye tbojanchembo chabuastama

(Mc 2.13-17; Lc 5.27-32)

⁹ Jesús chentšana tojtsanoñe y canýe entšábioye tbojáninýe, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojanianyana: “Smasto ca.” As Mateo chentšana tojéftsantsbaná y tbojanasto.

¹⁰ Jesús cach Mateobe yebnentše yojtsesaye ora, banga Romocama impuesto entšángbioye atjanayënga y inýenga bacna soye amënga tmojánashajjna y mesëshentše Jesús y chabe uatsjëndayëngaftaca imojotbiamá.

¹¹ Chë fariseunga chca tmojáninýe ora, Jesusbe uatsjëndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

¹² Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë šoquënga aiñe.

¹³ Smochjá y ntšamo ndegombre iuayancá šmochjuatsjinýe quem Bëngbe Bëtsabe uabemana palabrénguiñe:

Atše sëntseboše tšëngaftanga lastemadënga chašmotsemna,

y ndoñe nýe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

Jesús tmojantjá chë Bëngbe Bëtsáftaca jencuëntama tondaye saytescama

(Mc 2.18-22; Lc 5.33-39)

¹⁴ Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

¹⁵ As Jesús tojanëjua: —Chë casamentoye ofjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ofjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacna.

16 “Ndocná canýe uatanguá entšayá base tsēm entšējuaca jtarméndana. Er chē tsēm entšējua jtsabéconana y chē uatanguá entšayá más jtsatanécanana, y chca chē uátanēcniñe más bētsiñe jtsabemana.

17 Y cach ndoñe chē tojtseshayana vínoye tanguá jasabenguiñe ntjataftsuámayana. Tcojuaftsuamasna, chē jasabenga jtseshébēfjuana y chē vínoye jtsabuáshanana, y chē vínoye y chē jasabenga tondayama ntjatoservénana. Chýyeca comna, chē tojtseshayana vínoyna tsēm jasabenguiñe juaftsuámama; y chca, chē jasabenga y chē vínoye jtsoservénana ca” —Jesús tojánayana.

Jesús canýe shembásabioye tbojanshná y tojanma Jairēbe bembetema cháuatayenama

(Mc 5.21-43; Lc 8.40-56)

18 Jesús entšanga yojtsētsētsnantscuana, chē judiēngbe enefjuana yebnentsa canýe mandayá tojánashjango y Jesusbe shecuatšentše yojoshamentsiye. Chē mandayá tbojanianyana: “Atšbe bembe tontsóbana. Diosmanda atšbe yebnoye mabo; cochjaboja y cha echántayena ca.”

19 Chentsana Jesús y chabe uatsjéndayēnga chē mandayá tmojanasto.

20-21 Imojtsaye ora, canýe shembása stētsōicana Jesúsbioye yojobeconá. Bnētsana uta uatama oboftjajuanánaca cha inapadecena. Chē šocá Jesúsbioye yojobeconá ora, yojtsejuabnaye: “Masque nýe mo chabe entšayá sibiájua chajjuábojajo, salud chantinýena ca.” Chentsana chē šocá Jesusbe entšayá tojanábojajo.

22 Tojanábojajo ora, Jesús tojanobuértana, chē shembásabioye tbojáninýe y tbojaníyana: “Añemo matsca, shembása. Bēngbe Bētsábeñe icošbuachéyeca, mora tšabá contsatsmēna ca.” Y cach orscana cha tšabá yojtsatsmēna.

23 Chēnga tmojtētantonťsé ayana y chora chē mandayábioca chēnga tmojánashjajna. Chentše Jesús tojánanyē, ínýengna chē veloríama imojtsanflautaye y ínýengna tša imojtsošachiye.

24 Chora Jesús tojanéyana: “Muentšana mobocnēnga. Chē shembásetema cabá ndoñe obaná quenátsmēna; nýe endētsomañe ca.”

Pero chē entšanga Jesúsbioye nýe imojtsáfchaye.

25 Pero Jesús pronto chēnga chē yebnentsana tojanēbuacna. Chora Jesús tojánamashēngo chē shembásetema yojtsemnoye; cucuatše tbojanábuacueshache y cachora chē shembásetema tojtantsbaná.

26 Y nýets chē luarējana ndayá Jesús yojamama nýetsca entšanga imojátatšēmbona.

Jesús uta jtanata tojanashná

27 Jesús chentsana tojēftsanbocna ora, uta jtanata tbojanasto y mēntšá ibojtsaiuáyebuache: —¡Davidbentsana Entšá, bēndata šmotsalastemá ca!

28 Jesús chē yebnoye tojánamashēngo ora, chē jtanata tbojanóboconata. As Jesús tojanatjá: —¿Tsēndata šojtsošbuaché atše chca jamama chjobenaye ca? Y tmojanjuá: —Arseñor. Añe ca.

29 Chora Jesús tojánabuchbojajo y tojanéyana: —Nťsamo tsēndatbe ošbuáchiyana yomncá, cachá chaotsemna ca.

30 Y cachora jinýama ibojtsobena. Jesús bētsá chata mēntšá tojanaméndá: —Ndocná más quem soye chaondētsetatšēmbo ca.

31 Pero chata chentsana tbojēftsanbocna y cachora tbojanontšé ndayá Jesús chátaftaca tojanmama nýets chē luarējana jacúntana.

Jesús, canye ndëbiábioye tbojanshná

³² Chë jtanata ibojtsebocanëntscuana, básefta entšanga canye ndëbiá, bacna bayëjbe juabna uambayá, Jesúsbioye tmojanamba.

³³ Jesús chë bacna bayëja chábensšana tbojtanábcna y cachora chë ndëbiá tojtanontšë oyebuambnayana. Entšanga ojanánënga imojtsichamo: “¡Ndocna te Israelentšë chca bëtš soye chemuáisinýe ca!”

³⁴ Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojatštá chë bayëjenga entšángbentsšana jtëbuacanama ca.”

Jesús entsangbiana tbojanongmé

³⁵ Jesús nýetsca pueblënguëjana y luarënguëjana vojtsachnëjuana y chë judiëngbe enefjuana yebnënguenache entšanga vojtsabuátambaye. Yojanabuayiná chë tšabe noticiënga Bëngbe Bëtšabe amëndayama, y nýetsca šocanëngama y tsetšanama yojánashnaye.

³⁶ Y chë entšanga tojánanyë ora, puerta tbojanongmé. Er chënga imojtsemna mo abuajënyá ndbomna oveshëngcá, puerta uamëntšnyënga ba soyëngama padecena causa, y chaujúabuachama ndocná ntsebomncá.

³⁷ Chora chabe uatsjëndayënga tojanëyana: “Canyë bëtš jajañe bëtscá játbanama entsemna, pero peonga nýe báseftanga. Cachcá quem luar-entšë, bëtscá entšanga Bëngbe Bëtšábioye nduabuátmënga montsemna, y chëngbioye chabiana abuayinyayënga nýe báseftanga.

³⁸ Peonga tmojtsashbenšë chë nduññbioye jaimpádana ba peonga chauichamoma chë jaja saná játbanama. Cachcá, Bëngbe Bëtšábioye moimpadanga ba abuayinyayënga chauichamoma, quem entšanga chábioye chamúbuajama ca” —Jesús tojanëyana.

10

Jesús chë bnëtsana uta uatsjëndayënga tojanabacacá

(Mc 3.13-19; Lc 6.12-16)

¹ Chentsšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjengbe juabna entšángbentsšana jtabocnama y nýetsca šocanëngama y tsetšanama jashnayama.

² Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata;

³ Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo;

⁴ Simón, chë celote ca uabobainá y Judas Iscariote, chë uayayëngbe cucu-atšinë Jesúsbioye boshjuaná.

Jesús, chabe bnëtsana uta uatsjëndayënga tojanichamó, Bëngbe Bëtšabe amëndayama jábuayenama

(Mc 6.7-13; Lc 9.1-6)

⁵ Jesús chë bnëtsana uta boyabásenga tojanichamó chë tšabe noticiënga entšanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentšë Samaria luaroca ndoñe šmatjëftsamashjna.

⁶ Nýe Israeloca pueblëngoye šmochjá. Choca entšanga mo ótšena oveshëngcá montsemna, Bëngbe Bëtšábioye corente nduabuatma causa.

7 Smochjá y entsanga smochjábuayenaye Bëngbe Bëtsabe amëndayana echanjóshjanguama.

8 Chë soquënga smochjášnaye, smochjama chë obanënga chámuatayenama, bacna nguayanánaca soquënga smochjášnaye y bacna bayëjëngbe juabna entsángbentsana smochtábocna. Chë obenana smonjóyëngacne tondaye ntjëtsajuacá; cachcá, chë soyënga smojtsamama tondaye entsanga smattsayëngacaye.

9 “Ndoñe smattsambaye crocénana uasnanëchiñe.

10 Ni shecnaja sanaca benachiñama, ni inye entsáyá jtsenomódama, ni shecochëtjonëshënga, ni jatjonëfja, er chë tsabe trabajayá jtsomerecénana ntšamo tbojtsajabotcá jóyëngacñama.

11 “Nderado canye bëts pueblentse o base pueblentse chašmojáshjajna ora, smochjáanguango canye tsabe entsá, ín'yëngbiroye ndaingñayá, y chabe yebnentse smochtsoquedañe, inye puebloye játantscuana.

12 Canye yebnoye chašmojáshjajna ora, nyetsca chentša oyenënga mëntšá smochjácheuaye: ‘Chë bëngbe ainaniñe tsabe ebionana tsëngaftangbe ainaniñe chaotsemna ca.’

13 Chë yebnentša entsanga ainaniñe tsabe ebionana jtsebomnama mercedo tmojtsebuajonëse, chë tsëngaftangbe ainaniñe tsabe ebionana chëngaftaca chaotsemna. Ndoñesna, nye cach tsëngaftangaftaca chaotsoñe.

14 Y nderado canye pueblentse o bëts pueblentse chë entsanga ndoñe tcmonjúbuaja y ndoñe tcmonjóyaunase, chentšana smochjésebecana y chë shecuatšentša polvëshe smochjésenstoto. Chca, chë entsanga mochántsetatšëmbo chënga tsëngaftangaftaca ndoñe tsabá tmonjamama.

15 Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsanga Bëngbe Bëtsá puerte jabuache echantsacastigaye, y chë bacna entsanga Sodoma y Gomorra luaroquëgna ndoñe nýa nyëtšá jabuache queochatacastigaye ca” —Jesús tojánayana.

Ntšamo chë uatsjëndayënga mochjansúfria

16 “Smochjouena. Atse cbontsachamná mo oveshënga cuenta tjañe quešëngbeñe. Chíyeca studio bomnënga mo mëtscuayëngcá smochtsemna y uamanënga mo palomatemëngcá.

17 Entšangbiamá cuedado smochtsebomna, chëngbe pueblentša amëndayëngbe cucuatšinë tsëngaftanga cmochanjábashejuana y chëngbe enefjuana yebnënguenache cmochanjátsetšenaye.

18 Atšbe ústonënga bëtsemnama, mandadëngbiroye y reyëngbiroye cmochan-junatse. Y chca, tsëngaftanga smochanjobenaye chëngbeñe y chë ndoñe judiëngbeñe ntšamo atšbiamá smotatšëmbcá jóyebuambayama.

19 Pero chë mandadëngbe cucuatšinë chacmojábashejuana ora, ntšamo o ndayá smochjayanama ndoñe smattsenócochinýena. Chca orna, Bëngbe Bëtsá tsëngaftanga cmochanjabuayená ntšamo o ndayá jóyebuambayama.

20 Tsëngaftanga ndoñe chë oyebuambnayënga quešmochásmëna, sinó chë tsëngaftangbe Taitá, Bëngbe Bëtsabe Espiritu, tsëngaftangbiajana echantsóyebuambnaye.

21 “Y canye entsá cachabe catsátbiroye uayayëngbe cucuatšinë bochanjáboshjona chamotsóbama; y canye taitá cachabe uaqiñábioynaca.

Y chë básenga chëngbe bëtsëtsangbe contra mochántsemna y uayayëngbe cucuatšiñe mochanjábashējuana chamotsëbáyama.

²² Tsëngaftanga atšbe ústonënga bëtsemnama, nyetsca entsanga cmochantsëbuayënja; pero nda nyets tempo átšbeñe ošbuachiyá chaotsomñá, atsbocaná echántsemna.

²³ Canýe puebltše chacmojtšëcamena ora, inýe pueblöye šmochtsacheta. Ndegombre cbéyana, Israelentša nyetsca pueblëngöye cabá nda ora, chë Bëngbe Bëtsá Entšá tbojanbemá ya quem luaröye echanjabáshjango.

²⁴ “Ni canýe uatsjendayá chabe buatëmbayabiana más uamaná ntsemnana, ni chë oservená chabe nduiñbiana más uamaná.

²⁵ Chë uatsjendayá ya cachabe buatëmbayacá jtsemnana tojashjáchése, ndayá más nanjatsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canýe yebnentša taitacá y tsëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tsëngaftanga cmochtsëbobuatma ca?” —Jesús tojanëyana.

Nda ndegombre cuantsebiauatja (Lc 12.2-7)

²⁶ “Chíyeca entsangbiana ndoñe matauatjëngana. Chë yoiytëmena soyentsana tondaye ntjinýcá queochaisoquéda, y chë ndótatšëmbo soye, ntsoatšëmbcá queochaisoquéda.

²⁷ Chë mora cbontsëtsëtsná soyënga, chë entsangbiana mo ibetiñe cuaftsemncá soyënga, tsëngaftanga šmochjama entsanga botamana chama chamotsetatšëmbuama. Y chë iytëcana cbontsëtsëtsná soyënga nyetsca entsanga šmochtsabuayinyaye, mo nda canýe yebnentša tsbanánocana noticiënga tojtsayebuachcá.

²⁸ Ndoñe matauatjëngana nýe chë tsëngaftangbe cuerpo japochócama imobenëngbiana y ainana jtsepochócama ndoñe ntsoebenana. Más šmochtsebiauatja chë nda endobena tsëngaftangbe cuerpo y tsëngaftangbe ainana jtsepochócama, nyetsca tescama infernoca.

²⁹ “Uta jaja shloftšëtemata nýe canýe denario crocénánama mondbétsena. Masque chca, ni cánýetema obanatema fshantsoye jotsatšana, tsëngaftangbe Taitá, Bëngbe Bëtsá ndoñe tontsebošëse.

³⁰ Y tsëngaftangbiana, Bëngbe Bëtsá botamana jtsantješnana, y chca, cha lempe tsëngaftangbiana jtsetatšëmbuana, bueta stjënashënga tsëngaftangbe bestšašiñe yomnámncá.

³¹ Chíyeca ndoñe matauatjëngana, tsëngaftanga ba jaja shloftšëtemëngbiana corente más šmonduámana ca” —Jesús tojánayana.

Ndabiana Jesucristo yochjayana chabe entšá yomna ca (Lc 12.8-9)

³² “Nda atšbe entšá yomna ca entsangbe delante tojayanabiana, átšnaca, atšbe Taitá, chë celoca endmënabe delante chanjayana cha atšbe entšá yomna ca.

³³ Pero nda entsangbe delante atšbe entšá ndoñe yondmëna ca tojayanabiana, átšnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” —Jesús tojanëyana.

*Jesube causa, entsángbeñe más jtsentsjanayana**(Lc 12.51-53; 14.26-27)*

³⁴ “Ndoñe šmattsejuabnaye atše quem luaroye tijabo n̄yetsca entsanga natjẽmbana chamotsiyenama. Atše chama ndoñe chiyátabo; atše s̄enjabo causa, entsanga más mochántsejtsjanaye.

³⁵ Atše s̄enjabo ch̄e uaquiñá cachabe taitabe contra chaotsemnana, ch̄e bembe cachabe mamabe contra y ch̄e bebincúa chabe uambén mamabe contra chaotsemnana.

³⁶ Y chca, ba entsangbe uyayẽnga cachẽngbe pamíllanga mochántsemna.

³⁷ “Nda cachabe taitá o mamábioye atšbiana más tbojtsebobonshánese, cha ndoñe ntsomerecénana atšbe entsá jtsemnana. Nda cachabe uaquiñá o bémbẽbioye atšbiana más tbojtsebobonshánese, cha cach ndoñe.

³⁸ Y nda n̄yetsca chabe quem luare soyẽnga ndoñe tonjéseboshjona atše juastama, y atšbiana jasúfriama ndoñe tontseprontana y cruciñe jobanámna, cha ndoñe ntsomerecénana atšbe entsá jtsemnana.

³⁹ Nda tojtsentšena quem luarentše b̄etscá soyẽnga jtsebomnana y atšbiana jasúfriama ndoñe tontseprontana, ch̄e n̄yetsca tescama yomna tšabe vida echanjobuetše. Pero nda quem luarentša soyẽnga cachcá tojesonýá atše juastama, masque chaóbana, ch̄e n̄yetsca tescama yomna tšabe vida echántsebomna ca” —Jesús tojánayana.

*Ch̄e uacanana soyẽnga**(Mc 9.41)*

⁴⁰ “Nda tšẽngaftanga chacmojúbuaja, átšnaca cha šochanjofja; y nda atše chašojofja, ch̄e nda šojichmóbioynaca cha bochanjofja.

⁴¹ Nda can̄ye Bẽngbe B̄etsabe juabna oyebuambnayábioye tbojoyeuná, cha chca b̄etsemnana, chábioye Bẽngbe B̄etsá can̄ye uacanana soye bochántatšetaye, mo cach Bẽngbe B̄etsabe juabna oyebuambnayabe uacanana soycá. Y nda can̄ye n̄yetsca soyẽnguiñe tšabá amábioye tbojofja, cha chca uamanama, chábioye Bẽngbe B̄etsá can̄ye uacanana soye bochántatšetaye, mo cach n̄yetsca soyẽnguiñe tšabá amabe uacanana soycá.

⁴² Y ndánaca, tšẽngaftanguentsá can̄ye nduamanábioye masque n̄ye mo base býeshtema tbojuabuatšetá, atšbe ustoná b̄etsemnayeca, ndegombre Bẽngbe B̄etsá can̄ye uacanana soye chábioye bochántatšetaye ca” —Jesús tojánayana.

11*Juan ch̄e Ubayanabe ichmónẽnga**(Lc 7.18-35)*

¹ Jesús tojanpochocá chabe bn̄etsana uta uatsjẽndayẽnga jábuayenama, y chentsana tojtsanoñe ch̄e luariñe pueblẽnguenache oyena entsanga Bẽngbe B̄etsabe palabra jabuátambama y jábuayenama.

² Ch̄e tempo Juan ch̄e Ubayaná cárceloye tmojanètame. Choca cha vojouena ndayá Jesús yojtsamama. Y as, Jesús yojtsemnoye, básefta chabe ústonẽnga tojanichamó,

³ m̄entšá jatjayama: —¿Aca ndegombre cojtsemna ch̄e jabama ibojanm̄ená, ch̄e Uámana Uabuayaná, o šojtsamna ín̄yabiama jatobátmama ca?

⁴ Chca tmojantjá orna, Jesús tojanẽjua: —Smochjá y Juan šmochjauyana ntšamo šmojouena y šmojin̄ycá.

⁵ Cha šmochjacuénta: Ch̄e jtanẽnga tšabá entsatẽbin̄yana, ch̄e coshetẽnga tšabá montsatana, ch̄e bacna nguayanánaca šoquẽnga sh̄nánẽnga

montsatsmëna y chë tësmënga montsuenana, chë obanënga tmontayena y chë ndbomnëjëmëngbiöye chë tšabe noticiënga montsabuayiyná ca.

⁶ ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átsbeñe ošbuáchiyana ndoñe tontsajbaná cha ca! —Jesús tojanëyana.

⁷ Chënga tmojtsatanoñe ora, Jesús tojanontšë Juanbiamá chë entsanga jáuyanana, mëntšá: “Juan jinýama šmojánbocana ora, ¿ndayá jinýama chë entsanga ndoyena luaroye šmojánbocana? ¿Canýe entšá ainaniñe tondaye añemo ndbomná, mo canýe šëše bínýiaca shatiyeynëscá?”

⁸ Y ndoñese, ¿ndayá jinýama choye šmojánbocana? ¿Canýe boyabása uamana entsayaca bopormaná? Ndoñe. Tšëngaftanga šmondëtatsëmbo chë boyabásenga uamana entsayaca bopormánëngna chë mándayëngbe yebnënguñe mondbëtsiyenama.

⁹ Y asna, ¿ndayama choye šmojánbocana? ¿Canýe Bëngbe Bëtsabe juabna oyebuambnayá jinýama? Ndegombre, añe; y chëyana, ndegombre cha canýe Bëngbe Bëtsabe juabna oyebuambnayabiama más bëtsá endmëna.

¹⁰ Cha, Juan, endmëna ndabiama Bëngbe Bëtsá chabe uabemana palabrënguñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiama chaóyebuambama, entsanga jábuayenama aca jabama ainaniñe tšabe juabnëngaca chamotseprontánama ca.

¹¹ Ndegombre chëyana: Nýets tempo entšángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batsá uamaná, más bëtsá echántsemna ntšamo mora Juan yomnama.

¹² “Juan chë Ubayaná tojánabo orscana mëntscóñama, bëtsá entšanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nýets añémoca montseboše chë mándayana jtsephócama.

¹³ Juan candabëntscuana, nýetsca Bëngbe Bëtsabe juabna oyebuambnayënga y Moisesbe Ley nýe Bëngbe Bëtsabe amëndayama tmonjanobuambá.

¹⁴ Y tšëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná.

¹⁵ Chë jouenama tmojtsobenënga, chamouena ca” —Jesús tojánayana.

¹⁶ Mëntšánaca Jesús tojánayana: “¿Ndayacá morsca entsanga imomna? Chënga mondmëna mo chë plazëngoca mondbetsetbiámana basetemëngcá; chënga chëngbe enutëngbiöye jtsayebuáchana

¹⁷ y mëntšá jtsichámuana: “Tšëngaftangbiamá fsënjaflautá y ndoñe chešmatslatsá; ngmënacá fsënjaversiá y ndoñe chešmatošachna ca.”

¹⁸ Juan tonjánabo, y bëtsá entšángbeñe ndoñe quenjatamana ni jasana, ni jofšiyana, y entsanga montsanichamo chana bacna bayëjbe juabna uambayá yojamna ca.

¹⁹ Morna, chë Bëngbe Bëtsá Entšá tbojanbemá tonjabo, y chana añe entsamana bëtsá entšángbeñe jtseyayana y jtsofšëšnayana, y entsanga montsichamo chana yapa uasayá y vínoye tmoyá entsemna ca y Romocama impuesto entšángbiöye atjanayënga y bacna soye amëngbe amigo ca. Pero Bëngbe Bëtsá endbëtsinýanýnaye cha nýets osertánana bomná yomnama, chë ndayá cha tojama ora ndayá chentšana tojóbozna soyëngaca ca” —Jesús tojánayana.

*Chë nduauenana entsanga
(Lc 10.13-15)*

²⁰ Chentsana Jesús tojanontsé jucacánana chë entsanga, ndëmuanyënga imojoyena chë pueblënguiñe ndayenache ba chabe bëts soyënga tojanma, chënga bacna soyënga amana ndoñe tmonsantajbanama y Bëngbe Bëtsabe benache ndoñe tmontanishachama. Mëntsá yojsichamo:

²¹ “¡Tša lastema, Corazín puebloca entsangbiama! ¡Tša lastema, Bet-saida puebloca entsangbiámnaca! Chë chentše sënjama bëts soyënga, Tiro y Sidón bëts pueblënguentše matënjochnënguse, chentša bacna entsanga ya tempo ngménaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatšëmbuama uajojësha entsayangaca matmëntopormanga y chëngbe bestšašinë jatinyá matmëjnenotbótoto.

²² Pero ndegombre cbëyana, ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebomna, chë Tiro y Sidonoca bacna entsangbe castiguama.

²³ Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsësetjango! Chë muentše sënjama bëts soyënga Sodomoca matënjochnënguse, choca entsanga ya tempo ngménaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachá mëntscuana mantsomñe.

²⁴ Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbiocyte ndoñe nyëtsá jabuache quemochatacastígaye ca” —Jesús tojánayana.

*“Atšbiocyte mabënga y šmochjóchna”
(Lc 10.21-22)*

²⁵ Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nye batsá tatšëmbënga tcojanýanyé, chë tša tatšëmbënga y osertánëngbiama tcojaiytëme soyënga.

²⁶ Añe, chama cbontsadorana, Taita, chca chaotsemnama tcojábóšenayeca.

²⁷ “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nye chë Taitá añe. Y chë Taitábioye ndocná corente quebnatábuatma; nye chë Uaquiñá añe, y ndábioye chë Uaquiñá tojtseboše nda chë Taitá yomnama jinýanjiyama, chánaca chë Taitábioye bochantšabuatma.

²⁸ “Atšbiocyte mabënga nyëtsca tšëngaftanga uamëntšnayënga y bëts cá trabajo uangménënga, y atše chanjama tšëngaftanga chašmochnama.

²⁹ Ntšamo canye entšá, uacná yuguëšinë juabatsëcana juanatsama, cachá, tšëngaftanga atše šmochjalesëncia jobnatsayama y jabuátambama. Atšbentsana šmochjuatsjinýe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebomna.

³⁰ Mo canye uacnacá, ndoñe tishuta yuguëšëca o ndoñe uauta uasmanëshaca, paselo jama jobenayana, cachá tšëngaftanga šmochántsemna atše chojtsabnatsana y chojtsabuátambase; y chca, tšëngaftanga más oyejuayënga šmochántsemna y más paselo nyëtsca soyënga jamama echántsemna ca” —Jesús tojánayana.

12

Jesusbe uatsjédayénga ochnayté trigo tmojanátabebe
(Mc 2.23-28; Lc 6.1-5)

¹ Chë tempo, Jesús canýe ochnayté canýe jajajana yojsachñëjuana. Chabe uatsjédayéngna shëntseca imojtsemna, chíyeca tmojanontsé trigo juatabebiana y chë meshénga jasana.

² Chë fariseunga chca tmojáninye ora, Jesús tmojanianyana: —Minýe, acbe uatsjédayénga canýe soye montsama y chë soye ochnayté jamama ndoñe quenátslesenciana ca.

³ As Jesús tojanéyana: —¿Ndoñe šmëndualía y šmondétatšëmbo ndayá David y chabe enuténga tmojanmama, shëntseca imojtsemna ora?

⁴ Chca orna, David, Bëngbe Bëtsabe bëts yebnoye yojámashéngo y chë Bëngbe Bëtsá chentše yojamnama inýinýnaye tandšénga yojase. Chë tandése nýe ndánaca jasama ndoñe yonjalesenciana, ni Davidbiana, ni chabe enutëngbiana. Nýe bachnangbiana belesenciana chë tandése jasama. Masque David chca tojanma, Bëngbe Bëtsá chora ndoñe tonjánayana David canýe bacna soye tojanma ca.

⁵ ¿O ndoñe šmëndualía y šmondétatšëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama?

⁶ Y atše šcuayana: Muentše canýa entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyénga más entsámama chë bachnangbe mándayentša soyéngama.

⁷ Bëngbe Bëtsabe uabemana palabrenguiñe mëntšá endayana: Atše sëntseboše tšéngaftanga lastemadénga chašmotsemna, y ndoñe nýe bayénga chašmotsëbánaye Bëngbe Bëtsá jëtschuayama ca. Ntšamo chiñe entsayancá ndegombre cmojtšesertánëse, tšéngaftanga ndoñe chëngbe contra šmattsichamo, chë ochnayté chca tmojtsamëngbiana.

⁸ Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

Chë buashana cucuatše bomna entšá
(Mc 3.1-6; Lc 6.6-11)

⁹ Chentšana Jesús tojtsanoñe y chentša judiëngbe enefjuana yebnoye tojánamashéngo.

¹⁰ Chentše yojtsemna canýe boyabása buashana buacuatše bomná. Chë fariseunga imojtsenguaye ndayánaca, as chca chénga jtsebomnama ndaye sóyeca Jesús mal jaquédama. Chcasna, chora chénga Jesús tmojantjá: —¿Queojtselesenciana canýe ochnayté šocá jáshnama ca?

¹¹ Y Jesús tojanéjua: —¿Nda tšéngaftanguentšá, canýe oveshá tbojtsebomna y nýa chë ochnayté canýe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama?

¹² ¡Entšá oveshabiana puerta más uamaná endmëna! Chcasna, entselesenciana chë ochnayté tšabë soye jamama ca —Jesús tojanéyana.

¹³ Chora Jesús chë buashana buacuatše bomnábioye tbojanianyana: “Macuëñanëjaná ca.” Y chë boyabásana tojanacuëñanëjaná y chora chëtsa tšabá yojsatamna mo cach inýetšacá.

¹⁴ Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

Ndayá chë Bëngbe Bëtsabe juabna oyebuambnayá Jesusbiana tojánayana

¹⁵ Jesús chë soye tojántatsëmbona ora, chentsana tojtsanoñe y ba entsanga tmojanasto. Nÿetsca šoquënga tojanashná,

¹⁶ y tojanamëndá chabiana entsángbeñe ndoñe chamondëtsóyebuambnama.

¹⁷ Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntsá tojánayana:

¹⁸ Muentše atšbe oservená entsemna. Atše cha sënjabocacá, atšbe bonshaná, y atše corente chabiana sëntsoyejuá.

Atše chanjama atšbe Espiritu chabe ainaniñe chaotsemnama y entsanga echanjabuayená, Bëngbe Bëtsá nÿetsca luarënguentsana entsangbiana yochjayanama chënga tšabá o ndoñe tšabá tmonjamama.

¹⁹ Cha ndoñe queochátayajuatsana, ni queochátschembuana.

Chabe oyebuambnayana tsáshenañe ndocná queochatuena.

²⁰ Mo nda chë atcana šëse ndoñe más jatsndbimana, chë ndobenënga cha ndoñe queochátapochocaye.

Mo nda chë quinÿenëfjua nÿe uabojátsena uajuinÿnëfjua ndoñe ntsafsanana, chë Bëngbe Bëtsábeñe jtsošbuáchiyama imojtsebojángbe obatmanana chábeñe, cha ndoñe queochátabuajuanaye.

Cha nÿets añémoca echanjëftsetrabája, entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

²¹ Y nÿetsca luarënguentsana entsanga chábeñe mochantsobátmana ca –cha tojánayana.

Fariseunga tmojánayana Jesús Satanásbentsana obenana tojanóyëngacñe ca (Mc 3.20-30; Lc 11.14-23; 12.10)

²² Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshá, chabuatabinÿnama y chabuatauënanama.

²³ Y nÿetsca entsanga ojanánënga imojtsichamo: “¿Mua yojtsemna chë Davidbentsana Uámama Entšá, chë Cristo ca?”

²⁴ Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

²⁵ Y Jesús yojtsetátsëmbo ntšamo chënga imojtsejuabnayama; as tojanëyana: “Canÿe amëndayentše entsanga tmojtsenojatá y tmojtseñayase, cachënga jenpochócana. Cachcá, canÿe bëts pueblentša entsanga o canÿe yebnentša pamúllanga tmojtsenojatá y ndoñe tmonseneyeunanëse, chënga ndoñe tšabá nÿets tempo quemochátsmëna.

²⁶ Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebomnana?

²⁷ Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmontsichámuama.

28 Y atšna, chë Bëngbe Bëtsabe Espíritbeyeca chë bayëjënga entsángbentšana sëndëtëbuacana; y chë soye entsinÿinÿná Bëngbe Bëtsabe amëndayana tšëngaftangbioye tojóshjanguama.

29 “¿Ntšamo nda nanjobenaye canÿe corente añemo bomna entsabe yebnoye jamashënguana y chabe soyënga jtsebocana, ndoñe natsana chábioye tconjhétsebatsëquëse? Nÿe tcojshétsebatsëquësna aíñe cuanjobenaye cha jecana. Atše ya chca Satanásoftaca sënjama.

30 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

31 “Chíyeca cbéyana, Bëngbe Bëtsá entsanga echanjaperdonaye nÿetsca chëngbe bacna soyënga y chë Bëngbe Bëtsabiana puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiana puerte bacá ichámënga.

32 Bëngbe Bëtsá bochanjaperdóna chë Cha Entšá tbojanbemabiana ndoñe tšabá ichamuábioye; pero chë Uámana Espíritbiana ndoñe tšabá ichamuábioyna, ni quem luarentše, ni ndocna te queochatsperdóna ca” —Jesús tojánayana.

Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá

(Lc 6.43-45)

33 “Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá.

34 ¡Mëtšcuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnana entšá jtsóyebuambnayana.

35 Chë tšabe entšá, chë ainanoca tšabe juabnënga bomnentšana jtsóyebuambnayana, y chë bacna entšana chë ainanoca bacna juabnënga tobomnentšana jtsóyebuambnayana.

36 Y ndegombre cbéyana, chë entsangbiana tšabá o ndoñe tšabá tmonjamama jayanama tempo chaojobuachë ora, ndaye ndoservena palabra šmojóyeuambama, Bëngbe Bëtsabe delante šmochanjayana ndáyeca chca ca.

37 Er ntšamo tcojtsóyeuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

Chë bacna entsanga Jesús tmojanimpadá canÿe bëtš soye chaoma, chabe obenana jinÿyama

(Lc 11.29-32)

38 Chentšana, básefta fariseunga y Moisesbe ley abuatambayënga Jesús tojantjá: —Buatëmbayá, bënga fsëntseboše aca canÿe bëtš soye chacoma, acbe obenana chašcuinÿanÿema ca.

39 As Jesús tojanjúa: —Quem puerte bacna entsanga y ndošbuáchiyënga montseboše atše canÿe bëtš soye chaima, atšbe obenana jinÿanÿiyama; pero chca soye ndoñe quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soy cá.

⁴⁰ Ntšamo Jonás unga te y unga ibeta chë bëts beonbe uafsbioye yojëftsemná, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjëftsemna.

⁴¹ Morsca entsánga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsánga mochanjotsaye y morsca entsángbiana mochanjayana ndoñe tšabá tmonjama ca; er chënga, Jonás yojtsabuayinaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiana más uamaná endmëna.

⁴² Morsca entsánga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsángbiana echanjayana ndoñe tšabá tmonjama ca; er chana chë quem luare uajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiana más uamaná endmëna ca —Jesús tojánayana.

Ndayá inopása chë bacna entsángaftaca
(Lc 11.24-26)

⁴³ Jesús mëntšánaca tojánayana: “Canýe bacna bayëja canýe entsábentšana tojësebocna ora, chë bayëjna bojojo luarënguenache jtsanana ndayentše jóchnama onguayíñe, y canýe luare ndoñe tonjínýena ora cha jenójuaboyana:

⁴⁴ ‘Atšbe oyenoye, chë ndayentšana sënjëftsebocnoye chanjesshëcona ca’. Y choye tojtashjango orna, jinýenana lempe tšabá cha jtesamashënguama, mo chentše ndocná tontsiyencá, tsajjniñe y lempe botamaniñe cuaftsemná.

⁴⁵ Chorna chë bayëjna jana y inýe canýsëfta bayëjenga chabiana más opëjenga jobiatšana y nyetscanga choye jamashjnana chë boyabásabeñe joyéanama. Y chca, chë boyabása tempscama más bacna entsá jtsemnana, chora chë natsanama más bayëjenga abamna causa. Morsca puerte bacna entsángaftaca cachcá echanjochñëngo ca” —Jesús tojánayana.

Chë Jesusbe ndegombre pamillanguentsënga
(Mc 3.31-35; Lc 8.19-21)

⁴⁶ Jesús cabá entsánga yojtsëtsësnaye ora, chabe mamá y catšátanga tojánashajna y imojtseboše Jesúseftaca jóyebuambayama. Nýe shjoca imojtsemna;

⁴⁷ asna, canýe boyabása Jesúsbioye tbojanbuayená: —Acbe mamá y acbe catšátanga shjoca montsemna y montseboše ácaftaca jóyebuambayama ca.

⁴⁸ Pero Jesús chë jauenayama tojánabioye tbojanianaya: —¿Nda atšbe mamá yomna, y ndëmuanýenga atšbe catšátanga ca?

⁴⁹ Y cachora chabe cucuatše tojanatsbaná, chabe uatsjëndayënga tojanënyañýe y tojánayana: —Quemënga montsemna mo atšbe mamá y mo atšbe catšátanga.

⁵⁰ Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca —Jesús tojánayana.

13

Chë jenabe cuento
(Mc 4.1-9; Lc 8.4-8)

¹ Cach te, Jesús yebnentšana tojëftsanbocna y uafjajónaye tsachoca tojanótbema.

² Mallajta entsanga choye tmojanobeconá; as Jesús, chë uafjajónayentšë yojanamna canýe barquëshoye tojánášëngo, tojanótbema; y chë entsangna tsachoca imojtsemna.

³ Chorna ba soyëngama cuentëngaca chënga tojanabuatambá.

Mëntšá tojanëyana: “Canýe jená chë jénaye jauquëshama yojëftsebozna.

⁴ Yojtsëjqüshaye orna, básefta jénaye benache juachañe yojuatquëcjana, pero chë jaja shloftšënga imojástjajna y lempe imojtsósañe.

⁵ Inýe meshëngna ndëtsbenguñe yojuatquëcjana, ndoñe yapa fshantse binýnentšë. Chiñna betscó yojuábocna, fshantse ndoñe jashenocana yonjannëna causa,

⁶ pero shinýe yojábocna ora, puerte yojojënyána y yojtsancta; y yojtsábojo, bëtsca tbtëjënga tondaye causa.

⁷ Inýe meshëngna uchemëshangañe yojuatquëcjana, y chë uchemëshangá yojuájua orna, lempe yojtsatscuë.

⁸ Y inýe meshëngna, uanganëshiñe yojuatquëcjana y puerte botamana chiñe yojuashajo: inýenache nýe canýe jénayentšana mo patse meshënga yojuashájona, inýeñna mo chnënguana bnëtsana meshe y inýeñna mo unga bnëtsana meshe.”

⁹ Jesús chca jacuéntama tojanpochocá ora, mëntšá tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye
(Mc 4.10-12; Lc 8.9-10)*

¹⁰ Chora chë uatsjëndayënga tmojanobeconá y Jesús tmojantjá: —¿Ndáyeca entsanga cuentëngaca cojtsabuatambá ca?

¹¹ As Jesús tojanëjua: —Bëngbe Bëtsá tsëngaftanga cmontsinýanýná nýetsca chë mo iytëmcá yomna soyënga chabe amëndayama, pero chë inýengbioyna ndoñe.

¹² Nda tojtseboznábioye más jatštayana y chca cha corente bëtscá jtsebomnana; pero chë tondaye tondboznábioyna, chë batsatema tobomna sóynaca mochántseboza.

¹³ Chíyeca atše cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque becá chë soyënga chamouena, ndoñe tsabá quemochátuenana, ni queochátësertana.

¹⁴ Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinýe

¹⁵ Quem entsanga ndoñe quemátsboše botamana jajuaboyana;

chënga uamatsáhtonënga montsemna

y chëngbe bomínýnaca cachcá.

Chca ndóñesna, chënga muantsobena jinýama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojëftsanbema.

¹⁶ “Tsëngaftangna oyejuayënga šmochanjoyena, er šmondbozna bomínýe y matscuasënga Bëngbe Bëtsabe soyënga jinýama y jouenama.

17 Ndegombre chéyana, banga Bëngbe Bëtsabe juabna oyebuambnayënga y nyetsca soyënguine tšabá amënga tmonjánbošena chë tšëngaftanga šmontsonyá soyënga jinýama, y ndoñe chemátaninye; tmonjánbošena chë tšëngaftanga šmotsuenana soyënga jouenama, y ndoñe chemátanuena ca” —Jesús tojanëyana.

*Jesús chë jenabe cuentama tojanabuayená
(Mc 4.13-20; Lc 8.11-15)*

18 “Chcasna, oído šmochjajajo; chë jenabe cuento mëntšá endayana:

19 Chë Bëngbe Bëtsabe amëndayama tmojouena y ndoñe tontšesertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabëtsabuajuanama, chënga chiñe ndoñe chamondëtsošbuáchema.

20 Y chë ndëtšbenguine yojuatquécjana jénaye entsemna mo chë aïne Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá;

21 pero ndoñe nyets tempo chana jocháchajuana, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga chëngbioye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye.

22 Chë ucmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnama yapa mochántsenojuabnaye y mallajta crocénana y ba soyënga jtsebomnama mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana.

23 Pero chë uanganëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyëngna inyëngbiana más bëtscá soyënga mochántsama, y chca, inyënga jtsemnana mo chë patse meshënga tojanshajo jenaycá, inyënga mo chë chñënguana bnëtsancá y inyëngna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

24 Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje.

25 Pero nyetscanga imojtsomañe orna, chabe uayayá yojáshjango y chë trigo jeniñe bacna shácuaana yojesejé y yojtsatoñe.

26 Y chë trigo yojuájua y ya yojtseshajuana orna, chë bacna shácuanënaca yojuábocna.

27 As chë peonga imojá chë nduiño jauyanama: ‘Bacó, chë jajañe tšabe jénaye tconjanje y as, ¿ndáyeca chë bacna shácuaana chiñe tojuábocna ca?’

28 Y chë nduiño yojáyuana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuaana jetsejštsëtsama ca?’

29 Pero chë nduiño yojáyuana: ‘Ndoñe. Chë bacna shácuaana šmojtsejštsëtsana ora, chë trígnaca šmattsejštsë ca.

³⁰ Más tšabana, cachcá mochjonÿaye cányĩñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinÿiyama, y chentšana chë shajuana chamutatbaná y atšbe grano uaquëcjnaye yebniñe chamotsatsuumá ca' —Jesús tojánayana.

Chë mostaztiye jenayama cuento
(Mc 4.30-32; Lc 13.18-19)

³¹ Jesús mëntšánaca tojanacuntá: “Bëngbe Bëtsabe amëndayana endmëna mo canÿe mostaza betiye jenaycá, canÿe boyabása chabe jajañe yojáje.

³² Ndegombre, nÿetsca jenayëngama chë mostaza jénaye chë más básetema endmëna, pero tojójua orna, chë jajañentše chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chíñe uajajonëtemëngá jauábopormana ca’ —Jesús tojánayana.

Chë levadurama cuento
(Lc 13.20-21)

³³ Quem inÿe cuéntnaca tojanëyana: “Bëngbe Bëtsabe amëndayana endmëna mo levadurcá; canÿe shembása chana jenájuabana unga medida arninÿañe, nÿetsana chauabochama ca.”

Ndáyeca Jesús entsanga cuentëngaca yojanabuayiná
(Mc 4.33-34)

³⁴ Jesús nÿetsca chë soyëngama lempe cuentëngaca entsanga jtsëtsëtsnayana, y cuentëngaca ndoñesna ndoñe yonjanoyebuambná.

³⁵ Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:

Jabuátambamna cuentëngaca chanjóyebuambaye;
chanjayana chë iytëmena soyëngama y chë entsanga ndoñe mondëtatšëmbo soyëngámna;

Bëngbe Bëtsá quem luare tojanma orscana chë soyënga yomna ca —cha tojánayana.

Chë tríguañe bacna shácuana cuentama Jesús tojanabuayená

³⁶ Chentšana Jesús chë entsanga tojtanichamó y yebnoye tojtanamáshëngo. Chentšna chabe uatsjëndayënga tmojanimpadá ndayá chë bacna shacuanama cuento betsayancá chauabuayenama.

³⁷ As Jesús tojanëyana: “Chë tšabe jénaye jená endmëna chë Bëngbe Bëtsá Entšá tbojanbemá,

³⁸ y chë jajaña, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entsanga, y chë bacna shácuana entsemna chë bacna bayëjëngbe amëndayabe entsanga,

³⁹ y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotëmënga.

⁴⁰ Ntšamo chë bacna shácuana jtsejashtsëtšana y inoye jtsatmetšana jtsejuinÿiyama, cachcá echántsemna quem luare jopochócama te.

⁴¹ Chorna, chë Bëngbe Bëtsá Entšá tbojanbemá chabe angelotëmënga echanjichamuá chë inÿënga bacna soye chamomama amënga y chë bacna soyënga amënga chabe amëndayentšana chamotsajuanyama.

42 Y chora chëngbioye chë uabouana ñeshoye mochantsësetjango y chentse puerte mochanjenóbošachna y chë tsetšanama juatsašënga mochantsenoftëšjojnaye.

43 Chora, chë ntšamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” —chora Jesús tojánayana.

Chë fshantsiñe uaiytëmena bomnanama cuento

44 “Bëngbe Bëtsabe amëndayana endmëna mo chë fshantsiñe uaiytëmena bomnancá. Canýe boyabása chë bomnana yojuinýena y chentšana iytëcana cachentse yojetsatbontsá. Corente oyejuayá yojtá, nyetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

Chë corente uámana fiantse ndëtsëtëmama cuento

45 “Mo canýe entšá uámana fiantse ndëtsëtëmënga obuamnañacánaca endmëna chë Bëngbe Bëtsabe amëndayana.

46 Chana, canýe corente uámana ndëtsëtëma yojinýena ora, yojtá y lempe chë inabomma soyënga yojetsatobuiye y chë ndëtsëtëma yojtobuámiñe ca” —Jesús tojánayana.

Chë atarraiëshama cuento

47 “Bëngbe Bëtsabe amëndayana endmëna mo canýe atarraiëshacá, buyeshoye jutšenana y nyetsca beonga jashebuáyana.

48 Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentse juatbëmana chë beonga jabocacayama; chë tsábënga sbarëquënguiñe juatsuámana y chë ndoñe tsábënga jtsëšanana.

49 Cachcá echanjochnëngo quem luare jopochócama tempo chaojobuache ora. Chë angelotëmënga mochanjábocana chë tsabe entšángbentšana bacna entšanga jaluárama,

50 y chë bacna entšangna chë uabouana ñeshoye mochántsatquëcjaye, y chentse puerte mochanjenóbošachna y chë tsetšanama juatsašënga mochantsenoftëšjojnaye ca” —Jesús tojanacuntá.

Anteo y tsëm uámana bomnana

51 Chora chabe uatsjëndayënga Jesús tojanatjá: —¿Lempe chama quecmojsësertana ca?

Y chënga tmojanjuá: —Arseñor, aíñe ca.

52 As Jesús tojanëyana: —Canýe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjëndá orna, mo canýe yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanëyana.

Jesús Nazaretoca (Mc 6.1-6; Lc 4.16-30)

53 Jesús chë soyënga jacuëntama tojanpochócá ora, chentšana tojtsanoñe.

⁵⁴ Y cachabe luaroye tojtanashjango y chentša judiëngbe enefjuana yebnentše tojanontšé jabuátambama. Entšanga ojnánänënga imojtsichamo: —¿Chê lempe yojtsetatšëmbcá ndëmoca mua tojuatsjinÿe ca? ¿Ntšamo nantsobena chca bêts soyënga jamama ca?

⁵⁵ ¿Mua ndoñe yondmëna chë calpinterbe uaquiná y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata,

⁵⁶ y chabe uabénanga ndoñe muentše bëngaftaca mondoyena? ¿Ndayentšana lempe chca mua yojtsebomna ca? —chënga imojtsichamo.

⁵⁷ Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanëyana: —Nÿetsquénache canÿe Bëngbe Bëtsabe juabna oyebuambnayá bêtsá jabemëngana, pero cachabe luarentše, cachabe yebnentše ndoñe ca.

⁵⁸ Chiyeca chentše Jesús ndoñe tonjëftsanma ba bêts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

14

*Ntšamo Juan chë Ubayaná tojanóbana
(Mc 6.14-29; Lc 9.7-9)*

¹ Chê tempo, Rey Herodes, chë Galileoca mandayá tojanuena ntšamo nÿetsca entšanga Jesucristbiana imojtsichamcá.

² As cha chabe oservénënga tojanëyana: “Mua Juan chë Ubayaná ctsemna, obanënguentshana tojtayena, chíyeca chca obenana bêts soyënga jamama yojtsebomna ca.”

³ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipe shema.

⁴ Juan Heródesbioye mëntšá ibnauácacana: “Ndoñe quenátslesenciana aca acbe catšatbe shëmaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entšangbiana yojtsautja, er chënga innajuabnaye Juan ndegombre Bëngbe Bëtsabe obenánaca yojanoyebuambná ca.

⁶ Pero Heródesbe cumpleaños oboyejuaye ora, Herodíasbe bembe entšangbe delante tojanlantsá y Herodes puerta chama yojtsóyejuaye.

⁷ Chiyeca Herodes, jajúrase, tbojanšbuachená ndayánaca jatšetayana, ntšamo tbojtjañcá.

⁸ Y Herodíasna lempe bémbëbioye ibojabuayená ntšamo Herodes jojuama. As chë bembe tbojanianana: “Canÿe šcneniñe Juan chë Ubayanabe bestšaše šmatšetá ca.”

⁹ Herodes chë soyama tbojanongmé, pero chë ófanëngbe delante jajúrase tbojanšbuachená causa, yojamánda chca chaotsemnama.

¹⁰ Y as tojanmandá chë Juan yojanëtámenoca chabe bestšaše chamuetséstjanguama.

¹¹ Chentšana, canÿe šcneniñe chë bestšaše tmojanamba y chë tobiase tmojanëntšabuaché y chana, chabe mamábioye.

¹² Chentšana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

Jesús shachna uaranga boyabásenga saná tojanacaredadó
(Mc 6.30-44; Lc 9.10-17; Jn 6.1-14)

¹³ Jesús chca tojanuena ora, canye barquëshañe tojtsanoñe canye bën luaroye, entšanga ndoyena luaroye. Pero entšanga chama imojátatšëmbona y chë pueblënguentšana tmojánbocana shecuátšeca cha juastama.

¹⁴ Chentšana, chë barquëshoicana tojtánastjango ora, Jesús ba entšanga tojánanye, chë cha tmojánguanguënga. Chëngbiana tbojanongmé y chë entšanguentšana ba šoquënga tojanashná.

¹⁵ Ya jetiñe yojtsemna, chíyeca chë uatsjëndayënga Jesúsbiyoe tmojanobconá y tmojaniyana: —Ya jetiñe entsemna y quem luariñe ndocná quenatiyena. Entšanga cuantichamuá, pueblotémëngoye chamotsoñama, saná chamobuámiñama ca.

¹⁶ As Jesús tojanëjua: —Ndoñe quenátšiyta chënga chamotsatoñama. Tšëngaftanga saná šmochjacaredádaye ca.

¹⁷ Y chënga tmojanjúa: —Muentše tondaye queftsátšbomna; nje shachna tandëse y uta beónata ca.

¹⁸ As Jesús tojanëyana: —Chë soyënga moye miyëbo ca.

¹⁹ Chentšana Jesús tojanmandá entšanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontješé y Bëngbe Bëtsábíoye chama tojtanchuá. Chora chë saná tojanjátá, chabe uatsjëndayënga tojanëjátaye, y chëngna njetšca entšanga tmojanacaredadó.

²⁰ Njetšca entšanga tmojanse jtoshachaye njetšá y cabá chë ojamnëtëmëngaca bnëtsana uta sbarëcua tmojanajutjé.

²¹ Chë tmojansënga imojamna mo shachna uaranga boyabásenga, shembásenga y básenga ntjacuntacá.

Jesús béjaye juatsbuacá yojtsaye
(Mc 6.45-52; Jn 6.16-21)

²² Chentšana, Jesús chabe uatsjëndayënga tojanamëndá chë barquëshoye jtamashjnama y chë uafjájónaye chenguánoica chabe natsana jashjajnana. Chëntscuana Jesús entšanga yojtichamuá.

²³ Njetšcanga tojtánichamó orna, Jesús canye tjoye tojántšjua canya jtsemnama, Bëngbe Bëtsáftaca jencuëntama. Yojaibétata ora, cha canya chentše yojtsemna,

²⁴ y chë barquëshana tsachocana bënoca yojtsamna. Y chë olëshënga chë barquëshaya yojtsájantšetaye, chë binýia chëngbe contra yojtsemna causa.

²⁵ Ya binýanoyna, Jesús chëngbiyoe yojobeconá; béjaye juatsbuacá yojtsaye.

²⁶ Chabe uatsjëndayënga chca cha tmojáninýe orna, tša imojocochauatjaná y puerte auatjanánënga tmojanoyó: —¡Canyë añëmëse entsemna ca!

²⁷ Pero chora Jesús tojanëyana: —¡Añemo šmochtšebomna, atše Jesús sëndmëna; ndoñe matauatjëngana ca!

²⁸ Chora Pedro, Jesúsbiyoe tbojaniyana: —Bëngbe Utabná, ndegombre aca tojtsemnëse, momandá atše béjaye juatsbuacá ácbíoye chayá ca.

²⁹ Y Jesús tbojaniyana: —Mabo ca.

Chora Pedro chë barquëshoicana tojánastjango y tojanontšé béjaye juatsbuacá Jesúsbiyoe jama.

³⁰ Pero chë binýia tša jabuache yojtsemnama tojáninýe ora, Pedro puerte yojtsauatja y tbojanontšé jtšenatjëmbambana. Chíyeca cha jabuache tojanchembo: —¡Bëngbe Utabná, šmatsbocá ca!

³¹ Y cachora Jesús tbojtano buacuētēntsiye y tbojaniyana: —¡Tša batšatema ošbuachiyá! ¿Ndáyeca ndoñe bētsá átšbeñe contsošbuaché ca?

³² Chentšana chē barquēshoye chata tbojtanamáshēngo y cachora chē binýia bonguana yojtsatsmēna.

³³ Y chora, chē barquēshoye imojtsemnēnga Jesusbe shecuatšentše tmojanoshamentšé y tmojaniyana: —¡Aca ndegombre Bēngbe Bētsabe Uaquiniá comna ca!

*Genesaret ca uabáinoca, Jesús ba šoquēnga tojanashná
(Mc 6.53-56)*

³⁴ Chē uafjájónaye tmojánenashbuachengo y canýe luare Genesaret ca uabáinoe tmojánashjajna.

³⁵ Chentša entšanga Jesús tmojantēmbá ora, chē luarentša nýetsca entšanga chama tmojántatšēmbona. As chē entšanga chēngbe šoquēnga Jesúsbioye tmojanēnatse.

³⁶ Y imojtseimpadana nýe mo chabe entšayá sibiájuanaca juabojajuama chē šoquēnga chaualesenciama. Y nýetscanga chabe entšayá sibiájua tmojanábojajēnga, shnánēnga imojtsatoquēdaye.

15

*Ndáyeca canýe entšá Bēngbe Bētsabe delante ndoñe tšabia nántsemna
(Mc 7.1-23)*

¹ Chora básefta fariseunga y judiēngbe ley abuátambayēnga, Jerusalenocana tmojánabēnga, Jesúsbioye tmojanobeconá y tmojaniyana:

² —¿Ndáyeca acbe uatsjéndayēnga ndoñe montsama chē ntšamo bēngbe bēts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bēnga chē judiēnga fsēnduamancá, Bēngbe Bētsabe delante tšábenga jtsatsmēnama ca?

³ As Jesús tojanējua: —¿Y ndáyeca tšēngaftanga ndoñe šmontsama ntšamo Bēngbe Bētsá tojanmandacá, nýe cach tšēngaftangbe bētsétsanga imnētsama soyēnga jtsamama ca?

⁴ Bēngbe Bētsá mēntšá tojanmandá: “Acbe bētsétsata stētšoye ndoñe catjáquedaye”, y “nda cachabe bētsétsatbiana podesca tojóyebuambase, chana jóbanama jtsemnana ca.”

⁵ Pero tšēngaftanga šmondbētsichamo canýe entšá canobena chabe taitá o chabe mamá jauyanana: “Lempe ntšamo sēndbomncá Bēngbe Bētsá jaserviama entsemna, chíyeca tondaye quetsátsbomna aca juajabuáchama ca”;

⁶ y šmondbētsichamo nýe ndánaca chca tojayanēse, ya ndoñe ntsemnana chabe taitá o chabe mamá stētšoye ndoñe ntjaquédana, ni ntjuajabuáchana ca. Y chca, tšēngaftangbiana tondaye ntsámanana ntšamo Bēngbe Bētsá tojanmandacá, y añe šmontsama ntšamo tšēngaftangbe bētsétsanga imojanamancá.

⁷ ¡Bacna entšanga, ntšamo ndegombre šmojuabnacá ndinýinýayēnga! Nýe tšabá chē Bēngbe Bētsabe juabna oyebuambnayá Isaías tšēngaftangbiana tojanoyebuambá, mēntšá tojánayana ora:

⁸ Bēngbe Bētsá tonjayana: “Quem entšanga mondbētsichamo Bēngbe Bētsá tša tšabia yomna ca; chca nýe uayásaca, pero chēngbe ainantešē atšbiana ndocna tšabe juabnēngaca.

⁹ Chēnga nýe bonamente mondbētsichamo: Bēngbe Bētsá tša tšabia yomna ca; chēnga nýe entšangbe mandēnga jtsabuátambayana y Bēngbe Bētsabe mandēnga ndoñe ca” —cha tojánayana.

10 Chentšana Jesús entšanga tojánachembo y tojanëyana: —Smochjouena y chacmësertá.

11 Ndayá entšá tojttesacá, ndoñe quebochátsbema Bëngbe Bëtsabe delante ndoñe tšabia. Inyëtšá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

12 Chora chë uatsjëndayënga Jesúsbiye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chen-ateúenana ca?

13 As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nyë entsangbe bu-atëmbana soyëngaca.

14 Cachcá monyaye; chënga montsemna mo jtanënga inyë jtanënga unachayëngcá. Y canyë jtaná inyë jtaná tbojtsánachase, nyëts útata canyë tbuabentše bochanjetsótsatše ca —Jesús tojánayana.

15 Chora Pedro, Jesúsbiye tbojanianyana: —Ntšamo chë cuento bétsayanama šmabuayená ca.

16 As Jesús tojanëjua: —¿Tšëngaftángnaca cabá ndoñe cmontsësertana ca?

17 ¿Cabá ndoñe cmontsësertana lempe ntšamo šmojascá uafsbiye jomashënguana y chentšana cuerpentšana jtabocnana?

18 Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbiye Bëngbe Bëtsabe delante ndoñe tšábenga jábiamana.

19 Ainanocana jtsóbocanana bacna juabnënga: jenóbama, shema o boyábíoye ínÿaftaca jaingñama, shembása o boyabásaftaca bacna soye jamama, jatbëbama, jobostërama y ínÿabiamana jtsayátsenayama.

20 Chë soyënga cocayé jtsobenana entšábíoye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

Canyë shembása inyë luarocana ashjanganá Jesúsbeñe yojtsošbuaché (Mc 7.24-30)

21 Jesús chentšana, Tiro y Sidón luarëngoye tojtsanoñe.

22 Canyë shembása Caná luarocá chentše inoyena; cha Jesúsbiye yojeboná y mëntšá yojtšáyebuache: —¡Utabná, Rey Davidbentšana Entšá, šmotselastemá! ¡Atšbe bembe puerte entsesufrana, bacna bayëjbe juabna entsebomna causa ca!

23 Jesús ndocá tbonjanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

24 As Jesús tojánayana: —Bëngbe Bëtsá atše šonjichmó jtsanÿenama nyë chë entšanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

25 Pero chë shembása tojána, Jesusbe shecuatšentše tojanoshamentšé y tbojanianyana: —¡Utabná! Diosmanda pavor šmotsebema. ¡šmotsajabuache ca!

26 Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbíoye tbojuajabuache y chëngbiyoye ndoñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátsmëna ca.

²⁷ As cha tbojanjuá: —Arseñor. Pero chë quesëngnaca chëngbe nduiñëngbe mesëshentsana tmojatquëcjanatemënga mondbase, chë nduiñënga tmojt-sesá ora. Chcasna, Diosmanda šmotsajabuache ca.

²⁸ Chora Jesús tbojanijana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošća chca chaotsemna ca.

Y cach orscana chabe bembe tšabá yojtatsmëna.

Jesús ba šoquënga tojanashná

²⁹ Jesús chentsana tojëftsanbuocna y chë Galilea uafajónaye tsachoye tojána. Chentsana, canýe batsjoye tojánstjua y choca tojanótbema.

³⁰ Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanéshejango y cha nýetscanga tojanashná.

³¹ Y chca orna, chë entšanga tmojáninýe: chë ndëbianga imojtsatoye-buambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanënga yojtšëbinýna; y chama chënga corente ojanánënga imojtsemna. Chora chënga tmojanontšé jëtschuayana chë Israelentša entšanga imojánadorana Bëngbe Bëtsá.

Jesús canta uaranga boyabásenga saná tojanacaredadó

(Mc 8.1-10)

³² Chentsana Jesús, chabe uatsjëndayënga tojánachembo y tojanéyana: — Quem entšangbiama šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

³³ As chabe uatsjëndayënga tmojantjá: —¿Ntšamo muatjobenaye quem luarentše, ndocna entšá ndoyentše, chëfta entšangbiama saná jinýenama ca?

³⁴ Y Jesús tojanatjá: —¿Bueta tandëse šmojtsebomna ca?

Y chënga tmojanjuá: —Canýsëfta tandëse y básefta beonatëmënga ca.

³⁵ Chora Jesús tojanamëndá nýetsca entšanga fshantsiñe chamotbiamama.

³⁶ As chë canýsëfta tandëse y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjëndayënga tojanëjatá. Chentsana nýetsca entšángbioye tmojanacaredadó.

³⁷ Nýetsca entšanga tmojanse jtoshachaye nýetsá. Y chentsana cabá canýsëfta bëts sbarëcua tmojanajutjé chë tojanójamëtemëngaca.

³⁸ Chë tmojansënga imojamna canta uaranga boyabásenga, shembásenga y básenga ntjacuntaca.

³⁹ Chentsana Jesús, chë entšanga tojtanichamó, barquëshoye tojánamashëngo y Magadán luaroye tojtanoñe.

16

Chë fariseunga y saduceunga tmojánbošena Jesús chaoma canýe bëts soye

(Mc 8.11-13; Lc 12.54-56)

¹ Fariseunga y saduceunga tmojána Jesús jinýama, y jisháchichiyama imojtseimpadana canýe bëts soye chaoma, as jtsetatšëmbuama Jesusbe obenana ndegombre Bëngbe Bëtsábocana tainóbocanama.

² Pero Jesús tojanéjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’

³ Y cachëse šmondbétsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontjesiyëse, ntšamo chë tempo yochtsemnama tša tšabá jayanama šmojtsobenëse, ¿ndáyeca ndoñe šmontsobena jtsetatsëmbuana ndaye bëts soye Bëngbe Bëtsá quem tempo cmojtsinñanyñama?

⁴ Quem puerte bacna entšanga y ndošbuáchiyënga montseboše atše canye bëts soye chaima, obenana jinñanyñiyama; pero ndoñe chca quemochátinñe, sinó nñe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soyca ca” —Jesús tojánayana.

Chora Jesús tojésanabashejuana y chentšana tojtsanoñe.

Jesús tojanabuayená chë fariseungbe buatëmbana soyëngama

(Mc 8.14-21)

⁵ Chë uafjajónaye chenguanoicana chënga tmojtanabo ora, chë uatsjëndayënga yojésebnëjtjomba tandëse jesocñana.

⁶ Chora Jesús tojanéyana: —Smochtsantješna; cuedado šmochtsebmna chë fariseunga y saduceungbe levadurama ca.

⁷ Pero chë uatsjëndayëngna imojtsenatsëtsnaye: —Chca entsichamo, bënga tandëse ndoñe tmonjesocñana ca.

⁸ Jesús chë soye yojtsetátsëmbo; chíyeca mëntšá tojanéyana: —¿Ndayeca tandëšama šmojtsenatsëtsná ca? ¡Tša batšatema ošbuáchiyana šmobomna!

⁹ ¿Cabá ndoñe cmontšësertana y ndoñe šmontsabouñña chë shachna tandëšentsana shachna uaranga entšanga sënjanëjuatšema y bnëtsana uta sbarëcua šmonjánajutjema?

¹⁰ ¿Y ndoñe šmontsabouññna chë canyšëfta tandëšentsana canta uaranga entšanga sënjanëjuatšema y canyšëfta sbarëcua šmonjánajutjema?

¹¹ ¿Ndayeca ndoñe cmontšësertana atše tandëšama ndoñe sëntsóyebuambnana? Cuedado šmochtsebmna fariseunga y saduceungbe levadurama ca —Jesús tojanéyana.

¹² As chora chë uatsjëndayënga tojanësertá, Jesús ndoñe tonjánayana chë tandëšentsa levadurama cuedado jtsebmnnana ca, sinó ndayá chë fariseunga y saduceungbe buatëmbana soyëngama.

Pedro tojánayana, Jesús chë Cristo bëtsemnama

(Mc 8.27-30; Lc 9.18-21)

¹³ Jesús, Cesarea de Filipo luaroye tojánashjango ora, chabe uatsjëndayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

¹⁴ Chënga tmojanjuá: —Báseftanga montsichamo Juan chë Ubayaná ca, ínñengna Elías ca, ínñengna Jeremías y ínñengna tempsca inñe Bëngbe Bëtsabe juabna oyebuambnayá ca.

¹⁵ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

¹⁶ Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

¹⁷ Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinñinñé, sinó atšbe Taitá, celoca endmëná.

18 Y mēntśánaca cbēyana: Mora acna Pedro o chē ndētsbecá contsemna, y chē ndētsbeñe atśbe bēts yebna chanjajebo, y ni Satanás, chabe obenánaca entśá jōbanama, queochatobenaye jtsepochoćama.

19 Atśe cbochanjátsetaye obenana, mo llavēfjćá, entśanga Bēngbe Bētsabe amēndayoye jamashēnguama chamobenama. Bēngbe Bētsáftaca chacojtsencuēnta ora, canye soye ndoñe chaondētsemna ca chacojayanēse, Bēngbe Bētsá cachća echanjayana. Y cháftaca chacojtsencuēnta ora, canye soye aifne chaotsemna ca chacojayanēse, Bēngbe Bētsá echanjayana aifne chca chaotsemna ca —Jesús tbojanayana.

20 Chentśana chabe uatsjéndayēnga tojanamēndá ndocnábeñe ntsecuēntayana cha, Jesús, chē Bēngbe Bētsabe Uámana Uabuayaná, chē Cristo bētsemnama.

Jesús tojánayana cha ibojamna jōbanana y jtayenana ca
(Mc 8.31-9.1; Lc 9.22-27)

21 Chorscana Jesús tojanontśé chabe uatsjéndayēnga jábuayenana cha ibojtsemna Jerusalenoye jama, y chocna chē bētsējemēngćá mándayēnga, chē judiēngbe bachnangbe amēndayēnga y chē ley abuátambayēnga mochjanma cha puerta chaopadecema ca. Tojanēyana cha mochjanóba, pero unga tianoye yochtanayena ca.

22 Chora Pedro, Jesúseftaca tojanoluaré y tojanontśé mēntśá uatsētsnayana: —¡Atśbe Utabn, Bēngbe Bētsá ndoñe chaondēlesenciá chca chaopasama! ¡Ndocna te quenaisopodena chca ácaftaca jopásana ca!

23 As Jesús tojanobuértana y Pédrēbioye tbojanayana: —¡Satanás, átśbentśana mojuaná! ¡Aca contsebośe atśe canye bacna soye chaśócochēnguama! Pedro, acbe juabnēnga Bēngbe Bētsábiocana ndoñe quenatóbocana, sinó nye entśángbentśana ca.

24 Chentśana Jesús chabe uatsjéndayēnga tojanēyana: —Nda atśbe uatsjendayá jtsemnama tojtsebośe, cháuyana nye Bēngbe Bētsá yobena sempre chabe vidifne jtsemándayana ca, chabe quem luarentśa soyēnga cachća chauesonýá atśe juastama, y atśbiama jasúfriama chaotseprontana y crucifne jobanámna.

25 Nda tojtsama quem luarentśe bētsćá soyēnga jtsebomnama y atśbiama jasúfriama ndoñe tontseprontana, chē nýetsca tescama yomna tśabe vida echanjopérdia. Pero nda quem luarentśa soyēnga cachća tojēftsonýá atśe juastama, masque chaóbana, chē nýetsca tescama yomna tśabe vida echantsebomna.

26 ¿Ndayama entśá buanjóservia nýetsca quem luarentśa soyēnga jtsebomnana, chē nýetsca tescama yomna tśabe vida tojtsoperdese? Ndegombre, canye entśá chē nýetsca tescama yomna tśabe vida tojtsoperdese, ndocna soye quenátsmēna cha chaobená joyiyama, chē nýetsca tescama yomna tśabe vida jtsebomnama.

27 Chē Bēngbe Bētsá Entśá tbojanbemá, chabe Taitabe obenánaca y puerta buashinýinýaniñe echanjabo chabe angelotēmēngaftaca, y chora cada cánýabioye bochántatśetaye cachćá ntśamo cada ona tojēftsemćá.

28 Ndegombre ōcuayana: Báseftanga muentśe montsemnēnga ndoñe quemochatóbana, Bēngbe Bētsá Entśá tbojanbemá amēndayacá jabana ntjēftsinýća ca —Jesús tojánayana.

17

Jesús inyetšá tojanobinýná
(Mc 9.2-13; Lc 9.28-36)

¹ Chentšana chnënguana tianoye, Jesús tojéftsanëbiatše Pedro, Santiago y chabe catšata Juan, y inýoye tojanënatse nýe chënga, canýe bëts tjoye.

² Chentše, chëngbe delante inyetšá cha tojanobinýná. Chabe jubíá shinýcá yojtsebuashinýinýana, y chabe uichëtjonëjuangana mo binýniñcá uafjantsëjuangá yojtsamna.

³ Chca orna, chabe uatsjédayënga tmojáninýe Moisés y Elías tbojanobinýná, Jesúseftaca encuéntaye.

⁴ Chora Pedro, Jesúsbioye tbojaniana: “Bëngbe Utabná, jtša tšabá bëngbiama cuanmëna muentše jtsemnana ca! Tcojtsebošëse, unga tambotëmënga atše chjapórma: cánýetema acbiana, inýetema Moisesbiana y inýetemna Elíasbiana ca.”

⁵ Pedro chca yojtsóyebuambnantscuana, canýe buashinýinýana jantšetëshe nýetscanga yojáutsbotse. Y chë jantšetëshoicana canýe oyebuambnayana tmojanuena mëntšá: “Mua atšbe bonshana Uaquíñá endmëna, atše chabiana sëntsoyejúá. Cha šmochtseyeunana ca.”

⁶ Y chë uatsjédayënga chca tmojanuena ora, tmojanoshamentšé y jubíaca fshantsóntsoñe tmojanotsejbéna, puerte auatjanánënga.

⁷ Chora Jesús chabe uatsjédayëngbioye tojanobeconá, tojánabojajo y tojanëyana: “Matëtsbananga; ndoñe matauatjëngana ca.”

⁸ Y tsbanánoye tmojanontješé ora, Jesús nýe canýa tmojáninýe, ndocná inýa más.

⁹ Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentsšana candëtayenëntscuana, ndocnábeñe chë šmonjinýe soyama šmattsecuéntaye ca.

¹⁰ As chë uatsjédayënga Jesús tmojantjá: —¿Ndayeca chë ley abuátambayënga mondbëtsichamo, canmëna Elías jabana chë Bëngbe Bëtsabe Uámana Uabuayanabe natsana ca?

¹¹ Chora Jesús tojanëjua: —Ndegombre canýa Eliascá natsana echanjabo y ntšamo jtsemnana yomncá, lempe echánjabatsma ca.

¹² Pero atše cbëyana, canýa mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entšangbe cucuatšíñe echanjasúfria ca —Jesús tojánayana.

¹³ Chora chë uatsjédayënga tojanësertá, Juan chë Ubayanabiana Jesús chca yojtsëtsëtsnama.

Jesús, canýe bacna bayëja tbojanbojuaná
(Mc 9.14-29; Lc 9.37-43)

¹⁴ Entšanga imojtsemnoy chënga tmojtjanashjajna ora, canýe boyabása tojanobeconá, Jesusbe natsanoica yojoshamentšiyey tbojaniana:

¹⁵ —Utabná, atšbe uaquíñá motselastemá. Cha ataque bontšësháchichana y puerte entsesufrina, er cha inýe ora iñoye jtseshajayana y inýe orna, buyeshoye jtsoshbuetšana.

¹⁶ Acbe uatsjédayëngbioye cha sënjuánatse y ndoñe chematobená jtseboshnama ca —cha tbojaniana.

17 As Jesús tojánayana: —¡Nyetšá ndošbuáchiyënga y bacna entsanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë bášetema mánatse ca.

18 Chora Jesús, chë basetembeñe bacna bayëjbioye tbojanácacana y chábensana cha tojésanbocna. Cach orscana chë bášetema tšabá yojtatsmëna.

19 Chentšana, chë uatsjëndayënga luaroca Jesúseftaca tmojanoyebuambá y tmojanayana: —¿Ndáyeca bënga ndoñe fsënjobená chë bacna bayëja jtabocnama ca?

20 Y Jesús tojanëyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñëse, masque nÿe mo canÿe mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena.

21 Pero chca bayëjënga jtëbuacnamna jobenayana nÿe Bëngbe Bëtsáftaca jencuéntase y chama tondaye ntjascá jtsemñëse ca —Jesús tojanëyana.

Jesús cachiñe tojánayana cha ibojamna jóbanana y jtayenana ca
(Mc 9.30-32; Lc 9.43-45)

22 Jesús y chabe uatsjëndayënga cánÿiñe Galilea luaroye imojétsaye ora, cha tojanëyana: “Chë Bëngbe Bëtsá Entšá tbojanbemá entsangbe cucuatšifne mochanjáboshjona,

23 mochanjóba, pero unga tianoye echántayena ca.” Chë causa chë uatsjëndayënga puerte ngmënaca imojtsemna.

Chë Bëngbe Bëtsabe bëts yebnama impuesto jtsatsquëcjnyama

24 Jesús y chabe uatsjëndayënga Capernaumoye tmojánashjajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: —¿Acbe बातëmbayá Bëngbe Bëtsabe bëts yebnama impuesto queonÿbetsatsquëcjnyaye ca?

25 Y Pedro tojanëjua: —Aíñe, cha endbetsatsquëcjnyaye ca.

Chentšana, Pedro chë yebnome tojánamashëngo ora, Jesús natsana mëntšá chábioye tbojanayana: —Simón, ¿ntšamo catjájuaboje? ¿Quem luarentša reyënga ndémuanÿengbioye impuesto imnétsayëngacaye y crocénana imnétsatjanaye: cach luarentše oyenëngbioye o chë inÿe luarocana ashjajnëngbioye ca?

26 As Pedro tbojanjuá: —Chë inÿe luarocana ashjajnëngbioye ca.

Y Jesús tbojanayana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyayana ca.

27 Pero ndocná mal chabonduínÿnanamna uafjajónayoye motsa, anzuelëfjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiama y acbiama jëtsjájuama. Cochjëftsejatsëca y cochjatsboshjona ca —Jesús tbojanayana.

18

¿Nda chë más uamaná yomna?
(Mc 9.33-37; Lc 9.46-48)

1 Chentšana chë uatsjëndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

² Chora Jesús canye basetémbioye tbojanchembo y chëngbe tsëntsaca tbojanatsá.

³ Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama.

⁴ Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna.

⁵ Y nda átsbeñe ošbuachiyá bétsemnayeca, tbojofja canya mo quem basetembiocá, chana atše jofjana ca —Jesús tojánayana.

Resjo yomna, nderado bacna soyënga cuanjama
(Mc 9.42-48; Lc 17.1-2)

⁶ “Nda canye básetema átsbeñe ošbuachiyábioye tbojaingñe bacna soye jamama, chabiama más tsabá nántsemna canye bëts nantsnëbé chamotsetamošëntšbua y chë mar béjaye shbuatsëntsoye chamotsashbuetše chabotsen-atjëmbama.

⁷ ¡Tša lastema quem luarentša entsangbiana, chë ínÿenga bacna soye jamama chaócochënguama tmojtsamëngbiana! Nÿets tempo chca amënga mochanjëftsemna. Pero, ¡payajema chë ínÿa bacna soye chaomama tojtsamá ca!

⁸ “Chíyeca, acbe cucuatšeca o acbe shecuatšeca bacna soye tcojamëse, cochtšenástjango y bënoye cochtsëtšena. Acbiama más tsabá nántsemna celoye jamashënguana chë nÿetsca tescama yomna tsabe vida jtsebomnama, cucuatše ndbomná o cosheto, y ndoñe nÿets uta cucuatšeca o shecuatšeca chë nÿets tempo echanjesomñe ñëshoye chacmotsëstjango.

⁹ Nderado acbe bomínÿeca bacna soye tcojinÿe y cachca soye tcojama, chë bomínÿe cochtšenobuchjatsëca y bënoye cochtsëtšena. Acbiama más tsabá nántsemna, celoye jamashënguana nÿe canye bomínÿeca, y ndoñe nÿets uta bomínÿeca infernoye chacmotsëstjango, chë bëts ñëshoye ca” —Jesús tojánayana.

Chë ótsena oveshabiana cuento
(Lc 15.3-7)

¹⁰ Mëntšánaca Jesús tojánayana: “Ni mo cánÿabioye quem tsëm ošbuáchiyënguentšana, chë mo basetemëngcá mondmëñënga, mo nduamanacá šmatsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondésemna ca.

¹¹ Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnënga jabátsebacama.

¹² “¿Ntšamo tsëngaftanga šmatjájuaboye? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesëñÿaye, jama chë ótsena oveshá jetsenguanguama?

¹³ Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsena oveshabiana, y ndoñe nÿa chca chë inÿe esconëfta bnëtsana y esconëfta oveshëngbiana chë ndoñe tmonjanotšëngbiana.

¹⁴ Cachcá, tsëngaftangbe Taitá, Bëngbe Bëtsá, chë celoca endmëñá, ndoñe quenátšboše ni canya quem basenguentšana mo otšenacá chaotsemna, bacna soyënga jtsamëse oyena causa ca” —Jesús tojánayana.

*Ntsamo cuanjama inya japerdónama
(Lc 17.3)*

15 “Nderado acbe catšata, bacna soye tcmojaborlase, cochjá, cánjata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsatsmèna.

16 Pero ndoñe tcmónjóyeunasna, inye útata cochjáchembo chacmotjèmbambama, chca, chata chabouena ntsamo cochjauyanama y chamuayana ndegombre chca yomnama.

17 Y chata ndoñe tonjóyaunase, chentša Bèngbe Bètsábeñe ošbuáchiyènga macuntá. Y chènga ndoñe tonjóyaunasna, cochjayana cha yomna mo canya Bèngbe Bètsábíoye nduabatmacá, mo canye ndoñe judiyca ca o canye bacna entsá mo canya Romocama impuesto entsángbioye atjanayacá yomna ca.

18 “Ndegombre cbéyana: Tšèngaftanga Bèngbe Bètsáftaca chašmojtsencuénta ora, chašmojayana canye soye ndoñe chaondètsemna ca, Bèngbe Bètsá cachcá echanjayana. Y cháftaca chašmojtsencuénta ora, chašmojayana canye soye aña chaotsemna ca, Bèngbe Bètsá echanjayana aña chca chaotsemna ca.

19 “Mèntsánaca cbéyana: Nderado útata tšèngaftanguentsana quem luarentše tbojenoyeuná Bèngbe Bètsáftaca jencuéntama ndayánaca jótjañama, Bèngbe Bètsá chè celoca endmèna pronto chè soye cmochanjátataye.

20 Ndayentše útata o únganga tmojénefjna, átšbeñe ošbuáchiyènga bétsemnama, chentše atše chèngbe tsèntsaca chántsemna ca” —Jesús tojánayana.

21 As Pedro tojána y Jesúsbioye tbojantjá: —Bèngbe Utabná, ¿atsbe catšata bacna soye šojaborlase, bueta soye šojtsemna cha japerdónana? ¿Canysèfta soye ca?

22 Y Jesús tbojanjúá: —Ndoñe nye canysèfta soyama quecbatatsètsná, sinó canysèfta bnètsana soye canysèfta ca.

Ndayá inopása chè japerdónama ndèbošèngaftaca

23 Mèntsánaca Jesús tojanéyana: “Cbochanjáuyana ntsamo Bèngbe Bètsabe amèndayana yomnana. Endmèna ntsamo canye réyefraca tojanopasacá. Cha yojábošena chabe oservénenga crocénana jtsètjañana.

24 Jtsètjañama yojóntša orna, canye boyabása imojuánatse, chè réybioye mallajta crocénana ibnandebena.

25 Chè oservená tondaye yonjábomna chè ndebénama jètsjájuama; asna chè rey yojamánda cha chamotsiye njetstempo nye ínjabíama chaotsooservénama, chabe shema y chabe básengnaca, y lempe ntsamo yojanbomncánaca, y chca chè ndebénama jtopágama.

26 Chora chè oservená chè reybe shecuatšentše yojoshamentsiye y ibojtseimpáda: ‘Taita, Diosmanda šmotsèuantajema. Atše lempe cbochanjètsèntšabuachiye ca.’

27 Chè reyna chè boyabásabíama ibojóngmia; as chè ndebénana ibojtseperdóna y ibojètsboshjona.

28 “Chè oservenana chentšana yojésebocna y benachiñe inye oservenáftaca ibojenbetše, cach mandadbíama trabajayá. Chè inye oservenana nye batšatema crocénana chábiyoye ibnandebena. Chora chè oservená chè enutábíoye tamošajentsana ibojishache y ibojóntša jtsètajuashbebiana y mèntsá ibojauyana: ‘¡Ndebénana šmatsèntšabuaché ca!’

29 Chora cha chë oservenabe shecuatšentše yojoshamentšiyey y ibojtseimpáda: ‘Diosmanda šmotsëuantajema. Atše lempe cbochanjëtšëntšabuachiye ca.’

30 Pero chë oservená ndoñe yonjábošena, sinó yojama chë inýe oservenábioyey cárceloye chamotsëtámíama, chë ndebénana candëtsjájëntscuana.

31 Chë inýe oservenënga chca imojinýe ora, puerteyojóngmia y imojá lempe ntšamo yojopasacá chëngbey rey jacuëntama.

32 As chë rey yojamánda chë boyabása jobetšana, y ibojauyana: ‘¡Puertebacna oservená! Sconjaimpadáyeca, nýets ndebénana tcbontseperdoná.

33 Acnaca cachcá cmondmëna chë cach aquëcá muentša trabájayabiama jóngmiana, ntšamo atšey acbiama šonjongmecá ca.’

34 Y tša chë rey ibojtsetna; as yojamánda jabuache chamotsetsetšená nýets ndebénana candëtsjájuantscuana ca” —Jesús tojanacuntá.

35 Chora Jesús tojánayana: “Atšbey Taitá, celocay endmëná, cachcá tšëngaftangafaca echanjama, tšëngaftangbey catšata ndoñey ndegombrey nýets ainánaca šmonjaperdonase ca.”

19

Ndayá Jesús tojanabuatambá chë bouamnënga tmojtsenëtšenama (Mc 10.1-12; Lc 16.18)

1 Chë soyënga tojánayanentšana, Jesús Galilea luarentšana tojtsanoñey y Judeoyey tojánashjango, Jordán chenguánoica.

2 Ba entšanga tmojanastyey chentšey šoquënga tojanashná.

3 Básefta fariseungay Jesúsbiyey tmojanobeconá y jisháchichiyama mëntšá tmojantjá: —¿Queojtselesenciana canýey boyá nýey ndayámnacay chabey shëmbioyey cachcá jesonýayama ca?

4 As Jesús tojanëjua: —¿Tšëngaftangay ndoñey chë Bëngbey Bëtsabey uabemana palabrënguiñey šmëndualía, Bëngbey Bëtsá, chë entšanga tojanabíama, quem luare jobojátšama ora “boyá y shema tojánabíamama”?

5 Y Bëngbey Bëtsá tojánayana: “Chíyey boyabása chabey taitá y chabey mamá echanjésabashejuana, chabey shëmaftacay jenútanama, y chë útata moy canýacá bochántsemna ca.”

6 Y chca, yay ndoñey útata quebochátsmëna, sinó moy nýey canýacá. Chcasna, entšá ndoñey chaondënbemay ndayá Bëngbey Bëtsá moy canýiñcá tojëftsemay soyey ca —Jesús tojánayana.

7 Chora chë fariseungay tmojaníyana: —¿As, ndáyeyca Moisés tojanmandá, chë shëmbioyey canýey uabemana tsbuanácha juiyíyana jtsenëtšenama y cachcá jesonýayana ca?

8 Y Jesús tojanëyana: —Tšëngaftangay Bëngbey Bëtsabey mandëngay jóyëngacñíamay ndoñey quešmátšbošey causay, Moisés tcmojanalesenciá shëmbioyey jesëtšenana. Pero quem luare jobojátšama orna, ndoñey chca quenjatsmëna.

9 Atšey chëyana, nda chabey shëmaftacay tbojtsenëtšena y chca tojopasá ndoñey chë shema chabey boyábioyey inýaftacay tbontseingñey causay, y chë boyá inýaftacay tojtóbouamasna, chay chë natsana shëmbioyey inýaftacay jtseingñayana ca —Jesús tojánayana.

10 Chora chabey uatsjëndayëngay tmojaníyana: —Chca chë boyá y shëmaftacay tojtsemnësnay, ndoñey tšabá yontsemnay jobouamayana ca.

11 Y Jesús tojanëyana: —Njëtscanga ndoñe quemátobena chë palabrenga jóyëngacñana, nÿe chë Bëngbe Bëtsá tojama jóyëngacñama chamobenama, chëngna aíñe.

12 Ba soyënga comna ndaye causa chë boyabásenga ndoñe ntsobenana jobouamayana. Inÿenga jónÿnana jobouamayama ndobenënga, ínÿëngbiyoe cach entšanga jábiamana jobouamayama ndobenënga y ínÿengna, nÿets tempo chë Bëngbe Bëtsabe amëndayama oserverna causa ca —tojanëyana.

Jesús, basetëmëngbiana Bëngbe Bëtsábiyoe tbojanimpadá

(Mc 10.13-16; Lc 18.15-17)

13 Entšanga basetëmënga Jesúsbiyoe tmojanënatse, cha chauabojajuama y Bëngbe Bëtsábiyoe chëngbiana chaboimpadama. Pero chë uatsjëndayëngna tmojanontšë chë basetëmënga unachayënga jtsécacánana.

14 Chora Jesús tojanëyana: “Cachcá mónÿaye chë basetëmënga átšbiyoe chamuabo y ndoñe matëuyanana; er Bëngbe Bëtsabe amëndayana endmëna mo quem basetëmëngcá imomnëngbiana ca.”

15 As chë basetëmënga tojánabojajo, Bëngbe Bëtsá jaimpádase; y chentšana cha tojtsanoñe.

Canÿe bomna bobontse Jesúsbiyoe tojána

(Mc 10.17-31; Lc 18.18-30)

16 Chentšana, canÿe boyabása tojána Jesús jinÿama y mëntšá tbojantjá: — Buatëmbayá, ¿ndaye tšabe soye chjama chë nÿetsca tescama yomna tšabe vida jtsebomnama ca?

17 Y Jesús tbojanjá: —¿Ndáyeca chë tšabe soye ndayá bëtsemnama šcojtsetjaná ca? Tšabia nÿe canÿa endmëna: Bëngbe Bëtsá. Aca chë nÿetsca tescama yomna tšabe vida jtsebomnama tcojtsebošëse, mandënga cocht-sobedecena ca.

18 Chora chë bobontse tbojantjá: —¿Ndaye mandënga ca?

Y Jesús tbojanjá: —“Ndoñe catjóba, acbe shema ínÿaftaca ndoñe cattëingñaye, ndoñe catjatbëba, ndoñe catjuaboínÿena.

19 Acbe bëtšëtsata stëtsoye ndoñe catjáquedaye y ndëmua entšánaca cochtsebobonshana ntšamo cach aca cuenobobonshancá ca” —Jesús tbojanianana.

20 Chora chë bobontse tbojanjá: —Atše lempe chca nÿets tempo sëndocumplina. ¿Ndayá más šojtsebuáshbena ca?

21 As Jesús tbojanianana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjëmënga cochtsatšataye; chca, bëtš uacanana soye celoca cochántsebomna. Chentšana cochjabo y šochjuasto ca.

22 Chë bobontse chca tojanuena ora, ngmënacá yojtsatoñe, cha corente bomná bemna causa.

23 Chora Jesús chabe uatsjëndayënga tojanëyana: —Ndegombre cbëyana, puerta totcá entsemna canÿe bomnabiana Bëngbe Bëtsabe amëndayoye jamashënguama ca.

24 Chë bomnabiana cachiñe šcuatayana: Más paselo entsemna canÿe camello chë coshufjentša atëfnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

25 Chabe uatsjëndayënga chca tmojanuena ora, puerta ojanánënga imojtsemna y imojtsichamo: —As, ¿nda yochjobenaye atsbočaná jtsemnana ca?

²⁶ Jesús chënga tojanënyãnyé y tojanëyana: —Entsanga ndoñe quemátobena jamama canya atsbocaná chaotsemnana, pero Bëngbe Bëtsá aïñe, er cha nyetsca soyënga jamama endobena ca.

²⁷ Chora Pedro tbojaniyana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjòyëngacñe ca?

²⁸ As Jesús tojanëyana: —Ndegombre cbëyana, nyetsca quem luarentsa soyëngama mo tsmëcá jtsemnana tempo chaojobuache ora, chë Bëngbe Bëtsá Entsá tbojanbemá chabe buashinÿinÿana bëts tšenësiñe reycá echanjót'bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentsa entsangbiama jayanama tšabá o ndoñe tšabá tmonjama.

²⁹ Y ndëmuanyënga, atše jaserviama tmojëftseboshjona cachëngbe yebna, catšátanga o uabénanga, befta o bebmá, básënga o fshantsënga, chë soyëngama patse soye más mochanjòyëngacñe y chë nyetsca tescama yomna tšabe vídnaca.

³⁰ Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

20

Chë trabájayëngbiama cuento

¹ Mëntsánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiñna canye te cabá cachëse yojábocna peonga janguanguama, chabe uvas betiyënga jajañe chamotrabajama.

² Chë nduiño peonga yojánÿena orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabájama.

³ Mo base mošenana ora, chë nduiño cachiñe yojábocna y plazoca atsanënga ínÿënga yojanÿe, tondaye ntsamcá.

⁴ As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá.

⁵ Nyetsto ora y bëts mošenana ora, chë nduiño cachiñe yojábocna y cachiñe cachcá yojopása.

⁶ Mo la cinco ora, chë nduiño cachiñe yojábocna y chenache ínÿënga yojánÿena, tondaye ntsamcá. As yojátjaye: ‘¿Ndáyeca tšëngaftanga nyets día ntjatrabajacá muentše šmotsomñe ca?’

⁷ Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

⁸ “Y ya bien jetiñe yojtsemna orna, chë nduiño chabe caporálbiyoe ibojauyana: ‘Peonga metsachembo y cochtëbuénaye. Chë ústonoye tmojáshjajnënguentsana cochjabojátša y chë natsana tmojáshjajnënga ústonoye ca.’

⁹ Y chë mo la cinco ora imojáshjajnënga imojobeconá, y cada ona canye denario crocénana yojtáyentšbuachiye.

10 Chentšana, chë natsana jatrabájama imojáshjajnënga yojsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canye denario crocénana yojtëbuénaye.

11 Chca imojóyëngacñe orna, chënga imojóntša chë nduifñbiana bacá ichámuana,

12 mëntšá: ‘Quemënga chë ústonoye tmonjáshjajnënga nÿe canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënýá fsënjauantá ca.’

13 “Pero chë nduifño canya chca yojsichamuábioye ibojojuá: ‘Sobreno, acbiana ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca?’

14 Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tchojtabuenacá.

15 Chca entsemna, er atše sëndobena atšbe crocénánaca nÿe ndayánaca jamana. ¿O aca envidia cojtsebomna, atše tšabia tsmënana ca?’ ” —cha yojayana.

16 Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

Jesús cachiñe tojánayana cha jóbanama y jtayenama

(Mc 10.32-34; Lc 18.31-34)

17 Chënga Jerusalenoye imojtsaye ora, Jesús barie tojánachembo chabe bnëtsana uta uatsjédayënga y tojanéyana:

18 “Tšëngaftanga šmontsonýá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšifñe mochanjáboshjona, y chënga mochanjayana jóbanama cha ibojtsemna ca,

19 y chë ndoñe judiëngbe cucuatšifñe mochanjáboshjona chënga chamotsábóyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

Chë Santiago y Juanbe mamabe impadana soye

(Mc 10.35-45)

20 Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšëntše yojoshamentšiyë canye pavorama jaimpádama.

21 As Jesús tbojantjá: —¿Ndayá cojtseboše ca?

Y chë shembása tbojanayana: —Aca reycá chacojtsemándama ora, coch-jamándama atšbe uaquiñata chabótbema canya acbe catšbioica y chë inýa acbe uañicuayoica, ácaftaca chabotsemándama ca.

22 Y Jesús tojanéjua: —Ntšamo šmontsotjanañama, tsëndata ndoñe quešnátstatšëmbo ca. Ntšamo atše chjasufriacá, çtsëndátnaca cachcá jasufriama tašatjobenaye ca?

Y chata tbojanjuá: —Aññe, fchanjobenaye ca.

23 Chora Jesús tojanéjua: —Ndegombre, tsëndátnaca atšcá šochanjasufria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanýëngbiana atšbe Taitá to-japrontacá ca.

²⁴ Chë inÿe bnëtsana uatsjëndayënga chca tmojanuena ora, chë uta catšátaftaca tmojanotjayaná.

²⁵ Chora Jesús chë uatsjëndayënga tojánachembo y tojanëyana: — Tsëngaftanga šmondëtatšëmbo, chë ndoñe judiëngbeñe chë reyënga lempe jtsemándayana nÿa mo nduiñënga cuaftsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inÿe entsangna sempre chamotsayaunanama.

²⁶ Pero tsëngaftangbeñna ndoñe chca chaondëtsemna. Inÿetsá; masna, nda tsëngaftanguentšë chë más uamaná jtsemnana tojtsebošá bontsemna chë inÿënga jtsaservënana.

²⁷ Y ndánaca tsëngaftanguentšá chë más uamaná jtsemnana tojtsebošá bontsemna jtsemnana mo nÿe inÿabiana nÿets tempo oservenacá.

²⁸ Cachcá, chë Bëngbe Bëtsá Entšá tbojanbemá ndoñe chenátabo cha chamotseservënana, ndayá inÿënga jabáserviama. Y mo nda inÿënga játsebacama cuafjëtšajocá, cha echanjóbana, ba entsangna atsebácanënga chamotsemnana ca —Jesús tojánayana.

Jesús uta jtanata tojanashná
(Mc 10.46-52; Lc 18.35-43)

²⁹ Chënga, Jericó bëts pueblentšana tmojánbocana ora, ba entsangna Jesús imojtšëstona.

³⁰ Uta jtanata benache juachañe ibnatbemana. Jesús chëjana yojtsachnëjuanama chata tbojanuena ora, tbojanontšë uayebuáchana: —¡Utabná, Davídbentšana Entšá, šmotsalastemá ca!

³¹ Entšangna chë jtanátbiyoe tmojtsanëcácana iytëca chabotsemnana, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

³² As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbiana chjamama ca?

³³ Y chata tbojanjá: —Utabná, bëndata chabuatëbíñyana ca.

³⁴ Jesús chatbiana tbojanongmé y tojánabuchbojajo. Cachora chë jtanata tsabá yojtëbíñyana y Jesús tmojanasto.

21

Jesús Jerusalenoye tojánashjango
(Mc 11.1-11; Lc 19.28-40; Jn 12.12-19)

¹ Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentšë. Chora Jesús uta chabe uatsjëndayata tojanichamó,

² y mëntšá tojanëyana: “Tsëndatbe natsana entsemna base pueblotëmoye motsata. Cachora canÿe burrá utsbuaná sochanjñyëna y cháftaca canÿe burrotema echántsemna. Sochjuajafjoná y sochjuánatse.

³ Nderado nda ndayánaca chacmojáuyanëse, sochjauyana: ‘Bëngbe Utabná bontsájaboto y chentšana camuentšë echanjabáibasashejuana ca.’”

⁴ Chca tojanopasá, cachcá chaotsemnana ntšamo chë Bëngbe Bëtsabe juabna oyebuambnaya tojanayancá. Cha mëntšá tojanábema:

⁵ Jerusalén bëts pueblentšë oyenënga mëyana:

“Minÿënga, tsëngaftangbe Rey chentšë tsëngaftangbiyoe entsabó, ndoñe mo canÿa cachá bëtsá enobiamnayacá; canÿe búrrbeñe enjaquená; canÿe burrotëmiñe, canÿe uatrabájaye bayabe šešónbeñe ca.”

6 Chora chë uatsjéndayata tbojána y tbojanma ntšamo Jesús tojanamëndacá.

7 Chë uatsjéndayatna chë burrá y chë burrotema tmojanënatse, entšayëjuangá chátbeñe tbojanájatse y chora Jesús chábeñe tojanenoyayé.

8 Bëtsá entšanga chëngbe entšayá chë benachëjana imojtsëtëtsatsana, y inýengna betiyeshënguiñe buacuafjénga imojtsetcoye y chiñe imojtsequëcñá.

9 Y chë natsana imojtsajnënga y chë ústonoyënga mëntšá imojtsaiuáyebuache: “¡Rey Davídbentšana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

10 Jesús Jerusalenoye tojánamashëngo ora, nyëtsca entšanga imojtsenbouenana y banga imojtsenotíciaye: —¿Nda mua yojtsemna ca?

11 Y chë entšanga imojtsëjuana: —Chë Bëngbe Bëtsabe juabna oyebuambanayá Jesús, chë Galileoca pueblo Nazaretocá ca.

Jesús, Bëngbe Bëtsabe bëts yebnentšana enënga y obuámnyënga tojtanëbuacna (Mc 11.15-19; Lc 19.45-48; Jn 2.13-22)

12 Chentšana Jesús, Bëngbe Bëtsabe bëts yebnoye tojánamashëngo y chë entšanga chentše imojtsena y imojtsobuámmañënga chentšana tojtanëbuacna. Chëntšnaca imojtsemna entšanga canýe crocénana enënga, y chë crocénana nýe Bëngbe Bëtsabe bëts yebnentšama inoservenana. Chëngbe mesëshangá tojtsanenásatajchquëca y chë palomatema enëngbe tšenëšëngnaca.

13 Y tojanëyana: “Bëngbe Bëtsabe uabemana palabrënguiñe cha mëntšá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

14 Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná.

15 Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninýe ora, y chë basetëmënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyananga. Chë basetëmënga mëntšá imojtsáyebuache: “¡Chë Rey Davídbentšana Entšá matschuanga ca!”

16 As Jesús tmojanianya: —¿Ntšamo chë basetëmënga montsichamcá quect-suenana ca?

Y Jesús tojanëjua: —Aíñe, sëntsuenana. Pero, ¿tšëngaftanga Bëngbe Bëtsabe uabemana palabrënguiñe chë soyama ndoñe šmëndualía? Chiñe mëntšá endayana:

Chë basetëmënga y ochóchaye šešonatëmëngbe cantëngaca aca tcojama entšanga chacmotsatschuanama ca.

17 Chora Jesús chënga tojésanabashejuana y Jerusalenentšana Betania puebloye tojtsanoñe; y chentše chë ibeta tbojánbobinýna.

Jesús tojánayana canýe higo betiye ndoñe más chaondëshájona ca (Mc 11.12-14, 20-26)

18 Chë te cachëse, Jesús cach bëts puebloye yojtësa ora, tbojánishëntsena.

19 Chora canýe higo betiye benache juachaca yojinýe; as choye yojobeconá, pero nýe ena tsbuanáchënga chiñe yojinýena. As Jesús chë higo betiyoje tojánayana: “¡Ndocna te más chaondëshájona ca!” Y betscó chë higo betiye tojtsanbuashá.

20 Chë uatsjéndayënga chca tmojáninýe ora, imojenjananá y Jesús tmojantjá: —¿Ntšamo chca chë higo betiye canýe ora tojtsebuashá ca?

21 Y Jesús tojanéjua: —Ndegombre cbéyana, tséngaftanga Bèngbe Bètsabeñe ošbuáchiyana šmojtsebmna y chabiamana ainaniñe ndoñe inyetsá šmonjátsjuabnase, šmochantsobena jamama ndoñe nye ntšamo atše quem higo betiyeca sènjamcá, sinó quem tjoye, “muentšana mojuaná y uafjájónayoye moshbuetše ca” šmojananése, chca jochnénguana.

22 Y Bèngbe Bètsáftanga chašmojtsencuénta ora, chábeñe jtsošbuáchiyese, lempe ntšamo chásmojotjañcá šmochanjóyèngacñe ca —Jesús tojánayana.

Jesusbe obenana

(Mc 11.27-33; Lc 20.1-8)

23 Chca tojanopasá chentšana, Jesús Bèngbe Bètsabe bèts yebnoye tojánamashèngo. Chentše vojtsabuátambantscuana, bachnangbe améndayènga y judièngbeñe bètsèjemèngcá améndayènga tmojanobobeconá y tmojantjá: —¿Ndaye deréchoca chè contsama soyènga aca cojtsama ca? ¿Chca jtsamama nda mando tcmènjatštá ca?

24 As Jesús mèntšá tojanéjua: —Atšnaca canye soye sèntsebmna tséngaftanga jatjayama, y quešmojojuase, átšnaca chochjáuyana ndaye deréchoca atše chca stsama.

25 ¿Nda Juan chè Ubayaná tbojanichmó entšanga jubáyama, Bèngbe Bètsá o entšanga ca? —Jesús tojanéyana.

Chama chènga tmojanontsé mèntšá enatsètsnayana: “ ‘Bèngbe Bètsá ca’ chamojujuase, cha sochanjáuyana: ‘As, ¿ndáyeca chè tmojanabuayená soyènguiñe ndoñe šmonjanošbuaché ca?’

26 Pero ndoñe quemuátobena jayanana ‘entšanga ca’; muentša entšangbiamana bènga montsauatja, er nyètscanga mondèjuabná Juan ndegombre Bèngbe Bètsabe juabna oyebuambnayá yomna ca.”

27 Chcasna chènga Jesús tmojanjuá: —Bènga ndoñe queftsátstatšèmba ca.

Y as Jesús tojanéyana: —Atše cach ndoñe quechochatéyana ndaye deréchoca chca stsama ca.

Chè uta uaquiñátbiana cuento

28 Chora Jesús entšanga tojanatjá: —¿Ntsámo tséngaftanga quem soyama šmatjayana? Canye boyabása uta uaquiñata yojánabamna, y cányabioye ibojayana: “Uaquiñá, mènté motsa atšbe uvas betiyènga jajoye jatrabájama ca.”

29 Chè uaquiñá ibojajuá: “¡Jama ndoñe quetsátsoše ca!” Pero botamana yojenójuaboye y pronto choye yojá.

30 Chentšana chè taitá chè inye uaquiñábioye cachcá ibojayana. As cha ibojajuá: “Arseñor, aíñe chanjá ca.” Pero ndoñe yonjá.

31 ¿Chè útatentšana ndèmuanyá tojanma ntšamo chè taitá yojabošcá ca? —Jesús tojanatjá.

Y chènga tmojanjuá: —Chè natsaná ca.

Chora Jesús tojanéyana: —Ndegombre cbéyana, chè Romocama entšangbioye impuesto atjanayènga y chè bacna vida bomna shembásenga, tséngaftangbiamana más montseprontana Bèngbe Bètsabe améndayoye jamashènguama.

32 Juan chè Ubayaná tonjánabo tséngaftanga jábuayenama ntšamo jtsiyenana cmamnana, ntšamo Bèngbe Bètsá yobošcá, y tséngaftanga chè tmojanabuayená soyènguiñe ndoñe chešmatanošbuaché; y chè cuenta, chè Romocama entšangbioye impuesto atjanayènga y bacna vida bomna shembásengna aíñe chábeñe montsanošbuaché. Y tséngaftanga, masque

ntšamo chënga Bëngbe Bëtsábeñe imojtsošbuáchema lempe šmojinýëse, chë juabnayana ndoñe šmonjatrocá, chábeñe jtsošbuáchiyama ca –cha tojanéyana.

*Chë puerte bacna trabájayëngbiama cuento
(Mc 12.1-12; Lc 20.9-19)*

³³ Mëntšánaca Jesús tojánayana: “Inýe cuento šmochjatuenta chašmuatsjínýama: Canýe jajañe nduiño uvas betiyënga yojáje y chë shëconana yojajétja. Chë uvasëšangá juantšëtetjamna canýe base luare yojajutjo y canýe tsbanana jebna soye yojapórma chentše jtsaishanýama. Chentšana, inýe trabájayënga chë jajañe yojárrendaye y chana inýe luaroye yojtsoñe.

³⁴ Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama.

³⁵ Pero chë arréndayëngna chë oservénënga imojishëche: ínýengbioyna imojtsajantšetaye, ínýengbioye imojtsëbaye y chë ínýengbioyna ndëtšbëngaca imojtsachënganja.

³⁶ As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

³⁷ “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’

³⁸ Pero chë arréndayënga chë uaquiñá imojinýe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiama echanjoquéda ca.’

³⁹ As chë uaquiñá imojishache, chë uvas betiyënga jajañentšana imojtsábocna y imojtsóba.”

⁴⁰ Chca jacuéntama tojanpochocá orna, Jesús tojánayana: –Y morna, chë jajañe nduiño chaojabo ora, ¿ntšamo šmojtsejuabná chë arréndayëngaftaca cha yochjama ca?

⁴¹ Y chënga tmojanjuá: –Chë puerte bacna arréndayënga ni mo batšatema ntjalastemaycá echantsëbaye. Chë jajañe ínýenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojsotocancá chënga mochantíyiye ca.

⁴² Chora Jesús tojánayana: –¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana: Chë yebna jebuanënga tmojtsanaboté ndëtšbé, mora chë más bëts uashacuanësentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.

⁴³ Ntšamo chë nduiño chë arréndayënga chë fshantse echantsabaca y ínýenga echantsatšataye y chënga chabiamna bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínýengbioye mochantšatšataye. Chënga Bëngbe Bëtsabe soyëngama mochanjouena y chë soyëngama ínýengbioye mochanjabuayená, Bëngbe Bëtsabe amëndayoye jamashënguama.

⁴⁴ Ndánaca chë ndëtsbeñe chaojotsatsá, chëbé bochántsatcacaye; y chë ndëtsbé ndábeñnaca chaojotsatsë, polvëshe bochántsebema ca —Jesús tojánayana.

⁴⁵ Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatsëmbona chëngbiana chca yojtsóyebuambnama.

⁴⁶ Chora chënga tmojánbošena Jesús jishachana, pero entsangbiana imojsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

22

Chë casamento fiesta cuento

(Lc 14.15-24)

¹ Chentšana Jesús tojanontsé cachiñe cuentëngaca chënga jabuátambana. Mëntšá tojánayana:

² “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canye réyefaca tojanopasacá. Chë rey yojamánda canye bëts fiesta jamama, chabe uaquiñabe casamentama.

³ Chora chë rey chabe oservënga yojichamuá chë ófjanënga jobiatsama, pero chë ófjanënga ndoñe imonjouena jama.

⁴ As chë rey inye oservënga yojichamuá y mëntšá yojámëndaye: ‘Chë ófjanënga šmochjáuyana, ya saná steboprontana ca. Sëñjamandá, atšbe uacnënga y uamna bayënga minyicánënga jobáyama y lempe entseprontana; y chamuabo chë casamento fiesta ca.’

⁵ “Pero chë ófjanënga ndoñe imonjouena. Canya, cachabe fshantse inabomnoye yojtsoñe; inyana chabe obuámnayinhe trabajuama yojtsoñe;

⁶ y inyënga, chë reybe oservënga imojishëche, jajuache imojtsatsetšenaya y imojtsëbaye.

⁷ Y chë rey chë soyama yojouena ora, corente ibojtsetna. As chabe soldadënga yojichamuá chë oservënga obánayënga chamuetsëbáyama y chëngbe bëts pueblo jetsángbotjuama.

⁸ Chora chabe oservënga yojáyana: ‘Lempe entseprontana chë casamento fiesta, pero chë ófjanënga ndoñe quenjatëmerecena moye jabama.

⁹ Motsajna tsashenangoye y ndëmuanýëngnaca chašmojánýenënga, chë casamento fiesta šmochjúbuaja ca.’

¹⁰ As chë oservënga tsashenangoye imojábocana y nyëtscanga imojánýenënga imojáchembo, cánýinhe tšabe y bacna entsanga, y chca, chë tsbocnanoica jútjena yojtsemna entsángaca.

¹¹ “Chë ófjanënga jányama chë rey yojámashëngo ora, chentse cánýabioye ibojinýe y chana ndoñe yontsemna ntšamo canye casamento fiesta endbetsemncá uichëtjóná.

¹² As chë rey ibojauyana: ‘Sobreno, ntšamo canye casamento fiesta endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nye iytëca yojtsemna.

¹³ As chë rey chë fiestentse ujuatšnayënga yojámëndaye: ‘Shecuatse y cucuatse motsebatsëca y chë ndëbinýna luaroye, infernoye motsábocna. Chentse puerte echanjenóbošachna y chë tsetšanama juatsašënga echantsenoftšëjojnaye ca’ —cha yojayana.”

¹⁴ Jesús chca jacuéntama tojanpochocá ora, mëntšá tojánayana: “Chë fiesta ófjanënga banga montsemna, pero chë bocacánënga choca jtsemnama

nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

*Chë Romoca bëts mandadbiama impuesto jtsatsquécjnayama
(Mc 12.13-17; Lc 20.20-26)*

¹⁵ Chentsana chë fariseunga tmojtsatanoñe y tmojanenoyeuná ntšamo Jesús tojanyañe cha jisháchichiyana, as chca, mandadëngbeñe cha mal jaquédama.

¹⁶ Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndétatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jat-uananana nÿe ntšamo entšanga tmojatichamcá, er acbiama tondaye que-natámama nda más uamaná o nduamaná tomnana.

¹⁷ Chcasna, ¿ntšamo catjájuaboje? ¿Tšabá tayojtsemna, César, chë Romoca bëts mandadbiama, bënga impuesto jtsatsquécjnayana o ndoñe ca?

¹⁸ Jesús yojtsetátšëmbo chëngbe bacna juabnëngama; chíyeca tojanëyana: —Bacna entšanga, ntšamo ndegombre šmojuabnacá ndinÿinÿnayënga. ¿Ndáyeca tšëngaftanga šmojtseboše chë sóyeca atše jisháchichiyama?

¹⁹ Chë šmatsquécjná crocénana šminÿinÿé ca.

As canÿe crocénana tmojanoyé.

²⁰ Jesús tojanatjá: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

²¹ Y chënga tmojanjuá: —Césarbe jubiá; cha chca enduabaina ca.

As Jesús tojanëyana: —Césarbïoye šmochtoyoye cha ibotocana soye; y Bëngbe Bëtsana cha ibotocana soye ca.

²² Chënga chca tmojanuena ora, ojananëngá imojtsemna. As chënga cachcá Jesús tmojanonÿá y tmojtsatanoñe.

*Obanënga jtayenama Jesús tmojantjá
(Mc 12.18-27; Lc 20.27-40)*

²³ Báseftanga judiëngbe amëndayënga, saduceos ca uabáinënga, imo-
janjuabná chë obanënga ndocna te ntayenana ca. Cach te, chë impuestama Jesús
tojanoyebuambá te, básefta saduceunga tmojána y mëntšá tmojantjá:

²⁴ —Buatëmbayá, Moisés tojánayana nderado canÿe boyá tojóbana básenga
ntjëftsabashejuancá, ana chabe uabentsá jtsemnana chë shëmaftaca jtoboua-
mayana, chca, chabe uabochená obanabiama básenga jtsabamnama ca.

²⁵ Chcase, canÿe bëngbentše canÿsëfta catsátanga monjamna. Chë natsaná
tonjanobouamá y tontsanóbana. Básenga ndoñe quenjátabamna, chíyeca chë
shemna chë uabentsáftaca tontanobouamá.

²⁶ Y cháftaca cachcá tonjanopasá, chë inÿe uabentsáftaca cachcá, y cachcá
chë ínÿëngaftaca y chë ústonoca uabentsáftacnaca.

²⁷ Y chentsana chë shembásanaca tontsanóbana.

²⁸ Y morna, chë obanënga chamojtayena ora, ¿ndabe chë canÿsëfta
catsatanguentsabe shema chë shembása yochtsemna, nÿetscanga cháftaca
tmojanobouamase ca? —chënga tmojantjá.

²⁹ As Jesús tojanëjua: —Ntšamo tšëngaftanga šmonjayancá ndmëncá
šmontsoyebuambná, Bëngbe Bëtsabe uabemana palabra, ni chabe obe-
nanama ndoñe quecmátësertana causa.

³⁰ Chë obanënga chamojtayena ora, ni boyabásenga, ni shembásenga que-
mochatóbouamnaye, y chca, chënga mochántsemna mo celoca angelotemëngcá.

31 Y chë obanënga jtayanamna, ¿ndofne šmëndualía ntšamo cach Bëngbe Bëtsá chabe uabemana palabrenguiñe tojánayanama? Cha tonjánayana:

32 “Atse sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndofne yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

33 Chë entsanga chca tmojanuena ora, ojnánánënga imojtsemna ntšamo Jesús yojtšabuátambama.

Chë más bëts uámana mando
(Mc 12.28-34)

34 Jesús chë saduceúngbiye iytëca tojánabiamama fariseunga tmojántatšëmbona ora, chënga tmojánenefna,

35 y canya chënguentšá, ley abuatambayá, Jesúsbiye jisháchichiyama tbojan-tjá:

36 —Buatëmbayá, ¿Moisesbe leyiñe ndayá chë más bëts uámana mando yomna ca?

37 As Jesús tbojanjuá: —“Utabná Bëngbe Bëtsá cochtsebobonshana nyets acbe ainánaca, nyets espírituca y nyets juábnaca.”

38 Chë soye endmëna chë más bëts uámana mando y nyetsca mandëngama chë natsanoca entsemna.

39 Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.”

40 Chë uta mandentsana endóbocana lempe ntšamo Moisesbe leyiñe endayanácá y ntšamo chë Bëngbe Bëtsabe juabna oyebuambnayënga mond-betsabuatambacá ca —Jesús tbojanayana.

¿Cristo, ndabe entsábentsana yomna?
(Mc 12.35-37; Lc 20.41-44)

41 Chë fariseunga cabá cachentše imojtsemnëntscuana,

42 Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamama, chë Cristo? ¿Ndábentsana cha iuabó ca?

Y chënga tmojanjuá: —Davídbentsana ca.

43 As Jesús tojanéyana: —¿Ntšamo chca nántsemna, cach David, chë Uámana Espiritbe mándoca, Crístbiye Utabná ca tbojtsabobuátmëse? David mëntšá tojánayana:

44 Bëngbe Bëtsá, atšbe Utabná Crístbiye tbojanayana: atšbe catšbioica mótbema, atšbe obenánaca acbe uayayënga acbe cucuatšíne chamoquedama ch-jamëntscuana ca.

45 ¿Ntšámose Cristo, Davídbentsana Entšá nántsemna, cach David “Utabná ca” chábiye tbojtsabobuátmëse ca? —Jesús tojanatjá.

46 Chora ndocná tonjanobená ni mo canye palabra jojuana. Y chë tescana ndocná yonjenñemua Jesús más jatstjanayama.

23

Jesús chë fariseungbiamama y ley abuátambayëngbiamama tojánayana, chënga ndofne tsábá montsama ca

(Mc 12.38-40; Lc 11.37-54; 20.45-47)

1 Chora Jesús, entsanga y chabe uatsjëndayënga mëntšá tojanéyana:

2 “Chë fariseunga y chë ley abuátambayënga cmondbétsabuatambaye ntšamo Moisesbe leyënguñe iuayancá.

3 Chcasna, tšëngaftanga cmontsamna chënga joyaunayana y ntšamo tcmo-jauyancá, cachcá jtsamana. Pero ndoñe šmattsama ntšamo chënga mondbet-samcá, er chënga ndoñe ntsamana ntšamo mondbetsabuatambacá.

4 Mo canye entšá, couáybiye uauta uasmanësha juasmayana y cachá tondaye tontasmancá, chënga entšanga jtsamëndayana bètscá mandënga chamotsocumplínama, pero cachënga ni mo batšatema ntsamana chë mandënga jtsocumplínama.

5 Chënga lempe jtsamana nye entšanga chamotsënyäma. Chënga chë ínÿengbiama más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguñe juabemana ntšamo Bëngbe Bëtsabe uabemana palabrënguñe endayancá, y juentsaca y buacuatsñe chëjënga jenábatsëcana y sibiajana nya tëntša uasebtotonanëjuangá jtsichëtjonana.

6 Chënga jtsebošana chë fiestënguñe nya quëfseroca jtsetbiámanama, y chë judiëngbe enefjuana yebnënguenache chë más uámana luarënguñe.

7 Chënga jtsebošana tsáshenañe entšanga nya respétoca chamotsacheu-
nama, y ‘abuátambayënga ca’ chamotsachembuanámnaca chënga jtsebošana.

8 “Pero tšëngaftangna ndoñe šmattseboše entšanga ‘abuátambayënga ca’ chacmotsachembuanama, er nyetsca tšëngaftanga mo catšatangcá šmondmëna, Bëngbe Bëtsábeñe betsošbuachéyeca, y nye canya endmëna tšëngaftangbe Buatëmbayá.

9 Tšëngaftanga ‘taitá ca’ chë ley abuátambayënga šmondbétsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nye canye Taitá šmondbonna, chë celoca endmëná.

10 Ndoñe šmattseboše entšanga ‘mándayënga ca’ chacmotsachembua-
nama; er nye canye Mandayá endmëna y cha Cristo endmëna.

11 Nda tšëngaftangbeñe chë más uamaná tojtsemná bontsemna chë ínÿenga jtsaservénana.

12 Nda cachá bètsá tojtсенobiamná, nduamaná mochántsebema; y nda cachá nduamaná tojtсенobiamnana, más bètsá mochanjábema.

13 “¡Tša lastema tšëngaftangiama, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmontsama entšangbiama puerte totcá chaotsemna Bëngbe Bëtsabe amëndayoye jamashënguama, mo bësáša cuaftsebiatamiancá. Pero ni cach tšëngaftanga choye quešmátamashjuana, ni ínÿenga choye jamashënguama bošëngbiye chama quešmátalesenciana.

14 ¡Tša lastema tšëngaftangiama, ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga chë viudángbiye chë tmobomna soyënga jtsabacayana, y entšangbe delante tšabá chacmotsënyäma y chënga šmojtsaíngñayama ndoñe chamondëtsetatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tšëngaftanga más jabuache ínÿengbiama cmochanjácastigaye.

15 “¡Tša lastema tšëngaftangiama, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga ba luarënguenache jtsajnana canya tšëngaftangbe ustoná onguayñe, y šmojinÿena ora, tšëngaftanga jamana cha chaotsemna tšëngaftangiama uta soye más merecido buajoná infernoye chaotsama.

16 “¡Tša lastema tsëngaftangbiamia; tsëngaftanga šmondmëna mo jtanënga entšanga unachayëngcá! Tsëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’

17 ¡Obëjémënga y nduabínÿënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiamia josërviamia jtsemnana, ñye Bëngbe Bëtsabe bëts yebno ca chë castellano tojtsemnayeca.

18 Tsëngaftanga mëntsánaca šmondbëtsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiamia altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’

19 ¡Nduabínÿënga! ¿Ndayá más uámana soye yomna, chë Bëngbe Bëtsabiamia tmojacjá soyënga o chë altar? Chë tmojacjá soyënga Bëngbe Bëtsabiamia josërviamia jtsemnana, ñye chë altaroca chë soyënga tmojacjáyeca.

20 Nda chë altarama tojajurá, ndoñe ñye chë altarama ntsejúraryana. Lempe chë altar juatsboca tojtsemnánaca cha jtsejúraryana.

21 Nda Bëngbe Bëtsabe bëts yebnama tojajurá, ndoñe ñye Bëngbe Bëtsabe bëts yebnama ntsejúraryana. Bëngbe Bëtsabiamia cha jtsejúraryana, cha chë chentše oyená.

22 Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiánaca, chentše yotbemanabiamia.

23 “¡Tša lastema tsëngaftangbiamia, bacna entšanga ntšamo ndegombre šmojuabnacá ndinÿinÿayënga fariseunga y ley abuátambayënga! Tsëngaftanga Bëngbe Bëtsabiamia jtsequëcjnyana chë jajañentša sananga bnëtsanentšana canÿe soye; chë binche matatémënga menta, anis y chë cominentša sanágnaca. Pero tsëngaftanga ñye batsá jtsamana chë leyentša más uámana soyënga, mo chë ñyetsca entšanga cachca derechënga chamotsebomnama, ínÿënga jtsalastemánana y chë tsabe soyënguiñe jtsiyenana, chca, entšanga tsëngaftangbeñe chamotsošbuáchemá. Chë soyënga cocayé cmontsamna jtsamama, chë ínÿe tsabe soyënga amana ntjabanacá.

24 ¡Jtanënga entšanga unachayënga! Tsëngaftanga chë base soyënga jamama puerte jtseñocochinÿenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tsëngaftanga šmontsemna mo canÿe entšá ndayá tojtsabuchetjácá bayëfja jtsejuánama, ndoñe ntjasama, jasama ndoñe yondëlesenciana ca chë leyiñe iuayana causa. Pero šmondmëna mo entšangcá ndëmuanÿënga camellbe mëntsëna jasana, y chë leyiñe endayana chcana jasama ndoñe yondëlesenciana ca.

25 “¡Tša lastema tsëngaftangbiamia, bacna entšanga ntšamo ndegombre šmojuabnacá ndinÿinÿayënga fariseunga y ley abuátambayënga! Tsëngaftanga šmondmëna mo entšangcá ndëmuanÿënga platillëjënga y tazëšënga shjoicajana jtsóbojabiana, pero tsoyna ñye cachcá jonÿayana. Tsëngaftanga tša jtsentsënana entšangbiamia mo tsabengcá jtsinÿinama, pero tsëngaftangbe ainanentše jútjena entsemna ñye jtsatbëbanama y ñye bëtscá soyënga jésebomnama juabnëngaca.

²⁶ ¡Nduabinýna fariseo! Cochshetsajbaná ainaniñe bacna soyënga bomnana. Chamna nýe tšabe juabnënga chentše cochtsebomna, y lempe ntšamo chacojtsamcá y entsanga chamojtsonýacá tšabá echántsemna.

²⁷ “¡Tša lastema tšëngaftangbiama, bacna entsanga ntšamo ndegombre šmojuabnacá ndinýinýnayënga fariseunga y ley abuatambayënga! Tšëngaftanga šmondmëna mo obanëngbe cuevēshënga botamana uaffantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca.

²⁸ Tšëngaftanga chca šmondmëna: entšangbe delante tšëngaftanga jtsinýnana mo nýetsca soyënguiñe tšabá amëngcá, pero ndoñe chca quešmátmëna. Tšëngaftangbe ainarentšna chë bacna entsanga ntšamo ndegombre tmojuabnacá ndinýinýnayëngcá y chë bacna soye amëngcá šmontsejuabná.

²⁹ “¡Tša lastema tšëngaftangbiama, bacna entsanga ntšamo ndegombre šmojuabnacá ndinýinýnayënga fariseunga y ley abuatambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevēshënga jtsatspórmayëse. Tšëngaftanga cachcá jtsamana chë nýetsca soyënguiñe tšabá amëngaftaca, chë chëngbiama jtenójuaboyama pormániñe jtsatsbótamnyëse;

³⁰ y chentšana šmondbëtsichamo: ‘Bënga chë Bëngbe bëtsëjëmëngbe tempo maftsjanienëse, chëngbioye ndoñe matmënjanejabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canýe buayenana sóyeca tmojabëngbioyna ndoñe ntsayaunanana.

³¹ Pero ntšamo šmojtsamcá jtsamëse, tšëngaftanga šmontsinýanýná ndegombre chë Bëngbe Bëtsabe juabna oyebuambnayëngbioye tmojanëbayëngbe entsanguentšana šmonnana. Y mora cach tšëngaftangbe bëts taitangcá tšëngaftanga šmontsana.

³² ¡Mopochocanga jamama chë bacna soyënga, chë tšëngaftangbe bëts taitanga tmojanbojatsé jamama soyënga!

³³ “¡Mëtšcuayënga, mëtšcuaye entsanga! ¿Ndayá šmochjama chë infernoca uabouana castigüentsana jótsbocama?

³⁴ Chýyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatšëmbënga y abuatambayënga. Pero tšëngaftangna, ínýengbioye šmochantsëbaye y smochanjácrucificaye; ínýengbioyna chë enefjuana yebnënguenache šmochanjátsetšenaye y nýetsca bëts pueblënguenache chënga šmochandúcama.

³⁵ Chýyeca, tšëngaftangbiama nýets castigo echántsemna chë nýetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquíana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe.

³⁶ Ndegombre chëyana, lempe chë soyëngama castigo morsca entsangbiama echántsemna ca” —Jesús tojánayana.

Jesús tojanošachna Jerusalenoca entsangbiama

(Lc 13.34-35)

³⁷ Mëntšánaca Jesús tojánayana: “¡Jerusalenentša entsanga, Jerusalenentša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbëngaca jtsatëchënganjana jtsëbáyama. Bueta soye atše sënjábošena tšëngaftanga átšbioye júbuajana, mo

canÿe tuamba chabe bolletotémenga chabe juatëngmiáša tajsoye cuafta-jayecá, pero tsëngaftanga ndoñe chešmátsbošena.

³⁸ Y šmochjinÿe, atše mora cachcá cbochanjesëñÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y éñañe tcojeseboshjoncá.

³⁹ Y atše chëyana, ndegombre tsëngaftanga morscana atše ndoñe más quešmochátinÿe; y atše šmochántinÿe méntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

24

Jesús tojánayana chë Bëngbe Bëtsabe bëts yebna lempe mochjánpochocama (Mc 13.1-2; Lc 21.5-6)

¹ Jesús Bëngbe Bëtsabe bëts yebnentsana tojëftsanbocna y ya yojtsaye. Chorna chë uatsjëndayënga chábioye tmojanobeconá y tmojanontšé nÿetsca chentšá bëts yebnënga cha jinÿinÿiyana.

² Chora Jesús tojanëyana: “Tsëngaftanga lempe šmontsonÿá. Ndegombre šcuayana, quem Bëngbe Bëtsabe bëts yebnentsé ndoñe queochaisoquéda ni mo canÿe ndëtsbé inÿe ndëtsbé juatsboye. Lempe mochantsepochoća ca.”

Ntšamo yochtsemna quem luare jopochócama tempo chaojtsobeco ora (Mc 13.3-23; Lc 21.7-24; 17.22-24)

³ Chentšana chënga Olivos tjšahoye tmojána. Jesús choca yojtsetbemana; as, chë uatsjëndayënga tmojanobeconá nÿe chëngbiamá jatjayama, méntšá: —Smëyana. ¿Mocna ora chë soyënga Bëngbe Bëtsabe bëts yebnocá yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnama y quem luare jopochócama tempo yojtsobecuama ca?

⁴ As Jesús tojanjuá: —Cuedado šmochtsebomna ndocná chacmondáingñema.

⁵ Banga mochanjabo y mochantsabíchamo chënga atše imomna ca. Mochántsicamo: “Atše chë Cristo sëndmëna ca” y chca, ba entšángbioye mochanjáingñaye.

⁶ Tsëngaftanga šmochanjouena canÿe luarentšá entšanga inÿe luaroca entšángaftaca imojtsentsjanama y nderado mochjentsjámnaca. Ndoñe matau-atjëngana, er chca jochnënguama endmëna; pero masque chcse, quem luare jopochócama cabá ndoñe queochátmëna.

⁷ Canÿe luarentšá entšanga inÿe luaroca entšángaftaca mochántsentšjanaye, y canÿe amëndayábentšá entšanga inÿe amëndayábioća entšángaftácnaca; y ba luarënguine shëntsana echanjóshjango y chentšá fshantsënga echanjuangmëmëna.

⁸ Masque chca jasúfriase, más chcoye cabá más mochanjatssúfria.

⁹ “Chora, entšanga inÿengbe cucuatšifne cmochanjábashejuana chacmatsetšenama y cmochantsëbaye; y atšbe ústonënga bëtsemnayeca nÿetsca luarënguentsá entšanga cmochantsëbuayënja.

¹⁰ Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama inÿengbe cucuatšifne mochántsenboshjuana.

¹¹ Banga Bëngbe Bëtsabe ndoñe ndegombre juabna oyebuambnayënga mochanjábocana y ba entšanga mochanjáingñaye.

12 Nÿetsá bacna juabnënga entšangbe ainaniñe echanjésemna, y chë causa banga ndoñe quemochátenbobonshana.

13 Pero nda nÿets tempo átsbeñe ošbuachiyá totsomñe, atsbocaná echántsemna.

14 Y quem tšabe noticiënga Bëngbe Bëtsabe amëndayama nÿets quem luariñe entšangbioye mochántsabuaiynaye, chca, chë ndegombre soyënga Bëngbe Bëtsabiana chënga chamotsetatšëmbuama. Chentšana cocayé quem luare jopochócama tempo echántsemna.

15 “Chë Bëngbe Bëtsabe juabna oyebuambnayá Daniel chë puerte uabouana soye tojéftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama;

16 entšanga Judeoca chamojtsemnënga, batsjabengoye chamotsacheta.

17 Y nda cachabe yebnentša tsbanánoca chaojtsemna, chaotsachá chocana ntjtastjancá ndayá tsoicana jéftšabocnama.

18 Y nda jajoca chaojtsemna, yebnoye ndoñe chaondëta ni mo chabe quëfsaíya jesácñama.

19 ¡Tša lastema chë tempo ngomámanënga chamojtsemnëngbiana o ochóchaye šešonga chamojtsabamnëngbiana!

20 Bëngbe Bëtsá šmochtseimpadana chë tšëngaftanga jachetama, uaftena tempo ora o canÿe ochnayté ndoñe chaondëtsemnama.

21 Chca, chora puerte ngménana echántsemna. Tša jabuache ngmenancá, quem luare jabojátšama orscana y méntscoñama y más chcoye, cachcá ngménana ndoñe ntjamnana.

22 Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondëtsemnama.

23 “Chora nderado nda cmochanjáuyana: ‘Minÿënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

24 Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca.

25 Atše ya chama tchonjabuayená chë tempo cabá ndóshjango ora.

26 Chíyeca, nderado chënga chacmojáuyana: ‘Minÿënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canÿe tsoca entsemna ca’, chama ndoñe šmattsayaunana.

27 Er ntšamo chë tojatcuinÿe ora, shinÿe bocanoicana y shinÿe ue-natjëmbambanëntscoñe jabuashinÿinÿenancá y ba luarënguenache entšanga jobenayana jinÿama, cachcá, Bëngbe Bëtsá Entšá tbojanbemá quem luaroye chaojésabo te, entšanga nÿets luarentše mochanjobenaye cha jinÿama.

28 Canÿe obanabe cuerpo tojtsemnama chë gallinacënga tmojátatšëmbona y cachora chë béconana jojtana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

Bëngbe Bëtsá Entsó tbojanbemá quem luaroye echanjésabo
(Mc 13.24-37; Lc 21.25-33; 17.26-30, 34-36)

²⁹ Mëntsánaca Jesús tojánayana: “Chë puerte ngménana tempo chaojochnëngüentsana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjiana y quem luarentsa tsbanánaca espiritënga obenana bomnënga echanjángmëmána.

³⁰ Chora canÿe soye celoca echanjónÿna entsãnga jinÿanÿiyama Bëngbe Bëtsá Entsó tbojanbemá ya iuaisaboma, y nÿets luarenache entsãnga mochanjenóbošachna, y Bëngbe Bëtsá Entsó tbojanbemábioye mochanjinÿe celoca jantšetëshiñe echãntsaboye, puerte obenánaca y corente buashinÿinÿaniñe.

³¹ Y canÿe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntsoñe.

³² “Ntšamo higo betÿyeca endbëtsopasanama šmochjuatsjinÿe: Tojtsaisabuacuana y tojtsaisëjotsana ora, chë tšabe tempo ya tojtsaisobecuama jtsotatsëmbuana.

³³ Cachcá, lempe chë ndayama tšëngaftanga tbonjauyancá chašmojinÿe ora, šmochántsetatsëmbo Bëngbe Bëtsá Entsó tbojanbemá ya jésabama yojtsemnama.

³⁴ Ndegombre cbëyana, lempe chca echanjochnëngo, morsca entsãnga cabá ndóbana ora.

³⁵ Celoca y quem luare echanjopochóca, pero atšbe palabra ndocna te queochaisopochóca.

³⁶ “Pero ndayté y ntseco ora Bëngbe Bëtsá Entsó tbojanbemá yochjésabama, ndocná quenátstatšëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotátšëmbo.

³⁷ “Ntšamo Noé yojëtsiyena ora tojanopasacá, cachcá echanjopása chë Bëngbe Bëtsá Entsó tbojanbemá chaojésabo ora.

³⁸ Noebe tempo, chë uabouana uaftena cabá nduáshjango ora, entsãnga imnasaye, imnofšësnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguentscuana.

³⁹ Chënga tondaye imonjántatšëmbo, nÿe chë uabouana uaftena tojánashjango y nÿetscanga tojtsanëyamba ora cocayé. Cachcá echántsemna Bëngbe Bëtsá Entsó tbojanbemá chaojésabo ora; ya chaojochnëngo ora, entsãnga chama mochanjátatšëmbona.

⁴⁰ Chora uta boyabásata jajoca bochántsemna; canÿa mochanjesbetse y chë ínÿana ndoñe.

⁴¹ Uta shembásata bochántsejanÿcoye; canÿa mochanjesbetse y chë ínÿana ndoñe.

⁴² “Chÿyeca cuedado šmochtsebmna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama.

⁴³ Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsatatsëmbëse, cha nantsefšna y ndocnábioye buanjaleséncia jushañe chaotsembemama tsoye jtsamashënguama y jtsatbëbama.

⁴⁴ Chÿyeca, tšëngaftángnaca šmochtseprontana, er Bëngbe Bëtsá Entsó tbojanbemá echanjésabo, entsãnga chama tondaye chamontsejuabná ora ca” — Jesús tojánayana.

*Chë tšabe oservená y chë ndoñe tšabe oservená
(Lc 12.41-48)*

⁴⁵ “¿Nda yomna chë oservená ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjëftsebošhona chë yebnentšenga chaotsanýenama y jasama tojtsemna ora chaújuatšema.

⁴⁶ Chë nduiño tojtashjango ora, chë oservenábioye tbojýnena ntšamo ibomncá jtsamëse, chë oservená puerte oyejuayá echántsemna.

⁴⁷ Ndegombre cbéyana, chë nduiño chábioye bochanjaimpáda lempe chabe soyënga chabotsinýeñama.

⁴⁸ Pero chë oservená bacna entsá tomñesna, jajuaboyana chë nduiño ndoñe betscó yochantabo ca,

⁴⁹ y as, cha jóntšana chë inýe oservénënga jtsajantšetayana, becá jtsesana y jtsetmuana inýe tēmiëngaftaca.

⁵⁰ Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango.

⁵¹ Chora chë nduiño jabuache bochantsecastiga, y ntšamo chë bacna entsanga ndayá ndegombre tmojuabnacá ndinýinýnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftěšojnaye ca” –Jesús tojánayana.

25

Chë bnětsana tobiasëngbiana cuento

¹ Měntšánaca Jesús tojánayana: “Chë te chaojóshjango ora, Bëngbe Bětsabe amëndayana echántsemna mo ntšamo canýe casamento fiestentše tojanopasacá. Měntšá yojobása: Bnětsana tobiasënga chëngbe querosine uajuinýanëshangá imojětsájaca y imojábocana chë casamentero boyabása jajébenguama.

² Chë bnětsana tobiasënguentsana, shachnënga sempre enójuabnayënga innamna, y chë inýe shachnënga, ndenójuabnayënga.

³ Chë ndenójuabnayëngna chëngbe uajuinýanëshangá imojětsájaca, pero querosine ndoñe imonjuabuyamba chë uajuinýanëshangañe cachiñe jtaftsuámama.

⁴ Pero chë sempre enójuabnayëngna chëngbe uajuinýanëshangá imojětsájaca y querosinënaca botellěšënguiñe imojuabuyamba.

⁵ Chë casamentero boyabásana ndoñe betscó yonjabo, chíyeca nyetsca tobiasënga ocnayana yojubuache y imojtsomaná.

⁶ Mo tsěntseto orna, chënga imojouena měntšá uayebuáchana: ‘¡Chë casamentero boyabása ya endabó! ¡Jajébenguama mobocana ca!’

⁷ Asna, nyetsca tobiasënga imojotsbaná y imojóntša chë uajuinýanëshangá juabopróntana.

⁸ Chorna, chë shachna ndenójuabnaye tobiasënga chë inýe shachnënga siempre enójuabnayëngbioye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinýanëshangá tojontšé jtsafsanana ca.’

⁹ Pero chë siempre enójuabnayëngna imojayana: ‘Ndoñe. Tchojubuatsatase, tšëngaftangbiana y bëngbiámnaca querosine echántasshbe. Más tšabá entsemna, chë querosine mondběsenoye chašma y tšëngaftangbiana chašmauábuamiñe ca.’

10 “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamento boyabása yojáshjango y chë sempre endójuabnayënga cháftaca chë casamento fiestoye imojámashjna, y chentša bësásá imojtatame.

11 Chentšana chë inýe tobiasënga imojáshjajna y mëntsá imojtsichamo: ‘¡Taita, Taita, smebëtafjo ca!’

12 Pero chë casamento boyabása yojójua: ‘Ndegombre cbëyana, tsëngaftanga ndoñe quecbatëbuatma ca.’

13 “Cachcá echántsemna Bëngbe Bëtsá Entsá tbojanbemá chaojésabo ora; chíyeca smochtseprontana, tsëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento (Lc 19.11-27)

14 “Bëngbe Bëtsabe amëndayana endmëna mo ntšamo canýe boyabásaftaca tojanopasacá. Cha ibojtsemna inýe luaroye jtsoñama; as chabe oservénënga yojáchembo y yojaimpádaye chabe crocénana chamotsinýenama.

15 Cánýabioye ibojántšabuachiye shachna uaranga crocénana, ínýabioyna uta uaranga y ínýabioyna canýe uaranga. Chca yojamna ntšamo cada ona ibojobiashjachcá. Y as chë boyabása yojtsoñe.

16 Cachora chë shachna uaranga yojoyëngacñá yojá trato jabemama, y chca, inýe shachna uaranga crocénana yojábotiye.

17 Chë uta uaranga yojoyëngacñá cachcá yojama y inýe uta uaranga yojábotiye.

18 Pero chë canýe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentšana baytese chë oservénëngbe amëndayá yojtashjango y yojóntša chë crocenánama chënga jatjayana.

20 Natsana yojáshjango chë shachna uaranga yojoyëngacñá y chabe mandayábioye inýe shachna uaranga crocénana ibojántšabuachiye y mëntsá ibojauyana: ‘Taita, aca shachna uaranga sčonjanoyé y muentše entsemna inýe shachna uaranga sënjaboté ca.’

21 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tčojamandacá tčojámayeca, atše cbochanjaimpáda más bëtscá chašcotsinýeñama. Mamáshëngo y átseftaca cochjóyejuaye ca.’

22 Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga sčonjanoyé y muentše entsemna inýe uta uaranga sënjaboté ca.’

23 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tčojamandacá tčojámayeca, atše cbochanjaimpáda más bëtscá chašcotsinýeñama. Mamáshëngo y átseftaca cochjóyejuaye ca.’

24 “Pero chë canýe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canýe tsátjaye entsá connama; acna chë ndoñe tconjajé chentše saná jocñana y chë ndoñe tconjujquëshe luarentše jobuátbanana.

25 Chama atše uatjana sjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’

26 As chë mandayá ibojojuá: ‘¡Bacna oservená y oyënjayá! Chë ndayentse ndoñe tijajé chentse saná jocñana y chë ndoñe tijuquëshe luarentse jobuátbanana atse tsuamanama icojátatsëmbëse,

27 aca cmonjamna atšbe crocénana bancoca jetsobuájuaana y atšbe matijtabo ora, atšbe crocénana matijtoyëngacñe y chë chentšana tojoboté crocénanënaca ca.’

28 Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca.

29 Er nda tojtsebomnábioye, más jatšetayana, y chca cha corente bëtsá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

30 “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tšetšanama juatsašënga echantsenoftëšjojnaye ca’ ” –Jesús tojanéyana.

Ntšamo chë quem luare jopochócama ora, nyëtsca entsangbiana mochanjajana

31 Mëntsánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinýinýaniñe y nyëtsca chabe angelotémëngaftaca chaojésabo ora, chë reybiama puerte buashinýinýana tbemaniñe echanjótbema.

32 Chora nyëts luarëngoca entsanga chabe natsanoica mochanjénefna, y cha, entsanguentšana ínýenga echanjábacacaye, mo chë oveshënga abujénýa oveshënga chivëngbentsana endbetsabacacnayá.

33 Chë abujénýana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjátsaye.

34 “Chorna chë Rey, Bëngbe Utabná, chabe catšbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmëtabna, mabënga ca; atšbe amëndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana.

35 Er atšbe šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafsé; inýe luarocana ashjanganocá sënjánana y posada šmonjanántšame.

36 Enašá sënjánana y entsáyá šmonjanëtšetá jtichëtjuama; šocá sënjanájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

37 “As chë Bëngbe Bëtsá chabe bominýiñe tšábënga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninýe y tcbënjanajuatšé? ¿Ntseco uajuendayá tcbënjáninýe y tcbënjanaafsé?

38 ¿O ntseco inýe luarocana ashjanganocá tcbënjáninýe y posada tcbënjanaántšame, o enašá y entsáyá jtichëtjuama tcbënjanaëtšetá?

39 ¿O ntseco šocá o cárceloca utamená tcbënjáninýe y jauatsëtsayama tifjána ca?’

40 “As chë Utabná echanjóju: ‘Ndegombre cbëyana, lempe ntšamo chë atšbe catšátanguentšana chë más batšá uámanëngaftaca šmojamcá, cach átšeftaca šmonjanma ca.’

41 “Chentšana chë Utabná chabe uañicuayoica chamojtsemna entsanga echanjáuyana: ‘Atšbentšana mojuánanga atšbe Bëtsabe uaboténënga. Infiernoye motsajna, chë ndocna te queochátsfsana iñeshoye; chocha endëprontana Satanás y chabe ustonëngbiama.

42 Er atše shëntseca sënjánana y tšëngaftanga saná ndoñe chešmatancredadó; sonjanajuendá y ndoñe chešmatanafsé;

43 inye luarocana ashjanganacá sënjánana y ndoñe posada chešmatanántšame. Enašá sënjánana y ndoñe entsayá chešmatanëtsetá; šocá sënjanájona y cárceloca sënjanëtámena y ndoñe chešmatanatsëtsá ca.’

44 “As chënga mochanjatjaye: ‘Bëngbe Utabná, ¿ntseco tcbënjáninye shëntseca o uajuendayá, o inye luarocana ashjanganacá, o enašá, o šocá o cárceloca utamená y ndoñe tcbënjánajabuache ca?’

45 “Y chë Utabná echanjóju: ‘Ndegombre cbëyana, tšëngaftanga ntšamo chë atšbe catšátanguentsana chë más batšá uámanëngaftaca, ndoñe šmonjanmcá, átšeftaca cach ndoñe chešmánanma ca.’

46 “Chëngna infiernoye nyetsca tescama mochantsësetjango, y chë Bëngbe Bëtsá chabe bominyiñe tšábenga tojábiamëngna chë nyetsca tescama yomna tšabe vida mochántsebomna ca” —Jesús tojánayana.

26

Entsanga tmojanjuabó ntšamo jamëse Jesús jishachama (Mc 14.1-2; Lc 22.1-2; Jn 11.45-53)

1 Lempe chca tojánayanentsana, Jesús chabe uatsjëndayënga tojanëyana:

2 “Tšëngaftanga šmondëtatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá inyëngbe cucuatšine mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

3 Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefna, Caifás, chë bachnangbe más uámana amëndayabe bëts yebnentše.

4 Tmojanenojuabó y tmojanenoyeuná jtseíngñase Jesús jishachama, y jtsóbama.

5 Pero imojtsichamo: “Quem fiestëntscuana ndoñe, entsanga yapa muanjónťša enbouenanana ca.”

Canye shembása botamana uanguëtše béjaye Jesusbe bestšašine tbojan- buešcja (Mc 14.3-9; Jn 12.1-8)

6 Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše.

7 Chëntscuana canye shembása Jesúsbioye tojanabeconá. Chë shembásana tojanamba canye alabastro jarrëtema, jútjena canye puerta uámana botamana uanguëtše béjayeca. Jesús mesëshentše yojtsemnëntscuana, chë shembása chabe bestšašine chë botamana uanguëtše béjaye tbojanbuešcja.

8 Chë uatsjëndayënga chca tmojáninye orna, tmojanotjayaná y tmojanontšë ichámua: —¿Ndáyeca nye bonamente chë soye chca yojtsemna ca?

9 Chamna, matmënjobenanga chë béjaye becá crocenánama juiyana y chánaca ndbomnjëmënga matmënjújabuache ca.

10 Jesús chë soye tojanuena; as tojanëyana: —¿Ndáyeca ndoñe cachá quem shembása smochanjonýaye ca? Ntšamo tonjamcá tšabá entsemna.

11 Er chë ndbomnejémengna nýets tempo tšëngaftangbeñe mochanjëftsemna, pero atše tšëngaftangaftaca ndoñe nýets tempo quicháisemna.

12 Ntšamo chë shembása tojamcá, chë botamana uanguëtše bėjaye atšbe cuerpiñe jabuésjése, cha šontsepróna atše juatbontsa tescama.

13 Ndegombre cbëyana, quem luariñe ndayéntšnaca Bëngbe Bëtsabe soyëngama chamojtsabuayiyná chentše, ntšamo quem shembása tojamámna beca mochanjëftsóyebuambaye, chca, entšanga chabiama chamotsenójuabnama ca —Jesús tojanëyana.

*Judas tojána bachnangbe amëndayëngbioye, Jesús chamuishachama
(Mc 14.10-11; Lc 22.3-6)*

14 Canya chë bnëtsana uta uatsjendayënguentsá, Judas Iscariote ca uabainá, tojána bachnangbe amëndayëngaftaca jencuéntama.

15 Y tojanatjá: “¿Ntsachetsá smatjtabuénaye y Jesús tšëngaftangbe cucuatšíñe cbochjayentsšashejuana ca?”

As chëngna, unga bnëtsana ralbenga tmojtanabuená.

16 Y cach orscana Judas yojtsenguaye ntšámose y ntseco ora, Jesús chëngbe cucuatšíñe jayentsšáshejuana.

*Jesús chabe uatsjéndayëngaftaca Bashco saná tojanse
(Mc 14.12-25; Lc 22.7-23; Jn 13.21-30; 1 Co 11.23-26)*

17 Chë Bashco fiesta bojatsénté, chë lewadúraca ndëpormana tandëse jasama fiestëntscuana, chë uatsjéndayënga Jesúsbioye tmojanobeconá y tmojantjá: —¿Ndëmoca aca cojtseboše bënga fchaiprontama Bashco saná chacosama ca?

18 Y Jesús tojanëyana: —Chë bëts puebløye motsajna canye bacobe yebnoye y cha smochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sentsá, Bashco fiesta jamama atšbe uatsjéndayëngaftaca ca.’”

19 As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

20 Y tojanibétata orna, Jesús chë bnëtsana uta uatsjéndayëngaftaca mesëshentše yojtsemna.

21 Y imojtsesantscuana, Jesús tojanëyana: —Ndegombre cbëyana, canya tšëngaftanguentsá uayayëngbe cucuatšíñe šochanjáboshjona ca.

22 Chora chë uatsjéndayënga puerte ngménaca imojtsemna y tmojanontšë canyánya Jesús jatjayama: —Bëngbe Utabná, ¿nderado atše cha chtsemna ca?

23 As Jesús tojanëjua: —Canya nda chabe tandëse entsefchecuacná cach atše sëntsefchecuacná šcnenentše, cha uayayëngbe cucuatšíñe šochanjáboshjona.

24 Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrenguiñe chabiama iuayancá; pero, jtša lastema chë bochjáboshjonabiama! Más tšabá chabiama manjamna ndoñe ntjónana ca.

25 As Judas, chë boshjuaná, Jesúsbioye tbojantjá: —Buatëmbayá, ¿nderado atše chtsemna ca?

Y Jesús tbojanjúá: —Ndegombre tcjayana ca.

26 Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjéndayënga tojanatšatá. Y mëntsá tojánayana: “Mocñënga, mosënga. Atšbe cuerpo entsemna ca.”

27 Chentšana, canye coptema vínoyeca tojanaca, Bëngbe Bëtsábioye tbojtanchuá y chë uatsjéndayënga tojanëfšasé. Y mëntsá tojánayana: “Nýetscanga quem coptémentšana mošënga.

28 Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aiñe yochjochnënguama. Chë buiñe bëtscá entšangbiamama echanjuábuashana, chëngbe bacna soyëngama perdonánënga chamotsemnama.

29 Y ndegombre cbëyana, morscana atšbe ya ndoñe más chë uvasentšana obocniye quichaisofsiye. Chë tsëm vínoye tšëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama
(Mc 14.26-31; Lc 22.31-34; Jn 13.36-38)

30 Bëngbe Bëtsá jëtschuayama tmojancantá chentšana, Olivos tjšahoye tmojëfšsanbocana.

31 Choca Jesús tojanëyana: —Tšëngaftanga nýetscanga quem ibeta átšbeñe ošbuáchiyana šmochantsobuetše y šmochántšacheta, er Bëngbe Bëtsabe uabemana palabreñguiñe, cha mëntsá tojánayana: “Chë oveshëngbe abujëñya chanjóbá y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

32 Pero obanënguëntšana chaitayenentšana, tšëngaftangbe natsana Galileoye chanjá ca —cha tojanëyana.

33 Chora Pedro tbojanjuá: —Masque nýetscanga áceñe ošbuáchiyana chamotsobuetše y chamotsacheta, ntšamo ácaftaca yochjopása causa, atšbe ndocna te ca.

34 As Jesús tbojanayana: —Ndegombre cbëyana, cam ibeta, ngallo cabá ndëcánta ora, aca unga soye cochanjayana ndoñe šconduabatma ca.

35 Pero Pedro tbojanayana: —Masque chašotsemna ácaftaca jóbánama, atšbe ndoñe quichátayana ndoñe cbonduabatma ca.

Y nýetsca uatsjéndayëngnaca cachcá imojtsichamo.

Getsemaní luarentše Jesús Bëngbe Bëtsáftaca tbojanencuentá
(Mc 14.32-42; Lc 22.39-46)

36 Chentšana, Jesús chabe uatsjéndayëngaftaca canye luare Getsemaní ca uabáinoye tojána. Choca tojanëyana: “Muentše motbiamama, chëntscuana atšbe choye chanjá Bëngbe Bëtsáftaca jencuëntama ca.”

37 Y Pedro y chë Zebedeobe uta uaquiñata tojëfšsanëbiatše. Choca yojóntša puerte ngmënaca y corente cochtsetšënaná jtsemnama.

38 Jesús tojanëyana: “Atšbe ainana puerte ngmënaca entsemna, mo jobanamcá. Muentše moquedanga y átšeftaca šmochantšëfšna ca.”

39 Chora Jesús más natsanoye tojána, tojanoshamentšé y fshantsóntscoca yojotšëjbéna, y mëntsá Bëngbe Bëtsáftaca tbojanencuentá: “Atšbe Taitá, jopódianëse moma atšbe japadësama ndoñe chašondëtsemnama. Pero ntšamo atšbe stsebošcá ndoñe chaondëtsemna, sinó ntšamo aca cojtsebošcá ca.”

40 Chentšana, Jesús chabe unga uatsjéndayëngbioye tojtanabo y chëngna immétsomañe. Chca tojánanýena ora, Pédrëbioye tbojaniyana: “¿Ni mo canýe horatema tsëngaftanga šmonjobená átšeftaca jtsefnana ca?”

41 Smochtsefná y Bëngbe Bëtsáftaca šmochtsencuéntaye, chca, bacna soye jamama ndoñe chacmondócochënguama. Tsëngaftanga ndegombre šmontseboe espíritoca Bëngbe Bëtsá joneyunayama, pero cuerpiñe añemo ndoñe quešmátsbomna ca” —Jesús tojanéyana.

42 Uta soyama tojtesaná y mëntšá Bëngbe Bëtsáftaca tbojanencuentá: “Atšbe Taitá, atše japedésama ndoñe chašondëtsemnana jamama ndoñe jopódianëšna, nýe ntšamo aca cojtsebošcá chaotsemna ca.”

43 Y tojtanabo ora, chë uatsjéndayënga cachiñe immétsomañe; yapa ocñaye causa nýe imojtsefná.

44 As Jesús cachcá yojëtsëñýaye, y ungama cachiñe tojtesaná Bëngbe Bëtsáftaca jencuéntama, y cach palabrénga tojánayana.

45 Chora chë uatsjéndayëngbioye tojtanabo y tojanéyana: “¿Cabá šmotsomañe y šmotsochnañe ca? Ya ora tocjebuache, Bëngbe Bëtsá Entšá tbojanbemá bacna soye amëngbe cucuatšíñe mochanjábošjona.

46 Motsbananga, cuajna. Minýënga, chë boshjuaná ya entsebecóna ca.”

Uayayënga Jesús tmojanishache

(Mc 14.43-50; Lc 22.47-53; Jn 18.2-11)

47 Jesús cabá yojtsoyebuambnantscuana, Judas, canýe chë bnëtsana uta uatsjendayënguentšá, tojánashjango, y cháftaca imojtsemna ba entšanga espadëjanga y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga.

48 Judas, chë boshjuaná, tojanjuabó ntšamo jamana entšanga jinýanýiyama ndëmua Jesús bëtsemnana. Chíyeca yojáuyana: “Nda chajjauámocho, cha echántsemna. Smochjishache ca.”

49 Cachora Judas Jesúsbioye tojanobeconá y tbojančuá: —Buajtana, Buatëmbayá ca.

Y tbojtanámocho.

50 Jesús tbojaniyana: —Enutá, moma chë ndayá jabomama tcojabo ca.

Chorna, chë entšanga tmojanobeconá, Jesús tmojanishache y tmojanánatse.

51 Chca orna, canýe enutá Jesúseftaca yojtsemná, chabe espadëja tojanenosëngbotëntšena, y chë bachnangbe más uámana amëndayabe oservenábíoye canýe matscuaše tbojtšanëštjango.

52 As Jesús tbojaniyana: “Espadëja matosëngbuajonýá. Nda espadëjaca tbojóba chana, cach espadëjaca echanjóbana.

53 ¿Aca ndoñe condëtatsëmbo, atše atšbe Taitábioye stjaimpádase, cha cachora atšbiama nanjichamuá bnëtsana utama más ejércitënga angelotëmëngaca?

54 Pero chcasna, ¿ndayá Bëngbe Bëtsabe uabemana palabrénguiñe endayaná ntšamo nanjochnëngo? Chiñe endayana ntšamo entsopasancá jochnënguama canmëna ca.”

55 Cachora Jesús entšanga tojanatjá: “¿Ndáyeca šmojabo espadëjanga y ngarotbéngaca atše jishachama, mo atše canýe bacá uamana entšá cuaftsemncá ca? Atše cada te Bëngbe Bëtsabe bëts yebnoca tsëngaftangaftaca sënjántbemana abuátambaye, y choca ndoñe chešmátanishache.

56 Pero lempe quem soyënga chca entsopasana, cachcá chaotsemnama ntšamo Bëngbe Bëtsabe uabemana palabrenguiñe chë Bëngbe Bëtsabe juabna oyeuambnayënga tmojanayancá ca” —Jesús tojánayana.

Cachora nyetsca uatsjëndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonjá.

*Jesús tmojanánatse chë judiëngbe más uámana amëndayëngbioye
(Mc 14.53-65; Lc 22.54-55, 63-71; Jn 18.12-14, 19-24)*

57 Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentse chë ley abuátambayënga y chë judiëngbeñe bëtsëjemëngcá amëndayënga tmojánenefna.

58 Pedro bënocana Jesús tbojanasto, chë bachnangbe más uámana amëndayabe chashjónscoñe; choye tojánamashëngo y chë Bëngbe Bëtsabe bëts yebnoca josticiëngaftaca yojótbema, chca, jtsetatšëmbuama ntšamo yochjopásama.

59 Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama,

60 pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango,

61 y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajhcana y nÿe unga tese jtëtsjebuana ca.”

62 As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

63 Pero Jesús nÿe iytëca yojtsemna. Chíyeca chë bachnangbe más uámana amëndayá tbojanayana: —Bëngbe Bëtsá Ainabe mándoca chomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

64 Chora Jesús tbojanjuá: —Aca ndegombre yomncá tcjayana. Y quem sóynaca cbéyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nyets obenana bomnabe catšbioica jtsetbemanana y celoca jantšetëshiñe jtsaboyana ca.

65 Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjátëjaboto Jesusbe contra chamuayanama?

66 ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebomna; jóbanama bontsemna ca.

67 Chora tmojanontšé Jesús juebëbuashëtjnyana, jabuache jantšetayana y ínÿengna imojtsejuëbjantšetaye,

68 y imojtsatsëtsnaye: “Cristo, aca ndegombre Bëngbe Bëtsabe juabna oyeuambnayá tcomnëse, jmomalisiá nda tcmënjajantšetá ca!”

*Pedro tojánayana Jesúsbioye ndoñe bonjanabuátma ca
(Mc 14.66-72; Lc 22.55-62; Jn 18.16-18, 25-27)*

⁶⁹ Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobeconá y tbojaniyana: — Acnaca, Jesús chë Galileocáftaca conjánana ca.

⁷⁰ Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

⁷¹ Chora Pedro bësoye yojábocna. Chentšna, inÿe shembása oservená chábioye tbojáninÿe y chë inÿe entšanga tojanëyana: —Cha, Jesús chë Nazareto-cáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntšá yojtsejúraye: —¡Chë boyabása ndoñe quetsatabuatma ca!

⁷³ Chentšana, chë chentše imojtsemnënga Pédrëbioye tmojanobeconá y tbojaniyana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

⁷⁴ Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúraye y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta.

⁷⁵ Y Pedro yojenójuaboje ntšamo Jesús tbojaniyanama. Cha mëntšá tbojaniyana: “Cabá ngallo ndëcánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngmënaca yojt-senóbošachna.

27

Jesús, Pilátbioye tmojanánatse (Mc 15.1; Lc 23.1; Jn 18.28-32)

¹ Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefna jenóyeunayama ntšamo jamëse Jesús chaóbanama.

² As, Jesús tmojanëcucúatsëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

Ntšamo Judas tojanóbana

³ Judas, chë boshjuaná, Jesús jóbanama ibojtsemnana tojanuena ora, puerte yojtsenócochinÿena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba,

⁴ y mëntšá tojanëyana: —Puerte bacna soye tijama. Atše canÿe bacna soye ndbomná tšëngaftangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiama? Cach aca cochátotatšëmbñe ca.

⁵ As Judas chë ralbenga Bëngbe Bëtsabe bëts yebnentše yojesëtšana, y yojá y yojëtsentsešaye.

⁶ Chë bachnangbe amëndayëngna chë ralbenga tmojtanatbaná y tmojánayana: —Quem crocénánama buiñe echanjuábuashana; ntšamo leyiñe endayanacá, bënga ndoñe quemuátobena chë Bëngbe Bëtsabiama soyënga quëcjanjëtëmiñe chana jasegórana ca.

⁷ Chcasna, chënga tmojanenoyeuná, chë crocénánacna chë Alfarerbe Luare ca uabaina fshantse jabuámiyana, y chca, canÿe luare jtsebomnana ndayentše chë inÿe luarëngocana entšanga áshjajnënga jutabuantsama.

⁸ Chíyeca, chë fshantse mëntscoñama Buiñe Luare ca iuabaina.

⁹ Chca, tojanochnëngo ntšamo Jeremías, chë Bëngbe Bëtsabe juabna oye-buambnayá, tempscá tojanayancá, ndayá yochjanchnënguama. Chana mëntsá tojánayana: “Y chë unga bnëtsana ralbenga tmonjanca, ntsachetsá chë Israeloca entsanga cha tmojanamananáca,

¹⁰ y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

Jesús Pilatbe delante

(Mc 15.2-5; Lc 23.2-5; Jn 18.33-38)

¹¹ Chentšana Jesús, chë mandado Pilátbïoye tmojanánatse y cha mëntsá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

¹² Chë bachnangbe amëndayënga y chë bëtsëjémënga Jesús mal imojtse-quédantscuana, cha ndocá ntjojuana.

¹³ Chíyeca Pilato tbojantjá: —¿Ndoñe contsuenana lempe ntšamo acebe contra montsichamcá ca?

¹⁴ Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mc 15.6-20; Lc 23.13-25; Jn 18.38-19.16)

¹⁵ Bashco fiesta ora, chë mandado yojanamana canye utamená jëtsboshjonana, nda entsanga tmojuabuayaná.

¹⁶ Chë tempo canye uachuana utamená inamna, Jesús Barrabás ca uabainá.

¹⁷ Nýetsca entsanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

¹⁸ Er chë mandado yojtsetátšëmbo, entsangna envidia causa Jesús chabe cucuatšíñe tmojánboshjonama.

¹⁹ Pilato chë tribunal ca uabáinentše yojtsetbemanëntscuana, chabe shema canya tbojanichmó mëntsá cha jauyanama: “Chë nýetsca soyënguiñe tšabá ama entsábïoye ndocá matsborlánana; chabe causa íbeta otjénayoca puerta sënjasufrí ca.”

²⁰ Pero chë bachnangbe amëndayënga y chë bëtsëjémënga entsanga tmojanayëñjaná, Barrabás jëtsboshjonama y Jesús chaóbana ca chamuayanama.

²¹ Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

²² Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nýetscanga tmojanjuá: —¡Motsecrucificá ca!

²³ Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

²⁴ Ndocá jamama yontsobenama y entsanga más jabuache enbouenanama tmojanontšema Pilato tojáninýe ora, cha tojanmandá búyeshe juabuíyëboñana y nýetscangbe delante yojtsenacuentšabiá. Mëntsá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

25 Chora n̄yetsca entšanga tmojanjuá: —¡Quemuá yochjóbanama, bēnga y bēngbe básengbiama castigo chaotsemna ca!

26 As Pilato, Barrabás tbojtanboshjona; tojanmandá soldadēnga Jesús jabuache chamotsetsetšenama y chentšana entšangbe cucuatšīne tbojánboshjona chamocrucificama.

27 Chentšana, chē mandadbe soldadēnga Jesús tmojanánatse chē mandadbe bēts yebnentša chashjoye y choca n̄yetsca soldadēnga chabe shēconana tmojanójoto.

28 Chorna, entšayá tmojtsanabotsca y shbuenda uafjatsenga entšayá mo reycá tmojanichētjo.

29 Can̄ye coronēsha tmojanapormá uchmašēfjangaca y tmojanabestšajó, y catšbioica cucuatšīne can̄ye niñēfja. Chorna, chabe shecuatšentše imojtsfshēntsaméntšenaye y imojtsáboyejuana. Mēntšá imojtsichamo: “¡Bayte judiēngbe Rey cochtsemna ca!”

30 Chēngnaca imojtsanbuashētjnaye y cach niñēfjaca bestšašentše imojtsēljanjnaye.

31 Y chca imnaftsáboyejuanentšana, chē shbuenda uafjatsenga entšayá tmojtsanabotsca y cachabe entšayá tmojtanichētjo, y chora, jacrucificama tmojanánatse.

Jesús tmojanrucificá

(Mc 15.21-32; Lc 23.26-43; Jn 19.17-27)

32 Chē entšanga chentšana tmojánbocana ora, tmojánenbetše can̄ye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

33 Can̄ye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”),

34 Jesúsbiye vínoye hiéloyeca enájuañiye tmojanabuiyé chaofšema; pero yojaftántia y ndoñe yonjábosena chiye jofšiyama.

35 Ya tmojanrucificá orna, chē soldadēnga Jesusbe entšayamna, tsbanánoye tmojanētšena, chca, jtsetatšēmbuama ndabiama yochjanáquedama.

36 Y chora chēnga chentše tmojanotbiama Jesús jtsebojanýama.

37 Y chabe bestšaše juatsboicna can̄ye uabemana soye tmojananjo. Chiñe yojétsayana ndáyeca cha tmojanrucificama, mēntšá: MUA JESÚS ENDMĚNA, CHĚ JUDIĚNGBE REY ca.

38 Utata bacna soye ochjajnayátnaca chēnga chentše tmojanrucificá, can̄ya Jesusbe catšbioica y chē ín̄yana chabe uañicuayoica.

39 Y chējana imojtsachnējuana entšangna, Jesús imojtsóyenguaye, imojtsobestšshanenaye

40 y imojtsatsaye: “¡Aca chē icobena Bēngbe Bētsabe bēts yebna jt-senásatajhcana y n̄ye unga tese jētsjebuana, cach aca mentsbocá! ¡Ndegombre Bēngbe Bētsabe Uaquiñá tcomnēse, chē cruzocana matastjango ca!”

41 Chē bachnangbe amēndayēnga, ley abuátambayēnga y chē judiēngbeñe bētsējemēngcá mándayēnga cachcá imojtsóyenguaye. Mēntšá imojtsichamo:

42 “Cha ín̄yanga tojēftsatsebacá, pero cachá jēntsbocana ndoñe quenátobena. Cha Israeloca entšangbe Rey tojtsemnēse, chē cruzocana chauatastjango, y chca, bēnga chábeñe fchtsošbuáchiye.

43 Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánese!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

44 Y chë bacna soye ochjajnayata, Jesúseftaca ibojtsecrucificanálnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

45 Nÿetsto orscana las treséntscoñe, nÿets quem luare yojtseibétata.

46 Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

47 Chca tmojanuena ora, báseftanga chentše imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

48 As chora, chentša canya tojéftsanótjajo canye esponjëshe janguanguama, untja vínoyeca chëshe tojanfchecuacué, canye niñëfjiñe tojananguësëtjo y Jesúsbioye tojanbeconá chaofsema.

49 Pero ínÿengna tmojánayana: “Cachcá mochjonýaye, er Elías tayochjabo jabátsbocana ca.”

50 Pero Jesús cachiñe jabuache tojanoyó y tojanóbana.

51 Y cachora, Bëngbe Bëngbe Bëtsabe bëts yebnoca vojújonýana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonýana. Fshantse yojuangmëmëmana, ndëtsbenga yojtsashtëtšana,

52 y chë cuevëshënga obanëngaca yojtsëtëtjo y banga Bëngbe Bëtsabe entšanga tmojtanayena.

53 Y chënga, Jesús tojtanayenentšana, chë cuevëshënguentšana tmojánbocana, y Jerusalén, chë uámana bëts pueblo ca uabáinoye tmojánamashjna y ba entšángbioye tmojánëbëbuacana.

54 Chë soldadëngbe amëndayá y chë ínÿengna, Jesús jtsebojanýama cháftaca tmojanoquedanga, chë fshantse yojuangmëmëmanama tmojáninÿe ora, y nÿetsca chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

55 Ba shembásëngnaca chentše imojtsemna y bënëcana imojtserreparana. Chëngna, Galileocana Jesús tmojanasto y cha imojanájabuachana.

56 Chë shembásëngbeñe imojtsemna María Magdalena; María, Santiago y Josebe mamá; y Zebedeobe uaqiñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

57 Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná.

58 José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchemá.

59 José chë cuerpo tojanca y canye nduatsenga lino entšëjuaca tbojanandmaná.

60 Y canye chabe tsëm cuevëshiñe tbojanjajó. Tempo cha inamánda chë cuevëshna ndëtsbënguiñe chamopormama. Canye bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe.

⁶¹ Pero María Magdalena y chë inÿe Mariyna chentse tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentse jtsebojanÿama

⁶² Yëfsana, chë ochnayté, chë bachnangbe amëndayënga y chë fariseunga cánÿiñe tmojána Pilato jinÿama.

⁶³ Tmojanianana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca.

⁶⁴ Chíyeca, momandá chë cuevëshe soldadënga chamotsashanÿá unga tentscuana. Chca, chabe uatsjëndayënga ndoñe íbeta chamondabo chabe teurpo jabétsatbëbama, y chentšana chënga entšanga chamúyana, Jesús tojtayena ca. Y chca, chabiamama quem ústonoye bostero soye, chë cachabiamama tojánayana soyëngama puerte más bacá nántsemna ca —chënga tmojanianana.

⁶⁵ As Pilato tojanëyana: —Tšëngaftanga cach tšëngaftangbiamama soldadënga šmondábamna. Motsajna y chë cuevëshe cuedádoca šmochtsashanÿá, ntšamo šmondëtatšëmbcá ca.

⁶⁶ Chora chënga tmojána chë cuevëshe jtsashanÿama; chë ndëtsbena, tsengájašeca imojuinÿananá, ntšotatšëmbcá ndocná choye chaondámashënguama, y soldadënga chentse tmojëftsanabashejuana.

28

Jesús tojtanayena

(Mc 16.1-8; Lc 24.1-12; Jn 20.1-10)

¹ Ochnayté chentšana, chë inÿe semana bojatsenté yojtsebínÿana ora, María Magdalena y chë inÿe María tbojána cuevëshoye jarrepárama.

² Ndeolpe fshantse tojanangmëmëmana, er Bëngbe Bëtsabe canÿe ángel celocana tojánstma, chë cuevëshoye tojanobeconá, chë atamiana ndëtsbé tojtsanjuaná y chiñe tojanótbema.

³ Chë ángelna mo canÿe tcuinÿëjca yojtsebuashinÿinÿana, y chabe uichëtjonëjuangá uafjantsëjuangá mo jantsetëshcá yojtsamna.

⁴ Chë soldadënga chca tmojáninÿe ora, de auatja yojtsangmëmëmaye y mo obanëngcá imojtsemna.

⁵ Chora chë ángel chë shembásatbioye tojanëyana: “Ndoñe batauatjana. Atše sëntsetatšëmbo tšëngaftanga Jesús, chë tmonjanrucificá cha šmojtsenguama.

⁶ Cha muentse ndoñe quenátsmëna; cha tontayena, ntšamo cachá tonjanayanacá. Mabata y šochjinÿe cha endétsesegoranentse.

⁷ Betsco motsata y chë uatsjëndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinÿe ca.’ ” Y chora cha tojánayana: “Chca šondmëna tšëngaftanga jauyanana ca.”

⁸ Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsanotjajo chë soye chë uatsjëndayëngbeñe jobuambayama.

⁹ Y ndeolpe Jesús chata tojánëbëbuacna y tojanacheuá. Chatna, chábioye tbojanobëconata, tbojtanadorata y chabe shecuatše shëconana imojtbojcuá.

¹⁰ Y Jesús tojanëyana: “Ndoñe batauatjana. Motsata atšbe uatsjëndayënga, atšbe catšátanga jáuyanama Galileoye chamotsá y choca atše šmochjinÿe ca.”

Ntšamo chë soldadënga tmojánayana ndayá tojanochnënguama

¹¹ Chë shembásata ibojtsayéntscuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá.

¹² As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojanatšatá,

¹³ y mëntsá tmojanabuayená: “Tšëngaftanga šmochjayana, ibeta šmotsomáñéntscuana, Jesusbe uatsjëndayënga tmojabo y chabe cuerpo tmojabétsatbëba ca.

¹⁴ Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanëyana.

¹⁵ As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscoñama judiënga cachcá mondbétsichamo.

Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama

(Mc 16.14-18; Lc 24.36-49; Jn 20.19-23)

¹⁶ Chentšana, chë bnëtsana canye uatsjëndayënga Galileoye tmojána, chë ndëmua tjoye Jesús chënga tojanabuayená choye.

¹⁷ Y Jesús tmojáninýe ora, tmojtanadorá. Pero báseftangna imojëtsejuabnaye nderado cha ndoñe Jesús yontsemna ca.

¹⁸ Jesús chëngbioye tojanobeconá y tojanëyana: “Bëngbe Bëtsá nyëts mando atše šonjatšetá celoca y quem luarentše.

¹⁹ Chcasna, motsajna, nyëts luarënguenache oyenënga atšbe uatsjëndayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca,

²⁰ y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesús tojanëyana.

San Marcos

Juan chë Ubayaná entsanga yojanabuayiyná

(Mt 3.1-12; Lc 3.1-9, 15-17; Jn 1.19-28)

¹ Měntšá tojanobojaťšé chë tšabe noticiënga Běngbe Bětsabe Uaquiñá Jesu-
cristbiana.

² Nťšamo baytë entsemna, chë Běngbe Bětsabe juabna oyebuambnayá Isaías
chabe librěšaňe yojěťsayancá, nťšamo Běngbe Bětsá chabe Uaquiñábioye
ibojauyanama cha tojanábema ora:

Minýe, atšbe abuaiynayá acbe natsana sěntsichamná,
chë aca jabama lempe echanjaprónta cha.

³ Entšanga ndoyena luaroca cha enduáyebuache měntšá:

“Běngbe Utabná echanjabo ca;

mo nda canýe benache tojtseprontacá canýe uámana entšá jashjanguama,
cachá tšěngaftanga, cha jabama ainaniňe tšabe juabněngaca
šmochtseprontana ca” –cha tojanábema.

⁴ Chcase, Běngbe Bětsá Juan tbojanichmó, y cha tojánbocna entšanga
ndoyena luaroca, Běngbe Bětsabe soyěngama abuaiynaye y entšanga
ubáyana. Cha entšanga yojanětsěsnaye: “Tšěngaftangbe bacna soyěngama
ngmėnaca šmochtenójuaboje, chca amana sochtsajbaná, y Běngbe Bětsabe
benache šmochťishache. Chora cbochjúbaye, y Běngbe Bětsá tšěngaftangbe
bacna soyěngama cmochanjáperdonaye ca.”

⁵ Nýets Judea luarocana chábioye entšanga imojánbocana, y Jerusale-
nentšana nýetsca entšágnaca, y Běngbe Bětsábioye chěngbe bacna soyěngama
jaimpáda chentšana, Juan Jordán ca uabaina bėjayıňe chěnga yojanėbáyana.

⁶ Juanbe entšayá inauapormana camellbe stjėnasheca y bobache yojanas-
nana; chapulinatémęga y tjaňe méloye inasaye.

⁷ Y měntšá entšanga yojanětsěsnaye: “Atšbe ústonoye inýa echanjabo,
atšbiana más obenana bomná; chíyeca atše mercedo taitatobuajoňe, ni mo
jotsejbiyana chabe shecohětjoněshentša corriėja jajafjonama.

⁸ Atšna búyeshca cbondėubáyana, pero chë echanjabábeyecna, Běngbe Bětsá
bochanjíchmu chë Uámana Espíritu tšěngaftangbe ainaniňe cháuamashėnguama
ca.”

Juan, Jesúsbioye tbojanabaye

(Mt 3.13-17; Lc 3.21-22)

⁹ Chë tempo, Galilea luarocana Nazaret pueblentšana Jesús yojěťsebocna,
y Juan yojťsemnoye tojána; y Jordán bėjayıňe Jesúsbioye cha tbojanabaye.

¹⁰ Bejajoicana yojťashěbėbocna orna, tojáninýe celoca atėfjniňe, y chë
Uámana Espíritu chábioye mo palomatemcá yojťsastjajana.

¹¹ Y celocana Běngbe Bětsá měntšá tbojaníyana: “Acna atšbe bonshana
Uaquiñá condmėna; acbiana corente sěntsoyejuá ca.”

Jesús tojanobená Satanás jayėňjanama

(Mt 4.1-11; Lc 4.1-13)

¹² Chentšana chë Uámana Espíritu Jesúsbioye entšanga ndoyena luaroye
tbojanánatse.

13 Canta bnětsana te chě entšanga ndoyena luaroca tbojanjětana, y Sata nasna yojanabó jisháchichiyama. Chě luarentše tsátjaye bayěnga imnajena; chentsana, Běngbe Bětsabe angelěnga cha imojtseservena.

Jesús tojanontšé Galileoca chabe trabajo jamana
(Mt 4.12-17; Lc 4.14-15)

14 Juan cárceloye tmojanětamentšana, Jesús Galileoye tojesaná; y chiñe cha yojanabuayiyá chě tsabe noticiěnga Běngbe Bětsabiana.

15 Jesús entšanga yojanětsěsnaye: “Ora tocbuache, Běngbe Bětsabe aměndayana echanjóshjango. Tsěngaftangbe bacna soyěngama ngmėnaca šmochtenójuaboye, y chca amana šmochtsajbaná y Běngbe Bětsabe benache šmochtishache; y ainaniñe chě tsabe noticiěnga Běngbe Bětsabiana šmochjóyěngacñe ca.”

Jesús tojánachembo canta boyabásenga beonga ashebuánayěnga cha chamuas-tama

(Mt 4.18-22; Lc 5.1-11)

16 Galilea uafjónaye tsachajana Jesús vojtsaye ora, cha tojánanye Simón y chabe uabentsá Andrés; chatna atarraiěshangá ibnetsashbuětsetšañe, er beonga ashebuánayata chata ibnamna.

17 Chora Jesús tojaněyana: “Atšeftaca mabata. Atše cbochanjábiana Běngbe Bětsabiana entšanga anguayata; y morscana, nye beonga ashebuánayata ndoñe quešochátsmėna ca.”

18 Y cachora chatbe atarraiěshangá cachcá tbojėsanaboshjuana y Jesús tmojanasto.

19 Más chcoye yojátaye orna, Jesús tojánanye Santiago y chabe uabentsá Juan, Zebedeobe uaquiñata; chatna barquėshañe ibnetsotbemañe, chatbe atarraiěshangá atapórmayñe.

20 Chora Jesús chě útata tojánachembo; as chatna, chatbe taitá Zebedeo chě barquėshañe tmojėsanboshjona chabe peóngaftaca y Jesúseftaca tbojtsanoñe.

Jesús, bacna bayěbe juabna cán̄yabioye tbojanbojuaná
(Lc 4.31-37)

21 Chentsana, Jesús y chabe uatsjėndayěnga Capernaum ca uabaina puebloca tmojánashjajna. Chě ochnayté, Jesús chě judiěngbe enefjuana yebnentše tojánamashěngo y yojóntša entšanga jabuátambama.

22 Entšanga imojtsenjanaye ntšamo Jesús vojtsabuatambacá, er chama mo canye mando bomnacá vojtsóyebuambnaye, ndoñe nye ntšamo Moisesbe ley abuátambayěnga imojanabuatambacá.

23 Chě pueblentše judiěngbe enefjuana yebnentše yojtsemna canye entšá bacna bayěja uambayá, y chábeyeca chě boyabása yojóntša měntšá uayebuáchana:

24 —¿Ndayama běngbiyoe təcjabo, Jesús Nazaretocá? ¿Tcojabo bėnga jaběsapochocama? Atše sėndětatsėmbo nda aca comnama, aca chě Běngbe Bětsabe Uamaná ca.

25 Chora Jesús chě bayěbuiyoe tbojtsanácacana, y tbojaniyana: —¡lytėca móbema y chábentsana maisebocna ca!

26 Chora chě bacna bayějna tojanma chě boyabása ataque chaboshachama, jabuache tojanoyó y chábentsana tojėsanbocna.

27 Chama, nyetsca entšanga ojnanáněnga imojtsemna, y měntšá imojtsenjanaye: “¿Ndayá chca yojtsemna? ¿Canye tsėm buatėmbana soye? ¡Quem

boyabása mando bomnacá y obenacá entsabuatambá, y chca, chë bayëjenga cha jtsamëndayana y chëngnaca joyeunayana ca!”

²⁸ Y betesco nyëts Galilea luarentša pueblënguenache Jesusbiamá yo-
jtsótatsëmbo.

Jesús, Simón Pédrëbe uambén mamábioye tbojanshná

(Mt 8.14-15; Lc 4.38-39)

²⁹ Chentsana, chë enefjuana yebnentsana tmojánbocana y Santiago y Juánofaca Jesús tojána, Simón y Andresbe yebnoye.

³⁰ Simonbe uambén mamá šocá inajájona, jabuache calentóracá, y Jesúsbioye chë šocabiamá tmojanianá.

³¹ As chora, Jesús tojanobeconá, chë šocábioye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Lc 4.40-41)

³² Chë te jetiñe, shinÿe ya yojuenatjëmba ora, chë luarentša nyëtsca šoquënga y bacna bayëjenga uambayënga Jesúsbioye tmojanënëtsa;

³³ y nyëtsca entšanga bëšoye imojobeconá.

³⁴ Jesús banga tojanashná, nyëtsca šocana bomnënga, y ba bacna bayëjenga entšanguentšana tojtanebuacna; y ndoñe tonjanalesenciá chë bayëjenga chamóyebuambama, er chënga imnatatsëmbo cha chë Cristo bëtsemnama.

Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyiná

(Lc 4.42-44)

³⁵ Yëfsana cabá cachëse, cabá ibetcă, Jesús tojëftsantsbaná, chë pueblentsana tojëftsanbocana y entšanga ndoyena luaroye tojtsanoñe, choca Bëngbe Bëtsáftaca jencuëntama.

³⁶ Pero Simón y chabe enutëngna tmojána jetsenguanguama;

³⁷ y tmojtsaninÿena ora tmojanianá: —Nyëtscanga cmontsenguá ca.

³⁸ Y Jesús tojanëyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entšanga chayábuayenama; er chama atše sënjabo ca.

³⁹ Y chentsana, Jesús yojánana Bëngbe Bëtsabiamá entšanga abuayiyenaye chë judiëngbe enefjuana yebnënguenache, nyëts Galileiñe, y entšangbentsana bacna bayëjenga yojtëbuacana.

Jesús, canÿa bacna nguayanánaca šocábioye tbojanshná

(Mt 8.1-4; Lc 5.12-16)

⁴⁰ Chentsana, canÿe boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

⁴¹ Jesús chabiamá tbojanongmé; cucuátšeca tbojánbojajo y tbojanianá: —Añe sëntseboše. ¡šocana cbotsebojuaná ca!

⁴² Y cachora chë šocana tbojtsanóbojuanañe y tšabá yojtsatsmëna.

⁴³ Chora Jesús chábioye tbojtanicmó, pero puerte mëntšá tbojanmandá:

⁴⁴ —Mouena; ndocnábeñe quem soye cattsecuëntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe

Bëtsábioye chama jëtschuayama, chca, nÿetsca entsanga chamotatsëmbona mora ya tšabá cojtsatsmënama ca.

⁴⁵ Pero chë boyabásana, chentšana tojëftsanbocna y cachora yojóntša nÿetsquénache entsanga yapa acúntayana Jesús tbojanshnama. Chë causa, Jesús ndoñe yontsobena entsangbe delante pueblënguenache jtsanana, ndayá nÿe chë pueblënga béconana y nÿetsca chë entsanga ndoyena luarënguiñe yojánana; pero nÿets luarëngocana chábioye entsanga imojánashjajuana.

2

Jesús, canÿe jama ndobenábioye tbojanshná

(Mt 9.1-8; Lc 5.17-26)

¹ Chentšana, Jesús Capernaumoye tojtanashjango; y entsanga imojátatsëmbona, Jesús yebnentše yojtsatsmënama.

² Mallajta entsanga chentše tmojanójoto; chë causa chë yebnentše ya tondaye más luare entsangbiama yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiynaye.

³ Chora tojanopasá, canta boyabásenga tmojánashjango, canÿe entsá jama ndobená imojtsaismana.

⁴ Pero ndoñe tmonjanobená Jesús yojtsemnoye cha juambana, tša entsanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëštjango.

⁵ Jesús tojáninÿe chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniyana: “Sobreno, mouena; acbe bacna soyënga tcbontseboperdoná ca.”

⁶ Chentše báseftanga judiëngbe ley abuatambayënga imnatbemana; chënga chora mëntšá imojtsejuabnaye:

⁷ “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entsá quenátobena ínÿabioye bacna soyëngama japerdonana; nÿe Bëngbe Bëtsana aiñe ca.”

⁸ Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná?”

⁹ ¿Tšëngaftangbiama ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca?’

¹⁰ Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entsanga bacna soyëngama jáperdonama ca” —Jesús tojánayana.

Y chë jama ndobenábioye tbojaniyana:

¹¹ “Atše cbëyana, matëtsbaná, acbe tjuashe mesocñe y acbe yebnoye motatoñe ca.”

¹² Chachora chë jama ndobená tojtantsbaná, chabe tjuashe yojesocñe, y entsangbiajana chentšana yojésebocna. Chama nÿetsca entsanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nÿa ndocna te tša bëts soye chemuáisinÿe ca.”

Jesús, Levíbioye tbojanchembo chabuastama

(Mt 9.9-13; Lc 5.27-32)

¹³ Chentsana, Jesús cachiñe chë uafjajónaye tsachoye tojesaná; ba entsanga chábioye imojobeconá, y Jesús yojtsabuátambaye.

¹⁴ Chentsana yojtsataye orna, Jesús tbojáninýe Levíbioye, Alfeobe uaquiñá, yojtsanotbemañe, entsanga impuesto atjanayacá inétsotrabajañe. Chora Jesús tbojaniana: “Smasto ca.”

Y Leví tojantsbaná y tbojanasto.

¹⁵ Tojanopasá, Jesús Levibe yebnentse yojtsesaye, y banga Romocama entsanga impuesto atjanayënga y inýe bacna entsanga, mesëshentse cánýiñe imojtsetbiámána, Jesús y chabe uatsjéndayëngaftaca; er ba entsanga cha imojústona.

¹⁶ Chë fariseunga y chë ley abuátambayënga, chë entsángaftaca Jesús yojtsesama tmojáninýe ora, chabe uatsjéndayëngbioye tmojanatjá: —¿Ndáyeca tsëngaftangbe buatëmbayá, entsanga impuesto atjanayëngaftaca y bacna soye amëngaftaca yojtsesá ca?

¹⁷ Jesús chca tojanuena; as mëntsá tojanëjua: —Chë salud tmotsobomñënga, ashnayá ndoñe ntsëjabótana, pero chë shoquënga añe. Y atse ndoñe chiyátabo chë Bëngbe Bëtsabe bominiñe tsabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama

(Mt 9.14-17; Lc 5.33-39)

¹⁸ Canýe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básipta entsanga Jesúsbioye tmojanobeconá y mëntsá tmojaniana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

¹⁹ As Jesús tojanëjua: —Chë casamento fiestentse, chë ófjanënga saná ndoñe ntsabuáshebenana. ¿Ntsamo chca ndoñe nántsemna? Chë tojobouamá entsá chëngaftaca tojtsemnëntscuana, chë ófjanënga bëtsáca jasana y cháftaca oyejuayënga jtsemnana.

²⁰ Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsamo chë tojobouamá boyabása y chë ofjanëngaftaca endmëncá, cachcá endmëna atse y atšbe uatsjéndayëngaftacnaca.

²¹ “Ndocná, canýe tanguá entsáyá, base tsëm entsëjuaca jtarmëndana; chca tcojamëse, chë tsëm entsëjua jtsabëconana y chë tanguá entsáyá más jtsatanëcanana, y chca, chë uátanëcniñe más bëtsiñe jtsabemana.

²² Y cach ndoñe, chë tojtseshayana vínoye tanguá jasabenguiñe ntjataftsuámáyana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservëñana. Chíyeca comna, chë tojtseshayana vínoyna tsëm jasabenguiñe juaftsuámána; chca, chë jasabenga y chë vínoye josérviana ca” —Jesús tojánayana.

Jesusbe uatsjéndayënga canýe ochnayté trigo tmojanátabebe

(Mt 12.1-8; Lc 6.1-5)

²³ Canÿe ochnayté, Jesús canÿe jajajana yojtsaye; y chabe uatsjéndayénga chějana imojtsachnėjua ora, tmojanontsé trigo juatabebiana.

²⁴ Chë fariseunga chca imojinÿe ora, Jesúsbioye tmojaniyana: —Minÿe. ¿Ntšamo acbe uatsjéndayénga montsamcá, ndoñe quenátslesenciana ochnayté jtšamama ca?

²⁵ Pero cha tojanėjua: —¿Ndoñe šmëndualía y šmondétatšëmbo ntšamo Rey David y chabe enuténga tmojanmama šhéntseca imojtsemna ora y jasama yojtsėjaboto ora?

²⁶ Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnama inÿinÿnaye tandëšënga yojase; y chë cháftaca imojánajna entšágnaca yojátsataye. Y chë tandëšna nÿe bachnangbiamabelesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entšabiamatojama y entšá ndoñe tbonjánbema nÿe chë ochnayté ndoñe chaondétrabajama.

²⁸ Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtšemándayana ca.

3

Chë buashana cucuatše bomna entšá (Mt 12.9-14; Lc 6.6-11)

¹ Chentšana, Jesús cachiñe chë judiëngbe enefjuana yebnoye tojésanamashëngo; y chentše canÿe boyabása yojtsemna, buashana cucuatše bomná.

² Chë fariseunga chiñe imojtserrondana jinÿama nderado Jesús chë ochnayté chábioye tabuanjashnama, as chca chënga jtšebomnama ndaye sóyeca cha mal jaquédana.

³ Chora Jesús chë buashana cucuatše bomnábioye tbojaniyana: —Chentše, entšangbe delante motsa ca.

⁴ Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtšepochócama ca?

Pero chënga ndocá tmonjanjuá, nÿe iytëca imojobiama.

⁵ Chora Jesús rábiaca y ngmënaca chë fariseunga tojanëñanÿé, chënga ainaniñe josértama ndoñe montseboše causa; y chë buashana cucuatše bomnábioye tbojaniyana: —Macuenÿanëjaná ca.

As chë boyabása tojanacuenÿanëjaná, y chora tšabá chëtša yojtsatamna cach inÿetšacá.

⁶ Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

Mallajta entšanga Jesúsbioye tmojanobeconá

⁷ Chentšana, Jesús chabe uatsjéndayëngaftaca tojanoluaré mar bėjaye tšachoye, y Galileocana bëtscá entšanga tmojanasto.

⁸ Inÿe entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán bėjaye chenguanoicana, Tiro y Sidón pueblëngocana. Chënga tmojanobeconá, Jesús tša bëtš soyënga yojtsamama tmojanuena ora.

⁹ Jesús chabe uatsjéndayénga tojanéyana: “Motsajna y canye barquésna atsbiamá smochjuapróna, tsa entsanga ndoñe chašmondétsatsentsnama ca.”

¹⁰ Er cha banga tojanashná, y chë causa, nyetscanga šocana bomnénga chábioye tmojanajuatsentsená cha jaboajuama.

¹¹ Y chë bacna bayéjénga uambayénga, Jesús tmojinýe ora, betesco chabe shecuatsentse imojtsofshéntsaméntsenaye, y chë bacna bayéjéngbeyeca méntšá imojtsáyebuache: “¡Aca Bëngbe Bëtsabe Uaquiñá condmëna ca!”

¹² Pero Jesús puerte tojanamëndá, nda cha bétsemnama entsangbe delante ndoñe chamondétsichámuama.

Jesús chë bnëtsana uta uatsjéndayénga tojanabacacá
(Mt 10.1-4; Lc 6.12-16)

¹³ Chentsana, Jesús canye batsjoye tojántsjua, y ndëmuanýénga tšabá tbojanýnanénga tojánachembo. Y chëngna chábioye tmojanobeconá.

¹⁴ Chora, chënguentšana bnëtsana útata tojanëbuáyana, chamot-setjëmbambama, y Bëngbe Bëtsabe soyéngama entsanga chámabuayenama;

¹⁵ y chënga obenana tojanatsatá entsángbentsana bacna bayéjénga jtëbuacanama.

¹⁶ Mënga mondmëna chë bnëtsana uta bocacáénga: Simón, chë ndábioye Pedro ca Jesús tbojanabaye;

¹⁷ Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”;

¹⁸ Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá;

¹⁹ y Judas Iscariote, chë chentsana ndoñe baytesna, Jesús uayayéngbe cucuatšíñe bochjanboshjoná.

Ley abuátambayénga tmojánayana, Jesús Satanásbentsana obenana tojanóyëngacñe ca
(Mt 12.22-32; Lc 11.14-23; 12.10)

²⁰ Chentsana, Jesús yebnoye tojtanamáshéngo, y tsa entsanga chentše tmojanójoto; chë causa, ni cha ni chabe uatsjéndayénga, ni mo jasama luare ndoñe imontsebonna.

²¹ Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsencuéntaye cha opá tojtsanóbema ca.

²² Y chë ley abuátambayénga Jerusalenocana tmojánashjajnëngna Jesus-biamá méntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayéjénga amëndayá, Jesúsbioye obenana tbojatšetá entsángbentsana bacna bayéjénga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuenténgaca tojanontšé jáuyanana, jinýanýiyama chënga canye ndoñe ndegombre soyíñe imojtsemnama, méntšá: “¿Ntšamo Satanás nantsobena cachá jtenábocnama ca?”

²⁴ Canye amëndayábentše entsanga tmojtsenojatá y tmojtsenáyase, chë amëndayana ndoñe ntjatotonana.

²⁵ Cachcá, canye yebnentše pamíllanga tmojtsenojatá y tmojtsenáyase, chë pamíllanga ndoñe tšabá nyets tempo quemochátmëna.

²⁶ Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

²⁷ “Ndocná quenátobena canye corente añemo bomna entsabe yebnoye jamashënguana y chabe soyënga jtsebocana, ndoñe natsana tconjshëtsebatsëquëse. Nye tcojshëtsebatsëquëse cocayé cuanjobenaye cha jefcana.

²⁸ “Ndegombre cbëyana, Bëngbe Bëtsá entsangbe nyetsca bacna soyënga echanjáperdonaye, y ntšamo Bëngbe Bëtsabiana y ínÿengbiana ndoñe tšabá tmontsichamo soyëngnaca;

²⁹ pero chë Uámana Espíritbiana ndoñe tšabá ichámëngna ndocna te queochátaperdonaye, er nyetsca tescama castigánënga jtsemnana chënga jt-sannana ca” —Jesús tojánayana.

³⁰ Jesús chca tojanëyana, er chënga imojtsichamo cha bacna bayëja ibojt-sambá ca.

Chë Jesusbe ndegombre pamíllanguentsënga

(Mt 12.46-50; Lc 8.19-21)

³¹ Chëntscuana, Jesusbe mamá y catšátanga choye tmojánashajna, pero nÿe shjoca imojtsemna; y canya tmojanichmó cha jachembuama.

³² Chë ba entsanga chentše chabe shëconana imojtsetbiámánëngna, chora tmojaniana: —Acbe mamá, acbe catšátanga y uabënganga shjoca montsemna; aca cmontsenguá ca.

³³ Chora cha tojanëjua: —¿Nda atšbe mamá yomna, y ndëmuanÿenga atšbe catšátanga ca?

³⁴ Chentšana, chë chabe shëconanana tbiámánëngbioye jarrepárase, tojánayana: —Quemënga mondmëna atšbe mamá y atšbe catšátanga.

³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamíllanguentsá ca.

4

Chë jenabe cuento

(Mt 13.1-9; Lc 8.4-8)

¹ Chentšana, uafjajónaye tsachoca Jesús tojtëtanontšë Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjajónayentše yojanamna canye barquëshoye Jesús tojánashëngo y tojanótbema; y chë entsanga tsachoca imojtsemna.

² Chora cuentëngaca ba soyëngama tojanabuatambá.

Mëntšá tojanëyana:

³ “Smochjouena; canye jená chë jënaye jaujuquëshama yojëftsebocna.

⁴ Yojsëjqüëshaye orna, básefta jënaye benache juachañe yojuatquëcjana; pero jaja shloftšënga imojástjajna y lempe imojtsósañe.

⁵ Inÿe meshëngna ndëtsbenguiñe yojuatquëcjana, ndoñe yapa fshantse binÿentšë. Chiñna betscó yojuábocna, ndoñe yapa jashenocana fshantse yojanmëna causa;

⁶ pero yojuábocna orna, puerte yojojënÿána y yojtsancta; y yojtsábojo yapa tbëtëjënga tondaye causa.

⁷ Inÿe meshëngna uchmëshangañe yojuatquëcjana; chë uchmashá yojuájua ora, lempe yojtsatscué, y chca, chë jënayentšana tondaye yonjuashájona.

⁸ Pero inÿe meshëngna, uanguaniñe yojuatquécjana, y bëtsá tšabe shajuanënga chiñe yojóbcna: inÿenache, canÿe meshentšana unga bnëtsana meshënga yojóbcna; inÿenachna, chnënguana bnëtsana meshënga; y inÿenachna patse meshënga ca” —cha tojánayana.

⁹ Y chentšana, Jesús más tojánayana: “Chë jouenama tmojtsobenënga, smochjouena ca.”

Ndáyeca Jesús cuentëngaca yojánabuatambaye

(Mt 13.10-17; Lc 8.9-10)

¹⁰ Chentšana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bëtsayanama.

¹¹ As Jesús tojanëjua: “Bëngbe Bëtsá tšëngaftanga cmontsinÿanÿná nÿetsca chë mo iytëmenca yomna soyënga chabe amëndayama, pero chë inÿengbiöye ndoñe; chë soyëngama chënga lempe cuentëngaca sëntsëtsëtsná.

¹² Chca, masque beca chamotsafšna, ndoñe chamondobená chë Bëngbe Bëtsabe soyënga jinÿama; y masque beca chë soyënga chamouena, ndoñe queochátësertana, chënga Bëngbe Bëtsábiöye ndoñe chamondëtobéconama, y cha ndoñe chaondáperdonama ca.”

Jesús chë jenabe cuentama tojanabuayená

(Mt 13.18-23; Lc 8.11-15)

¹³ Chentšana, Jesús tojanëyana: “¿Quem cuentama ndoñe tmonjósertase, ntšamo chcase nÿetsca cuentëngama cmochjóserta ca?

¹⁴ Chë jená endmëna chë tšabe noticiëngama abuayinayá.

¹⁵ Básefta entšanga mondmëna mo chë benache juachañe yojuatquécjana jenaycá. Chëngna Bëngbe Bëtsabiana soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabëtsabuajuanama, chënga chiñe ndoñe chamondëtsošbuáchemá.

¹⁶ Inÿe entšanga mondmëna mo chë ndëtšbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana;

¹⁷ pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmonsasbuaché causa. Inÿenga mochantsëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye.

¹⁸ Inÿenga mondmëna mo chë ucmëshangañe yojuatquécjana jenaycá. Chënga Bëngbe Bëtsabe palabra mochanjouena,

¹⁹ pero quem luarentša soyëngaca oyejuayënga jtsemnana yapa mochántseboše, y nÿe bomnana jëftsebomnana yapa mochanjësenojuabnaye. Chë soyama y inÿe ba soyëngama yapa enócochinÿena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá.

²⁰ Pero inÿenga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nÿets ainánaca mochántseprontana chiñe jtsošbuáchiyama. Mo canÿe betiye beca tšabá tojtshajuaná, chënga bëtsá tšabe soyënga Bëngbe Bëtsabiana mochántsama. Inÿenga inÿengbiana más bëtsá soyënga mochanjama; y chca, inÿenga mochántsemna mo chë unga bnëtsana meshe tojanshajo jenaycá, inÿenga mo chë chnënguana bnëtsancá, y inÿengna mo chë patse meshënga tojanboté jenaycá ca” —Jesús tojánayana.

Chë uajuinÿanëshama cuento
(Lc 8.16-18)

²¹ Mëntsánaca Jesús tojánayana: “Ndocná juiyëbana canÿe uajuinÿanëshama cajonësho o jutsnëshama tajsoye juajájuama. Ndoñe; uajuinÿanëshama juiyëbana tsbanánoca juajájuama, lempe chaotsebínÿyama.

²² Ndocna yoiytëmena soye ntjinÿencá queochaisoquéda, y chë ndótatšëmbo soye ntsoatšëmbcá queochaisoquéda.

²³ Chë jouenama tmojtsobenënga, šmochjouena ca.”

²⁴ Y mëntsánaca Jesús tojanëyana: “Tšabá šmochjájuaboje ntšamo šmojtsuenanama. Nÿe batšatema šmojouenëse, nÿe batšatema cmochanjósertaye; pero aiñe tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama.

²⁵ Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama jósertama ndoñe tontsebošá, chë nÿe batšá ibosertana soyëngama bochántsebnatjëmbe ca” —cha tojánayana.

Chë ojuajna jenayama cuento

²⁶ Jesús mëntsánaca tojanëyana: “Bëngbe Bëtsabe amëndayana endmëna mo ntšamo canÿe boyabása jénaye tojuatbontsá ora echandbopasacá:

²⁷ masque cha cada ibeta jtsojájuana y bnëté jotsbanama, ibeta o bnëté, chë jénayentšana juabocnana y juájuaana, ntšamo chca yojtšájuaajnama chë boyabása ntjatstatšëmbcá.

²⁸ Chë fshantse cachabe ponto jamana ndayánaca chiñe chaójuama; natsana tsbuanachëtema jóbocnana, chentšana chë espiga, y chentšana chë meshënga jashájonana.

²⁹ Y chë meshënga ya tojtsebóchichna orna, játbanama jabocnana, chë saná josháchichna ora ya tojbuácheyeca ca” —Jesús tojánayana.

Chë mostaztiye jenayama cuento
(Mt 13.31-32; Lc 13.18-19)

³⁰ Jesús mëntsánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama?

³¹ Endmëna mo canÿe mostaza jénaye jajoca tcojajecá. Ndegombre, nÿetsca quem luarentša jenayëngama, mostaza jénaye chë más básatema endmëna;

³² pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

Ndáyeca Jesús cuentëngaca entšanga yojanabuayiyná
(Mt 13.34-35)

³³ Chca Jesús Bëngbe Bëtsabe soyëngama entšanga yojanabuatambá, ba cuentënguentšana, mo chë tmonjouena cuentcá, ntsachetšá chë entšanga jósertama tmojobenacá.

³⁴ Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cánÿenga tmojtsemna ora.

Jesús chë binÿia y chë béjaye bonguana yojëtsbema
(Mt 8.23-27; Lc 8.22-25)

³⁵ Cach te, yojtseibëtatana ora, Jesús chabe uatsjëndayënga tojanëyana: “Uafjajónaye chenguana cuajna ca.”

³⁶ Chorna, chë entsanga jesabáshejuanëse, chë uatsjédayënga Jesús tmojtsanánatseñe, cach yojánenjaquena barquëshañe; y inÿe entsángnaca inÿe barquëshangañe tmojanasto.

³⁷ Chentsana, chë uafjajónaye béjayiñe tsa jabuache binÿia yojóshjango; olëshënga chë barquësha imojtsétsbotsana, y chë causa chë barquësha yojóntsa búyeshca jtsobuajútjiana.

³⁸ Y chëntscuana, barquësha stétsioica, tséntsenëshañe Jesús yojtsomañe. Chora chë uatsjédayënga tmojtsanfšená y tmojanianyana: —¡Buatëmbayá! ¿Tondayana cmontsentšamna bënga chašotsénatjëmbama ca?

³⁹ As Jesús tojantsbaná, chë binÿia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binÿia yojétstëcja, y lempe bonguana yojtsatsmëna.

⁴⁰ Chora chabe uatsjédayënga tojanéyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

⁴¹ Chama, chënga puerte auatjanánënga imojtsemna y mëntšá imojtsenatsétsnaye: “¿Nda quem boyabása yomna? Cha tonjayana y chë binÿia y chë béjaye tmonjoyeuná ca.”

5

Chë Gerasa luaroca bacna bayëja uambayá

(Mt 8.28-34; Lc 8.26-39)

¹ Chentsana, uafjajónaye chenguánoica tmojánashjajna, Geraseno ca uabaina entsangbe luaroye.

² Jesús barquëshoicana tojánastjango, y cachora, chë obanëngbe cuevëshënguentšana canÿe entsá, bacna bayëjbe juabna uambayá, tojánbocna y tbojanjébengo.

³ Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca;

⁴ er ba soye cadenëjuangaca y inÿe soyëngaca cha nÿetsá tmojanbatsëca, pero cha nÿetsca soye yojtsátabebe y yojtsenájaca, y ndocná yonjobenaye cha bonguana chaotsemnana.

⁵ Nÿets tempo, bnëtë y ibeta, obanëngbe cuevëshënguenache y tjañenache yojánana yoye, y ndëtšbëngaca enotsetšenaye.

⁶ Jesúsbiyoye bënocana tbojáninÿe ora, chábiyoye tojanótjajo y chabe natsanoica yojoshëntsamentsiye;

⁷ y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsetšená ca!

⁸ Chca tbojanianyana, er Jesús chábiyoye tbojanianyana: —¡Bacna bayëjbe juabna, chábentšana maisebocna ca!

⁹ Chentsana Jesús tbojantjá: —¿Ntšamo cabaina ca?

Y chë bacna bayëjëngbe juábna cha tbojanjuá: —Atšna Legión ca šënduabaina, bëtsçanga fšëndmëna causa ca.

¹⁰ Y tša Jesús ibojtserruana chë luarentšana ndoñe chaondëtëbuacanama.

¹¹ Chentsa bëconana ba cotšënga imnajena, batsjoca imnëtsosañe;

¹² as chë bacna bayëjënga Jesúsbiyoye tmojanimpadá: —Chë cotšëngbiyoye šmichamó, chëngbeñe fchayamashjna ca.

13 Y Jesús aífne tojanalesenciá; as chë bacna bayëjënga chë entsábentsána tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetse y yojtsatajo.

14 Chora, chë cotšënga anÿenënga tmojtsanacheta auatjanánënga, y tmojána chama jacuéntama chë puebloca y chabuenache; y entsánga tmojánabo ntšamo tojanopasacá jinÿama.

15 Jesús yojtsemnoye chë entsánga tmojánashajna ora, tmojáninÿe chë tempo bacna bayëjënga uambayá, inëtsotbemañe, entsáyá uichëtjoná y chabe nÿets juábnaca. Y chë entsánga chama imojtsëuatjaná.

16 Chë tmojáninÿënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámna.

17 Chora chë entsánga tmojanontsé Jesús impadánana chë luarentšana chaotsatoñama.

18 Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca.

19 Pero ndoñe tbojanlesenciá, sinó mëntšá tbojaniyana: “Acbe yebnoye motsatoñe, acbe pamílangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

20 Chentšana, chë entsá yojtsatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmcá; y nÿetscanga imojtsenjanaye.

Jesús canÿe shembásabioye tbojanshná y Jairëbe bembetëmbioye tbojtanayená (Mt 9.18-26; Lc 8.40-56)

21 Chentšana, Jesús cachiñe chë uafjajónaye chenguana tojesaná barquëshañe. Chocna ba entsánga tmojanobuashconá, y Jesús chë uafjajónaye tsachañe yojtsemna.

22 Chorna, tojánashjango chë judiëngbe enefjuana yebnentša canÿe mandayá, Jairo ca uabainá. Jesúsbioye tbojáninÿe ora, chábentše tojanoshëntsamentšé,

23 y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochhajájua, salud chauat-inÿenama y cháuatayenama ca.

24 As Jesús cháftaca tojána; pero bëtská entsánga imojtséstona, chábioye imojtsenatsëntsenaye.

25 Chë entsánguentše yojtsaye canÿe shembása šocá; cha ya bnëtsana uta uata oboftjajuanánaca inapadecena.

26 Cha puerta tojansufrí, ba ashnayëngbe cucuatšifne, y lempe ntsachetšá inabomncá tojanpochocá jenóshnama; pero ndoñe ibontsatstëcacjana, nÿe más peor ibojtsobiamnaye.

27 Chë shembása yojouena ntšamo Jesús ba šoquënga tojánashnama, y as stëšoicana entsángbe tsëntsajana yojobeconá, y Jesusbe entsáyá yojauábojajo.

28 Cha chca tojanma, er yojtsejuabnaye: “Masque nÿe mo chabe entsáyá sibiájua chaijuábojajo, y salud chantsatsbomna ca.”

29 Y cachora chë oboftjajuanana ibojtsobojuána; y chabe cuerpiñe iboje-biónana ya tšabá yojtsatsmënama.

³⁰ Chora Jesús yojaséntia chábentšana obenana vojóbocnama, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

³¹ Chabe uatsjéndayënga tmojanjuá: —Aca contsonyá chë entšanga cmontsatsëntšená, y cabá cochjátsnoticiaye nda entšayá tojuabojajo ca.

³² Pero Jesús cátoye yojtserreparana jinŷama nda tbojánbojajuama.

³³ As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniana.

³⁴ Chora Jesús tbojaniana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

³⁵ Jesús cabá yojtsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniana: —Ache bembe tontsóbana; ¿ndayama más Buatëmbayá chama cochjátebëyaboma ca?

³⁶ Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniana: —Ndoñe matauatjana. Nŷe Bëngbe Bëtsábeñe cochtsošbuáchiye cha tšabá chaotsatsmënama ca.

³⁷ Y Jesús ndoñe tonjanalesenciá Jairëbe yebnoye banga chamuastama; nŷe Pedro, Santiago y Juan, Santiagbe uabentsana, aifne.

³⁸ Chentšana, chë mandayabe yebnoye tmojánashjajna ora, Jesús tojánanŷe entšanga tša imojtsenbouenana, entšanga imojtsošachiye y puerte ngmënaca imojtseyoye.

³⁹ As chë yebnoye tojánamashëngo y chë entšanga tojanëyana: “¿Ndayama tša šmojtzenbouenana y tša šmojtsendëntjana? Chë shembásetema ndoñe chenatóbana, nŷe endëtsomañe ca.”

⁴⁰ Pero entšanga nŷe imojtsáfchaye. As Jesús nŷetsca entšanga shjoye tojtanëbuacna, y tojëftsanëbiatše chë basetembe bëtsétsata y chabe enutënga; y chë shembásetema yojtsemnoye tojánamashëngo.

⁴¹ Chora Jesús tbojanábuacueshache y cachëngbe biyañe tbojaniana: “Talita, cum ca.” (Chca endayana “Shembásetema, matëtsbaná ca”.)

⁴² Cachora, chë bnëtsana uta uata bomna shembásetema tojtantsbaná y yojtsobena jama. Y chë entšanga chama imojtsenjnanaye.

⁴³ Pero Jesús corente tojanamëndá ndocnábeñe chama ntsecuéntayana ca, y tojanamëndá chë bássetema saná chamuiyé chaosama.

6

Jesús Nazaret puebloca (Mt 13.53-58; Lc 4.16-30)

¹ Chentšana Jesús tojëftsanbocna y cachabe luaroye tojtanashjango, y chabe uatsjéndayënga cháftaca tmojána.

² Ochnayté tojanobuache ora, Jesús tojanontšé chë judiëngbe enefjuana yebnentše entšanga jabuátambana.

Chë ba entšanga cha jóyebuambayama tmojanuënga, imojenjnaná y tmojánayana: “¿Ndémoca quem boyabása lempe chca tojuatsjinŷe? ¿Ndaye osertánana mua tmojatšetá, y ntšámoyeca cha yojtsobena chca bëts soyënga jtsamana ca?

³ ¿Mua ndoñe chë calpintero yondmëna, Mariybe uaqüñá, y chabe catšátanga ndoñe mondmëna Santiago, José, Judas y Simón; y chabe uabénganaca muentše ndoñe béngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana.

⁴ As Jesús tojanéyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamillangbenache, ni cachabe yebnentše ca.”

⁵ Chë entšanga chentše chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentše jéftsemana; nýe básefta soquëngbeñe cucuatšënga tojanajó y tojanashná.

⁶ Jesús ojnananá yojtsemna cachábentša entšanga chábeñe ndoñe montsanošbuaché causa.

Jesús, chabe uatsjëndayënga tojanichamó Bëngbe Bëtsabe amëndayama jábuayenama

(Mt 10.5-15; Lc 9.1-6)

Chentsana, chë chaboye base pueblënguenache Jesús yojánana, Bëngbe Bëtsabe soyëngama abuátambaye.

⁷ Y chë bnëtsana uta uatsjëndayënga Jesús tojánachembo, y utáta ínýoye tojanichamó, entšángbentsana bacna bayëjënga jtëbuacnama obenana jatšatayëse;

⁸ y mëntsá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe.

⁹ Nduámanëshe šmochjesóshecochëtjo, y nýe canýájua šmochjesíchëtjo ca.”

¹⁰ Mëntsánaca tojanéyana: “Posada chacmojúyentšame yebnentše šmochtsoquedañe inýe pueblöyë jatantscuana.

¹¹ Canýe luaroye chašmojáshjajna y ndocná posada chacmonjuyentšame, y joyeunayama ndoñe chamontsebošëse, chentsana šmochjésebocana, y shecuatšentša polvëshe šmochjésentstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca.”

¹² Chentsana, chë uatsjëndayënga tmojëftsambocana y entšanga imojánabuayinayë, chë tšabe benache chámuatishachama, bacna soyënga amana jtsajbanase.

¹³ Entšángbentsana ba bacna bayëjënga tmojtanébuacna, y ba soquënga aceitíyeca tmojananëttojto y tmojanashná.

Ntšamo Juan chë Ubayaná tojanóbana

(Mt 14.1-12; Lc 9.7-9)

¹⁴ Rey Herodes Jesusbiamá yojátatšëmbona, er nýetsquénache nýetsca entšanga chabiamá imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

¹⁵ Inýengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y inýengna: “Muana canýa Bëngbe Bëtsabe juabna oyebuambnayá, mo chë tempsquëngcá ca.”

¹⁶ Heródesna ntšamo entšanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

17 Juan cabá ainá ora, Herodes tojanmandá cha chamishache, cadenějuangaca chamobátsēca y chca cárceloye jutámíama. Herodes chca tojanma Herodíasbe causa, chabe uabentsá Felipebe shema. Herodes chě shémaftaca tojanobouamá, Felipe cabá ainá ora.

18 Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnma ca.”

19 Chě causa, Herodías Juánbioye puerte ibojuáya, y yojánboše jtsóbama; pero ndoñe yontsobena,

20 er Herodes yojántatšēmo, Juan canye nyetsca soyēnguñe tšabá amá, nye Bēngbe Bětsábioye sempre oservená inamnma. Chama cha yojánauatja y ndoñe yonjanaleséncia cha chamóbama. Y Juan Bēngbe Bětsabe soyēngama Heródesbioye tbojtsebuayiyná ora, ntšamo jajubuoyana ndoñe yontsetátšēmo, pero masque chca, oyejuayá Juánbioye ibnayeunana.

21 Pero Herodías tojáninýena mocna ora Juan chamóbama. Heródesbe cumpleño oboyejuaye ora, bětscá saná tmojanprontá, y Herodes yojúbuaja chabe aměndayēnga, soldadēngbe aměndayēnga y Galileoca uamana entšanga.

22 Chora, chě oboyejuaye luaroye Herodíasbe bembe tojánamashēngo, tojanlantsá, y Herodes y nyetsca ófjanēnga chama tša imojtsóyejuaye. As chě rey, chě tobiášbioye tbojaníyana: —Ndayánaca šmotjañe y atše cbochjátšetaye ca.

23 Y jajúrase, mēntšá tbojanšbuachená: —Ntšamo chašcojotjañcá cbochjátšetaye, masque atšbe aměndayentša bomnanentšana tsěntsañnaca ca.

24 Chentšana, chě tobiáše yojěftsebcna y chabe mamábioye ibojatjaye: —¿Ndayá chjotjañe ca?

Y chabe mamá ibojuuá: —Juan chě Ubayanabe bestšaše ca.

25 Cachora chě tobiáše betscó chě rey yojtsemnoye tojtanamáshēngo, y tbojaníyana: —Atše sěntseboše, cam ora Juan chě Ubayanabe bestšaše canye šcneněšiñe chašcuatšetá ca.

26 Herodes chama corente tbojanongmé, pero chě entšangbe delante y jajúrase tbojanšbuachená causa, ndoñe yonjobenaye ntšamo tbojaníyancá jeběbuetámenana.

27 Cachora chě rey canye soldado ibojíchmuá, Juanbe bestšaše chaiuyēbama.

28 As chě soldado cárceloye tojána, Juánbioye bestšaše tbojtšaněštjango, y canye šcneněšiñe tojanamba. Chě tobiášbioye tbojaněntšabuaché, y chana, chabe mamábioye.

29 Juanbe ústonēnga chama imojátatšēmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó
(Mt 14.13-21; Lc 9.10-17; Jn 6.1-14)*

30 Chě Jesús tojánichamonga chábioye tmojtjanashjajna ora, lempe ntšamo tmojanmama y tmojanabuatambama cha tmojancuentá.

31 Chora Jesús tojanéyana: “Cuajna inýoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabēbana; ni mo jasama ndoñe luare imontsebonna.

32 As canyēnga barquěshañe tojtsanoñe, entšanga nděbínnyoye.

33 Pero chēnga imojtsoñama entšanga tmojánanyē, y ndēmuanýēnga imojamnama imojtsetátšēmo; chcasna, chě entšanga shecuátšeca betscó tmojána, nyetsca pueblēnguentšana, y chēngbe natsana choye tmojánashjajna.

34 Chentšana, chë barquëshoicana tojánastjango ora, Jesús ba entšanga tojánanÿe; chëngbiana tbojanongmé, er imojtsemna mo abuajënÿa ndbomna oveshëngcá; y tojanontsé ba soyëngama jabuátambana.

35 Ya jetiñe yojtsemna orna, chabe uatsjédayënga tmojanobobeconá y tmojaniana: —Ya jetiñe entsemna, y quem luariñe ndocná quenatiyena.

36 Entšanga cuantichamuá, pueblotémëngoye y inÿe luarëngoye chamot-soñna, ndayánaca jasama chamobuámiñana ca.

37 Y Jesús tojanëyana: —Tšëngaftanga saná chëngbioye šmochjacaredádaye ca.

Chora chënga tmojaniana: —Crocénana queftsátsbomna, uta patse denario nÿetšá, chëfta entšangbiana saná jabuámiyama ca.

38 As Jesús tojanëyana: —¿Bueta tandëse šmojtsebomna? Marrepáraga ca.

Ya imojtsetátšëmbo ora, tmojaniana: —Shachna tandëse y uta beónata fsëntsebomna ca.

39 Chora Jesús entšanga tojanamëndá ínÿoca ínÿoca chamoshëntsjatbiamama.

40 As chënga tmojanotbiana patse patsënga y shachna bnëtsátsanënga.

41 Chora Jesús chë shachna tandëse y chë uta beónata tojanca, y celoye jontjesiyëse, Bëngbe Bëtsábioye chama tbojtanchuá. Chentšana chë tandëšënga tojanjatá y chabe uatsjédayënga tojanayentsbuaché chë entšanga jatsatayama. Y chë uta beónatnaca nÿetscanga tojanëjátaye.

42 Nÿetscanga tmojanse jtoshachaye nÿetšá.

43 Y chentšana, chë tandëse y chë beonentsana ojamnëtémënga tmojanatbaná, y bnëtsana uta sbarëcua tmojanajutjé.

44 Chë saná tmojansënga imojamna shachna uaranga boyabásenga, shembásenga y básenga ntjacuntacá.

Jesús béjaye juatsbuacá yojtsaye

(Mt 14.22-27; Jn 6.16-21)

45 Chentšana, Jesús chabe uatsjédayënga tojanamëndá chë barquëshoye jtasjnama, chë uafjajónaye chenguana jangana y chabe natsana Betsaida ca uabaina puebloca jashajnana. Chënga imojtsebocanëntscuana, Jesús chë entšanga yojtichamuá.

46 Nÿetscanga tojtanadiošoftá ora, tjoye cha tojtsanoñe Bëngbe Bëtsáftaca jencuëntama.

47 Yojtseibétatana ora, chë barquëshu uafjajónaye tsëntsaca yojtsamna, y Jesús, canÿa fshantsoca.

48 Jesús tojáninÿe chëngbiana totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbioye yojobeconá, béjaye juatsbuacá yojtsaye, y ya chëngbiajana nÿe ndericho jachnënguama yojtsemna.

49 Y chënga, chë béjaye juatsbuacá cha yojtsayama tmojáninÿe ora, tmojan-juabó cha canÿe añemëse yojtsemna ca, y tmojanontsé yoyana;

50 er nÿetscanga chca tmojáninÿe y cochauatjanánënga imojtsemna. Pero Jesús cachora tojanëyana: “¡Añemo šmochtsebomna; atše Jesús sëndmëna; ndoñe matauatjëngana ca!”

51 Chorna, chënga imojtsemna barquëshoye cha tojánasëngo, y chë jabuache binÿia tojanëjbana, y nÿetscanga puerte auatjanánënga y ojanánënga imojtsemna.

⁵² Chënga tmojáninÿe chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

*Genesaret ca uabáinoca Jesús ba šoquënga tojanashná
(Mt 14.34-36)*

⁵³ Chë uafjajónaye tmojánenashbuachengo ora, Genesaret ca uabaina lu-roye tmojánashjajna, y chë uafjajónaye tsachoca chë barquësha tmojanëtsbua.

⁵⁴ Chë barquëshoicana tmojánastjajna y cachora entsanga Jesús tmojanhtëmbá.

⁵⁵ Chíyeca, chë luariñe yebnënguenache betscó chënga tmojána, y tmojanontsé chë šoquënga tjuashënguñe juyambana, chë ndëmoye tmojanuena Jesús yojtsemna luaroye.

⁵⁶ Y ndayentse cha tojámashëngüentse, pueblënguñe, bëtš pueblënguñe y base pueblotëmënguñnaca, chë šoquënga benachoye imojtsëbuacana, y Jesús corente imojtseimpadana chë šoquënga chaulaescenciá, ñye mo chabe entsáyá sibuájua juabojajuana. Y ñyetscanga tmojuábojajënga tšabá imojtsatsmëna.

7

*Ndáyeca canÿe entsá Bëngbe Bëtsabe delante ndoñe tšabia nántsemna
(Mt 15.1-20)*

¹ Chentsana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga.

² Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá.

³ Er chë fariseunga y ñyetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëtš taitanga imojanamancá. Chënga imojanjuabná, chca jtsamëse Bëngbe Bëtsabe delante tšábënga jtsatsmënama ca.

⁴ Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero ñye chëngbe bëtš taitanga chca jamana imojanamánayeca, mo chë béjayeca juabáyana tazësënga, matbajënga, calderëshënga y jutsnëshangá.

⁵ Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëtš taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

⁶ Chora Jesús tojanëyana: —Ñye tšabá chë Bëngbe Bëtsabe juabna oye-
buambnayá Isaías tšëngftangbiana tojánayana, bacna entsanga chë ntšamo ndegombre šmojuabnacá ndinÿinÿinayënga ca, mëntšá enduabemanentse:

Quem entsanga mondbëtsichamo Bëngbe Bëtsá tša tšabia yomna ca; chca ñye uayášaca,

pero chëngbe ainanentse ndocna tšabe juabnëngaca.

⁷ Pero chënga ñye bonamente mondbëtsichamo Bëngbe Bëtsá tša tšabia yomna ca;

chënga ñye entsangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

⁸ Chora Jesús tojanëyana: —Ntšamo Bëngbe Bëtsá tojanmandacá stëtsoye tšëngaftanga šmojtsequedá, nÿe ntšamo entšanga monduamancá jtsamama ca.

⁹ Y mëntšánaca tojanëyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnyana tšabá šmojtsama ca chca šmojtsama ora.

¹⁰ Moisés tonjánayana: ‘Acbe bëtsëtsata ndoñe stëtsoye catjáquedaye’, y ‘nda chabe bëtsëtsatbiana ndoñe tšabá tonjoyebuambá chana, jóbanama jtsemnana ca.’

¹¹ Pero tšëngaftanga šmondbétsichamo, canÿe entšá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiana uátšëmbona soyënga cá”).

¹² Tšëngaftanga šmondbétsichamo, nda chca tojayanëse, ya ndoñe obligaciónaca ntsemnana chabe taitá o mamabiana ndayánaca jamama ca.

¹³ Chca, tšëngaftanga šmontsama entšanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempscana y mëntsoñama yochñëjuancá. Y ba soyënga tšëngaftanga cachcá šmontsama ca” —Jesús tojánayana.

¹⁴ Chora Jesús, cachiñe entšanga tojtanchembo y tojanëyana: “Nÿetscanga šmochjouena y chacmësertá.

¹⁵ Ndayá entšá tojtsesacá, ndoñe ntjábemana ndoñe tšabia Bëngbe Bëtsabe delante. Inÿetšá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante.

¹⁶ Chë jouenama tmojtsobenënga, šmochjouena ca” —cha tojánayana.

¹⁷ Jesús entšanga tojéftsanashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama.

¹⁸ As cha tojanëyana: “¿Tšëngaftánaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsobenenana chábioye jabemana ndoñe tšabia Bëngbe Bëtsabe delante;

¹⁹ er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nÿetsca sananga tšabá jasama yomna ca y chë saná ndoñe ntjamana canÿe entšá bacna soye chaotsamama ca.

²⁰ Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante.

²¹ Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama,

²² bacna juabnënga boyá o shëmbioye inÿaftaca jáingñama, jtsatbomnayama, nÿetsca bacna soyënga jamama, inÿenga jáingñama, nÿe cachá jenomándama ntsobenacá jtsiyenama, inÿabioye jtsántšabošama, inÿabiana jtsayátseyayama, jtsenábotamnyama y nÿe opënga jtsobiarnayama.

²³ Nÿetsca quem bacna soyënga entšabe ainanocana jóbocnana, y cha jabe-mana ndoñe tšabia Bëngbe Bëtsabe delante ca” —cha tojánayana.

Canÿe shembása inÿe luarocana ashjangoná Jesúsbeñe yojtsošbuaché (Mt 15.21-28)

²⁴ Jesús chentšana, Tiro ca uabaina luaroye tojtsanoñe, y canye yebnentše tojánamashengo. Cha yojtseboše ndocná chama chaondétsetatšembuama; pero ndoñe yonjobenaye iytēmenana jatsmēnana.

²⁵ Y betscó, canye shembása, canye bembe bacna bayēbe juabna uambayá ibnabomná, Jesusbiana oyeubuambnayana yojouena ora, chábiye tojánabo y chabe shecuatšentše tojanoshēntšamentšé.

²⁶ Chē shembása ndoñe yonjamna judiá, sinó Sirofenicia luarocá. Tojánabo y Jesúsbiye tbojanimpadá chabe bembetémbentšana bacna bayēja chabu-
atábocnama.

²⁷ Pero Jesús tbojaniana: —Atše šondmēna natsana judío entšangbiana chē soyēnga jamana; chentšana cocayé chanjobenaye chca inye entšangbiana jamana. Atše acbiana, canye ndoñe judiá, soyēnga stjamēse, nántsemna mo chē básengbe saná quešēnga cuaftsēbuajocá ca.

²⁸ Y cha tbojanjá: —Arseñor, chca jtsemnana. Pero chē quešēngnaca mondbase chē básenga tmojtšesá ora tmojatquēcjanatemēnga. Chcasna, Diosmanda átšnaca šmotsajabuache ca.

²⁹ As Jesús tbojaniana: —Tšabá tcjajana; chcasna, acbe yebnoye motaño. Chē bacna bayēja acbe bembetémbentšana tonjéseocna ca.

³⁰ Chentšana, chē shembása chabe yebnoye tojtáná, y tbojáninyena chē bembetema jutsnēshentše yojtsojájoñe, y chē bacna bayēja ya ndoñe chábeñe yontsemna.

Jesús, canye boyabása tēsmá y ndēbiábíoye tbojanshna

³¹ Tiro pueblentšana Jesús tojēftsanbocna, y Sidón y Decápolis luarentša pueblēnguējana jachnēnguse, Galilea uafajónayoye tojánashjango.

³² Cha chentše yojtsemna ora, chábiye tmojanánatse canye entšá tēsmá y ndēbiá, y tmojanimpadá chabe cucuatšēnga chē šocábeñe chaojájoma, chaboshnama.

³³ Chorna Jesús entšangbentšana luaroye tbojanánatse, cányata. Chora chē šocabe matscuašoye ntšabuafjēnga yojajué, cucuatšíñe yojabuashētjo, y chē šocabe bichtaja yojábojajo.

³⁴ Chentšana, Jesús celoye tojanontješé, jabuache yojáshachna, y hebreo palabriñe tbojaniana: “¡Efata ca!” (Chca endayana “¡Chacmotsauenana ca!”)

³⁵ Cachora, chē boyabásabe matscuaše tšabá yojtsatsmēna y tšabá yojtsu-
nana; chē bichtaja tšabá yojtóbema y tšabá yojtsóyebuambnaye.

³⁶ Y Jesús chē entšanga tojanaméndá chama ndocnábeñe ntsecuéntayana. Pero masque tša chama yojtsaméndaye, entšanga más chabiana imojtsen-
cuéntaye.

³⁷ Chama chē entšanga puerte imojtsenjnanaye, y mēntšá imojtsichamo: “¡Lempe tšabá entsama! Chē tēsmēnga chamouenama, y chē ndēbianga chamóyebuambama entsama ca.”

8

Jesús canta uaranga entšanga saná tojanacaredadó

(Mt 15.32-39)

¹ Chē tempo, ba entšanga Jesúsbiye cachiñe tmojanobeconá, y jasama tondaye imontsebobna. As Jesús chabe uatsjéndayēnga tojánachembo y tojanēyana:

² —Quem entšangbiana šontsengmena, er ya unga te átšeftaca montsemna y mora jasama tondaye quemátsbobna.

³ Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

⁴ As chabe uatsjëndayënga tmojaniana: —¿Ntšamo nda nanjobenaye quem luarentše, ndocna entšá ndoyenentše, chëfta entšangbiana saná jinÿenama ca?

⁵ Chora cha tojanatjá: —¿Bueta tandëse šmojtsebmna ca?

Y chënga tmojanjuá: —Canÿsëftaše ca.

⁶ Chentšana, Jesús tojanamëndá entšanga chamoshëntsjatbiamama. Chorna, chë canÿsëfta tandëse tojanca y Bëngbe Bëtsábioye chama tbojtanchuá. Chentšana tojanjatá, chabe uatsjëndayënga tojanëjatá, y chënga chë entšangbioye.

⁷ Básefta beonatémëngnaca imnabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entšanga jujátayama.

⁸ Nÿetscanga tmojanse jtoshachaye nÿetsá. Chentšana cabá canÿsëfta bëts sbarëcua tmojanajutjé chë ojamnëtémëngaca.

⁹ Chë tmojansënga imojamna mo canta uaranga nÿetsá. Chentšana Jesús chë entšanga tojtanadiošoftá.

¹⁰ Chora Jesús barquëshañe tojánenojayiye chabe uatsjëndayëngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma canÿe bëts soye, chabe ndegombre obenana jinÿyama

(Mt 16.1-4; Lc 12.54-56)

¹¹ Chentšana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canÿe bëts soye chaoma, as jtsetatšëmbuama Jesusbe obenana Bëngbe Bëtsábocana ndegombre tainóbocanama.

¹² Y Jesús ngménaca, jabuache yojáshachnëse, mëntsá tojánayana: “¿Ndáyeca tšëngaftanga, chë mora oyenënga, šmojtseboše canÿe bëts soye chaimama tšëngaftanga atšbe obenana jinÿanÿiyama ca? Ndegombre cbëyana, quem entšanga ndocna chca soye quemochátinÿe ca.”

¹³ Chorna chë entšanga cachcá tojesanëñyá, chë barquëshoye yojtamáshëngo, y uafjájónaye chenguana yojtsoñe.

Jesús tojanabuayená fariseunge buatëmbana soyëngama

(Mt 16.5-12)

¹⁴ Chë uatsjëndayënga yojësebnëtjomba ndaye soye jasama jesocñama, y chë barquëshoye nÿe canÿe tandëse imojtsebmna.

¹⁵ Jesús tojanëyana: —Smochtsantješna; cuedado smochtsebmna fariseunga y Heródesbe lewadurama ca.

¹⁶ Chora chë uatsjëndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

¹⁷ Jesús yojtsetátsëmbo, chabe uatsjëndayënga imojtsejuabnaye chana tandëšama yojtsëtsëtsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntsá tojanëyana: —¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátsëmbo? ¿Ainanoca ndoñe šmontseboše chacmësertama?

¹⁸ Bominÿe šmondobomna, pero ndoñe quešmátobena jinÿyana; joue-nama šmondobena, y ndoñe quešmátuenana, y ndayá tijamama ndoñe quešmatsjuabná.

19 Chë shachna uaranga entšanga shachna tandësentšana sënjanëjata chentšana, ¿bueta sbarëcua chë ojamnëtemëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

20 —Y chë canyëšfta tandësentšana canta uaranga entšanga sënjanëjata chentšana, ¿bueta bëts sbarëcua chë ojamnëtemëngaca šmënjanajutjé ca?

Y chënga tmojanjuá: —Canyëšftácua ca.

21 As Jesús tojanëyana: —¿Y cabá ndoñe cmontsësertana ca?

Jesús canyë jtanábioye tbojanshná, Betsaida puebloca

22 Chentšana tmojánashajna Betsaida puebloca; y chora, entšanga canyë boyabása jtaná Jesúsbioye tmojanánatse, y tmojanimpadá cha jabojuana chabotseshnama.

23 As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojájua, y tbojantjá nderado ndayá jinýama tayojsanobena ca.

24 As chë jtaná yojontješiyey y tojánayana: —Boyabásenga sëntsënyä; mo betiyëngcá montsemna, pero montsobonjná ca.

25 Chora Jesús, chë jtanabe fšnëbeñe cachiñe cucuatšënga yojájua. Y chë boyabása yojsobena lempe tšabá jinýama; ya shnaná yoitoquëda. Y yojsobena nyëtca soyënga botamana jinýana.

26 Chentšana, Jesús cachabe yebnoye tbojanichmó y mëntšá tbojanayana: —Chë puebloye ndoñe catjëtsamashëngo ca.

Pedro tojánayana, Jesús chë Cristo bëtsemnama

(Mt 16.13-20; Lc 9.18-21)

27 Chentšana, Jesús tojánbocna chabe uatsjëndayëngaftaca Cesarea de Filipo luaroca pueblëngoye, y benachiñe chabe uatsjëndayënga tojanatjá: —¿Nda atše bëtsemnama ca entšanga imojtsichamo ca?

28 Y chënga tmojanayana: —Inýenga montsichamo Juan chë Ubayaná ca, inýengna Elías ca, y inýengna, canyë Bëngbe Bëtsabe juabna oyebuambnayá ca.

29 As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

30 Chentšana Jesús corente chënga tojanamëndá, chë nda cha yojamnama ndocnábeñe ntsecuëntayana.

Jesús tojánayana cha ibojamna jóbanana y jtsayenana ca

(Mt 16.21-28; Lc 9.22-27)

31 Y Jesús tojanontsé chabe uatsjëndayënga jabuátambana, cha, chë Bëngbe Bëtsá Entšá tbojanbemá, ibojamna puerte jasúfrianana ca; chë judiëngbeñe bëtšëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayana ca.

32 Nyëtscanga catafjosertaycá chama yojsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana.

33 Pero Jesús yojobuértana, chabe uatsjëndayënga tojanënyanyé, y Pédrëbioye mëntšá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nyë entšangbentšana ca.”

34 Chentšana, Jesús chabe uatsjéndayënga y chë inÿe entšanga tojánachembo chamouenama, y tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiana jasúfriama chaotseprontana y cruciñe jobanámnaca.

35 Nda tojtsama quem luarentše bëtscá soyënga jtsebonnama y atšbiana jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojëftsonÿá atše juastama, y chë tšabe noticiënga atšbiana abuátambaye causa, masque chaóbana, chë nÿetsca tescama yomna tšabe vida echántsebonna.

36 ¿Ndayama entšá buanjosérvia nÿetsca quem luarentša soyënga jtsebonnama, chë nÿetsca tescama yomna tšabe vida tojtsoperdese?

37 Er canÿe entšá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebonnama.

38 Chcasna, nda mora atšbiana y atšbe buayenana soyëngama tojtsëuatja entšángbeñe, chënga chë Bëngbe Bëtsabiana nduauenanënga y bacna soye amënga, chë Bëngbe Bëtsá Entšá tbojanbemánaca chabiana echantsëuatja, chabe Taitabe bëtš obenánaca y chabe angelëngaftaca chaojésabo ora ca” — cha tojanëyana.

9

1 Mëntšánaca Jesús tojanëyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinÿcá ca.”

Jesús inÿetšá tojanobinÿná (Mt 17.1-13; Lc 9.28-36)

2 Chentšana chnënguana tianoye, Jesús tojëftsanëbiatše Pedro, Santiago y Juan, y inÿoye tojanënatse nÿe chënga, canÿe bëtš tjoye. Y chëngbe delante Jesús inÿetšá tojanobinÿná;

3 chabe uichëtjonëjuangá tša yojtsabuashinÿinÿyana; corente uafjantsëjuangá yojtsamna; nÿa chca juafjantsama ndocná quem luarentše quentatobenaye.

4 Chca orna, chë uatsjéndayënga tmojáninÿe, Moisés y Elías tbojanobinÿná Jesúseftaca encuéntaye.

5 Chora Pedro, Jesúsbioye tbojaniyana: “¡Buatëmbayá, tša tšabá bëngbiana cuanmëna muentše jtsemnana ca! Mora fchanjapórma unga tambotëmënga: canÿetema acbiana, inÿetema Moisesbiana y inÿetema Elíasbiana ca.”

6 Chca tojanáyana, chë uatsjéndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana.

7 Chora canÿe jantšetëshe yojóbema, y chëngbioye yojáutsbotse; y chë jantšetëshoicana canÿe oyebuambnayana tojanóbocna, mëntšá: “Mua atšbe bonshana Uaquiñá endmëna; cha šmochtseyeunana ca.”

8 Y ndeolpe, chëngbe shëconana tmojanrrepará ora, ya ndocná más tmónjáninÿe; nÿe Jesús canÿa chëngaftaca yojtsemna.

9 Chë tjocana imojtsatstmaye ora, Jesús chë uatsjéndayënga tojanamëndá: —Bëngbe Bëtsá Entšá tbojanbemá obanënguentshana candëtayenëntscuana, chë mëntë tjoca šmonjinÿe soyama ndocnábeñe šmattsecuéntaye ca.

10 Chë uatsjéndayënga añe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora.

11 Y Jesúsbiyoye imojtsetjanaye: —¿Ndáyeca chë ley abuatambayënga mondbétsichamo, canmëna Bëngbe Bëtsabe Úámama Uabuayanabe natsana Elías jabana ca?

12 As cha tojanëjua: —Ndegombre, canya Eliascá natsana echanjabo, y ntšamo jtsemnana yomncá lempe echánjabatsma. Pero ntšamo Bëngbe Bëtsabe uabemana palabrénguine endayancana, Bëngbe Bëtsá Entšá tbojanemá puerte caochjasúfria, y inyënga puerte camochtsáboyënja ca.

13 Ndegombre chëyana, canya Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrénguine endayancá.

Jesús, canye basa bayëjbe juabna uambayábiyoye tbojanshná
(Mt 17.14-21; Lc 9.37-43)

14 Chentšana, chënga tmojaná chë inye uatsjëndayëngbiyoye. Chora, Jesús tojáninye ba entšanga chë uatsjëndayëngbe shëconana imojtsemnana, y básefta ley abuatambayënga chëngaftaca imojtsetsëtsnaye.

15 Nýetsca entšanga cha tmojáninye ora, imojenjnaná y tmojanótjajo cha jachuyama.

16 Chora Jesús chënga tojanatjá: —¿Ndayama chëngaftaca šmenatsëtsná ca?

17 Y canya entsanguentsá tbojanjuá: —Buatëmbayá, muentšë ábiyoye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena.

18 Nye ndayéntsna cha tojtsemntšë, chë bayëja chábiyoye jishachana y jtseñajuáchesënjana; chentšë uayoicana shashiye jtšabocanana, jtseñoftšfjoynayana y obanacá jtsatsájonana. Ache uatsjëndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniana.

19 As Jesús tojánayana: —¡Nýetsá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

20 Chora chë básetema chábiyoye tmojanánatse; y chë bayëja Jesúsbiyoye tojáninye ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yotšábocana.

21 As Jesús chë básabe taitábiyoye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca;

22 ba soye, chë bayëja chábiyoye inoye jtšatmetšana y buyeshoye jtšabuetšana, jtšóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotsëjabuache ca.

23 Chora Jesús tbojaniana: —¿Ndáyeca “ndayá jamama tcojtsobenëse ca” šcjayana? Nda Bëngbe Bëtsábeñe tojtšošbuáchebiamama lempe endopodena ca.

24 Y cachora chë básabe taitá tojanáyebuachena: —Aíñe, Bëngbe Bëtsábeñe sëntšošbuaché; Diosmama, ¡más jtošbuáchiyama šmajabuache ca!

25 Y bëtsca entšanga imojtsótotoma Jesús tojáninye ora, chë bacna bayëja tbojtsanbochembo mëntsá: —¡Bacna bayëja, chë básetema tšmá y ndëbiá bi-amnayá; chábenšana maisebocna y ndocna te más chábeñe catjésamashëngo ca!

26 Y chë bayëja chábentšana yojésebozna, yojtseyoye y chë básabioye jabuache ibojeshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca.

27 Pero Jesús tbojanábuacueshache y tbojtanatsbaná; y chë básana yojtëtsaye.

28 Chentšana, Jesús canÿe yebnoye tojánamashëngo, y chabe uatsjëndayënga luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

29 Y Jesús tojanëjua: —Chca bayëjënga jtëbuacanamna jobenayana nÿe Bëngbe Bëtsáftaca jencuëntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayanana ca
(Mt 17.22-23; Lc 9.43-45)*

30 Chentšana tmojëftsanbozna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama,

31 er cha chabe uatsjëndayënga yojtsabuátambaye. Mëntsá cachabiamama yojanëtsëtsnaye: “Bëngbe Bëtsá Entsá tbojanbemá entsangbe cucuatšinë mochanjáboshjona; mochanjóba, pero chentšana unga tianoye echántayena ca.”

32 Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

*¿Nda chë más uamaná yomna?
(Mt 18.1-5; Lc 9.46-48)*

33 Chora Capernaum puebloye chënga tmojánashajna; y cach yebnentše imojtsemna ora, Jesús chë uatsjëndayënga tojanatjá: “¿Ndayama benachiñe šmabáyenatsëtsnaye ca?”

34 Chëngna nÿe iytëca tmojanobiamama, er benachëjana chënga imnayénatsëtsnaye, chënguentšá nda chë más uamaná bëtsemnama.

35 As Jesús tojanótbema, chabe bnëtsana uta uatsjëndayënga tojánachembo y tojanëyana: “Ndánaca nÿetscangbiamama chë más uamaná jtsemnama tojtsebošëse, cha chë más nduamaná chaóbema y nÿetscanga chaotsaserverna ca.”

36 Chora Jesús canÿe bášetema tbojánishache, chëngbe tsëntsaca tbojanatsá, tbojantbá y chënga tojanëyana:

37 “Ndánaca, átsbeñe ošbuachiyá bëtsemnayeca, tbojofja canÿa mo quem basetemcá, chana atše jofjana; y nda atše šojofja, chora cha nÿe atše ndoñe ntjofjana, sinó chë šojichmó chábioynaca jofjana ca.”

*Nda ndoñe bëngbe contra tontsemná, bëngaftaca jtsemnana
(Mt 10.42; Lc 9.49-50)*

38 Juan, Jesúsbioye tbojanianama: —Buatëmbayá, bënga fsënjinÿe canÿe boyabása, y cha aca jótšëmbonëse, bacna bayëbe juabna entsángbentšana endëtëbuacana; pero cha bëngaftaca ndoñe quenátšmëna causa, chama fsënjesauyaná ca.

39 As Jesús tbojanjuá: —Ndoñe šmatjuauyaná; er ndocná quenátobena canÿe bëts soye jamana Bëngbe Bëtsabe obenánaca, atše jótšëmbonëse, y chentšana atšbe contra jatóyeuambnayana.

40 Ndegombre, nda ndoñe bëngbe contra tontsemná, bëngaftaca jtsemnana.

41 Y ndánaca, masque nÿe búyeshtema tsëngaftanga tcmojubuatšatá, tsëngaftanga átsbënga bëtsemnayeca, chábioye Bëngbe Bëtsá canÿe uacanana soye bochantatšetaye, cha chë tsabe soye tojamama ca.

*Resjo yomna, nderado bacna soyënga cuanjama
(Mt 18.6-9; Lc 17.1-2)*

⁴² Chentsana Jesús tojánayana: “Canya átšbeñe ošbuachiyábioye mo quem basetemcá, nda tbojaingné atše ustonama chaotsajbanama, más tšabá chabiama nántsemna canye béts nantsnéb chamotsetamošentsbua y mar béjayoye asentoye chamotsashbuetše chabotsenatjembama.

⁴³ Nderado acbe cucuatšeca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nyetsca tescama vida jtsebomnama, nye canye cucuatše bomná, y ndoñe nyets útatšeca infernoye chacmotocá jama, chë ndocna te yochanjáfsana íñeshoye;

⁴⁴ choca útsenënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁵ “Nderado acbe shecuátšeca bacna soye tcojama, acbiama más tšabá nántsemna chë shecuatše chacotsenashecuástjango. Acbiama más tšabá endmëna cosheto celoye jamashënguana nyetsca tescama vida jtsebomnama, y ndoñe nyets útatšeca infernoye chacmotsétšena;

⁴⁶ choca útsenënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁷ “Nderado acbe bomínýeca bacna soye tcojinýe y cachca soye tcojama, más tšabá nántsemna chë bomínýe chacotsenobuchjátsëca. Acbiama más tšabá endmëna Bëngbe Bëtsabe amëndayoye jamashënguana nye canye bomínýe bomná, y ndoñe nyets útabeca infernoye chacmotsétšena;

⁴⁸ choca útsenënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁹ “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtsá echanjama nyetsca tšëngaftangbiama tšábenga chašmotsemnama, chë átšbeñe betsošbuáchema šmojtsepadecena ora šmojuantase.

⁵⁰ Tamó tšabe soye endmëna. Pero chë tamó ftënana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entsangbiama šmochtsemna, chëngbeñe jtsiyenëse ntšamo Bëngbe Bëtsá yobošcá, y nyetscángaftaca natjëmbana šmochtsiyena ca” —cha tojánayana.

10

*Ndayá Jesús tojanabuatambá bouamnënga tmojtsenëtšenama
(Mt 19.1-12; Lc 16.18)*

¹ Chentsana, Jesús chë luarentšana tojéftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá.

² Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shëmbioye cachcá jesonýayama ca?

³ Chora cha tojanëjua: —¿Ntšamo Moisés chë soyëngama tcmënjanamëndaye ca?

4 Y chënga tmojánayana: —Moisés tojanalesenciá chë boyá chabe shémbioye chabuiyé canýe tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonyá ca.

5 Chora Jesús tojanéyana: —Tšëngaftanga Bëngbe Bëtsabe mandënga ainaniñe jójyëngacñama ndoñe quešmátsboše causa, Moisés chca tšëngaftanga tcmojëtsanamëndá.

6 Pero quem luare jobojátšama orna, “Bëngbe Bëtsá canýe boyabása y canýe shembása tonjánabiamá.

7 Chíyeca, chë boyabása chabe taitá y chabe mamá echanjésabashejuana, chabe shémaftaca jenútanama,

8 y chë útata mo canýacá bochántsemna.” Y chca, ya ndoñe útata quebochátsmëna, sinó nýe mo canýacá.

9 Chcasna, entšá ndoñe chaondënbema ndayá Bëngbe Bëtsá mo canýiñcá tojëftsema soye ca —cha tojánayana.

10 Ya cach yebnoca imojtsatsmëna ora, chabe uatsjëndayënga cach soyama imojtëttjaye.

11 Y Jesús tojanéyana: “Nda chabe shémbioye cachcá tbojesonyá y ínýaftaca tojtóbouamase, cha chë natsana shémbioye ínýe shembásaftaca jtseingñayana; chana canýe uabuatmá jtsebomnana.

12 Y chë shema chabe boyábioye cachcá tbojesonyá, y ínýaftaca tojtóbouamase, chánaca chë natsana boyábioye ínýaftaca jtseingñayana; canýe uabuatmá jtsebomnana ca” —Jesús tojánayana.

Jesús, basetëmëngbiamá Bëngbe Bëtsábioye tbojanimpadá

(Mt 19.13-15; Lc 18.15-17)

13 Entšanga, basetëmënga Jesúsbioye tmojanënatse, chauabájajuama y Bëngbe Bëtsábioye chëngbiamá chaboimpadama; pero chabe uatsjëndayëngna tmojanontsé chë basetëmënga unachayënga jtsécacana.

14 Jesús chca tojáninýe ora, tojánetna y chë uatsjëndayënga tojanéyana: “Cachcá mónýaye chë basetëmënga átsbioye chamuabo y ndoñe matëuyanana; er Bëngbe Bëtsabe amëndayana endmëna chë mo quem basetëmëngcá imomnëngbiamá.

15 Ndegombre cbéyana, nda Bëngbe Bëtsabe soyënga ndoñe tonjójyëngacñe mo canýe basetëmá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

16 Y chë basetëmënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnama.

Canýe bomna entšá Jesúsbioye tojána

(Mt 19.16-30; Lc 18.18-30)

17 Jesús jama tojtëtanontsé ora, canýe boyabása chábioye tojanótjajo, chabe shecuatšentse tojanoshëntsamentse, y mëntšá tojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtsebomnama ca?

18 Y Jesús tbojanjuá: —¿Ndáyeca “tšabia ca” šcjauyana? Tšabia nýe canýa endmëna: Bëngbe Bëtsá.

19 Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínýaftaca ndoñe cattseingñaye, ndoñe catjatbëba, ndoñe catjuaboínýena, ínýëngbioye ndoñe catjáingñaye ndayánaca jabacama, y acbe bëtsétsata ndoñe stëtšoye catjáquedaye ca.”

20 Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

21 Jesús bonshanánaca tbojanonÿinÿé y mëntsá tbojaniana: —Canÿe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocënana, ndbomnjëmënga cochtsatšataye; chca, celoca canÿe bêts bomnana cochántsebomna. Chentšana, cochjabo y šcochjuasto ca.

22 Pero chë bobóntsbioye inÿetšá ibojtsínÿnana Jesús chca tbojanianama; y puerte ngmënaca yojtá, cha puerte bomná inamna causa.

23 Chora Jesús cátoye tojanrrepará y chabe uatsjëndayënga tojanëyana: —¡Puerte totcá entsemna bomnëngbiana Bëngbe Bëtsabe amëndayoye jamashënguama ca!

24 Chca imojouena ora, chë uatsjëndayënga ojanánënga imojtsemna, pero Jesús cachiñe tojanoyebuambá y mëntsá tojanëyana: —Atšbe básenga; ¡puerte totcá entsemna Bëngbe Bëtsabe amëndayoye jamashënguama!

25 Ndegombre, más paselo endmëna chë coshuffentša atëfnëjana canÿe camello chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

26 Pero chë uatsjëndayënga nÿe más imojtsenjanaye y imojtsentjanaye: —¿As, nda yochjobenaye atsbocaná jtsemnana ca?

27 Chora Jesús tojanënÿanÿé y tojanëyana: —Entšanga ndoñe quemátobena jamana canÿa atsbocaná chaotsemnana, pero Bëngbe Bëtsá aiñe; er Bëngbe Bëtsá lempe jamama endobena ca.

28 Chora Pedro tbojaniana: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsajna ca.

29 As Jesús tojánayana: —Ndegombre chëyana, ndánaca átšbioye jasérviana y chë tšabe noticiënga jábuayenama, tojëseboshjona chabe yebna, catšátanga o uabënanga, bebmá o befta, o básenga, o fshantsënga,

30 cha mora quem luarentše echanjóyëngacñe chama patse soye más yebnënga, catšátanga, uabënanga, bebmanga, básenga y fshantsënga, masque puerte chaosufrima ínÿënga mochántsama; y chë inÿe luarocna, chë nÿetsca tescama yomna tšabe vida echanjónÿena.

31 Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca — Jesús tojánayana.

Jesús cachiñe tojánayana cha jóbana y jtayenama
(Mt 20.17-19; Lc 18.31-34)

32 Chentšana Jerusalenoÿe imojtsaye, y Jesús yojtsebnatsana. Chë uatsjëndayënga puerte ojanánënga imojtsemna, Jesús ndauatjácá choye yojtsayama; y inÿe becá entšanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjëndayënga barie tojánachembo y tojanontšé jáuyanana ntšamo cháftaca jopásama yojtsemnana.

33 Mëntsá tojanëyana: “Tšëngaftanga šmontsonÿá, Jerusalenoÿe bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amëndayënga y ley abuatambayëngbe cucuatšinë mochanjáboshjona, y chënga mochanjayana cha chaóbana ca; y ndoñe judiëngbe cucuatšinë mochanjáboshjona.

34 Chënga mochantsáboyejuana, mochántsebuashëtotjo, mochántsetjanja y mochanjóba, pero chentšana unga tianoye cha echántayena ca.”

*Santiago y Juan, Jesús tmojanimpadá canye pavor cháuabiamama
(Mt 20.20-28)*

³⁵ Chora, Santiago y Juan, Zebedeobe uaquíñata, Jesúsbioye tbojanobeconá y tmojaniana: —Buatëmbayá, bëndata fsëntseboše pavor chašcuabiamama ntšamo chachbojaimpadacá ca.

³⁶ Y Jesús tojanatjá: —¿Ndayá šojtseboše atše tsëndatbiamá chjamama ca?

³⁷ Y chata tbojaniana: —Aca reycá chacojtsemánda ora, cochjaleséncia bëndata fchayobená jótbemana, canya acbe catšbioica y inya acbe uañicuayoica ca.

³⁸ As Jesús tojanéjua: —Ntšamo šmotsotjanañama tsëndata ndoñe quešnatstasëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entsanga puerta bacá chacmojtšëbuatsená ora, tašochjauánta, ntšamo atše chjauantacá ca?

³⁹ Y chata tbojaniana: —Aíñe fchanjobenaye ca.

Y Jesús tojanéyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfria.

⁴⁰ Pero atše ndoñe quešatobena jamándana nda atšbe catšbioica y atšbe uañicuayoica chaótbemama. Chë útentšë entsemna ndëmuanyëngbiamá atšbe Taitá tojaprontacá ca.

⁴¹ Chë inye bnëtsana uatsjëndayënga chca tmojanuena ora, tmojanontsé Santiago y Juánoftaca tojtjayanana.

⁴² Pero Jesús nyetsca uatsjëndayënga tojánachembo y tojanéyana: “Tšëngaftanga šmondëtatšëmbo, quem luarentša amëndayënga lempe jtsemándayana, nya mo nduiñënga cuaftsemncá; y chë bëtsëtsa entsanga chëngbe obenánaca jtsemándayana, ntšámnaca jtsemëse, chë inye entsanga sempre chamotsayaunana.

⁴³ Pero tšëngaftangbeñe ndoñe chca chaondëtsemna. Inyetsá; masna, nda tšëngaftangbeñe chë más uamaná jtsemnama tojtseboše, cha bontsemna chë inyënga jtsaservénana;

⁴⁴ y ndánaca tšëngaftanguentsá chë más uamaná jtsemnama tojtsebošá, bontsemna jtsemnana nyetscangbiamá, mo nye inyabiamá nyets tempo oservenacá.

⁴⁵ Cachcá, Bëngbe Bëtsá Entšá tbojanbemá ndoñe chenátabo cha chamot-seservénama, ndayá inyënga jabáserviamá. Y mo nda, inyënga játsebacama cuafjopagacá, cha echanjóbana ba entsanga atsebácanënga chamotsemnama ca” —cha tojánayana.

*Jesús canye jtanábioye tbojanshná
(Mt 20.29-34; Lc 18.35-43)*

⁴⁶ Chentšana, Jesús y chabe uatsjëndayënga Jericó uabaina puebloye tmojánashajana. Y Jesús chabe uatsjëndayëngaftaca y bëtscá entsángaftaca Jericó pueblentsana yojtšaisëbocana ora, Timeobe uaquíñá, Bartimeo ca uabainá, canye jtaná lemošna otjanañá, benache juachañe yojtsetbemana.

⁴⁷ Y Jesús Nazaretocá chëjana yojtšachnëjuanama cha yojátatšëmbona ora, tojanontsé mëntšá uayebuáchana: —¡Jesús, Davidbentsana Entšá, šmotselastemá ca!

⁴⁸ Chorna, banga chë jtaná imojtšácacana iytëca chaótbemama. Pero cha más yojtšáyebuache: —¡Davidbentsana Entšá, šmotselastemá ca!

⁴⁹ Chora Jesús tojantsá y chë inyënga tojanéyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtse-bomna; motsbaná! Jesús cmontsechembuana ca.

⁵⁰ Y chë jtaná, quefsaíya jtsenátsejquëse, yojontsënja y betsko Jesúsbiocyte yojobeconá.

⁵¹ Chora, Jesús chë jtanábiocyte tbojantjá: —¿Ndayá cojtseboše atše acbiama chjamama ca?

Y chë jtaná tbojanjuá: —¡Buatëmbayá, šmolesenciá atše chašuatábínýnama ca!

⁵² As Jesús tbojanianyana: —Motsatoñe. Tšabá jtsatsmënema Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinýna, y Jesúsbiocyte benachëjana ibojtsëstona.

11

Jesús Jerusalenoye tojánashjango (Mt 21.1-11; Lc 19.28-40; Jn 12.12-19)

¹ Ya Jerusalenoye imojtsebeconá ora, Betfagë y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó,

² y mëntšá tojanëyana: “Tsëndatbe natsana entsemna base pueplotémoye motsata. Chašojáshjango y cachora šochanjínýena canýe burrotema utsbuaná; chábeñe cabá ndocná tonjenojayé. Sochjuajafjoná y šochjuánatse.

³ Nderado nda, ¿ndáyeca šmojtsanachá ca? chacmojátjase, šochjuojuá: ‘Bëngbe Utabná bontsájaboto y chora bochantabáiseboshjona ca.’ ”

⁴ As chata tbojána, y tbojáninýena chë burrotema tsáshenañe, canýe bësásañe utsbuaná, y imojuajafjoná.

⁵ Y básefta entšanga chiñe imojtsemnënga, chátbiocyte tmojanëyana: “¿Ndayá šojtsama? ¿Ndayeca chë burrotema šojtsajafjná ca?”

⁶ As chata tbojanjuá ntšamo Jesús tojanëyancá; y chë entšanga tmojanalesenciá chë burrotema chamuánatsama.

⁷ Chentšana, chë burrotema Jesúsbiocyte tmojanánatse; chë burrotëmeñe chatbe entsáyá tbojanájtse, y Jesús chábeñe tojanenoyayé.

⁸ Bëtská entšanga chëngbe entsáyá chë benachëjana imojtsanëtëtsatsana, y inýengna chë jajoca imojuatëtsetse buacuashangá chiñe imojuacjaye.

⁹ Y chë natsana imojtsajnënga y chë ũstonoyënga mëntšá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá!

¹⁰ ¡Tša tšabá chë echanjóshjango amëndayana, bëngbe bëts taitá David yojëftsemándá orcá! ¡Bëngbe Bëtsá celocá matschuanga ca!”

¹¹ Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebløye.

Jesús tojánayana canýe betiye ndoñe más chaondëshájona ca (Mt 21.18-19)

¹² Yëfsana, Betaniocana Jerusalenoye chënga imojtésajna ora, Jesús tbojánishëntsena.

13 Bēnocana canýe higo betiye yojinýe; as tojána jontješiyama tainashajo o ndoñe. Pero nýe tsbuanáchēnga chiñe yojínýena, chora ndoñe shajo tempo bétsemna causa.

14 As Jesús chē higo betiyoje tojánayana: “¡Ndocna te más chacondēshájona entšanga chamosama ca!”

Y chabe uatsjéndayēnga imojouena ntšamo cha tojanayancá.

Jesús, Bēngbe Bētsabe bēts yebnentsana enēnga y obuámnayēnga tojtanēbuacna (Mt 21.12-17; Lc 19.45-48; Jn 2.13-22)

15 Jerusalenoye tmojánashjajntšana, Jesús Bēngbe Bētsabe bēts yebnoye tojánamashēngo, y tojanontsé chentšana jtēbuacnana chē chentše imojtsena y imojtsobuámañēnga. Chéntšnaca imojtsemna entšanga canýe crocénana enēnga, y chē crocénana nýe Bēngbe Bētsabe bēts yebnentsama inoservena. Chē entšanga crocénana atrocayēngbe mesēshangá tojtsanenásatajchquēca, y chē palomatémēnga enēngbe tšenēšēngnaca;

16 y ndoñe tonjanalesenciá ndocná Bēngbe Bētsabe bēts yebnējana chē soyēnga chaotsēchnējuanama.

17 Y tojanontsé entšanga mēntšá jabuátambana: “Ndegombre, Bēngbe Bētsabe uabemana palabrenguiñe cha mēntšá tojánayana: ‘Atsbe bēts yebna echantsabaina nýetsca luarentša entšangbiama átseftaca encuéntaye yebna ca’; pero tsēngaftangna atbēbanēngbe oyeñiñe chē yebna šmojtsebema ca” — Jesús tojanéyana.

18 Chē bachnangbe más uámana amēndayēnga y chē ley abuátambayēnga tmojántatsēmbona ntšamo yojochnēnguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nýetsca entšanga imojtsenjanaye ntšamo cha yojanabuátambama.

19 Pero yojtseibétatana ora, Jesús chabe uatsjéndayēngaftaca chē bēts pueblentsana yojesóboçñe.

Chē higo betiye tojtsanbuashá (Mt 21.20-22)

20 Yēfsana cachēse, cachējana imojtēsachnējuana ora, tmojáninýe chē higo betiye parejo tbētjēngaca yojtsebuashá.

21 Chora Pedro yojenójuaboje ntšamo yojopásama; as Jesúsbioje tbojaniyana: —¡Buatēmbayá, minýe; chē tconjayana ndocna te más tsšabe betiye chaotsemnama betiye tojtsebuashá ca!

22 Y Jesús tbojaniyana: —Bēngbe Bētsábeñe šmochtsošbuáchiye.

23 Ndegombre cbēyana, nderado nda quem tjoye tojayana, “¡chentšana mojuaná y bēts uafjónayoye motsēshbuetše ca!” y chca tojayana ainaniñe inýetšá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnēnguama, ndegombre chca echanjochnēngo.

24 Chíyeca chochanjáuyana, lempe ntšamo Bēngbe Bētsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyēngacñe ca, y ndegombre chca šmochántsebozna.

25 Y Bēngbe Bētsáftaca chašmojtsencuénta ora, šmochjenójuaboje nderado nda ndaye bacna soye tsēngaftangbiama tojamama, y cháftaca cabá etonánēnga šmojtsemnēse, šmochtseperdóna; chca, Bēngbe Bētsá, celoca endmēná, tsēngaftangbe bacna soyēngama chacmotsaperdonama.

²⁶ Pero inŷa ndoñe ŷmonjaperdonasna, Bēngbe Taitá, celoca endmēná, cach ndoñe tšēngaftanga quecmochátaperdonaye ca —cha tojánayana.

Jesusbe obenana
(Mt 21.23-27; Lc 20.1-8)

²⁷ Chca tojanopasá chentšana, Jerusalenoye chēnga tmojesaná. Jesús Bēngbe Bētsabe bēts yebnējana yojtsobuertanēntscuana, chábioye tmojanobeconá bachnangbe amēndayēnga, ley abuatambayēnga y chē judiēngbeñe bētsējemēngcá amēndayēnga,

²⁸ y mēntšá tmojanťjá: —¿Ndaye deréchoca chē contsama soyēnga aca cojt-sama ca? ¿Chca jtsamama nda obenana tcmēnjatšetá ca?

²⁹ As Jesús tojanēyana: —Atšnaca sēntsebmoma canŷe soye tšēngaftanga jatjayama. Chašmojojuase, átšnaca cbochjáuyana ndaye deréchoca atše chca stsama.

³⁰ ¿Nda Juan chē Ubayaná tbojanichmó entsanga jubáyama, Bēngbe Bētsá o entsanga? Smēyana ca.

³¹ Chora chēnga tmojanontšé mēntšá enatsētsnayana: “ ‘Bēngbe Bētsá ca’ chamojojuase, cha ŷochanjáuyana: ‘As ¿ndáyeca chē cha tmojanabuayená soyēnguiñe ndoñe ŷmonjanošbuaché ca?’

³² Pero ndoñe quemuátobena jayanana ‘entsanga ca.’ Chca tmojánayana, er chēnga entsangbiamá imojánauatja, er nŷetscanga imojanjuabná, Juan ndegombre Bēngbe Bētsabe juabna oyebuambnayá yojamnama.

³³ Chcasna, chēnga tmojanjuá: —Bēnga ndoñe queftsátstatšēmo ca.

Y Jesús tojanēyana: —As atše cach ndoñe quebochatēyana ndaye deréchoca atše chca stsama ca.

12

Chē puerte bacna trabájayēngbiamá cuento
(Mt 21.33-46; Lc 20.9-19)

¹ Chora Jesús tojanontšé cuentēngaca jabuátambana. Mēntšá tojanēyana: “Canŷe entšá bētscá uvas betiyēnga yojáje, y chē shēconana yojajétja. Chē uvasēsangá juantsētetjiamna canŷe base luare yojajutjo; y canŷe tšbanana jebna soye yojapórma chiñe jtsashanŷama. Chentšana, inŷe trabájayēnga chē jajañe yojúyentsame, y chana inŷe luaroye yojtsoñe.

² Chē uvasēsangá juashacama tempo yojobuache orna, chē jajañe nduiño canŷe oservená ibojichmua chē arrēndayēnga jáuyanama ntsachetsá chē nduiño ibojtsotocánama.

³ Pero chēngna, cha imojishache, imojtsejantšetaye, y tondaye ntajatacá imojtichmuá.

⁴ Chentšana, chē nduiño inŷe oservená ibojíchmua; pero chana, bestšaše imojtselisia y podesca imojtsóyenguango.

⁵ Chentšana inŷa ibojatichmuá, y chana chē arrēndayēnga imojtsóba. Y bángnaca yojichamuá; pero chēngna, inŷyengna imojtsajantšetaye y inŷyengna imojtsēbaye.

⁶ “Chē nduiño cabá canŷa ibojtsábojamna jíchmuama: cachabe bonshana uaquiñá. Cabana, cha ibojíchmua y mēntšá yojtsejuabnaye: ‘Atšbe uaquiñá cocayé mochanjóyeunaye ca.’

⁷ Pero chē arrēndayēnga cha imojinŷe ora, imojeniyana: ‘Mua chē fshantse nduiñbe uaquiñá entsemna. Lempe chabe soyēnga mua echanjóyēngacñe.

Cuajna, motsóbanga, y lempe chabe otocana soyënga bëngbiana echanjoquéda ca.

⁸ Chcasna, cha imojishache, imojtsóba y chë uvas betiyënga jajañentsana más chcoye imojetsëtsena ca” —Jesús tojancuentá.

⁹ Jesús chca jacuëntama tojanpochocá ora, tojánayana: “Y asna, ¿ndayá chë fshantse nduïño yochjama ca? Cha co echanjá y chë trabájayënga echanjetsëbaye, y inÿe trabájayënga chë uvas betiyënga jajañe echanjárrendaye.

¹⁰ “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtsbé,
mora chë más bëts uashacuanësentse entsejájona.

¹¹ Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.”

¹² Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinÿanÿiyama chënga mo chë puerte bacna trabajayëngcá imojanmënama. Pero entšangbiana imojtsauatja, chíyeca cachcá tmojanonÿá y chentsana imojtsóñenga.

Chë Romoca bëts mandadbiana impuesto jtsatsquëcñayama
(Mt 22.15-22; Lc 20.20-26)

¹³ Chentsana chënga, básefta fariseunga y Heródesbe ústonënga Jesúsbiocyte tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana.

¹⁴ Chënga tmojána y Jesús tmojanianana: —Buatëmbayá, bënga fsëndëtatšëmbo aca ndegombre soyënga cnetسابuatambama, y ndoñe jatuenanana nÿe ntšamo entšanga tmojatichamcá, er acbiana tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiana bënga impuesto jtsatsquëcñayana? ¿Fchtsatsquëcñaye o ndoñe ca? —chënga tmojantjá.

¹⁵ Jesús yojtsetátšëmbo, chënga bacna entšanga ntšamo ndegombre tmojuabnacá ndinÿinÿnayënga imojamnana; chíyeca tojanëyana: —¿Ndáyeca tšëngaftanga šmojtseboše chë sóyeca atše jisháchichiyama? Canÿe denario crocénana šmiyëboñe, atše chayobená jinÿama ca.

¹⁶ As canÿe crocénana tmojanoyé y Jesús tojanëyana: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

¹⁷ Chora Jesús tojanëyana: —Chcasna, César šmoctoyiye cha ibotocana soye; y Bëngbe Bëtsana cha ibotocana soye ca.

Y nÿetscanga chama imojenjaná.

Obanënga jtayenama Jesús tmojantjá
(Mt 22.23-33; Lc 20.27-40)

¹⁸ Chentsana, báseftanga saduceo ca uabaina entšanga tmojána Jesús jinÿama. Chënga imojanjuabná obanënga ndocna te ntayenana ca. Chíyeca, Jesús mëntšá tmojanianana:

¹⁹ —Buatëmbayá, Moisés tojëftsanabema, nderado canÿe boyá tojóbana y básenga ndoñe tonjëftsabáshejuanëna, canmëna chë uabentsá chë shëmaftaca

jtobouamayana, chca, chabe uabochená obanabiama básenga jtsabamnama ca.

²⁰ Y chcase, canye, canyështëa catsátanga monjamna. Chë natsaná tonjanbouamá y tontsanóbana básenga ntjěftsabashejuancá.

²¹ Chentšana, chë ústona uabentsá chë shémaftaca tonjanobouamá, pero chana tontsanóbana, básenga ntjěftsabashejuancá; chë inye uabentsáftaca cachcá tonjanopasá.

²² Chca, nyetsca canyështëa catsátangaftaca cha tonjanobouamá, pero ndocná básenga ntjěftsabáshejuana. Y chentšana chë shembásanaca tontsanóbana.

²³ Y morna, chë obaněnga chamojtayena ora, ¿ndabe chë canyështëa catsatanguentsábe shema chë shembása yochtsemna, nyetscanga cháftaca tmojanbouamase ca? —chěnga tmojantjá.

²⁴ As Jesús tojaněyana: —Ntšamo Běngbe Bětsabe uabemana palabřenguñe endayancá ndoñe tmonjosertá, ni Běngbe Bětsabe obenanama. Chíyeca ntšamo ndoñe yondměncá šmontsichamo.

²⁵ Er obaněnga chamojtayena ora, ni boyabásenga ni shembásenga quemochatóbouamnaye, y chca, chěnga mochántsemna mo celoca angeloteměncá.

²⁶ Y chë obaněnga jtayenama, ¿Moisesbe librěšañe ndoñe šměndualía ntšamo Běngbe Bětsá tbojanianama, chë betiyetema yojtsángbototjuana ora? Běngbe Bětsá měntšá tbojaniana: “Atše sěndměna Abraham, Isaac y Jacoběbe Bětsá ca.”

²⁷ Běngbe Bětsá chca tojánayana ora, entsichamo cha ndoñe yondměna obaněngbe Bětsá, sinó aina entšangbe Bětsá ca, er masque chěnga tmojanóbana, chěnga cabá Běngbe Bětsáftaca mondoyena. Tšěngaftanga canye ndoñe ndegombre soyiñe šmontsemna ca —tojaněyana.

Chë más běts uamana mando (Mt 22.34-40)

²⁸ Chentše yojtsemna canye ley abuatambayá. Cha yojouena ntšamo Jesús y chěnga imojtsenatsětsnayana, y yojtsetátšěmbo Jesús tšabá tojanějuama. As, tojanobeconá y Jesúsbioye tbojantjá: —¿Ndayá chë más běts uamana mando yomna ca?

²⁹ Y Jesús tbojanjú: —Chë más uamana mando měntšá endměna: “Israeloquěnga šmochjouena, Utabná, Běngbe Bětsá endměna, y nye canye Běngbe Utabná endměna, ndocná más.

³⁰ Utabná Běngbe Bětsá cochtsebobonshana nyets acbe ainánaca, nyets espíritoca, nyets juábnaca y nyets añémoca.”

³¹ Y chentšana quem inye mándnaca: “Nděmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámama ca —Jesús tojánayana.

³² Chora, chë ley abuatambayá Jesúsbioye tbojaniana: —Buatěmbayá, puerte tšabá tcjayana. Ndegombre yomncá contsichamo, nye canye Utabná endměna y ndocná más.

³³ Y cha jtsebobonshánana nyets ainánaca, juábnaca y añémoca, y nděmua entšánaca jtsebobonshánana cachá cuenobobonshancá, puerte cuámana. Cach nyětsá ndoñe quenatámama bayěnga jtsěbánayana, ni chë uatšěmbona soyěnga Běngbe Bětsá jětschuayama ca.

³⁴ Cha nyěts juábnaca tbojanjuama Jesús tojáninye ora, tbojaniana: —Batšatema cmontsebuáshbena jtseprontánama, Běngbe Bětsá chacolesenciama acbe ainanentše jtsemándayama ca.

Y chentshana, ya ndocná yonjenñemua Jesús más jatstjanayama.

¿Cristo ndabe entšábentshana yomna?

(Mt 22.41-46; Lc 20.41-44)

³⁵ Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámana Uabuayaná Davidbentshana iuabó ca?

³⁶ Cach David, chë Uámana Espiritbe mándoca mëntšá tojánayana: Bëngbe Bëtsá, atšbe Utabná Crístbioye tbonjanayana:

atšbe catšbioica mótbema,

atšbe obenánaca, acbe uayayënga acbe cucuatšifne chamoquedama ch-jamëntscuana ca.

³⁷ ¿Ntšámose Cristo Davidbentshana Entšá nántsemna, cach David ‘Utabná ca’ chábioye tbojtsabobuátmëse ca?” –cha tojanëyana.

Y chë bëtsá entšanga, oyejuayënga imojtsuenana.

Jesús chë ley abuátambayëngbiama tojánayana, chënga ndoñe tšabá montsama ca

(Mt 23.1-36; Lc 11.37-54; 20.45-47)

³⁸ Mëntšánaca Jesús chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenañe entšanga nÿa respétoca chamotsacheuanama.

³⁹ Chë judiëngbe enefjuana yebnënguenache, chë más uámana luarënguiñe jstebiámanana, y chë fiestënguenache nÿa quëfseroca.

⁴⁰ Pero chënga, viudángbioye chë tmobomna soyënga jtsabacayana, y entšangbe delante tšabá chamotsënyama, y chëngbioye imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínÿengbiama más chënga echanjácastigaye ca” –Jesús tojánayana.

Jesús yojtsënyaye chë crocénana quëcjayënga

(Lc 21.1-4)

⁴¹ Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcjayëtema ndirichiñe; y chë crocénana quëcjayënga yojtsënyaye. Bëtsá bonnëngna becá crocénana imojtsequëcjayaye.

⁴² Chora, canÿe viudá ndbomnjëmnaca vojobeconá y nÿe uta crocénana chëtemiñe yojaftsesegóra.

⁴³ Chora Jesús chabe uatsjëndayënga tojánachembo chamobéconama, y mëntšá tojanëyana: “Ndegombre cbëyana, quem viudá ndbomnjëjema, Bëngbe Bëtsabiana nÿetscangbiama más tonjëftsesegorá.

⁴⁴ Chë bonnëngna chë yojtsóyentsjamentšana tmonjëftsesegorá, y cabá bomnana imotsóbomñe; y chë viudana tonjëftsesegorá lempe ntsachetšá yobomncá; masque tša ndbomnjëjema, chë vida jtsebomnana lempe ntsachetšá yobomncá tonjëftsesegorá ca.”

13

Jesús tojánayana chë Bëngbe Bëtsabe bëts yebna lempe mochjánpochocama (Mt 24.1-2; Lc 21.5-6)

1 Jesús Bëngbe Bëtsabe bëts yebnentšana tojëftsanbocna ora, canÿe chabe uatsjendayá tbojaniyana: —Buatëmbayá, minÿe, itša bëts ndëtsbenga, y tša botamana bëts yebnënga ca!

2 Chora Jesús tbojaniyana: —Tšabá cochjinÿe tša botamana bëts yebnënga. Pero muentše ndoñe queochaisoquëda ni mo canÿe ndëtsbé inÿebé juatsboye. Lempë mochantsepochoá ca.

Ntšamo yochtsemna quem luare jopochócama te chaojtsobeco ora
(Mt 24.3-28; Lc 21.7-24; 17.22-24)

3 Chentšana, Olivos tjšashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá,

4 ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

5 Chora Jesús tojanëjua: “Cuedado šmochtsebojna ndocná chacmondáingñema.

6 Banga mochanjabo y mochantsabíchamo chënga Jesús imomna ca. Mochántšichamo: ‘Atše chë Cristo sëndmëna ca’, y chca, ba entšanga mochanjáingñaye.

7 “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátsmëna.

8 Canÿe luarentša entšanga inÿe luaroca entšangaftaca mochántšentsjanaye, y canÿe amëndayábentša entšanga inÿe amëndayábica entšangaftácnaca; ba luarënguenache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

9 “Pero tšëngaftangna cach tšëngaftangbiama šmochtsantješna; entšanga cmochanjshëche y amëndayëngbe cucuatšinë cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiana šmotatšëmbcá chašmuayanama.

10 Er entseyta, quem luare cabá ndopochóca ora, Bëngbe Bëtsabe tšabe noticiënga nÿetsca luarënguentša entšangbioye chaóshjanguama.

11 Y inÿengbe cucuatšinë jabáshejuanama chacmojtsënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga canÿenga ndoñe chora quešmochátoyebuambnaye, ndayá chë Uámna Espiritu tšëngaftangbiajana echantsóyebuambnaye.

12 “Canÿe catšata cachabe catšata inÿengbe cucuatšinë bochanjáboshjona chamotsóbama, y bëtsëtsanga cachëngbe básenga mochanjábashhejuana chamotsébáyama; y chë básengna chëngbe bëtsëtsangbe contra mochántsemna y chamotsébáyama mochanjábashhejuana.

13 Atšbe ústonënga bëtsemna causa, nÿetsca luarënguentša entšanga cmochantsébuayënja; pero nda nÿets tempo átšbeñe ošbuachiyá totsomñe, atsbočaná echántsemna.

14 “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojëftsanabema. Chë puerte

uabouana soye, chca jtsemnama ín̄yoca ts̄ēngaftanga chašmojin̄ye ora (nda tojtsalía, chabosertá), šmochántsetatš̄embo ch̄e puerte ngménana tempo tojóshjanguama; chorna, ch̄e Judeoca chamojtsemna entšanga, batsjabengoye chamotsacheta;

¹⁵ chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashēngo tsoicana ndayá jesábocnama;

¹⁶ y nda jajoca chaojtsemna, yebnoye ndoñe chaondéta ni mo chabe quēsaiya jesáñama.

¹⁷ ¡Tša lastema ch̄e tempo ngomámanēnga o ochóchaye šešonga chamojtsabamna shembásēngbiamá!

¹⁸ Bēngbe Bētsá šmochtseimpadana ch̄e ngménana tempo ndoñe chaondóshjango uaftena tempo ora,

¹⁹ er chora puerte ngmenancá echántsemna. Tša jabuache ngmenancá, quem luare jobojátšama orscana y mēntscoñama y más chcoye, cachá ngménana ndoñe ntjamnana.

²⁰ Ch̄e puerte ngménana tempo, yapa bēn ndoñe chaondētsemnama Bēngbe Bētsá ndoñe tonjalesenciase, ndocná quentatsbocá; pero cha, chabe ubuáyanēnga, chabe bocacánēnga corente endábabuan̄yeshanayeca, echanjama yapa bēn tempo ndoñe chaondētsemnama.

²¹ “Chora nderado nda chacmojáuyana: ‘Min̄ye, muentše ch̄e Cristo entsemna’, o ‘Choca cha entsemna ca’, ch̄e soyēngama ndoñe šmattsayaunana.

²² Er mochanjábocana ndoñe ndegombre uámana ubuáyanēnga, chēnga Cristo imoncha ja jtsichámēse, y Bēngbe Bētsabe ndoñe ndegombre juabna oyebuambn̄ayēngnaca; y chēnga mochanjama bēts soyēnga chēngbe obenana jin̄yan̄iyama, entšanga jáingñama, y tmojobenase, ch̄e Bēngbe Bētsabe bocacánēngnaca.

²³ ¡Cuedado šmochtsebomna! Cabá chca ndochñēngo ora, lempe tcbonjabuayená ca” —Jesús tojanēyana.

Bēngbe Bētsá Entsá tbojanbemá quem luaroye echanjésabo

(Mt 24.29-44; Lc 21.25-36)

²⁴ Mēntšánaca Jesús tojanēyana: “Pero ch̄e tempo, entšanga puerte chamojasufrí chentsana, shin̄ye ndoñe queochátsbuashin̄yin̄yana, juashcona ndoñe queochátsbin̄ynaye,

²⁵ celocana estrellēnga echanjatquécjana, y quem luarentša tsbanánoca espírituēnga obenana bomnēnga echanjámēmama.

²⁶ Y chora, entšanga mochanjin̄ye, Bēngbe Bētsá Entsá tbojanbemá jantšetšhiñe echántsaboye, corente obenánaca y corente buashin̄yin̄janiñe.

²⁷ Chora cha chabe angelēnga echanjámēndaye ch̄e Bēngbe Bētsabe ubuáyanēnga júbuajama, n̄yets luarēngocana, quem fshantsoca cán̄yoica juachoicana, celoca ín̄yoica juachóntscoñe.

²⁸ “Ch̄e higo betiyama šmochjuatsjin̄ye: Tsēm buacuafjēnga tojtsebomna ora y tojtsaisējotsana, jtsotatšēmbuana ch̄e tsabe tempo ya tojtsaisobecuama.

²⁹ Cachcá, ch̄e soyēnga ndayama ts̄ēngaftanga tcbonjauyancá chašmojin̄ye ora, šmochántsetatš̄embo Bēngbe Bētsá Entsá tbojanbemá ya jesabama yojtsemnama.

³⁰ Ndegombre cbēyana, lempe chca echanjochñēngo, morsca entšanga cabá ndóbana ora.

³¹ Celoca y quem luare echanjopochóca, pero atšbe palabra ndocna te queochaisopochóca.

³² “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nye chë Taitá chama yotátšëmbo.

³³ “Chíyeca, cuedado šmochtsebmna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tbojanbemá jésabama tempo.

³⁴ Echántsemna mo canye entšacá; chana inye luaroye ya jëftsebmocna ora, chabe oservénënga jëftsamëndana chabe yebna chamotsinýenama. Cada ona canye trabajo jëftsebónýiyana, y chë shanyá jëftsemándana botamana chaotsantješna.

³⁵ Chcasna, cuedado šmochtsebmna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tséntseto ora, bínýanoye o cachëse, tšëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo;

³⁶ ndoñe cuedado šmontsebmne, nderado cha nye ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta.

³⁷ Chíyeca, ntšamo tšëngaftanga cbochanjauyancá, nyetscanga chanjáuyana: ¡Puerte cuedado šmochtsebmna ca!” –Jesús tojánayana.

14

Entšanga imojtsejuabnaye ntšamo jamëse Jesús jishachama (Mt 26.1-5; Lc 22.1-2; Jn 11.45-53)

¹ Bashco fiestama uta te yojetsámna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseingñase, y jtsóbama.

² Báseftanga imojtsichamo: “Quem fiestëntscuana ndoñe, er nderado entšanga yapa muanjónša enbouenanana ca.”

Canye shembása botamana uanguëtse béjaye Jesusbe bestšašine tbojanbuešcja

(Mt 26.6-13; Jn 12.1-8)

³ Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canye shembása tojánashjango. Chë shembása yojúshjango canye alabastro jarrëtema jútjena canye becá uámana y botamana uanguëtse béjaye, ena nardana uanguëtšiyey; chana chë jarrëtema yojátsba y chë béjaye Jesusbe bestšašine tbojanbuešcja.

⁴ Chca tmojáninye ora, báseftanga chentše imojtsemnënga tmojanotjayaná y mëntšá imojtsenatsëtsnaye: –¿Ndáyeca nye bonamente chë soye yojtsemna ca?

⁵ Chamna, matmënjobenanga chë béjaye unga patse denario crocenánama juiyana, y chánaca ndbomnejëmënga matmënjúabuache ca.

Y chë shembásabiama podescá imojtsichamo.

⁶ Chora Jesús tojanéyana: –¿Ndáyeca quem shembása ndoñe cachcá šmochanjonyaye ca? ¡Ndocá matatsana! Atšbiama tšabe soye tonjama.

7 Er ndbomnjémenga nyets tempo tsëngaftangbeñe mochanjëftsemna, ndayénaca šmojábošena ora, šmatjobenaye tsabe soye chëngbiama jamana; er atše tsëngaftangaftaca ndoñe nyets tempo quichásemna.

8 Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora.

9 Ndegombre cbëyana, quem luaroca ndayéntšnaca Bëngbe Bëtsabe tsabe noticiënga chamojtsabuayiyiná chentše, ntšamo quem shembása tojamámnaca becá mochanjëftsóyebuambaye, chca, entšanga chabiama chamot-senójuabnama ca —cha tojanëyana.

Judas tojána bachnangbe amëndayëngbiöye, Jesús chamuišachama
(Mt 26.14-16; Lc 22.3-6)

10 Chentšana, Judas Iscariote, canye chë bnëtsana uta uatsjendayënguentšá, tojána chë bachnangbe amëndayëngaftaca jencuéntama, Jesús chëngbe cucuatšine jaboshjonama.

11 Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšine jaboshjonana.

Jesús chabe uatsjëndayëngaftaca Bashco saná tojanse
(Mt 26.17-29; Lc 22.7-23; Jn 13.21-30; 1 Co 11.23-26)

12 Chë Bashco fiesta bojatšenté, chë levadúraca ndëpormana tandëše sayté, chë uatsjëndayënga Jesús tmojantjá: —¿Ndëmoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canye oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

13 As Jesús uta chabe uatsjëndayata tojanichamó y mëntšá tojanëyana: —Chë bëts puebloye motsata. Chašojáshjango ora, canye bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmuanye yebnentše yochjámashënguama;

14 y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?”

15 As cha cmochanjínjanyaye canye bëts tsañe, tsbanana pisoca, lempe prontániñe; chentše šochjaprónta bënga mochjasama ca.

16 As chë uatsjëndayata tbojána y tbojáninýena lempe ntšamo Jesús tojanëyancá; y chentše chë Bashco saná tbojanprontata.

17 Tojanibétata ora, Jesús chë yebnoca tojánashjango, chabe bnëtsana uta uatsjëndayëngaftaca.

18 Y mesëshentše imojtsesaye ora, Jesús tojanëyana: —Ndegombre cbëyana, canya tsëngaftanguentšá, átšeftaca entsesá cha, uayayëngbe cucuatšine šochanjáboshjona ca.

19 Chorna chë uatsjëndayënga ngménaca imojtsemna, y tmojanontsé canyánya cha jatjayana: —¿Atše chtsemna ca?

20 Y Jesús tojanëjua: —Canya chë bnëtsana utatentšá entsemna. Chabe tandëše cach atše sëntsefchecuacná šcnenentše cha entsefchecuacná.

21 Ndegombre, Bëngbe Bëtsá Entšá tbojanbemáftaca echanjopása ntšamo chabiama Bëngbe Bëtsabe uabemana palabrënguiñe endayancá. Pero, itša

lastema chë bochjáboshjonabiam! Chabiamá más tsábá manjamna ndoñe ntjónñana ca —Jesús tojánayana.

²² Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjédayënga tojanëjatá, y mëntśá tojánayana: “Mocñënga, mosënga, atśbe cuerpo entsemna ca.”

²³ Chentśana, canye coptema vínoyeca tojanaca, Bëngbe Bëtsábioye tbojtanchuá, chabe uatsjédayënga tojanëśśaśé, y nyetscanga tmojanofśé.

²⁴ Mëntśá tojánayana: “Quem vínoye atśbe buiñe entsemna. Atśbe buiñe echanjuábuashana entśanga chamotsetatśëmbuama ntśamo Bëngbe Bëtsá entśanga tojaśebuachenacá ndegombre yochjochnënguama. Chë buiñe bëtsá entśangbe tsábiamá echanjuábuashana.

²⁵ Y ndegombre cbëyana, morscana ya ndoñe más chë uvasësentśana obocniye quichaisofśiye. Chë tsëm vínoye tsëngaftangaftaca chanjofśiye, Bëngbe Bëtsabe amëndayoca chamojtsemna ora ca” —tojánayana.

Jesús tojánayana, chábioye ndoñe bonjanabuátma ca Pedro yochjányanama (Mt 26.30-35; Lc 22.31-34; Jn 13.36-38)

²⁶ Bëngbe Bëtsábioye jëtschuyama tmojançantá chentśana, Olivos tjashoye tmojëftsanbocana.

²⁷ Jesús tojanëyana: —Nyetsca tsëngaftanga quem ibeta átśbeñe ośbuáchiyana śmochantsobuetśe y śmochántacheta, er Bëngbe Bëtsabe uabemana palabrënguiñe, cha mëntśá tojánayana: “Chë oveshënga abuajënña chanjóba y chë oveshënga mochantsáshana ca.” Chca tsëngaftangaftaca echanjopása, uayayënga chaśmojishache ora.

²⁸ Pero obanënguentsana chaitayenentśana, tsëngaftangbe natsana Galileoye chanjá ca —cha tojanëyana.

²⁹ Chora Pedro tbojanianca: —Masque nyetscanga ácbeñe ośbuáchiyana chamotsobuetśe y chamotsacheta, atśe nña ndocna te ca.

³⁰ Chora Jesús tbojanianca: —Ndegombre cbëyana, cam ibeta, ngallo cabá uta soye ndécanta ora, aca unga soye cochanjayana ndoñe śconduabatma ca.

³¹ Pero Pedro más yojtsichamo: —Masque chaśotsemna ácaftaca jóbanama, atśe ndoñe quichátayana ndoñe cbonduabatma ca.

Y nyetscanga cachá imojtsichamo.

Getsemaní luarentse Jesús, Bëngbe Bëtsáftaca tbojanencuentá (Mt 26.36-46; Lc 22.39-46)

³² Chentśana, canye luare Getsemaní ca uabáinoye tmojána. Chocna Jesús tojanëyana: “Muentśe motbiamá, chëntscuana atśe choye chanjá, Bëngbe Bëtsáftaca jencuéntama ca.”

³³ Y tojëftsanëbiatśe Pedro, Santiago y Juan. Choca cha yojóntśa puerte ngménaca jtsemnama y corente cochtsetśenaná.

³⁴ Chëngbiyoye tojanëyana: “Atśbe ainana puerte ngménaca entsemna, mo jobanamcá. Muentśe moquedanga y śmochtsefśna ca.”

³⁵ Chentśana, Jesús más natsanoye tojána, tojanoshëntsamentśé y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tśa japadésa ora ndoñe chaondóshjanguama.

³⁶ Mëntśá yojtsichamo: “Atśbe Taitá, aca lempe jamama condobena; tojopodese, cochjama atśe japadésama ndoñe chaśondëtsemnama. Pero

ntšamo atše stsebošcá ndoñe chaondětsemna, sinó ntšamo aca cojtsebošcá ca.”

³⁷ Chentšana, chabe unga uatsjéndayëngbioye tojtanabo, y chëngna imnétsoñañe. Chca tojánanýena ora, Pédrëbioye tbojanianana: “Simón, ¿cotsomañe? ¿Ni mo nye canýe hora jtsefšnama ndoñe tconjobená?”

³⁸ Smochtsefsna y Bëngbe Bëtsáftaca šmochtseñcayey, bacna soye jamama ndoñe chacmondócochënguama. Tšëngaftanga ndegombre šmontseboše espírituca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

³⁹ Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse.

⁴⁰ Yojtabo orna, chë uatsjéndayënga cachiñe imnétsoñañe; chënga imojtsefshëtana ocñaye causa, y ndoñe imontsobena ntšamo jojuana.

⁴¹ Chentšana, tojtesaná y tojtanabo ora tojanëyana: “¿Cabá šmotsomañe y šmotsochnañe? Nýe nýetsá; hora tocjebuache, Bëngbe Bëtsá Entšá tbojanbemá bacna soye amëngbe cucuatšifne mochanjáboshjona.

⁴² Motsbananga, cuajna. Minýënga, atše boshjuaná y a entsebeconá ca.”

Uayayënga Jesús tmojánishache

(Mt 26.47-56; Lc 22.47-53; Jn 18.2-11)

⁴³ Jesús cabá yojtsoýebuambnantscuana, Judas, canýe chë bnëtsana uta uatsjéndayënguentsá, tojánashjango y cháftaca ba entsanga espadëjangaca y ngarotbëngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga.

⁴⁴ Judas, chë boshjuaná, tojanjuabó ntšamo jamana entsanga jinýanýiyama ndëmua Jesús bëtsemnana. Chíyeca, yojáuyana: “Nda chajjauámocho, cha echántsemna; šmochjishache y cuedádoca šmochjuánatse ca.”

⁴⁵ Chcasna, Judas Jesúsbioye tojanobeconá y tbojanianana: “¡Buatëmbayá ca!” Y tbojanámocho.

⁴⁶ Chora chë entsanga tmojánishache y tmojanánatse.

⁴⁷ Pero canýa chentše Jesúseftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canýe matscuáše tbojtšanëstjango.

⁴⁸ Y Jesús chë entsanga tojanatjá: “¿Ndáyeca šmojabo espadëjangaca y ngarotbëngaca atše jishachama, mo atše canýe bacá uamana entšá cuaftsemncá ca?”

⁴⁹ Atše cada te tšëngaftangbeñe sëndëtsemna Bëngbe Bëtsabe bëts yebnoca abuátambaye, y ndocna te choca chešmátanishache. Pero tšëngaftanga chca átseftaca šmotsama, cachcá ntšamo Bëngbe Bëtsabe uabemana palabrënguifne endayancá chaotsemnana ca” —tojánayana.

⁵⁰ Chorna, nýetsca uatsjéndayënga tmojtšanëuatjaná y tmojtšanacheta, y Jesús cachcá chë uayayëngaftaca tmojesanonýa.

⁵¹ Canýe bobontse Jesúsbioye ibojtsëstona, nýe canýe uafjantse entšëjua uichëtjoná. Cha chë entsanga tmojánishache,

⁵² pero chëngbe cucuatšifne chë entšëjua jesáboshjonëse, chë bobontsna enašá yojtsachá.

Jesús tmojanánatse chë judiëngbe uámana amëndayëngbioye

(Mt 26.57-68; Lc 22.54-55, 63-71; Jn 18.12-14, 19-24)

53 Chentšana, Jesús tmojanánatse chë bachnangbe más uámana amëndayábioye; y chocna, nÿetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna.

54 Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtšëšbonena.

55 Chë bachnangbe amëndayënga y chë judiëngbe uámana mándayënga imojtsenguaye canÿa, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninÿana.

56 Er masque banga Jesusbe contra uayátsenaye soyënga imojtsichamo, nÿetscanga ndoñe cachca soye montsanichamo.

57 Báseftanga imojtsaye y mëntšá Jesusbe contra, ndoñe ndegombre betsemncá tmojánayana:

58 “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entsangbe pormana yebna, chantsepochóca; y unga tese inÿe Bëngbe Bëtsabe bëts yebna, entsángbeyeca ndëpormana yebna chanjëtšjebo ca.’ ”

59 Pero masque chca imojtsichamo, nÿetscanga ndoñe cachca soye montsanichamo.

60 Chorna, chë bachnangbe más uámana amëndayá yojotsbaná, nÿetscangbe tsëntsaca yojtsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

61 Pero cha nÿe iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

62 Y Jesús tbojanjá: —Arseñor, atše cha sëndmëna; y tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica chantsetbemana, y celoca jantšëtëšhiñe chántsaboye ca.

63 Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entsanga šochjátëjaboto Jesusbe contra chamuayanama ca?

64 Tšëngaftanga šmonjouena ntšamo chë entšá entsichamcá, y chca Bëngbe Bëtsabiana entsemna mo cha cuafjyenguangcá, chë chabe Uaquiñá yomna ca cha tonjayana ora. ¿Ntšamo tšëngaftanga šmatjayana ca? —cha tojanëyana.

Y nÿetscanga tmojánayana, cha ndegombre bacna soye yojtšëbomna y jóbanama ibojtsemna ca.

65 Chorna báseftanga tmojanontšë Jesús buashëtjnayana; jubiá imojútsbotse, imojtsejantšëyaye y imojtsetjanaye: “¡Momalisiá nda tcmënjajantšëta ca!” Y chë Bëngbe Bëtsabe bëts yebnoca josticiëngna imojtsajuebjantšëyaye.

*Pedro tojánayana Jesúsbioye ndoñe bonjanabuátma ca
(Mt 26.69-75; Lc 22.56-62; Jn 18.15-18, 25-29)*

66 Pédrëna, tsmanoca yojtsemna chashjoca. Chora, canÿe shembása, chë bachnangbe más uámana amëndayabe oservená yojáshjango;

67 y Pédrëbioye tbojáninÿe ora, cha iñe juachaca yojtsanšbonena, yejuana ibojonÿinÿe y tbojaníyana: —Acnaca, Jesús Nazaretocáftaca conjánana ca.

68 Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnatšësertana ca.

Y shjoye, amashjuanóntscoñe yojábocna; y chora canye ngallo yojacánta.

⁶⁹ Chë oservená cachiñe Pédrëbïoye tbojáninÿe y tojanontsé chë ínÿenga jauyanana: —Muánaca Jesusbe uatsjendayënguentsá entsemna ca.

⁷⁰ Pero chana cachiñe tojánayana Jesúsbiyoye ndoñe bonjanabuátma ca. Chentšana, chë chentše imojtsemnënga Pedro tmojátaniyana: —Ndegombre aca chënguentsá contsemna; ácnaca Galileocá contsemna ca.

⁷¹ Pero Pedro tojanontsé ichámuaana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntša júrayana— ¡Atše chë entsá ndoñe quetsatabuatma, ndabiama tšëngaftanga šmontsatsëtsná ca!

⁷² Y cachora chë ngallo uta soyama yojacánta, y Pedro yojenójuaboye ntšamo Jesús tbojaniyanama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontsé enóbošachiyaná.

15

Jesús Pilátbiyoye tmojanánatse

(Mt 27.1-2, 11-14; Lc 23.1-5; Jn 18.28-38)

¹ Tojanbinÿna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánÿentše tmojánanefjna, nÿetsca chë luarentša más uámána mandayëngaftaca, jenóyeunayama ntšamo jamëse Jesús jóbama. Jesús tmojanëcuébatšëca y tmojanánatse, y Pilato, chë Judeoca mandadbe cucuatšïñe tmojánboshjona.

² Pilato Jesúsbiyoye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aññe, aca ndegombre yomncá tcjayana ca.

³ Chë bachnangbe amëndayënga bëtscá soyënga Jesusbe contra imojtsichamo;

⁴ chíyeca Pilato cachiñe Jesúsbiyoye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

⁵ Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mt 27.15-31; Lc 23.13-25; Jn 18.38-19.16)

⁶ Cada Bashco fiesta ora, Pilato yojanamana canye utamená jëtsboshjonana, ndánaca entšanga tmojuabuayaná.

⁷ Chë tempo yojamna canÿa Barrabás ca uabainá; cárceloye inautámëna chabe enutëngaftaca. Chëngna entšanga tmojtsanëbaye, mandadëngbe entšangaftaca imojentsjaná ora.

⁸ Chora, entšanga tmojánashhajna y tmojanontsé Pilátbiyoye jauyanana, ntšamo Bashco fiesta ora jamama yojanamancá chaomama.

⁹ Y Pilato tojanëjua: —¿Tšëngaftanga šmojtseboše tšëngaftangbe rey atše chjëtsboshjona ca?

¹⁰ Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšïñe tmojánboshjonama.

¹¹ Pero chë bachnangbe amëndayëngna entšanga tmojanañëmó chamuenbouénanama, Pilato jauyanama chëngbiama Barrabás chabuatsboshjona ca.

¹² Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

¹³ Y chënga tmojanáyebuachena: —¡Motsecrucificá ca!

14 Y Pilato entšanga tojaněyana: —¿Ndáyeca? ¿Ntšamo cha tojobuachjanguá ca?

Pero chěngna más añémoca tmojtétanayebuachena: —¡Motsecrucificá ca!

15 As Pilato, entšangaftaca tšabá joquédama yojtsebóseyecna, Barrabás tbojtanboshjona. Yojáměndaye soldaděnga jabuache Jesús chamotsetšenama; y chentšana soldaděngbe cucuatšíne tbojánboshjona, chamocrucificama.

16 Chentšana, chě soldaděnga Jesús tmojanánatse chě mandadbe běts yebnentša chashjoye, y nýetsca soldaděnga tmojánachembo chamobéconama.

17 Shbuenda uafjatsenga uinýna entšayá mo reycá tmojanichětjo; canýe coroněsha tmojanapormá uchmašěfjangaca y tmojanabestšajó.

18 Y chentšana tmojanontšé jachuayana: “¡Bayté judiěngbe Rey cochtsemna ca!”

19 Canýe niñěfjaca Jesús bestšašíne imojtsétsjanjnaye, imojtsebuashětjnaye, y chabe delante imojtsofshěntsaměntšenaye.

20 Y chca imnaftsáboyejuanentšana, chě shbuenda uafjatsenga entšayá tmojtsanabotsca y cachabe entšayá tmojtanichětjo, y pueblo chaboye tmojanánatse jacrucificama.

Jesús tmojancrucificá
(Mt 27.32-44; Lc 23.26-43; Jn 19.17-27)

21 Chora, canýe entšá chějana yojtsatashjajuana, Simón ca uabainá, Cirene pueblócá, Alejandro y Rufbe taitá; jajocana yojtsatachnějuana; y chě soldaděngna imojuatária Jesusbe cruz jěftsocutsayama.

22 Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”);

23 y tmojanabuiyé vínoye mírraca enájuaabniye, pero Jesús ndoñe yonjuáyěngacñe.

24 Y chentšana tmojancrucificá; y chabe entšayangamna, tsbanánoye tmojanětšena jinýama ndayá cada ona yochjěftsanácnama.

25 Cachěse, base mošenana ora Jesús tmojancrucificá.

26 Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojancrucificama, měntšá: MUA CHĚ JUDIĚNGBE REY ENDMĚNA ca.

27 Y cháftaca útata bacna soye ochjajnayátnaca tmojanacrucificá, canýa chabe catšbioica, y ínýana chabe uañicuayoica.

28 Chca cháftaca tmojanma, chaochněnguama ntšamo Běngbe Bětsabe uabemana palabrěnguiñe chabiamana iuayanca, měntšá: “Y chábioye tmonjáninýe mo chě puerte bacna soye aměnguentšá canýa cuaftsemncá ca.”

29 Y chějana imojtsachnějuana entšanga, Jesús imojtsóyenguaye, imojtsobestšfshanenaye y imojtsatsaye: “¡Aca chě Běngbe Bětsabe běts yebna cochtsánenasatajchca y nýe unga tese cochtanjebo,

30 cach aca mentsbocá y cruzocana matastjango ca!”

31 Cachá chě bachnangbe aměndayěnga y chě ley abuátambayěnga imojtsáboyejuana, y chěnga imojtsenatsětnaye: “Cha ínýenga tojěftsatsebacá, pero cachá jěntsbecama ndoñe quenátobena.

32 ¡Chě Cristo, chě Israeloca Rey! ¡Cruzocana chauatastjango, běnga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

*Jesús tojanóbana**(Mt 27.45-56; Lc 23.44-49; Jn 19.28-30)*

33 Njëtsto orscana y las treséntscoñe, njëts quem luare yojtseibétata.

34 Chca orna, Jesús chabe biyañe tojanáyebuachena: “Eloi, Eloi, ¿lema sabac-tani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

35 Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechem-buana ca.”

36 As chora, canya tojanótjajo, untja vínoyeca canye esponjêshe tojanfchecuacuá, canye niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátëštjanguama ca.”

37 Pero Jesusna, jabuache tojanoyó y tojanóbana.

38 Y chë Bëngbe Bëtsabe bëts yebnoca vojújonýana entšëjua tsëntsaca yot-senájataye, tsbanánocana fshantsoye. Chëjua bënëjua inauamna y chë tsatsëntsaca inaujonýana.

39 Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¿Ndegombre quem boy-abása Bëngbe Bëtsabe Uaquiñá yomna ca!”

40 Básefta shembásengnaca chentše imojtsemna, bënocana imojtser-reparana; chënguentše imojtsemna María Magdalena; María, Santiago chë más basa y Josebe mamá; y Salomé.

41 Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

*Jesús tmojanatbontsá**(Mt 27.57-61; Lc 23.50-56; Jn 19.38-42)*

42 Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora,

43 Pilato yojtsemnoye tojána canye boyabása, José ca uabainá, Arimatea pueblócá; cha inamna canye chë luarentša uámana mandayënguentšá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Nduatjácá Pilátbioye Jesusbe cuerpo tbojanotjañe.

44 Pilato yojenjnaná Jesús tša betscó yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tay-ójësemnana.

45 Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama.

46 Chora, José canye uafjantse lino entšëjua tojanabuamé, Jesusbe cuerpo cruzocana tbojanëštjango, chë lino entšëjuaca tbojanandmaná, y canye cuevëshiñe ndëtšbeñe pormánëshiñe tbojanajó; chentšana canye ndëtšbé tojansjoná, y chë cuevëshoye amashjuanentše tojánachto.

47 María Magdalena y María, chë José y Santiagbe mamá, tbojáninýe ndayentše Jesusbe cuerpo tbojanájoma.

16

*Jesús tojtanayena**(Mt 28.1-10; Lc 24.1-12; Jn 20.1-10)*

¹ Ochnayté tojanopasá ora, María Magdalena, María Santiagbe mamá, y Salomé, botamana uanguëtse béjaye tmojanabuamé, chíyeca jama Jesusbe cuerpo janëtjuama;

² y tmenguse, chë semana bojatšéntena, cabá cachëse, shinÿe yojábocna ora, chë cuevëshoye tmojána.

³ Imojtsaye ora imojtsayénatsëtsnaye: “¿Chë cuevëshoye amashjuanentša ndëtsbé nda bochtsabuajuána ca?”

⁴ Pero imojontješiyे ora, tmojáninÿe chë cuevëshoye amashjuanentša bëts ndëtsbé, chentšana juanániñe.

⁵ As chënga choye tmojánamashjna y choye tmojáninÿe canÿe bobontse bën uafjantse entšéjua uichëtjoná, chë cuevëshentša catšbioica inétsotbemañe; y chë shembásenga imojouatjaná.

⁶ Pero chë bobontse tojanëyana: “Ndoñe matauatjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentse ndoñe quenátsmëna. Minÿenga cha enjëftsejajonentse.

⁷ Motsajna, y Pedro y chë inÿe uatsjëndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinÿe, ntšamo cachá tmojanëyancá ca.’ ”

⁸ As chë shembásenga betscó chë cuevëshentšana tmojésanbocana, er puerte auatjanánënga imojtsemna y ngmëmnyayënga imojtsemna; y chë causa, chë soyama ndocná tmonjaníyana.

*Jesús, María Magdalénbioye tbojánëbëbocna**(Jn 20.11-18)*

⁹ Jesús tojtanayenentšana, chë semana bojatšénté, Jesús natsana María Magdalénbioye tbojánëbëbocna. Tempo Jesús chábertšana canÿsëfta bacna bayëjenga tojtanëbuacana.

¹⁰ Cha Jesúsbioye ainá tbojáninÿentšana, tojána Jesúseftaca imojánajnënga chama jaúnayama; chëngna ngmënaca y sachénaca imojtsemna.

¹¹ Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninÿe ca tmojanuena ora.

*Uta ustonata Jesúsbioye tbojáninÿe**(Lc 24.13-35)*

¹² Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inÿa cuaftsemncá.

¹³ Chora chata tbojésanshëcona chë inÿenga chama jacúntama; pero chëngna cach ndoñe ndegombre ca tmojanjuabó.

Jesús chë uatsjëndayënga tojanichamó, Bëngbe Bëtsabe soyëngama nÿetsquénache jábuayenama

(Mt 28.16-20; Lc 24.36-49; Jn 20.19-23)

¹⁴ Cabana, Jesús chë bnëtsana canÿe uatsjëndayënga tojánëbëbuacna, chënga imojtsesaye ora; y tojanécácana chë cha ainá yojtsemnama ndoñe ndegombre yontsemna ca tmojánjuaboma y nÿets ainánaca chábeñe ndoñe

montsanošbuachema, er cha ainá tmojáninjënga chama tmojanacuntá ora, chca ndoñe ndegombre yontsemna ca chë uatsjëndayënga tmojánayana.

¹⁵ Chentšana Jesús tojanéyana: “Nÿets luarëngoye motsajna, y nÿetsca entšanga chë tšabe noticiëngama šmochtsabuayiyayae.

¹⁶ Nda chiñe chaojtsošbuaché y tšëngaftanga chašmojuabayae, cha atsbo-caná echántsemna; pero nda ndoñe tontsošbuaché, cha nÿets tempo castiganá echántsemna.

¹⁷ Chë átšbeñe ošbuáchiyënga ndegombre soyënga imojtsabuayiyayama, entšanga mëntšá mochántsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye.

¹⁸ Masque nderado cucuatšinë mëtscuayënga tmojishache o veneno tmojofšenga, ndocá quemochatšpása; y šoquëngbeñe cucuatšënga chamojacjá ora, chënga shnánënga mochántsatšmëna ca” —Jesús tojanéyana.

Jesús Bëngbe Bëtsábioye tojtaná

(Lc 24.50-53)

¹⁹ Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtóbema jtsemándayama.

²⁰ Y chë uatsjëndayëngna tmojánbocana y Bëngbe Bëtsabe soyëngama nÿetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjëndayënga bëtš soyënga jamama obenana chamotsebomnama cha jtsamëse.

San Lucas

Jabojátsama

¹ Ba entšanga Jesusbe historia tmojuábema, ntšamo bēngbeñe ndegombre tojopasacá.

² Chē historia juabemamna, chēnga tmojanuena ntšamo Jesusbe uatšjēndayēnga y inye entšanga chabiama immencuentaycá. Chē entšangna tmojáninye y tmojanuena ndayá Jesús tojanama y ntšamo tojanayancá, y chentšana chabe tšabe noticiēnga entšángbioye tmojanabuayená.

³ As, átsnaca sēnjontsé cuedádoca juanoticiāna lempe ntšamo Jesusbiana imojtsichamcá, tojanobojatšentšana mēntscōñe. Mora šontsinýana tšabá yojtsemna acbiama juabemana ntšamo ndegombre yomncá, uamana taitá Teófilo, chē tjuanoticiá soyēngama, ntšamo ndegombre bēngbeñe tojopasacá.

⁴ Ba soyēnga Jesusbiana tmojabuátēmbanga, y atše séntseboše aca chacotsetátsēmbō, ntšamo tcojouencá ndegombre yomnama.

Canye ángel tojanabuayená Juan chē Ubayaná jónýnama

⁵ Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uamana bachnangbe natsana amēndayá).

⁶ Chatna tšabá amata ibnamna Bēngbe Bētsabe bominýiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca.

⁷ Bāsenga tondaye ibonjánabamna, Isabel šešona jtsebomnama ndobena causa, y chatna ya bētsanánata ibojtsemna.

⁸⁻⁹ Chē bachnanga Bēngbe Bētsabe bēts yebnentše tmojtsošervena ora, sempre imojanamana jabocacayana, nda tšabá tbojtsonýená, Bēngbe Bētsábioye atschuanaye luaroye cháuama incienso jajuinýiyama. Canye, Zacaríasbe entšanga Bēngbe Bētsabe bēts yebnoca, Bēngbe Bētsábentše imojtsošervena orna, Zacaríasbioye tšabá ibojonýena; y chca, cha ibojotóca jana incienso jajuinýiyana.

¹⁰ Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye.

¹¹ Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catšbioica.

¹² Zacarías chábioye tbojáninye ora, tojanenjananá y corente uatjana tbojanábuache.

¹³ Chora chē ángel tbojaníyana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Ache shema Isabel canye šešona bohántsebmōna, boyabásetema, y chana Juan ca cochjuabaye.

¹⁴ Chama aca corente oyejuayá cochántsemna, y bētscá entšanga mochanjóyejuaye ache uaquiñá tojonýnama.

¹⁵ Er cha, Bēngbe Bētsabiana canye uamana entšá echántsemna. Ndocna te queochaisofsiye vínoye, ni jabuáchiye. Chē Uamana Espíritu chabe ainaniñe echantsemándaye, cha cabá ndonýna orscana.

16 Banga Israeloca entšanga, ntšamo cha chaojayanama mochanjontsé joyeunayana Bëngbe Bëtsá, chëngbe Utabná.

17 Cha echanjáshjango chë Bëngbe Bëtsabe Uámana Uabuayanabe natsana, y echántsebomma obenana y canye espíritu ntšamo chë Bëngbe Bëtsabe juabna oyebuambnayá Elías inabomncá. Chabe natsana echanjáshjango, bëtsétsanga chëngbe básengaftaca ndoñe chamondétsentsjanama, y chë nduauenanënga cachíne chamotsatsjuabnama ntšamo chë Bëngbe Bëtsabe bominiñe tsabá amënga mondbetsejuabnaycá. Y chca, entšanga cha echantsapróntaye Bëngbe Utabná jabama orscama ca —chë ángel tbojaniana.

18 As Zacarías chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bëtsemnama? Er atše ya bëtsëjema sëntsemna y atšbe shëmnaca cachcá ca.

19 Chora chë ángel tbojanuá: —Zacarías, atše ángel Gabriel sëndmëna; atše Bëngbe Bëtsábioca sëndoserverna. Cha šonjichmó chë tsabe noticiënga aca jauanama y juenayama.

20 Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojsemna ora, chora jóyeuambayama cochantobenaye ca.

21 Chë ángel Zacaríasefata yojtsoyeuambnantscuana, entšanga shjoca Zacaríasbiana imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?”

22 Zacarías tojtanbocna ora, ndoñe yontsobena chë entšángaftaca jóyeuambayana. Chënga tojánatšëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábiocana canye soye tojáninñama, er chëngbioye jatšëmbombonana yojáuyana, ndëbiá yojoquéda causa.

23 Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtana.

24 Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinñe cach tsoca yebnentše totanoquedá.

25 Cha mëntšá yojtsichamo: “Bëngbe Utabná mora atšbiana tojtenuabó, entšángbentše atšbe ngmënana jtsebojuánama, básenga tondaye béntsabamna causa ca.”

Canye ángel tojanabuayená Jesús jónñama

26 Isabel chnënguana ishinñe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye,

27 canye shembása María ca uabainá jauatsétsayama. Mariyna cabá boyabása nduabatmá inamna, pero Joséftaca jobouamayama tbojanšbuachená. Y Josena, rey Davídbentšana entšá inamna.

28 Chë ángel Maríybioye tojána y mëntšá tbojanchuá: —¡Mouena. Bëngbe Bëtsá tsabe bendición acbiana tonjama! ¡Bëngbe Utabná áaftaca entsemna ca!

29 Chca tojanuena ora, María yojenjaná chë soyama, y yojtsejuabnaye ndáyeca chë ángel chca tbojanчуama.

30 Chora chë ángel tbojaniana: —María, ndoñe matauatjana, Bëngbe Bëtsá entsama tsabe bendicionënga chacotsebomnama.

31 Aca ngomamaná cochanjoquéda y canye šešona boyabásetema cochántsebomma, y chana Jesús ca cochjuabaye.

³² Cha puerte echantsámana, y entsangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canýe rey bochanjábema, ntšamo David yojamncá,

³³ y Jacóbëbentšana entsanga nýetsca tescama echántsamëndaye, y chabe mándayana ndocna te queochaisopochóca ca —chë ángel tbojaniana.

³⁴ Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomñese ca?

³⁵ Y chë ángel tbojanjuá: —Chë Uámana Espíritu echanjabo nýets ábeñe, y Bëngbe Bëtsabe obenánaca ngomamaná cochanjoquéda. Chabe obenana mo jantšetëshcá cmochanjabouútsbotse; chíyeca chë echanjónýna šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma.

³⁶ Mouena, Isabel, acbe primá, canýe šešona bochántsebomna, masque ya bëtsananá cha entsemna; chë “šešona ndbomná ca” monjanabobuatmá, mora ya chñënguana ishinýe ngomamaná entsemna,

³⁷ er Bëngbe Bëtsá lempe jamama endobena ca —cha tojánayana.

³⁸ Chora María chë ángelbioye tbojaniana: —Bëngbe Bëtsabe oservená atše sëntsemna. Bëngbe Bëtsá átšeftaca chaoma ntšamo šcojauyancá ca.

Y chentšana chë ángel tojtsatanoñe.

María tojána Isabel jabuáchama

³⁹ Chentšana, María tojanoprontá y tojanochëmo canýe puebloye, Judeoca tjañenache luariñe.

⁴⁰ Chocna cha, Zacaríasbe yebnentše tojánamashëngo y Isabélbioye tbojanjuá.

⁴¹ Isabel ntšamo María tbojanчуama tojanuena ora, Isabelbe šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama.

⁴² Chcasna, Isabel jabuache tojánayana: —;Bëngbe Bëtsá acbiana más tšabe bendicionënga entsama nýetsca shembásengbiana, y chë cochántsebomna šešonbiámnaca cachcá!

⁴³ Atše merecido taitsatobuajoñe, atšbe Utabnabe mamá chašubobuáchama;

⁴⁴ er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó.

⁴⁵ ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

⁴⁶ Chora María tojánayana:

“Nýets ainánaca Bëngbe Utabná chantsadorana,

⁴⁷ y Bëngbe Bëtsá, atšbe Atsbocayabiana corente chanjóyejuaye.

⁴⁸ Bëngbe Bëtsá atšbiana tojtenojuabó, atše chabe oservénëjema.

Er morscana muentša entsanga nýetscanga puerte oyejuayá ca šmochantsábobuatma.

⁴⁹ Bëngbe Bëtsá, chë nýets obenana bomná, chabe obenánaca bëts soyënga atšbiana tonjama.

¡Bëngbe Bëtsá puerte Uamaná ca entsabaina!

⁵⁰ ¡Morsca entsanga y más chcoyënga, chábioye yeunanëngbiana, cha sempre bochántsengmena!

⁵¹ Cha, chabe obenánaca bëts soyënga tojama,

y chë nýe cachënga bëtsëtsanga enobiamnayëngbe juabna tojtsepochoá;

⁵² reyëngbioye chëngbe mándayentšana tojtsatsatše;

pero chë nÿe cachënga bëtsëtsanga ndenobiamnayëngbioye, uámanënga tojábiama.

⁵³ Chë shëntseca imomnëngbioye, chamosama bëtsá cha tojatšatá, pero chë bomnëngbioyna tondaye tonjatšatá.

⁵⁴ Cha tojanëjabuache chabe entšanga Israeloca, chabe oservënënga, y ndoñe tbonjánebnatjëmbe jtsalastemánana,

⁵⁵ nÿetsca tescama chë Abraham y chá bentšana entšángbioye, ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

⁵⁶ Mariyna unga ishinÿe Isabéaftaca tojanoquedá, y chentšana cachabe yebnoye tojtaná.

Juan chë Ubayaná tojanonÿná

⁵⁷ Isabel jtsesócanama tojanóntsabuache ora, canÿe šešona boyabásetema tojanonÿná.

⁵⁸ Isabelbe juachañe oyenënga y chabe pamíllanga tmojánatšëmbona ntšamo Bëngbe Bëtsá chábioye ibojalastemama, y chama corente Isabéaftaca tmojanoyējuanga.

⁵⁹ Chë šešona posuftayté yojtsebmna ora, tmojánashjango y chëtémbioye chë más delicadentše base bobachtema tmojantéše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá;

⁶⁰ pero chabe mamá tojanëyana: —Ndoñe. Quem šešona echantsabaina Juan ca.

⁶¹ As chënga Isabébioye tmojanianyana: —Acbe pamíllangbeñe ndocná chca quenatabaina ca.

⁶² Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca.

⁶³ Zacaríasna jatšëmbombonana canÿe tablëbé tojanëyá y chiñe tojanábema: “Cha entsabaina Juan ca”. Y chë causa, nÿetscanga ojanánënga imojtsemna.

⁶⁴ Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana.

⁶⁵ Chë juachañe oyenënga nÿetscanga tmojanëuatjaná, y Judeoca nÿetsca chë tjañenache luaríne entšanga chë soyëngama imojtsencuéntaye.

⁶⁶ Nÿetscanga chë soyëngama tmojánatšëmbona ora, chëngnaca corente chama imojtsejuabnaye y mëntsá imojtsichamo: “¿Chë bássetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

Zacarías, Bëngbe Bëtsábioye jëtschuayama

⁶⁷ Chë Uámana Espiritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntsá tojánayana:

⁶⁸ “¡Chë Utabná, chë Israeloca entšangbe Bëtsá matschuanga, er cha tonjajo chabe entšanga jabújabuachama y jabátsebacama!

⁶⁹ Cha tobanjíchmuua canÿe atsebacyá puerte obenana bomná, y cha echántsemna Bëngbe Bëtsabe oservená Davídbentšana entšá;

⁷⁰ ntšamo Bëngbe Bëtsá bayté entsemna, chë chabe juabna oyebuambnayëngbiajana,

chë chábinga imomnëngbiajana bënga šojanašebuachenacá, mëntsá:

71 Cha canya bochjanichmuá bēngbe uayayēnga y n̄yetsca uaboyēnjēngbiama bēnga jabátsebacama;

72 bēngbe bētsētsangbiolye jálastemama,

y jenójuaboyama y jamama chabe uámana trato,

73 ntšamo Bēngbe Bētsá, bēts taitá Abrahámbyolye tbojansbuachenacá.

74 Cha tbojansbuachená bēngbe uayayēngbiama bēnga jabátsebacama,

chca, bēnga ndauatjá Bēngbe Bētsá jaserviama,

75 y chabe entšangcá, n̄yetsca soyēnguiñe tšabá amēnga, Bēngbe Bētsabe delante n̄yetsca te bēngbe vidēnguiñe jēftsiyenama.

76-77 Y aca, atšbe hásetemna, Bēngbe Bētsabe juabna oyebuambnayá ca cmochantsábobuatma,

entšangbiolye Bēngbe Bētsabe soyēngama cochtsabuayiynama,

Bēngbe Utabná cabá ndáshjango ora, bacna soyēnga amana chamuajbanama;

as Bēngbe Bētsá chēngbe bacna soyēnga echanjáperdonaye, y Bēngbe Utabná jabama mochantsopróntaye.

78-79 Bēngbe Bētsá bēnga puerte šualastemánayeca,

canya bēngbe juabnēnga bin̄ynayá bochanjíchmuá,

bēnga chē bacna soyēnga causa mo ibetiñcá y obanēngbe luarentšcá vida bomnēngbiolye jabátsebacama,

y jabaúambama ntšamo natjēmbana jtsiyenana ca” —cha tojánayana.

80 Chē hásetema yojontsé jobóchana y chabe espírituca puerte. Bayté, entšanga ndoyena luarēnguenache cha yojēftsiyena, Bēngbe Bētsá Israeloca entšangbiolye cha tojánin̄yan̄yentscuana. Chentšana, chamuábuatmanamna tojanontsé Israeloca entšangbeñe jóyebuambayana.

2

Jesucristo tojanon̄yná (Mt 1.18-25)

1 Chē tempo yojamna canye Romoca bēts mandado, Augusto ca uabainá; y cha, chē natsanama tojanmandá n̄yetsca entšanga chamuenábemama.

2 Chē soye tojanochñēngo Cirenio ca uabainá Siroica mandado yojamna ora.

3 Chamna, n̄yetscanga tojanotocá jtangana jenábemēngama, cada ona ndēmoca chēngbe bēts taitanga imojēftsiyena puebloye.

4 As, Joséna Galilea luarentšana Nazaretocana yojēftsebozna y Judeoye, Belén puebloye, tojtaná. Tempo, Josebe bēts taitá rey David, Belenoca inoyena. Y José, Davidbentšana entšá inámmayecna, choye jenábemama tojtaná.

5 Maríaftaca tojána jenábemama, y muana tbojansbuachená Joséftaca jobouamayama. María ngomamaná yojtsemna,

6 y Belenoca ibojtsemnēntscuana, chē ora tbojanóntšabuache jtsešócanama.

7 Y chentse María ibojtsebozna chabe natsana šešona, canye boyabásetema. Posadoca tondaye luare yontsemna causna, chata n̄ye uacnēngbe átana tambuentše tbojanoquedá. Y Jesús tojanon̄yná orna, María tbojtantēntsacjuá y canye bachetēmiñe tbojanajájó.

Chē angelotémēnga y chē oveshēnga abujājēnyānga

8 Belén béconana, chē ibeta, oveshēnga abujājēnyānga shēntsjoca cachēngbe oveshēngaftaca imojtsemna.

⁹ Nye ndeolpe, Bëngbe Bëtsábiocana canye ángel tojánebëbuacna, y Bëngbe Bëtsábentsana corente yojtsebuashinÿinÿyana chëngbe shëconániñe. Chama chënga puerte imojocochauatjaná.

¹⁰ Chora chë ángel tojanëyana: “Ndoñe matauatjëngana. Sënjabo tšabe soyënga tonjopasama jábuayenama, nÿetscanga chamóyejuama.

¹¹ Mora chë David tojanonÿná pueblentse canye šešona tonjonÿná. Cha tšëngaftangbe atsebacyá echántsemna y tšëngaftangbe entsangbiámna. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná.

¹² Ndegombre chca entsemnama mëntšá šmochanjátatsëmbona: canye šešona ntsacjuaná y uacnëngbe bachetémiñe jajoná šmochanjÿyena ca” —cha tojanëyana.

¹³ Cachora, celocana mallajta angelënga chë natsana ángelbentse tmojánbocana y Bëngbe Bëtsábioye mëntšá imojtsatschuanaye:

¹⁴ “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiana, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

¹⁵ Chentšana chë angelënga celoye tmojésanshëcuana. Y chora chë oveshënga abujëñyanga tmojanontsé jeniyanana: “Belenoye cuajna, chë quem tojopasá soye jinÿyama. Ndegombre, Bëngbe Bëtsá chë soye šojanÿanyé ca.”

¹⁶ As betscó tmojána y tmojánanyëna María, José y chë šešonatema bachetémiñe jajoná.

¹⁷ Chë šešona tmojáninÿe ora, chënga tmojanacuntá Jesusbe bëtsëtsata y chë inÿyëngbioye, ntšamo chë šešonbiana chë ángel tojanëyancá.

¹⁸ Nÿetscanga chë tmojanuenënga tmojanenjaná ndayá chë oveshënga abujëñyanga imojtsacúntama.

¹⁹ Pero Mariyna nye cachabe ainanoca quem soyëngama más bën inétsenjuabnañe.

²⁰ Chentšana, chë oveshënga abujëñyanga tmojtaná Bëngbe Bëtsá atschuanaye, ndayá tmojáninÿyama y tmojanuenama. Nÿetšá tojanopasá lempe ntšamo chë ángel tojanëyancá.

Bëngbe Bëtsabe bëts yebnoye Jesús tmojanamba

²¹ Posufta te tojánashjache ora, chë basetémbioye chë más delicadentse base bobachtema tmojantëtše, Bëngbe Bëtsabe entsá bëtsemnama chaotsinÿyama, ntšamo judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

²² Y chë tempo tojanóshjango, ndaye ora José y María yojtsamna jamana ntšamo Moisesbe leyinÿe uyayancá, ndayá jamama yojanmëncá, canye shembása Bëngbe Bëtsabe delante tšabia jtsatsmënama, canye šešona tbojtsebomnentsana. Asna, Jerusalenoye tbojánata y chë bāsetema tmojanamba, Bëngbe Bëtsabe bëts yebnoca jinÿinÿiyama,

²³ ntšamo chë Bëngbe Utabná Moisésbioye tbojaninÿe leyënguñe uyayancá, mëntšá: “Canye yebnentse chë natsana šešona boyabása tojtsemnëna, Bëngbe Bëtsábioye cha jinÿinÿiyana chábioye chabotseservënama ca.” Chcasna, chë bāsetema Bëngbe Bëtsabe bëts yebnoye tmojanamba.

²⁴ Y tmojanamba janshana uta shloftse, Bëngbe Bëtsá jëtschuayama, ntšamo Bëngbe Utabnabe leyinÿe yomandancá. Chiñe mëntšá endayana: “Chë natsana šešona chaojonÿná ora, boyabāsetema tojtsemnëse, janshana

šmochjuamba uta fchetnatémata o uta šešona palomatémata, Běngbe Bětsá jětschuayama ca.”

²⁵ Jerusalenoca inamna canye bacó, Simeón ca uabainá; cha inamna nyetsca soyěnguiñe tšabá amá, y yojaniyena ntšamo Běngbe Bětsá yomandacá. Cha yojanobátmana chě tempo ndaye ora, Běngbe Bětsá bochjanichmuá canya Israeloca entšanga cháuatsebacama. Y chě Uámana Espiritu chabe ainaniñe yojtsemna;

²⁶ chíyeca, cabá lempe chca ndopása ora, cha yojtsetátšěmbo cha ndoñe yochjanóbanama, chě Běngbe Bětsabe Uámana Uabuayaná ntjětsinýcá.

²⁷ Chě Uámana Espiritu tbojanmandáyeca, Simeón Běngbe Bětsabe běts yebnoye tojána; y Jesusbe bětsětsata chě bášetema tmojanamba ora, ntšamo Moisesbe leyiñe iuayancá chabiama jamama ora,

²⁸ Simeón tbojanocutsá y Běngbe Bětsábioye tbojtanchuá. Cha měntšá tojánayana:

²⁹ “Běngbe Utabná, mora šmoleseñciá, atše acbe oservená natjěmbana jóbanana,

er ya tconjama ntšamo šconjanšbuachenacá;

³⁰ atše chě entšangbe Atsebacayá sěnjinye.

³¹ Aca cha tcojichmó nyets luarenache entšangbiama.

³² Cha chě ndoñe judiěngbe juabněnga binýnayá echántsemna;

y chábeyeca, nyets quem luarentše mochanjátatsěmbona, chě acbe entšangbiama, Israeloquěngbiama ca” —cha tojánayana.

³³ José y María ibojenjanata ntšamo Simeón Jesusbiama yojtsichámuama.

³⁴⁻³⁵ Chentšana, Simeón Běngbe Bětsábioye tbojanimpadá tšabe bendicioněnga chata chabotsebomnama chaomama; y María, chě Jesusbe mamábioye tbojaniyana: “Quem soyěnga corente cmochanjacochtsetšenaná, mo ainana espadějaca cuafjeněchněngcá. Cha Israeloca banga echanjápochoyaye y banga echanjátsebacayey; y chca, ntšamo banga ainaniñe imojuabnacá echantsótatsěmbo. Israeloca banga quem bášetema mochantsábotena y chabe palabrěngnaca ca” —cha tbojaniyana.

³⁶ Chěntšnaca yojtsemna canye shembása Běngbe Bětsabe juabna oye-buambnayá, Ana ca uabainá; cha yojamna Fanuelbe bembe y Aserbe pamil-lentšá; ya bětsananá cha inamna. Nye canýsěfta uata cha yojěftsebouamna;

³⁷ y chabe boyá tojanóbanentšana, cha posufta bnětsana y canta uata viudá inamna. Ndocna te Běngbe Bětsabe běts yebnentšana yonjábocana, y chentše tojanokedá bněté y ibeta, Běngbe Bětsáftaca encuěntaye y cha atschuanaye; y chama, ba soye yojanamana tondaye ntjascá jtsemnana.

³⁸ Simeón, María y Josébioye yojtsětsětsnaye ora, Ana chěngbioye yojbeconá, y chě Atsebacayá tojanonýnama Běngbe Bětsábioye tbojtanchuá chentšana, Jerusalenoca entšangbioye, chě canye atsebacayá Israeloca entšangbiama imojanobatmaněngbioye tojaněyana, chana Jesús yojtsemna ca.

Jesús Nazaret puebloca

³⁹ José y María lempe ntšamo chě Utabnabe leyěnguiñe iuayancá tbojanma ora, Galilea luaroye tbojtanata, cachěngbe puebloye, Nazaretoye.

⁴⁰ Y chě bášetema yojtsobóchayey, y más añemo yojtsejacana y más osertánana yojtsebomna. Y Běngbe Bětsá yojánama cha bětscá tšabe bendicioněnga chaotsebomnama.

Jesús Bëngbe Bëtsabe bëts yebnoca

⁴¹ Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta.

⁴² Jesús bnëtsana uta uata tojánashjache ora, Jerusalenoye tmojána, ntšamo imojanamancá.

⁴³ Chë fiesta tojanopochocá chentšana, chabe bëtsëtsata yebnoye ibojstaye, y chata ntsetatšëmbcá, Jesusna Jerusalenoca vojtsoquedañe.

⁴⁴ Chata ibojëtsejuabnaye Jesús chë inye entšángaftaca vojtsataboye ca; chcasna, canye te nÿetšá benachëjana tbojánata ora, tbojanontsé chabe pamíllangbeñe y ubuatmëngbeñe jtsenguanguana,

⁴⁵ pero ndoñe ibonjobenaye jtsinÿenana. As, chata chora Jerusalenoye tbojësanshëcona choca cha jetsenguanguama.

⁴⁶ Unga tianoye chata tbojanobená Bëngbe Bëtsabe bëts yebnentse cha jetsinÿenana. Chana chë Moisesbe ley abuátambayëngbe tsëntsaca inëtsofbemañe, chëngbioye inayaunana, inatjanaye.

⁴⁷ Nÿetsca ouenanënga imojtsenjnanaye Jesús tša osertaná inamnana, y tša tsabá jojuama cha vojtsobenama.

⁴⁸ Chabe bëtsëtsata chca tbojáninÿe ora, chátnaca ibojenjaná. Chora, chabe mamá tbojanianaya: —Uaquiñá, ¿ndáyeca chca bëndátaftaca tcojama? Taitá y atse corente enócochinÿenata cbondënguá ca.

⁴⁹ As Jesús tojanëyana: —¿Ndayeca atse šmonguá? ¿Ndoñe šondëtatšëmbo atse šomna atšbe Taitabe yebnentse jtsemnana ca?

⁵⁰ Pero chë bëtsëtsata ndoñe tonjanësertá ntšamo cha tojanëyancá.

⁵¹ Chentšana Jesús chë bëtsëtsataftaca Nazaretoye tojtaná y chata vojtsayaunana. Y chabe mamana nÿe cachabe ainanoca chë soyëngama más bën inëtseñojuabnañe.

⁵² Jesús vojtsobóchaye y más juabna vojtsobomna; y Bëngbe Bëtsá y nÿetsca entšanga corente oyejuayënga chabiamana imojtsemna.

3

Juan chë Ubayaná entšanga yojanabuayiyiná

(Mt 3.1-12; Mc 1.1-8; Jn 1.19-28)

¹ Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey.

² Anás y Caifás chë bachnangbe más uámana amëndayata ibojamna. Cach tempo, canye luare entšanga ndoyenentšë Bëngbe Bëtsá tbojanatsëtsá Juánbioye; Juan, Zacaríasbe uaquiñá.

³ As Juan nÿetsca luarënguëjana Jordán bėjaye béconana tojánachnëngo, entšanga mënšá utsëtsnaye: “Tšëngangbe bacna soyëngama ngmënaca šmochtënojuaboye, chca amana šmochtsajbaná y Bëngbe Bëtsabe benache šmochtishache. Chora chochjúbaye, y Bëngbe Bëtsá tšëngangbe bacna soyëngama cmochanjáperdonaye ca.”

⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe vojëftsabemcá. Cha mënšá tojanábema: Entšanga ndoyena luaroca canya enduáyebuache:

“Bëngbe Utabná echanjabo ca; mo nda canye benache tojtseprontacá canye uámana entśá jashjanguama, cachcá, tšëngaftángnaca, Bëngbe Utabná jabama ainanentse tšabe juabnëngaca šmochtseprontana.

⁵ Nýetsca jachañe echantojútjia, y tjañe y batsjabenga mochantenájachibiaye. Chë scundma benachënga ndríchëjënga echántsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canye benache japróntana canye rey cháuashjanguama, tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

⁶ Y nýetsca entśanga mochanjinye chë Atsebacayá Bëngbe Bëtsábentšana jabana ca” —cha tojanábema.

⁷ Chë entśanga Juan chaubáyama imojánbocana ora, Juan yojanëtsëtsnaye: “¡Mëtšcuaye entśanga! ¿Nda tcmënjáuyana chë echanjóshjango uabouana castigüentšana šmochjotsbocá ca?

⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinýna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiama jayanama: ‘Bëngna Abrahámbentšana entśanga, Bëngbe Bëtsabe entśanga fsëndmëna ca’. Er atše chanjayana, Bëngbe Bëtsá quem ndëtšbëngacnaca Abrahámbentšana entśanga nanjábiam.

⁹ Tatśniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

¹⁰ —¿Y as, ndayá jamama šojtsamna ca? —chora chë entśanga tmojantjá.

¹¹ Y Juan tojanëjua: —Chë uta quëfsaiya uabomná bontsemna canýiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

¹² Romocama entśángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

¹³ Y Juan tojanëyana: —Nye ntšamo chë leyíñe yomandancá entśángbioye crocénana šmochtsayëngacaye ca.

¹⁴ Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanëyana: —Ndocnábioye tondaye šmatjáboca, ni jauátjanase, ni nye ndayámna bonamente jobuáchëse; y nye ntsachetśá šmacaná crocénana oyejuayënga šmochtsomñe ca.

¹⁵ Entśanga chë Bëngbe Bëtsabe Uámana Uabuayanabiam imojtsobátmana, y chëngna Juanbiam imojëtsejuabnaye nderado cha chë Bëngbe Bëtsabe Uámana Uabuayaná nanjamna ca;

¹⁶ pero Juan tojanëyana: “Ndegombre, atše béjayeca cbondubáyana. Pero chë echanjabá atšbiam corente más obenana endbomna, y atše merecido taitsatobuajoñe ni mo jorsejbiyana chabe shecohëtjonëshentśa corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháuamashënguama. Pero chë ndoñe chamontishachëngbiama, Bëngbe Bëtsá

echanjama chë echanjabábeyeca, chënga corente castigánënga chamotsem-nama, mo ñesheshequécá.

¹⁷ Canye entśá chabe mëtśtá cucuatśiñe jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcñaye tsañe jtsabuájuana, y chë ndoservena shácuanëngna ñeshoye jtsatmetśana. Cachcá, chë átśbentsana echanjabá, chë tśabe entśanga echanjúbuaja, y chë bacna entśangna ñeshiñe echantsacastígaye, y chë ñe ndocna te queochátsfsana ca” –cha tojanëyana.

¹⁸ Chca y ñyë palabréngaca Juan chë tśabe noticiëngama yojanabuayiyná.

¹⁹ Tempo, Juan Heródesbioye tbojanácacana, cha tojanobouamama cachabe catśata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y ñyetsca bacna soyënga Herodes tojanmámnaca.

²⁰ Pero Herodes Juánbioye joyeunaye luariñna, cabá ñyë más bëts bacna soye tojátanma: Juánbioye cárceloye tbojtsanëtame.

Juan, Jesúsbioye tbojanabaye

(Mt 3.13-17; Mc 1.9-11)

²¹ Pero Herodes Juánbioye cabá ndutame ora, Juan ba entśanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo,

²² y chë Uámana Espíritu mo canye palomatemcá Jesúsbioye yojtsastja-juana; y celocana Bëngbe Bëtsá tbojanianana: “Acna atśbe bonshana Uaquiñá condmëna. Acbiama corente sëntsoyejuá ca.”

Jesube bëts taitanga

(Mt 1.1-17)

²³⁻³⁸ Jesús unga bnëtsana uata yojtsebomna, entśángbeñe Bëngbe Bëtsabe soyëngama jýebuambayama yojontśé ora. Entśanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaiibe uaquiñá.

Nagai yojamna Maatbe uaquiñá,

Maatna Matatíasbe uaquiñá.

Matatías Semeibe uaquiñá,

Semei Joseche uaquiñá

y Josec yojamna Judabe uaquiñá.

Judá yojamna Joananbe uaquiñá

y Joanán Resabe uaquiñá.

Resa Zorobabelbe uaquiñá,

Zorobabel Salatielbe uaquiñá,

y Salatielna Neribe uaquiñá yojamna.
Neri yojamna Melquibe uaquiñá,
Melquí Adibe uaquiñá.
Adi Cosambe uaquiñá,
Cosam Elmadambe uaquiñá,
y Elmadamna yojamna Erbe uaquiñá.
Er yojamna Jesusbe uaquiñá
y Jesús Eliezerbe uaquiñá.
Eliezer Jorimbe uaquiñá
y Jorimna Matatbe uaquiñá.
Matat yojamna Levibe uaquiñá,
Leví Simeonbe uaquiñá
y Simeón Judabe uaquiñá.
Judá Josebe uaquiñá,
José Jonambe uaquiñá,
y Jonamna yojamna Eliaquimbe uaquiñá.
Eliaquim yojamna Meleabe uaquiñá,
Melea Menabe uaquiñá.
Mena Matatbe uaquiñá,
y Matata yojamna Natanbe uaquiñá.
Natán yojamna Davidbe uaquiñá,
David Isaíbe uaquiñá
y Isaína Obedbe uaquiñá.
Obed Boozbe uaquiñá,
Booz Salabe uaquiñá
y Sala yojamna Naasonbe uaquiñá.
Naasón yojamna Aminadabëbe uaquiñá,
Aminadab Adminbe uaquiñá
y Admin Arnibe uaquiñá.
Arni Esrombe uaquiñá,
Esrom Fáresbe uaquiñá
y Fáresna yojamna Judabe uaquiñá.
Judá yojamna Jacobëbe uaquiñá,
Jacob Isaacbe uaquiñá
y Isaacna Abrahambe uaquiñá.
Abraham Tarebe uaquiñá
y Taré yojamna Nacorbe uaquiñá.
Nacor yojamna Serugbe uaquiñá,
Serug Ragaube uaquiñá
y Ragauna Pelegbe uaquiñá.
Peleg Heberbe uaquiñá,
y Heber yojamna Salabe uaquiñá.
Sala yojamna Cainanbe uaquiñá,
Cainán Arfaxadbe uaquiñá
y Arfaxadna Sembe uaquiñá.
Sem Noebe uaquiñá
y Noé yojamna Lamechebe uaquiñá.
Lamec yojamna Matusalenbe uaquiñá,
Matusalén Enoche uaquiñá

y Enocna Jaredbe uaquiñá,
 Jared Mahalaleelbe uaquiñá,
 y Mahalaleelna yojamna Cainanbe uaquiñá,
 Cainán yojamna Enosbe uaquiñá,
 Enós Setbe uaquiñá,
 Set Adanbe uaquiñá
 y Adán Bëngbe Bëtsabe uaquiñá.

4

Jesús tojanobená Satanás jayëñjanama

(Mt 4.1-11; Mc 1.12-13)

¹ Juan, Jesúsbiye tbojanabáyentšana, chë Uámana Espíritu Jesusbe ainaniñe yojtsemándaye. Jesús Jordán bejayoicana tojtaná y chë Uámana Espíritna entšanga ndoyena luaroye tbojanánatse.

² Chentše canta bnëtsana te tbojanjétana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

³ Chora Satanás tojesanabo y tbojanianyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

⁴ As Jesús tbojanjuá: —Bëngbe Bëtsabe uabemana palabrenguiñe mëntšá endayana: “Entšá nÿe tandëseca ndoñe vida ntsebomnana ca.”

⁵ Chentšana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿe.

⁶ Chora Satanás tbojanianyana: —Atše nÿets obenana cbochjátsetaye y lempe quem amëndayëngbenache yobinÿna soyëngnaca. Atše lempe chca sëmjóyëngacñe y sëntsobena jatšetayama nda stebošábioye.

⁷ Aca chacojoshëntsamentšé y chašcojadorase, lempe nÿetsá acbiama echántsemna ca.

⁸ Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ache Bëtsá, chë Utabná cochtsadorana y nÿe cha cochtseservena ca.”

⁹ Chentšana, Satanás Jerusalemoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojanianyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja,

¹⁰ er Bëngbe Bëtsabe uabemana palabrenguiñe endayana:

Bëngbe Bëtsá chabe angelënga echanjichamuá, chacmotsinÿenama.

¹¹ Chënga buacuatšëngaca cmochanjishache, shecuatše ndocá ndëtsbeñe chacondomama ca —cha tbojanianyana.

¹² Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacoçhënguama ca.”

¹³ Cabana, Satanás tojanajbaná bošana Jesúsbiye bacna soyëngama jacoçhënguama, y bënama Jesús bentsána tojtanojuánañe.

Jesús tojanontšé Galileoca chabe trabajo jamana

(Mt 4.12-17; Mc 1.14-15)

¹⁴ Chentšana, Jesús Galileoye tojesaná chë Uámana Espíritbe obenánaca, y nÿetsca entšanga chë luariñe chabiama imojtsencuéntaye.

¹⁵ Jesús yojtsabuátambaye chë judiëngbe enefjuana yebnënguenache, y nÿetscanga cha imojtsatschuanaye.

Jesús Nazaret puebloa
(Mt 13.53-58; Mc 6.1-6)

¹⁶ Chentšana Jesús Nazaretoye tojtanashjango, chë pueblentse cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualiama.

¹⁷ Chë Bëngbe Bëtsabe juabna oyebuambnayá Isaiásbe librëša tmojaninyé chauliama. Chë librëša yojutëfjona orna, tojáninjëna mëntšá uábemanentše:

¹⁸ “Chë Utabnabe Espiritu átšeftaca entsemna,

er atše uabuayaná stsemna chë Bëngbe Bëtsabe tšabe noticiënga chë ndomnëngbeñe jóyeuambayama.

Cha sonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínynama;

jamama chë ínÿengbe causa imosufrínënga, tempcá cachcá tšabá chamot-satsmënama;

¹⁹ y entšanga jáuyanama ndëmua ora chë Utabná chabe entšanga yochjatsebacye ca.”

²⁰ Jesús jualiama tojanpochocá y chora chë uajabuachanábioye chëša tbojtaniyé y tojtanoíbema. Nÿetsca entšanga chë enefjuana yebnentše imojtsemnënga Jesúsbioye imojtsobuáuatja.

²¹ Chora Jesús tojanontšë mëntšá jayanana: —Camënté tšëngaftangbeñe tonjopasá ntšamo quem librëšañe uabemancá ca.

²² Nÿetscanga Jesusbiana tšabá imojtsencuëntaye y ojnánänënga imojtsemna tša botamana cha yojtsoyeuambnana. Y chënga imojtsentjanaye: —¿Quem boyabása ndoñe Josebe uaquiña yondmëna ca?

²³ Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojanëyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

²⁴ Y cachora Jesús más tojanoyebuambá, mëntšá: “Ndegombre chëyana, ni canÿe Bëngbe Bëtsabe juabna oyebuambnayábioye cachabe pueblentše tšabá quematonÿá.

²⁵ Ndegombre chëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nÿetšá ndoñe tonjanafté y bëts shëntsana chë luariñe yojtsebinÿna.

²⁶ Pero Bëngbe Bëtsá, Elíasbioye ndoñe tbonjanichmó ni mo canÿe Israelentša viudábioye, y aiñe tbojanichmó ínÿoye, Sarepta ca uabáinoye, Sidón béconana, canÿe chentša viudábioye.

²⁷ Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canÿa chentša šocábioye tbonjanshná, pero aiñe canÿe šocábioye, Naamán ca uabainá, cach bacna nguayanánaca, Siriocá ca” —cha tojánayana.

²⁸ Chë judiëngbe enefjuana yebnentše imojtsemna entšanga chca tmojanuena ora, puerte tojánetëna.

²⁹ As, chora chënga tmojantsbaná, chë pueblentsana Jesús imojtábocna y más tsjuanoye canýe peñëšëjana imojuánatse. Chënga imojanajebna cach peñëšiñe, y chë entsanga imojtseboše Jesús chocana jtsajuatsëntšana.

³⁰ Pero Jesusna chëngbe tsëntsajana tojánachëngo y ínýoye tojtsanoñe.

Jesús, bayëjbe juabna cánýabioye tbojanbojuaná

(Mc 1.21-28)

³¹ Chentsana, Jesús cach Galileoye tojesaná, Capernaum puebloye, y choca tojanontsé, chë ochmayté, chë judiëngbe enefjuana yebnentse entsanga jabuátambana.

³² Entsanga imojtsenjnanaye ntšamo Jesús yojtsabuátambama, er chamna mo canýe mando bomnacá yojtsóyebuambnaye.

³³ Chë enefjuana yebnentse, canýe boyabása bacna bayëja uambayá yojtsemna, y chabe causa chë boyabása tojanontsé mëntsá uayebuáchana:

³⁴ —¡Cachcá šmonýá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

³⁵ Chora Jesús chë bacna bayëjbioye tbojtsanácacana y tbojaniyana: — ¡lytëca móbema y chábentsana maisebocna ca!

As chora chë bayëja entsanguentse chë boyabásabioye tbojanshajayé, y ndocá ntjëftsemcá chábentsana yojésebcna.

³⁶ Chë soyama nýetsca entsanga imojénjanaye y mëntsá imojtsenatsëtsnaye: “¡Tša chca palabrénga! ¡Quem entsá mandayacá y obenacá chë bayëjenga entsamënda, y chënga montsaisebocana ca!”

³⁷ Y Galileoca nýetsca pueblënguñe Jesusbiana yojtsótatšëmbo.

Jesús, Simón Pédrëbe uambén mamábioye tbojanshná

(Mt 8.14-15; Mc 1.29-31)

³⁸ Chentsana, Jesús chë judiëngbe enefjuana yebnentšana tojëftsanbocna y Simonbe yebnentse tojánamashëngo. Simonbe uambén mamá šocá inajájona jabuache calentóraca, y chë chentse imojtsemna entsanga chabiana Jesúsbioye tmojanimpadá.

³⁹ Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Mc 1.32-34)

⁴⁰ Shinýe yojuenatjëmba ora, banga inýe y inýe šocana bomnënga Jesúsbioye tojanënatse, y cha nýetsca šoquëngbeñe cucuatšënga tojanajó y tojanashná.

⁴¹ Chora, ba šoquëngbentsana bacna bayëjenga imojtsaisebocana y mëntsá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtsécacana y ndoñe tonjanalesenciá chamóyebuambama, er chë bayëjenga imnatátšëmbo cha chë Cristo bëtsemnama.

Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiyná

(Mc 1.35-39)

⁴² Yëfsana tojanbinýna ora, Jesús chë pueblentsana tojëftsanbocna, y canýe luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashajjna. Chënga imojétseboše Jesús cach pueblentse chaotsoquedáñama,

⁴³ pero Jesús tojanéyana: “Atše šontsemna chë tšabe noticiënga Bëngbe Bëtsabe amëndayama inÿe pueblënguenáchnaca jábuayenana. Chama Bëngbe Bëtsá sonjichmó ca.”

⁴⁴ Y chentsana, Jesús yojánana Bëngbe Bëtsabiama entšángbioye abuyaiynaye, chë judiëngbe enefjuana yebnënguenache Judeoca.

5

Canÿe te mallajta beonga ashebuánaye te

(Mt 4.18-22; Mc 1.16-20)

¹ Canÿe te, Jesús, Genesaret ca uabaina uafjajónaye tsachañe yojtsemna ora, ba entsanga tmojánashjajna, y chënga tša imojtsenajuatsëntšnaye Bëngbe Bëtsabe palabra jouenama.

² Jesús, chë uafjajónaye tsachañe bécoñe tojáninÿe uta ena barquësha; chë beonga ashebuánayëngna barquëshanguentsana tmojëftsanbocna atarraiëshangá jetsáboshabiama.

³ Jesús canÿe barquëshañe tojánamashëngo; chësha Simónbesha inauamna. Chora Simónbioye mëntsá tbojanianyana: “Quem tsacháñentšana chcoye mëyamba ca.”

⁴ Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojanianyana: —Shbuatsëntsoye barquësha mëyamba y tšëngaftangbe atarraiëshangá smochjushbuetše, beonga jashebuáyama ca.

⁵ Pero Simón tbojanjá: —Buatëmbayá, nÿets ibeta fsëndanguá y ton-daye chibiátashebuaye. Pero aca chca tcjayánayecna, cachiñe atarraiësha chantëtëshbuetše ca.

⁶ Tmojanëshbuetše orna, bëtsca beonga tmojánishëche y chëngbe atarraiëshangá tojanontsé jtsatanëcanana.

⁷ As, chë inÿe barquëshañe imojtsemna enutëngbioye tmojánëfjatsëmbo, jabújabuachama chamuábama. Chora chënga tmojánabo, y nÿets uta barquësha beóngaca tmojanajutjé. Tša chëftanga causa, tojanontsé chë uta barquësha jtsenatjëmbambana.

⁸ Simón Pedro chca tojáninÿe ora, Jesúsbentše tojanoshëntsamentsé y tbojanianyana: —¡Bëngbe Utabná, atše bacna soye amá sëndmëna, chíyeca átsbentšana mojuaná ca!

⁹ Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná.

¹⁰ Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojanianyana: —Ndoñe matauatjana. Morscana, entsanga Bëngbe Bëtsabiama cochántanguaye, y nÿe beonga ashebuayanáyá ndoñe quecochátsmëna ca.

¹¹ As chora chë barquëshangá tsachoye tmojtanéyamba y lempe jéseboshjonëse, Jesús tmojanasto.

Jesús, canÿa bacna nguayanánaca šocábioye tbojanshná

(Mt 8.1-4; Mc 1.40-45)

¹² Jesús canÿe pueblentše yojtsemna ora, chentše tojánashjango canÿe entsá bacna nguayanánaca šocá. Chë šocá Jesúsbioye tbojáninÿe ora, tojanoshëntsamentsé y jubiaca fshantsóntscoñe yojtsejbéna y tbojanimpadá:

—Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

¹³ As Jesús cucuátšëca tbojánbojajo y tbojanियana: —Aíñe, séntseboše. ¡šocana cbotsebojuaná ca!

Y cachora chë šocana tbojtsanóbojuanañe.

¹⁴ Chora Jesús tbojanmandá: —Ndocnábeñe chë soye cattsecuéntaye; nÿe Jerusalenoca báchnëbioye motsa, y cha cochjinÿinÿiye aca mora ya tšabá cojtsatsmënama; y chora cochjuátšëmbona ntšamo Moisés chabe leyíñe tojanmandacá, Bëngbe Bëtsábioye chama jëtschuayama, chca, nÿetsca entšanga chamotatšëmbona mora ya tšabá cojtsatsmënama ca.

¹⁵ Pero ndayá Jesús yojtsamama más entšanga imojátatšëmbona, y ba entšanga imojtsójotoye chábioye joyeunayama y chëngbe šocanëngama chauashnama.

¹⁶ Pero Jesús yojanamana jtsoñana entšanga ndoyena luarëngoye y chocha Bëngbe Bëtsáftaca ibnéncuentaye.

Jesús, canÿe jama ndobenábioye tbojanshná

(Mt 9.1-8; Mc 2.1-12)

¹⁷ Canÿe te, Jesús yojtsabuatambá ora, chentše básefta fariseunga y ley abuátambayënga imojtsetbiámana, Galileoca nÿetsca pueblënguentšana áshjainënga, Judeoquënga y Jerusalenoquënga. Y chora Jesús šoquënga yojt-sashnaye, Bëngbe Bëtsabe obenánaca.

¹⁸ Chora tojanopasá, básefta boyabásenga canÿe šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye,

¹⁹ pero jamashnana ndoñe tmonjanobená, tša entšanga causa. Chcasna, gradasëšënguëjana chë yebnentša tsbanánoye tmojánasëngo y batšá tejšë tmojtsanjuaná. Chorna, chë atëfñëjana chë šocá tjuashiñe tmojanëštjango, entšangbe tsëntsaca, Jesusbe natsanoica.

²⁰ Jesús tojáninÿe cha chë šocá jáshnama bëtsobenama chënga puerte imojtsošbuáchema. As, chë jama ndobenábioye tbojanियana: “Bacó, acbe bacna soyënga tcbontseborderoná ca.”

²¹ Chora chë ley abuátambayënga y chë fariseunga mëntšá tmojanontsé juabnayana: “Quem boyabása ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inÿa japerdonana; nÿe Bëngbe Bëtsá aíñe ca.”

²² Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tšëngaftangbe ainaniñe chca šmojtsejuabná?”

²³ ¿Tšëngaftangbiana ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’?”

²⁴ Y chca, morna atše cbochanjínÿanÿiye, chë Bëngbe Bëtsá Entšá tbojanbemá quem luariñe obenana yobomnana, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanियana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

²⁵ Cachora chë jama ndobená tojtantsbaná entšangbe delante, chë cha inajájona tjuashe yojesocñe y Bëngbe Bëtsábioye atschuanaye chentšana yo-tsatsoñe.

²⁶ Chama n̄yetsca entsanga imojénjnanaye y Bèngbe Bètsá imojtsatschuanaye. Y corente auatjanánènga imojtsichamo: “Mènté bèts soyènga tmonjin̄yè ca.”

Jesús, Levíbioye tbojanchembo chabuastama
(Mt 9.9-13; Mc 2.13-17)

²⁷ Chca yojochnèngüentsana, Jesús chentšana tojéftsanbocna y can̄yè entsábioye tbojánin̄yè, Leví ca uabainá, ch̄è entsángbioye impuesto Romocama atjanayentše in̄étsotbemañe. Chora Jesús tbojaniana: “Smasto ca.”

²⁸ Y Leví lempe tojésanboshjona, tojantsbaná y Jesús tbojanasto.

²⁹ Chentšana, Levina bèts fiesta chabe yebnentše Jesusbiana yojama. Y ch̄è fiestentše imojsemna banga impuesto atjanayènga; y in̄yè entsángnaca mesëshentše imojtsetbiámana.

³⁰ Chora, ch̄è fariseunga y ch̄è ley abuátambayènga tmojanontsé ch̄è Jesusbe uatsjéndayèngbiana podesca oyebuambnayana; y ch̄èngbioye mèntšá tmojanéyana: —¿Ndáyeca tšèngaftanga impuesto atjanayèngaftaca y bacna soye amèngaftaca šmojttesá y šmojtsofšèšn̄ ca?

³¹ Y Jesús tojanéjua: —Salud bomnènga ashnayá ndoñe ntsèjabótana, pero soquèngna aín̄e.

³² Y atše ndoñe chiyátabo ch̄è Bèngbe Bètsabe bominiñe tšabá amènga jabáchembuama, sinó ch̄è bacna soye amènga imomna ca juabnayènga Bèngbe Bètsábioye jabáchembuama ca.

Jesús tmojantjá ch̄è Bèngbe Bètsáftaca jencuéntama tondaye saytescama
(Mt 9.14-17; Mc 2.18-22)

³³ Chora ch̄ènga Jesúsbioye tmojaniana: —Juan ch̄è Ubayanabe uatsjéndayènga y ch̄è fariseungbe usetonènga monduamana ba soye Bèngbe Bètsáftaca jtsencuéntayana, y chama ba soye tondaye ntjascá jtsemnana; pero acbe uatsjéndayènga n̄yè n̄yets tempo jesosañana y jesofšèšnañana ca.

³⁴⁻³⁵ Chora Jesús tojanéjua: —Ch̄è boyabása bouamná ch̄è ofjanèngaftaca tojtsemnèntscuana, ch̄èngbioye saná ndoñe ntsabuáshebenana. ¿Ntšamo chca ndoñe nántsemna? Ch̄è tojobouamá cha ch̄èngaftaca tojtsemnèntscuana, ch̄è ófanènga bètsá jasanya y cháftaca oyejuayènga jtsemnana. Pero ora echanjóshjango y ch̄è boyabása ch̄èngbentšana mochantsánatseñe; chora cocayé ch̄è ófanènga echántsamna tondaye ntjascá jtsemnana. Ntšamo ch̄è tojobouamá cha y ch̄è ofjanèngaftaca endmèncá, cachcá endmèna atše, atšbe uatsjéndayèngaftacnaca ca —cha tojanéjua.

³⁶ Jesús mèntšánaca tojanacuntá jabuátambama: “Ndocná queon̄ybatatètše basájua tsèm entsayañe, tanguá entsayá jtarméndama. Chca tcojamèse, ch̄è tsèm entsayá jtsandbemana, y ch̄è tcojuatètše entséjua ch̄è tanguájuañe ndoñe tšabá ntsin̄yana.

³⁷ Y cach ndoñe, ch̄è tojtseshayana vínoye tanguá jasabenguiñe ntjatuftsuámayana. Tcojuaftsuamasna, ch̄è jasabenga jtsheshébèfjuana y ch̄è vínoye jtsabuáshanana; y chca, ch̄è vínoye y ch̄è jasabenga tondayama ntjatoservénana.

³⁸ Chíyeca co, ch̄è tojtseshayana vínoyna tsèm jasabenguiñe juaftsuámana.

³⁹ Ndocná, ch̄è bóchena vínoye tojatèmo y chentšana játsbošana ch̄è tojtseshayana vínoye jatofšiyana; cha jayanana: ‘Ch̄è bóchena vínoye tša tšabeye ca’.

6

*Jesusbe uatsjéndayénga ochnayté trigo tmojanátabebe**(Mt 12.1-8; Mc 2.23-28)*

¹ Canye ochnayté, Jesús canye jajajana yojsaye; chabe uatsjéndayénga trigo imojsaiuatabnaye, imojsaiúshenécaye, y imojsaiuasaye.

² Chè causa, básefta fariseunga tmojanatjaye: —¿Ndáyeca šmojtsama chè ochnayté jamama ndoñe quenátslesenciana soye ca?

³ Y Jesús tojanéjua: —¿Ndoñe šmëndualía y šmondétatšëmbo, ntšamo rey David y chabe enuténga tmojanmama shéntseca imojtsemna ora y jasama yojséjaboto ora?

⁴ Chca orna, David Bëngbe Bëtsabe bëts yebnentše yojámashëngo y chè Bëngbe Bëtsá chentše yojamnama inýinýnaye tandëšënga yojase, y chè cháftaca imojánajna entšágnaca yojátšataye. Y chè tandëšna nýe bachnanga telesenciana jasama. Masque David chca yojama, Bëngbe Bëtsá chora ndoñe tonjánayana David canye bacna soye tojanma ca —Jesús tojanéjua.

⁵ Y Jesús más tojanéyana: “Chè Bëngbe Bëtsá Entšá tbojanbemá, chè entšá ochnayté tojtsama sóynaca jtsemándayana ca.”

*Chè buashana cucuatše bomna entšá**(Mt 12.9-14; Mc 3.1-6)*

⁶ Inye ochnayté, chè judiëngbe enefjuana yebnoye Jesús tojánamashëngo y tojanontsé jabuátambana. Y chentše yojtsemna canye entšá, catsbioica cucuatše buashanëtše bomná;

⁷ y chè ley abuátambayénga y fariseunga chiñe imojtserrondana jinýama nderado Jesús chè ochnayté chábioye tabuanjashna, as chca chënga jtsebonmana ndaye sóyeca Jesús mal jaquédana.

⁸ Pero Jesús chëngbe juabna yojtsetátšëmbo; asna chè buashana cucuatše bomna boyabásabioye tbojanianyana: “¡Motsbaná y chentše tséntsaca motsa ca!” Y chè entšá yojotsbaná y entšangbe tséntsaca yojtsaye.

⁹ Chora Jesús chè inýengbioye tojanéyana: “¿Ndayá yojtselesenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochócana ca?”

¹⁰ Y nýetscanga chabe chabuajana imojtsemnënga tojanënyanýé, y chè buashana cucuatše bomnábioye tbojanianyana: “Macuenýanéjaná ca.” Y chè boyabása tojanacuenýanéjaná, y tšabá chëtša yojtsatamna.

¹¹ Pero chè inýengna puerte tmojanotjayaná, y tmojanontsé enatsëtsnayana ndayá muanjobenaye Jesusbe contra jamana ca.

*Jesús chè bnëtsana uta uatsjéndayénga tojanabacacá**(Mt 10.1-4; Mc 3.13-19)*

¹² Chè tempo, Jesús tjoye tojána Bëngbe Bëtsáftaca jencuéntama; y nýets ibeta cháftaca tbojanencuentá.

¹³ Tojanbinýna ora, chabe ústonënga tojánachembo, y chënguentšana tojanëbuáyana bnëtsana uta uatsjéndayénga, chè ndëmuanýenga “chabe ichmónënga cánaca” tojanëbobaye.

¹⁴ Chënga imojamna: Simón, chè Pedro cánaca Jesús tbojanabobayá; Andrés, Simónbe catsata; Santiago y Juan, Felipe y Bartolomé,

¹⁵ Mateo y Tomás, Santiago, Alfeobe uaquiñá; Simón, chè celote ca uabobainá;

16 Judas, Santiagbe uaquiña; y Judas Iscariote, chë más chcoye, Jesús uayayëngbe cucuatshiñe bochjanboshjoná.

Jesús ba entsanga yojanabuatambá y yojánashnaye
(Mt 4.23-25)

17 Chentsana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentšana, Jesúsbiyoe oído jabuájua y chëngbe šocanëngama chauashnama.

18 Y chábeyeca chë bacna bayëjbe juabna uambayënga tšabá imojtsatsmëna.

19 Nyetsca entsanga tša imojtseboše y ndayánaca imojtsama Jesús jabojuama, er chábentšana bëts obenana yojsóbocana y nyetscanga yojsashnaye.

Chë ndegombre oyejuayana bomnënga y ndëmuanyëngbiana tša lastema yochtsemna
(Mt 5.1-12)

20 Jesús chabe uatsjëndayëngbiyoe tojanontješé y tojanéyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiana entsemna ca.

21 “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántatenbiajuaye ca.

22 “Puerte oyejuayënga šmochtsemna, entsanga chacmojtsëbuayënja ora, chacmojtsatëbuacana ora, chacmojtsëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama.

23 Chë te puerte šmochjóyejuaye, er celoca canye bëts uacanánana šmochántsebomna. Chëngbe bëts taitanga, cachcá chë Bëngbe Bëtsabe juabna oyeuambnayëngaftaca tmonjanma ca.

24 “Pero ¡tša lastema tšëngaftanga bomnëngbiana, er mora oyejuayënga jtsemnama ya bëtscá šmojóyëngacñe ca!

25 “¡Tša lastema tšëngaftanga chë mora shachanëngbiana, er shëntsana šmochántsebomna ca!

“¡Tša lastema tšëngaftanga chë mora oyejuayëngbiana, er ngménama šmochanjenóbošachna ca!

26 “¡Tša lastema tšëngaftangbiana nyetsca entsanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyeuambnayëngaftaca ca!” —Jesús tojanéyana.

Chë uayayëngbiana bonshánana jtsebomnana
(Mt 5.38-48; 7.12)

27 “Pero tšëngaftanga, átšbiyoe ouenanënga cbéyana: Tšëngaftangbe uayayënga šmochtsababuán'yeshana; chë tcmojtsëbuayënjëngbiana tšabe soyënga šmochtsama;

28 chë tšëngaftangbiana bacna soyënga bošëngbiana, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana.

²⁹ Nderado ndánaca cánÿoica tcmojajuebiantsetase, cochjomiye chë ínÿoica cachcá chacmomama; nderado ndánaca quësfaiya tcmojuábocana, cachcá cochjonÿaye acbe shabuanguanëjuanaca chauetsáçñama.

³⁰ Ndánaca chacmojtjañábioyna, jatsetayana; y nda ndayánaca chacmoje-
fcábioyna, ndoñe catjontsínÿena chacmatoyema.

³¹ Inÿengaftaca smochtsama, ntšamo chë ínÿenga tšëngaftangaftaca chamot-
samama šmojtsebošcá.

³² “Tšëngaftanga, nÿe chë tcmojtsababuánÿeshanënga šmojt-
sababuánÿeshanëse, ¿ndaye tšabe soye chca šmattsama?; er chë bacna
entšángnaca chca mondbétsama.

³³ O nderado, nÿe chë tšëngaftangbiana tšabe soyënga tmojtsamëngbiana
tšabe soyënga šmojtsamëse, ¿ndaye tšabe soye chca šmattsama?; er bacna
entšángnaca chca mondbétsama.

³⁴ O nÿe chë cmochtëchenanguama šmojtsejuabnángbioye šmojúyentsámëse,
¿ndaye tšabe soye chca šmattsama?; er chë bacna entšángnaca mondbet-
senántšamiana, chëngbentsana cachcá jtóyëngacñama jtsobátmanëse.

³⁵ Pero tšëngaftanga cmontsamna chë uayayënga jtsababuánÿeshanana;
y tšabe soyënga chëngbiana jtsamana y júyentsámiana, chëngbentsana
ndayánaca jtóyëngacñama ntjatobatmancá. Chca, tšëngaftanga uacanánana
cuenta canÿe bëts soye šmochanjóyëngacñe, y celoca endmëna Bëngbe Bëtsabe
básenga šmochántsemna; Bëngbe Bëtsá chë ndochuanayëngaftaca y bacna
entšangafácñaca tšabia comna.

³⁶ Inÿengbiana lastemadënga šmochtsemna, ntšamo tšëngaftangbe Taitá
yomncá ca” —Jesús tojánayana.

*Ndoñe ntsichámuana chë ínÿenga tšabá o ndoñe tšabá tmonjamama
(Mt 7.1-5)*

³⁷ “Ndocá ínÿengbiana šmattsichamo chë ndoñe tšabá tmontsamama, y
Bëngbe Bëtsá ndoñe queochátichamo tšëngaftanga ndoñe tšabá šmonjama
ca. Inÿengbiana ndoñe šmattsichamo ndoñe tšabá tmonjama ca, y Bëngbe
Bëtsá ndoñe queochátichamo tšëngaftanga ndoñe tšabá šmonjama ca. Inÿenga
šmochjáperdonaye y Bëngbe Bëtsá cmochanjáperdonaye.

³⁸ Inÿengbioye šmochjatsataye y Bëngbe Bëtsá cmochántatsataye. Mo nda
canÿe biaco medidiñe bëtscá tojajutjé, uashëshe y cmojtiyecá, Bëngbe Bëtsá
cachcá cmochántatsataye. Ntšamo tšëngaftanga ínÿengbioye chašmojábiama,
uabouana o ndoñe jabuache soyënga, Bëngbe Bëtsá cachcá tšëngaftangbioye
cmochanjábiama ca” —Jesús tojánayana.

³⁹ Jesús quem cuétnaca tojánayana jabuátambama: “¿Canÿe jtaná
nantsobena inÿe jtaná jtsanachayama? ¿Chca ndoñe nÿets útata ndaye
tbuabentše buanjótsatše?

⁴⁰ Chë uatsjendayá ndoñe ntsemnana chë buatëmbayabiama más bëtscá. Pero
chabe uatsjëndayana chaojapochocá ora, cach buatëmbayacá jtsemnana.

⁴¹⁻⁴² “Canÿa chabe bominiñe canÿe niñëfja tojtsebomnëse, cha ndoñe
ntsobenana chabe catsátbioye jauyanana: ‘Acbe bominiñtsana canÿe
polvështema jtsebuchjátsëcana šmolesenciá ca’. Natsana cha bontsemna
cachabe bominiñtsana chë niñëfja jtsenobuchjátsëcana, tšabá jinÿama jobe-
nayama, chabe catsatbe bominiñtsana chë polvotema jtsebuchjátsëcana.

¡Cachcá entsemna acbiama, bacna entśá chë ntśamo ndegombre tcojuabnacá ndinÿinÿinayá! Chë tśa bacna soye cojtsama ca acbe catśátbïoye tcojauyana ora, cach aca tśa bëtś bacna soyënga cojtsamama ntjenojuaboyá; y chca, aca jamana canÿe bacna soye. Natsana cmontsemna chë cach aca ndoñe tśabe soyënga cojtsamama ngmënaca jshatenójuaboyana y chca amana jshëtśajbanana, y chentśana cocayé cohantsobena acbe catśata juajabuáchana ntśamo tśabá yomncá chaotsamama ca” —Jesús tojánayana.

Tśabe betiye o ndoñe tśabe betiye tondmënama, jtsotatśëmbuana ntśamo tojashajoncá

(Mt 7.17-20; 12.34-35)

⁴³ “Ndoñe queonÿbatsmëna, chë canÿe tśabe betiÿiñe podesca soye jashájonana; ni canÿe ndoñe tśabe betiÿiñe tśabe soye jashájonana.

⁴⁴ Betiÿënga jtsabuatmana ntśamo cada betiÿe tojtseshajcá. Uchmaśëshentśana quenátopodena higuëbé jocñana; ni uvaśëśa, shëshëntśa betiÿentśana.

⁴⁵ Chë tśabe entśana, chabe ainanoca tśabe juabnënga bomnentśana jtsóyebuambnayana; y chë bacna entśana, chabe ainanoca ndoñe tśabe juabnënga bomnentśana jtsóyebuambnayana. Er ndayá becá ainanoca tomnana entśá jtsóyebuambnayana ca” —Jesús tojánayana.

Chë uta ucuatjoniñe

(Mt 7.24-27)

⁴⁶ “¿Ndáyeca tśëngaftanga atśe śmnétsatsaye, ‘Utabná, Utabná ca’, y ntśamo atśe stśichamcá ndoñe ntsamana?

⁴⁷ Cbochanjáuyana ndacá yomna nda átśbïoye tojabo, atśbe palabra tojouena y ntśamo stśichamcá tojtsama:

⁴⁸ Cha endmëna mo canÿe entśacá, nda canÿe yebna jajebuamna becá fshantse jashenoye yojajutjo y ndëtśbenguïñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtśbenguïñe jabuache yojaúcuatjona.

⁴⁹ Pero nda atśbe palabra tojouena y ntśamo stśichamcá ndoñe tontsama, endmëna mo canÿe entśacá, nda canÿe yebna yojajebo nÿe fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

7

Jesús canÿe Romano soldadëngbe amëndayabe bochichnayábïoye tbojanshná

(Mt 8.5-13)

¹ Entśángbïoye chca jáuyanana tojanpochocá ora, Jesús Capernaum puebloye tojána.

² Chentśe yojoyena canÿe romano soldadëngbe amëndayá. Cha ibnabomna canÿe bochichnayá puerte bonshaná, y chora cha śocá yojtsemna, ya jtsóbanama.

³ Jesús ba śoquëngbïoye yojáshnama encuëntayana chë amëndayá yojouena ora, báseftanga bëtśëjemëngcá amëndayënga cha tojanichamó, chauábama Jesús jaimpádama y chabe bochichnayábïoye chabotseshnáñama.

⁴ Chënga Jesúsbïoye tmojánashjango y tśa imojtseimpadana, mëntśá: “Quem soldadëngbe amëndayá mercedo entsebuájona chacotsájabuachama;

⁵ er cha bëngbe luarentśa entśángbïoye corente endábabuanÿeshana, y cachá chë bëngbe enefjuana posada śonjayentśjebo ca.”

⁶ Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbiocyte mëntšá chamuauyanama: “Atšbe Utabná, ndoñe yapa matenócochinýenana átšbiocyte jabama. Atše mercedo taitatobuajoñe aca atšbe yebnoye chacua-mašënguama;

⁷ chíyeca ni mo añemo chiyatentšetá jama aca jajébenguama. Morna nýe cochjayana y atšbe bochichnayá tšabá echántsatsmëna.

⁸ Er atše sëndábamna átšbiocyte mándayënga y átšnaca soldadëngbe amëndayá sëndmëna. Atše canýe soldádbiocyte stjauyana ‘motsa ca’, cha cachora jana; y ínýabiocyte stjauyana ‘mabo ca’, cha cachora jabana; y nderado atšbe bochichnayábiocyte ndayánaca chaomama stjamánda, chánaca cachora chë soye jamana ca” —cha yojáuyana.

⁹ Jesús chca tojanuena ora, chë mándayabiama yojenjnaná, y jobuértanëse chë ba entsanga cha ustonëngbiocyte tojanýyana: “Ndegombre cbëyana, ni mo nýets Israelentše, ni canýa quem boyabasacá tša ošbuachiyá chiyátinýena ca.”

¹⁰ Y chë ichmónënga yebnoye tmojtaná orna, tmojáninýena chë bochich-nayá ya tšabá yojtsatsmëna.

Jesús tojanma canýe viudabe uaqiñá cháuatayenama

¹¹ Chca tojanopasá chentsana, Jesús yojétsaye Naín ca uabaina pueblöy, y cháftaca chabe uatsjëndayënga y ba entsanga imojtsaye.

¹² Chë pueblo amashjuanoye yojtsebeconá orna, entsanga chë pueblentsana canýe obaná imojtsábocana jauábtontsama; chë obaná canýe viudabe uaqiñá inamna y nýe cha uaqiñá. Bëtsá entsanga chë obanabe mamá imojtsetjëmbambayae.

¹³ Bëngbe Utabná chë viudábiocyte tbojáninýe ora, chabiama tbojanongmé y tbojaniyana: “Ndoñe matošachena ca.”

¹⁴ Y jobëconase, chë ataúse tojánbojajo, y chë obaná atambayënga tmojantsá. Y Jesús chë obanábiocyte tbojaniyana: “Bobontse, atše cbëyana: ¡Matëtsbaná ca!”

¹⁵ Chora chë obaná tojtantsbaná y tojanontsé oyebuambnayana; y chabe mamábiocyte Jesús chë bobontse tbojtánantse.

¹⁶ Nýetsca entsanga tša uatjana yojubuache chca tmojáninýe ora, y Bëngbe Bëtsá imojtsatschuanaye, mëntšá jayanëse: “Bëngbentše canýe Bëngbe Bëtsabe juabna oyebuambnayá cuatënjonýná ca.” Y mëntšánaca: “Bëngbe Bëtsá tojabo chabe entsanga jabújabuachama ca.”

¹⁷ Y nýets Judea luarëjana y chë chábuañe luarenache entsanga imojátatsëmbona ndayá Jesús tojanmama.

Juan chë Ubayanabe ichmónënga (Mt 11.2-19)

¹⁸ Juan, lempe ntšamo Jesús yojtsamama yojátatsëmbona; er chabe ústonënga chama tmojancuentá. As Juan, chënguentsana útata tojánachembo,

¹⁹ y Jesúsbiocyte yojichamuá jatjayama cha tayojamna chë Cristo, chë jabama ibojanmëná, chë Uámana Uabuayaná, o ínýabiama jatobátmama tayojétsamna ca.

²⁰ As chë Juanbe ichmónënga Jesúsbiocyte tmojanobeconá y tmojaniyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínýabiama jatobátmama ca.

21 Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinÿna.

22 Chora Jesús mëntšá tojanëjua: —Motsata y Juánbioye šochjauyana ntšamo šojinÿe y šououená: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga šhnánënga montsatsmëna, chë tšëmënga montsuenana, chë obanënga tmontayena, y chë ndbomnjëmëngbioye chë tšabe noticiënga montsabuayiyná.

23 ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

24 Chë Juanbe ichmónata chentšana tbojésanbocnentšana, Jesús tojanontšé Juanbiana entsanga jáuyanana, mëntšá: “Juan jinÿama šmojánbocna ora, ¿ndayá jinÿama šmojánbocana entsanga ndoyena luaroye? ¿Canÿe entšá ainaniñe tondaye añemo ndbomná, mo canÿe ššëe bínÿiaca shatiyeynëščá?”

25 Y ndoñese, ¿ndayá jinÿama choye šmojánbocana? ¿Canÿe boyabása uamana entsayaca bopormaná? Ndoñe. Tšëngaftanga šmondétatsëmbo chë uamana entsayaca bopormanënga y chë bëtsá bomnánaca nÿe tondayama ntsecocinÿencá vida bomnëngna, reyëngbe yebnënguiñe mondbëtsiyenama.

26 Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna oyebuambnayá? Ndegombre; y cbëyana, canÿa Bëngbe Bëtsabe juabna oyebuambnayabiana más bëtsá.

27 Cha, Juan, endmëna ndabiama Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora: Cristo, atšbe entšá natsana sënjichmó acbiama chaóyeuambama, entsanga jábuayenama aca jabama ainaniñe tšabe juabnëngaca chamotseprontánama ca.

28 Ndegombre cbëyana: Nÿets tempo entšángbeñe, ndocná quenátsmëna Juan chë Ubayanabiana más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

29 “Nÿetsca entsanga chca Juánbioye tmojanóyeunanga y chë Romocama entšángbioye impuesto atjanayëngnaca, nÿets ainánaca tmojánayana Bëngbe Bëtsá nÿetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá.

30 Pero chë fariseunga y ley abuátambayënga, ntšamo jubáyama Juan yojanamancá jójëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiana jamama yojanjuabnacá.”

31 Jesús mëntšánaca tojánayana: “Cbochanjáuyana ndayacá morsca entsanga imonna, y ndayëngcá chënga imonna.

32 Chënga mondmëna mo chë plazëngoca mondbetsetbiámama basetemëngcá; chëngna mëntšá jabuache jtseantsayana: ‘Tšëngaftangiama fsënjaflautá y ndoñe chešmatslantšá; ngmënaca fsënjaversiá y ndoñe chešmatenóbošachna ca.’

33 Juan chë Ubayaná tonjánabo y ndoñe quenjatamana bëtsá entšángbeñe jtsemnana, ni tandëse jasana, ni vínoye jofšiyana; y tšëngaftanga šmontsichamo chana bacna bayëjbe juabna uambayá inamna ca.

34 Morna, chë Bëngbe Bëtsá Entšá tbojanbemá tonjabo y chana añe entsamana bëtsá entšángbeñe jtseyayana y jtsofšëšnayana, y tšëngaftanga

chabiama šmonsichamo: ‘Chana yapa uasayá y vínoye tmoyá entsemna y Romocama entšángbioye impuesto atjanayënga y bacna soyënga amëngbe amigo ca’.

³⁵ Pero Bëngbe Bëtsá endbétsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” –cha tojánayana.

Jesús, chë fariseo Simonbe yebnentše

³⁶ Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema.

³⁷ Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatsëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtše béjayeaca.

³⁸ Jesusbe shecuatšentše yojoshëntsamentsiye, šachénaca; shëchbuÿeyeca chabe shecuatšënga yojtsefchecuacná y cachabe stjënashaca ibojtsatsshëcbojuaye. Chabe shecuatšënga yojtonguëtšëntsÿiye y chë botamana uanguëtše béjaye ibojtashecbuešcacia.

³⁹ Chë fariseo Jesúsbioye ofjaná chca tojáninÿe ora, mëntsá Jesusbiana yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëše, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.”

⁴⁰ As Jesús chë farisëobioye tbojaniana: –Simón, cuentado palabra šmotsoyeuná ca.

Y chë fariseo tbojanjuá: –Arseñor, Buatëmbayá ca.

⁴¹ Y Jesús tojánayana: –Canÿe entšá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë inÿana, shachna bnëtsana.

⁴² Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë farisëobioye tbojaniana: –Mora šmëyana, ¿chë útatentšana nda más chë uyentšamianábioye buantsebobonshana ca?

⁴³ Y Simón tbojanjuá: –Atše šontsinÿana chë más bëtscá ndebená ca.

Y Jesús tbojaniana: –Ndegombre, ntšamo endmëncá tcjayana ca.

⁴⁴ Jesús, chë shembásabioye jontješiyëše, Simónbioye tbojaniana: –Minÿe quem shembása. Atše acbe yebnoye sënjámashëngo y aca búyeshe ndoñe chešcatabuatšetá atšbe shecuatšëngama. Y quem shembásana, cachabe shëchbuÿeyeca šontseshecjabebé y chabe stjënashaca šontseshecbójó.

⁴⁵ Ndoñe chešcatámocho, pero cha tonjámashëngo orscana ndoñe ntjájbanana atšbe shecuatšënga onguëtšëntsÿnaye.

⁴⁶ “Aca bestšašinë aceitiye ndoñe chešcatsbuešcacia, y chana aïñe botamana uanguëtše béjaye šonjashecbuešcacia.

⁴⁷ Chcasna atše cbëyana, cha šonjinÿanÿé atšbiana corente bonshánana yojtsebomna, er atše chabe bëtscá bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

⁴⁸ Y chora Jesús chë shembásabioye tbojaniana: “Acbe bacna soyëngama perdonaná contsemna ca.”

49 Chora chë ófanënga chentše imnatbiámanëngna tmojanontsé enatsëtsnayana: “¿Nda quem entśá yojtsemna, chë bacna soyëngámna entśángbioye jtsaperdónayana ca?”

50 Y Jesús más chë shembásabioye tbojaniyana: “Aca átsbeñe icošbuachéyeca, atsbocaná cochántsemna; natjëmbana motsatoñe ca.”

8

Chë Jesúsbioye imojanájabuachana shembásenga

1 Chca tojanopasá chentšana, Jesús bëts y base pueblënguëjana yojánana, tšabe noticiënga Bëngbe Bëtsabe amëndayama entšanga abuatambaye y abuayiynaye. Chë bnëtsana uta uatsjëndayëngna cháftaca imojtsajna.

2 Básefta shembásengnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canýsëfta bacna bayëjënga tojtanëbuacna;

3 Juana, Cuzebe shema (Cuza yojamna rey Heródesbe canýe uajabuachaná); Susana y inýe shembásenga; chëngna chë imojánbomna soyëngaca chëngbioye imojanëjabuáchana.

Chë jenabe cuento

(Mt 13.1-9; Mc 4.1-9)

4 Ba pueblënguentsana mallajta entšanga tmojánbocana Jesús jinýama. Ba entšanga jouenama tmojanobeconá ora, Jesús mëntsá tojanacuntá:

5 “Canýe, canýe jená jénaye jaujquëshama yojëftsebozna. Yojtsëjquëshaye orna, básefta jénaye benache juachañe yojuatquëcjana; chiñna entšanga imojtsebotájaye, y jaja shloftšënga imojástajna y imojtsósañe.

6 Inýe meshëngna ndëtšbenguiñe yojuatquëcjana. Yojuábocna orna, betscó yojtsábozo, chë fshantsiñe ndoñe yapa búyeshe yonjamna causa.

7 Inýe meshëngna uchemëshangañe yojuatquëcjana y chë uchemëshangá lempe yojtsatscué, chë jénayeca cánýiñe yojuábocna ora.

8 Inýe meshëngna, uanguaniñe yojuatquëcjana. Yojuájua orna, bëtsca yojuashájona; canýe jénayentšana nýa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojtsoberënga, šmochjouena ca.”

Ndáyeca Jesús cuentëngaca yojánabuatambaye

(Mt 13.10-17; Mc 4.10-12)

9 As chora chabe uatsjëndayënga tmojantjá: —¿Ntšamo chë cuento yojtsayana ca?

10 Y Jesús tojanëyana: —Bëngbe Bëtsá tšëngaftanga cmontsinýanýná nýetsca chë mo iytemencá yomna soyënga chabe amëndayama, pero chë inýengbioyna ndoñe; chë soyëngama chënga lempe cuentëngaca sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque becá quem soyënga chamouena, ndoñe queochátësertana ca.

Jesús chë jenabe cuentama tojanabuayená

(Mt 13.18-23; Mc 4.13-20)

11 “Chë cuento mëntsá endayana: Chë jénaye Bëngbe Bëtsabe palabra entsemna.

12 Chë benache juachañe yojuatquëcjana básefta jénaye endayana chë básefta entsanga Bëngbe Bëtsabiana soyënga tmojouenënga; pero chora Satanás betso jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsošbuáchema y bacna soyënguentšana ndatsebácanënga chamotsemnana.

13 Inye entsanga mondmëna mo chë ndëtsbenguiñe yojuatquëcjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nyets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmonsasbuaché causa. Inyënga mochantsëbuayënja y Bëngbe Bëtsabeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjonyaye.

14 Inye entsanga mondmëna mo chë uchanguiñe yojuatquëcjana jenaycá. Chëngna Bëngbe Bëtsabe palabra jouenana, pero quem luar-entša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebmomnana yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnëjtjomba y ndoñe quemochátama ntšamo Bëngbe Bëtsá tojayancá.

15 Inye entsangna mondmëna mo chë uanganuiñe yojuatquëcjana jenaycá. Chëngna Bëngbe Bëtsabe palabra botamana mochanjouena; tsabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canye betiye puerte tsabá tojtseshajuancá, chënga bëtscá tsabe soyënga Bëngbe Bëtsabiana mochántsama. Chca mochántsama, Bëngbe Bëtsabeñe jtsošbuáchiyëse y nyetsca soyënguiñe puerte uantadënga jtsemnëse ca” —Jesús tojanabuayená.

Chë uajuinýanëshama cuento

(Mc 4.21-25)

16 “Ndocná canye uajuinýanësha juajuinýenana, chentšana ndaye sóyeca chësha jtsëstama o jutsnësha tajsoye jtsajájuama; juajuinýenana ndayá tsbanánoca juajájuama, chë luarentse amashjuanëngbiama chaotsebinýnama.

17 Er ndocna yoiytëmena soye, ntjinýcá queochaisoquëda, y chë entsangbiama ndótatšëmbo soye, ntsotatšëmbcá queochaisoquëda.

18 “Chcasna, botamana smochjouena, er nda Bëngbe Bëtsabe soyëngama tsabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe jontsebošá, chë nýe batšá ibosertana soyëngama bochántsebnatjëmbo ca” —Jesús tojánayana.

Chë Jesusbe ndegombre pamillanguentsënga

(Mt 12.46-50; Mc 3.31-35)

19 Chora, chabe mamá y chabe catsátanga chë Jesús yojtsemnentse tmojánashajna, pero ndoñe imontsobena chábioye jobëconana, yapa entsanga causa.

20 As canya Jesúsbioye mëntšá tbojaniana: —Acbe mamá y acbe catsátanga shjoca montsemna y montseboše aca jinýama ca.

21 As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catsátanga, atšbe ndegombre pamillanguentsënga ca.

Jesús chë binýia y chë béjaye bonguana yojëtsbema

(Mt 8.23-27; Mc 4.35-41)

22 Canÿe te, Jesús chabe uatsjéndayëngaftaca canÿe barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána;

23 y imojtsenachñëjuanëntscuana Jesús yojtsomaná. Ndeolpe, chë béjayiñe corente jabuache binÿia yojóshjango y yojontsé béjaye chë barquëshoye jt-sobuajútjiana. Y chca, chëngbiama puerte resjo yojtsemna.

24 Chora chë uatsjéndayënga tmojána Jesús jetseñenama y mëntśá tmo-janiyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana šochtsemna ca.” Y chë binÿiayana tojanëjbana y lempe bonguana yojtsatsemna.

25 Chentśana Jesús chabe uatsjéndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntśá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binÿia y chë béjaynaca joyeunayana ca!

Chë Gerasa luaroca bacna bayëja uambayá

(Mc 8.28-34; Mc 5.1-20)

26 Chentśana Gerasa ca uabaina luaroye tmojánashjajna, Galilea ndirichiñe.

27 Jesús fshantsoye tojánastjango ora, chë pueblocana canÿe entśá chábioye tojánabo. Cha ya bayté bayëjbe juabna yojtsebomna, ndocna entśayá yonjanichëtjona; y yebniñe ndoñe yonjaniyena, sinó obanëngbe cuevëshënguenache.

28 Chë entśá, Jesúsbioye tbojáninÿe ora, chabe natsanoica yojoshëntsamentšiye y mëntśá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

29 Chca tbojaniyana, er Jesús tojanmandá chë bacna bayëjbe juabna chábensana chaueseboचना. Ba soye chë bayëja yojánama chë entśá ndoñe tšabá chaotsemnana. Chë entśanga imojuamana cucuatšentśana y shecuatšentśana cha jtsëtsbuayana bonguana chaotsemnana, pero chana jtsatabebiana, y chë bacna bayëjbe mándoca entśanga ndoyena luarëngoye yojánachana.

30 Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjenga tmojánamashjna.

31 Y chë bayëjenga Jesús tmojanimpadá, chë corente uabouana tboye ndoñe chaondíchamuama.

32 Chentśa béconana ba cotšënga imnajena, tjoca imnétsosañe; as chë bayëjenga Jesús tmojanimpadá chë cotšëngbeñe jamashjna chualesencia, y Jesús añe chca tojanalesenciá.

33 As chë bayëjenga chë entśábentśana tmojésanbocana y chë cotšëngbeñe tmojánamashjna; y chentśana, chë cotšënga batsjocana peñëšëjana uaf-jajónayoye imojtsoshbuëtse y yojtsatajo.

34 Chë cotšënga anyënga chca yojopásama tmojáninÿe ora, chentśana tmo-jtsanacheta y tmojána chë soye jacuéntama chë puebloca y chiñe luarenache.

35 Entśanga tmojánbocana ndayá tojanopasacá jinÿama, y Jesús yojtsemnoye tmojánashjajna ora, tmojáninÿe chë entśá chë ndábentśana bayëjenga

tmojtanbocna, Jesusbe shecuatšentše yojtsoǎbemañe, entšayá uichëtjoná y chabe nyets juábnaca. Y chë entsanga chama corente imojouatjaná.

³⁶ Ntšamo yojobasacá tmojáninÿëngna entšángbïoye tmojanacuntá ntšamo chca chë bacna bayëjbe juabna uambayá chora ya tšabá yojtatsmënana.

³⁷ Chentšana, nyetscanga chë Gerasa luarentše oyenënga Jesúsbiöyey imojtseimpadana chë luarentšana inÿoye chaotsoñama, er chënga corente imojtsauatja. As Jesús chë barqušhojey tojtanamáshëngo y chentšana tojtanoñe.

³⁸ Chë entšá chë ndábentšana bacna bayëjënga tmojtanbocana, Jesúsbiöyey tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojanianyana:

³⁹ “Acbe yebnoyey motsatoñe y cochjácuntayey lempe ntšamo Bëngbe Bëtsá acbiama tojamcá ca.”

Chentšana chë boyabása yojtatoñe, y nyets pueblëjana tojanacuntá ntšamo Jesús chabiama tojanmcá

Jesús canÿe shembásabiöyey tbojanshná y tojanma Jairëbe bembetema cháuatayenama

(Mt 9.18-26; Mc 5.21-43)

⁴⁰ Jesús chë uafjajónayey chenguánoica tojtashjango ora, nyetsca entsanga oyejuayënga tmojtanojfa, er nyetscanga chabiama imojanobátmana.

⁴¹ Chora tojánashjango canÿe entšá, Jairo ca uabainá. Cha inamna chë pueblentše chë judiëngbey enefjuana yebnentša mandayá. Jesusbe shecuatšentšey yojobeñsamentšiyey y ibojtseimpadana chabe yebnoyey cháuama;

⁴² er chë nyë canÿe bembey cha ibnabomná, bnëtsana uta uata bomná, chora ya jóbanama yojtsemna.

Y Jesús yojtseyëntscuana, chë entsanga chábiöyey imojtsojuatsëntšenayey.

⁴³ Chë entsanguentšey yojtseyey canÿe shembása, oboftjajuánánaca šocá; cha ya bnëtsana uta uata chca inapadecena. Lempe ntšamo yojanbomncá ash-nayëngbiöyey atóbocayinë yojtsepochóca, y ndocná yonjobenayey cha jáshnana.

⁴⁴ Chë shembásana stëtšoicana Jesúsbiöyey yojobeconá y chabe entšayá sibujua tojanábojajo. Y cachora chë oboftjajuánana ibojtsobojuána.

⁴⁵ Chora Jesús tojanatjá: —¿Nda šjabojajo ca?

Nyetscanga imojtsichamo ndoñey ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenayey ca.

⁴⁶ Pero Jesús cachiñey tojánayana: —Pronto nda šjabojajo, er atšey sënjasenté obenana átšbentšana jóbocnana, mo nda stjashna orcá ca.

⁴⁷ Chë shembása tojáninÿey Jesús yojtsetátšëmbo cha tbojánbojajuama. As chora, ngmëmnyayá tojáná y Jesusbe shecuatšentšey yojobeñsamentšiyey; y nyetscangbey delantey tojanobuambá, ndáyeyca tbojánbojajuama, y ntšamo cachora tšabá tojtanoquedama.

⁴⁸ Chora Jesús tbojanianyana: —Bembe. Bëngbey Bëtsábeñey icošbuachéyeyca shnaná contsatsmëna. Natjëmbana motsatoñey ca.

⁴⁹ Jesús cabá yojtsoyebuambnantscuana, chë judiëngbey enefjuana yebnentša mandayábïocana canÿa tojánashjango, y chë mandayábïoyey tbojanianyana: —Acbe bembey ya tontsóbana; ndoñey más chë Buatëmbayábïoyey matëbëyabomana ca.

⁵⁰ Pero Jesús chë soyey tojanuena; as chë mandayábïoyey tbojanianyana: —Ndoñey matauatjana. Nyë Bëngbey Bëtsábeñey cochtsošbuáchiyey y acbey bembey tšabá echántatsmëna ca.

⁵¹ Chë yebnoye tmojánashajna ora, Jesús ndoñe tonjanalesenciá banga choye jamashnama, ñye Pedro, Juan y Santiago y chë shembásetembe bëtsëtsatna aifne.

⁵² Nÿetscanga imojtsenóbošachiye y ngménaca imojtsóyebuambnaye, pero Jesús tojanëyana: “Ndoñe matenóbošachengana. Cha ndoñe chenatóbana; cha ñye endëtsomañe ca.”

⁵³ Chë entsanga Jesúsbioye ñye imojtsáfchaye, er chënga imojtsetátšëmbo chë shembásetema obaná yojëtsemnama.

⁵⁴ Chora Jesús chábioye tbojanábuacueshache y jabuache tbojaniana: “¡Shembásetema, matëtsbaná ca!”

⁵⁵ Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama.

⁵⁶ Chë shembásetembe bëtsëtsata puerte ojnánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

9

Jesús, chabe uatsjédayënga tojanichamó, Bëngbe Bëtsabe amëndayama jábuayenama

(Mt 10.5-15; Mc 6.7-13)

¹ Chentšana, Jesús chabe bnëtsana uta uatsjédayënga tojánachembo, y mando y obenana tojanatšatá bacna bayëjënga entšángbentšana jtëbuacanama y šocanëngama jashnayama.

² Tojanichamó Bëngbe Bëtsabe amëndayama jábuayenama y entšángbioye jashnayama.

³ Y mëntšá tojanëyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inÿe entšëjua jenotrócama cach ndoñe.

⁴ Canÿe yebnentše posada chacmojúyentšame ora, chentše šmochjoquéda inÿe pueblöye játantscuana.

⁵ Nderado ndayentše posada ndoñe chacmonjuyentšame, chentšana šmochjësebocana y shecuatšentša polvëshe šmochjësenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca” —Jesús tojanabuayená.

⁶ Asna chë uatsjédayënga tmojëftsambocana y tmojána, nÿetsca chë base publötëmënguenache chë tšabe noticiënga abuayinyaye y entsanga šocanëngama áshnaye.

Herodes y Jesús

(Mt 14.1-12; Mc 6.14-29)

⁷ Jesusbiana y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentšana tojtanayena ca,

⁸ Inÿënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inÿëngna canÿa chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanayena ca.

⁹ Pero Heródesna tojánayana: “Cach atše sënjanmandá Juanbe bestšaše chamotsëštjanguama. ¿As, nda cha nántsemna, chë ndabiana chca soyënga jtsoyëbuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinÿama.

*Jesús shachna uaranga boyabásenga saná tojanacaredadó**(Mt 14.13-21; Mc 6.30-44; Jn 6.1-14)*

¹⁰ Chê Jesús tojánichamonga chábiyoe tmojtanashjango ora, lempe ntšamo chënga tmojanmama tmojancuentá. Y Jesús, nÿe chënga jëftsëbiatšese ínÿoye tojtanoño, Betsaida ca uabaina pueblöye.

¹¹ Pero chë entsanga chë soye tmojantatsëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtšëtsësnaye, y chë šoquënga imojtsemnëngbiyoe tojanashná.

¹² Ya jetiñe yojtsoyamná orna, chë bnëtsana uta uatsjëndayënga Jesúsbiyoe tmojanobeconá y mëntsá tmojaniana: —Chë entsanga cuantichamuá, jóchnama y saná jonguangoñama chamotsama chë béconana pueblotëmënguenache y luarënguenache; er quem luariñe ndocná quonatiyena ca.

¹³ Jesús chora tojanëyana: —Tšëngaftanga saná chëngbiyoe šmochjacaredádaye ca.

Pero chënga tmojanjuá: —Nÿe shachna tandëse y uta beónata fsëntsebonna; nÿetscangbiama saná jabuámiyama nderado nda tojasna, aíñe cuanjacaredádaye ca.

¹⁴ Er mo shachna uaranga boyabásenga immamna. Pero Jesusna chabe uatsjëndayënga tojanëyana: —Mamëndá nÿetscanga chamotbiamama shachna bnëtsátsanënga ca.

¹⁵ As chënga chca tmojanma y nÿetsca entsanga tmojanotbiama.

¹⁶ Chora, Jesús chë shachna tandëse y chë uta beónata tojanca, y celoye tojanontješé, Bëngbe Bëtsábiyoe chama tbojtanchuá, tojanjatá y chabe uatsjëndayënga tojanantregá entsángbiyoe chamuatšatama.

¹⁷ Nÿetsca entsanga tmojanse jtoshachaye nÿetšá, y cabá bnëtsana uta sbarëco tmojanajutjé chë ojamnëtëmëngaca.

*Pedro tojánayana, Jesús chë Cristo bëtsemnama**(Mt 16.13-19; Mc 8.27-29)*

¹⁸ Canÿe te, Jesús canÿa Bëngbe Bëtsáftaca ibojtsencuëntaye ora, chabe uatsjëndayënga cháftaca imojtsemna. Chora tojanatjá: —¿Nda atše bëtsemnama entsanga imojtsichamo ca?

¹⁹ Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canÿe Bëngbe Bëtsabe juabna oyebuambnayá tempscá mora tojtayena ca.

²⁰ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtayenana**(Mt 16.20-28; Mc 8.30-9.1)*

²¹ Pero Jesús corente chënga tojanamëndá ndocnábeñe chama ntse-cuëntayana.

²² Y mëntsá cachabiamama tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtsëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entšanga mochanjóba, pero unga tianoye cha echántayena ca.

²³ Chentšana nyetsca entsanga tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidíñe jtsemándayama, chabe quem luarentša soyënga cachcá chauesonÿá atše juastama, y cada te chaotseprontana átsbeyeca jasúfriama, y crucíñe jobanámnaca.

²⁴ Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojëftsonÿá atše juastama, masque chaóbana, chë nyetsca tescama yomna tšabe vida echántsebomna.

²⁵ Er çndayama entsá buanjóservia nyetsca quem luarentša soyënga jtsebomnana, cha pochocaná jtsemnama tojtsá y chë nyetsca tescama yomna tšabe vida tojtsoperdese?

²⁶ Er ndëmuanÿe entsá, atšbiamá o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiamá echantsëuatja, cha chabe bëtš buashinÿinÿaniñe chaojésabo ora, chabe Taitabe bëtš obenánaca y chabe angolotëmëngaftaca adoraná.

²⁷ Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjëtsinÿcá ca” —cha tojánayana.

*Jesús inÿetšá tojanobinÿná
(Mt 17.1-8; Mc 9.2-8)*

²⁸ Mëntsá tojanopasá: Chca palabrënga tojanoyebuambá chentšana posuf-taytese, Jesús tojëftsanëbiatše Pedro, Santiago y Juan, y canÿe tjoye tojántsjuá, Bëngbe Bëtsáftaca jencuéntama.

²⁹ Bëngbe Bëtsáftaca ibojtsencuéntantscuana, chabe jubíá inÿetšá yojtsinÿna, y chabe uichëtjonëjuangá tša uafjantsëjuangá yojtsamna y tša yojtsabuashinÿinÿana.

³⁰ Chora uta boyabásata tbojanonÿná, Jesúseftaca ibojtsencuéntaye. Chata ibojamna Moisés y Elías;

³¹ corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbana.

³² Masque Pedro y chabe enutata tša ocnayënga imojtsemna, nÿe imojtsefšna y tmojáninÿe Jesusbe juachañe tša yojtsebuashinÿinÿana y chë uta boyabásata cháftaca ibojtsemna.

³³ Chë uta boyabásata Jesúsbentšana ibojoluára ora, Pedro, Jesúsbiyoe tbojaniyana: “Buatëmbayá, itša tšabá bëngbiamá cuanmëna muentše jtsemnana ca! Mora fchanjapórma unga tambotëmënga: cánÿetema acbiamá, ínÿetema Moisesbiamá y ínÿetemna Elíasbiamá ca.”

Pero Pedro ndoñe yontsetátšëmbo ntšamo yojtsichámuama.

³⁴ Y chca yojtsóyebuambnantscuana, canÿe jantšetëshe yojóbema, y chëngbiyoe yojáutsbotse, y chënga chë tsoye imojtsemnama tmojáninÿe ora, chë uatsjëndayënga chama imojtsauatja.

³⁵ Chora chë jantšetësheoacana canÿe oyebuambnayana tojanóbocna, mëntsá: “Mua atšbe Uaquíñá endmëna, atšbe uabuayaná; cha šmochtseyeunana ca.”

³⁶ Chë oyebuambnayana tmojanuenentšana, tmojáninÿe Jesús canÿa yojtsemna. Chë uatsjëndayënga iytëca imojtsemna, y chë tempo ndocnábiyoe chama imonjuenaye.

Jesús, canÿe basa bacna bayêjbe juabna uambayábioye tbojanshná
(Mt 17.14-21; Mc 9.14-29)

³⁷ Yêfsana, chë tÿocana tmojtantsmá ora, ba entšanga tmojánbocana Jesús jajébuguama.

³⁸ Chora, chë entšanguentšana canÿe boyabása tojanontsé mëntšá uayebuáchana: —Buatëmbayá, Diosmanda atšbe uaquiñá minÿe. Nÿe cha atšbe uaquiñá endmëna;

³⁹ y mora, bayêjbe juabna chábioye bontsësháchichana, y nÿe ndeolpe jontšana yoyana, ataque joshachana y uayoicana shashiye jtsabocanana. Y chábensšana chë bayêja ndoñe betso ntjésebcnana, y cuerpiñe corente maltrataná jeseboshjonana.

⁴⁰ Acbe uatsjëndayënga sënjaimpadá chë bayêja chábensšana chamuatábocnana, pero ndoñe chematobená ca.

⁴¹ As Jesús tojánayana: —¡Nÿetsá ndošbuáchiyënga y bacna entšanga! ¿Bue-taytë šojtsemna tšëngaftangaftaca jëftsemnana y jtsëuantánana ca?

Chora chë boyabásabioye tbojanianyana: —Moye chë uaquiñá mánatse ca.

⁴² Chë basa yojtsebeconá ora, chë bacna bayêja chábioye tbojanshajayé y inÿe ataque tbojanëshache. Pero Jesús chë bayêjbioye tbojanácacana, chë basetémbioye tbojanshná y chabe taitábioye tbojanëntregá.

⁴³ Y nÿetscanga puerte ojanánënga imojtsemna, Bëngbe Bëtsá tša obenana bomná inamnana.

Jesús cachiñe tojánayana cha ibojamna jóbanana y jtayenana ca
(Mt 17.22-23; Mc 9.30-32)

Nÿetsca entšanga, ndayá Jesús yojtsamama ojanánënga imojtsemnëntscuana, chabe uatsjëndayënga cha tojanëyana:

⁴⁴ “Quem soye tšabá šmochjouena y ndoñe chacmondébnëtjomba: Chë Bëngbe Bëtsá Entšá tbojanbemá entšangbe cucuatsiñe mochanjáboshjona ca.”

⁴⁵ Pero chënga ndoñe yontsósertana ntšamo Jesús yojtsëtsëtnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

¿Nda chë más uamaná yomna?
(Mt 18.1-5; Mc 9.33-37)

⁴⁶ Chë tempo, chë uatsjëndayënga tmojanontsé enatsëtsnayana, nda chë más uamaná bëtsemnana.

⁴⁷ Jesús yojtsetátšëmbo ntšamo chënga imojtsejuabnayama; asna, canÿe báseta tbojánishache, chabe juachaca tbojánbema,

⁴⁸ y chëngbioye tojanëyana: “Nda átšbeñe ošbuachiyá bëtsemnana, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

Nda bëngbe contra ndoñe tontsemná, bëngaftaca jtsemnana
(Mc 9.38-40)

⁴⁹ Juan, Jesúsbioye tbojanianyana: —Buatëmbayá, bënga fsënjinÿe canÿe boyabása y cha aca jótšëmbonëse, entšángbentsšana bacna bayêjbe juabna endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

⁵⁰ As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

Santiago y Juánbioye Jesús tojaněcácana

⁵¹ Jesús celoye jtama yojtsobeco ora, n̄yets añémoca cha yojtsejuabnaye Jerusalenoye jama.

⁵² Natsana báseftanga tojanichamó, y chēnga tmojána can̄ye base pueblotémoye Samaria luaroca, posada chabiamá janguangoñama;

⁵³ pero chē laurentša entšanga ndoñe tmonjánbošena posada juantšamiana, er tmojántatšēmbona cha Jerusalenoye yojétsayama, chē chēngbe uayayēngbe uamana puebloye.

⁵⁴ Chabe uatsjéndayata, Santiago y Juan, chē soye tbojánin̄ye ora, Jesús tmojaniana: “Bēngbe Utabná, ¿quetseboše bēndata fchaimandá celocana iñeshe chaótsatše y quem entšanga chaotsapochócaye ca?”

⁵⁵ Pero Jesús yojobuértana y chátbioye tojtsaněcácana, chca juabna bomna causa.

⁵⁶ Chentšana chēnga in̄ye pueblotémoye tmojtsanoñe.

Chē Jesús juastama bošēnga

(Mt 8.19-22)

⁵⁷ Benachējana imojtsajna ora, can̄ye boyabása Jesúsbioye tbojaniana: —Atšbe Utabná, atše sēntseboše aca juastana ndēmoye chacojtsá choye ca.

⁵⁸ Y Jesús tbojanjuá: —Chē zorrēnga cuevēshēnga mondbomna ndayentše jtsiyenama y chē shloftšetēmēnga uajajonēshangá; pero chē Bēngbe Bětsá Entšá tbojanbemá ndoñe quenátšbomna ndayentše jóchnama ca.

⁵⁹ Jesús in̄ye entšábioye tbojaniana: —Smasto ca.

Pero cha tbojanjuá: —Atšbe Utabná, šmoleseñciá atšbe taitá chjshesabotbontsañe ca.

⁶⁰ As Jesús tbojaniana: —Chē Bēngbe Bětsabiamá mo obanēngcá imomnēnga, ntšamo Bēngbe Bětsá yomandacá ndoñe tmontsama causa, chēnga cachēngbe obanēnga chamotsétebuantsañe. Acna, motsa y Bēngbe Bětsabe amēndayama entšanga cochjabuayená ca.

⁶¹ In̄yana Jesúsbioye tbojaniana: —Atšbe Utabná, atše sēntseboše aca juastama, pero šmoleseñciá natsana atšbe pamíllangbiamá jaisodióšoftama ca.

⁶² As Jesús tbojaniana: —Nda cachabe soyēngama tbojtsengmena, Bēngbe Bětsabe amēndayocama ndoñe ntsoservénana; er cha jtsemnana mo can̄ye arayacá, chē tojtsetrabája ora, stētsoye tojtsaisantjeñcá ca.

10*Jesús can̄ysēfta bnětsana y uta entšanga tojanichamó Bēngbe Bětsabe soyēngama jábuayenama*

¹ Chē soyēnga chentšana, Bēngbe Utabná Jesús in̄ye can̄ysēfta bnětsana y útátnaca tojanabacacá, y utáta chabe natsana tojanichamó, chē cha ibojtsemna jama pueblēngoye y luarēngoye.

² Měntšá chēnga tojanéyana: “Can̄ye bēts jajañe bētscá játbanamá entsemna, pero peonga báseftanga; chíyeca, chentša nduifñbioye jaimpádana ba peonga chauichamó chē jaja saná játbanamá. Cachcá, quem laurentše bētscá entšanga montsemna Bēngbe Bětsábioye nduabuátmēnga, y chēngbioye chabiamá abuayinyayēnga n̄ye báseftanga. Chíyeca, Bēngbe Bětsá moimpadanga ba abuayinyayēnga chauichamó quem entšanga chábioye júbuajama.

³ Motsajna; smochjin̄ye, atše tsēngaftanga cbontsichamná mo oveshēnga cuenta, tjañe quešēngbeñe.

4 Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisenobiamnaye.

5 “Ndaye yebnentše chašmojámarshjna ora, natsana šmochjayana: ‘Lempe tšabá quem yebnentše chaotsomñe ca’.

6 Y chë yebnentše chca juabna bomna entšanga tmomñësna, chë tšabiana ndegombre chentše echántsemna; pero ndoñese, chca tšabiana chentše ndoñe queochásmëna.

7 Canye yebnentše šmochjoquéda, y šmochjase y šmochjofšiye ntšamo chentše chacmojacaredadaycá; er chë trabajayá merecido jtsebuájonana chca juácanama. Canye pueblentše nye inye y inye yebñenguenache ndoñe matajnana.

8 “Ndaye pueblentše chašmojámarshjna y tšabá chacmojúbuajentše, šmochjase ntšamo chentše chacmojacaredadaycá;

9 chentša soquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’.

10 Pero canye pueblentše chašmojáshjango y ndoñe chacmonjúbuaja, chentša tsashenangoye šmochjábocana y mëntšá šmochjayana:

11 ‘¡Chë tšëngaftangbe pueblentša polvëshe, chë bëngbe shecu-atšënguiñe tojuanjëshe, camuentše fšcuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetátšëmbo chë Bëngbe Bëtsabe amëndayana tšëngaftangbeñe entsemnana ca.’

12 Ndegombre cbëyana, quem luare jopochócama te, chë luarentša entšángbioye Bëngbe Bëtsá puerte jabuache echantsacastígaye, y Sodoma pueblota bacna entšángbioye ndoñe nya nyëtsá jabuache ca” —Jesús tojánayana.

Chë nduauenana entšanga (Mt 11.20-24)

13 “¡Tša lastema Corazín pueblota entšangbiamma! ¡Tša lastema Bet-saida pueblota entšangbiamma! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochmënguse, chentša bacna entšanga ya tempo chëngbe bacna soyëngama ngmëñaca matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entšayangaca matmëntopormanga y jatinyashiñe matmënjotbiamma.

14 Pero ntšamo entšanga tmojamama, tšabá o ndoñe tšabá bëtsemnana jayanama chaojobuache ora, tšëngaftanga más bëts castigo šmochántsebomna, chë Tiro y Sidonoca bacna entšangbe castiguama.

15 Y tšëngaftanga, Capernaum pueblentša entšanga, ¿celóntscoca atëbánanënga šmochtsemna ca šmojtsejuabnanga? ¡Chë uabouana infiernoye cmochantsësetjang!

16 “Nda tšëngaftanga tmojoyauná, chana atše joyeunayana; y nda tšëngaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

Chë canyësëfta bnëtsana y uta entšanga tmojtanashjajna

17 Chë canÿsëfta bnëtsana y útatna Jesús yojtsemnoye tmojtanashajna, puerte oyejuayënga; y chábioye mëntśa tmojanianyana: —İBëngbe Utabná, aca jótśëmbonëse, chë bacna bayëjëngnaca sonjoyauná ca!

18 Y Jesús tojanëyana: —Ndegombre. Y tšëngaftanga Satanásbioye chca šmontseyëñaná ora, entsemna mo Satanás celocana canÿe tcuinÿcá jtsot-satsana stjinÿcá.

19 Atśna obenana tbonjatśatá mëtścuayënga y alacranëngbeñe chašmotsajnama, y bëngbe uayayá Satanasbe nÿets obenana jáyëñanama, tšëngaftanga ndocá ntjapasacá.

20 Pero móyejuanga, ndoñe chë bacna bayëjënga chacmóyaunama obenana šmojtsebmomnama, sinó tšëngaftangbe uabaina celoca ya yojtsábemanama, er tšëngaftanga chë nÿetsca tescama yomna tšabe vida šmochántsebmomna ca —cha tojanëyana.

Jesús puerte tojanoyejuá

(Mt 11.25-27; 13.16-17)

21 Chora Jesús, chë Uámana Espíritbeyeca, corente oyejuayá tojánayana: “Atśe cbatschuá, Taita, celoca y quem luarentśa Utabná. Aca, chë nÿe batśá tatśëmbënga tconjanÿanÿé, chë tśa tatśëmbënga y osertánëngbiama tcojaiyëtëme soyënga. Aíñe, chama cbontsadorana, Taita, aca chca chaotsemnama tcojábóšenayeca.

22 “Atśbe Taitá lempe chca šonjatśetá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndëmuanÿengbioye chë Uaquiñá tojtseboše nda chë Taitá yomnama jinÿanÿiyama, chëngnaca chë Taitábioye mochantsábuatma ca.”

23 Chentśana, Jesús chabe uatsjëndayëngbioye tojanobuértana y nÿe chëngbioye tojanëyana: “İPuerte oyejuayënga chë ntśamo tšëngaftanga šmontsonÿacá jinÿyama tmojtsobenënga!

24 Er atśe cbëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿyana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

Chë Samarioca tšabe entśabiama cuento

25 Canÿe judiëngbe ley abuatambayá yojontśé Jesúseftaca jóyebuambayama, y jisháchichiyamna mëntśá tbojantjá: —Buatëmbayá, ¿ndayá šojtsemna jamana chë nÿetsca tescama yomna tšabe vida jtsebmomna ca?

26 Y Jesús tbojanjúa: —¿Ntśamo leyiñe iuábemana? ¿Ndayá chiñe condbëtsaliaye ca?

27 Chë ley abuatambayá tbojanjúa: —“Chë Utabná Bëngbe Bëtsá cochtsebobonshana nÿets ainánaca, nÿets espíritoca, nÿets añémoca y nÿets juábnaca”; y “ndëmua entśánaca cochtsebobonshana, ntśamo cach aca cuenobobonshancá ca.”

28 Chora Jesús tbojanianyana: —Tśabá sconjojuá. Chca cochtsama y chë nÿetsca tescama yomna tšabe vida cochántsebmomna ca.

29 Pero chë ley abuatambayá tśabá jenoquédamna Jesúsbioye tbojantjá: —Y ¿ndase chë ndëmua entśánaca yomna ca?

30 As Jesús tbojanjúa: —Canÿe, Jerusalenocana Jericó benache canÿe entśá yojtsetśmá, y básefta salteadorënga imojébëbocna. Lempe imojtsefca, chë

entšayánaca; imojtsejantšetaye y chentšana imojtsatónēnga, y chē entšá batšá obaná imojéseboshjona.

³¹ Ndeolpe, chē benachējana canye judiēngbe bachna yojsachnějuana. Chē entšábioye ibojinye ora, nye chabuacá yojsēchnēnguañe.

³² Cachcá, canye Levita, chē canye Bēngbe Bētsabe bēts yebnoca trabajayá chējana yojsachnějuana; y chē entšábioye ibojinye orna, nye chabuacá yojsēchnēnguañe.

³³ “Chorna, cach benachējana canye samaritano ináboye. Chē entšábioye ibojinye orna, ibojóngmia.

³⁴ Chábioye yojobeconá, aceitiye y vínoyeca ibojáshna, y lisianēnguiñe entšējuaca ibojuantsacjuá. Chabe couayiñe ibojēftsenjariye, canye yebnoye posada uyentšamianoye ibojuánatse, y chentše chábioye ibojēftsinyena.

³⁵ Yēfsana, chē samaritano uta denario crocénana yodenóbojatsēca, chē mo uta tesca trabajuama crocénana nyetšá, y chē posada nduíñbioye ibojesabuenaye, y mēntšá ibojauyana: ‘Quem boyabása cochtsinyena, y nderado más crocénana muabiana chacojenábojafjonasna, mējana chaitisachnějuana ora, cbochjabáisabuenaye ca.’

³⁶ Y chcasna, ¿chē unganguentšana nda cmojtsinyana chē entšabiama yojtsejuabnaye cha cachacá entšá inamnana ca?”

³⁷ Y chē ley abuatambayá tbojanjuá: —Chē entšabiama tbojanongmé cha ca.

Y Jesús tbojaniana: —Asna, motsa y cachcá cochjama ca.

Jesús, María y Martbe yebnentše

³⁸ Chentšana, Jesús benachējana yojsaye y canye base pueblotémoye tojēftsanamashēngo; y canye shembása Marta ca uabainá, chabe yebnentše tbojanofja.

³⁹ Martna canye quenata ibnabomna, María ca uabainá. Cha Jesusbe shecuatšentše yojótbema chabe palabra jouenama;

⁴⁰ y chēntscuana Marta ba soyēnga yojsama. Cha Jesúsbioye tojanobeconá y tbojaniana: —Utabná, ¿tondayana cmontsentšamna, atšbe quenata nye canya chašonjá lempe jamama ca? Mēyana chašujabuache ca.

⁴¹ Chora Jesús tbojanjuá: —Marta, Marta, bētscá soyēngama contsenócochinýena y contsenomantšná;

⁴² pero nye canye soye endmēna chē yoiyta soye jamama. María chca jamama tojobuáyana, chē más tšabe soye, y ndocná queochatsma cha chaot-sajbanama ca.

11

Ntšamo Bēngbe Bētsáftaca cuanjencuénta (Mt 6.9-15; 7.7-11)

¹ Canye, Jesús Bēngbe Bētsáftaca ibojtsencuéntaye canye luarentše. Tojanpochocá orna, canya chabe uatsjendayēnguentšá tbojaniana: —Bēngbe Utabná, Bēngbe Bētsáftaca jencuéntama šmabuatambá, ntšamo Juan chabe uatsjendayēngaftaca tojanmá ca.

² Y Jesús tojanéyana: —Bēngbe Bētsáftaca chašmojtsencuénta ora, šmochjayana:

Bēngbe Taitá, acbe uabaina chē más uámana uabainana chauesomñe.

Acbe amēndayana chaóshjango.

³ Měnté šmiyatšatá, cada te šnetsjaboto tanděse.

⁴ Bacna soyënga fsënjama: šmotsaperdónaye; er bëngnaca nyëtscanga chë bëngbiana bacna soyënga amëngbioye fsëndbetsaperdónaye.

Bacna soyënga jamama šojocohëngo ora, šcochjijabuache chca nde-nobuiyama.

⁵ Jesús mēntšánaca tojanëyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tanděse šmotsemná,

⁶ er canye atšbe amigo yebnoca tonjáshjango y tondaye quetsátobomna cha jonánjama ca.’

⁷ Ndegombre, cha tsocana tcmojojuá: ‘Ndoñe šmatébeyabomana. Běšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tanděse jámnana ca.’

⁸ Ndegombre, chë bacó ndoñe tonjotsbaná chë tanděse jámnama, cháftaca šuenatsětsnámase, cha pronto jotsbanana chca uebéyabomana ndoñe tconjan-janá causa, y lempe ntšamo cmojtsajabotcá cha cmochanjoiyiye.

⁹ Chcasna, atše cbëyana: Šmochjotjañe y Bëngbe Bětsá cmochanjátšataye; šmochjánguango y šmochanjínjëna; šmochjachembo y cmochanjébëtafjo.

¹⁰ Er ndánaca ndayá tojtsotjanañá, jóyëngacñana; y tojtsenguá cha, jónjënana; y nda tojtsechembuanábioye jebiatëfjuana ca.

¹¹ “¿Nda tšëngaftanguentšana nantsobena, taitá tojtsemnëse, cachabe uaquinábioye canye mētšcuaye jatštayana, beona tbojtsotjanañe ora;

¹² o canye alacránashe joyiyana, shëmnëbé tbojtsotjanañe ora?

¹³ Y chca, tšëngaftanga, bacna soyënga amënga, tšëngaftangbe basetmëngbioye tšabe soyënga jatštayama šmojtsamanëse, jmás chë celoca Taitá, chë Uámana Espíritu echanjátšataye, chca tmojtsotjanañëngbioye ca!”
—Jesús tojánayana.

Fariseunga tmojánayana Jesús Satanásbentšana obenana tojanóyëngacñe ca (Mt 12.22-30; Mc 3.20-27)

¹⁴ Jesús canye entsábentšana canye bacna bayëja tbojtánabocna. Chë bayëja ndëbiá chë entsábioye tbojánbema, y chábentšana tojésanbocna ora, chë ndëbiá tojtanontšë oyebuambnayana. Y chë entsanga chama imojenjaná;

¹⁵ pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatšetá chë bayëjënga chauatëbuacnama ca.”

¹⁶ Y ínjënga, Jesús jisháchichiyamna tmojanimpadá canye bëts soye chaoma, jinjánjyama cha celoca obenana inabomna o ndoñe.

¹⁷ Pero Jesús yojtsetátšëmbo ntšamo chëngbe juabna bétsemnana. As tojanëyana: “Canye amëndayábentše entsanga tmojtsenojatá y tmojtsenáyase, cachënga jtsenpochócana; y canye yebnentše oyenënga tmojtsenojatá y tmojtsenáyase, chë pamíllanga tšabá nyëts tempo ndoñe quemochátsmëna.

¹⁸ Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebomnana? Chca sěntsichamo, er tšëngaftanga šmontsichamo Beelzebube obenánaca chë bayëjënga stsatëbuacana ca;

¹⁹ pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chíyecna,

cachënga montsinjinyńná ntšamo ndegombre yomnana, y tšëngaftanga ndoñe ndegombre soye šmontsichámuama.

²⁰ Y atšna, Bëngbe Bëtsabe obenánaca entsángbentsána chë bayëjënga sëndëtëbuacana; y chë soye entsinjinyńná, Bëngbe Bëtsabe amëndayana tšëngaftangbioye tojóshjanguama.

²¹ “Canye corente añemo bomna entšá, bëtsá ármangaca chabe yebna tojtsinýenëse, chë tsoca tomna soyënga ndoñe ntjotšana.

²² Pero inýa chabiama más añemo bomná tojabo y tbojabetseyëñjaná, chë cha yojanašbuaché armangá jtsabocana y chë tobomna sóynaca; y ntšamo chë inýa tojtsebošcá chë soyëngaca jamana.

²³ “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

Ndayá inopása chë bacna entsángaftaca

(Mt 12.43-45)

²⁴ “Canye bacna bayëja canye entsábentsána tojësebocna ora, bojojo luarënguenache chë bayëja jtsanana, ndayentše jóchnama onguayíñe. Ndoñe tonjinyëna ora, jenójuaboyana: ‘Atšbe oyenoye, chë ndayentsána sënjëftsebocnoye chanjeshëcna ca.’

²⁵ Y choye tojtashjango ora, jinýenana lempe tšabá cha jtesamashënguama, mo tsajniñe y prontániñe cuaftsemncá.

²⁶ Chora chë bayëja jana y inýe canýsëfta bayëjënga, chabiama más opëjënga jobiatšana, nyëtsanga choye jamashjnama, chë boyabásabeñe joyënanama. Y chca, chë boyabása tempscama más bacna entšá jtoquédana, chora chë natsanama más bayëjënga abamna causa ca” —Jesús tojánayana.

Chë ndegombre oyejuayana

²⁷ Jesús chë soyënga yojtsichamëntscuana, entsanguentše canye shembása yoyuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

²⁸ As Jesús tbojanayana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

Chë bacna entsanga Jesús tmojanimpadá canye bëts soye chaoma, chabe obenana jinýama

(Mt 12.38-42; Mc 8.12)

²⁹ Entšanga más imojtsótoyoye Jesús yojtsemnentše, y Jesús tojanontsé jáuyanana: “Morsca entsanga puerte bacna entsanga; chënga montsojtjanañe atše canye bëts soye chaima atšbe obenana jinýama, pero ndoñe chca quemochátinye, sinó nýe chë ndayá yomna mo chë Jonásoftaca tojanopasá soycá.

³⁰ Er chca, ntšamo Jonás Nínive pueblaca entsanga canye bëts soye tojaninýanyë Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinýanyńná morsca entsángbioye, Bëngbe Bëtsabe amëndayana tojóshjanguama.

³¹ Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entsangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiamá más uamaná endmëna.

³² Chë entsanga tšabá o ndoñe tšabá tmonjamama jayanama te, chë Nínive bêts puebloca entsángnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojsabuayiyayana ora, tmojanoyeuná y chë tšabe benache tmojtanishache, y chë mora muentše entsemnana, Jonasbiamá más uamaná endmëna ca” —Jesús tojánayana.

Chë cuerpama uajuinñanësha

(Mt 5.15; 6.22-23)

³³ “Ndocná canye uajuinñanësha juajuinñenana, canye iytëmena luaroye juajájuama, ni canye cajonëshe tajsoye, sinó canye tsbanana luaroca juajájuama, chca, chë luaroye amashjuanëngbiamá chaotsebínñama.

³⁴ Acbe bominñe tšabá totsomñëse, acbe cuerpama mo canye uajuinñanëshacá jtsemnana; chíyeca aca jtsobenana, ntšamo tcojtsamcá chë bominñeca jtsonñayana. Chë bominñe ndoñe tšabá tontsemnëсна, chë bominñe tondaye ntsobenana jamana, ntšamo tcojtsamcá chacobená jinñama. Cachcá, acbe ainaniñe tšabe juabnënga tcojtsebmñëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebmñëсна, lempe ntšamo chacojtsamcá ndoñe tšabá queochátsmëna.

³⁵ Cuedado šmochtsebmñna, tšëngaftangbe ainaniñe nñe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana.

³⁶ Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canye uajuinñanësha puerte tšabá tojtsebinñnacá ca” — Jesús tojánayana.

Jesús chë fariseungbiamá y ley abuátambayëngbiamá tojánayana, chënga ndoñe tšabá montsama ca

(Mt 23.1-36; Mc 12.38-40; Lc 20.45-47)

³⁷ Jesús chca jayanama tojanpochocá ora, chábioye canye fariseo tbojanofja chabe yebnoye jauasamá. As Jesús tojánamashëngo y mesëshentše tojanótbema.

³⁸ Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama.

³⁹ Pero Bëngbe Utabná tbojaniyana: “Tšëngaftanga fariseunga šmondmëna mo entsangcá ndëmuanyënga chë tazëšënga y šcnenënga shjoicajana jtsóbojabiana, pero tsoyna nñe cachcá jonñayana. Tšëngaftanga becá jtsamana entsangbiamá mo tšabëngcá jtsinñama; pero tšëngaftangbe ainanentše jútjena entsemna nñe jtsatbëbanama y bacna soyënga jtsamana juabnëngaca.

⁴⁰ Juabna ndbomñënga! Tšëngaftanga ndoñe šmondëtatšëmbo, chë tšëngaftangbentsana entsanga ndayá jinñama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiamá cachcá enduámana ndayá tšëngaftangbe ainanoye yomna soyënga, y chë entsangbe delante šmojama soyënga.

⁴¹ Tšëngaftanga cmontsamna, chë soyënguiñe ndayá ainaniñe yomnentšana inñëngbioye jatsatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

⁴² “¡Tša lastema tšëngaftangbiamá fariseunga! Tšëngaftanga Bëngbe Bëtsabiamá jtsequëcñayana chë jajañentša sananga bnëtsanentšana canye

soye nyetsá, y chë binche matatémënguentsana menta, ruda y nyetsca binche matatémënguentsánënaca; pero nye batsá jtsamana chë nyetscanga cachca derechënga chamotsebomnama y cha jtsebobonshánama. Quem soyënga cocayé cmontsamna jtsamana, chë inýe tšabe soyënga ntjajbanacá ca.

43 “¡Tša lastema tšëngaftangbiama fariseunga! Tšëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnama, y benachiñe nýa puerte respétoca entsanga chacmotsacheuanayama ca.

44 “¡Tša lastema tšëngaftangbiama! Smondmëna mo obanënga uatbontsaniñcá, ndoñe ntsinýnana, y entsanga ntsetatšëmbcá chiñe jtsebotájayana. Chca smondmëna, er tšëngaftangbe ainana entsemna jútjena bacna juabnëngaca, pero entsangbiama ndoñe chca quešmátinýna ca.”

45 Jesús chca tojánayana ora, canýe ley abuatambayá tbojanayana: — Buatëmbayá, chca palabrënga contsoyebuambná ora, bëngbiámnaca ndoñe tšabá quécátichamo ca.

46 Pero Jesús tojánayana: —¡Tša lastema tšëngaftangbiámnaca, chë ley abuatambayënga! Mo canýe entsá, couáybioye canýe uauta uasmanésha tbojuasmá, y chësha ndoñe yapa chaondétsautama tondaye totsamcá, tšëngaftanga entsángbioye jtsamëndayana bëtscá mandënga chamotsocumplínama, pero cach tšëngaftanga ni mo batšatémnaca jtsamana chë mandënga jtsocumplínama ca.

47 “¡Tša lastema tšëngaftangbiama! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevëshënga jtsatspórmayëse; pero chë mo chëngcá, canýe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye.

48 Chca jtsamëse, tšëngaftanga šmontsinýnáná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

49 “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiama abuayinayënga, y báseftangbioye mochantsëbaye y inýengbioyna mochantsécamiye ca.’

50 Y chca, nyets castigo morsca entsángbeñe echántsemna, nyetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana;

51 Abélbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entsángbeñe nyets castigo chaotsemnama ca.

52 “¡Tša lastema tšëngaftangbiama, chë ley abuatambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entsangbiama yapa totcá chaotsemnama. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

⁵³ Jesús chë soyënga tojánayana, chë ley abuátambayënga y fariseunga puerte tojánëtëna, y cha chentsana yojtsaisebocana ora, tmojanontsé chábïoye becá tjanayana, y imojtsama ba soyëngama chaóyebuambama,

⁵⁴ chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábïoye mal jaquédana.

12

Jesús, chë bacna entsanga ntšamo ndegombre tmojuabnacá ndinÿinÿnayëngbïama tojanabuatambá

¹ Chëntscuana, ba uaranga entsanga chentse tmojanóoto; tša entsanga causa, nÿetscanga imojtsenatsëntsenaye. Chora Jesús tojanontsé jóyebuambayama, y natsana chabe uatsjëndayëngbïoye tojanëyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tšabá tontsemncá chamotsamama.

² Er ndocna yoiytëmena soye, ntjinÿcá queochaisoquéda; y chë ndótatsëmbo soye, ntsotatsëmbcá queochaisoquéda.

³ Chíyeca, chë mora nÿe tšëngaftangbïama šmojtsichamo soyënga, chë entsangbïama mo ibetiñcá cuaftsemna soyënga, entsanga chama botamana mochanjátatsëmbona. Y chë iytëcana šmojtsichamo soyënga, nÿetsca entsángbïoye mochántsabuyiynaye, mo nda canÿe yebnentša tsbanánocana noticiënga tojtsayebuachcá ca” —cha tojanëyana.

*Nda ndegombre cuantsebiauatja
(Mt 10.26-31)*

⁴ “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbïama, pero chentsana más jamana ndoñe ntsobenana.

⁵ Cbochanjabuayená ndábïoye cmojtsamna jtsebiauatjana: šmochtsebiauatja chë nda vida jtsabuajuánama y chentsana infernoye jtsichámuama obenana endbomnábioye; chábïoye cocayé šmochtsebiauatja ca.

⁶ “¿Shachna jaja shloftsetëmënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbïama sempre jesenójuabnayana.

⁷ Y tšëngaftangbïama Bëngbe Bëtsá lempe endétatsëmbo, y bueta stjënëjënga tšëngaftangbe bestšašifë yomnámnaca. As ndoñe matauatjëngana; tšëngaftanga ba jaja shloftšëngbïama corente más šmonduámama ca” —Jesús tojánayana.

*Ndbïama Jesucristo yochjayana chabe entsá yomna ca
(Mt 10.32-33; 12.32; 10.19-20)*

⁸ “Atše cbëyana, nda atšbe entsá yomna ca entsangbe delante tojanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entsá chabia yomna ca;

⁹ pero nda entsangbe delante, atšbe entsá ndoñe yondmëna ca tojanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entsá ndoñe yondmëna ca.

10 “Bëngbe Bëtsá bochanjaperdóna, nda chë Bëngbe Bëtsá Entsó tbojanbemabiama ndoñe tšabá tontsichamuábioye, pero chë Uámana Espíritbiana ndoñe tšabá tontsichamuábioyna ndoñe.

11 “Tšëngaftanga chë judiëngbe enefjuana yebnëngoye, ntšamo entsanga bëtsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyeca šmochjenéuyanama, o ndayá šmochjayanama;

12 er chë Uámana Espiritu cmochanjabuayená ntšamo jayanama tojtsemná, jóyebuambayama chacmojtšamna ora ca” —Jesús tojánayana.

Entšabiama resjo yomna, nýe yapa bomnana jesejuabayana

13 Chentšana, canýa entsanguentsá Jesúsbioye tbojaniana: —Buatëmbayá, atšbe catšata momandá chë átšbioye otocana soyënga chašuatoyé ca.

14 Y Jesús tbojaniana: —Bacó, ¿nda atše šojábema tsëndatbe ujtatanayá ca?

15 Y entsángbioye tojanéyana: —Smochjinýe y cuedado šmochtsebmna chë nýe yapa soyënga jtsebmnama bošama; er masque bëtsá soyënga chašmotsóbmñe, chca ndoñe quešmochátstatšëmbo aífne tšabe vida taišmochjónýenama ca.

16 Y chora mëntsá tojanacuntá: “Inamna canýe bomna entsá, y chabe fshantsënguiñe tša jaja saná yojtšopodena.

17 Chë bomná chora mëntsá yojtsejuabnaye, ‘¿Y morna, ntšamo chjama? er ndoñe quetsátsbmna ndayentše atšbe jaja saná jtsobocjayama ca.’

18 Y mëntsá yojeniyana: ‘Chë grano uaquëcjnaye yebnënga chantsendbiana, y inýe más bëts yebnënga chanjëtšjebo, y chiñe nýetsca atšbe jaja saná chantsóboçjaye y nýetsca atšbe soyëgnaca.

19 Y chora atše chjeniyana: Bacó, bëtsá soyënga contseboçjana, ba uatama cmochanjuášhache. Morna, cochjóchna, cochjase, cochjatëmo, cochjóboçjaye ca.’

20 Pero Bëngbe Bëtsá chábioye ibojauyana: ‘Obëjema, cach quem ibeta cochanjóbana; y asna, chë contseboçjana soye, ¿ndabiama yochtsemna ca?’ ”

21 Y Jesús chora tojánayana: “Chca endbopása chë nýe chabiama bomnana tojtsejuabá y bëtsá Bëngbe Bëtsabe soyënga ndoñe tonjëftsashjáftaca ca.”

Bëngbe Bëtsá chabe básenga jtsanýenana

(Mt 6.25-34)

22 Chentšana, Jesús chabe uatsjëndayënga tojanéyana: “Quem soye cbéyana: Ndoñe šmattsenócochinýena ndayá šmochjase o šmochjofšiyé vida jtsebmnama, ni ndaye entsáyá šmochjuíchëtjuama cach ndoñe.

23 Ndegombre, vida chë sanama más enduámana y cuerpo chë entsáyama más.

24 Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebmnama; pero Bëngbe Bëtsá chënga saná jtsatšatnayana. ¡Y tšëngaftanga chë ftsenga shloftšëngbiana puerte más šmonduámana!

25 Masque chca endmëna, masque canýa tša tojesenócochinýena, ¿ntšamo nanjobenaye jamana, chë ntsachetšá vida yochtsebmmentšana canýe hora vida más jabotiyana?

26 Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?

27 “Smochjuinÿe chë lirio uantsefjushangá jtsajuajnana: ndoñe ntse-trabájayana, ni ntsehabiamnayana. Pero atse cbéyana, ndegombre ni mo rey Salomón, nÿetsca chabe bomnánaca, chë lirio uantsefjushangacá nÿetsá botamana quenjatspormana.

28 Bëngbe Bëtsá tša botamana shácuana tojuama, y chë shácuana mënté jajoca jtsamnana y yéfsana iñoca. Cha chë shácuanaca chca tojamëse, ndegombre tsëngaftangbiámnaca Bëngbe Bëtsá echanjama entšayá chašmotsábomnama, jentsanga Bëngbe Bëtsábeñe nÿe batšá ošbuáchiyënga!

29 Chíyeca, ndoñe šmattsenócochinÿena ndayá jasama o jofšiyama onguayiñe;

30 er chë soyëngama quem luarentša entšanga mondbétsenocochinÿena, pero tsëngaftanga ndoñe. Tsëngaftangna canÿe Taitá šmondbomna, y cha endétatšëmbo ndayá cmëjabótama.

31 Más tšabana, tsëngaftanga šmochtseboše Bëngbe Bëtsá tsëngaftangbe ainaniñe chaotsemándama, y chë cmojtšëjabeto soyënga nÿe šmochanjóyëngacñe ca” —Jesús tojánayana.

Chë celoca bomnana (Mt 6.19-21)

32 “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuinÿnana chabe amëndayana tsëngaftanga jatšatayama.

33 Lempe ntšamo šmobomncá šmochtsatobuiye y chë ujabotëngbioye šmochtsatšataye. Mo ndotanguánaye shecnajiñe crocénana cuafjacacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca;

34 er chë ndayentše tsëngaftangbe bomnana tojtsemnentša soyëngama, ainánaca tsëngaftanga šmochántsejuabnaye ca” —Jesús tojánayana.

Bëngbe Utabná yochjésabama jtseprontánana

35 “Mo chë oservénënga, chë entšayá uichëtjonënga y uajuinÿananëshangaca chëngbe nduiño yochtashjanguama cuafstobatmancá, tsëngaftanga šmochtseprontana Bëngbe Utabná yochjésabama.

36 Chca, tsëngaftanga šmochántsemna mo chë oservénënga, tšabe entšayaca bopormánënga y uajuinÿananëshangaca chëngbe amëndayá casamentocana yochtashjanguama cuafstobatmancá; y chca, chë nduiño tojabochembo ora, cachora chë oservénënga jtebiatëfjuama.

37 Puerte oyejuayënga chë oservénënga, chë nduiño tojtashjango ora tojtsefšnënga. Ndegombre cbéyana, chora chë mandayá sëndorëche echantásnaye, mesëshentše chë oservénënga echanjátbiana, y saná echanjuatšiyë.

38 Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínÿanoye.

39 Quem soye tšabá chacmësértá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jshañe chaondbemama, chë yebnoye jtsamashënguama y jtsatbëbama.

40 Tsëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

Chë tšabe oservená y chë bacna oservená

(Mt 24.45-51)

⁴¹ Pedro, Jesúsbiye tbojaniana: —Utabná, ¿chë tconjayana cuento nÿe bēngbiama o nÿetscangbiama yochtsemna ca?

⁴² Y Bēngbe Utabná tbojanjá: —¿Nda yomna chë oservená, ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjéftsebošhona chë yebnentšēnga chaotsanjēnama, y jasama tojtsemna ora chaújuatšema.

⁴³ Puerte oyejuayá chë oservená, chë nduiño tojtashjango ora, cha tbojínÿena jtsamēse ntšamo tbojtsemncá.

⁴⁴ Ndegombre chēyana, chë nduiño chábioye bochanjaimpáda nÿetsca chabe soyēnga chabotsinÿēñama.

⁴⁵ Pero chë oservená, chabe nduiño betscó ndoñe yochantabo ca tojtsejuabná, y tojontsé chë inÿe oservenēnga, boyabásēnga y shembásēnga jtsajantšetayana, becá jtsesana, jofšiyana y jtsótmenana,

⁴⁶ cha ndoñe tontsejuabná te y tontsetátšēmo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bēngbe Bētsábeñe ndošbuáchiyēnga mochanjasufriacá.

⁴⁷ “Chë oservená, nda tojtsetátšēmo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja.

⁴⁸ Y chë oservená, ntsetatšēmbcá ntšámnaca tojabuachjuanguá, y chë causa chamotsetjanjama tbojtsemnēsna, chana más batšá mochántsetjanja. Nda bētscá soyēnga tmojatštábioye jauyanana, bētscá soyēnga chaoma ca; y nda bēts trabajo tmojabonÿébioyna jauyanana, más bēts trabajo chaoma ca.”

Jesube causa, entšángbeñe más jtsentsjanayana

(Mt 10.34-36)

⁴⁹ “Atše sēnjabo quem luariñe jabojuinÿiyama, y jtsa sēntseboše malaye ya ctsangbototjuana!

⁵⁰ Atše šontsemna puerte jasúfriana, y ipuerte ngménaca sēntsobátmana chca chaotsemnana!

⁵¹ ¿Tšēngaftanga šmojtsejuabná atše tijabo quem luarentše entšanga natjēmbana chamotsiyenama? Ndegombre ndoñe chca queochátsmēna; atše sēnjabo causa, entšanga más mochántsejtsjanaye.

⁵² Er mēntescana, canÿe yebnentše, shachnēnga ndoñe quemochátēnyeunana, únganga útatbe contra y útata úngangbe contra mochántsemna.

⁵³ Taitá uaquiñabe contra echántsemna, y uaquiñá taitabe contra; bebmá, bembēbe contra, y bembe bebmabe contra; uambén mamá, bebinuabe contra, y bebinuá uambén mamabe contra ca” —cha tojánayana.

Ndaye tempo yochtsemnana ntšamo inétsotatšēmo

(Mt 16.1-4; Mc 8.11-13)

⁵⁴ Mēntšánaca Jesús entšanga tojanēyana: “Tšēngaftanga, chë jantšetēshēnga shinÿe uenatjēmbambanoicana tojóboचना šmojinÿe ora šmondbētsichamo ‘echanjuafté ca’, y ndegombre chca jopásana.

⁵⁵ Y tsmoicoicana tojtsebínÿia orna, tšēngaftanga šmondbētsichamo ‘echanjōjēñyana ca’, y ndegombre chca jopásana.

⁵⁶ ¡Bacna entšanga, chë ntšamo ndegombre šmojuabnacá ndinÿinÿnayēnga! Ntšamo quem luarentše yochtsemnana, ndayá celoca šmojinÿyama tša tšabá

šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinýanýnama ca?” –Jesús tojánayana.

Chë uayayáftaca natjëmbana jtenbemana

(Mt 5.25-26)

⁵⁷ “¿Ndáyeca cach tšëngaftanga ndoñe šmondábayana ndayá tšabá bëtsemnana?

⁵⁸ Nderado nda tmojtseedemandá y cabildoye jotsánama cmojtsemna, cabá choye ndáshjango ora, betso cháftaca cochtenoyántsia. Chca ndóñese, chë demandáyá mandádbioye cmochanjúshjango, chë mandadna josticiëngbe cucuatšinë cmochanjáboshjona, y chënga cãrceloye cmochanjutame.

⁵⁹ Ndegombre cbéyana, chentšana ndoñe quecochtëtsbocna, nyëts ndebénana candesopagantscuana ca” –Jesús tojánayana.

13

Bëngbe Bëtsabe benache jtishachana

¹ Cach ora, báseftanga tmojána Jesús jinýama, y tmojancuentá ndayá chë mandado Pilato tojanmama; chana básefta Galileoca boyabásenga tojt-sanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

² Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inýe boyabásengbiama chënga más bacna soye amënga imojamna causa ca?

³ Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana.

⁴ O, ¿tšëngaftanga šmnétsejuabnaye, chë Jerusalenentša bnëtsana posufta entšanga tmojanóbanënga, chë Jerusalenoca binche uafjajónaye Siloé béconana tshanana jebna soye tojtšanáshajaye ora, chënga imojamna chë inýenga Jerusalenentše oyenëngbiama más bacna soyënga amënga ca?

⁵ Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” –Jesús tojanéyana.

Chë ndëshajona higo betiyama cuento

⁶ Jesús mëntšá tojanacuntá jabuátambama: “Canýe entšá jajoca canýe higo betiye inabomna, y yojá nderado nantseshájonama, pero tondaye yonjínýena.

⁷ Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoye jaborrepárama, nderado nantseshájonama, pero ndocna te tondaye chiyátinýena; chiyeca, motsetëtše. ¿Ndayama quem jajañe yochjátsjena ca?’

⁸ Pero chë jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanganëshe chanjabotboto.

⁹ Nderado chca jamëse, nanjashájona; y ndóñesna, chora cocayé cuantsetëtše ca.’ ”

Jesús canýe ochnayté, canýe tsëštjona shembásabioye tbojanshná

¹⁰ Canýe, canýe ochnayté Jesús yojontsé entšanga jabuátambana, chë judiëngbe enefjuana yebnentšë,

11 y chentše yojtsemna canýe shembása; cha ya bnétsana posufta uata yojtšeoca. Canýe bacna bayéja chábeñe tojánamashéngo y chca tsestjoná tbojtsanbema, y tondayama yontsobena jtondirichana.

12 Jesús chábiyoye tbojáninye ora, tbojanchembo y mēntśá tbojanianyana: “Batá, mora ya ndoñe šocá quecátsmēna ca.”

13 Chora Jesús chabe cucuatśēnga chábeñe tojanjájó, y cachora chē shembása yojtondiricha, y tojanontśé Bēngbe Bētsábíoye jētschuayama.

14 Pero chē enefjuana yebnentśa mándayana tbojánētna, Jesús chē shembása ochnayté tbojanshnama, y entśanga tojanēyana: —Chnénguana te comna jatrabájama; chora šmochjabo jenóshnama; ochnaytese ndoñe ca.

15 Y Bēngbe Utabná tbojanjuá: —¡Bacna entśanga, ntśamo ndegombre šmojuabnacá ndinýinýnayēnga! ¿Tśēngaftanguentśá ndocná chē ochnayté chabe uacná o chabe burrotēma buanjuajafjoná, juanatsama béjaye chaofsema?

16 Chcasna, quem shembása, canýa Abrahámbentśana entśá, y Satanasbe causa bnétsana posufta uata šocá yojtsemna, ¿ndoñe tśabá yondmēna canýe ochnayté chē bayéja jtsebojuánana ca?

17 Jesús chca tojánayana ora, chabe uayayēnga imojtsēuatja, y nýetsca entśanga imojtsóyejuaye Jesús tśa bēts soyēnga yojtsamama.

Chē mostaztiye jenayama cuento (Mt 13.31-32; Mc 4.30-32)

18 Jesús mēntśánaca tojánayana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenana ca?”

19 Endmēna mo canýe mostaza jénaye, canýe entśá jajañe tojajecá; chiyna jójuana y canýe bēts betiye jóbemana; tśa bētsashe jóbemana, chíyeca chē jaja šloftśēnga chē buacuashēnguiñe uajajonētemēngá jauábopormana ca.”

Chē levadurama cuento (Mt 13.33)

20 Mēntśánaca Jesús tojánayana: “¿Ndaye sóyeca chjobenaye Bēngbe Bētsabe amēndayama jábuayenama ca?”

21 Endmēna mo levadurcá; canýe shembása chana jenájuaabana unga medida arninýañe, nýetsana chauabochama ca.”

Chē base utēntśá bēśása (Mt 7.13-14, 21-23)

22 Jerusalenoye benache, Jesús entśanga yojtsabuátambaye bēts pueblēnguiñe y base pueblotémēnguiñe.

23 Canýa chábiyoye tbojantjá: —Bēngbe Utabná, ¿nyē báseftanga imomna chē atsebácanēnga mochtsemnēnga ca?

Y Jesús tbojanjuá:

24 —Puerte šmochtsentśena chē base utēntśá bēśásajana jamashjnama; er ndegombre cbéyana, banga mochántseboše chējana jamashjnama, pero ndoñe quemochatobenaye.

25 Chē yebnentśa nduíño chaojotsbaná y chē bēśása chaojtatámentśana, tśēngaftanga chē šhoca chašmojtsemnēnga, šmochántsechembuana, mēntśá jtsichámēse: “Utabná, šmebētafo ca.” Pero cha cmochanjáuyana, “Atše ndoñe quetsátstatsēmo ndēmoquēnga tśēngaftanga šmomnana ca.”

26 Chora tśēngaftanga šmochanjontśé ichámuana: “Acaftaca cánýiñe fsēnjase y fsēnjofśé, y aca bēngbe tsáshenañe tconjabuatambá ca.”

²⁷ Pero cha cmochanjójuaye: “Ya tcbonjáuyana, ndëmoquënga šmomnana ndoñe tsátšëmbo ca. ¡Atšbentsana mojuánanga, bacna soyënga amënga ca!

²⁸ “Chora chentše puerte šmochanjenóbošachna y tsetšanama juat-sašënga šmochantsenofëtšjojnaye, Abraham, Isaac, Jacob y nyetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojsemnana chašmojinÿe ora, y tsëngaftanga chentšana cmochtëbuacanama.

²⁹ Y shinÿe bocanoicana y uenatjëmbambanoicana, tsmanoicana y tsjuanoicana entsanga mochanjabo y juasama mochanjotbiana Bëngbe Bëtsabe amëndayentše.

³⁰ Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

Jesús tbojanongmé Jerusalemëntša entsangbiana (Mt 23.37-39)

³¹ Jesús chë soyënga tojanëyana ora, básefta fariseunga tmojánashajna y tmojanayana: —Muentšana motsatoñe; Herodes enteboše aca jtsóbama ca.

³² Y Jesús tojanëjua: —Motsajna y šmochjauyana chë corente studio bomná, mo tjañe mesetca: “Minÿe, mënté y yëfse entsángbentsana bacna bayëjënga sëndëtëbuacana y soquënga sëndáshnaye, y baseftaytesna chan-japochóca ca.”

³³ Pero atše sontsemna mënté y yëfse jtsayana, y baseftaytesna Jerusalemoye jana, er ndoñe tsábá ntsemnana canÿa Bëngbe Bëtsabe juabna oyebuambnayá Jerusalemëntša chábuañe chaóbana ca.

³⁴ “¡Jerusalemëntša entsanga, Jerusalemëntša entsanga, tsëngaftanga chë Bëngbe Bëtsabe juabna oyebuambnayënga jtsébáyana, y chë Bëngbe Bëtsabe ichmónëngbiyoe ndëtšbëngaca jtsatëchënganjana jtsébáyama! ¡Bueta soye atše sënjábóšena tsëngaftanga átšbiyoe júbuajama, mo canÿe tuamba chabe bolletotëmënga juatëngmiásha tajsoye cuaftajayecá, pero tsëngaftanga ndoñe chešmátsbošena!

³⁵ Y šmochjinÿe, mora atše cachcá cbochanjesënyaye, y chca, atšna enánanga cbochanjésabashejuana, mo canÿe yebna cachcá tcojesonÿá y énañe tcojeseboshjoncá. Y ndegombre, tsëngaftanga morscana ndoñe más atše quešmochátinÿe; y atše šmochántinÿe, chë: ‘¡Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” —Jesús tojánayana.

14

Jesús, canÿe uafshachanána šocábioye tbojanšná

¹ Canÿe ochnayté, Jesús tojána jasama fariseungbe canÿe amëndayabe yebnoye; y chë fariseunga yejuana imojtserreparana, er ndayá Jesús nanjama.

² Chéntšnaca, chabe delante yojtsemna canÿe entsá uafshachanána šocá.

³ As Jesús chë ley abuátambayënga y fariseunga tojanatjá: “¿Quenlesenciana canÿe ochnayté canÿe šocá jáshnama o ndoñe ca?”

⁴ Chëngna ndocá tmonjanjuá. As Jesús chë šocábioye tbojánishache, tbojanšná y tbojanayana chaotsatoñe ca.

⁵ Y chë fariseunga tojanëyana: “¿Nda tsëngaftanguentšá, nderado chabe uaquiná o uacná canÿe tboye tojtsótsatše, cachora ndoñe nanjá jet-sejátsëcama, masque ochnayté totsomñëse ca?”

6 Y chënga ndocá tmonjanobená cha jojuana.

Chë casamentoye ófjanënga

7 Jesús tojáninÿe ntšamo chë ófjanënga quëfseroye imojtsachnjëjuana jotbiama; as mëntšá chënga tojanabuayená:

8 “Canÿe casamentama nda chacmojojfa ora, quëfseroca ndoñe catjót'bema, er nderado inÿe ofjaná acbiama más uamaná ústonoye nandaboye;

9 y nderado chë tsëndatbe ofjajaná nanjabo y cmatjauyana: ‘Mua chentše chaót'bema, maluaré ca’, y chora cmatjotóca ouatjentše chafjoca jana jatót'bemana.

10 Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiamá uamaná cochántsemna.

11 Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema ca.”

12 Y chë tbojanofja entšábioynaca Jesús mëntšá tbojaniyana: “Fiesta chacojama o sananga chacojtsebmna ora, ndoñe cattšëbuájajana acbe amiguënga, catšátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebmna ora, aca cmochantëtofja, y chca ya acbe uacanana soye cochántsebmna.

13 Chamna, canÿe fiesta chacojama ora, cochjúbuaja ndbomnjëmënga, jama ndobenënga, coshetënga y jtanënga,

14 y aca corente oyejuayá cochántsemna; er chënga ndoñe quemochatobeyenaye cachcá aca jtëtofjana, pero acna acbe uacanana soye cochántsebmna, chë Bëngbe Bëtsabe bominiñe tsábenga imomnënga chamojtayena ora ca” — cha tbojaniyana.

Chë bëts sanama cuento

(Mt 22.1-10)

15 Chca tojanuena ora, canÿa chë mesëshentše tbemaná tojánayana: — ¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

16 Chora Jesús tbojaniyana: —Canÿe bacó canÿe bëts saná yojapróna y ba entšanga yojúbuaja.

17 Juasama ya yojobuache ora, canÿe oservená ibojíchmua chë ófjanënga jáuyanama chamotsajna, ya lempe yojtseprontana ca.

18 Pero chorna nÿetscanga imojontšë jtsoyátšëmbuana. Canÿa yojayana: “Cabá mora canÿe fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.”

19 Inÿa yojayana: “Bnëtsana toronga sënjobuámiñe, y šontsemna jana jánjama, jáarama taimochjosérvia. Chcasna, aslëpaye šmotsepacenciá ca.”

20 Y inÿa yojayana: “Cabá mora sëntsobouamá, y chë causa, ndoñe quichatobenaye jama ca.”

21 Chora chë oservená yoješshëcona y lempe chabe nduíñbiyoye ibojauyana. Chë nduíño tša ibojtsetna, y chë oservenábiyoye ibojauyana: “Cam ora motsa tsashenangoye y benachëngoye, y moye cochjunatse ndbomnjëmënga, jama ndobenënga, jtanënga y coshetënga ca.”

22 Chentša bënëntscose, chë oservená chë nduíñbiyoye ibojauyana: “Bacó, ya sënjama ntšamo šconjamandacá, y cabá inÿengbiamá luare entsemna ca.”

²³ As chë nduiño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojtjijama;

²⁴ er ndegombre chëyana, chë natsana sënjobuajënguentšá ndocná atšbe saná queochatsse ca.”

Ntšamo yomna Cristbe ustoná jtsemnana

(Mt 10.37-38)

²⁵ Mallajta entšanga Jesús imojtsëstona; as cha tojanobuértana y tojanëyana:

²⁶ “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénganga tuababuánjeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsoberenana atšbe uatsjendayá jtsemnana.

²⁷ Y nda, atšbiana ndoñe tontseprontana jasúfriama y cruciñe jobanámnaca, y nyetsca chabe quem luare soyënga ndoñe tonjëseboshjona atše juastama, cha ndoñe ntsoberenana atšbe uatsjendayá jtsemnana.

²⁸ “Nderado nda tšëngaftanguentšá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyëtšá crocénana tayojtsebonnana?

²⁹ Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinýënga, muantsáfchaye y mëntšá muantsichamo:

³⁰ ‘Quemëjema jajebuama tonjontsé, y japochócama ndoñe chenatobená ca.’

³¹ “O ¿ndaye rey inye réyefata jéntsjava tbojotocase, natsana ndoñe nanjót'bema jajuaboyama, nderado nanjobenaye bnëtsana uaranga soldadëngaftaca chë ínýabioye jayëñjanana, chë inýa uta bnëtsana uaranga soldadëngaftaca tojtsabose?

³² Y ndóñesna, chë inye rey cabá bënoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

³³ “Chcasna, ndánaca tšëngaftanguentšá, lempe ntšamo tobomncá ndoñe cachá tonjesonýá, cha ndoñe ntsoberenana atšbe uatsjendayá jtsemnana ca” —Jesús tojánayana.

Chë tamó fténana tojtsebocna ora

(Mt 5.13; Mc 9.50)

³⁴ “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaot-satsmënana, ni saná jatamuyama. Chë ftëna tamó tondayama ntoservénana, cachcá, chë atšbe uatsjendayënga jtsemnana tmojtsebošënga, pero lempe jëseboshjonama ndoñe tmontseboše, cach ndoñe chama ntoservénana.

³⁵ Chë ftëna tamó ndoñe ntoservénana ni fshantsama, ni uanguanëshama. Nye jtsëtšenana. Chë jouenama tmojtsobenënga, šmochjouena ca” —Jesús tojánayana.

15

Chë ótšëna oveshabiana cuento

(Mt 18.10-14)

¹ Nyetsca chë Romocama impuesto entšángbioye atjanayënga y inye bacna soyënga amënga, Jesúsbioye imojánajna chabe palabra jouenama;

² y chë fariseunga y ley abuátambayënga chama Jesusbiam a podesca imo-tsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

³ As Jesús mëntšá tojanacuntá, chënga jabuátambama:

⁴ —¿Nda tšëngaftanguentsá, canye patse oveshënga tojtsabamna, y canya tbojtsobuëtsëse, chë inye esconëfta bnëtsana y esconëfta oveshënga shëntsjañe ndoñe cachcá nanjesënyäye, y nanjá chë otšená jetsenguanguama candëtsónyëñëntscuana?

⁵ Y tbojtsinýena ora, oyejuayá chë oveshá jesotantšájuaana;

⁶ y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšeftaca móyejuanga, er chë sëntsano buetšë oveshá sëntsinýena ca.”

⁷ Atše chëyana, cachcá, celócnaca más oyejuayana jtsebínýnana, canye bacna soyënga amá tšabe benache tojtishachabiam a, y ndoñe nýa yapa, esconëfta bnëtsana y esconëfta tšabe soyënga amëngbiam a, chë ndoñe yondu-jaboto bacna soyënga amana jtsajbanana ca.

Chë crocénana tojtsónýena shembásabiam a cuento

⁸ “O mëntšá, ¿ndëmua shembása, bnëtsana uámana crocénana tojtse bomna y canýana tojtsobuëtsëse, chora ndoñe canye uajuinýanësha nanjuajuinýená, y cuedádoca chë yebna nantsetsajoy y botamana chë crocénana nantsenguango candëtsónyëñëntscuana?

⁹ Y tojtsinýena ora, chabe amiguënga y juachañe oyena shembásenga jáchembuana, y mëntšá jáuyanana: ‘Atšeftaca móyejuanga, er chë sëntsano buetšë crocénana sëntsinýena ca.’

¹⁰ Atše chëyana, cachcá, chë Bëngbe Bëtsabe angelotémëngbeñe oyejuayana jtsebínýnana, nýe canye bacna soyënga amá chë tšabe benache tojtishachabiam a ca” —Jesús tojánayana.

Chë uaquiñá bacna benachiñe ayá

¹¹ Jesús mëntšánaca tojanacuntá: “Canye entsá uta uaquiñata yojánabamna;

¹² y canye, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšeta ca.’ As chë befta lempe chë uta uaquiñata yojtëjätaye.

¹³ “Chentsana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocénánaca bën luaroye yojtsoñe, y choca, cha nýe ntšamo ibojocochëngcá, mocá yojenobuiye, y chca, lempe yojtse-pochóca.

¹⁴ Lempe crocénana yojtsoshañe orna, bëts shëntsana chë luarentse yojóshjango, y chë causa cha ibojotóca shëntseca jtsejétanana.

¹⁵ As, cha yojá trabajo jongoangoñama y yojínýena chë luarentša canye entšábentšë; chana, chabe jajoye ibojíchmu a cotšënga jtsanýenama.

¹⁶ Chë bobontsna yojtsebošë chë cotšbe saná jtsesana, pero ndocná ton-daye ibonjanájuatšnaye.

¹⁷ “Cabana, botamana yojinýe ntšamo yojtse pasacá, y mëntšá yojenójuaboye: ‘¿Bueta trabájayënga atšbe taitabe yebnentšë bëtscá saná mondëtsó bomñe, y atšë muentšë shëntsama chanjóban a ca!

¹⁸ Chantá atšbe taitabe yebnoye y mëntšá cha chanjuayana: Taita, šmotseperdoná. Atšë tijama ndayá Bëngbe Bëtsá ndoñe yondbošcá, y ntšamo aca ndoñe condbošcá.

19 Mora ya merecido taitatobuajoñe acbe uaquiñá jtsabáinama; n̄ye can̄ye acbe trabajayacá Diosmanda šmatofja ca.'

20 Chca jétsenójuaboyése, yojontsé cachabe yebnoye jtana.

"Cabá bēnoca yojtsemna ora, chabe taitá chábioye ibojin̄ye, y chabe uaquiñabíama ibojóngmia, y jajénguama betscó yojá; ibojajebengo, ibojtotsejcuá y tša yojtsóyejuayama chē uaquiñábioye ibojtámocho.

21 Chora chē uaquiñá ibojauyana: 'Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.'

22 Pero chē Taitana chabe oservénēnga yojámēndaye: 'Betscó chē más tšabe entšayá mauaca y matspormanga, montšabuechētjo y matsshecochētjo.

23 Mora chē más min̄yica uacná šmochjuánatse y šmochjášhbu. ¡Mochjase y mochjóboyejuaye ca!

24 Quem atšbe uaquiñá mo obanacá endánmēna y mora bēnga montsetátsēmo cha ainá yotsomñama. Quem atšbe uaquiñá mo otšenacá endánmēna y mora tmontsin̄yena ca.' Y chentšana imojontsé joboyeuayama.

25 "Chē yebnoca fiesta yojtsemnēntscuana, chē mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye.

26 As chora cha can̄ye oservenábioye ibojachembo y mēntšá ibojatjaye: '¿Ndayá bēngbe yebnentše yojtsopasana ca?'

27 "As chē oservená ibojojuá: 'Acbe uabentsá tontashjango y chama acbe taitá tojtarié chē más min̄yica uacná jášhbuama, cha tšabá tojtashjanguama ca.'

28 Pero chē uabóchena catšatna corente ibojtsetna y ndoñe yontseboše tsoye jtamashēnguana. As cach befta yojábocna chē catšátbioye jaimpádama chauatamashēnguama.

29 Chora cha chē taitábioye ibojauyana: 'Taita, aca condētátsēmo bueta uata cbetsajabuáchanama, n̄yets tempo cbetseyeunanama, pero ndocna te ni mo can̄ye chivotema chešcaisatšá atšbe amiguēngaftaca joboyeuayama.

30 Y masna, acbe uaquiñá chē bacna vida bomna shembásengaftaca acbe crocénana pochocayá tojtashjango ora, chē más min̄yica uacná chabíama tcojášhbu ca' –chē uaquiñá ibojauyana.

31 "Chora chē befta ibojojuá: 'Atšbe uaquiñá, aca sempre átšeftaca condētsemna y lempe ntšamo atše tsbomncá acbiámnaca endmēna.

32 Pero mora tšabá entsemna joboyeuayama y joyeuayēngama; er acbe uabentsá mo obanacá endánmēna, y mora bēnga montsetátsēmo cha ainá yotsomñama; mo otšenacá endánmēna, y mora tmontsin̄yena ca.' "

16

Chē nduiñbe ndoñe tšabe uajabuachanábíama cuento

1 Jesús mēntšánaca chabe uatsjéndayēnga tojanacuntá: "Inamna can̄ye bomna entšá, y cha ibnabomna can̄ye uajabuachaná chabe soyēnga chaotsin̄yena; y chē nduiño imojunenaye chē uajabuachaná chabe soyēngaca ndoñe tšabá yontsamama.

2 Asna, chē nduiño ibojachembo y mēntšá ibojauyana: '¿Ntšamo acbíama šmotsatsētsnacá ndegombre yojtsemna ca? Mora cuenta šmatatšá ntšamo

atšbe soyëngaca tcojamama, er morscana ya ndoñe atšbe soyënga inyëná quecochátsmëna ca.'

³ Chë uajabuachaná yojontšé jenójuaboyana, y mëntšá yojeniyana: '¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sëntséuatja.

⁴ Ya sëntsetatšëmbo ndayá chjama, chca, atšbe trabajuentšana chašojtábocna ora, atše jtsabamnana ndëmuanýenga chëngbe yebnentše chašmofjama ca.'

⁵ "Chentšana, canýánja chë chabe nduíñbiye ndebénënga yojáchembo. Cánýabiye ibojatjaye: '¿Ntsachetšá atšbe nduiño icondebena ca?'

⁶ Y cha ibojujá: 'Canýe patse barrilëšangá aceitiye ca.' As cha ibojauyana: 'Muentše acbe recibëcha entsamna; mora mótbema y inyácha nýe shachna bnëtsana barrilëšangama matapormá ca.'

⁷ Chentšana inýabiye ibojatjaye: 'Y acna, ¿Ntsachetšá icondebena ca?' Y cha ibojujá: 'Canýe patse medida trigo ca.' As cha ibojauyana: 'Muentše acbe recibëcha entsamna; chiñe nýe posufta bnëtsanama mábema ca.'

⁸ Chentšana, chë nduiño tšabá yojayana chë ndoñe tšabá ama mayor-dombiama, cha stúdioca yojamama. Chë nýe quem luarama enójuabnaye entšanga, cachëngbe soyëngaca puerte studio bomnënga mondmëna; y chë entšangbe juabnënga binýnayábenga ndoñe nýa yapa ca.

⁹ "Atše cbabuayená, quem luarentše, chë bacna soyënga amëngbe luar-entša bomnánaca amiguënga smochjábiana, inýenga jtsëjabuáchanëse. Chca, chë bomnana tojtsopochocá ora chašmotsabamna ndëmuanýenga chë nýetsca tescama oyenoye chacmúbuajama ca.

¹⁰ "Nda básefta soyënguñie lempe tšabá tojama, bëtscá soyënguñínaca lempe tšabá echanjama; y nda básefta soyënguñie ndoñe tšabá tonjama, bëtscá soyënguñínaca cach ndoñe tšabá queochatsma.

¹¹ Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanýiye?

¹² Y chë ndoñe tšëngaftangbe sóyeca ndoñe tšabá šmonjamëse, ¿nda cmoch-jantšabuáchiye ndayá tšëngaftangbiama yomncá ca?

¹³ "Ndocná ntsoebenana uta mandayata jtsaservénana; er cánýabiye bochantšáboyënja y chë inýabioyna bochantsebobonshana, o cánýabiana tšabá echántsetrabajaye, y chë inýabiamna ndoñe tšabá. Ndoñe quecátobena Bëngbe Bëtsá jtsebobonshánana, nýe quem luarentša soyënga jtsebomnana tcojtsebošëse ca" —Jesús tojánayana.

¹⁴ Chë fariseunga, becá crocénana jtsebomnana bošënga imnamna, lempe chca chënga tmojanuena, y Jesúsbiye imojtsáboyejuana.

¹⁵ As Jesús tojanëyana: "Tšëngaftanga entšangbe delante mo tšábënga cuaftsemncá jtsebobonshánana, pero Bëngbe Bëtsá endëtatsëmbo ndayá tšëngaftangbe ainaniñe yomnana; er ndayá entšanga más tojtsebošcá, Bëngbe Bëtsá jtsáboyënjana ca.

Moisesbe ley y Bëngbe Bëtsabe amëndayana

¹⁶ "Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiyá, Juan chë Ubayaná quem luaroye tonjánabëntscuana. Cha tonjánabo orscana montsabuayiyá chë tšabe

noticiënga Bëngbe Bëtsabe amëndayocama, y nyëtscanga tša montseboše choye jamashënguama ca.

¹⁷ “Más paselo endmëna, celoca y quem luare chaopochocá, y ndoñe chë ntšamo leyíñe iuayancá, chë ndayá jopásama yomnama, ni mo canye punto ndoñe chca chaondëtsemnama ca” —Jesús tojánayana.

*Ndayá Jesús tojanabuatambá chë bouamnënga tmojtšenëtšenama
(Mt 19.1-12; Mc 10.1-12)*

¹⁸ “Nda chabe shëmbioye cachcá tbojesonýá y ínÿaftaca tojtóbouamase, cha chë natsana shëmbioye ínÿaftaca jtseingñayana; y nda chë útšena shëmbásaftaca tojobouamá chana, canye uabuatmá jtsebomnana, y chca, chana canye bacna soye jtsamana ca” —Jesús tojánayana.

Chë bomná y chë ndbomnjëma Lázaro

¹⁹ “Canye bomna entšá inamna; cha yojanamana uámana y botamana shbuenda uafjatsenga y lino entšayangá jtichëtjuana, y cada te bëts fiestënga yojánama.

²⁰ Canye ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bëshëntšë fshantsiñe jótbemana.

²¹ Quem ndbomnjëma yojtseboše chë bomná yojtšesayentšana yojatquëcjana sanángaca jtoshachayana; y chë quešënga innaboye chabe nguaye cuerpo jajáfuama.

²² Canye te Lázaro yojtšóbana, y Bëngbe Bëtsabe angelënga Abrahambioye cha imojtamba, chë nyëtscanga oyejuayënga mondmëna luaroye. Chë bomnánaca yojóbana y imojuátbontsa.

²³ “Chë bomná infiernoca puerte ngmëniñe yojtšesufrina ora, tsbanánoye yojontješiyë y bënoca Abraham ibojinýe, y Lázaro cháftaca yojtsemna.

²⁴ As chë bomná yoyuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša sëntsesufrina ca.’

²⁵ Pero Abraham ibojauyana: ‘Uaquiná, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátšbomna; pero morna, cha tšabá y oyejuayá entsemna, y aca jabuache ngmënanana contsebomna.

²⁶ Y inye soye, canye bëts tbuañe entsemna tšëngaftangbiocana mëntšcoñe; chca, chë tšëngaftangbioye muentšana jenachnënguama tmojtsebošënga ndoñe chamondëtšobena, ni chocana bëngbioye cach ndoñe ca.’

²⁷ “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye;

²⁸ choca sëndábamna shachna catšátanga; as chaúyana ntšamo moca atšë stsepasana y ntšamo jamëse chënga ndoñe chaondëtšamna quem ngmëñënga luaroye jabama ca.’

²⁹ Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojfétsanábema soyënga; jchëngbioye chamoyauná ca!’

³⁰ Chë bomná ibojuá: ‘Ndoñe, Taita Abraham; nderado obanënguëntšana canya chëngbioye tojase, aíñe chë tšabe benache muantishache ca.’

³¹ Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyauñe, Bëngbe Bëtsabeñe

ndoñe quemochatošbuáchiye, masque canye obaná chauatayenese, chéngbioye jábuayenama ca' ”—Jesús tojancuentá.

17

Resjo yomna, nderado bacna soyënga cuanjama

(Mt 18.6-7, 21-22; Mc 9.42)

¹ Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, itša lastema chë entšabiamana ndabe causa inyënga bacna soyënga tmojama!

² Más tšabá chabiamana nántsemna canye nantsnëbé chamotsetamosëntšbua y mar béjayoye chamotsashbuetše, y ndoñe chë canya Bëngbe Bëtsábeñe ošbuachiyá bacna soye chaomama juanatsana.

³ Cuedado šmochtsebomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna.

⁴ Masque nye canye te, canyëšfta soye ntšámnaca tcmojaborlá, y canyëšfta soye ‘chca ndoñe más quebochatsbórla ca’ tcmojauyanëse, aca cmontsemna cha jtseperdónana ca’ —Jesús tojánayana.

Bëngbe Bëtsábeñe jtsošbuáchiyëse, corente obenana jtsebomnana

⁵ Chë uatsjëndayënga Bëngbe Utabnábioye tmojanianana: —Ošbuáchiyana šmababaté ca.

⁶ Y chë Utabná tojanëjua: —Tšëngaftanga ošbuáchiyana, batšatema masque nye mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar béjayoca mojé ca”, y quem betiye chca nanjama ca.

Chë oservená ndayá ibomna jamana

⁷ “Nderado canya tšëngaftanguentšá canye bochichnayá tbojtsebomna, cha jajocana tojtashjango jajañe arayocana o uacnënga anyënocana, ¿chábioye bochjauyana: ‘Matabo y mabose ca’?

⁸ Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofšiyë ca.’

⁹ Y chë bochichnayábioye ndoñe quebochtëtschuaye ndayá tbojuatarieca cha tojamama.

¹⁰ Tšëngaftángnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: ‘Nduámana oservëñënga fsëndmëna; er nye ntšamo jamama šuamncá tifjama ca’ ” —Jesús tojánayana.

Jesús, bnëtsanënga bacna nguayanánaca šoquënga tojanashná

¹¹ Jerusalenoye benache, Jesús tojánachnëngo Samaria y Galilea luarëjana.

¹² Y canye pueblotëmoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá,

¹³ y mëntšá imojtsáyebuache: —¡Jesús, Buatëmbayá, šmotsalastemá ca!

¹⁴ Jesús chënga tojánanyë ora, tojanëyana: —Jerusalenoca bachnángbioye motsajna, y chënga šmochjínnyányiye tšëngaftanga mora ndëšoquënga šmojtsemnana ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye.

15 Can'ya chënguentsá, shnaná yojtsemnama tojáninye ora, yojesshëcona Bëngbe Bëtsábiye jabuache atschuanaye;

16 y Jesusbe delante yojoshëntsamentšiyë, jubiaca fshantsóntsoñe yojot-sejbëna, y chábiye ibojtsatschuanaye; y chë boyabásana Samarioca entsá inamna.

17 Chora Jesús tbojaniana: —Bnëtsanënga mondmëna chë shnánënga tmontoquedanga. ¿Ndayentšë chë in'ye esconëftanga imojtsemna?

18 ¿N'ye quem boyabása, in'ye luarocana ashjanganá, tojesshëcona Bëngbe Bëtsá jëtschuayama? ¿Ndáyeca chë in'yenga ndoñe ca?

19 Y chë entsábiye tbojaniana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatmëna ca.

Ntsamo Bëngbe Bëtsabe amëndayana yochjòshjango

(Mt 24.23-28, 36-41)

20 Can'ye, chë fariseunga Jesús tmojantjá, mocna ora chë Bëngbe Bëtsabe amëndayana yochjanòshjanguama; y cha tojanëjua: “Bëngbe Bëtsabe amëndayana chaojòshjango ora, tsëngaftanga ndoñe quešmochatobenaye chca jin'yana.

21 Chora ndoñe quemochátichamo ‘Muentšë entsemna’ o ‘Choca entsemna ca’; er Bëngbe Bëtsabe amëndayana ya tsëngaftangbeñe entsemna ca” —cha tojánayana.

22 Jesús chabe uatsjëndayënga tojanëyana: “Can'ye tempo echanjòshjango, y chora tsëngaftanga šmochántseboše can'ye te jtsebmomnana, ntsamo chë Bëngbe Bëtsá Entzá tbojanbemá tsëngaftangbeñe enjëftsemna orcá; pero chora ndoñe chca queochatòshjango.

23 Chora báseftanga mochántsicamo: ‘Muentšë entsemna’ o ‘Choca entsemna ca’; pero choye ndoñe šmatjá, ni šmatjüseto.

24 Er chë tojatcuin'ye ora, ntsamo celoca catoica juachoica tojabuash-in'yin'yenacá, chca echántsemna chë Bëngbe Bëtsá Entzá tbojanbemá quem luaroye chaojésabo te.

25 Pero natsana cha bontsemna puerte jasúfriana, y morsca entsangbiana uabotená jtsemnana.

26 “Ntsamo Noé yojaniyena ora tojanopasacá, cachcá echanjopása chë Bëngbe Bëtsá Entzá tbojanbemá quem luaroye chaojésabo ora.

27 Chë tempo, entsanga imnasaye, imnofšësnaye, imnóbouamnaye; natjëmbana imojtsiyëne, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entsanga tojtsanapochocá.

28 Cachcá ntsamo Lot yojaniyena ora tojanopasacá: entsanga imnasaye, imnofšësnaye, imnóbouamnaye, imojtsena, sananga imnajena y imnaje-buana;

29 pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana íñeshe y azufre chauaftema, y chentša entsanga tojtsanapochocá.

30 Cachcá echántsemna chë Bëngbe Bëtsá Entzá tbojanbemá chaojton'yná ora.

31 “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebmomñëse, chocana ndoñe chaondëstajango chë soyënga jesabobocnama; y nda jajoca chaojtsemna, yebnoye ndoñe chaondëta.

³² Menójuabonga ntšamo Lotbe shémaftaca tojanopasama.

³³ Nda tojtsentsena quem luarentše bētsca jtsebomnama y atšbiana jasúfriama ndoñe tontseprontana, chē n̄yetsca tescama yomna tšabe vida echanjobuetše. Pero nda quem luarentša soyēnga cachcá tojonýa atše juastama, masque chaóbana, chē n̄yetsca tescama yomna tšabe vida echántsebomna.

³⁴ “Atše chēyana, chē ibeta, chē Bēngbe Bētsá Entšá tbojanbemá chaoj-tonýná ora, útata canye jutsnēshañe bochántsemna; canya mochanjesbetše y chē ín̄yana ndoñe.

³⁵ Uta shembásata cán̄yĩñe bochántsejan̄ycoye; canya mochanjesbetše y chē ín̄yana ndoñe.

³⁶ Uta boyabásata jajoca bochántsetrabajaye; canya mochanjesbetše y chē ín̄yana ndoñe ca” —cha tojanéyana.

³⁷ Chora chē uatsjédayēnga Jesús tmojantjá: —Utabná, ¿ndēmoca chca yochjopása ca?

Y cha tojanjúá: —Chē obanabe cuerpo tojtsemnentše chē gallinacēnga jojotana ca.

18

Chē viudá y chē mandadbiama cuento

¹ Jesús mēntšá tojanacuntá, entsānga jabuátambama, Bēngbe Bētsáftaca n̄yets tempo jtseñcuentayana yomnama, ainaniñe añemo jtsebomnama ndocna te ntjajbanacá.

² Mēntšá tojánayana: “Canye pueblentše canye mandado inamna; chana ni Bēngbe Bētsábioye ndoñe bonjánebiauatja, ni entsānga yonjánayaunana.

³ Chē pueblentše canye viudánaca inamna; chana canye demanda yojánbomna. As chē mandádbioye yojobeconá y mēntšá ibojauyana: ‘Dios-manda atšbe uayayá motsecastigá ndayá šojaborlama ca.’

⁴ Baytē chē mandado ndoñe yonjábosena chē viudábioye joyeunayama; pero chentsana cha yojenójuaboye: ‘Masque Bēngbe Bētsá ndoñe quetsátebiauatja, ni entsānga ndoñe quetsátayaunana,

⁵ pero quem viudá cada ora endabó causa, añe chanjójeyunaye, chabe uayayá chanjacastigá; ndoñesna cada te nandaboye y cabana ya šochanjanamēntša ca.’ ”

⁶ Chentsana Bēngbe Utabná tojánayana: “Smonjouena ntšamo chē ndoñe tšabá ama mandado yojayancá.

⁷ Y chca, ¿Bēngbe Bētsá chabe bocacánēnga ndoñe yochanjátsebacaye? Chēnga mora ín̄yēngbe causa montsesufrina y cada te Bēngbe Bētsá mondbétseimpadana chaujúbuachama. ¿Más chamuatobatmá ca yochjáuyana?

⁸ Atše chēyana, Bēngbe Bētsá betscó tšēngaftanga cmochanjátsebacaye, tšēngaftanga chē ín̄yēngbe causa mora šmojtseufrínēnga. Pero chē Bēngbe Bētsá Entšá tbojanbemá chaojésabo ora, ¿cabá Bēngbe Bētsábeñe ošbuáchiyēnga quem luarentše entsānga yochján̄yena ca?” —Jesús tojánayana.

Chē fariseo y chē Romocama impuesto atjanayabiama cuento

⁹ Báseftanga imojtsanjuabná chēnga tšabe entsānga imnamna ca, pero chē ín̄yēngbioye imojtsēbuayēnja; chíyeca Jesús mēntšá tojanacuntá jabuátambama:

10 “Uta boyabásata Bèngbe Bètsabe bèts yebnoye tbojána Bèngbe Bètsáftaca jencuéntama: canya yojamna fariseo, y chë ínÿana, canÿe Romocama entsángbioye impuesto atjanayá.

11 Chocna chë fariseo, tsanana Bèngbe Bètsábioye mëntśá ibojtsecuéntaye: ‘Bèngbe Bètsá, cbontsatschuaná atše chë ínÿengcá ndoñe quetsatsmënama: atbëbanënga, puerta bacna soye amënga y shëmbioye ínÿaftaca ingñayënga; y ni quem Romocama impuesto atjanayacá ndoñe quetsatsmënama.

12 Atše sënduamana, ácaftaca jencuéntamna, canÿe semaniñe uta soye ton-daye ntjascá jtsemnana; y lempe stjonÿenentsana, bnëtsanentsana canÿe soye acbiana sëndëquëcñá ca.’

13 Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mëntśá yojtsichamo: ‘¡Atśbe Bètsá, šmotselastemá, atśajema bacna soye amá tsmëna causa ca!’ ”

14 Chentsana Jesús tojánayana: “Atše cbëyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bètsá tojtsenobiamná, nduamaná mochántsebema; y nda cachá nduamaná tojtsenobiamná, añe bètsá mochanjábema.”

Jesús, basetëmëngbiana Bèngbe Bètsábioye tbojanimpadá

(Mt 19.13-15; Mc 10.13-16)

15 Entśanga imojanamana Jesúsbioye basetëmënga junatsana chauabájajuama, y Bèngbe Bètsábioye chëngbiana chaboimpadama; pero chë uatsjëndayënga chca tmojáninÿe ora, tmojanontśé chë basetëmënga unachayënga jtsëcácanana.

16 Pero Jesusna chë basetëmënga tojánachembo, y mëntśá tojánayana: “Cachá mónÿaye chë basetëmënga átsbioye chamuabo, y ndoñe matëuyanana; er Bèngbe Bètsabe amëndayana endmëna chë mo quem basetëmëngcá imomnëngbiana.

17 Ndegombre cbëyana, nda Bèngbe Bètsabe soyënga ndoñe tonjòyëngacñe mo canÿe basetëmá jtsošbuáchiyëse, cha ndoñe queochatobenaye Bèngbe Bètsabe amëndayoye jamashënguama ca.”

Canÿe bomna entsá Jesúsbioye tojána

(Mt 19.16-30; Mc 10.17-31)

18 Canÿe mandayá Jesúsbioye tbojantjá: —Tśabe Buatëmbayá, ¿ndayá sojtsemna jamana chë nÿetsca tescama yomna tśabe vida jtsebomnana ca?

19 Y Jesús tbojanjá: —¿Ndáyeca ścjayuana “tśabia ca”? Tśabia nÿe canÿa endmëna: Bèngbe Bètsá.

20 Aca condëtatśëmo ntśamo Bèngbe Bètsá tojanmandacá: “Acbe shema ínÿaftaca ndoñe cattseingñaye, inÿa ndoñe catjóba, ndoñe catjatbëba, ndoñe catjuaboínÿena y acbe bètsëtsata ndoñe stëtsoye catjáquedaye ca.”

21 Chora chë boyabása tbojanjá: —Atše lempe chca bāsetema orscana sëndocumplina ca.

22 Jesús chca tojanuena ora, tbojanianana: —Cabá canÿe soye cmontsebuashbena jamana: lempe ntśamo icobomncá cochjetsatobuiye, y chë crocénana, ndbomnëjëmënga cochtsatsataye; chca, celoca canÿe bèts bomnana cochántsebomna. Chentsana, cochjabo y ścochjuasto ca.

23 Chë entsá chca tojanuena ora, puerta ngmënaca yojtsemna, er cha corente bomná inamna.

24 Chca ngmená tbojáninÿe ora, Jesús tojánayana: —¡Yapa totcá bomnëngbiana entsemna Bëngbe Bëtsabe amëndayoye jamashënguama!

25 Ndegombre, más paselo endmëna canÿe camello chë coshuffjentša atëfnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

26 Chora, chë chca imojouenënga tmojánayana: —¿As nda yochjobenaye atsbocaná jtsemnana ca?

27 Y Jesús tojanëjua: —Ndayá entsanga ndoñe mondobena jamana, Bëngbe Bëtsá aifñe endobena jamana ca.

28 Chora Pedro, Jesúsbiroye tbojanianya: —Bëngbe Utabná, aca contsonÿá, bënga lempe chë fsëndbomna soyënga fsënjëseboshjona, y ácaftaca fsëntsajna ca.

29 Jesús chora tojanëyana: —Ndegombre cbëyana, ndánaca Bëngbe Bëtsábioye jasérviana, chabe amëndayama jtsabuayiyayëse, cachcá tojëftseboshjona chabe yebna, shema, catšátanga, bëtsëtsanga o básenga,

30 cha mora quem luarentše chë soyëngama más echanjójyëngacñe, y chë inÿe luarocna, chë nÿetsca tescama yomna tšabe vida ca.

Jesús cachiñe tojánayana cha jóbana y jtayenama

(Mt 20.17-19; Mc 10.32-34)

31 Jesús chabe bnëtsana uta uatsjëndayënga barie tojánachembo, y mëntšá tojanëyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tbojanbemabiana tmojanabemcá;

32 er choca cha chë ndoñe judiëngbe cucuatšifñe mochanjáboshjona, y mochantsáboyejuana, mochanjójyenguango, mochántsebuashëtotoj;

33 y chamojátjanjentšana, mochanjóbá, pero unga tianoye cha echántayena ca.”

34 Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojtšëtsëtsnacá, er chëngbiana yojamna josértama ndopodena soyënga.

Jesús, Jericó puebloca canÿe jtanábioye tbojanshná

(Mt 20.29-34; Mc 10.46-52)

35 Tojanopasá, Jesús Jericó puebloye yojtsebëconaye ora, canÿe jtaná be-nache juachañe inatbemana, lemošna otjanañe.

36 Entšanga chëjana imojtsachñëjuanama tojanuena ora, yojanotícia ndayá yojtsoapasana ca,

37 y chë entsanga tmojanianya, —Jesús Nazaretocá entsebeconá ca.

38 As cha yojtšë uayebuáchana: —¡Jesús, Davídbentšana Entšá, šmotselastemá ca!

39 Chë natsana imojtsajnënga chë jtaná imojtsácacana, iytëca chaóbemama; pero cha más yojtšáyebuache: —¡Davídbentšana Entšá, šmotselastemá ca!

40 As Jesús tojantsá y tojanmandá cha chamobetsama. Cha ya bécoñe yojtsemna ora, Jesús tbojantjá:

41 —¿Ndayá cojtseboše atše acbiana chjamama ca?

Y chë jtaná tbojanjuá: —Atšbe Utabná, atše sëntseboše chašuatábínÿnama ca.

42 Chora Jesús tbojanianya: —Matinÿe, Bëngbe Bëtsábeñe betsošbuachéyeca shnaná contsatsmëna ca.

⁴³ Y cachora cha tsabá ibojtabinýna, y Jesúsbioye ibojtséstona, Bèngbe Bètsá atschuanaye. Y nýetsca entšanga, chca tmojáninýe ora, Bèngbe Bètsá imojtsatschuanaye.

19

Jesús y Zaqueo

¹ Jesús Jericó puebloca tojánashjango ora, chë pueblëjana cha yojsachñëjuana.

²⁻³ Chora, canýe bomna entšá, chë Romocama entšanga impuesto atjanayèngbe amëndayá, Zaqueo ca uabainá, yojtseboše Jesús jinýama. Pero ndoñe yontsobena jinýama, bètsá entšanga causa y cha becuá inamna causa.

⁴ Chcasna, cha betesco natsanoye tojaftsanójtajo y canýe sicomoro betiyeshoye tojánasèngo, chca, Jesús chëjana tojtsachñëjuana ora, jinýama jobenayama.

⁵ Jesús chë betiyeshoye tojánashjango ora, tsbanánoye tojanontješë y Zaquéobioye tbojáninýe. As Jesús tbojaniyana: “Betsco chocana matastjango, Zaqueo, er mënté chanjá acbe yebnoye jatema ca.”

⁶ Chora Zaqueo betesco tojtastjango y chentšana puerte oyejuayá Jesúsbioye tbojanofja.

⁷ Entšanga chca tmojáninýe ora, tmojanontsé Jesusbe contra mëntšá ichámuana: “Jesús tonjá canýe bacna soyènga amabe yebnentše jatema ca.”

⁸ Chora Zaqueo tojantsá, Bèngbe Utabná Jesúsbentše, y mëntšá tbojaniyana: —Mouena, atšbe Utabná, atšbe bomna soyènguentšana tsèntsañe ndbomñëmènga chanjátsataye y nda más crocénana tiéftseyèngacá, chë ntsachtšá tiéftsefcama canta soye más chantoyiye ca.

⁹ As Jesús tbojaniyana: —Mënté, aca acbe bacna soyènguentšana atsbocaná contsemna, er Zaqueo, ácnaca Abrahámbentšana entšá condmëna.

¹⁰ Er chë Bèngbe Bètsá Entšá tbojanbemá tojabo chë pochocánènga jtsemnama imojtsajnènga jabétsanguama y jabátsebacama ca.

Chë crocénanama cuento (Mt 25.14-30)

¹¹ Entšanga chë soyènga imojtsuenana, y Jesús inýe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bèngbe Bètsabe amëndayana ya yochjanóshjango ca.

¹² Jesús tojanëyana: “Canýe luarentša uámana entšá inýe bën luaroye yojá, cachabe luarentša rey chamobemama y chentšana cachábioye jtama.

¹³ Cabá nda ora, chabe bnëtsana oservénènga yojáchembo y bètsá crocénana cada cánýabioye yojéftsayentsbuachiye, y mëntšá yojéftšëyana: ‘Quem crocénanaca trato šmochjábema atše candëtabëntscuana ca.’

¹⁴ Pero cachabe luarentša entšanga cha imojuáya, as chëngna básefta entšanga imojichamuá chë inýe bën luaroca mëntšá chamuayanama: ‘bènga ndoñe queftsátsoše cha bèngbe rey chaotsemnana ca’.

¹⁵ “Pero pronto chë luarentša rey cha imojábema. Y chë luaroye yojtá ora yojamánda chë crocénana yojéftsayentsbuáchenga chamobéconama, jtsetatšëmbuama ntsachtšá cada ona chë crocénanaca yojongánama.

¹⁶ Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’

17 Y chë rey ibojuuá: ‘Tša tšabá, tšabe oservená. Aca quem base soyiñe ntšamo tchojamandacá tšabá tcojámayeca, bnětsana pueblentša mandado chacotsemnama cbojayé ca.’

18 Chentšana inya yojáshjango y yojayana: ‘Taita, acbe crocénana shachna soye más tonjoboté ca.’

19 Y chë rey ibojuayana: ‘Acnaca shachna pueblentša mandado cochántsemna ca.’

20 “Chorna inya yojobeconá y měntšá yojayana: ‘Taita, muentše acbe crocénana entsatsmēna; canye pañueléjuañe bonguana sěntsejajo.

21 Atše acbiamá uatjana šonjuábuache, er aca canye tšátjaye entšá condmēna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’

22 As chë rey ibojuayana: ‘Bacna oservená, cach acbe palabrěngaca chanjínjanyie aca ndoñe tšabá tconjamama. Atše chë ndoñe sěndbuajonentšana jocñana y chë ndoñe sěnjajé luarentšana jobuátbanana tsuamanama icojátatšěmběse,

23 ¿ndáyeca ndoñe tconjá chë crocénana bancoca jetsobuájua, y atše camoye matijtabo ora, maštoyé chë crocénana y chë chentšana tojoboté crocénanēnaca ca?’

24 Y chë chentše imojtsemna entšanga yojáuyana: ‘Chë crocénana motse-boca y chë bnětsana soye más tojabotébioye chana motsatšetá ca.’

25 As chěnga imojuuá: ‘¡Pero cha ya bnětsana soye más entsebomna ca!’

26 Y chë rey yojójuu: ‘Atše cbéyana, nda tojtsebomnábioye, más mochanjátšetaye; pero nda tondaye tondbomnábioye, chë tojtsejuabná batšatema yobomna sóynaca mochántseboca ca.

27 Y chë atše uayayěnga, chë chěngbe rey atše chaitsemnama ndoñe monjánbošěngna, moye mēnatse y atšbe delante šmochtsěbaye ca’ ” —cha chora yojayana.

Jesús Jerusalenoye tojánashjango

(Mt 21.1-11; Mc 11.1-11; Jn 12.12-19)

28-29 Chca tojěftsanayana chentšana, Jerusalenoye yojětsaye ora, Jesús tojánashjango canye tjšahoye, Olivos ca uabáiniñe, Betania y Betfagé pueblěnga bėconana. Chora, uta chabe uatsjėndayata tojanichamó,

30 měntšá jáuyaněse: “Tsěndatbe natsana entsemna base pueblotémoye mot-sata. Chašojáshjango ora, canye burrotema utsbuaná šochanjínjěna. Chábeñe cabá ndocná tonjenojayé. Sochjuafjoná y šochjuánatse.

31 Y nderado nda ndáyeca šojtsajafjná ca chacmojátjasna, šochjuayana: ‘Běngbe Utabná bontsajaboto ca.’ ”

32 Chë uatsjėndayata tbojána y lempe ntšamo Jesús tojaněyancá tbojáninjěna.

33 Y chë burrotema imojtsajafjná orna, chë burrotema nduiñěnga tmojaněyana: —¿Ndáyeca chë burrotema šojtsajafjná ca?

34 Chora chata tbojánayana: —Běngbe Utabná bontsajabótoyeca ca.

35 Chentšana Jesúsbioye chë burrotema tmojanánatse, y chë burrotémbeñe chatbe entšayá tbojanátatse, y chábeñe Jesús tmojanenjayé.

36 Y cha yojtsachnějuana ora, entšanga chěngbe entšayá benachějana imojtsětšatsana.

³⁷ Olivos tjashe tsmanoye yojtsebeconá ora, chë bëtscă entšanga, Jesúsbeñe ošbuáchiyënga, tmojanontšë uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama.

³⁸ Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

³⁹ Chë entšanguentše básefta fariseunga imojtsemnënga, Jesús tmojaniana: —Buatëmbayá, acbe ústonënga mëcácana chca ndoñe chamondëtsáyebuachama ca.

⁴⁰ Pero Jesús mëntšá tojanëjua: —Ndegombre cbëyana, mënga iytëca tmojobiamëse, chë ndëtsbenga manjuayebuáchena ca.

⁴¹ Jesús Jerusalén bëconana tojánashjango, y chë bëts pueblo tojáninÿe ora, chentša entšangbiana tojánenobošachna.

⁴² Y mëntšá tojánayana: “¡Malaye šmëntsetátšëmbo, nÿe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominÿama entsëitëmena.

⁴³ Er Jerusalenoca bacna tenga echanjóshjango; chora uayayënga chentša shëconánëjana canÿe tapiëse mochantsepórma, mochantsejëtja y nÿetsca juachocana mochanjontšë tšëngaftanga jtsatsejana,

⁴⁴ y lempe mochantsepochóca. Muentša oyenënga mochantsëbaye, y ni mo canÿe ndëtsbé inÿebé juatsboca quemochaiseboshjona, chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

Jesús, Bëngbe Bëtsabe bëts yebnentšana enënga y obuámnayënga tojtanëbuacna (Mt 21.12-17; Mc 11.15-19; Jn 2.13-22)

⁴⁵ Chentšana, Bëngbe Bëtsabe bëts yebnoye Jesús tojánamashëngo y tojanontšë chë chentše imojtsenënga chentšana jtëbuacnana,

⁴⁶ y tojanëyana: “Bëngbe Bëtsá chabe uabemana palabrënguiñe tojayana: ‘Atšbe bëts yebna echántsemna átšeftaca encuéntaye yebna ca’, pero tšëngaftangna, atbëbanëngbe oyeniñe chë yebna šmojtsebema ca.”

⁴⁷ Y cada te, Bëngbe Bëtsabe bëts yebnentše Jesús entšanga yojsabuátambaye; y bachnangbe amëndayënga, ley abuátambayënga y chë pueblëta mandayëngnaca imojtsenguaye ntšamo jamëse cha jóbana.

⁴⁸ Pero ndoñe tmonjáninÿena ntšamo, er nÿetsca entšanga corente imojtseyeunana ntšamo cha yojtsoyebuambnacá.

20

Jesube obenana (Mt 21.23-27; Mc 11.27-33)

¹ Canÿe te, Bëngbe Bëtsabe bëts yebnentše Jesús yojsabuátambaye, y chë tšabe noticiëngama yojsabuayiyiná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca canÿiñe;

² y Jesús tmojaniana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšëtá ca?

³ Chora Jesús tojanëjua: —Atšnaca canÿe soye sëntsebmna tšëngaftanga jatjayama. Smochjojuanga.

4 ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

5 Chora chënga tmojanontsé enatsëtsnayana: “ ‘Bëngbe Bëtsá ca’ chamojojuase, cha šochanjáyana: ‘As ¿ndáyeca chábeñe ndoñe šmonjanošbuaché ca?’

6 Y ndoñe quemuátobena jayanana ‘entšanga ca’; entšanga ndëtsbéngaca buattsébaye, er nyëtsanga becá mondëjuabná Juan ndegombre Bëngbe Bëtsabe juabna oyebuambnayá yojamama.”

7 Chcasna, chënga tmojanjuá ndoñe monjántatšëmbo nda Juan tbojanichmó entšanga jubáyama ca.

8 Y Jesús tojanëyana: —Asna atše cach ndoñe quebochatëyana ndaye deréchoca chca stsama ca.

Chë puerte bacna trabájayëngbiana cuento
(Mt 21.33-44; Mc 12.1-11)

9 Chentšana Jesús tojanontsé entšanga jáuyanana, y quem cuéntoca tojanabuatambá: “Canýe entšá uvas betiyënga yojáje y chë fshantse inýe trabájayënga yojúyentsame, y baytescama bën luaroye yojtsoñe.

10 Chë uvasëšangá juashacama tempo yojobuache orna, chë jajañe nduiño canýe oservená ibojíchmua chë trabájayënga jáuyanama ntsachetsá cha ibojtsotocánama. Pero chëngna cha imojtsejantšetaye, y tondaye ntoyycá imojtichmuá.

11 Chentšana inýa ibojíchmua; pero chë trabájayënga cha imojtsejantšetaye, imojtsóyenguango, y tondaye ntoyycá imojtichmuá.

12 Chë nduiño inýa ibojatichmuá; pero chánaca chënga imojtsejantšetaye, imojtselísia, y chentšana imojtábocna.

13 “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmua; nderádose cha aíñe mochanjóyeunaye ca.’

14 Pero chë trabájayënga, chë uaquiñá imojinýe orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyëtsca chabe otocana soyënga bëngbiana echanjoquéda ca.’

15 Chcasna, chë uvas jajañentšana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca?

16 Cha co echanjá y chë trabájayënga echanjetsébaye, y chë uvas betiyënga jajañe inýe trabájayënga echanjárrendaye ca.

Chë entšanga chca tmojanuena ora, tmojánayana: —¡Bëngaftaca ndocna te chca chaondopasá ca!

17 Pero Jesús tojanëñyanýe y tojánayana: —As ¿ndayama Bëngbe Bëtsabe uabemana palabrénguiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona ca.

18 Ndánaca chë ndëtsbeñe chaojotsatsá, chëbé bochántsatcacaye; y chë ndëtsbé ndábeñnaca chaojotsatše, polvëshe bochántsebema ca —Jesús tojánayana.

19 Chë bachnange amëndayënga y ley abuátambayënga tmojanenótatšëmbona Jesús chca tojanacuntá jinýanýiyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entšangbiana imojtsauatja.

*Chë Romoca bëts mandadbiama impuesto jtsatsquëcjnyama
(Mt 22.15-22; Mc 12.13-17)*

²⁰ Chentsana chënga báseftanga tmojanichamó, mo ndegombre tšabe entsanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama.

²¹ As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y abicama tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtoebomnama, ntšamo Bëngbe Bëtsá yomandacá.

²² Chcasna, šmëyana, çtšabá tayojtsemna bënga, César, chë Romoca bëts mandadbiama, impuesto jtsatsquëcjnyana o ndoñe ca?

²³ Jesús yojtsetatšëmbo, ntšamo cha tojayaniñe jisháchichiyama chënga imojtsebošama; as tojanëyana:

²⁴ —Chë šmatsquëcjná crocénana šminÿinÿenga ca; çndabe jubiá chë croceniñe yojtsemna, y ntšamo muentše entsabemancá nda chca iuabaina ca?

Y chënga tmojanjúá: —Césarbe jubiá; cha chca enduabaina ca.

²⁵ Y Jesús tojanëyana: —César šmochtoyiye cha ibotocana soye; y Bëngbe Bëtsana cha ibotocana soye ca.

²⁶ Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanëjúama, ojnanánënga iytëca imojobiama.

*Obanënga jtayenama Jesús tmojantjá
(Mt 22.23-33; Mc 12.18-27)*

²⁷ Chentsana, báseftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Jesús mëntšá tmojantjá:

²⁸ —Buatëmbayá, Moisés bëngbe leyënguiñe tojëftsanabema, nderado canÿe boyá tojtsóbana y básenga ndoñe tonjëftsabáshejuanëšna, canmëna chë uabentsá chë shémaftaca jtobouamayana, chca, chë chabe uabočená obanabiama básenga jtsabamnama ca.

²⁹ Chcase, canÿe bëngbentše canÿsëfta catsátanga monjamna. Chë natsaná tonjanobouamá y tontsanóbana, básenga ntjëftsabashejuancá;

³⁰ chentsana chë inÿa chë shémaftaca tonjanobouamá, y cachcá tonjanopasá.

³¹ Chë inÿe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inÿe uabentsëgnaca cháftaca tmonjanobouamá, pero nÿetscanga tmonjanóbana básenga ntjëftsabashejuancá.

³² Cabana, chë shembásanaca tontsanóbana.

³³ Y chcasna, chë obanënga chamojtayena ora, çndabe chë canÿsëfta catsatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

³⁴ Chora Jesús tojanëjúá: —Quem luarentše boyabásenga y shembásenga mondbëtsobouamnaye;

³⁵ pero chë echanÿojshango luaroye jama y obanënguentšana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye,

³⁶ ni queochátopodena chënga chamóbanama, y chca, chënga mochántsemna mo angelëncá, y Bëngbe Bëtsabe básenga mochántsemna, obanënguentsana mochtayénayeca.

³⁷ Y Moisésnaca, chë yojtsángbototjuana betiyetémama tojanábementse, bënga šontsinjánýná chë obanënga imnátayenama; chentse Bëngbe Bëtsá tojánayana cha yomna Abraham, Isaac y Jacobébe Bëtsá ca.

³⁸ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³⁹ Chora básefta ley abuátambayënga Jesús tmojanianyana: —Buatëmbayá, tšabá tcjayana ca.

⁴⁰ Y ya ndoñe más montsenñemua inýe soyëngama jatstjanayana.

¿Cristo ndabe entsábentšana yomna?

(Mt 22.41-46; Mc 12.35-37)

⁴¹ Jesús tojanatjá: “¿Ndáyeca tšëngaftanga šmnétsichamo chë Uámana Uabuayaná, chë Cristo, Rey Davidbentšana iuabó ca?”

⁴² Er cach David, chabe librëšañe Salmos ca uabainëšañe, tojánayana: Bëngbe Bëtsá, atšbe Utabná Crístbioye tbojanianyana:

‘Atšbe catšbioica mótbema,

⁴³ atšbe obenánaca, acbe uayayënga acbe cucuatšinë chamoquedama chjamëntscuana ca.’

⁴⁴ ¿Ntšámose, Cristo, Davidbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

Jesús chë ley abuátambayëngbiama tojánayana chënga ndoñe tšabá montsama ca

(Mt 23.1-36; Mc 12.38-40; Lc 11.37-54)

⁴⁵ Nyetsca entšanga imojtsuenana, y Jesús chabe uatsjëndayënga tojanëyana:

⁴⁶ “Cuedado šmochtsebomna, y ndoñe šmattsama chë ley abuatambayëncá; chënga jtsogusetánana bënëna entšayangaca jtsajnana, y jtsebošana tsáshenañe entšanga beca respétoca chamotsacheuanayama. Chënga chë judiëngbe enefjuana yebnënguenache chë más uámana luarënguñe jtsetbiámanana, y fiestënguñe nýa quëfseroca.

⁴⁷ Pero chë viudángbioye chë tmbomna soyënga jtsabacayana; y entšangbe delante tšabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínýëngbiama más chënga echanjácastigaye ca” —Jesús tojánayana.

21

Jesús yojtsënyaye chë crocénana quëcjayënga

(Mc 12.41-44)

¹ Bëngbe Bëtsabe bëts yebnentse, Jesús yojtsënyaye chë bomnënga crocénana jtsequëcjayana chë crocénana quëcjayëtëmiñe;

² y canýe viudá ndbomnjëmnaca tbojáninýe, uta crocénana chëtëmiñe yojaftsesegóra.

³ Chora Jesús tojánayana: “Ndegombre cbéyana, quem viudá ndbomnjëma, Bëngbe Bëtsabiamana nyetscangbiama más beca tonjëftsesegorá;

⁴ er nyetscanga tmonjëftsesegorá chë yojtsoýentšjamentššana, pero chana, masque tša ndbomnjema, cha vida jtsebomnama lempe ntsachetšá yobomncá tonjëftsesegorá ca.”

Jesús tojánayana Bëngbe Bëtsabe bëts yebna lempe mochjánpochocama (Mt 24.1-2; Mc 13.1-2)

⁵ Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámama ndëtsbéngaca y chë entsanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana:

⁶ –Canýe tempo echanjóshjango, y lempe ntšamo mora muentše šmontsonýacá tondaye queochatoquéda, ni mo canýe ndëtsbé inýebé juatsboye. Lempe mochantsepochóca ca.

Ntšamo yochtsemna quem luare jopochócama te chaojtsobeco ora (Mt 24.3-28; Mc 13.3-23)

⁷ Chora chënga tmojantjá: –Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

⁸ Y Jesús tojánayana: –Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántschamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye.

⁹ Y tšëngaftanga, entsanga imojtsentsjanama y entsanga mandadëngbe contra imojtsemnana chašmojtsuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

¹⁰ Y mëntšánaca Jesús tojanëyana: “Canýe luarentša entsanga, inýe luaroca entsangaftaca mochántsejtanaye; y canýe amëndayábentša entsanga, inýe amëndayábioca entsangaftácnaca.

¹¹ Ba luarënguñe jabuache echanjuangmëmmana, bëts shëntsana, y entsanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entsanga jinýanýiyama quem luare ya yochtopochócama.

¹² “Pero cabá ndoñe chca chaondochnëngo ora, tšëngaftanga mochanjishëche y chašmosufrima mochántsama; bënga judiëngbe enefjuana yebnëngoye mochanjunatse játssetšenama y cárceloynaca cmochanjútame, y reyënga y mandadëngbióynaca cmochanjunatse, atšbe ústonënga bëtsemna causa.

¹³ Chca šmochanjapása, ntšamo atšbiana šmotatšëmbcá chënga chašmëyanama.

¹⁴ Natsana ndoñe šmatjátsjuabnaye jenëuyanama ntšamo chora jóyebuambayana,

¹⁵ er atše chanjama puerte tšabá y osertanána tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsichamo ca, y ndocá jojuama quemochatobenaye.

¹⁶ Pero uayayëngbe cucuatšinë cmochanjábashejuana cach tšëngaftangbe bëtsëtsanga, catšátanga, pamíllanga y amiguënga; y tšëngaftanguentššana báseftanga cmochantsëbaye.

¹⁷ Y nyetsca entsanga cmochantsëbuayënja, atšbe ústonënga bëtsemna causa.

18 Pero tsëngaftangbe bestšašentšana ni mo canye stjënëja quecmochátabajajo.

19 Tsëngaftanga nyets tempo átsbeñe ošbuáchiyënga chašmojtsemnëse, chë nyetsca tescama yomna tšabe vida šmochántsebmoma ca.

20 “Jerusalén nyets šheconana soldadënga chašmojanýe ora, šmochtsetátsëmbo Jerusalén jopochócoma tojobuáchama.

21 Chorna, chë Judeoca oyenënga batsjabengoye chamotsacheta; Jerusalemntše chamojtsemnënga, chentšana chamuaisebocana; y chë jajenache chamojtsemnënga, Jerusalemoye ndoñe chamondésamashjna.

22 Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguife endayancá chora echanjochnëgo.

23 ¡Tša lastema chë tempo shembásenga ngomámanëngbiana o ochóchaye básenga chamojtsabamnëngbiamal Er chora corente ngmënana quem luarentše echántsemna, y quem luarentša entsangbiana chë uabouana castigo.

24 Inýenga espadëjaca mochanjóbana, y inýengbiyoye nyetsca luarënguëjana utámenënga mochanjunatse; y chë ndoñe judiënga, Jerusalemoca entsángbiyoye mochántsatsejaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

Bëngbe Bëtsá Entsá tbojanbemá quem luaroye echanjësabo

(Mt 24.29-35, 42-44; Mc 13.24-37)

25 Mëntsánaca Jesús tojánayana: “Chora bëts soyënga echantsinýna shinýiñe, juashconiñe y estrellënguife; y quem luarentša entsanga tša mochántsauatja, ndayá jamama ntsetatšëmbcá, chë mar béjaye y olëshënga corente echantsefshauenana causa.

26 Entsanga echantsabuatëcja tša auatja causa y ndayá quem luariñe yochjopásama enócochinýena causa; er chë quem luarentša tsbanánoca espiritënga obenana bomnënga echanjángmëmana.

27 Y chora entsanga mochanjinýe, chë Bëngbe Bëtsá Entsá tbojanbemá jantsetëshiñe echantsaboye, puerte obenánaca y corente buashinýinýaniñe.

28 Chë soyënga jochnënguama chaojobojatšé ora, añemo šmochjentsetaye y bestšaše játsbanase šmochjarrepára, er chora echántsemna chë tsëngaftangbe atsebacayana ca” —Jesús tojánayana.

29 Mëntsánaca Jesús tojánëyana jabuátambama: “Smochjinýe canye higo betiye o ndaye inýe betíynaca.

30 Tojtsaiséjotsanama šmojinýe ora, jtsetatšëmbuana chë tšabe tempo ya yojtsaisobecuama.

31 Cachcá, chë soyënga yojtsëchnëjuanama chašmojinýe ora, šmochtsetátsëmbo chë Bëngbe Bëtsabe amëndayana ya yojtsobecuama.

32 “Ndegombre cbéyana, lempe chca echanjochnëgo, morsca entsanga cabá ndóbana ora.

33 Celoca y quem luare echanjopochóca, pero atšbe palabra ndocna te queochaisopochóca.

34-35 “Cuedado šmochtsebmoma y ndoñe šmatjaleséncia tsëngaftangbe ainana bacna juabnëngaca chaotsemnana, jenomándama ntsobencá mocá enobuena causa, tmoye causa y nýe quem luarentša soyëngama enócochinýena causa; y tsëngaftanga prontánënga šmochtsemna, nýe ndeolpe chë te chaojobuache ora; y tsëngaftanga ndëprontánënga ndoñe chašmondëtsemna, mo tsëngaftangbiana canye uachmaniñe cuaftsemncá. Er nyetsca quem luarentša entsangbiana chca echántsemna.

³⁶ Cuedado šmochtsebomna y yejuana šmochtsantješna; n̄ye ntseco órnaca Bēngbe Bētsáftaca šmochtsencuéntaye, chca, chē echanjopása soyēngama jótsbocama chašmobenama, y chē Bēngbe Bētsá Entšá tbojanbemabe delante jashjanguama ca” —Jesús tojanēyana.

³⁷ Jesús, bnēté Bēngbe Bētsabe bēts yebnentše yojánabuatambaye, y ibetna, Olivus uabaina tjashoye yojánaye joquédama.

³⁸ Y n̄yetsca entšanga cabá cachēse Bēngbe Bētsabe bēts yebnoye imojánajna Jesús joyeunayama.

22

*Entšanga tmojanjuabó ntšamo jamēse Jesúsbioye jishachama
(Mt 26.1-5, 14-16; Mc 14.1-2, 10-11; Jn 11.45-53)*

¹ Ya yojétsobeco Bashco fiesta, chē levadúraca ndēpormana tandēse saye fiesta, chē Bēngbe Bētsá Egiptocana judiēngbe bēts taitanga tojánatsebacama jtenójuaboyama.

² Chē bachnangbe amēndayēnga y ley abuátambayēnga imojtsenguaye ntšamo jamēse Jesús jóbana, pero entšanghiama imojtsauatja.

³ Chora Satanás, Judas chē Iscariote ca uabobuatmabe ainaniñe bacna juabnēnga tojanjajó. Chánaca yojamna chē bnētsana uta uatsjendayēnguentšá;

⁴ y tojána, chē bachnangbe amēndayēnga y Bēngbe Bētsabe bēts yebnoca soldadēngbe amēndayēngaftaca jencuéntama, ntšamo Jesús chēngbe cucuatšifne jayentšbáshejuanama.

⁵ As chēnga imojóyejuaye, y Judas tmojanšbuachená crocénana chama jtatšetayana.

⁶ Y Júdasna aifne ca tojánayana; y cach orscana cha yojtsenguaye ntšamo jamana y ndēmua ora Jesús chēngbioye jayentšbáshejuanama, ndocna entšanga ora.

*Jesús chabe uatsjēndayēngaftaca Bashco saná tojanse
(Mt 26.17-29; Mc 14.12-25; Jn 13.21-30; 1 Co 11.23-26)*

⁷ Chē Bashco fiesta ora tojanóshjango, chē levadúraca ndēpormana tandēse sayté; chē te yojamna, Bēngbe Bētsá jētschuayamna can̄ye oveshá jóbana chora jasama.

⁸ As Jesús, Pedro y Juánbioye tojanēyana: —Motsata y saná sochjaprónta Bashco fiestama bēnga mochjasama ca.

⁹ Chora chata tbojantjá: —¿Ndēmoca cojtseboše chē saná fchjapróntama ca?

¹⁰ Y Jesús tojanējua: —Jerusalenentše chašojámashēngo ora, can̄ye bacó cmochanjóbiatše, matbajiñe búyeshe echantsabuyambaye. Cha sochjuasto, y sochtson̄yaye ndēmuan̄ye yebnentše cha yochjámashēnguama;

¹¹ y chentša nduiño sochjauyana: “Chē Buatēmbayá šonjichamó aca jauyanama: ‘¿Ndayentše chē tsañe yojtsemna, Bashco saná atše atšbe uatsjēndayēngaftaca jasama ca?’”

¹² As cha cmochanjín̄yan̄iye can̄ye bēts tsañe, tsbanana pisoca; ya lempe echántseprontana, y chentše, Bashco fiestama saná sochjaprónta ca.

¹³ As chē útata tbojána, y tbojánin̄yena lempe ntšamo Jesús tojanēyancá, y chentše chē Bashco saná tbojanprontata.

¹⁴ Jasama tojanobuache ora, Jesús mesēshentše tojanótbema chabe uatsjēndayēngaftaca, chē cachēnga más chcoye chabe ichmónēnga ca uabáinēnga.

15 Chora Jesús tojanéyana: “Tša sëndánboše quem Bashco saná tšëngaftangftaca jasama, atše cabá ndoñe chandësufri ora.

16 Muentšana ndoñe más quemëntša saná quicháisesse, Bëngbe Bëtsabe amëndayana candóshjanguëntscuana. Chora echantsótatsëmbo ntšamo quem fiesta ndegombre iuayancá ca.”

17 Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfsenga; y cbéyana,

18 chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

19 Chentšana, tandëse tojanca y Bëngbe Bëtsábioye tbojtanchuá; tojan-jatá, tojanatsatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

20 Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entsángaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entsanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana.

21 Pero chë uayayëngbe cucuatšniñe šochjaboshjoná, mesëshentše átšeftaca entsemna.

22 Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë bochjáboshjonabiama ca!” —Jesús tojánayana.

23 Chorna chë uatsjédayënga tmojanontsé entjanayana, chënguentšá nda chë boshjuaná bétsemnana.

Nda chë más uamaná yomna

24 Chë uatsjédayënga imojtsenatsëtsnaye chënguentšá nda chë más uamaná bétsemnana.

25 As Jesús tojanéyana: “Chë ndoñe judiëngbeñe, chë reyënga chëngbe entsángbioye nýe ntšámnaca jtsamëndayana, y chentša amëndayënga jtsamana, entsanga chëngbioye tšabe soye amënga ca chamotsëbobaútmama.

26 Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá.

27 Er, ¿ndase chë más uamaná yomna, chë mesëshentše jasama tojotbemá o chë uajuatšnyá? Ndegombre co chë mesëshentše tojotbemá; pero atšna tšëngaftangbeñe séntsemna mo chë oservenacá.

28 “Atšbe padecëniñe tšëngaftanga sempre átšeftaca šmondëtsemna.

29 Chíyeca, atšbe bariëna, canye amëndayana cbochanjátšataye, ntšamo atšbe taitá canye amëndayana šojatštacá;

30 chca, atšbe amëndayoca mesëshentše átšeftaca šmochanjase y šmochanjofsiye, y uámana tšemaniñe mo reyëngcá šmochanjotbiama, chë Israeloca bnëtsana uta pamíllanga entsangbiama chašmuayanama tšabá o ndoñe tšabá chënga tmonjamama ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)

³¹ Jesús mēntśánaca tojánayana: —Simón, Simón; cochtsetátśēmo, Satanás obenana tonjotjañe tšēngaftangaftaca n̄ye ntśámnaca jamama, mo chē trigo matēnga tcojtsashatiyeynacá;

³² pero atśna Bēngbe Bētsá sēnjaimpadá, átśbeñe ośbuáchiyana ndoñe chacmondētsebuáshbenama. Y aca, n̄yets ośbuáchiyana átśbeñe chacojtsats-bomna ora, chē in̄ye ośbuáchiyēnga cochjújabuache átśbeñe sempre chamot-sośbuáchemaca.

³³ Chora Simón tbojanayana: —Bēngbe Utabná, atśe sēntseprontana ácaftaca cárceloye jámnaca y jobanámncaca.

³⁴ Y Jesús tbojanayana: —Pedro, atśe cbēyana, cam ibeta bín̄yanoye, ngallo cabá ndécánta ora, aca unga soye cochanjayana ndoñe s̄conduabuatmaca.

Chē más jabuache ora yojtsobeco

³⁵ Chentśana Jesús tojanatjá: —¿Chē ni shecnájaca, ni crocenánaca, ni shecoch̄tjonēsheca tcbonjanichamó ora, nderado ndayá tmojanabuáshebena ca?

Y chēnga tmojanjuá: —Tondaye ca.

³⁶ Chora tojanéyana: —Mora ndoñe chca; shecnaja tobomná, chēja chauesocñe y crocenánama shecnébénaca; y nda ndoñe espadēja tondbomna, chabe quēfsaiya chaotsatábuiye y can̄ye espadēja chauatobuámiñe.

³⁷ Er cbēyana, entseyta átśeftaca chaopasá, ntśamo Bēngbe Bētsabe uabemana palabreñguiñe atśbiamá iuayancá, mēntśá: “Y chábioye tmonjánin̄ye mo chē puerte bacna soye amēnguentśá can̄ya cuaftsemncá ca.” Y lempe ntśamo atśbiamá iuabemancá, mora ya echanjochnēngo ca —Jesús tojanéyana.

³⁸ As chēnga tmojanayana: —Bēngbe Utabná, muentše uta espadēja entsemnaca.

Y japochócamna cha tojánayana: —N̄ye n̄yetśá ponto ca.

Getsemaní luarentse, Jesús Bēngbe Bētsáftaca tbojanencuentá

(Mt 26.36-46; Mc 14.32-42)

³⁹ Chentśana, Jesús tojánbocna y ntśamo yojanamancá Olivos tjashoye tojána, y chabe uatsjédayēnga tmojanasto.

⁴⁰ Choca tmojánashjajna ora, Jesús tojanéyana: “Bēngbe Bētsá moimpadanga, bacna soye jamama ndoñe chacmondócochēnguama ca.”

⁴¹ Y chē uatsjédayēngbentśana yojoluára, mo can̄ye ndētśbé jutšenēntscoca n̄yetśá, y yojoshēntsament̄siye Bēngbe Bētsáftaca jencuéntama.

⁴² Jesús mēntśá tojánayana: “Taita, aca tcojtsebośēse, moma atśe ndoñe chaōndētsemna chca jasúfriana. Pero ntśamo atśe steboścá ndoñe chaōndētsemna, sinó ntśamo aca cojtseboścá ca.”

⁴³ Chca orna celocana can̄ye ángel tbojánēbēbocna, añemo chaotsebomnama juajabuáchama.

⁴⁴ Jesús tśa ngmēniñe yojtsemna, y Bēngbe Bētsáftaca más ibojtsencuéntaye. Y chabe bosese yojtsemna mo fshantsiñe buiñe cuaftsebuastētjuancá.

⁴⁵ Bēngbe Bētsáftaca jencuéntama tojanpochocá ora, tojtantsbaná y chabe uatsjédayēnga imojtsemnoye tojána; y chēnga imnētsomañe, tśa ngmēnaca imojtsemnaca causa.

⁴⁶ Chora tojanéyana: “¿Ndayeca śmotsomañe? Motsbananga y Bēngbe Bētsá śmochtseimpadana, bacna soye jamama ndoñe chacmondócochēnguama ca.”

Uayayēnga Jesús tmojánishache

(Mt 26.47-56; Mc 14.43-50; Jn 18.2-11)

⁴⁷ Jesús cabá yojtsóyebuambnantscuana, ba entšanga chentše tmojánashajna. Chë Judas ca uabainá, canya chë bnëtsana uta uatsjendayënguentšá, chë entšangbe natsana yojtsaye. Cha yojobeconá Jesús juamóchama;

⁴⁸ pero Jesús tbojaniana: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšinë cochjaboshjona ca?”

⁴⁹ Chë Jesúseftaca imojtsemnënga tmojáninÿe ntšamo chora yochjanopásama; as tmojaniana: —Bëngbe Utabná, ¿espadéjaca fšcotsatsejaye ca?

⁵⁰ Y canya chënguentšá, chë bachnangbe más uámana amëndayabe bochich-nayábioye catšbioica matscuaše tbojtsantëtse, y tbojtsanëštjango.

⁵¹ Chora Jesús tojanëyana: —Cachcá monyá; nÿe nÿetšá ponto ca.

Y chë bochichnayábioye chë matscuaše tbojánbojajo y tbojanshná.

⁵² Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanëyana: “¿Ndáyeca espadéjagaca y ngarotbéngaca šmojabo atše jishachama, mo atše canye bacá uamana entšá cuaftsemncá ca?”

⁵³ Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanëyana.

*Pedro tojánayana Jesúsbioye ndoñe bonjanabuátma ca
(Mt 26.57-58, 69-75; Mc 14.53-54, 66-72; Jn 18.12-18, 25-27)*

⁵⁴ Chentšana Jesús tmojánishache, y chë bachnangbe más uámana amëndayabe ybnoye tmojánánatse. Y Pedro bënocana ibojtsëstona.

⁵⁵ Choca, chashja tsëntsaca, canye iñeshe tmojanangbotjó y entšanga chë shëconana imojtsetbiámana; y Pédrënaca chentše chëngaftaca yojótbema.

⁵⁶ Chora, canye shembása chentša oservená, Pédrëbioye tbojáninÿe chë iñe juachaca yojtsetbemana; tbojanonÿinÿe y tojánayana: —Muánaca cháftaca endánmëna ca.

⁵⁷ Pero Pedro ndoñe ca tojánayana, y chë shembásabioye mëntšá tbojaniana: —Sobrená, atše cha ndoñe quetsatabuatma ca.

⁵⁸ Ndoñe yapa bën y inÿa chábioye tbojátaninÿe y tbojaniana: —Acnaca chë uatsjendayënguentšá condmëna ca.

Pero Pedro tbojanjuá: —Bacó, atše ndoñe quetsátsmëna ca.

⁵⁹ Chentša benëntscosna, inÿa más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojtsichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canye ngallo yojacánta.

⁶¹ Chora Bëngbe Utabná yojobuértana y Pédrëbioye tbojanonÿinÿe; y Pedro chora yojenójuaboye ntšamo Bëngbe Utabná tbojanianama: “Cam ibeta bínÿanoye, ngallo cabá ndécánta ora, aca unga soye cochanjayana ndoñe šconduabuatma ca.”

⁶² As Pedro shjoye tojánbocna, y corente ngmënaca yojtsenóbošachna.

*Jesús imojtsábóyejuana
(Mt 26.67-68; Mc 14.65)*

⁶³ Chë Jesús imojtsebojanýá entsanga cha imojtsáboyejuana y imojtsejantšetaye;

⁶⁴ y jtsabuchëntsacjuase, imojtsetjanaye: “¡Momalisía, nda tcmënjajantšetá ca!”

⁶⁵ Y imojtsóyenguaye, nýe mocá soyënga jtsatsëtsnayëse.

Jesús, chë judiëngbe uámana mándayëngbe delante

(Mt 26.59-66; Mc 14.55-64; Jn 18.19-24)

⁶⁶ Tojanbinýna ora, chë bëtsëjemëngcá amëndayënga, bachnangbe amëndayënga y ley abuatambayënga tmojánenefna, y chëngbioye Jesús tmojánánatse. Choca tmojantjá:

⁶⁷ —Smëyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanëjua: —Aíñe ca tchojáuyanëse, tsëngaftanga chama átšbeñe ndoñe quešmochatošbuáchiye.

⁶⁸ Y nderado tchojátjasna, tsëngaftanga ndoñe quešmochatojuá ca.

⁶⁹ Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nýets obenana bomnabe catšbioica echántsatsbemana ca.

⁷⁰ Chora nýetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanëjua: —Cach tsëngaftanga chca šmontsichamo; atše cha sëndmëna ca.

⁷¹ As chora chënga tmojánayana: —¿Ndayama más entsanga šochjátëjaboto Jesusbe contra chamuayanama? Er cach bënga chabe uayášentsana chca tmonjouena ca.

23

Jesús, Pilatbe delante

(Mt 27.1-2, 11-14; Mc 15.1-5; Jn 18.28-38)

¹ Nýetsca mándayënga tmojëftsantsbaná, y Pilátbioye, chë Judeoca mandádbioye Jesús tmojánánatse.

² Y chentše tmojanontsé cha mal jaquédana, mëntšá: —Bënga fsënjínýena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquëcjayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canýe reyca ca.

³ Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjúá: —Aíñe, aca ndegombre yomncá tcjayana ca.

⁴ As Pilato, chë bachnangbe amëndayënga y entsanga tojanëyana: —Atše ni mo canýe soye chiyátinýena, quem boyabása castiganá chaotsemnama jayanama ca.

⁵ Pero chënga más tmojánáyebuachena: —Nýets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroa chca tonjabojatšë y mora moca Judeócnaca cachcá entsama ca.

Jesús Rey Heródesbe delante

⁶ As Pilato, Galilea luarama yojouena ora, tojanatjá Jesús Galileocá tayojamnama.

7 Y Jesús aífne Galileoca yojamna cha tojántatsëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalemense cha yojtsemna.

8 Herodes Jesúsbioye tbojáninýe ora, corente tojanoyejuá. Chana temp-scana inaboše Jesús jinýama. Cha ba soyënga Jesusbiana tojanuena, y yojtseboše jinýama Jesús jamana canýe bëts soye, Bëngbe Bëtsabe obenánaca.

9 Heródesna ba soyënga tbojantjá, pero cha ndocá tbojanjuá.

10 Y chéntšnaca, chë bachnangbe amëndayënga y judiëngbe ley abuatambayënga imojtsemna, y Jesús corente mal imojtsequédaye.

11 Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entsayangá tmojanichëtjo, mo canýe reycá; chentsana cachiñe Pilátbioye tmojesanichmó.

12 Cach te Herodes y Pilato tbojtananatsëtsaye; tempna chata ibojenáyata.

Jesusbiana chaóbana ca tmojánayana
(Mt 27.15-26; Mc 15.6-15; Jn 18.39-19.16)

13 Chentsana Pilato, chë bachnangbe amëndayënga, chë pueblentsa amëndayënga y nýetsca entsanga tojánachembo,

14 y mëntsá tojanéyana: —Tšëngaftanga quem entsá átšbioye šmojuánatse, mo bacna soye entsángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiana šmonjayana, pero atšna ni mo canýe soye chiyátinýena, quem boyabása castiganá jtsemnana ibojtsemna ca jayanama.

15 Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canýe ndoñe tonjobuachjanguá jóbanama chabotsemnana.

16 Chcasna, jabuache chamotsecastigá y chentsana chanjëtšboshjona ca — cha tojánayana.

17 Yojamna canýe utamená jëtšboshjonana, ntšamo Bashco fiesta ora jamana imojanamancá.

18 Pero chora entsanga cánýiñe tmojanáyebuachena: —¡Jesús chaóbanal ¡Barrabás matsboshjona ca!

19 Barrabás inautémena, mandadëngbioye ndëtsayaunanama chë bëts pueblentse entsanga tojánenautanama y entsá óbanaye causa.

20 Pilato cachiñe tojánayana Jesúsbioye jëtšboshjonama yojtsanboše ca;

21 pero entsangna más tmojtëtanayebuachena: —¡Motsecrucifical ¡Motsecrucifical ca!

22 Pilato ya unga soyama tojtëtanayana: —¿Ntšamo bacna soye mua tojobuachjanguá ca? Ni mo canýe bacna soye chiyátinýena, mua jóbanama chabotsemnana. Chcasna, chanjacastiga y chora chanjëtšboshjona ca.

23 Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entsangbe jabuache chembumbuanánaca, Pilato tmojanéyëñjaná Jesús chamóbama.

24 As Pilato tojanmandá ntšamo chë entsanga imojtsotjanañcá chaotsemnana;

25 as chora Pilato, Barrabásbioye cachcá tbojtamboshjona, chë nda inautémena mandadëngbioye ndëtsayaunanama entsángbioye tojánenautanama y entsá óbanaye causa. Y Jesusna entsangbe cucuatšifne tbojánboshjona, ntšamo chënga tmojtsebošcá chamomama.

Jesús tmojanrucificá
(Mt 27.32-44; Mc 15.21-32; Jn 19.17-27)

26 As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

27 Y banga chë pueblentša entsanga imojtséstona; y chë shembásenga imojtséstonëngna imojtsayošachiye y ngmënaca imojtsanioye, Jesús chca yojtsepásama.

28 As Jesús chëngbiyoye tojanobuértana y tojanëyana: “Jerusalenentša shembásenga, atšbiamama ndoñe matošachena; cach tšëngaftangbiamama y tšëngaftangbe básëngbiamama šmochjenóbošachna.

29 Canye te echanjóshjango y chë te šmochántsicamo: ‘Tša tšabá chë shembásenga šešona ndobmnëngbiamama, chë quem luaroye šešongama ndoñe tmonjëftsšëhëjajnéngbiamama, y chë šešongama ndoñe tmonjëftsabachëngbiamama ca.’

30 Chora entsanga jetsóitanama mochántseboše y mochanjontšë ichámuana: ‘¡Tjashënga šmotsëtebuantsá y batsjabengama šmotsaitame ca!’

31 Atse, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanëyana.

32 Jesúseftaca cruciñe jóbánama, útata bëts bacna soyënga ochjajnayátnaca imojtsënachaye.

33 Chë “Obanabe Bestšashe ca” uabaina luaroye tmojánashjajna ora, Jesús tmojanrucificá y chë bëts bacna soyënga ochjajnayátnaca, canya chabe catšbioica y chë inyana chabe uañicuayoica.

34 Chora Jesús mëntšá tojánayana: “Taita, mëngbe bacna soye mot-saperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entsayamna, tsbanátoyoye tmojanëtšëna, chënga jtenájatayama.

35 Entšanga chentše imojtsemnënga chca imojtsonyaye, y chë pueblentša mandayëngnaca Jesús imojtsáboyeyuana y mëntšá imojtsenatsësnaye: “Inyëngna añe tojëftsatsëbacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

36 Soldadëngnaca Jesús imojtsáboyeyuana; tmojanobeconá y untja vínoye imojtsefšësnaye,

37 y mëntšá imojtsatsaye: “¡Chë judiëngbe Rey tcomnëсна, cach aca ments-bocá ca!”

38 Jesusbe bestšaše juatsboicna canye uabemana soye tmojananjo; chiñe mëntšá yojtsanábemana: MUA CHË JUDIËNGBE REY ENDMËNA ca.

39 Canye bëts bacna soyënga ochjajnayá yojtsecrucificaná, Jesúsbiyoye mëntšá tbojanóyenguango: —Chë Bëngbe Bëtsabe Uámana Uabuayaná tcomnëсна, mentsbocá y bëndátnaca šmatsebocá ca.

40 Pero chë inye bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespetana? Bëndátnaca bontsamna chacá jóbánama.

41 Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriamama bontsamna. Pero quem boyabása ni mo canye bacna soye ndoñe tonjobuachjanguá ca.

⁴² Y chorna, quem bêts bacna soyënga ochjajnayá Jesúsbioye tbojanianya: –Jesús, atšbiamá cochtenójuaboje aca reycá jabomándama chacojtabo ora ca.

⁴³ Y Jesús tbojanjuá: –Ndegombre cbëyana, mënté átšeftaca celoca, chë nyëtscanga oyejuayënga mondbetsemnoca, aca cochantsatsmëna ca.

Jesús tojanóbana

(Mt 27.45-56; Mc 15.33-41; Jn 19.28-30)

⁴⁴ Njësto orscana las tresëntscoñe nyëts quem luare yojtsebétata.

⁴⁵ Y shinÿe yojtsajbaná binÿnayana, y Bëngbe Bëtsabe bêts yebnentše vojújonÿana entšëjua tsëntsaca yojtsenájataye. Chëjua bënëjua inauamna y chë tsatsëntsaca inaújonÿana.

⁴⁶ As Jesús tojanáyebuachena: “Taita, atšbe espíritu acbe cucuatšinë scoboshjona ca.”

Y chca jayanama tojanpochocá ora, tojanóbana.

⁴⁷ Chë romano soldadëngbe amëndayá chca tojáninÿe ora, Bëngbe Bëtsábioye tbojtandorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

⁴⁸ Nÿetsca entšanga chë soye jinÿama tmojánabënga, chca tojanopasama tmojáninÿe ora, tmojanontšé jtangana enocochjantšetaye, ngménama.

⁴⁹ Pero Jesusbe nyëtsca ubuátmënga y chë shembásenga Galileocana tmojanastëngna, chaboca tmojanoquedá chë soyënga onÿayinë.

Jesús tmojanatbontsá

(Mt 27.57-61; Mc 15.42-47; Jn 19.38-42)

⁵⁰ Yojanmëna canÿe boyabása, José ca uabainá, canÿe Judeoca pueblócá, Arimatea ca uabaina; cha inamna canÿa chë pueblentša uamana amëndayënguentsá y canÿe tšabe entšá y nyëtsca soyënguiñe tšabá amá.

⁵¹ Chánaca yojanobátmana chë Bëngbe Bëtsabe amëndayana chaóshjanguama, y tondaye tbojanogustá ntšamo chë inÿe amëndayënga tmojanjuabó y Jesúseftaca tmojanmcá.

⁵² Cha Pilátbioye tojána y Jesusbe cuerpo tbojanotjañe.

⁵³ José chë cruzocana Jesusbe cuerpo tbojtandštjango, canÿe lino entšëjuaca tbojanandmaná y canÿe cuevëshiñe, peñëshiñe pormániñe, tbojanjajó. Chentše cabá ndocná mondëjajo.

⁵⁴ Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebinÿana.

⁵⁵ Chë shembásenga, Galileocana Jesús tmojantjëmbabanga, tmojána y chë cuevëshe tmojáninÿe, y tmojanrrepará ntšamo Jesusbe cuerpo tmojanjajoma.

⁵⁶ Yebnoye tmojtaná orna, tmojanprontá botamana uanguëtse béjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyinë yojanmandancá.

24

Jesús tojtanayena

(Mt 28.1-10; Mc 16.1-8; Jn 20.1-10)

¹ Y tmengo, chë inÿe semana bojatšéntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtse soyënga.

² Pero choye tmojánashjajna orna, tmojáninÿena chë cuevëshoye amashjuantša ndëtsbé chentšana juanániñe,

³ y choye tmojánamashjna ora, Bëngbe Utabná Jesusbe cuerpo ndoñe tmonjáninÿena.

⁴ Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinÿinÿana entšayá uichétjonata chentše tbojabántsaye.

⁵ Y chë shembásengna tmojanëuatjanama y fshantsoye imojtsatsejbénama, chata tbojanëyana: “¿Ndayeca obanëngbentše chë vida totsobomñá šmojtsenguá ca?”

⁶ Muentše cha ndocná quenátsmëna, er cha ya tontayena. Menójuabonga ndayá cha tmojanëyanama, cha cabá Galileoca enjamna ora. Cha tonjánayana:

⁷ ‘Chë Bëngbe Bëtsá Entšá tbojanbemá bontsemna bacna soye amëngbe cucuatšiñe chamoboshjonama, chamocrucificama y unga tianoye cháuatayenama ca’ ” —chata tbojánayana.

⁸ Chora chë shembásengna Jesusbe palabrëngama imojtenójuaboye,

⁹ y chë cuevëshentšana tmojtaná ora, chë tšabe noticiënga chë bnëtsana canÿe uatsjëndayënga y inÿe entšángbioye tmojanacutá.

¹⁰ Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inÿe shembásengna chëngaftaca imojamnënga.

¹¹ Pero chë uatsjëndayëngna mëntsá chë shembásengbiama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

¹² Pero chentšana, Pedro tojëfšantsbaná y ochamanana chë Jesús tojanjáj cuevëshoye tojána. Y choca yojtsemna ora, yojtsejbéna toye jontješiyama, pero nÿe ena entšëjuangá yojuinÿe, chë Jesús tojanbochmëjuangá. As Pedro ojnananá yebnoye yojtá, chca tojanopasama.

Chë Emaús puebloye benachiñe

(Mc 16.12-13)

¹³ Cach te, uta uatsjëndayata Emaús puebloye ibojtsaye. Emaús yojamna Jerusalenocana bnëtsana canÿe kilómetroca.

¹⁴ Chata ibojtsayencuëntaye lempe ntšamo tojanopasama.

¹⁵ Y tojanopasá, ibojtsencuëntaye y ibojtsenatsëtsnayëntscuana, cach Jesús tojanobeconá y chátaftaca cánÿiñe yojtsaye;

¹⁶ masque imojtsonÿaye, ndoñe ibontsobena cha jótëmbana.

¹⁷ Jesús tojanëyana: —¿Ndayama benachiñe šuabanencuëntaye ca?

As chata ngmënaca ibojtsaye,

¹⁸ y canÿa, Cleofás ca uabainá, tbojanianya: —¿Nÿe aca cojtsemna, inÿe luarocana ashjanganá Jerusalenentše oyená, ndayá chentše quem diënga yopasánama ndëtátšëmbuá ca?

¹⁹ Chora cha tojanëyana: —¿Ndaye soyënga ca?

Y chata tbojanianya: —Chë Jesús Nazaretocáftaca tonjopasá soyëngama. Cha enjamna canÿe Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nÿetsca entšangbe delante.

20 Y ntšamo, chë bachnangbe amëndayënga y chentša mandadënga ínÿengbe cucuatšínë tmonjáboshjona, jóbanama ibojtsemna ca entšanga chamuayanama y chamocrucificama.

21 Bënga chabiamana fsënjanobátmana, Césarbe cucuatšentšana Israeloca entšangbe atsebacayá chaotsemnama; pero morna ya unga te entsemna chca tonjopasá.

22 Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevēshoye tmonjá,

23 y chabe cuerpo ndoñe tmonjínÿena; as chora chënga bëngbiolye tmontabo y montsabíchamo angelënga tmojëftsanyë y chënga catmënjayana cha ainá yojsatsmëna ca.

24 Bëngbentšana baseftángnaca chentšana chë cuevēshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmojëftsinyë ca —chata ibojtsichamo.

25 As Jesús chata tojanëyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama!

26 ¿Mo ndoñe yonjamna chë Uámana Uabuayana chë soyënga chaosufrima, y chentšana nÿetsca entšanga corente cha chamuatschuama ca?

27 Chentšana Jesús tojanontsé chata jábuayenana, lempe ntšamo chabiamana yojanoyebuambnacá chë Bëngbe Bëtsabe uabemana palabrénguiñë; yojontsé Moisesbe librëšangañë y chë Bëngbe Bëtsabe juabna oyebuambnayëngbe librëšangáñnaca.

28 Chë ibojétsaye puebloye imojtsebeconá ora, Jesús tojanma mo más chcoye cuaftsacá.

29 Pero chatna tmojanatarié chentše chaotsoquedáñama, mëntšá jauyanëse: —Bëndátaftaca motsoquedañë; ya jetiñë entsemna y ya echanjaibétata ca.

As Jesús chátaftaca tojtsanoquedañë.

30 Chentšana tojanopasá, juasama mesëshentše imojtsetbíamana ora, Jesús chë tandëse tojanca, Bëngbe Bëtsabioye tbojtanchuá, chë tandëse tojanjatá, y chata tojanatšatá.

31 As, chora chë uatsjëndayata ibojobenaye Jesús jótëmbana; pero chana nÿe ndeolpe yojuenatjëmba.

32 Chora chata ibojtsenatsëtsnaye: “Chë benachiñë Bëngbe Bëtsabe uabemana palabréngama šondabuayiyná ora, ndegombre bëngbe ainaniñë más bontseboše cha más chašotsabuayiynama, ¿ndoñë chca ca?”

33 As, cachora tbojëftsantsbanata y Jerusalenoye tbojtanata; choca tmojáninÿena chë bnëtsana canÿe uatsjëndayënga cánÿentše imojtsemna y chëngbe enutëgnaca;

34 y mëntšá imojtsichamo: —¡Ndegombre Bëngbe Utabná tojtayena; Simónbioye tbojëbëbocna ca!

35 As chata tbojanontsé jacúntana, ntšamo benachiñë tbojanpasacá, y ntšamo Jesúsbioye imojótëmba, chë tandëse tojanjatá ora.

*Jesús chabe uatsjëndayënga tojánebébuacna
(Mt 28.16-20; Mc 16.14-18; Jn 20.19-23)*

36 Chë uatsjéndayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntšá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

37 Pero chënga tša auatjanánënga imojtsemna, y canye añemëse imojtsonjaye ca imojtsejuabnaye.

38 Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca?”

39 Atšbe cucuatšënga y atšbe shecuatšënga minjënga; šmobjoajo y šmochanjinyë. Cach atše sëntsemna. Canye añemëсна, ni mëntšëna ni betasënga ntsebmomna; pero tšëngaftanga šmontsonjá, atšna aifne ca” —tojanëyana.

40 Chca yojtsichámëse, chabe cucuatšënga y chabe shecuatšënga tojaninjanjé.

41 Y chënga cabá ndoñe montsanošbuaché, chca noticiama corente imojsóyejuama y tša ojnánënga imojtsemna causa; as Jesús tojanatjá: “¿Muentšë ndáyá jasama quešmëbmomna ca?”

42 As canye tabena buana beonbiana tmojanoyé;

43 Jesús tojanocñe y chëngbentšë tojanse.

44 Chentšana Jesús tojanëyana: “Quem palabrënga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiama iuabemancá, Moisesbe leyënguifne, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

45 Y chora chë uatsjéndayënga, Jesúsbeýeca tmojanobená chë Bëngbe Bëtsabe uabemana palabrëngama jošertana.

46 Chentšana Jesús tojanëyana: “Ntšamo atšbiama iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca.

47 Y morna atšbe uabaina jayanëse, átšbeñe betsošbuáchema, nyets quem luarentšë šmochjónštá entšanga atšbiama jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalemntšë chaobojatšë.

48 Tšëngaftanga atšbiama soyënga šmonjinjye y šmondëtatšëmbo.

49 Atšbe Taitabe šbuachenaná, tšëngaftangbiana chanjichmua. Pero morna camuentšë Jerusalemntšë moquedanga, Bëngbe Bëtsabe obenana chašmóyëngacñëntscuana ca” —cha tojanëyana.

Jesús celoye tojtantsjuá (Mc 16.19-20)

50 Chentšana, Jesús chabe uatsjéndayënga ínjoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjéndayënga tšabe bendicionënga chamóyëngacñama.

51 Chca yojtsamëntscuana, cha chëngbentšana tojanoluaré y tojanontšé celoye játsjuana.

52 Chë uatsjéndayëngna, Jesús tmojtanadorá chentšana, Jerusalemoye oyejuayënga tmojtaná;

53 y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

San Juan

Cristo, chë Bëngbe Bëtsabe Uámana Oyebuambnayana ca Uabainá

¹ Quem luare ndobojátsa ora, Cristo, chë Bëngbe Bëtsabe Uámana Oye-
buambnayana ya yojtsemna; chora cha, chë chca uabainá, Bëngbe Bëtsáftaca
yojtsanmëna, y cachá Bëngbe Bëtsá inamna.

² Ndegombre cha, chë tempcana Bëngbe Bëtsáftaca yojtsanmëna.

³ Cháftaca, Bëngbe Bëtsá lempe tojanma; cháftaca ndóñesna, lempe ntšamo
mora yomncá, Bëngbe Bëtsá tondaye matënjanna.

⁴ Cachábeñe nyets vida inamna, y quem vídaca tojánabo quem luarentša
entsangbe juabnënga jabuábinýnaya.

⁵ Cha tonjánabo moye, chë entsangbe juabnënga ndoñe binýniñe yonjam-
noye, chiñe jabobínýnaya. Cha sempre chca yobínýna, y Satanás chë
entsangbe juabnënga ndoñe binýniñe chaondëtsemnama amá, ndoñe yon-
dobena chë binýnaye obenana jtsejuánana.

⁶ Inamna canye yobabása, Juan ca uabainá; y Bëngbe Bëtsá tbojanichmó,

⁷ binýnabiamama chaóyeuambama; entsángbeñe binýnabiamama cháuyanama,
chca, ntšamo Juan chë binýnabiamama tojayana soyéngaca, nyetscanga
Jesúsbeñe chamotsošbuáchema.

⁸ Juan ndoñe yonjamna chë binýnáyá. Cha inamna canye ichmoná, chë nda
binýnáyá yomnabiamama entsángbeñe chauabáyanama.

⁹ Chë ndegombrá quem luaroye tonjánabo chë entsangbe juabnënga
jabuábinýnaya.

¹⁰ Chë Bëngbe Bëtsabe Uámana Oyebuambnayana quem luariñe yojt-
sanmëna; masque cháftaca Bëngbe Bëtsá quem luare tojanma, nda cha yojam-
nama muentša oyenënga ndoñe monjántatšëmbo.

¹¹ Cachabe luare entsángbioye tonjánabo, y entsanga ndoñe tmonjánbošena
cha jofjana.

¹² Nyetscanga, ndëmuanýenga cha tmojanëbuaja y chábeñe
tmojtsošbuáchenga, cha derecho tonjanatšatá jtsobenama Bëngbe Bëtsabe
básenga ca jtsabainama.

¹³ Quem ošbuáchiyëngna, chca jtsemnama ndoñe tmonjanobená entsangbe
buiñentšana tmojanonýnáyeca, o ndaye entsabe juabnentšana. Nye Bëngbe
Bëtsábeyeca chca chabe básenga imojtsabaina.

¹⁴ Cha, chë Bëngbe Bëtsabe Uámana Oyebuambnayana, entsá tojanóbema,
y quem luare bëngaftaca yojéftsiyena. Cha yomna chë Bëngbe Bëtsabe
nye canye Uaquiñá; chiyeca bënga tifjáninye chabe bëts obenana y chabe
tšabe juabna, chë Bëngbe Bëtsábentšana tojanóyëngacñana. Cha corente
jtsababuánýeshanëse šojánanyena y yojéftsiyena ntšamo ndegombre inamncá.

¹⁵ Juan mëntšá chabiamama yojanáyebuache: “Chabiamama sënjanoyebuambná,
chë ndabiamama chora atše sënjánayana, chë átšbentšana jabamama atšbiamama
más uamaná endmëna, er atše cabá ndonýna orna, cha ya yojtsemna ca.”

¹⁶ Cha tša tšabe ainana bómnyeyeca, bënga nyetscanga mallajta tšabe bendi-
cionënga tmojóyëngacñe.

17 Moisesbiajana tiffjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tšabe bendicionënga bëngbiama tojama y chë ndegombre soyënga bënga tmojëftsashjache.

18 Ndocná, ndocna te Bëngbe Bëtsábioye tbonjinýe. Chë nýe canýe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánýiñe mo canýaca yomna. Mua, chë Uaquiñá, bëngbiama tojama, Bëngbe Bëtsá juabuátmanama chaotsopodënama.

Juan chë Ubayaná Jesucristbiama tojanabuayená

(Mt 3.11-12; Mc 1.7-8; Lc 3.15-17)

19 Canýe te, Jerusalemoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnana chamuatjayama.

20 Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsátsmëna ca.

21 As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyeubuambnayá Elías ca?

Y Juan tojanëjua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyeubamayama jabamá ca?

Y Juan tojanëjua: —Ndoñe ca.

22 Chora chënga tmojanianya: —Asna, ¿aca ndase cojtsemna? Bënga šontsamna nda aca cojtsemnana jtsetatšëmbuana, as chë šonjadespachenga jacúntama. ¿Ndayá cojtsobena cach acbiama jayanama ca?

23 Y Juan mëntšá tojanëjua: —Atše sëntsemna chë ndabiamna Bëngbe Bëtsabe juabna oyeubuambnayá Isaías mëntšá tojanábema: “Entšanga ndoyenoca canýe abuayiyayá echántsemna, y entšanga mëntšá echántsabuyiyayae: Bëngbe Utabná echanjabo ca. Mo nda canýe benache tojtseprontacá, tšëngaftágnaca cachcá, cha jabama tšabe juabnéngaca šmochtseprontana ca.”

24 Chorna, báseftanga chë fariseungbe ichmónënguentsana,

25 Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemñësna, ni Elías, ni chë Bëngbe Bëtsabe juabna jabóyeubamayama jabamá ndoñësna, ¿ndáyeca entšanga cojtšëbayana ca?

26 Chora Juan tojanëjua: —Atšna, béjayeca entšanga sëndëubáyana. Pero tšëngaftangeñe canýa entsemna; cha ndoñe quešmatábuatma;

27 y cha atšbe ústonoye echanjáshjango. Atše mercedo taitatobuajoñe, ni mo jotsejbiyama, chabe shecochëtjonëshentša corriëja jajafjonama ca.

28 Chca tojanopasá, canýe pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

Jesús chë Bëngbe Bëtsabe Oveshatema ca uabainá

29 Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashajuana ca. Cha jóbaniëse, quem luarentša entšanga bacna soyëngama perdonánënga mochántsemna.

30 Atše chabiamna cbonjutsëtsná, mëntšá sënjánayana ora: ‘Atšbe ústonoye canýa echanjáshjango. Cha atšbiama más uamaná endmëna, er atše cabá ndonýna ora, cha ya yojtsemna ca.’

31 Tempna, cach atše ndoñe quetsjátantatšëmbo nda cha bétsemnana. Pero atšna ínŷenga béjeyeca ubáyana sëndabó, Israeloca entsanga quem boyabása chamuábuatmanama ca” —Juan tojaněyana.

32 Chentšana Juan mēntšánaca tojanobuambá: “Chabiamamēntšá bom-inŷe sēnjanjajó: chē Uámana Espíritu, mo canŷe palomatemcá, celocana tonjánastjango y quem boyabásabe juatsbuañe tonjanototóná.

33 Atše cabá ndoñe quetsjátantatšëmbo nda cha bétsemnana, pero chē béjeyeca jubáyama šonjanichmó cha, mēntšá šonjaniyana: ‘Nda chacojinŷe, chē Uámana Espíritu jastjanguana y chabe juatsbuañe jototonana, chábeyeca atše chanjíchmua chē Uámana Espíritu entsangbe ainaniñe cháuamashēnguama ca.’

34 Y morna, atše aíñe chca tijinŷe, y ndegombre tšēngaftanga cběyana, cha chē Bēngbe Bětsabe Uaquiñá entsemna ca” —cha tojaněyana.

Chē Jesusbe natsana ústonēnga

35 Yěfsana, Juan chabe uatsjédayēnguentshana útatafaca cachoca yojtšesemna.

36 Jesús yojtsachnějuanama, Juan tojáninŷe ora, tojaněyana: “Sochjinŷe. Mua entsemna nda Bēngbe Bětsá tbojichmó y iytanana Oveshatemcá entsobiamná cha ca.”

37 Chora chē Juanbe uta uatsjédayata, chca tbojanuena ora, Jesús tmojanasto.

38 Jesús tojesanontjese y tojánanŷe chata imojétsēstonama. As, tojanatjá: —¿Ndayá šojtsenguá ca?

Y chata tbojaniyana: —¿Rabí, ndayentše icoyena ca? (Rabí endayana “Buatēmbayá ca”).

39 Chora Jesús tojanějua: —Mabo y sochjinŷe ca.

As chata tbojána y tbojáninŷe ndayentše cha yojaniyenana. Y chentše cháftaca tojéftsanajetana, ya jetiñe mo las cuatro ora yojtsemna causa.

40 Chē Jesusbiam aoyebuambnayana Juánbioye tbojanóyeunata y Jesús tbojanasto útatentšana canŷana Andrés ca yojanabaina; cha yojamna Simón Pédrēbe catšata.

41 Andrés, cabá ndocna inŷe soye ndēma ora, tojána chabe catšata Simón janguanguama. Y tbojáninŷena ora, Simónbioye tbojaniyana: “Chē Bēngbe Bětsabe Uámana Uabuayaná, Cristo, fsēnjínŷena ca.”

42 Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninŷe ora, tbojaniyana: “Aca condmēna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndētšbé ca”).

Jesús, Felipe y Natanael tojánachembo chamuastama

43 Yěfsana, Jesús tojanjuabó Galilea luaroye jama. Benachiñe Felípbioye tbojáninŷena y tbojaniyana: “Smasto ca.”

44 Chē boyabása Felipe, Betsaida pueblócá inamna. Andrés y Pédrēna cach pueblocata ibnamna.

45 Chentšana Felipe tojána Natanael janguanguama; y tbojaniyana: —Chē ndabiamaleyēnga libréšangañe Moisés tojanábema cha fsēnjínŷena ca. Cachabiam, Bēngbe Bětsabe juabna oyebuambnayēngnaca tmojanábema. Cha Jesús entsemna, Josebe uaquiñá, chē Nazaretocá ca.

46 Chora Natanael tbojaniyana: —¿Ndaye tšabe soye Nazaretocana nan-jopódia jóbocnama ca?

Y Felipe tbojanjuá: —Mabo y cochjinÿe ca.

⁴⁷ Natanael yojtsebéconama, Jesús tbojáninÿe ora tojánayana: —Moye canÿe entsá entsabó; cha ndegombre endomerecena Israelbentsana entsá jtsemnana. Cha tsabe entsá endmëna; ndocnábioye quebnatsingña ca.

⁴⁸ Chora Natanael Jesúsbioye tbojantjá: —¿Ntsamo atse šcuabuatma ca?

Y Jesús tbojanjuá: —Felipe cabá aca ndëchembo ora, atse tcbonjinÿe, chë higo betiye tchetšoye condëtsomñe ora ca.

⁴⁹ As, Natanael tbojanianana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entsangbe Rey ca!

⁵⁰ Chora Jesús tbojanjuá: —¿Aca átšbeñe cojtošbuaché, ñye chë higo betiye tchetšoye tcbojinÿe ca tcbouayanama? Ndegombre, chë soyama más bëtsoyënga cochanjinÿe ca.

⁵¹ Chentšana Jesús tojanëyana: —Ndegombre šcuayana: Tšëngaftanga šmochanjinÿe celoca atëfñiñe, y Bëngbe Bëtsabe angelotëmënga jtsetsjuajana y jtsastjauanana Bëngbe Bëtsá Entšá tbojanbemabe tatsëtsoca.

2

Canÿe casamento Galilea luaroca, Caná pueblentše

¹ Chentšana unga tianoye, canÿe casamento inamna, canÿe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna.

² Jesús y chabe uatsjëndayëgnaca chë casamentoca ófjanënga imojtsemna.

³ Chë oboyejuayentše, vínoye yojtsopochóca y Jesusbe mamá tbojanianana: —Ya tondaye vínoye quemátsbomna ca.

⁴ As, Jesús tbojanjuá: —Mama, ¿ndáyeca chca atse šcojtsatsá? Atšbe ora cabá ndoñe ntjoshjanguana ca.

⁵ Chentšana, chabe mamá, chentša oservëñënga tojanëyana: —Lempe šmochjama, ntšamo cha chacmojuayancá ca.

⁶ Chocna, chnënguana ndëtsbé matbaja inamna. Chca matbajënguentša béjayeca, judiënga imojanamana jtsacuéntšabiana cabá ndëse ora, ntšamo tempo entsanga imojanamancá, Bëngbe Bëtsabe delante tšábënga jtsatsmënama. Cada matbajiñe, mo shachna o canÿsëfta bnëtsanájuá béjaye yojanába.

⁷ Chora Jesús chë oservëñënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

⁸ Y Jesús tojanëyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

⁹ Chora, chë fiesta otocaná, chë béjaye Jesús vínoye tojanbemiye tojanfantíá, ndëmocana yojóbocnana ntsetatšëmbcá. Pero chë oservëñëgna aífne imojtsetátšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo,

¹⁰ y tbojanianana: “Nÿetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

¹¹ Ntsamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninÿanÿé; y as, chabe uatsjëndayënga chábeñe imojtsošbuaché.

¹² Chca tojanopasá chentšana, Jesús canÿe pueblo, Capernaum ca uabáinoye tojtsanoñe. Chorna, chabe mamá, chabe catšátanga y

chabe uatsjédayënga cha tmojantjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentsana bacna entsanga tojtanëbuacna
(Mt 21.12-13; Mc 11.15-18; Lc 19.45-46)*

¹³ Ya canye judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána.

¹⁴ Jerusalenoca, Bëngbe Bëtsabe bëts yebnentsë, Jesús tojánanyëna uacnënga, oveshënga y paloma enënga, y entsángbioye crocénana atrócyënga, chëngbe luarënguenache imojtsetbiámana.

¹⁵ Jesús chca tojánanyë ora, biajënga tojanaca, tjanjanëja tojanobopormá, y Bëngbe Bëtsabe bëts yebnentsana nyetscanga tojtanëbuacna, chëngbe oveshënga y uacnëngaca. Chentsana Jesús, Bëngbe Bëtsabe bëts yebnentsama yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca.

¹⁶ Chë paloma enënga Jesús tojanëyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentsë, mo cányentsë jiyama luarentse cuaftsemncá ca!

¹⁷ Y as, chabe uatsjédayënga tmojanenojuabó ntšamo Bëngbe Bëtsabe uabemana palabrénguiñe iuayanama: “Bëngbe Bëtsabe yebna jtseboguiñanama juabna, nyets átšbeñe entsemna ca.”

¹⁸ Chora, judiënga Jesús tmojantjá: —¿Ndaye bëts soye cochjama bënga chascuinñanyëma, aca ndaye deréchoca bëngaftaca chca cojtsobenama ca?

¹⁹ As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

²⁰ Chora chë judiënga tmojanianyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nýe unga tese lempe cochtëtsjebo ca?

²¹ Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye.

²² Chama, Jesús obanënguentsana tojtanyana ora, chabe uatsjédayënga tmojanenojuabó ntšamo muentše cha tojanëyanama. Chca ora, Bëngbe Bëtsabe uabemana palabrénguiñe y Jesús chora tojánayana palabrénguiñe más chënga imojtsošbuaché.

Jesús nyetsca entsangbe juabna iuábuatma

²³ Jesús Jerusalenoca chë Bashco fiestama yojtsemnëntscuana, entsanga tmojáninýe Jesús jamana bëts soyënga Bëngbe Bëtsabe obenánaca. Chíyeca, ba entsanga chábeñe imojtsošbuaché.

²⁴ Pero Jesús chëngbeñe ndoñe yontsošbuaché, cha nyetscanga yojanëbuatma causa.

²⁵ Y Jesús ndoñe bonjanájoboto chë entsangbe soyëngama chabotsebuayiy-nama, er cachá entsangbe ainaniñe nyetsca juabnënga yojanábuatma.

3

Jesús y Nicodemo

¹ Inamna canye boyabása Nicodemo ca uabainá. Cha yojamna farise-unguentšá y judiëngbe canye amëndayá.

2 Chana ibeta Jesúsbioye tojána y tbojanianana: —Buatëmbayá, bēnga fsëntsetatšēmo aca canye buatëmbayá comnama, Bēngbe Bētsabe ichmoná. Ndocná quenátobena jamana quem bēts soyēnga, aca contsama soyēnga, Bēngbe Bētsá cháftaca ndoñe tontsemñese. Chíyeca bēnga chca fsëntsetatšēmo ca —cha tbojanianana.

3 Chora Jesús tbojanjá: —Ndegombre cbēyana, nda ndoñe cachiñe ton-tonýna, cha ndoñe quenátobena Bēngbe Bētsabe amēndayana jinýama ca.

4 Y Nicodemo tbojantjá: —¿Ntšamo, canye entšá ya bētsá tojtsemna ora, nantsobena cachiñe jtónýnama ca? Ndegombre, cha ndoñe ntsobenana cachabe mamabe cuerpiñe jtamashēnguana cachiñe jtónýnama ca.

5 Chora Jesús tbojanjá: —Ndegombre cbēyana, bējayeca y chē Uámana Espíritbeyeca ntjonýnacá, ndocná quenátobena Bēngbe Bētsabe amēndayoye jamashēnguama.

6 Nda bētsétsabentšana tojonýná cha, quem luarentša entsāngcá jtsemnana; pero chē Uámana Espíritbeyeca tojonýná chana, jtsemnana canya chē Uámana Espíritu ainaniñe bomná.

7 Ndoñe matenjnanana ntšamo tcbonjauyanama: “Nýetscanga entsamna cachiñe jtónýnama”.

8 Chē binýia ndēmuajana tojtseboše jtsemnana, chējana jtsanana. Masque entsānga, chē binýiyama jtsuanana, ndoñe ntsetatšēmbuana ndēmocana yobama y ndēmoye yojtšoma. Cachcá, tsēngaftanga ndoñe quešmátstatšēmo ntšamo entsānga chē Uámana Espíritbeyeca tmojtšónýnama; pero tsēngaftanga šmontsetátšēmo añe chca yomnama ca —Jesús tbojanianana.

9 Chora Nicodemo tbojantjá: —¿Ntšamo chca nántsemna ca?

10 Y Jesús tbojanjá: —Aca, canye Israeloca abuatambayá, ¿chē soyēngama ndoñe condétatšēmo ca?

11 Ndegombre cbēyana, bēngna chē fststátšēmo soyēngama fsëntsoyebuambná, y chē tifjinýe soyēngama ndegombre bētsemnana fsentsichamo. Pero tsēngaftangna, chē cbontsētsētsná soyēnguiñe ndoñe quešmatošbuaché.

12 Atše, quem luarentša soyēngama sēnjoyebuambá y tsēngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyēngama cbojtšētsētsnase?

13 “Ndocná, nýe cachábeyeca Bēngbe Bētsábioye tonjátsjua. Nýe chē celocana tojabá añe, chē Bēngbe Bētsá Entšá tbojanbemá.

14 Y chcase, ntšamo Moisés entsānga ndoyenoca bronce mētšcuaye tsbanánoca tbojananguēsētjácá, šoquēnga tsábá chamotsatšmēnama; cachcá entsemna, Bēngbe Bētsá Entšá tbojanbemá entsānga chamuatsbanama;

15 chca, nýetscanga chábeñe tmojtšošbuáchenga, chē nýetsca tescama yomna tsábe vida chamotsebomnama ca” —Jesús Nicodémbioye tbojanianana.

Ntsachetšá Bēngbe Bētsá entsānga iuababuányeshana

16 Mēntšánaca Jesús tojánayana: —Bēngbe Bētsá quem luare entsāngbioye tša yojánabuanýeshanayeca, chē nýe canye Uaquiñá ibobomná, bēngbioye tbojichmó, nýetsca chábeñe ošbuáchiyēnga ndoñe chamondóbanama, y añe chē nýetsca tescama yomna tsábe vida chamotsebomnama.

17 Er Bēngbe Bētsá chabe Uaquiñá quem luaroye ndoñe tbonjichmó quem luare entsāngbiama jabáyanama ntšamo tmojamama castigánēnga chaot-samnana ca, sinó, entsānga chábeyeca atsebácanēnga chamotsemnana.

18 “Nda Bëngbe Bëtsabe Uaquiñábeñe tojtsošbuáchebiamá, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiamá, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa.

19 Chca, chë ndoñe tmontsošbuáchengbiamna cha ya tojayana, ntšamo tmojamama castigánënga chamotsemna ca; er chë entšangbe juabnënga binÿñayá quem luaroye tojabo, pero ba entšanga tmojábošëna jtsomñana, chë entšangbiamá bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana.

20 Chë bacna soyënga tojtsamá ndoñe ntsebošana, chë binÿñayá chabe bacna soyënga chabuñÿñyema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿñayábioye jtsáboyënjana, y chë binÿñayábioye ndoñe ntjabana.

21 Pero nda sempre tojtsiyena ntšamo ndegombre yomncá jtsamëse, chana aíñe chë binÿñayábioye jabana, chë binÿñayá chabiamá chabuñÿñyema, chë tojama soyënga, ntšamo Bëngbe Bëtsá tojtsebošcá tojamama ca” —Jesús tojánayana.

Juan chë Ubayaná cachñe Jesucristbiamá tojanabayená

22 Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoqedá, entšanga ubáyana.

23 Cach tempo, Juanënaca entšanga yojanëbáyana Enonoca, Salim béconana, er choca bëtscá béjaye inabinÿna. Ba entšanga choye imojtsaye, y Juan chënga yojanëbáyana.

24 Chca tojanopasá, chë Heródesbe soldadënga Juan cabá ndutame ora.

25 Chë tempo, básefta Juanbe ústonënga tmojanontsé inÿe judíoftaca enatsëtsnayana ntšamo tempo judiënga chë jtsacuéntšabiamá imojanámanama.

26 Chora, chënga Juánbioye tmojánabo y tmojaniyana: —Buatëmbayá, chë Jordán chenguánoica ácaftaca enjamná, ndabiamá tša tsábá conjanoyebuambná, mora entšanga entsëbayana y nÿetscanga cha montsëstona ca.

27 As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase.

28 Cach tsëngaftanga tsábá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamá entšanga jabábuayenama.

29 Chë tobiáše tojtsobouamá ora, chë bobontse chábioye jtsebomnana; y chabe amigna, chabiamá jtsobátmanana y chë bobontse bouamnabe oye-buambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sentsuenana ora, átšnaca corente oyejuayá sëntsemna.

30 Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanéyana.

Ntšamo yomna chë celocana tojabá

³¹ Měntšánaca Juan tojánayana: “Chě tsbanánocana tojabá, n̄yetsca entšangbiama más uamaná endmēna. Chě quem luare oyená quem luare entšangcá jtsemnana y quem luarentša soyēngama jtsóyebuambnayana, pero chě celocana tojabana, n̄yetsca entšangbiama más uamaná endmēna.

³² Cachá ntšamo tojín̄yē y tojouenca entsoyebuambná, pero chě entšichamo soyēnguiñe ndocná quenatošbuaché.

³³ Nda ntšamo cha tojtsóyebuambnañe tojtsóšbuaché y chca tojtsama, jtsin̄yan̄nayana Bēngbe Bětsá ndegombre soyēnga inetsichámuama.

³⁴ Chcasna, Bēngbe Bětsabe ichmonana, jtsóyebuambnayana ntšamo Bēngbe Bětsá tojtsichamcá. Bēngbe Bětsana chě ichmonábioye tbojichmó chě Uámana Espírítu, n̄yets tempo corente chabotsájabuachanama, ntšamo cach Bēngbe Bětsá tojtsichamo y cachcá chaotsichámuama.

³⁵ Chě Taitá Uaquiñábioye bondboboshana, y chě Uaquiñábioye obenana tbojatšetá n̄yetsca soyēnguiñe jtsemándayama.

³⁶ Nda chě Uaquiñábeñe tojtsóšbuaché, chě n̄yetsca tescama yomna tšabe vida echántsebmna; y nda chě Uaquiñábioye ndoñe tbontsašbuaché, chana chě vida ndoñe queochátsbmna, y chě Bēngbe Bětsabe uabouana castigo n̄yetsca tescama chábeñe echántsemna ca” —cha tojánayana.

4

Jesús y chě Samaria luaroca shembása

¹ Chě fariseunga tmojanuena Jesús, Juanbiama más ústonēnga yojtsabamnama, y más entšanga yojtsébáyanama.

² Pero ndegombre, cach Jesús ndocnábioye bon̄yanábayana, sinó chabe uatsjéndayēnga.

³ Bēngbe Utabná Jesús, ntšamo chě fariseunga tmojanuename tojántatsēmbona ora, Judea luarocana tojěftsanbocna y Galileoye tojtaná.

⁴ Choye jtamna ibojamna Samaria luarējana jachnēnguana.

⁵ Samariocna, can̄ye pueblo Sicar ca uabáinoye Jesús tojánashjango. Chě pueblo yojamna, chě Jacob chabe uaquiñá Josébioye tbojěftsanlargá fshantse béconana.

⁶ Choca yojamna cán̄yentše atěfjóniñe, búyeshe jobuatsjuama, Jacobēbe atěfjóniñe ca uabáiniñe. Mo n̄yetsto ora, chentše Jesús yojtsemna, aniñe uaměntšnayá, chě atěfjóniñe batsjaca yojótbema.

⁷⁻⁸ Chabe uatsjéndayēngna chě pueblōye tmojána saná jobuámiñama. Chora, can̄ye shembása Samariocá, chě atěfjónoye tojánashjango, búyeshe jauafcama; as Jesús tbojaniana: —Búyeshtema šmabuatsšetá ca.

⁹ Y chě shembása tbojanjuá: —Aca can̄ye judío condmēna y atšna can̄ye samaritaná. ¿Ntšamo cojtsobena atše búyeshe juabuátjañama ca? (Cha chca tojánayana, er canjanopasana, judiēngna samaritanēngaftaca ndoñe monjanatsētsná.)

¹⁰ Chora Jesús tbojanjuá: —Aca mo cojtsetátsēmbo n̄yē ntšamo Bēngbe Bětsá aca jatšetayama yojtsebošcá, y nda chě búyeshe cmojtsábuatjanañama, acna más cha catjuábuatjañe, y chana bėjaye vida bomniye cmatjuabuátšetaye ca.

¹¹ Y chě shembása tbojaniana: —Señor, tondaye quecátsbmna n̄yē mo ndayecnaca búyeshe jabuatsjuama, y chě atěfjóniñe corente tboca endmēna; y as, ¿ndayentšana cochjobenaye bėjaye vida bomniye atše juabuátšetayama?

¹² Bēngbe tempsca bēts taitá Jacob, quem atěfjóniñe bēngbiama tojěftsanboshjona. Cachá, chabe básenga y chabe bayēnga muentšana

búyeshe tmojëfťsanofťsé; y ¿aca chabiama más bėťsá comna ca? —chė shembása yoįťsichamo.

13 As Jesús tbojanjuá: —Nĳetscanga chė quem búyeshentšana tmoįofťsenga, chėnga cachiņe echantėťjuendaye.

14 Pero chė chanjuabuáťsetaye búyeshentšana toįofťsé chana ndocna te cachiņe quebochėťajuendaye. Cha chanjuabuáťsetaye búyeshna, chábeņe echántsemna mo cánĳentťse bėįaytema obocanińcá, chė nĳetsca tescama yomna řšabe vida įťsebomnama ca —cha tbojanıyana.

15 Chora chė shembása tbojanıyana: —Seņor, hcba búyeshe řmabuáťsetá, as atťe ndoņe cachiņe chařondetsajuendama, ni búyeshe įuafcama moye įťsaboyama ndoņe chařondėťsemnama ca.

16 As Jesús tbojanıyana: —Motsa acbe boyá jachembuama y cochĳésabo ca.

17 Chora chė shembása tbojanjuá: —Boyá ndoņe quetsáťsbomna ca.

As Jesús tbojanıyana: —Třabá tcjayana boyá ndoņe condbomna ca.

18 Er, aca shachna boyanga conĳánabamna, y chė mora contsebomnana, acbe boyá ndoņe quenátřmėna. Nťřamo tconĳayancá ndegombre entsemna ca.

19 Chė shembása hcba tojanuena ora, Jesúsbioye tbojanıyana: —Seņor, mora atťe řentsetatřėmbo, aca canĳa Bėngbe Bėťsabe įuabna oyebuambnáyá comnama.

20 Bėngbe tempsca bėťs taitanga quem įjoca Bėngbe Bėťsá monĳánadorana; pero třėngaftanga, judiėnga řmondbėťsichamo, bėnga Bėngbe Bėťsá įadóramna, Jerusalenoca chė luare canmėna ca.

21 Chora Jesús tbojanjuá: —Shembása, řmoyeuná; canĳe tempo echanĳóřhjango y chora třėngaftanga ndoņe quecmochátamna Bėngbe Bėťsá įadóramna, ni quem įjoye įabana, ni Jerusalenoye jana.

22 Třėngaftanga samaritanėnga ndoņe queřmatábuatma nda řmetsadoránama; pero bėnga aíņe řřėnduábuatma, er chė atsebacayá judiėnguentšana endabó.

23 Pero ora entsoshĳajuana, ya chė tempo tocjobuache, ndaye ora chė Bėngbe Bėťsá chė Taitá ndegombre atřchuanayėnga, chė Espíritbeyeca y ndegombre įuabnėngaca chábiyome mochántadorana. Er chė Taitá entseboře chė chábiyome adórayėnga hcba chamotsamama.

24 Bėngbe Bėťsá, Espiritu endmėna; y chė chábiyome adórayėnga entsamna, chė Uámama Espíritbeyeca y ndegombre įuabnėngaca cha įťsadoránana ca —Jesús tbojanıyana.

25 Chora chė shembása tbojanıyana: —Atťe řėndėťatřėmbo, canmėna chė Bėngbe Bėťsabe Uámama Uabuayaná, chė Cristo įabana ca; y cha chaoĳářhjango orna, cha nĳetsca soįėngama cařochĳabuayená ca.

26 As Jesús tbojanıyana: —Atťe, chė ácaftaca entsoįebuambná cha, cha entsemna ca.

27 Chėntřcuana, Jesusbe uatřĳėndayėnga tmoįťanashĳajna, y tmoįťanėuatĳaná, Jesús canĳe shembásafaťca yoįťsoįebuambná causa. Pero ndocná Jesús tboįantĳá: ¿Ndayá cháftaca coįťseboře? o ¿Ndayeca cháftaca coįťsoįebuambná ca?

28 Chorna, chė shembása chabe uafcanėĳa toĳėsanboshĳona, y chė puebloye betřco toĳťaná. Chocna, entřanga toĳanėyana:

29 “Mabënga canÿe boyabása jinÿama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtsichamo.

30 As chë entšanga chë pueblócana tmojánbocana y Jesús yojtsemnoye tmojánashjajna.

31 Chca yojtsopasánentscuana, chë uatsjéundayënga Jesúsbioye imojtseimpadana: —Buatëmbayá, batšatema mose ca.

32 Pero cha tojanéyana: —Atše canÿe soye jasama séntsebmna. Tšëngaftanga chë soyama ndoñe quešmátstatšëmbo ca.

33 Chora chë uatsjéundayënga tmojanontšé entjanayana: —¿Nderado nda jasama chabiamá tojiyëbo ca?

34 Y Jesús tojanéyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiamá entsemna.

35 Tšëngaftanga šmondbétsichamo: “Cabá canta ishinÿe entsashbena jaja saná chaotsebínÿnama ca”; pero atše cbéyana: Minÿënga tša entšanga moye montsabëbana; chënga montsemna mo jajañe saná játbanama tojtseprontancá.

36 Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanána jtsësháchiñana. Cachcá, tšëngaftanga cmontsamna atšbiamá entšanga júbuajana, chë nÿetsca tescama yomna tšabe vida chamotsebmnama. Chë jaja saná átbanaye ora, jenënga y chë atbanayënga cánÿiñe oyejuayënga jtsemnana. Cachcá, chë entšanga átsbeñe chamojtsošbuaché ora, nÿetscanga, chë atšbiamá obuájajanënga y chë atšbiamá trabájayëngnaca cánÿiñe oyejuayënga mochántsemna.

37 Quem entšangbe ichámuana, canÿe ndegombre soye endmëna: “Chë jená canÿa jtsemnana, y atbanayana inÿa ca.”

38 Atše tšëngaftanga cbonjichamó canÿe soye játbanama, y tšëngaftanga tondaye chešmatsma chca chaotsebínÿnama. Inÿenga chiñe bëtscá tmonjëftsetrabája, y tšëngaftangna, chëngbe trabajënguentšana šmojolograñe ca —Jesús tojánayana.

39 Bëtscá entšanga, Samarioca pueblentšënga Jesúsbeñe imojtsanošbuaché, ntšamo chë shembása tojanéyana. Chë shembása tojanéyana: “Lempe ntšamo atše tijamcá cha šonjauyana ca.”

40 As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjëtana.

41 Y más entšanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

42 Y chë shembása chë entšanga tmojanianana: “Mora cocayé fsëntsošbuaché, ndoñe nÿe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatšëmbo ndegombre cha yojtsemna chë quem luare entšangbiamá Atsebacayá ca.”

Jesús, canÿe mandado uajabuachanabe básabioye tbojanshná

43 Uta te chentšana, Jesús Samariocana tojáisanbocna y Galileoye tojataná.

44 Cach Jesús mëntsá tojánayana: “Canÿa Bëngbe Bëtsabe juabna oyebuambanayá, cachabe luarentše oyenënga ndoñe bëtsá ntjabemëngana ca.”

45 Galileoca oyenënga Jerusalenoye tmojána, y tmojáninÿe nÿetsca bêts soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtanashjango ora, chënga tšabá tmojtanoſja.

46 Galileocna, Jesús cachiñe Caná puebloye tojésanashjango, chë béjayeca vínoye cha tojánbementse. Choca yojtsemna canÿe mandadbe uajabuachaná, y chabe uaquiñana Capernaum puebloa šocá yojtsejájona.

47 Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca.

48 As Jesús tbojaniyana: —Tšëngaftanga, Bëngbe Bëtsabe obenana jinÿanÿiyama bêts soyënga atše jamama ndoñe šmonjinÿëse, átšbeñe ndocna te ntšošbuáchiyana ca.

49 Chora, chë mandadbe uajabuachaná Jesúsbioye tbojaniyana: —Taita, betscó mabo, atšbe uaquiñá cabá ndóbana ora ca.

50 As Jesús tbojaniyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojaniyancá y tojtaná.

51 Cha yojtsataye orna, chabe observënga tmojánbocana jajëbenguama y tbojaniyana: —Acbe uaquiñá tšabá entsatsmëna ca.

52 As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

53 Chora chë taitá tojanenojuabó, cachca ora Jesús tbojaniyana: “Acbe uaquiñá ainá endëtsomñe ca”. Y cha y nÿetscanga chabe yebnentše oyenënga Jesúsbeñe imojtsanošbuaché.

54 Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bêts soye jamama, Bëngbe Bëtsabe obenana jinÿanÿiyama, Galilea luaroca.

5

Jesús canÿe jama ndobenábioye tbojanshná

1 Baseftayté chentšana, chë judiënga canÿe oboyejuaye te imojtsebomna ora, Jesús Jerusalenoye tojána.

2 Choca, chë Oveshëngbe amashjuana ca uabáinentše yojamna canÿe binche uafjajónaye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna.

3 Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana.

4 (Nderado nderado, Bëngbe Bëtsábioca canÿe ángel yojanamana jastjan-guana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënanana.)

5 Chë šoquënguiñe canÿe boyabása inamna, unga bnëtsana y posufta uatama jama ndobená.

6 Jesús chë jajonábioye tbojáninÿe ora y ba uatama chca yojamnama tojántatšëmbona ora, tbojantjá: —¿Quecojtseboše tšabá jtsatsmënama ca?

7 Y chë šocá tbojanjuá: —Taita, ndocná quetsátsbomna nda chašujabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inÿa atšbe natsana jtsamashënguana ca.

8 Y Jesús tbojanianana: —Matëtsbaná, acbe tjuashe mesocñe y matontsé jóyenana ca.

9 Cach ora chë boyabása tšabá yojsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna.

10 Chíyeca, chë tbojanshnábioye chë judiënga tmojanianana: —Mëntena ochnayté. Mënté ndoñe quenátopodena aca tjuashe jtsecutsnana ca.

11 Y chë boyabása tojanéyana: —Chë šonjashná cha mëntsá šonjauyana: “Acbe tjuashe mesocñe y montsé jóyenana ca”.

12 As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tmojauyaná ca?

13 Pero chë shaná ndoñe yontsetátšëmbo nda tbojanshnama. Chocna bëtsá entšanga imojtsemna; chcasna, Jesús chëngbe tsëntsajana tojanenatjëmba.

14 Chentšana, Jesús Bëngbe Bëtsabe bëts yebnentše chë boyabásabioye tbojáninýena y tbojanianana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiamu puerte mal echanjopása ca.

15 Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

16 Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama.

17 Pero Jesús tojanéyana: “Atšbe Taitá nýets tempo tšabe soyënga endbëtsama; cachcá, átsnaca tšabe soyënga sëntsama ca.”

18 Jesús tojanma ntšamo ochnayté ndoñe yonjanapodencá, y Bëngbe Bëtsabiamu tojánayana “Atšbe Taitá ca”. Mëntsá Jesús yojsanobiamná cach Bëngbe Bëtsacá. Chama, chë judiënga más imojtseboše Jesús jóbama.

Bëngbe Bëtsabe Uaquiñabe obenana

19 Chentšana Jesús tojanéyana: “Ndegombre šcuayana: Bëngbe Bëtsabe Uaquiñá, nýe cachabe cuenta tondaye quenátobena jamana. Cha jtsonýayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana.

20 Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëts soyënga bochanjínýinýiye, chë soyëngama tšëngaftanga chašmenjanama.

21 Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanýenga cha tojtsebošcá.

22 Chë Taitá ndocnabiamu jatichámuana tšabá o ndoñe tšabá yontsama ca. Chabe Uaquiñábioye nýets obenana tbonjatšetá nýetscangbiamu jayanama tšabá o ndoñe tšabá tmontsamama.

23 Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nýetscanga mondbetsinýinýaycá. Nda chë Uaquiñábioye ndoñe más uamaná tbonstebiamná, cach ndoñe más uamana ntsebiannayana chë Taitábioye, nda chë Uaquiñá tbojichmóbioye.

24 “Ndegombre šcuayana: Nda ntšamo atše sëntsichamcá šojoyeuná, y chë muentše šonjichmó chábeñe tojtsošbuaché, chë nýetsca tescama yomna tšabe vida jtsebomnama. Chabiamu chë Uaquiñá ndoñe queochátayana

castiganá chaotsemna ca. Chca, Bëngbe Bëtsabiama cha ya ndoñe más mo obanacá queochátmëna, chábeñe ndoşbuáchiye causa; y ya ndoñe nyetsca tescama castiganá queochátmëna. Y aíñe, chë nyetsca tescama yomna tşabe vida echántsebomna.

²⁵ “Ndegombre şcuayana: Chë jobuáchama te ya toçjobuache. Chë te, chë Bëngbe Bëtsabiama mo obanëngcá imomñënga mochanjouena Bëngbe Bëtsabe Uaquiñá jtsóyebuambnayana. Nda chca tşabá chaşojoyeuná cha, tşabe vida echántsebomna.

²⁶ Er ntşamo Bëngbe Taitá obenana endbomncá, cachá jamama entsanga vida chamotsebomnama, chabe Uaquiñábioynaca obenana tbojatşetá entsanga vida chamotsebomnama jamama.

²⁷ Chë Uaquiñá endmëna nda Bëngbe Bëtsá Entşá tbojánbema; chíyeca chë Taitá chábioye obenana tbojatşetá nyetscangbiama jayanama tşabá o ndoñe tşabá tmontsamama.

²⁸ Chama ndoñe matenjanana. Er canye tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjësebocana.

²⁹ Tşabe soyënga tmojëftsemënga, obanënguentşana mochántayena, chë nyetsca tescama yomna tşabe vida jtsebomnama. Pero bacna soyënga tmojëftsemëngna obanënguentşana mochántayena nyetsca tescama castigánënga jtsemnama ca” —Jesús tojanëyana.

Jesús, ndegombre Bëngbe Bëtsabe ichmoná inamna

³⁰ Mëntşánaca Jesús cachatbiama tojánayana: “Nye átsbeyeca tondaye quetsátobena jamama. Chë Taitá şontsemánda ntşamo nyetscangbiama jayanama tşabá o ndoñe tşabá tmontsamama. Nye chca atşe sentsobena chë soye jamama. Ndoñe quetsátsoşe jamana nye ntşamo cach atşe stseboşcá; pero sempre sëndbëtseboşe jamama, ntşamo Taitá, chë şonjichmó cha tojtseboşcá. Chíyeca atşe nyetscangbiama sentsichamo tşabá o ndoñe tşabá tmontsamama; y ntşamo nyetscangbiama sentsichamcá, ndegombre endmëna.

³¹ “Ntşamo cach atşbiamá tşayanama, ndegombre entsemna ca stsichámëse, ntşamo stsichamcá, nyetscangbiama tondaye ntsámanana.

³² Pero inya entsemna. Cha endétatşëmbo y entsichamo ntşamo ndegombre atşbiamá yomncá; y sëntsetatşëmbo ntşamo cha atşbiamá yojtsichamcá, nyetscangbiama aíñe yojtsámanama.

³³ Tşëngaftanga ínÿenga şmojanichamó atşbiamá Juan jatjayama; y ntşamo cha tmojauyancá ndegombre endmëna.

³⁴ Masque chë soyënga cha tmojáuyana, ndoñe queşnatájaboto ndocna entşá atşbiamá chaotsichamo ‘cha aíñe chca endmëna ca’. Atşe quem soyënga sentsichamo ndayá nye tşëngaftanga atsebácanënga chaşmotsemnama.

³⁵ Juan enjamna mo canye uajuinÿanësha tojtsajuinÿana y tojtsabuash-inÿinÿancá. Tşëngaftanga chabe buashinÿinÿanana şmonjinÿe, y şmonjáboşena rato cháftaca oyejuayënga jtsemnama.

³⁶ Pero chë atşe sënjama soyëngacna más entsinÿinÿena ntşamo atşbiamá ndegombre yomncá, chë ntşamo Juan atşbiamá tojánayanama. Ndayá atşbe Taitá şojabonÿé jamama, ntşamo atşe sentsamcá, entsinÿinÿiná ndegombre chë Taitá şojichmoma.

³⁷ Atşbe Taitá, chë şojichmó chánaca entsichamo ntşamo atşbiamá ndegombre yomncá, masque ndocna te chabe oyebuambnayana cheşmatuena, ni ntşamo cha yomncá cheşmátinÿe.

³⁸ Pero tšëngaftangbe ainanoye chabe palabra ndoñe tonjómashëngo, cha tbojichmóbeñe tšëngaftanga ndoñe quešmatošbuaché causa.

³⁹ Tšëngaftanga, Bëngbe Bëtsabe palabra tša jtsatsjëndayana, er šmondobátmana, chca jtsamëse chë nyetsca tescama yomna tšabe vida jónyënama. Y Bëngbe Bëtsabe uabemana palabrënguiñe atšbiana endayana ntšamo ndegombre yomncá;

⁴⁰ pero masque chca, tšëngaftanga ndoñe quešmátsboše atše jtsëstonana, y chca, tšabe vida jtsebomnana.

⁴¹ “Atše ndoñe quetsátsboše entšanga yapa tšabá atšbiana chamot-sichámuama.

⁴² Y inye soye, atše puerte cbondëbuatma, y sëndëtatšëmbo tšëngaftanga Bëngbe Bëtsá ndoñe šmondobonshánama.

⁴³ Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aíñe šmatjofja.

⁴⁴ Tšëngaftanga corente jésebošana, inyënga tšëngaftangbiana tšabá chamot-sichámuama, y inyëngbiana tšabá jtsichámuama; pero ndoñe ntsebošana chë nyë canyë Bëngbe Bëtsá tšëngaftangbiana cachcá chaotsichámuama. Chca šmojtšamëse, çntšamo šmochtsobena Bëngbe Bëtsábeñe jtsošbuáchiyana?

⁴⁵ Ndoñe šmattsejuabnaye, atšbe Taitabe delante tšëngaftangbe contra atše chjanya ca ntšamo tšëngaftanga šmojtšamama. Tšëngaftanga tša jt-sobátmanana atsebácanënga jtsemnana, chë ntšamo Moisesbe leyíñe endayancá šmojtšamama; pero ndegombre, ntšamo cha tojayancá, cach tšëngaftangbe contra entsemna.

⁴⁶ Tšëngaftanga, chë Moisés tojéftsanabema soyíñe šmojtsošbuachese, átšbeñnaca šmattsošbuáchiye, er cha atšbiana tojanábema.

⁴⁷ Pero chë tojanábema soyíñe tšëngaftanga ndoñe šmontsošbuachesna, çntšamo šmochjobenaye chë atše sentsichamo soyënguiñe jtsošbuáchiyana ca?” —Jesús tojanéyana.

6

Jesús shachna uaranga boyabásenga saná tojanacaredadó (Mt 14.13-21; Mc 6.30-44; Lc 9.10-17)

¹ Chë soyënga tojanopasá chentšana, Jesús chabe uatsjëndayëngaftaca tojána Galilea uafjájónaye chenguana. Chë uafjájónayna Tiberias cánaca inauabaina.

² Ba entšanga imojtsëstona, er chënga tmojáninye cha bëts soyënga jt-samana, šoquënga jtsashnayëse.

³ As Jesús tjoye tojántsua, y choca chabe uatsjëndayëngaftaca tojanótbema.

⁴ Ya judiëngbe canyë fiesta, chë Bashco fiesta, yojétsobeco.

⁵ Jesús tojanótbema ora, tojanontješë y tojánányë ba entšanga chábioye imo-jetsebëconaye. As Felípbioye tbojaniyana: —¿Ndayentšë saná cuanjabuámiye nyetsca quem entšanga chamosama ca?

⁶ Jesús chca tbojaniyana, ana Felípbioye jinýama ntšamo cha tabuanjo-juama; er cach Jesús tšabá inatátšëmbo ndayá jamama.

⁷ Y Felipe tbojanjuá: —Ni mo uta patse denario crocenánaca nanjopódia tandëse jabuámiyama, nyetsca entšanga nyë mo batšatëmnaca chamuétšesama ca.

⁸ Chorna, Jesusbe canyë uatsjëndayá, Andrés ca uabainá, Simón Pédrëbe catšata, Jesúsbioye tbojaniyana:

9 —Muentše entsemna canye básetema y cha shachna cebada tandëse y uta beónata entsebomna. Pero, ¿ndayase nye nyetsatema chëfta entsangbiama ca?

10 As Jesús tojánayana: —Entsanga méyana chamotbiama ca.

Becá shácuana chë luariñe inamna, y nyetsca entsanga chiñe tmojanoshéntsjatbiama. Chë entsanguentše shachna uaranga boyabásenga imotsemna.

11 Chora Jesús, chë tandëse chabe cucuatshiñe tojanca, y Bëngbe Bëtsábioye chë tandësama tbojtanchuá; y chabe uatsjéndayënga tojanëjatá, y chë uatsjéndayëngna nyetsca entsanga imojtsetbiámanënga tmojanatšatá. Cachcá Jesús chë beónaca tojanma, y ntšamo entsanga imojanbošcá tmojanatšatá.

12 Nyetscanga tmojanse y tmojtanoshachá ora, Jesús chabe uatsjéndayënga tojanëyana: —Chë ojamnëtémënga šmochtsatbananga, tondaye nye cachcá ntjëtsonyayama ca.

13 Chá chënga tmojanatbaná, y chë tmojanse shachna cebada tandësentšana tojanójamëtëmëngaca, bnëtsana uta sbarëcua tmojanajutjé.

14 Chë entsanga quem bëts soye Jesús jamama tmojáninye ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

15 Jesús yojtsetátšëmbo entsanga chëngbe rey jabemama imojetsebošama. Chýeca cach tjoye tojtsaisanoñe canya jtsomñama.

Jesús bėjaye juatsbuacá yojsaye

(Mt 14.22-27; Mc 6.45-52)

16 Tojanibétata ora, Jesusbe uatsjéndayënga chë uafjájónayoye tmojantsmá;

17 barquëshañe tmojtanenojayé, y tmojanontsé jenashbuachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chëngbioye ntashjanguana.

18 Chca imojtsenashbuachnëjuana orna, chë bėjayiñe jabuache binýia tojanóshjango y bëts olëshënga chë barquëshoye yojsójantšetaye.

19 Shachna o chnënguana kilómetro chënga tmojána ora, tmojáninye Jesús chëngbioye yojtsebëconaye, bėjaye juatsbuacá yojsaye. Chënga chca tmojáninye ora tša tmojanocochauatjaná,

20 pero Jesús tojanëyana: “Atše sëndmëna; ndoñe matauatjëngana ca.”

21 Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

Entsanga Jesús tmojánguango

22 Yëfsana, nyetsca entsanga, chë uafjájónayoye chenguánoica tmojanoquedanga tmojáninye, chë inye yëfsana chë nye canye barquësha yojuamnëshañe Jesusbe uatsjéndayënga tmojtsanoñama, y Jesús chëngaftaca ndoñe tonjánama.

23 Pero chëntscuana, Tiberias pueblentšana inye barquëshangá tojanáshjajna canye luarentše, chë Bëngbe Utabná Jesús chabe Taitábioye tbojtanchuá chentšana, entsanga saná tmojanse luare béconana.

24 Asna, ni Jesús ni chabe uatsjéndayënga chentše ndoñe montsemnama chë entsanga tmojáninye ora, chë barquëshangañe tmojtanenojayé y Capernaumoye tmojána Jesús jetsenguanguama.

Jesús, chë nyetsca tescama yomna tsabe vida jtsebomnama tandëse

25 Chë uafjajónaye chenguánoye tmojánashjajna ora, Jesús tmojáninýena y mëntśá tmojantjá: —¿Buatëmbayá, ntseco ora muentşe tcojášhango ca?

26 Y Jesús tojanëyana: —Ndegombre cbëyana, tšëngaftanga ndoñe atşe quešmatnguá, chë bëts soyënga tijamama, sinó nýe chë jtshachaye nýetśá tandëşe šmojasama.

27 Ndoñe matenángmenana chë nýe ndoñe bën y jopochócana sanama; chë ndmopochócaye saná, chë nýetsca tescama yomna tšabe vida jtsebomnama saná šmochjáanguango. Chë saná, Bëngbe Bëtsá Entśá tbojanbemá cmochanjátšataye, er Bëngbe Bëtsá chë Taitá tonjinýanýe, tšabe soyëngaca, cha chábiøye tbojuábuayanama ca —tojánayana.

28 Chora chë entśanga tmojantjá: —¿Ndayá fchjama ntšamo Bëngbe Bëtsá yojtseboścá chaotsemnna ca?

29 Chca tmojantjá ora, Jesús tojanëyana: —Chë Taitá entseboşe tšëngaftanga chabe ichmonábeñe chašmotsošbuáchemca ca.

30 Chora chënga tmojanianya: —¿Ndaye tšabe soye cochjama acbe obenana bënga jinýanýiyama ca? Chë soye chaftsjinýeşe, ácbeñe fchantsošbuáchiye. ¿Bëngbiamca taicochjama ca?

31 Bëngbe tempsca bëts taitanga entśanga ndoyenoca maná ca uabaina saná tmojanse. Bëngbe Bëtsabe uabemana palabrénguñe mëntśá endayana: “Cha celoca tandëşe tonjanatśatá chamosama ca” —chënga tmojánayana.

32 Chora Jesús tojanëyana: —Ndegombre cbëyana, Moisés chënga ndoñe chë celoca tandëşe tonjanatśatá; Bëngbe Bëtsá Bëngbe Taitá chëngbiøye tojanatśatá chë maná ca uabaina tandëşe; y cha endmëna nda celocana chë ndocna te ndmopochócaye tandëşe ndegombre cmondatśatná.

33 Er Bëngbe Bëtsábiocana tandëşe entsemna chë celocana tojastjanguá; y cha quem luare entśangbiamca entsama chë nýetsca tescama yomna tšabe vida chamotsebomnna ca —cha tojanëyana.

34 Chora chënga tmojanimpadá: —Taita, chë tandëşe sempre šcochtsatśatnayca ca.

35 Y Jesús tojanëjua: —Atşe sëndmëna entśanga chë nýetsca tescama yomna tšabe vida jtsebomnna tandëşe. Nda atşe chašojtsšëstona, sempre oyejuayá echanjëftsemna y Bëngbe Bëtsabe soyënga nýets tempo echanjesóbmñe, mo nda nýets tempo saná totsobomñcá, y ndocna te tboñtsishëntšancá.

36 Pero ntšamo ya tcbonjauyancá, tšëngaftanga atşe šmonjinýe y cabá ndoñe átsbeñe quešmatošbuaché.

37 Nda atšbe Taitá atšbiamca tbojabocacá, cha atşe šochantsšëstona; y nda átsbiøye šojtsšëstona, átsbentšana quichtëtábocna.

38 Er atšna celocana sënjabo chë šojichmó cha ntšamo yojtseboścá jamama, y ndoñe nýe ntšamo atşe stseboścá.

39 Y chë šojichmó cha entseboşe, ni mo canýa chë atšbiamca tojabacacá chentšana, atşe chailesenciá pochocaná chaotsemnna; y quem luare jopochócama tena, nýetscanga atšbiamca tojábacangbiamca chámuatayenama atşe chaimama.

40 Er atšbe Taitá entseboşe, nda chabe Uaquiñábioye tbojinýe y chábeñe tojtsošbuaché, chë nýetsca tescama yomna tšabe vida chaotsebomna, y quem luare jopochócama tena, cha cháuatayenama atşe chaimama ca —Jesús tojanëyana.

41 “Atşe sëntsemna chë celocana tojóshjango tandëşe ca” Jesús tojanëyana causa, chë judiënga tmojanontśé chabiamca podescá ichámuana.

42 Chënga mëntśá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsëtsata bënga tmotsábuatmñe. ¿Ntśamo cha mora yochjátichamo celocana tojástjango ca?

43 As Jesús tojanëyana: —Atśbiana ndoñe podesca matichámuana.

44 Ndocná quenátobena atśe juastana, chë Taitá, chë šojichmó cha, ainaniñe chca chaotsebošama ndoñe tbonjuajabuachëse; y atśe chanjama cha cháuatayenama quem luare jopochócama te.

45 Chë tempsquënga Bëngbe Bëtsabe juabna oyebuambnayënga mëntśá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atśbe Taitábioye tbojoyeuná, y ntśamo chë Taitá tbojabuatëmbacá tojuatsjinÿe, cha atśe šochanjuasto.

46 “Ndocná atśbe Taitá tbonjinÿe. Nÿe chë Bëngbe Bëtsábíocana tojabá aiñe.

47 Ndegombre šcuayana: Nda átśbeñe tojtsošbuaché, chë nyetsca tescama yomna tšabe vida echántsebomna.

48 Atśe sëndmëna entśanga chë nyetsca tescama yomna tšabe vida chamotsebomnama tandëse.

49 Masque tšëngaftangbe bëts taitanga, entśanga ndoyenoca chë maná ca uabaina saná tmojanse, pronto tmojanóbana.

50 Pero atśe sëntsoyeuambná ndayá chë celocana tojóshjango tandëšama. Nda chë tandëse tojase, ndoñe queochatóbana.

51 Atśe sëntsemna entśanga chë nyetsca tescama yomna tšabe vida jtsebomnama tandëse, chë celocana tojóshjanguëse. Nda quem tandëse tojase, nyetsca tescama nÿe ainá echanjesomñe. Chë chanjátśataye tandëšna, cach atśbe cuerpo entsemna. Chca chanjama quem luare entśanga chë nyetsca tescama yomna tšabe vida chamotsebomnama ca” —Jesús tojánayana.

52 Chora chë judiënga tmojanontśé enatsëtsnayana: —¿Ntśamo cha yochjobenaye cachabe cuerpo jatśatayana bënga jasama ca?

53 As Jesús tojanëyana: —Ndegombre šcuayana: Tšëngaftanga Bëngbe Bëtsá Entśá tbojanbemabe cuerpo ndoñe šmonjase y chabe buiñe ndoñe šmonjoššese, ndegombre tšabe vida ndoñe quešmochátsbomna.

54 Nda atśbe cuerpo tojase y atśbe buiñe tojošśé, chë nyetsca tescama yomna tšabe vida echántsebomna, y quem luare jopochócama te atśe chanjama cha cháuatayenama.

55 Atśbe cuerpo ndegombre saná endmëna, y atśbe buiñe ndegombre ofšëšnayie.

56 Nda atśbe cuerpo tojase y atśbe buiñe tojošśé, átšeftaca cánÿiñe mo canÿacá echántsemna, y átśnaca cháftaca.

57 Atśbe Taitá, chë šojichmó cha, vida endbomna, y atśe chábeyeca vida sëndbomna; cachcá, nda atśbe cuerpo tojase, chana átśbeyeca vida jtsebomnana.

58 Chë ndaye soyama atśe sëntsoyeuambná, atśbe cuerpo y atśbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nÿe nyets tempo vida echanjesóbmñe ca —Jesús tojánayana.

59 Chë soyëngna Jesús tonjanabuatambá Capernaum pueblentse, chë judiëngbe enefjuana yebnentse.

Chë nyetsca tescama yomna tšabe vida jtsebomnana palabrënga

⁶⁰ Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

⁶¹ Jesús yojtsetátsëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsësnacá ndoñe tšabá cmontsëuena ca?

⁶² Y chcasna, Bëngbe Bëtsá Entšá tbojanbemá, chë cha tempo inamna luaroye tojtëtsjuama šmojinýese, ¿ntšamo šmattsejubnaye?

⁶³ Bëngbe Bëtsabe Espiritu entsama entšanga chë tšabe vida chamotsebomnana. Chë cuerpo ndoñe uamana soye quenátsmëna; chë tcbonjáuyana soyënguiñe entsemna chë Uamana Espiritbe uajabuáchenana y chë tšabe vida.

⁶⁴ Pero masque chca entsemna, tšëngaftangbentšana banga átsbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entšanga jábuayenama Jesús tojanbojatšë orscana, cha inatátsëmbo ndëmuanyënga chábeñe ndoñe mochanjanošbuáchiye, y nda chë uayayëngbe cucuatšíñe yochjéftsayentšbashejuana.

⁶⁵ Y Jesús yojtëtóntša oyebuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

⁶⁶ Chë causa, chentšana, ba chabe ústonënga cachcá tmojesanonýá, y cháftaca ya ndoñe imontsajna.

⁶⁷ Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsóñama y atše jéseboshjonama šmojtseboše ca?

⁶⁸ Chora Simón Pedro tojanjuá: —Bëngbe Utabná Jesús, ¿chcasna ndábioye fchjanga ca? Nýe aca šcontsëtsësná chë nýetsca tescama yomna tšabe vida jtebomnana palabrénga.

⁶⁹ Acheñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnana ca.

⁷⁰ Chora Jesús tojanëyana: —Atše tcbonjabacacá, chë bnëtsana útata; pero canýa tšëngaftanguentšana, mo Satanasbe canýe trabajayacá entsemna ca.

⁷¹ Judas Iscariote, chë Simonbe uaquiñabiama chca Jesús tojánayana. Er chana masque canýa chabe bnëtsana uta uatsjëndayënguentšá inamna, Jesús uayayëngbe cucuatšíñe yochjáftsayentšbashejuana.

7

Jesube catšátanga chábeñe ndoñe montsanošbuaché

¹ Chë soyënguentšana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontsebo Judeoye jama.

² Chora, judiëngbe canýe bëts fiesta semana yojtsobeco. Quem fiestënguëntscuana, chë judiënga imojanamana tambënguiñe jtsiyenana.

³ As chora Jesusbe catšátanga tmojanayana: —Muentse ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminyama.

⁴ Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamëсна, motsa y nýetscangbe delante chca cochjama ca —chënga tmojanayana.

⁵ Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojanayana.

6 Chora Jesús tojanējua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe.

7 Chë nÿe quem luarama enójuabnaye entšanga ndoñe quemátobena tšëngaftanga jtsëbuayënjana, pero átšbioyna añe, er atše puerte tšabá sentsinÿanÿná ntšamo chënga imojtsamcá ndoñe tšabá yontsemnama.

8 Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

9 Jesús chë soyënga tojanëyana y cach Galileoca tojtsanoquedañe.

Chë tambënguñe jtsiyenama fiesta

10 Chabe catšátanga chë fiestoye tmojána chentšana, Jesúsna tojána, masque ndoñe entšángbeñe, sinó mo iytëcana cuenta.

11 Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

12 Entšángbeñe ba soyënga chabiana iytëcana imojtsichamo. Inÿenga chabiana imojtsichamo: “Cha tšabia endmëna ca”; pero ínÿengna: “Cha entšanga entsaíngña ca”.

13 Pero ndocná Jesusbiana beca añémoca yontsoyebuambná, chë judiëngbe amëndayëngbiana imojtsauatja causa.

14 Chë fiesta semana tsëntsañe yojsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana.

15 Chentše chë judiënga, ntšamo Jesús tojanabuatambacá tmojanuena ora, ojanánënga imojtsichamo: —Bëtscá ntjuatsjinÿcá, ¿ntšamo nÿetšá nantsetatsëmbo ca?

16 As Jesús tojanējua: —Atšbe buatëmbayana ndoñe nÿe átšbentšana quenatóbocana, ndayá chë šonjichmó chábentšana.

17 Nda tojtseboše jamama ntšamo chë šojichmó cha yojtsebošcá, cha echántsetatsëmbo atšbe buatëmbayana Bëngbe Bëtsábíocana yóbocanama o nÿe átšbentšana.

18 Nda nÿe cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsoyebuambnayana, y ndocnábioye ntseíngñayana.

19 “Ndegombre, Moisés tšëngaftangbiana ley tojëtsanaboshjona. Pero masque chca, tšëngaftanguentšá ndocná quenátama ntšamo cha tojëtsanmandacá. Y ¿ndáyeca šmojtseboše atše jóbama ca?” —Jesús tojanatjá.

20 Chora entšanga tmojanjá: —¿Ndegombre aca bacna bayëjbe juabna contsambá! ¿Nda yojtseboše aca jóbama ca?

21 Chora Jesús tojanëyana: —Nÿetsca tšëngaftanga ojanánënga atše šmontsonÿá, atše canÿe ochnayté canÿe entšá tijashnama.

22 Pero, Moisés tcmónjanamëndá básetema base bobachtema chë más delicadentše jatëtšana, chaotsinÿnama (ndoñe nÿe Moisésbeyeca chca, sinó Moisesbiana más tempsca bëts taitanga chca jamama imojanamánayeca); y tšëngaftanga canÿe básetema base bobachtema chë más delicadentše jatëtšana, masque chë te canÿe ochnayté totsomñese.

23 Y mora, ntšamo Moisés tcmojëtsanamëndacá ndoñe cachcá ntjonÿayama, canÿe básetema chca jatëtšana masque ochnayté; as, ¿ndáyeca atše šmojtsayaná, atše ochnayté canÿe entšabe nÿets cuerpo tijashnama?

24 Nye batśá jinÿese, ínÿengbiamá ndoñe matichámëngana tśabá o ndoñe tśabá tmonjama ca. Ntśamo chë soyënga ndegombre bëtsemnama natsana lempe tśabá jshëtsetatśëmbëse, śmochjayana tśabá o ndoñe tśabá tmonjama ca —Jesús tojánayana.

Jesús tojánayana ndëmocana cha tojánabama

25 Chora báseftanga Jerusalenoca oyenënga tmojanontśé ichámuana: —¿Mua ndoñe yontsemna chë jóbama montsenguá cha ca?

26 Masque ba entsángbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca?

27 Pero bënga mondëtatśëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatśëmbo ndëmocana cha yochjabama ca —chënga imojtsichamo.

28 Chca tojanuena ora, Bëngbe Bëtsabe bëtš yebnentše Jesús yojtsabuátambayëntscuana, cha jabuache tojánayana: —¡Tšëngaftanga śmojtsejuabná atše ndegombre śmabuatma, y ndëmocana tijabama śmojtsetatśëmbo ca! Pero nye atśbe cuenta, ndoñe chiyátabo, ndayá canÿa śojichmóyeca, nda ntśamo ndegombre yomncá nÿetsca soyëngama endbëtsoyebuambnaye; y tšëngaftanga cha ndoñe queśmatábuatma.

29 Atśna aíñe cha sënduábuatma, er atśe chábentšana sënjabo y cha quem luaroye śonjichmó ca —Jesús tojánayana.

30 Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango.

31 Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiamá más tśabe soyënga yochjama ca?”

Chë fariseunga tmojánbošena Jesús jishachama

32 Chë fariseunga tmojánatśëmbona ntśamo entsanga Jesusbiamá iytëcana imojtsencuëntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëtš yebnoca josticiënga, Jesús chamuishachama.

33 Chora Jesús tojánayana: “Muentšana nye baseftayté tšëngaftangaftaca chanjëftsemna; chentšana, chë śojichmó chábioye chanjëftspadésa.

34 Chora tšëngaftanga atśe śmochántsenguaye, pero ndoñe queśmochátinÿena; y ndayentše chántsemnoca ndoñe queśmochatobenaye jashjanguama ca.”

35 Chora chë judiënga tmojanontśé entjanayana: “¿Ndëmoye quem boyabása yochjá, y bënga ndoñe mochanjobenaye jinÿenama ca? ¿Inÿe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá?

36 ¿Ntśamo yojtsentsáyana cha śonjauyancá, chë ‘tšëngaftanga atśe śmochántsenguaye, pero ndoñe queśmochátinÿena; y ndayentše chántsemnoca ndoñe queśmochatobenaye jashjanguama ca?’” —chënga imojtsichamo.

Béjayënga vida bomniye

37 Chë fiesta jopochócama te yojamna chë más uámana te. Chë te, Jesús entsángbentše tojantsá y jabuache tojánayana: “¡Nda tbojtsajuendá, átšbioye chauabo y chaofśé!

38 Ntšamo Bëngbe Bëtsabe uabemana palabrenguiñe endayancá: ‘Nda átsbeñe tojtsošbuaché, cha echántsemna mo ndabe ainanentšana vida bomna béjayënga tojtsobocancá.’ Chca echántsemna átsbeñe ošbuáchiyëngbiana ca” — cha tojánayana.

39 Chë sóyeca, Jesús yojtseboše jayanana, chábeñe ošbuáchiyënga chë Uámana Espiritu mochjanóyëngacñe ca; er chë Uámana Espiritu cabá ndoñe tonjánabo, Jesús corente bëtsá yojamna cabá ndoñe tmonjaninýnyé causa.

Nýetsca entšanga ndoñe cachcá Jesusbiana imontsejuabnaye

40 Chca tmojanuena ora, ínýenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

41 Inýenga imojtsichamo: —Ndegombre cha chë Cristo, chë Uámana Uabuayaná entsemna ca.

Peró ínýengna: —Ndoñe, er chë Cristo Galileocana ndoñe queochátabo.

42 Ndegombre, Bëngbe Bëtsabe uabemana palabrenguiñe endayana, chë Cristina rey Davidbentsana entšá canmëna, y Belenocana caochjabo ca, cach pueblcana ndayentšá David inamna ca —chënga imojtsichamo.

43 Y chca, ínýengna Jesusbe pavor imojtsemna, y ínýengna chabe contra.

44 Inýenga imojtseboše Jesús jishachama, pero ndocná tbonjánishache.

Chë amëndayënga Jesúsbeñe ndoñe montsanosbuaché

45 Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashjajna ora, tmojanatjá: —¿Ndáyeca ndoñe Jesús šmonjuánatse ca?

46 Chora chë josticiënga tmojanëjua: —Ndocná quenatoyebuambná ntšamo chë boyabása tonjoyebuambacá ca.

47 Chora chë fariseunga tmojanéyana: —¿Tšëngaftágnaca šmojalesencia cha chacmaingñema ca?

48 ¿Nderado bëngbe amëndayënguentsá o bënga fariseunguentšá nýe mo canýa chábeñe tayojtsošbuaché?

49 Pero quem entšanga, ntšamo leyíne iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

50 Chora Nicodemo, canýa fariseunguentšá, chë Jesúseftaca jencuéntama íbeta tojána cha, tojánayana:

51 —Ntšamo bëngbe leyíne endayancá, bënga ndoñe quemuátobena jayanana canýe entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

52 Chora chënga Nicodemo tmojanjuá: —¿Acnaca chábeñe cojtsošbuaché y mo canýe Galileoca entšacá cojtsejuabná ca? Bëngbe Bëtsabe uabemana palabrenguiñe cochjuatsjinýe, y cochanjinýe ni canýa Bëngbe Bëtsabe juabna oyebuambnayá Galileocana yochjabo ca.

Chë shema boyábioye ínýaftaca ingñayá

53 Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatóñënga.

8

1 Pero Jesusna canýe tjoye, Olivos ca uabáinoye tojtsanoñe.

² Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nyetsca entšanga tmojanobeconá jouenama, y Jesús tojanótbema y tojanontšé jabuátambama.

³ Chorna, báseftanga ley abuátambayënga y fariseunga tmonjánashajna, y canÿe shembása tmojanëshjango. Chana tmojáninÿena chabe boyábioye inÿaftaca ibnetsoíngñañentscuana; nyetscangbe tsëntsaca tmojanatsá,

⁴ y Jesús tmojaníyana: —Buatëmbayá, quemuá fsënjínÿena chabe boyábioye inÿaftaca bondëtsoíngñañentscuana.

⁵ Leyiñe Moisés šonjanamëndá mëntšá uamana shembásengna ndëtšbéngaca jtsëbáyama. ¿Aca ntšamo catjayana ca?

⁶ Jesús chca tmojaníyana ana jisháchichiyama, chca chënga jtsebomnama ndáyeca chabe contra jayanana. Pero Jesús nÿe fshantsoye yojotsejbéna y yojótsá ntšabuáfjaca fshantsiñe juabemama.

⁷ Chënga nÿe imojtsetjanaye causa, Jesús tojantsbaná y tojanëyana: —Nda tsëngaftanguentsá tondaye bacna soyënga tondbomná, chaobojatšé ndëtšbeca jatëchënjama ca.

⁸ Chentšana Jesús cachiñe fshantsoye yojtsejbéna, y yojtëtóntša fshantsiñe jtëtabemama.

⁹ Chca tmojanuena ora, entšanga tmojanontšé canÿánÿa chentšana jésebocanana; natsana chë más bëtsananënga y chë inÿengna ústonoye. Canÿa Jesús tonjanoquedá y chë shembásanaca.

¹⁰ As, Jesús tojtantsá y tbojantjá: —¿Shembása, ndayentse chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

¹¹ Ndoñe, Taita, ndocná ca —chë shembása tbojanjuá.

Chora Jesús tbojaníyana: —Atse cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

Jesús yomna quem luarentša entsangbe juabna binÿnayá

¹² Jesús cachiñe Bëngbe Bëtsabe bëts yebnentse yojsabuátambaye, y entšanga mëntšá tojanëyana: —Atse sëndbinÿna quem luare entsangbe juabnënga. Nda atse chašojtsëstona, cha echantsiyena atse chë binÿnayáftaca; y ndoñe mo ibetiñcá queochátaye, y chca, tšabe vida echántsebomna ca.

¹³ Chora chë fariseunga Jesús tmojaníyana: —Aca nÿe cach acbiama chca contsoyebuambná; chcana, chë ntšamo contsichamcá tondaye quenatámana ca.

¹⁴ As chora Jesús tojanëjua: —Ntšamo cach atšbiama sëntsichamcá aiñe entsámana, masque nÿe atse stsichamo ntšamo atšbiama ndegombre yomncá. Er atse sëndëtatšëmbo ndëmocana tijabo y ndëmoye tštsá. Pero tsëngaftanga ndoñe chca quešmátstšëmbo.

¹⁵ Tsëngaftanga šmondbétsichamo inÿëngbiana tšabá o ndoñe tšabá tmontsamama, chca, nÿe ntšamo entšanga mondbetsejuabnaycá. Pero atšna ndocnabiama chca quetsátichamo.

¹⁶ Atse ndoñe nÿe canÿa quetsátsmëna inÿabiama jayanama tšabá o ndoñe tšabá tontsamama; ndayá atšbe Taitá, chë šonjichmó cha, átseftaca chca jayanana. Chiyeca, atse inÿabiama tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana.

¹⁷ Tsëngaftangbe leyiñe enduábemana, uta entšata ndayámnaca cachcá tbojanëse, ntšamo chata tbojayancá puerte jtsámanana ca.

18 Y morna, atše sentsichamo chë ntšamo cach atšbiana ndegombre yomncá, y atšbe Taitá, chë sonjichmó chánaca entsichamo ntšamo atšbiana ndegombre yomncá ca —Jesús tojánayana.

19 Chora chënga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tsëngaftanga ndoñe quešmatábuatma ni atše ni atšbe Taitá. Atše šmojtsábuatmëna, atšbe Taitánaca šmattsábuatma ca.

20 Bëngbe Bëtsabe bëts yebnoca, chë crocénana jacayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

“Chë chanjá luaroye, tsëngaftanga ndoñe quešmatobena jama”

21 Chora Jesús yojtëtóntša oyebuambnayana: —Atše chantá, y chora tsëngaftanga atše šmochántseguaye. Masque chca, šmochanjóbana tsëngaftangbe bacna soyëngama ndëperdonánënga. Chë chanjá luaroye, tsëngaftanga ndoñe quešmatobena jama ca —Jesús tojánayana.

22 Chora chë judiënga tmojanontsé enatsëtsnayana: —¿Mo nderado yojtsejuabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

23 Chora Jesús tojanéyana: —Tsëngaftanga quem luaroquënga šmondmëna; atšna tsbananocá, celocá sëndmëna. Tsëngaftanga nÿe quem luarama enójuabnayënga šmondmëna, pero atše ndoñe.

24 Chíyeca atše chca tbonjáuyana, chë “tsëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnama ndoñe chašmontsošbuachese, tsëngaftangbe bacna soyëngama ndëperdonánënga šmochanjóbana ca.

25 Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatsé orscana chama tcbonjáuyana.

26 Atše ba soyënga séntsebmoma tsëngaftangbiana jayanama, tsëngaftangbe contra jayanama; pero chë sonjichmó cha nÿetsca soyëngama ndegombre endbëtsichamo, y atšna ntšamo chábensana tijouencá, cachcá quem luare oyenënga séntsëtsëtsná ca —cha tojanéyana.

27 Pero chënga ndoñe tonjanësertá Jesús cachabe Taitabiana chca tojanéyanama.

28 As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatsëmbo nda sëndmëná atše bëtsemnama. Cachcá, tsëngaftanga šmochántsetatsëmbo, nÿe cach atšbe juábna atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuabná.

29 Y chë sonjichmó cha ndoñe nÿe canÿa quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtsemncá ca —Jesús tojánayana.

30 Jesús chca tojánayana ora, banga chábeñe imojtsanošbuaché.

Bëngbe Bëtsabe básenga y chë nÿe bacna soye jtsamama vida bomnënga

31 Chora Jesús, chë chábeñe imojtsosbuaché judiënga tojanéyana: —Ntšamo cbontsëtsëtsnacá tsëngaftanga siempre šmojtsamëse, ndegombre atšbe uatšjëndayënga šmochántsemna.

32 Ntšamo ndegombre yomncá šmochántsetatsëmbo; y ntšamo ndegombre yomncá jtsatatsëmbëse, atsebácanënga šmochántsemna ca.

³³ Chora chënga tmojanjuá: —Bëngna Abrahábentšana entšanga fsëndmëna, y ndocná ndocna te chešnáisishëche nÿe chabiama nÿets tempo jtsoservënama. As, ¿ndáyeca šcojtsëtsëtná bënga atsebácanënga fchtsemna ca?

³⁴ Chora Jesús tojanëyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana.

³⁵ Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá.

³⁶ Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana.

³⁷ Atše sëndëtatšëmbo tšëngaftangna Abrahábentšana entšanga šmomnana; pero tšëngaftanga šmontseboše atše jóbama, ntšamo atše chontsëtsëtnacá ainaniñe jójëngacñama ndoñe quešmátsboše causa.

³⁸ Ntšamo atšbe Taitábioca tijinÿcá, cach soyëngama atše sëntsoyëbuambná. Tšëngaftangnaca, cachcá ntšamo tšëngaftangbe taitábentšana šmojouencá šmontsama ca —tojanëyana.

³⁹ Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanëyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojëftsema y cachcá tšëngaftanga šmattsama.

⁴⁰ Atšna ntšamo ndegombre yomncá sëndoyëbuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenisobuachjanguá.

⁴¹ Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaneyana: —Bënga nÿe enaquëcana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

⁴² Chora Jesús tojanëyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmatsebobonshana. Er atšna, Bëngbe Bëtsábiocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá šonjichmó.

⁴³ ¿Ndáyeca tšëngaftanga ndoñe šmontsobena atšbe palabrënga josértana? Co, ntšamo chontsëtsëtnacá joyeunayama ndoñe quešmátsboše causa chca.

⁴⁴ Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátsama orscana, Satanás entšá obanayá endmëna. Satanabe juabnoca, ndocna tšabe soyënga ni ndegombre soyënga ntsebinÿnana. Chíyeca, ndocna te cha ntšamo ndegombre yomncá ntšamana. Cha canÿe bostero endmëna, y chá bentšana nÿetsca bostero soyënga jtsóbocanana. Chíyeca, cha tojtseboštero ora, nÿe ntšamo cachá yomnana jtsichámuana.

⁴⁵ Atšna sempre ntšamo ndegombre yomncá chondutsëtná; chíyeca, chë sentsichamo soyiñe tšëngaftanga ndoñe quešmatošbuaché.

⁴⁶ ¿Nda tšëngaftanguentšá nanjobenaye jinÿanÿiyana atše ndaye bacna soye tijamama? Y atše, nÿe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché?

⁴⁷ Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga

quešmátsmēna. Chíyeca, ntšamo Bēngbe Bētsá entsichamcá ndoñe quešmátsboše jouenama ca —Jesús tojanējyana.

Cristo Abrahambiana más natsana ya yojtsemna

48 Chora chē judiēnga tmojanianyana: —Ajá, bēnga co ndegombre fstsichamo, aca n̄ye samaritano y bacna bayējbe juabna uambayá comna ca fstsichamo ora ca.

49 Y Jesús tojanējua: —Atše ni mo can̄ye bayējbe juabna quetsatambá. Ntšamo atše sēntsamcá, endmēna jin̄yan̄iyama atšbe Taitá Bēngbe Bētsá uamaná yomnama; pero tšēngaftangna, atše chca tsmēnama ndoñe quešmatin̄yín̄ná.

50 Atše ndoñe quetsátsboše ín̄yenga atše más uamaná chašmobemama. Pero in̄ya endmēna; cha aín̄e endboše atše bētsá bétsemnama chamin̄yan̄yema. Y chánaca endmēna chē ín̄yēngbiana tšabá o ndoñe tšabá tmontsamama endbetsichamuá.

51 Ndegombre šcuayana, nda ntšamo atše sēntsichamcá tojouena y chca tojama, ndocna te queochatóbana ca —Jesús tojánayana.

52 Chora chē judiēnga tmojanianyana: —Mora cocayé fsēntsetatšēmo aca ndegombre bacna bayējbe juabna uambayá comnama. Abraham tojanóbana, y cachcá, n̄yetscanga Bēngbe Bētsabe juabna oyebuambnayēngnaca. ¿Y mora aca cochjátichamo, “Nda ntšamo atše sēntsichamcá tojouena y chca tojama, cha ndocna te queochatóbana ca”?

53 ¿O aca, bēngbe bēts taitá Abrahambiana más bētsá comna? Cha tojanóbana, y Bēngbe Bētsabe juabna oyebuambnayēngnaca. ¿Ndase cojátsmēna ca aca cojatsjuabná ca? —chēnga imojtsichamo.

54 Chora Jesús tojanējua: —Atše n̄ye cach atše más bētsá stsenobiamnasna, chē soye tondaye nantsámama. Pero chē más bētsá šojtsebiamná cha, atšbe Taitá endmēna, cach ndabiana tšēngaftanga šmondbētsichamo tšēngaftangbe Bētsá canmēna ca.

55 Pero tšēngaftanga cha ndoñe quešmatábuatma; atše aín̄e. Y atše, “cha ndoñe quetsatabuatma ca” stsichámēse, átsnaca cach tšēngaftangcá can̄ye bostero stsemna. Pero ndegombre atše cha sēnduábuatma, y ntšamo cha tojtsichamcá, atše sēndouenana y cachcá sēndbētsama.

56 Tšēngaftangbe uámana bēts taitá Abraham, chē atše jabama te jin̄yama yojtsejuabnaye ora, puerte oyejuayá yojtsemna. Y pronto tojēftsanin̄ye, y puerte tojanoyejuá ca —Jesús tojánayana.

57 Chora chē judiēnga tmojanianyana: —Aca cabá ndoñe shachna bnētsana uata quecátsbomna; y as, ¿ntšamo cochjátichamo, Abraham tcojēftsín̄ye ca?

58 Chora Jesús tojanējua: —Ndegombre cbēyana, Abraham cabá ndoñe ainá quenjatsmēna ora, atše ya sēnjétsemna ca.

59 Jesús chca tojanējua ora, chēnga ndētsbēnga tmojanájaca cha jt-satēchēnganjama. Pero Jesusna oitanánana, Bēngbe Bētsabe bēts yebnentšana tojésanbocna.

9

Jesús tojanma, can̄ye boyabása jtaná on̄yaná chabuabín̄yama

1 Can̄ye luarējana yojtsachnējuana ora, Jesús can̄ye boyabásabioye tbojánin̄ye. Chē boyabásana jtaná inón̄yana.

² Chë uatsjédayënga Jesús tmojantjá: —Buatëmbayá, ¿ndáyeca quem boyabása jtaná inónýna? ¿Camuá bacna soyënga tojamama, o chabe bëtsëtsangbe bacna soyënga causa ca?

³ Chora Jesús tojanëjua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entsanga jinýnyiyama ntšamo Bëngbe Bëtsá yobencá.

⁴ Cabá vojtsësháchena ora, sontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye.

⁵ Quem luariñe chjëftsemnëntscuana, atše quem luare entsangbe juabnënga binýnaya chanjëftsemna ca —tojanëyana.

⁶ Chca tojánayanentšana, Jesús fshantsiñe tojanbuashëtjo, y chë yebuáyeca batšá ngüiche tojánbema, y chë jtaná chë ngüicheca tojanbuchanëtjo.

⁷ Chora chë jtaná tojaniana: —Motsa y metsobúchjabebiyé, chë binche uafjónaye entsangbe pormániñe, Siloé ca uabániyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca vojtsobúchjabebiyé, y yebnoye tojtaná ora, ya ibojtsabinýna.

⁸ Chë juachañe oyenënga y chë jtaná tempo lemošna otjanañana tmojáninýënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

⁹ Inýënga imojtsichamo: —Cha entsemna ca.

Y inýënga: —Cha ndoñe quenátsmëna, pero chacá entsábona ca.

Y cach shnaná vojtsichamo: —Atše cha sëndmëna ca.

¹⁰ As chë entsanga tmojantjá: —¿Ntšamo chca mora cmojtsabinýna ca?

¹¹ Y cha tojanëjua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjónayañe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinýna ca.

¹² Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanëjua.

Chë jtana shnanábioye fariseunga imojtsetjanaye

¹³ Chora chë entsanga, chë jtaná inamná fariseúngbioye tmojanánatse.

¹⁴ Chë Jesús batšá yebuáyeca ngüiche tojánbema, y chë jtaná tojanma te, canýe ochnayté inamna.

¹⁵ As chë fariseunga chë boyabása tmojantjá: —¿Ntšámoyeca mora cmojtsabinýna ca?

Chora cha tojanëjua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyé, y cachora šonjuabinýna ca.

¹⁶ As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojtrabajá. Chíyeca cha Bëngbe Bëtsabe entšá ndoñe quenátsmëna ca.

Inýënga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, inýënga Jesusbe pavor imojtsemna, y inýënga chabe contra.

¹⁷ Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiamá ntšamo catjayana ca?

Chora cha tojanějua: —Chana canya Bëngbe Bëtsabe juabna oyebuambnayá entsemna ca.

¹⁸ Pero chë judiënga ndoñe montsanošbuaché, cha chë jtaná inamnana y chora ibojtsabinýnama. As chënga, ínýenga tmojanichamó chë boyabásabe bëtsésata jobiatsama.

¹⁹ Chë bëtsésata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

²⁰ Chora chë bëtsésata tmojanějua: —Aíñe fsëndétatšëmbo cha bëndatbe uaquiñá endmënana y jtaná tonjanonýnama.

²¹ Pero ndoñe queftsátstatšëmbo ntšamoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tsëngaftanga razón jatšatayama ca —chata tbojánayana.

²² Tempo, chë judiënga imojenóyeunaye, chëngbe enefjuana yebnënguentsana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsésatna chama ibojtsauatja;

²³ chíyeca tmojanéyana: “Cha ya bëtsá entsemna. Cachá motjanga ca”.

²⁴ As cachiñe chë judiënga chë jtaná inamná tmojanchembo y tmojaniana: —Bëngbe Bëtsabe delante cach acbiana ndegombre mobuambá. Bënga fsëndétatšëmbo chë boyabása canye bacna soyënga amá yomnama ca.

²⁵ Chora cha tojanějua: —Cha canye bacna soyënga amá o ndoñe tondmënana, atse ndoñe quetsátstatšëmbo. Atse nye mëntšá sëntsetatšëmbo: Atse jtaná sënjanmëna, pero mora šontsabinýna ca.

²⁶ Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

²⁷ Y cha tojanějua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tsëngaftángnaca šmojtseboše chabe ústonënga jtsemnama ca?

²⁸ Chora chënga cha tmojtsanóyenguango y tmojaniana: —Acna canye chabe ustoná cojtsemna, pero bënga ndoñe; bëngna Moisesbe ústonënga fsëndmëna.

²⁹ Bënga fsëndétatšëmbo, Bëngbe Bëtsá Moisésbioye tbojanatsésama, pero chë boyabásabiama ndoñe queftsátstatšëmbo ni mo ndëmocana cha tojabama ca —chënga imojtsichamo.

³⁰ Chora chë boyabása tojanějua: —¡Ntšamo chca nántsemna! Tsëngaftanga ndoñe šmontsetátšëmbo ndëmocana cha tojabama; pero chašubabinýnama cha tonjama.

³¹ Bënga tsabá mondétatšëmbo, bacna soyënga amënga Bëngbe Bëtsá ndoñe queondbátayaunanama. Chana, nye chábioye adorayá y ntšamo cha tojtsebošcá amábioye joyeunayana.

³² Quem luare jobojátsama orscana ndocna te quenaisótatšëmbo canye jtaná onýnanabiama ndánaca cha chabotsabinýnama tojéftsemama.

³³ Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

³⁴ As chë fariseunga tmojaniana: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátatuambaye ca?

Y chora chë judiëngbe enefjuana yebnentsana cha tmojtanábocna.

Chë Bëngbe Bëtsabe soyëngama mo jtanëngcá imomnënga

³⁵ Chë jtaná tmojtanáboचना Jesúš tojanuena ora, tojána cha janguan-guama. Tbojáninýena ora tbojaniana: —¿Aca Bëngbe Bëtsá Entśá tbo-janbemábeñe quecojtsošbuaché ca?

³⁶ Y cha tbojanjá: —¿Taita, nda cha yojtsemna, as atše chábeñe jt-sošbuáchiyama ca?

³⁷ As Jesúš tbojaniana: —Aca ya tconjinýe; chë ácaftaca entsoyebuambná cha entsemna ca.

³⁸ Chora, chë boyabása Jesúšbentše tojanoshamentśé jëtschuayama y tbo-janiana: —Atšbe Utabná, aínë sëntsošbuaché ca.

³⁹ Chora Jesúš chë entsanga tojanéyana: —Atše quem luaroye tijabo ndayá entsanga jinýanýiyama ntśamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjinýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátśëmbo ca juabnayëngna chanjinýanýiye, nýe batsá Bëngbe Bëtsabe soyëngama imotatsëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

⁴⁰ Básefta fariseunga Jesúseftaca imojtsemnënga chca tmojanuena ora, cha tmojaniana: —Ndegombre bënga ndoñe mo jtanëngcá queftsátsmëna ca.

⁴¹ Chora Jesúš tojanéjua: —Tšëngaftanga Bëngbe Bëtsabe soyëngama ndétatsëmbënga šmojtsemna ca, y ndegombre chë soyëngama ndoñe cmontśesertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátónýaye. Pero tšëngaftanga corente Bëngbe Bëtsabe soyëngama cmojtsésertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesúš tojanéyana.

10

Chë oveshënga abujënëya y chabe oveshënga

¹ As Jesúš tojanéyana: “Ndegombre šcuayana: Nda chë oveshëngbe luaroye bësháshajana ndoñe tonjámarshëngo, pero aínë inýajana tojtsamáshëngo, chana canýe atbëbaná y abacayá jtsemnana.

² Pero chë bësháshajana tojamashënguana, chë oveshënga anýená jtsemnana.

³ Chë bëshásha ebtafjuaná, chë bëshásha jebëtafjuana, y chë oveshënga abujënëya ntśamo cada ona tmabaincá chë oveshënga jáchembuana. Y chë oveshënga jtsetatsëmbuana chëngbe abujënëya yojtsachembuanama; y chë luarentšana cha jubuacnana.

⁴ Nýetsca oveshënga tmojábocana ora, chë abujënëya chënga jtsebënantsanana, y chë oveshënga jtśestonana, er chabe oyebuambnayana chënga joyátëmbana.

⁵ Pero chë tmonduabatmábioyna chë oveshënga ndoñe ntjuastana; nýe chábentsana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesúš tojánayana.

⁶ Jesúš entsanga chca tonjanacuntá, pero chënga ndoñe ntjosértana ntśamo yojtśentsayancá.

Jesús, chë oveshënga tšabe abujënëya

⁷ As Jesúš cachiñe tojanéyana: “Ndegombre chëyana: Atše sëndmëna chë bëshásha oveshënga mondbétsamashjuanéjána.

⁸ Njyetscanga chë atšbe natsana tmojánabënga, atbëbanënga y abacayënga immamna, pero chë oveshënga ndoñe chëngbioye ntjóyaunayana.

⁹ Atše chë bësásha sëndmëna. Nda quem bësáshajana tojamashënguá, atsbocaná echántsemna. Canye oveshá jamashënguana y jabocnana, y shácuana jónjënana. Cachcá, chë quemëjana tojamashënguá, lempe echanjónyena.

¹⁰ “Chë atbëbaná jabana nye jatbëbama, jóbama y lempe jtsepochoçama; pero atšna, entsánga vida chamotseboimnana y átšeftaca bëtscá tšabe vida chamotseboimnana tijabo.

¹¹ “Atše sëndmëna chë oveshënga tšabe abujajëña. Chë oveshënga tšabe abujajëña sempre jtseprontánana chëngbiama jóbana, chabe oveshënga abubájyeshanayeca.

¹² Pero nda nye crocenánama totrobáya y chë oveshënga ndoñe chábenga tmontsemna, cha nderado tojinýe canye tjañe queše chë oveshëngbioye tojtsobéocnana, cachora nye cachcá jesënyayana y jtsachana. Chë tjañe queše oveshënga jtsacamiyana, y chë oveshëngna nye cátoye jtsachetana.

¹³ Cha jtsemnana nye crocenánama trabajayá; chabíama nye chë uacanána más uámana soye jtsemnana, y chë oveshëngbiama tondayana ntseštšamnana; chíyeca cha jtsachana.

¹⁴ “Atše sëndmëna chë oveshënga tšabe abujajëña. Atše chënga sëndëubuatma, y chëngnaca atše šmonduábuatma.

¹⁵ Cachcá, chë Taitá Bëngbe Bëtšá atše šonduábuatma y atše chábioye. Atše sempre sëndétseprontana jóbana, atšbe oveshënga sëndabubanjeshánayeca.

¹⁶ Atše inye oveshënga sëndábamna, pero chënga ndoñe quem luariñe oveshënga quemátmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cániñe mochántsemna, y atšna njyetsca chë oveshëngbiama chë abujajëña chántsemna.

¹⁷ “Atše sempre sëndétseprontana jóbana, chora jtayenama. Chíyeca chë Taitá šondbobonshana.

¹⁸ Ndocná atšbe vida quešochatsbojuána, pero chënga sëndabubanjeshánayeca siempre sëndétseprontana jóbana, cach atše chca sëndbošeyeca. Derecho sëndétsóboimñe chëngbiama jóbana, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

¹⁹ Chë soyënga chë judiënga tmojanuena ora, cachiñe banga Jesusbe contra y inyënga Jesusbe pavor imojtsemna.

²⁰ Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

²¹ Pero inyënga imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canye bayëja nantsobena jamama canye jtaná chabotsabinýnana ca?

Chë judiënga ndoñe imontsošbuáchiye Jesús Bëngbe Bëtšabe Uaqiñá bëtsemnana

²² Canye uaftena tempo inamna, y Jerusalenentše canye fiesta imojtseboimna. Chë fiesta inamna cada uata, Bëngbe Bëtšabe bëtš yebna tempo cachiñe tmojtanjebuama entsánga jtenójuaboyama.

²³ Jesús Bëngbe Bëtšabe bëtš yebnoca yojétsana, canye amashjuana otsbojebniñe, Salomonbe Amashjuana ca uabáinentše.

24 Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiama ndegombre soye ntsetatšëmbcá? Aca chë Cristo cojtsemnëse, chama lempe tšabá šmanÿanÿë ca.

25 As Jesús tojanëjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bëtsemnana.

26 Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatéstoná, ntšamo chë oveshënga chë tšabe abuañëña mond-betsëstoncá.

27 Chë atše šmondústonënga, atše šmondbóyeunaye y šmondbëuasto. Atše chënga sëndëubuatma.

28 Atše chanjama, quem entsanga chë nÿetsca tescama yomna tšabe vida chamotsebonnama; chënga ndocna te pochocánënga quemochátsmëna, y ndocná quenátobena átšbentšana chënga jefcana.

29 Atšbe Taitá Bëngbe Bëtsá, chë entsanga atše chašmuastama tojamá, nÿetscangbiama más bëtsá endmëna, chíyeca ndocná quenátobena chábtentšana chënga jefcana.

30 Chë Taitá y atše canÿa fsëndmëna ca —Jesús tojánayana.

31 Chora, chë judiënga cachiñe ndëtšbënga tmojanájaca Jesús jtsatëchënganjama.

32 Pero Jesús tojanëyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

33 Chora chë judiënga tmojanjuá: —Ni canÿe quem bëts soyëngama bënga queftsátšboše aca jtsatëchënganjama. Aca Bëngbe Bëtsabiama ndoñe tšabá quecátichamo; mo chábiye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtšbéngaca aca jtsatëchënganjama ca —chënga tmojanayana.

34 Chora Jesús tojanëyana: —Bëngbe Bëtsabe uabemana palabrënguifne mëntšá endayana: “Atše sënjayana tšëngaftanga diosënga šmomna ca.”

35 Bëngbe Bëtsá chca tojánayana chë chabe palábraca y cha chamot-seservënama tojánamandangiama; ndocná quenátobena jinÿanÿiyana ni mo canÿe soye Bëngbe Bëtsabe uabemana palabrënguifne, ndoñe ndegombre soye yomnama.

36 Y atšbiamá, Bëngbe Bëtsabiácá uabuayaná y quem luare ichmoná, ¿ntšamo tšëngaftanga šmojtsoyana jayanama, “aca Bëngbe Bëtsabiama ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše ti-jayanama?

37 Ntšamo atšbe Taitá endamcá atše ndoñe sëntsamëse, tšëngaftanga átšbeñe ndoñe šmattsošbuáchiye.

38 Pero, ntšamo atšbe Taitá endamcá atše aiñe stsamëse, masque ndoñe átšbeñe šmontsošbuaché, nÿe chë Taitabe obenánaca soyënga tijamama šmochtssošbuáchiye. As, canÿe ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënama ca —Jesús tojanëyana.

39 Chora chënga cachiñe tmojánbošena Jesús jishachama, pero cha chëngbentšana tojanotsbocá.

40 Chentšana, Jesús Jordán bėjaye chenguana tojesaná y choca tojt-sanoquedañe. Chentše Juan tempo entsanga yojanëbáyana.

⁴¹ Ba entšanga tmojána Jesús jinýama, y mēntšá imojtsichamo: “Nde-gombre, masque Juan ni mo canýe bēts soye Bēngbe Bētsabe obenánaca tonjéftsema, lempe ntšamo quem boyabásabiama tonjanoyebuambacá, nde-gombre yojamna ca.”

⁴² Y chentše, ba entšanga Jesúsbeñe imojtsanošbuaché.

11

Lázaro tojanóbana

¹ Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Maríaftaca, chabe uabénata.

² Quem María inamna nda Bēngbe Utabná Jesusbe shecuatsiñe botamana uanguēsiye tbojanáshecbuešcja, y chabe stjēnashaca tbojtanshechojó cha.

³ Chē uta uabénatna ínýenga tmojanichamó Jesús jauenayama: —Bēngbe Utabná, chē aca condbobonshaná šocá entsemna ca.

⁴ Jesús chca tojanuena ora, tojánayana: —Quem šocana ndoñe quenátsmēna Lázaro chaóbanama. Pero aínē entsemna Bēngbe Bētsabe obenana entšanga jinýanýiyama, y Bēngbe Bētsabe Uaquiñá chamuatschuama ca.

⁵ Jesús corente yojánababuanýeshana Marta, María y chatbe uaftše Lázaro.

⁶ Masque chcasna, Lázaro šocá yojtsemna ca Jesús tmojaniana ora, cabá uta te más cha yojésemna luarentše tojtsanoquedañe.

⁷ Chentšana, chabe uatsjéndayēnga tojanéyana: —Judeoye cachiñe cuajna ca.

⁸ As chē uatsjéndayēnga tmojaniana: —Buatēmbayá, baseftayté entsemna chē luaroca judiēnga cmonjanbuachetá ndētsbéngaca jtsóbama; y mora, ¿cabá choye jtésama cojtseboše ca?

⁹⁻¹⁰ Chora Jesús tojanéyana: —Bnētsana uta hora bnēté endmēna. Nda bnēté tojtsana, ndoñe ntjojéstjiana, binýniñe bétsemnayeca. Cachcá átšeftaca endmēna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero ibeta tojtsanēse, cha jtsojéstjiana, ndoñe binýniñe causa. Cachcá, bēnga šontsamna yojtsēsháchenéntscuana jatrabájana. Atše jóbanama tempo chaojóshjango ora, ya ndoñe queochátēshachena jatrabájama ca —tojánayana.

¹¹ Chentšana tojanéyana: —Bēngbe amigo Lázaro tojtsomaná, pero atše choye chanjá jetsefšenama ca.

¹² Chora chē uatsjéndayēnga tmojanjuá: —Bēngbe Utabná, tojtsomanase yojtsayana chana tšabá yochtsatsmēna ca.

¹³ Pero Jesús yojtsanētsēsná ndayá Lázaro tojtsanóbana ca, y chabe uatsjéndayēngna imojtsejuabnaye Lázaro ndegombre yojtsomáñama.

¹⁴ As Jesús tšabá tojanéyana: —Lázaro tontsóbana.

¹⁵ Atše sēntsoyejuá choca atše ndoñe tsmēnana, tšēngaftangbe tšabiama chaotsemnana; chca, tšēngaftanga más átšbeñe chašmotsošbuáchema. Pero cuajna cha jinýama ca.

¹⁶ Chora Tomás, chē Gemelo ca uabobainá, chē inýe uatsjéndayēnga tojanéyana: “Bēngnaca cuajna, cháftaca mochjóbona ca.”

Jesús iuama entšanga chámuatayenama y chē nýetsca tescama yomna tšabe vída chamotsebonama

¹⁷ Jesús chē béconana tojánashjango ora, tojántatšēmbona Lázaro ya canta te uatbontsána yojtsemnana.

¹⁸ Betania pueblo yojamna Jerusalén béconana, mo unga kilómetroca.

19 Ba judiënga tmojána Marta y María jautsësayama y jatjëmbambayama ndoñe tša ngménaca chabondëtsemnama, chatbe uaftše tojanóbana causa.

20 Jesús yojtsashjajuanama Marta tojántatšëmbona ora, tojánbocna cha jajëbenguama, pero María cach yebnentše tojanoquedá.

21 Chora Marta Jesúsbioye tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana.

22 Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátšetaye ca.

23 Y Jesús tbojanjuá: —Ache uaftše echántayena ca.

24 Chora Marta tbojaniyana: —Aíñe, atše sëndëtatšëmbo cha yochtayenama, pero quem luare jopochócama te, nÿetsca obanënga mochtayena ora ca.

25 As Jesús tbojaniyana: —Atše sëndmëna chë entšanga chámuatayenama y chë nÿetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena.

26 Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

27 Chora Marta tbojaniyana: —Aíñe, Bëngbe Utabná, atše áceñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

Jesús, Lázaro yojtsátbontsana cuevëshentše yojenóbošachna

28 Chca tojánayanentšana, Marta tojtaná chabe quenata María jachembuama, y iytëcana tbojaniyana: “Buatëmbayá tonjášhango y entseboše aca jinÿama ca.”

29 María chca tojanuena y cachora tojéftsanbocna y tojána Jesús jinÿama.

30 Jesús cabá ndoñe chë puebløye tonjánamashëngo; yojëtsemna Marta tbojanëngo luarentše.

31 Chë yebnentše imojtsemna judiënga, María tša ngménaca ndoñe chaondëtsemnama tjëmbambayënga, tmojánbocana María juastama; er chë tojéftsantsbaná y tojéftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

32 Jesús yojtsemnentše María tojánashjango ora, chá bentše tojanoshamentšë y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

33 María y cháftaca tmojánashjajna judiënga, nÿetscanga imojt-senóbošachiye; y Jesús chca tojáninÿe ora, corente tbojancochtsetšena y puerte ngménaca yojtsemna.

34 Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinÿe ca.

35 Chora Jesús tojánenobošachna.

36 As chë judiënga tmojánayana: —¡Minÿënga, tša ibnabobonshana ca!

37 Pero inÿe judiënga imojtsichamo: —Chë jtaná chabuabínÿnama tojamá, ¿tondaye tonjobená jamama, Lázaro ndoñe chaondóbanama ca?

Lázaro tojtanayena

38 Jesús, cachiñe puerte cochtsetšenaná, chë uatbontsánøye tojanobeconá. Chë luarna cuevëshe inamna, y amashjuanentše canÿe bëts ndëtšbeca yojt-satámena.

39 Chora Jesús tojanëyana: —Chë ndëtsbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtšé, er ya canta te entsemna cha tontsóvana ca.

40 Y Jesús tbojanjuá: —Ndegombre, ya tcbonjauyana, aíñe átsbeñe tcojtsosbuáchese, cochjinÿe Bëngbe Bëtsá puerte obená y bëtsá bëtsemnama ca.

41 Chora chë ndëtsbé tmojanjuaná; Jesús celoye yojontjeÿiye y Bëngbe Bëtsábioye tbojaniyana: “Taita, cbatschuá atšbe opresido tcojouenama.

42 Atše sëndëtatšëmbo aca sempre šcondbëtseyeunanama; atše chca tcbonjauyana, muentše montsemna entšangbe tšabiama, chca, aca atše šcojichmoma, chënga chamotsošbuáchema ca.”

43 Chca tojánayanentšana, jabuache tojánayana: “¡Lázaro, chentšana mats-bocna ca!”

44 Y cachora chë obaná tojtanbocna, cucuatšënga y shecuatšënga entšëjuaca batsécná, y chabe jubíá base entšëjuaca uamochëcjuaná. As Jesús tojanëyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbioye jóbama
(Mt 26.1-5; Mc 14.1-2; Lc 22.1-2)*

45 Chë soyëngama, banga chë judiënguentšana, María jatjëmbabayama tmojánanga, y ntšamo Jesús tojanmca tmojáninÿënga, Jesúsbeñe imojtsosbuaché.

46 Pero inÿe judiënga fariseúngbioye tmojána, ntšamo Jesús tojanmama chënga jacúntama.

47 As, chë fariseunga y chë bachnangbe amëndayënga tmojánenefjna inÿe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama.

48 Nÿe cachcá chamojonÿase, nÿetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochóca, Bëngbe Bëtsabe bëts yebna y bëngbe luare Israel ca —chënga imojtsichamo.

49 Pero canÿa chënguentšá, Caifás ca uabainá, chë uata chë bachnangbe más uámama amëndayá inámná, tojanëyana: —Tšëngaftanga tondaye quešmátstatšëmbo.

50 Y ndoñe quešmatsjuabná, tšëngaftangbiamá más tšabá yojtsemna nÿe canÿe boyabása Israeloca entšangbiamá chaóbana, y ndoñe nÿets bëngbe luare chamotsepochóca ca —cha tojanëyana.

51 Pero Caifás chë soye nÿe cachabe juábnaca ndoñe chca tonjánayana. Cha, chë uata chë bachnangbe más uámama amëndayá inámnayeca, Bëngbe Bëtsabe Espiritbe obenánaca tojánayana Jesús ibojamna Israeloca entšangbiamá jóbana ca.

52 Y ndoñe nÿe Israeloca entšangbiamá, sinó chë inÿe luarënguiñe Bëngbe Bëtsabe básenga tmojanáshanënga chamuatábama, as chca, nÿetscanga nÿe canÿe luarentša entšanga chamotsemnama.

53 Chcasna, cach tescana judiëngbe amëndayënga tmojanenoyeuná Jesús jóbama.

54 Chíyeca Jesús entšangbeñe, Judea luariñe ya ndoñe yontšana. Chë luarentšana tojétsanbocna y canÿe luaroye tojtsanoñe, entšanga ndoyeniñe béconana, canÿe pueblo Efraín ca uabáinoe. Y chentše chabe uatšëndayëngaftaca tojtsanoquedañe.

⁵⁵ Judiëngbe Bashco fiestama batsá yojtsájamna, y ba entšanga pueblënguentšana Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominyama tšábenga jtsemnama, chë Bashco fiesta cabá ndobuache ora.

⁵⁶ Chocna, judiënga Jesús imojtsenguaye, y Bëngbe Bëtsabe bëts yebnentše imojtsentanaye: “¿Ntšamo šmojtsejuabná, cha tayochjabo o ndoñe quem fiesta ca?”

⁵⁷ Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbësna, chaobuambá ca, as Jesús jishachama.

12

María, botamana uanguëtsiye Jesúsbeñe tbojanáshecbuešcja
(Mt 26.6-13; Mc 14.3-9)

¹ Chnënguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtananayená cha, choca inoyena.

² Chentsna bëts saná Jesusbiamama tmojanábua. Marta tojanëjuatšé, y Lázaro yojtsemna chë Jesúseftaca juasama meséshañe imojtsetbiámanënguentše.

³ As María canye jarrëtema tojanaca; chiñe yojanaftsuamna canye botamana uanguëtsiye, bëtsca uámaniye, ena nárdoca pormániye. Chë uanguëtsiye, María, Jesusbe shecuatšënguiñe tbojanáshecbuešcja, y cachabe stjënashaca tbojtanshebojó. Chora, chë yebnentše ena nardiyana yojtsonguëtsiye.

⁴ Chora, canya Jesusbe uatsjendayënguentšá, Judas Iscariote, chë Jesús uayayëngbe cucuatšifne yochjanayentšbashejuaná, tojánayana:

⁵—Quem botamana uanguëtsiye unga patse denario crocénana enduámana. ¿Ndáyeca ndoñe šmonjuie y ndbomnjémënga chë crocénana mašmëntsatsatá ca?

⁶ Pero Judas chca tojánayana, chë ndbomnjémëngbeñe ntsejuabnacyá, sinó cha atbëbaná inamna causa. Judas chëngbe crocénana shecnëšifne yojánatbëna, y ba soye, chë shecnëšoye imojanatsuáma crocénanentšana cha yojánatbëbana.

⁷ As Jesús tbojanjuá: —Cachcá monyá. María mëntscoñe chë botamana uanguëtsiye iuabofjájona, cha jobenayama átšbeñe jabuéšcja, er ndoñe bën y atše šmochanjaitëme.

⁸ Chë ndbomnjémëngna tšëngaftangbeñe sempre mochanjesomñe, pero atše ndoñe ca —tojánayana.

Judiënga tmojanenoyeuná Lázaro jóbama

⁹ Ba judiënga tmojántatšëmbona Jesús Betanioca yojtsemnama, y choye tmojána, ndoñe nýe Jesús jinýama, sinó Lázarnaca, chë Jesús tbojtananayená cha.

¹⁰ As chë bachnangbe amëndayënga tmojanenoyeuná Lázarnaca jóbama.

¹¹ Chabe causa, ba judiënga chëngbiyoye cachcá tmojesanëñya y Jesúsbeñe imojtsošbuaché.

Jesús Jerusalenoye tojánashjango
(Mt 21.1-11; Mc 11.1-11; Lc 19.28-40)

¹² Chë yëfsana, mallajta entšanga, Jerusalenoca fiestama tmojánashjajnënga, tmojántatšëmbona Jesús choye yochjánashjanguama.

¹³ As chëngna palma betiye buacuafjënga tmojanatëtsetše, y Jesús jajëbenguama tmojánbocana, y mëntsá imojtsáyebuache: “¡Bëngbe Bëtsá

matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

¹⁴ Jesús canye burrotema tbojáninýena y chábeñe tojanenoyayé. Ntšamo Bëngbe Bëtsabe uabemana palabrenguiñe iuayancá, cachcá tojanopasá. Chiñe mëntšá endayana Jerusalenoca entšangbiama:

¹⁵ Sión bëts puebloca oyenënga, ndoñe matauatjëngana.

Minýënga, tšëngaftangbe Rey burrotëmiñe enjaquená entsabó ca.

¹⁶ Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninýanyé ora, chë uatsjëndayënga chama tmojanenoyuabó, lempe ntšamo Bëngbe Bëtsabe uabemana palabrenguiñe iuayancá y cachcá Jesúseftaca tojanopasama.

¹⁷ Chë Jesúseftaca imojtsemna entšanga, Lázarbïoye uatbontsánoye tbojanchembo ora y chentšana tbojtanayená ora, ntšamo tmojáninýama chora imojtsecuëntaye.

¹⁸ Chíyeca, ba entšanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca.

¹⁹ Pero chë fariseunga imojtsenatsëtsnaye: “Tšëngaftanga šmontsonýá bënga tondaye jamama quemuátobenama y más, inýetscanga cha montšëstona ca!”

Básefta Grecia luaroca entšanga Jesús tmojánguango

²⁰ Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entšangnaca imojtsemna.

²¹ Chëngna, Felipe chë Galilea luarocá, chë Betsaida pueblocabïoye, tmojanobecná y tmojanimpadá: “Señor, bënga fšëntseboše Jesús jinýama ca.”

²² Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jauenayama.

²³ Jesús chata tojanéyana: “Chë Bëngbe Bëtsá Entšá tbojanbemá corente bëtsá yomnama jinýanýiyama te ya tocjebuache.

²⁴ Ndegombre šcuayana: Canye trigo jénaye ndoñe fshantsiñe tmonjuatbontsá y ndoñe tonjóbanëse, nýe cach canye trigo jénaye jesomñana. Pero tmojuatbontsá y tojóbanase, bëtscá jashájonana.

²⁵ Cachcá, nda nýe cachá tojtsenóbobonshana, cha chabe vida echanjëtsobuetše. Pero nda nýe cachá ndoñe tontsenóbobonshana y ntšamo atše stemandacá, quem luariñe vida tojtsebomnëntscuana cha tojtsamëse, chë nýetsca tescama yomna tšabe vida echántsebomna.

²⁶ Nda ntšamo stemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiama, atšbe Taitá Bëngbe Bëtsá echanjínýanýiye bëtsá yomnama ca” —Jesús tojánayana.

Jesús tojánayana cha yochjanóbanama

²⁷ Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átseftaca echanjopása soyënga šmotsebojuaná ca?’ Ndoñe; er más chama atše quem luaroye tijabo.

²⁸ Taita, šminýanýé aca puerte bëtsá y obená comnama ca.”

Y cachora, celocana canye oyebuambnayana tojanóbocna mëntšá: “Ya tcbonjinýanýé atše puerte bëtsá y obená tsmënama, y mora cachiñe cachcá chanjama ca.”

²⁹ Entšanga chca tmojanuena ora, ínýënga imojtsichamo nýe tojanjuésase ca; pero ínýëngna imojtsichamo: —Canye ángel chábiyoe tbonjuatsëtsá ca.

³⁰ Chora Jesús tojanëyana: —Ntšamo šmonjouencá, atšbiamana ndoñe quenátsmëna, sinó tšëngaftangbiamana.

³¹ Mora chë tempo entsemna, chë quem luare entsanga tmojëftsema bacna soyënga jinÿanÿiyama y chëngbe castiguama jayanama. Y mora, chë nyetsca bacna soyënga mandayá, quem luarentšana mochántabocna.

³² Pero atše fshantsocana atšbananá chaitsemna ora, nyetsca entsanga átšbioye chanjúbuaja ca —Jesús tojánayana.

³³ Chca cha yojtsichamo, ana jinÿanÿiyama ntšamo jóbanama ibojamnama.

³⁴ Chora chë entsanga tmojanjuá: —Bëngbe Bëtsabe uabemana palabrënguiñe endayana, y chíyeca bënga fsëndétatšëmbo chë Cristo nyetsca tescama vida yochtseboamna ca. As, ¿ndáyeca cojtsichamo, Bëngbe Bëtsá Entšá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entšá tbojanbemá ca? —chënga imojtsichamo.

³⁵ Y Jesús tojanëyana: —Nye baseftescama chë entsangbe juabnënga binÿnayá tšëngaftangbeñe entsemna. Chë binÿnayá cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binÿniñe tojtsana, cha ndoñe ntsetatšëmbuana ndëmuajana yojtsana.

³⁶ Chë binÿnayá cabá tšëngaftangftaca endëtsemnëntscuana, chábeñe šmochtsošbuáchiye; as, tšëngaftangbe juabnënga binÿniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entsangbiamana yojetsóitana.

Ndáyeca chë judiënga Jesúsbeñe ndoñe montsanošbuaché

³⁷ Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana,

³⁸ ntšamo Bëngbe Bëtsabe juabna oyebuambnayá Isaías tojanabemcá, cachcá chaotsemnana. Isaías mëntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinÿinÿé ora ca?

³⁹ Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojëftsanabema:

⁴⁰ Bëngbe Bëtsá tojama chënga chabe soyëngama ndoñe botamana chamondëtsejuabnama

y chabe soyënga ainaniñe ndoñe chamondóyëngacñama,

as ndoñe chaondëtšësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjätsebacama;

y chca, chënga mochántsemna mo ndëšnana entsangcá ca.”

⁴¹ Isaías chca tojánayana, er tojáninÿe Jesús puerte bëtsá y obená yojamnama, y chca chë uabemaniñe Jesusbiamana yojanoyebuambná.

⁴² Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiamana auatja causa, chë judiëngbe enefjuana yebnënguentšana ndoñe chamondëtëbuacnama.

⁴³ Chëngbiamá más yojanámana, entšanga chëngbiamá chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

Jesube palabrëngaca yochtsótatšëmbo entšanga tšabá o ndoñe tšabá tmon-jamama

⁴⁴ Chora Jesús mëntšá jabuache tojánayana: “Nda átšbeñe tojtsošbuaché, ndoñe nýe átšbeñe ntsošbuáchiyana; chë nda šojichmó chábeñnaca cha jt-sošbuáchiyana.

⁴⁵ Cachca, nda atše šojtsonýá, chë šojichmó chábioynaca cha jtsonýayana.

⁴⁶ Atše quem luaroye tijabo entšangbe juabnënga jabobínýnama, chca, nda átšbeñe tojtsošbuaché, mo ibetiñcá ndoñe chaondëtsemnama.

⁴⁷ Pero nda atšbe soyëngama tojouena, pero ntšamo sëntsichamcá ndoñe tontsama, atše chabiamá ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entšanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama.

⁴⁸ Nda atše šojtšaboté y atšbe palabrëngama ndoñe šonjoyeuná, ya entse-bomna nda chabiamá yochjayana bëts castigo jtsebmomnama ibojtsemna ca. Atše tijanoyebuambá palabrëngaca, quem luare jopochócama te chabiamá chca echántsayana.

⁴⁹ Er atše ndoñe nýe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana.

⁵⁰ Atše sëndétatšëmbo, atšbe Taitá tojamandá orna, cha jamándana entšanga chë nýetsca tescama yomna tšabe vida chamotsebmomnama. Chýeca, ndayá sëntsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

13

Jesús chabe uatsjëndayënga tojanashecjabebé

¹ Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábenga yojanababuanýeshancá, chë quem luare imojamnënga, chórna yojtseboše chë bëts bonshánana puerte más jinýanýiyana.

² Pero Satanás, Júdasbe ainaniñe bacna juabnënga tojanajó, uayayëngbe cucuatšíñe Jesús jayentšbáshejuanama. Judas Iscariote, Simonbe uaquíñá.

³ Jesús yojtsetátšëmbo chabe Taitá Bëngbe Bëtsá nýets obenana tojánatšetama. Cachcá, Jesús yojtsetátšëmbo, Bëngbe Bëtsábiocana cha tojánabama y cachábioye jtama ibojtsemnama.

⁴ Chcasna, chë ibeta jasama tmojanpochocá ora, mesëshentšana tojants-baná, chabe juatsboye uichëtjoníya tojanenátsejca y canýe tuallëjua tojanen-nasná.

⁵ Chentšana, canýe bachešíñe búyeshe tojanbuešcja y tojanontsé chabe uat-sjëndayënga jushecjabebiyana y jtéshebojuana cha yojtšasnana tuallëjuaca.

⁶ Pero, Simón Pedro tbojanobuache ora, Jesúsbioye tbojaníyana: —Atšbe Utabná, ¿aca šcochjuashecjabí ca?

⁷ Chora Jesús tbojanjuá: —Atše sëntsama soye mora ndoñe quecmátësertana; pero más chcoye aíñe cmochanjósérta ca.

⁸ As Pedro tbojaníyana: —¡Ndocna te šcatjuashecjabí ca!

Pero Jesús tbojaniyana: —Ndoñe chachbonjuáshecjabese, atšbia ndoñe que-cochátsmëna ca.

⁹ Y Simón Pedro tbojaniyana: —¡Atšbe Utabná, as nÿe atšbe shecuatšënga ndoñe, ndayá atšbe cucuatšënga y bestšásnaca ca!

¹⁰ Pero Jesús tbojanjuá: —Nda bebená tojtsemna, nÿe shecuatše jtsashecjabiamá jtsajabótana, ndoñe nÿetsá cachiñe. Nda tojtsobebé, ndoñe tsengá ntsemnana. Cachcá, mo bebënënga cuenta tsëngaftanga šmontsemna; pero canÿa muentše entsemna, y cha mo bebenacá ndoñe quenátsmëna.

¹¹ Jesús yojtsetátšëmbo nda chë uayayëngbe cucuatšinë boshjuaná yochtsanmënema, chíyeca tojánayana: “Tsëngaftanguentšá canÿa entsemna, cha mo bebenacá ndoñe quenátsmëna ca”.

¹² Jushecjabebiyama tojanpochocá ora, chabe juatsboye uichëtjoníya tojtanchëtjo, y mesëshentše tojtanoítbema. Chora tojanéyana: —¿Chë tcbonjábiamá soyama quecmojtsësertana ca?

¹³ Tsëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna.

¹⁴ Atše, tsëngaftangbe Buatëmbayá y Utabná, tcbonjushecjabebé; chcasna, tsëngaftángnaca cmontsamna jenáshecjabebiyana.

¹⁵ Ntšamo quem sóyeca tcbonjanÿanyëcá, tsëngaftanga cachcá šmochtsama.

¹⁶ Ndegombre šcuayana, chë oservená chabe nduñbiama ndoñe más uamaná ntsemnana. Cachcá, chë ichmoná chë tbojichmobiyama ndoñe más uamaná quenátsmëna.

¹⁷ Quem soyënga chašmojuatsjinÿe y chca chašmojamëse, tsëngaftanga puerte oyejuayënga vida šmochanjëftsebmoma.

¹⁸ “Atše sëndëtatšëmbo chë tijábacangbiama, chíyeca atše nÿetscangbiama ndoñe chca quetsatoyebuambná. Y ntšamo Bëngbe Bëtsabe uabemana palabrënguiñe endayanca cachcá chaotsemnana, chë ‘canÿa átseftaca tandëse tonjasá, atšbe contra echántsemna ca’, cachcá echanjopása.

¹⁹ Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, atšbeñe šmochantsošbuáchiye, y as šmochántsetatšëmbo atše tsmëna chë nda sëndmëná.

²⁰ Ndegombre šcuayana: Nda atše tijichmóbiye tbojofja, cha atše šochanjofja; y nda atše šojofja, cha chë nda šojichmóbiye bochanjofja ca” —Jesús tojánayana.

Jesús tojánayana uayayëngbe cucuatšinë Judas bochjánboshjonama (Mt 26.20-25; Mc 14.17-21; Lc 22.21-23)

²¹ Chë soyënga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canÿa tsëngaftanguentšá uayayëngbe cucuatšinë šochanjáboshjona ca.

²² Chora, chabe uatsjëdayënga tmojanontsé enonÿinÿayana, y ndoñe montsetátšëmbo ndabiyama Jesús chca tojánayanama.

²³ Canÿe uatsjëdayá, chë Jesús puerte ibnabobonshaná, Jesusbe juachaca inatbemana.

²⁴ As, Simón Pedro chábiye tbojánëfatšëmbo, ndabiyama Jesús chca tojánayanama Jesúsbiye chabotjama.

²⁵ Chë puerte bonshana uatsjëdayá, Jesúsbiye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

²⁶ Chora Jesús tbojanjuá: —Atše canÿe base tandëtema chanjafchëcuacuaye y ndábiye chajoyé, cha entsemna ca.

As Jesús canýe base tandëtema tojanfchecuacuá, y Judas, Simón Iscariotbe uaquiñábioye, tbojanoyé.

²⁷ Tandëse tojanóyëngacñe y cach ora, Satanás Júdasbe ainaniñe bacna juabñënga tbojáncochëngo. As Jesús tbojanianyana: “Chë cochanjama soye, cam ora moma ca.”

²⁸ Pero ni canýa chë jasama imojtsetbiamanënguentśá tbojanësertá, ndayama Júdasbioye chca tbojanianama.

²⁹ Judas inamna chëngbe crocénana shecnësiñe uambayá; chíyeca ínýënga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomñëjmënga ndayánaca chauatśatama ca.

³⁰ Júdasna chë base tandëtema tojanóyëngacñe, y cachora chentśana tojëftsanbocna. Chora ya ibeta yojtsemna.

Chë tsëm mando

³¹ Judas tojëftsanbocnentśana, Jesús tojánayana: —Ora tocjobuache, Bëngbe Bëtsá Entśá tbojanbemá corente bëtsá y obená yomnama jinýanýiyama; y mua echanjínýanýiye Bëngbe Bëtsá corente bëtsá y obená yomnama.

³² Cha echanjínýanýiye Bëngbe Bëtsá chca yomnama, chíyeca Bëngbe Bëtsánaca echanjínýanýiye corente bëtsá y obená yomnama, y mora entsemna chë ndaye ora Bëngbe Bëtsá chca chabiamama yochjínýanýiye.

³³ Atśbe básënga, baseftatescama tśëngaftangaftaca séntsemna. Chora śmochántsenyuaye, pero ntśamo judiënga sënjauyancá, mora cachcá tśëngaftanga cbëyana: Chë chanjá luaroye, tśëngaftanga ndoñe queśmátobena jama ca.

³⁴ Canýe tsëm soye cbetsamëndá: Nýetscanga śmochtsenbobonshana. Ntśamo atśe tśëngaftanga cbondábabuanýeshana, cachcá tśëngaftanga śmochtsenbobonshana.

³⁵ Tśëngaftanga śmojtisenbobonshánëse, nýetsca entśanga mochántsetatśëmbo, tśëngaftanga atśbe uatsjëndayënga śmomnama ca —Jesús tojanëyana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Lc 22.31-34)

³⁶ Chora Simón Pedro tbonjantjá: —Bëngbe Utabná, ¿ndëmoye cochjá ca?

As Jesús tbojanjuá: —Atśe sëntśá luaroye, mora aca ndoñe quecátobena atśe juastana, pero más chcoye aiñe ścochanjuasto ca.

³⁷ As Pedro tbojanianyana: —Atśbe Utabná, ¿ndáyëca ndoñe séntsobena mora aca juastama? ¡Atśe séntseprontana acbiamama jóbánama ca!

³⁸ Chora Jesús tbojanianyana: —¿Ndegombre cojtseprontana atśbiamama jóbánama? Ndegombre cbëyana, cabá ngallo ndécánta ora, aca unga soye atśbiamama cochanjayana: “Cha ndoñe quetsatabuatma ca”.

14

Jesús beyëca entśanga jobenayana Bëngbe Bëtsábioye jama

¹ Mëntśánaca Jesús tojánayana: —Ndoñe ainana tsetśanënga matmënana. Tśëngaftanga Bëngbe Bëtsábeñe śmondośbuaché; átśbeñnaca śmochtsośbuáchiye.

² Atśbe Taitá Bëngbe Bëtsá endmënoca, ba luarënga joyënanama endmëna. Ndoñe chca tontsemnëse, atśe chca matchënjáuyana. Morna, cha endmënoye atśe chanjá tśëngaftangbiamama canýe luare joyënanama jabuáprontama.

³ Atše chajá y chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftángnaca chašmotsá joyénanama.

⁴ Atše chanjá choye ntšamo jama y jashjanguama ya šmontsetátšëmbo ca –Jesús tojánayana.

⁵ Chora Tomás Jesúsbioye tbojaniana: –Bëngbe Utabná, ndëmoye coch-jama ndoñe queftsátstatsëmbo. As, ¿ntšamo bënga fchtsetátšëmbo ntšamo choye jama ca?

⁶ Chca tbojaniana ora, Jesús tbojanuá: –Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuambnayá, y entsanga chë nyetsca tescama yomna tšabe vida chamotsebomnana endamá. Nye átšbeyeca endopodena ndayëjana jama, y atšbe Taitá Bëngbe Bëtsábioca jashjanguama.

⁷ Tšëngaftanga atše šmojtsábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonýa ca –tbojaniana.

⁸ Pero Felipe tbojaniana: –Atšbe Utabná, nye chë Taitá šmanýanýe, ndayama más ca.

⁹ Chora Jesús tbojaniana: –Chëfta te tšëngaftangaftaca sëntsemna, y ¿cabá ndoñe atše šcontsábuatma, Felipe? Nda atše sojinýe, chë Taitá Bëngbe Bëtsábiodynaca jinýana. As, ¿ntšamo atše scojtsatsá, chë Taitá šmanýanýe ca?

¹⁰ ¿Ndoñe condošbuaché, atšbe Taitá átšbeñe y átšnaca chábeñe nye canýacá ftsmënana? Chë cbontsëtsëtná soyënga, ndoñe nye atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo tsamná.

¹¹ Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo nye canýacá sëndmëna. Chama ndoñe šmontsošbuachese, as nye chë tijama soyëngámna átšbeñe šmochtsošbuáchiye.

¹² Ndegombre šcuayana, nda átšbeñe tojtssošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama.

¹³ Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínýanýiye chë Taitá corente bëtsá y obená yomnana.

¹⁴ Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca –Jesús tojánayana.

Jesús tojanašebuachená chë Uámana Espíritu jíchmuama

¹⁵ Mëntsánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama.

¹⁶ Chca chašmojamëse, atšbe Taitá Bëngbe Bëtsá tšëngaftangbiama chan-jaimpáda, tšëngaftanga jabújabuachama y jabáñemuayama inýa cha chabuich-moma, chë Uajabuachaná nyetsca tescama tšëngaftangaftaca chauétsemnana.

¹⁷ Cha, chë Uámana Espíritu endmëna chë nyetsca soyënguñe ntšamo ndegombre yomncá oyebuambnayá. Chë nye quem luarama enójuabnaye entsanga, chë átšbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana.

Pero tsëngaftanga aíñe cha šmontsábuatma. Cha tsëngaftangaftaca entsemna, y tsëngaftangbe ainaniñe sempre echanjéftsiyena.

18 “Atše ndoñe quechocháisabashejuana, mo uajchonga cuenta chašmotsemnama. Tsëngaftangbioye chanjésabo.

19 Muentšana baseftaytese, chë nye quem luarama enójuabnaye entsanga ndoñe más quešmochátonyaye; pero tsëngaftangna aíñe, atše cachiñe šmochántinñe. Atše ainá chántsemna, chíyeca tsëngaftanga átseftaca tsabe vida šmochántseboamna.

20 Chë Uámana Espíritu tsëngaftangbe ainaniñe chašmojóyëngacñe ora, tsëngaftanga šmochántsetatšëmbo, atše atšbe Taitábeñe nye canýacá tsmënama; cachcá, tsëngaftanga šmochántsetatšëmbo, tsëngaftanga átseftaca cachcá nye canýacá šmomnama y átšnaca tsëngaftangaftaca.

21 Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinñinñiye ca” —Jesús tojánayana.

22 Chora, inñe Judas, ndoñe Judas chë Iscariote, Jesúsbioye tbojaniana: —Bëngbe Utabná, žntšamo chca yojtsemna, nye bënga šcochjínñinñiye ntšamo cach aca comnama, y nyetsca quem luarentšëngbioye ndoñe ca?

23 Chora Jesús tbojanuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantseboamna.

24 Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe juábnaca quenátsmëna, sinó chë Taitá, chë šonjichmó chabe juábnaca.

25 “Atše cabá tsëngaftangaftaca sëntsemnëntscuana, lempe quem soyëngama sëntsoyebuambná.

26 Chë Uajabuachaná, chë Uámana Espíritu, atšbe impadanánaca atšbe Taitá bochanjíchmua. Cha lempe cmochántsabuatambaye, y echanjama nyetsca chë tcbonjáuyana soyëngama chašmuatenójuaboma.

27 “Chë atšbe ainaniñe puerte tsabe ebionana tsëngaftangbiana šcuétsëboshjona, cbetsatšatá. Chë nye quem luarama enójuabnaye entsanga cmondbëtsatšatnaye soyëngcá ndoñe quenátsmëna, chë atše cbontsatšatná ainaniñe puerte tsabe ebionana. Ainana tsetšanënga ndoñe matsmënana, ni matauatjëngana.

28 Ya šmonjouena ntšamo tcbonjauyancá: ‘chanjá y tsëngaftangbioye chanjésabo’. Tsëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiana más bëtsá endmëna.

29 Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

30 “Chë quem luarentša bacna soyënga mandayá endabó; chíyeca atše ya ndoñe bëtscá tsëngaftangaftaca quichaisóyebuambaye. Pero cha tondaye quenátobena atše jabórlana.

31 Masque cha chca endmëna, chca entsemna, atše chë Taitábioye tsbobonshánama quem luarentša entsanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

15

Jesús yomna mo chë tšabe uvas betiyá

1 Měntšánaca Jesús tojánayana: “Atše sěndměna mo chë tšabe uvas betiyá, y atše Taitá Běngbe Bětsá chë tšabe uvas betiye inyěnacá.

2 Chë inyěná, chë uvas betiyentša buacuafjěnga nděshajuaněfjěnga jtse-buácuētětsetšana; pero chë uvas betiyentša buacuafjěnga shajuaněfjěnga jt-sobolímpiana, bětscá chaotseshájuanama. Nda ndoñe tontsama ntšamo Běngbe Bětsá tojtsebošcá, jtsemnana mo chë nděshajuana buacuafjěngcá; y chë causa, chë Taitá chábioye corente bochantsecastíga.

3 Tšěngaftanga šmonjouena ntšamo tijayancá; bětscá chca šmontsama. Chiyeca mora tšěngaftanga šmontsemna mo chë limpiana y shajuana buacuafjěngcá.

4 Atšeftaca cányiñe mo canyáca šmochtsemna y atše tšěngaftangaftácnaca. Chë buacuafja uvas betiyentšana juanáněfja ndoñe ntsobenana nye cachabe ponto jashájonana. Cachcá, tšěngaftanga átšeftaca ndoñe cányiñe mo canyáca šmontsemnėse, ndoñe šmattsobena Běngbe Bětsabiana bětscá soyěnga jamama.

5 “Atše chë tšabe uvas betiyá sěndměna y tšěngaftanga chë buacuafjěngcá. Nda átšeftaca cányiñe mo canyáca tojtsemna y atše cháftacnaca, cha Běngbe Bětsabiana bětscá soyěnga echanjama, mo canye buacuafja becá tojtšeshajuancá. Er, tšěngaftanga atšbe uajabuáchenana ndoñe šmontsebošnėse, átšeftaca cányiñe mo canyáca ndoñe šmontsemna causa, tondaye šmattsobena jamama.

6 Canya átšeftaca cányiñe mo canyáca ndoñe tontsemnėse, cha jtsemnana mo canye buacuētětšena buacuafja, utšeněfja y buasháněfjá. Chca buacuafjěnga, entšanga jtsatbanana, íñeshoye jtsětšenana y chentše jtse-juinỹiyana. Cachcá, nda ndoñe átšeftaca cányiñe mo canyáca tontsemna, ndoservená jtsemnana y luaroca cha mochantsesegóra.

7 “Tšěngaftanga átšeftaca cányiñe mo canyáca šmojtsemna y ntšamo atše tijayancá šmojtsamėse, lempe ntšamo šmojtsebošcá šmochjotjañe, y lempe šmochanjóyěngacñe.

8 Chë shajuana buacuafjěngcá tšěngaftanga chašmojtsemna ora, šmochanjínỹanỹiye atšbe Taitá corente bětscá y obená yomnama. Y chca, tšěngaftanga atšbe ndegombre uatsjěndayěnga šmochántsemna.

9 Ntšamo chë Taitá šondbobonshancá, átšnaca cachcá tšěngaftanga chondábabuanỹeshana. Chiyeca, šmochtsiyena atšbe bonshánama jtsejuabnayěse.

10 Atše sěndama ntšamo atšbe Taitá šonděmandacá. Chiyeca atše sěndoyena chabe bonshánama jtsejuabnayěse. Cachcá tšěngaftángnaca, ntšamo atše cbontsaměndacá šmojtsamėse, atšbe bonshánama jtsejuabnayěse šmochantsiyena.

11 “Atše chca cbontsětsětná, chë atše sěntsebojna oyejuayana tšěngaftángnaca chašmotsebojnana, y tšěngaftanga puerte chašmotsóyejuama.

12 Měntšá cbetsaměndá: Ntšamo atše chondababuanỹeshancá, cachcá šmochtsenbobonshana.

13 Chë chabe amiguěngbiana tojóbanabiana, ndocna quenátobena chabiana más bonshánana jtsebojnana.

14 Ntšamo atše tijamandacá tšëngaftanga šmojtsamëse, atšbe amiguënga šmochántsemna.

15 Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservénënga ca ndoñe quecbatëtsëtsná. Morscana mëntsá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinýcá, tšëngaftanga tcbonjinýanyé.

16 Tšëngaftanga ndoñe atše chešmatábuayana, pero atše aíñe tšëngaftanga tcbonjabacá y tcbonjubuáyana, Bëngbe Bëtsabe trabajo jamama; y chca, mo canye betiye sempre tojtseshajuana y chë shajuana ndocna te tontsopochocacá, tšëngaftanga chašmotsemnama. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuchéyeca, cha lempe cmochanjátšataye.

17 Mëntsá atše cbetsamëndá: Smochtsenbobonshana ca” —Jesús tojanëyana.

Jesús y chabe entšanga, chë nye quem luarama enójuabnyëngbiana uaboyëñjanënga

18 Mëntsánaca Jesús tojánayana: “Pero chë nye quem luarama enójuabnaye entšanga tcmojtsëbuayëñjese, šmochjenójuaboye, natsana chënga atše šmonjanáboyëñjama.

19 Tšëngaftanga, chë nye quem luarama enójuabnaye entšanguentšana šmojtsemnëse, chënga cmattsababuánýeshana cachëngbengbioycá. Pero tšëngaftanga ndoñe chë nye quem luarama enójuabnaye entšanguentšana quešmátmëna, y atšna, chë quem luare oyenënguentšana tšëngaftanga tcbonjabacá. Chíyeca chë nye quem luarama enójuabnaye entšanga tšëngaftanga cmontsëbuayëñja.

20 Smochjenójuaboye ntšamo tcbonjáuyanama: ‘Chë oservená chabe nduiñbiana ndoñe más uamaná quenátmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentšana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentšana.

21 Chë chacmojtsëbuayëñjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

22 “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘¡Chca fsëñjama ntsetatšëmbcá ca!’

23 Nda atše šojtsáboyëñja, atšbe Taitábioynaca jtsáboyëñjana.

24 Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinýëse, chënga atše šmontsáboyëñja y atšbe Taitábioynaca.

25 Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntsá endayana: ‘Nye tondayama chënga šmonjanáboyëñja ca.’

26 “Atše, atšbe Taitábentšana chë Uajabuachaná y añemuayá tšëngaftangbioye chanjichmua. Cha chë Uámana Espiritu endmëna, chë nyetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tšabe soyënga cmochantsëtsëtsnaye.

²⁷ Chorscana, tsëngaftángnaca atšbiana entšanga smochantsëtsësnaye, er tsëngaftanga átšeftaca šmondëtsemna, entšanga jábuayenama atše sënjanbojatsé orscana ca” —Jesús tojánayana.

16

¹ Mëntšánaca Jesús tojánayana: “Atše quem soyënga cbontsëtsëtsná, tsëngaftanga átšbeñe ošbuáchiyana ndoñe chašmondájbanama, atšbe causa chašmojtšesufrina ora.

² Chëngna, chë judiëngbe enefjuana yebnënguentšana cmochantëbuacana. Chca tempo chaojobuache ora, chë tsëngaftanga chacmojtšëbáyënga mëntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtšëbošcá, cachcá bënga tmonjama ca.’

³ Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye.

⁴ Atše chca tsëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

Ndayá chë Uámana Espíritu inétsama

Mëntšánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbëñjatanëtsëtsná, er atše tsëngaftangaftaca sënjëtsemna.

⁵ Pero morna, chë šojichmó cha yomnoye chantá; y tsëngaftanguentšá ndocná šochanjatjaye, ‘¿ndëmoye cojtsá ca?’

⁶ Mora, tsëngaftangbe ainana ngmënaca entsemna, atše chca tcbonjáuyana causa.

⁷ Pero ndegombre šcuayana: Atše chanjá y chca tsëngaftangbe tšabiana echántsemna. Atše ndoñe quetsjase, chë Uajabuachaná y añemuayá ndoñe tsëngaftangbioye queochátabo. Pero aïne chanjá, y chora cha tsëngaftangbioye chanjíchmua.

⁸ Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominyiñe tšabia jtsemnana, y ndayá yomna chë Bëngbe Bëtsá entšangbiana jayanana tšabá o ndoñe tšabá tmonjamama.

⁹ Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana.

¹⁰ Chë Taitábioye chanjá y atše ndoñe más quešmochátinýe. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominyiñe tšabia jtsemnana.

¹¹ Quem luarentša bacna soyënga mándayabiama Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiana jayanana tšabá o ndoñe tšabá tmonjamama.

¹² “Atše cabá ba soyënga sëntsebomna tsëngaftanga jáuyanama. Masque chcasna, mora tsëngaftanga ndoñe quešmatóbena chë soyëngama josértana.

¹³ Pero chë Uámana Espíritu, chë nyetsca soyënguiñe ntšamo ndegombre yomncá oyebuambnayá, chaojášhango ora, lempe ntšamo ndegombre yomncá cmochanjabuatambá. Cha ndoñe nyë cachabe juábna

queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama.

14 Atšbe soyënguentshana cha echanjójyëngacñe, y cach soyëngama cmochanjabuatambá. Chcase cha cmochanjínñanñiye atšbe bëtšá y obená bëtsemnana.

15 Lempe ntšamo chë Taitá endbomncá, atšbe soyëgnaca endmëna. Chiyeca atšbe tcbonjáuyana, chë Uámana Espiritu atšbe soyënguentshana yochjójyëngacñe y cach soyëngama cmochjabuatambá ca.”

16 “Baseftayté y atšbe ndoñe más quešmochátinñe. Inñe baseftayté y cachiñe šmochantëtinñe ca” —Jesús tojanëyana.

“Tšëngaftangbe ngmënana, oyejuayana echanjóbema”

17 Chora Jesusbe básefta uatsjëndayënga imojtsentjanaye: —¿Ntšamo yojtsentšáyana, chë “baseftayté y atšbe ndoñe más quešmochátinñe, y inñe baseftayté y cachiñe atšbe šmochantëtinñe, er atšbe chë Taitábioye chanjá ca”?

18 ¿Ntšamo yojtsentšáyana, chë “baseftayté ca”? Ndoñe quemuatstatšëmbo ntšamo yojtsentšáyanama ca —chënga imojtsichamo.

19 Jesús yojtsatšëmbo chënga chca jatjayama imojtsebošama, y tojanëyana: —Atšbe tcbonjáuyana: “Baseftayté y atšbe ya ndoñe más quešmochátinñe, y inñe baseftayté y cachiñe atšbe šmochantëtinñe ca.” ¿Chë soyëngama šmojtsentjaná ntšamo stsentšáyanama?

20 Ndegombre šcuayana: Tšëngaftanga šmochanjenóbošachna y puerte ngmëñënga šmochántsemna, pero chë nñe quem luarama enójuabnaye entšanga corente oyejuayënga mochántsemna. Masque tša ngmëñënga šmochántsemna, chentšana tšëngaftangbe ngmënana, oyejuayana echanjóbema.

21 Canñe shembása tbojontšabuache šešona jónñyana ora, tša ngmënaca cha jésemnana, puerte tbojtsentsetse causa. Chë šešona ya tojonñná ora, cha ndoñe ntsenójuabnayana chë tša ibuántsetšama. Canñe šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana.

22 Ndegombre, tšëngaftángnaca cachcá, chora tša ngmënaca šmochántsemna. Pero atšbe tšëngaftangbioye chajésabo ora, atšbe šmochantëtinñe y corente oyejuayënga šmochántatsmëna. Y ndocná queochatobenaye chë oyejuayana jabaujuánana.

23 “Chë te chaojóshjango ora, tšëngaftanga ndocá atšbe quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atšbe jótšëmbonëse, átšbeñe šmošbuachéyeca, cha lempe cmochanjátšataye.

24 Mëntscoñama, atšbe Taitá tondaye chešmatotjañe atšbe jótšëmbonëse. Cha motjañënga y šmochanjójyëngacñe, y chca, bëtšcá oyejuayana šmochántsebmna ca” —Jesús tojanëyana.

Jesucristo, quem luarentše mandayábioye yëñjanayá

25 Mëntsánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atšbe ya ndoñe más cuentëngaca quebochátëtsëtsnaye; chë cuentna, puerte botamana lempe atšbe Taitabiana chochanjáuyana.

26 Chë tena, atšbe jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atšbe cbëyana; chca, chë te ndoñe quešochatájaboto tšëngaftangbiama atšbe Taitá jatsimpadánana.

²⁷ Atše ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobonshánama, y Bëngbe Bëtsábiocana atše tijabama šmojtsošbuáchema, chë Taitá cmondábabuanÿeshana.

²⁸ Atše chë Taitábiocana sënjábcna y quem luaroye sënjabo. Pero mora quem luare chanjëftsebhoshjona atšbe Taitábioye jtama ca” —Jesús tojánayana.

²⁹ Chora chabe uatsjëndayënga tmojaniana: —Mora ya ndoñe cuentëngaca quecatoyebuambná, chíyeca lempe paselo josértama bëngbiama entsemna.

³⁰ Mora fsëntsetatšëmbo aca nÿetsca soyëngama cotatšëmbuama, y ndoñe quenátsiya ndocná aca chacmátstjanama, er aca chëngbe juabnënga jtsabuatumana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábiocana tcojabama ca —chënga tmojaniana.

³¹ As Jesús tojanëyana: —¿Mora chiñe šmojtsošbuaché ca?

³² Ya tempo tocjobuache y cam ora entsemna, tšëngaftanga nÿetsquénache šmochanjuáshana y atše nÿe canÿa šmochanjésebhoshjona. Pero atše ndoñe nÿe canÿa quichátsmëna, chë Taitá átšeftaca entsëmnayeca.

³³ Atše lempe quem soyënga chontsëtsëtsná, tšëngaftangbe ainaniñe tšabe ebionana chašmotsebmnama, átšeftaca cánÿiñe mo canÿacá jtsemnëse. Quem luarentše šmochanjasufrina; pero añemo šmochtsebmna, atše ya chë quem luarentša mandayá sënjayëñaná ca —Jesús tojánayana.

17

Jesús chabe uatsjëndayëngbiama Bëngbe Bëtsábioye tbojanimpadá

¹ Jesús chë soyënga tojánayanentsána, celoye tojanontješé y Bëngbe Bëtsábioye tbojaniana: “Taita, atšbe te ya tocjobuache. Minÿanÿé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainÿanÿema.

² Mora aca nÿets obenana sconjatšetá nÿetsca entsángbeñe, nÿetscanga chë atšbiana tcojábacacanga chë nÿetsca tescama yomna tšabe vida chamotsebmnama atše chaimama.

³ Chë nÿetsca tescama yomna tšabe vida jtsebmnnana endmëna aca, chë nÿe canÿe y ndegombre Bëngbe Bëtsá jtsabuatumana, y atše Jesucristo, acbe ichmoná.

⁴ “Lempe ntšamo sconjamandacá atše sënjapochocá, y chca quem luariñe sënjama aca corente bëtsá y obená comnama jinÿanÿiyama.

⁵ Taita, quem luare cabá ndoñe quenjatsmëna ora, aca tconjaninÿanÿé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

⁶ “Aca quem luarentša entsanguentsána quem boyabásenga tconjabacacá y atšbiana sconjinÿinÿé. Atše chënga sënjanÿanÿé ntšamo ndegombre aca comnama. Chënga acbe entsanga mondmëna; y acna, chë atšbiana chënga sconjinÿinÿiyá. Chënga acbe palabra tmonjouena y tšabá tconjoyeuná.

⁷ Chíyeca chënga mondëtatšëmbo, lempe ntšamo atše tsbmncá ácbentšana tijóyëngacñama.

⁸ Atše chënga sënjáuyana ntšamo aca scojauyancá, y chënga montsošbuaché chë atše sënjayaniñe. Chíyeca, chënga ndegombre mondëtatšëmbo atše acbiocana tijabama, y montsošbuaché aca chë atše scojichmó cha comnama.

9 “Atše chëngbiamā cbontseimpadana. Chë nÿe quem luarama enójuabnaye entsangbiamā ndoñe quecbátsimpadana, pero aíñe chë atšbiamā šcojinÿinÿiyëngbiamā, er chënga acbe entsanga mondmëna.

10 Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojñanÿé atše corente bëtsá y obená bëtsemnama.

11 “Atše ndoñe quem luarentše quešocháisetotona, pero chënga aíñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiamā šconjinÿinÿiyënga acbe obenánaca cochtsanÿena. Chca ntšamo bëndata mo canÿacá bondmëna, chëngnaca cachcá chamotsemnama.

12 Atše chëngaftaca sëntsemnëntscuana, chënga sëntsanÿena, aca šconjatšetá obenánaca. Atše chënga sëndánÿena, y ni canÿa queochátsmëna infernoa pochocaná, nÿe chë infernoa pochocaná jtemnama ibomná chana aíñe, ntšamo acbe uabemana palabrénguiñe endayancá, cachcá chaotsemnama.

13 “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsétsétsná, chca, chë atše sëntsebmna puerte bëtscá oyejuayana chëngnaca chamotsebmnama.

14 Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nÿe quem luarama enójuabnaye entsanguentsá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entsanga chënga montsëbuayënja.

15 Atše ndoñe quecbátsimpadana, chënga quem luarentšana chacúbuanama; pero aíñe, nÿetsca bacna soyënguentšana chacuatsebacama.

16 Ntšamo atše ndoñe quetsátsmëna chë nÿe quem luarama enójuabnaye entsanguentsá, cachcá, chënga cach ndoñe quemátsmëna.

17 Cochjama chënga acbe entsanga chamuétsemnama, y chca, nÿe acbiamā vida chamotsebmna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna.

18 Ntšamo aca quem luaroye šconjanichmocá, cachcá átsnaca chënga sëntsachamná, quem luare entsanga jábuayenama.

19 Chëngbiamā atše cachiñe mëntšá chëyana: Atše nÿe acbiamā sëndmëna. Y chca, chëngnaca, ntšamo acbiamā ndegombre yomncá jtsóyebuambnaye acbe entsanga chamotsemna, y chca, nÿe acbiamā vida chamuétsebmna, ntšamo ndegombre yomncá chënga imoyenama.

20 “Pero nÿe chëngbiamā ndoñe quecbátsimpadana, sinó chë átsbeñe mochtsošbuáchiyëngbiannaca, chë atšbiamā šconjinÿinÿiyënga, chëngbioye atšbiamā ínÿenga chamojtsabuayiyiná ora;

21 as chënga nÿetscanga cánÿiñe mo canÿacá chamotsemnama. Ntšamo aca, Taita, átsëftaca cánÿiñe mo canÿacá bondmëna y átsnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entsanga, atše šcojichmoma chamotsošbuáchemā.

22 Ntšamo chë obenana y uámanana šconjatšetacá, cachcá átsnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama.

23 Atše chëngbe ainaniñe sëntsemna, y aca átsëftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnama. Y chca, quem luarentša entsanga chamotsetátsëmbo

aca šcojichmoma, y chamotsetátšëmbo ntšamo atše šcondbobonshancá, chěngnaca cachcá condábabuanýeshanama.

²⁴ “Taita, atšbiama chěnga šconjínýinýiye. Atše mēntšá sěntseboše: chě atše chántsemnoca, chěngnaca chamotsemna, y chentše, chě šconjatsetá obenana y uámanana chěnga chámuinýe. Quem luare cabá ndoñe quenjatsmēna orscana, šconjánbobonshana; chíyeca, cachora tconjaninýanýé atše corente bētsá y obená bětsemnana.

²⁵ Taita, nýetsca soyēnguiñe tšabá amá, masque chě nýe quem luarama enójuabnaye entšanga ndoñe quecmatábuatma, atše aíñe cbonduábuatma, y quem boyabásenga montsetátšëmbo, aca comna chě šcojichmó cha.

²⁶ Atše chěnga sēnjínýanýé ntšamo ndegombre aca comnama, y más chanjínýanýiye; chca, ntšamo šcondbobonshancá, chěngnaca cachcá chamotsenbobonshánama y atše chěngbe ainaniñe chaitsemnana ca” — Jesús tojánayana.

18

Uayayēnga Jesús tmojánishache

(Mt 26.47-56; Mc 14.43-50; Lc 22.47-53)

¹ Chě soyēnga Jesús tojěftsanayanentšana, chabe uatsjéndayēngaftaca tojěftsanbocna, chě binche bėjaye Cedrón ca uabáiniye chenguana jama. Chentše inamna canýe tjashetema; y Jesús chabe uatsjéndayēngaftaca choye tojánamengo.

² Y Judas, chě Jesús uayayēngbe cucuatšíñe boshjuaná, tšabá chě luare yojánabuatma, er Jesús y chabe uatsjéndayēnga ba soye chentše imojánenefjuana.

³ Chora Judas tojánashjango, y cháftaca ba soldadēnga y básefta Bēngbe Bētsabe bēts yebnoca josticiēnga; chěnga imojamna chě bachnangbe amēndayēnga y fariseungbe ichmónēnga; nýetscanga uajuinýanēshangaca, lamparēshangaca y espadējangaca uajátēnga.

⁴ Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chě entšanga tojanéyana: —¿Nda šmojtsenguá ca?

⁵ Y chěnga tmojanjuá: —Jesús, chě Nazaretocá fsěntsenguá ca.

As Jesús tojanéjua: —Atše cha sēndmēna ca.

Y Judas, chě boshjuaná, chánaca chě entšángaftaca yojtsemna.

⁶ Jesús tojanéyana: “Atše cha sēndmēna ca”, y cachora chě entšanga tmojtanostētšánanga y fshantsoye tmojánshajaye.

⁷ Chora Jesús cachiñe tojanatjá: —¿Nda šmojtsenguá ca?

Y chěnga tmojanjuá: —Jesús, chě Nazaretocá ca.

⁸ As Jesús tojanéyana: —Ya tconjáuýana: “Atše cha sēndmēna ca.” Atše šmojtsenguasna, mēnga cachcá šmochjónýaye chamotsóñengama ca.

⁹ Chca tojanopasá, ana ntšamo Jesús tojanayancá cachcá chaotsemnana, chě “Atšbe Taitá Bēngbe Bētsá, chě šconjínýinýiye entšanguentšana ni canýa pochocaná queochátsmēna ca”.

¹⁰ Simón Pedro canýe espadēja inasēngbuájónýana; asna, tojanenosēngbotěntšēna y chě bachnangbe más uámana amēndayabe canýe oservenábioye catšbioica matscuaše tbojtsanēštjango. Chě oservená Malco ca inauabaina.

¹¹ As Jesús, Pédrēbioye tbojanayana: “Acbe espadēja matosēngbuajónýá. Ntšamo atšbe Taitá Bēngbe Bētsá tojanmandacá, chě atše puerte ngménana jtsebomnana, ¿ndoñe chca chaondětsemna ca?”

*Jesús, Anasbe yebnoca**(Mt 26.57-58; Mc 14.53-54; Lc 22.54)*

¹² Chentsana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuëbatsëca.

¹³ Natsanëna, Anás, Caifasbe uambën taitábioye Jesús tmojanánatse. Caifás chë uata inamna chë bachnangbe más uámana amëndayá.

¹⁴ Caifás yojamna nda judiënga tojanëyana: “Tšëngaftangbiama más tšabá entsemna canÿe boyabása Israeloca entsangbiama chaóvana ca.”

*Pedro tojánayana Jesúsbiöye ndoñe bonjanabuátma ca**(Mt 26.69-70; Mc 14.66-68; Lc 22.55-57)*

¹⁵ Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauabuátma; chíyeca, cha tojanobená Jesúseftaca chabe chashjónscoñe jash-janguana.

¹⁶ Pero Pédrëna nÿe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bëšáša ebtafjuana shembásaftaca tojanoyebuambá. Chora Pedro tbojanëmashëngo.

¹⁷ As chë shembása Pédrëbioye tbojaniyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

¹⁸ Tša yojtsesëсна causna, chë oservënënga y chë josticiënga shjoca tmojaninië y chentše imojtšoboniye. Y Pédrënacá chëngaftaca yojtsešbonena.

*Ntšamo chë bachnangbe más uámana pasado amëndayá, Jesúsbiöye tbojantjá**(Mt 26.59-66; Mc 14.55-64; Lc 22.66-71)*

¹⁹ Chora, chë bachnangbe más uámana pasado amëndayá tojanontsé Jesús jatjayama chabe uatsjëndayëngbiama y ndayá cha entsanga yojánabuatambamnaca.

²⁰ Y Jesús tbojanjuá: —Atše nÿetsca entsangbe delante sënjoyebuambá. Sempre chë entsangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nÿetsca judiënga mondëtsenefjuantse; y chca, iytëmencá tondaye chiyatoyebuambá.

²¹ ¿Ndáyeca chca šcojtsetjaná? Atšbe palabra tmojouenënga májtaye, as chënga chacmëyana ntšamo atše tijáuyanama. Chënga mondëtatšëmbo ntšamo atše tijayanácá ca —Jesús tbojanjuá.

²² Jesús chë soyënga tojánayana ora, canÿe josticio chentše yojtsemná, Jesúsbiöye tbojanjuebantšetá y tbojaniyana: —¿Chca chë bachnangbe más uámana amëndayá cuanjojuá ca?

²³ Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebantšetá ca?

²⁴ Chentsana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

*Pedro cachiñe tojánayana Jesúsbiöye ndoñe bonjanabuátma ca**(Mt 26.71-75; Mc 14.69-72; Lc 22.58-62)*

²⁵ Chëntscuana, Pedro yojtsešbonena, tsanana chë inë juachaca. Chora chë entsanga tmojantjá: —¿Aca ndoñe chabe uatsjendayënguentšá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

26 Chora, chë bachnangbe más uámana amëndayabe canÿe oservená Pédrëbioye tbojanianyana: —¿Atše ndoñe cháftaca chë tjashetémoça tcbonjinÿe ca?

Chë oservená inamna chë Pedro tbojtsanmatstëtšabe pamillo.

27 Y Pédrëna cachiñe ndoñe ca tojánayana, y cachora canÿe ngallo yojacánta.

Jesús Pilatbe delante

(Mt 27.1-2, 11-14; Mc 15.1-5; Lc 23.1-5)

28 Chentšana, Caifasbe yebnentsana Jesús tmojanánatse chë romano mandadbe yebnoye. Ya yojtsebínÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canÿe ndoñe judiëbe yebnoye nda tojámashënguse.

29 Chíyeca Pilato tojánbocna y chënga tojanëyana: —¿Ndayá quem boyabásabe contra šmochjayana ca?

30 Chora chë entšanga tmojanjuá: —Bacá uamaná ndoñe tontsemnëse, ndoñe matifjuánatse ca.

31 As Pilato tojanëyana: —Tšëngaftanga matánatse, y ntšamo cach tšëngaftangbe leyíñe iuayancá muabiamá šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

32 Chca tojanopasá, ana ntšamo Jesús cachá jóbánama tojanayancá cachcá chaotsemnama.

33 As Pilato cach yebnoye tojtanamáshëngo, Jesús tbojanchembo y tbojan-tjá: —¿Aca chë judiëngbe Rey cojtsemna ca?

34 Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiamá tcmojacuentáyeca ca?

35 Chora Pilato tbojanianyana: —¿Mo atše judío quetsmëna? Cach ábiocá entšanga y chë bachnangbe amëndayënga muentše tcmónjúshjango. ¿Ndayá tcojama ca?

36 Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšíñe ndoñe chašmondboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

37 As Pilato tbojanianyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

38 Chora Pilato tbojanianyana: —¿Y ndayase chë ndegombre soye yomna ca?

Jesusbiamá tmojánayana chaóbana ca

(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanëyana: —Atše ni mo canÿe soye chiyátinÿena, quem boyabása castiganá chaotsemna ca jayanama.

39 Pero tšëngaftanga šmondétatšëmbo, Bashco fiestama atše canÿe utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

40 Chorna nÿetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canÿe bacá uamana entśá inamna.

19

¹ Chora Pilato, Jesús tbojanánatse y tojanmandá chamotsetjanjama.

² Y canÿe coroněsha uchmašěfjangaca chě soldaděnga tmojanapormá y Jesús tmojanabestśajó; y canÿe shbuenda uafjatsenga entśayá mo reycá tmojanichětjo.

³ Chorna chěnga imojtsóbobecocnaye y jtsafchayama imojtsatsěsnaye: “¡Bayté judiěngbe Rey cochtsemna ca!” Y imojtsejuebantśetaye.

⁴ Pilato cachiñe tojánbocna y entśanga tojaněyana: —Smochjouena; cha chanjuábocna, chě boyabása castiganá chaotsemna ca jayanama atše ni mo canÿe soye ndoñe sěnjínÿenama chašmotsetatśěmbuama ca.

⁵ As Jesús tojánbocna chě uchmašěfjangaca coroněsha uabestśajoná y chě shbuenda uafjatsenga entśayá mo reycá uichětjoná. Y Pilato tojaněyana: — ¡Muentše chě boyabása entsemna ca!

⁶ Chě bachnangbe aměndayěnga y chěngbe josticiěnga cha tmojáninÿe ora, tmojanontśě uayebuáchana: —¡Motsecrucificá! ¡Motsecrucificá ca!

Chora Pilato tojaněyana: —Cach tśěngaftanga mánatse y śmochjacrucifica; atše ni mo canÿe soye chiyátinÿena quem boyabása castiganá chaotsemna ca jayanama ca.

⁷ Chora chě judiěnga tmojanjuá: —Běngna canÿe ley fsěndbomna, ntśamo chiñe endayancana, quem boyabása jóbanama bontsemna, Běngbe Bětsabe Uaquiñá entsenobiamná causa ca.

⁸ Pilato chca tojanuena ora, más yojtsauatja.

⁹ Cachiñe chabe yebnoye tojtanamáshěngo y Jesús tbojantjá: —¿Nděmocá aca cměna ca?

Pero Jesús ndocá tbojanjuá.

¹⁰ Chora Pilato tbojaninyana: —¿Ndoñe ścochanjojuá ca? ¿Ndoñe condětatśěmbo, aca jacrucificama o jětsboshjonama atše tsobenama ca?

¹¹ As Jesús tbojanjuá: —Acbe obenana Běngbe Bětsá ndoñe macměnjánatśetase, tondaye cattsobena átseftaca jamama; chiyeca, acbe cucuatśiñe šonjaboshjoná, acbiama más běts bacna soye tonjama ca.

¹² Cach orscana Pilato yojtsenguaye ntśamo jamana, jobenayama Jesús jětsboshjonama; pero chě judiěnga imotsáyebuache: —¡Chacojětsboshjoněsna, Césarbe amigo ndoñe condměna! ¡Nda rey tojtsenobiamná chana, Césarbe uayayá jtsemnana ca!

¹³ Pilato chě soyěnga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chě tribunaloca chashjañna hebreo biyañe Gabata ca inauabaina, y endayana “ndětsběngaca pormániñe ca”.

¹⁴ Bashco fiestama canÿe te yojtsájamna, y mo nÿetsto ora yojtsemna. Chora Pilato chě judiěnga tojaněyana: —¡Muentše tśěngaftangbe rey entsemna ca!

¹⁵ Pero chěnga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tśěngaftangbe rey atše chjacrucifica ca?

Y chě bachnangbe aměndayěnga tmojanjuá: —Běngbe rey nÿe César endměna, ndocná más ca.

¹⁶ Chentśana Pilato, chěngbe cucuatśiñe Jesús tbojánboshjona chamocrucificama y chě judiěnga cha tmojanánatse.

*Jesús tmojanrucificá**(Mt 27.32-44; Mc 15.21-32; Lc 23.26-43)*

¹⁷ Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoe (hebreo biyañe Gólgota ca inauabaina).

¹⁸ Chentše cha tmojanrucificá y inye útatnaca cátaoica tmojanrucificá; Jesusna tséntsaca.

¹⁹ Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca.

²⁰ Y ba judiënga chë uabemana soye tmojanalía, er chë Jesús tmojanrucificá luare Jerusalemó béconana inamna, hebreo, latín y griego biyañe yojetsábemana.

²¹ Chca juabemama tojanmandáyeca, chë bachnangbe amëndayënga Pilato tmojaniana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

²² Pero Pilato tojanëjua: —Ntšamo tijuábema cachcá chaotsábemana ca.

²³ Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, nyetsca canta soldadëngbiama. Chabe cmešëjua tmojanaca; chëjuana yojanamna nduajonanëjua, nyetsëjua uabi-anánëjua.

²⁴ As chë soldadënga tmojáneniyana: “Ndoñe matjuátanëca; más tšabana tsbanánoe mochjútšena, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrënguiñe endayancá cachcá chaotsemnama, chë “Atšbe entšayangá tmojatenájataye; atšbe cmešëjuamna tsbanánoe tmonjanëtšena, ndabiama juaquédama jtso-tatšëmbuama ca.” Y lempe chca chë soldadënga tmojanma.

²⁵ Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena.

²⁶ Jesús chabe mamábioye tbojáninye, y chabe juachacna chë Jesusbe bonshana uatsjendayá yojtsemna. Chora chabe mamá tbojaniana: “Mama, chentše acbe uaquiñá entsemna ca.”

²⁷ Y chë bonshana uatsjendayá tbojaniana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

*Jesús tojanóbana**(Mt 27.45-56; Mc 15.33-41; Lc 23.44-49)*

²⁸ Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrënguiñe endayancá cachcá chaotsemnama, tojánayana: “Sontsajuendá ca.”

²⁹ Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfchecuacuá, canye hisopo niñëfjiñe tmojananguësëtjo y játsbanase, Jesusbe uayásoye tmojanbeconá.

³⁰ Chë untja vínoye Jesús tojanofšé ora, tojánayana: “Ya lempe tocjochnëngo ca.”

Tojanotsejbé y tojanóbana.

Canye soldado chabe lanzšaca costillaca Jesúsbioye tbojanashacua

³¹ Bashco fiestama canye te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnama, chë te puerte

uámana te bétsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama.

³² As chë soldadënga tmojána y shecuatšënga imojsatcacaye, natsana canya y chentšana chë inya, Jesúseftaca yojtsecrucificaná.

³³ Pero Jesúsbioye tmojanobeconá ora, ya obaná tmojáninye; chíyeca chabe shecuatšënga ndoñe tmonjanatcacá.

³⁴ Masque chca, canye soldado Jesúsbioye costillaca canye lanzësaca tbojanashacuá. Y cachora buiñe y búyeshe chentšana tonjanóbocna.

³⁵ Chë mëntšá cuentayá chentše enjamna y tonjáninye, y ndegombre entsichamo; cha endëtatšëmbo ndegombre yojtsichámuama, chca, tšëngaftángnaca chiñe chašmotsošbuáchema.

³⁶ Chë soyënga chca tojanopasá, ntšamo Bëngbe Bëtsabe uabemana palabrenguiñe endayancá cachcá chaotsemnana. Chiñe endayana: “Ni mo canye betaše cha quemochatsëntšátca ca.”

³⁷ Y inyoca, Bëngbe Bëtsabe uabemana palabrenguiñe endayana: “Chë tmojenachentšá bominye mochanjabuájua ca.”

Jesús tmojanatbontsá

(Mt 27.57-61; Mc 15.42-47; Lc 23.50-56)

³⁸ Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustóná, masque nye iytëcana, chë judiëngbiana auatja causa. Pilato aiñe tbojanlesenciá; as José tojána y Jesusbe cuerpo yojtsámabañe.

³⁹ Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana.

⁴⁰ As José y Nicodemo Jesusbe cuerpo tbojanca y tmojanandmaná chë botamana uanguëtše soyëngaca unëtjona entšëjuangaca. Judiënga chca innaumana, obaná juatbontsama ora.

⁴¹ Jesús tmojanrucificá luarentše canye base jajañe inamna, y chiñe canye tsëm cuevëshe, entšangbe pormánëshe, obanëngbiana; chëshiñe cabá ndocna obaná mondëjajo.

⁴² Asna, nye chentše Jesusbe cuerpo tmojansegorá, chë Bashco fiestama canye te yojtsájamna causa, y chë cuevëshe chë bëconana inámnayeca.

20

Jesús tojtanayena

(Mt 28.1-10; Mc 16.1-8; Lc 24.1-12)

¹ Chë inye semana bojatsënté, cabá cachëse, cabá ndëbinyna ora, María Magdalena chë cuevëshoye tojána y tojáninye inyoca yojtsemna chë cuevëshoye amashjuanentša ndëtšbé.

² Asna, tojëftsantójtajo y tojána chë Simón Pedro y chë inye uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshëntšana tmojtsámabañe y ndayentše tmojtëjájoma ndoñe queftsátstatšëmbo ca.”

³ Chora Pedro y chë inye uatsjendayá chentšana tbojëftsanbocna y chë cuevëshoye tbojánata.

⁴ Nyets útata ibojtsëchamana, pero chë inye uatsjendayá Pédrëbiana más betscó tojanótjajo y natsana chë cuevëshoye tojánashjango.

⁵ Tojanotsejbé y chë chentše tmojanacjá entsëjuangá tojáninýe, pero choye ndoñe tonjánamashëngo.

⁶ Chentsana, Simón Pedro chabe ústonoye tojánashjango y chë cuevëshoye tojánamashëngo, y tojáninýe chë chentše tmojanacjá entsëjuangá.

⁷ Y chë Jesús juabestšëntsacjuama tojanaservé entsëjuana ndoñe chë inýájuangaca yontsamna, sinó inýoca botamana uandmanánëjua.

⁸ Chora chë inýe uatsjendayá, chë cuevëshoye natsana tojanashjanguá, choye tojánamashëngo. Tojáninýe y Jesús tojtanayenama yojtsanošbuachë.

⁹ Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrenguiñe endayancá, chë Jesús obanënguentšana jtayenama ibojamnana.

¹⁰ Chentsana chë uatsjendayata chatbe oyenoye tbojtaná.

*Jesús, María Magdalénbioye tbojánebëbocna
(Mc 16.9-11)*

¹¹ Pero María chentše tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama.

¹² Y tojáninýe uta angelotémata uafjantsëjua uichëtjonata, Jesusbe cuerpo yojtsejajónentše ibojtsebemana. Canya tsëntšënëshoica y chë inýana matsëscóica.

¹³ Chora chata tmojanianyana: —Shembása, ¿ndayama cošaché ca?

As cha tojanjuá: —Atšbe Utabná tmojtsámabáne, y ndayentše tmojtsejájoma ndoñe quetsátstatsëmbo ca.

¹⁴ Chca tojánayana ora, tojanostëtsantješé y tojáninýe chentše Jesús yojtsemna, pero María ndoñe yontsetátšëmbo cha Jesús bëtsemnana.

¹⁵ Chora Jesús tbojanianyana: —Shembása ¿ndayama cošaché? ¿Nda congúa ca?

María yojtsejuabnaye chë boyabásana yojtsemna chentša base jajañe uais-hanyá ca; chíyeca tbojantjá: —Bacó, aca tcojuambësna, šmëyana ndayentše cojtsejájó, as atše cha jesocñama ca.

¹⁶ As Jesús tbojanianyana: —¡María ca!

Chora María chábioye tojanontješé y tbojanianyana: —¡Rabuni ca! (hebreo biyañe chca endayana “Buatëmbayá ca”).

¹⁷ Chora Jesús tbojanianyana: —Ndoñe šcatábójajo, er atše cabá ndoñe atšbe Taitábioye quetstëtstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

¹⁸ As María Magdalena tojána y Jesusbe uatsjendayënga tojanëyana cha chë Utabnábioye tbojáninýe ca y cha chë palabrenga tojánayana ca.

*Jesús chabe uatsjendayënga tojánebëbuacna
(Mt 28.16-20; Mc 16.14-18; Lc 24.36-49)*

¹⁹ Tojanibétata ora, cach semana bojatsenté, chë uatsjendayënga tmojánenefna canye luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y mëntsá tojanacheúa: “Chë atšbe ainaniñe tšabe ebionana tšëngaftangftaca chaotsema ca.”

²⁰ Y chca tojanëyana ora, chabe cucuatšënga y costillaca tojaninýanýe. Chora chë uatsjendayënga oyejuayënga imojtsemna, chëngbe Utabná tmojáninýama.

²¹ As Jesús cachiñe tojanëyana: “Chë atšbe ainaniñe tšabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá sojichmocá, átšnaca cachcá tšëngaftanga cbontšachamná ca.”

²² Chca tojánayana ora, chëngbiöye tojangouo y tojanëyana: “Chë Uámana Espiritu šmochjýöngacñe.

²³ Ndëmuanýenga chëngbe bacna soyëngama chašmojáperdonanga, perdonánënga mochántatsmëna; y ndoñe chašmonjáperdonasna, ndëperdonánënga mochántsemna ca.”

Tomás, Bëngbe Utabnábiöye ainá tbojáninýe

²⁴ Pero Tomás, chë Gemelo ca uabobainá, canýa chë bnëtsana uta uatsjendayënguentšá, chë uatsjendayëngaftaca ndoñe yontsemna, Jesús tojánashjango ora.

²⁵ Chíyeca, “bënga chë Utabná fsëjinýe ca”, chë inýe uatsjendayënga tmojaníyana ora, Tomás tojanëjua: “Atšbe chabe cucuatšine chë uajabonjana uinýniñe ndoñe sënjinýe, y chiñe atšbe ntšabuafja ndoñe sënjajué y atšbe cucuatšbe chabe costillaca ndoñe, ndoñe quichátosbuachiye ca.”

²⁶ Canýe semana tojanochnëngo ora, chë uatsjendayënga cachiñe canýe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanëyana: —Atšbe ainaniñe tšabe ebionana tšëngaftangaftaca chaotsemna ca.

²⁷ Chora Tomásbiöye tbojaníyana: —Acbe ntšabuafja muentše mojué y atšbe cucuatše minýe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayenama cochtsošbuachiye ca.

²⁸ As Tomás tbojaníyana: —¡Atšbe Utabná y atšbe Bëtsá ca!

²⁹ Chora Jesús tbojaníyana: —Tomás, nýe šconjñinýeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nýe ntjinýcá tmojošbuachenga ca!

Ndayama quem librëša tmojanábema

³⁰ Jesús, chabe uatsjendayëngbe delante inýe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana.

³¹ Y quem librëšañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chašmotsošbuachese, chábeyeca chë nýetsca tescama yomna tšabe vida chašmotsebonnama.

21

Jesús, canýsëfta chabe uatsjendayënga tojánëbëbuacna

¹ Chca tojanopasá chentšana, Jesús inýe soye chabe uatsjendayënga tojánëbëbuacna, Tiberias mar bëjaye tsachañe. Chora mëntsá tojanopasá:

² Cánýentše imojëtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesube inýe uta uatsjendayata.

³ Simón Pedro chënga tojanëyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canýe barquëshoye tmojánamashjna; pero chë ibeta tondaye tmonjáninýena.

4 Ya yojtsebínŷana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama.

5 Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

6 As Jesús tojanëyana: —Barquësha catšbioica chë atarraiešha mëtšena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nyëtšá beonga tmojánishëche causa.

7 As chë Jesusbë bonshana uatsjendayá, Pédrëbioye tbojanianyana: “¡Bëngbe Utabná entsemna ca!”

Simón Pedro chca soye tojanuena y cachora entšayá tojtaniçhëtjo, er nduichëtjoná yojtsemna, y chë bëjayoye tojanoshbuetše.

8 Chë inŷe uatsjéndayëngna chë barquëshañe tmojána, y chë atarraiešha jútjena beóngaca imojtsásjaye, er chë tsachocama bécoñe imojtsemna, nŷe canŷe patse metroca.

9 Fshantsoye tmojánastjajna ora, chënga tmojáninŷena canŷe chebániñe pormániñe, y chentšna canŷe beona y tandëšnaca yojtsesegorana.

10 Chora Jesús tojanëyana: “Chë šmonjáshebuaye beonguentšana báseftanga miyëbo ca.”

11 Simón Pedro chë barquëshoye tojánamashëngo, y chë atarraiešha jútjena bëts beóngaca, uasjoónana tsachóntscoñe tojanëyamba. Mo canŷe patse y shachna bnëtsana y unga beóngaca; pero masque nyëtšá beonga, chë atarraiešha ndoñe ntjuatanëcanana.

12 Chora Jesús tojanëyana: “Mabënga, šmochjase ca.”

Chë uatsjéndayënguentšana ni canŷa yontsenñëmua cha jatjayama nda cha yojamnama, er nyëtscanga imojtsetátšëmbo cha chë Utabná bëtsemnama.

13 Chora Jesús tojanobconá, chë tandëše tojanca y chënga tojanatšatá, y chë beónacnaca cachá tojanma.

14 Chóracna, Jesús ya unga soyama chabe uatsjéndayënga yojtsanebëbuacana, obanënguentšana tojtanayenentšana.

Jesús, Simón Pédroftaca tojanoyebuambá

15 Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más quešcobotshana ca?

Y Pedro tbojanjuá: —Atšbe Utabná, aíñe. Aca condëtatšëmbo atše aíñe cbondbobonshánama ca.

As Jesús tbojanianyana: —Atšbe entšanga, mo oveshatemëngcá imomnënga, cochtsanŷena ca.

16 Chora cachiñe tbojantjá: —Simón, Juanbe uaquiñá, ¿quešcobotshana ca?

Y Pedro tbojanjuá: —Atšbe Utabná, aíñe. Aca condëtatšëmbo atše aíñe cbondbobonshánama ca.

As Jesús tbojanianyana: —Atšbe entšanga, mo oveshëngcá imomnënga, cochtsanŷena ca.

17 Y unga soyama tbojtëtantjá: —Simón, Juanbe uaquiñá, ¿quešcobotshana ca?

Pedro puerte tbojanongmé, ya unga soyama “quešcobotshana ca” tbojantjá causa; y tbojanjuá: —Atšbe Utabná, aca lempe condëtatšëmbo. Aca condëtatšëmbo atše aíñe cbondbobonshánama ca.

Aş Jesús tbojanianana: —Atšbe entšanga, mo oveshëngcá imomnënga, cocht-sanýena.

¹⁸ Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboşe choye jtsoñana; pero tanguá chacojtsemna orna, buacuatšënga cochanjatsbaná, y inýa cmochantichëtjo y ndëmoye jama ndoñe chacontseboşe choye cmochanjuánatse ca —Jesús tbojanianana.

¹⁹ Chca tojánayana, ana jtsotatsëmbuama ntšamo Pedro jóbanama ibojam-nama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninýanýiyama. Y chca tojánayanentšana, Pédrëbioye tbojanianana: —Smasto ca.

Jesube bonshana uatsjendayá

²⁰ Pedro tojesanenostëtšantješé y tojáninýe, Jesusbe bonshana uatsjendayá ústonoye yojtseye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

²¹ Pedro chábioye tbojáninýe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

²² Chora Jesús tbojanjuá: —Atše quem luaroye jesabámëntscuana cha ainá chausomñama atše stsebošëse, ¿aca ndayá chama cmatjátsëntšamna? Acna nýe šmasto ca.

²³ Chýeca, chentšana, Jesucristbeñe ošbuáchiyëngbenache nýetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chausomñama atše stsebošëse, ¿aca ndayá chama cmatjátsëntšamna? ca”.

²⁴ Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondëtatšëmbo cha ndegombre soye endóyebuambnama.

²⁵ Jesús inýe ba soyënga tonjëftsema; tša bëtscá soyënga endmëna, nderado lempe cada canýe soye tcojuábema y librëšangá tcojuapormá, atše sëntsejuabná, nýetsca chëšangá quem luarentše ndoñe nanjuába.

Hechos

Jesús tojanašebuachená chë Uámana Espíritu jíchmuama

¹ Teófilo, atšbe natsana librěšaňe tchonjuábobema lempe ntšamo Jesús tojanmama y tojánabuatambama, chca tojanbojatšé orscana,

² y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritibajana, ndayá jamama yojánamnama.

³ Jesús cruciňe tojanóbana y tojtanayenentšana, ba soye chë ichmóněnga yojáneběbuacana, chca, chěnga jinŷanŷiyama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

⁴ Canŷe, Jesús chabe ichmóněngaftaca yojětsemna ora, měntšá tojanaměndá: —Jerusalenentšana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tchonjájuyana.

⁵ Ndegombre, Juan entšanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmu, tšěngaftangbe ainaniňe jtsemándayama cháuamashěnguama ca.

Jesús celoye tojtantsjuá

⁶ Canŷe, chë ichmóněnga Jesúseftaca cánŷiňe imojtsemna ora, chěnga tmojantjá: —¿César y chë Romoquěngbe aměndayentšana tašcochjatsebacá, y mora běnga, Israeloca entšanga, canŷe Rey quemochtsatsbomna ca?

⁷ As Jesús tojaněyana: —Tšěngaftanga ndoňe quecmátamna chë soyěngama jtsetatšěmbuana. Nŷe atšbe Taitá aňe; y cha, chabe obenánaca echanjamánda motcna ora y ndaytě chca chaopasama.

⁸ Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentšana, ntšamo atšbiana šmotatšěmbcá, chë tchonjabuatambá soyěnga, entšanga šmochjájuyana Jerusalenentše, nŷets Judea luariňe, Samarioca y quem luarentša nŷets lurěnguenáchnaca ca.

⁹ Chë soyěnga tojánayanentšana y chabe uatsjěndayěnga imojtsonŷaye ora, Běngbe Bětsá, Jesúsbiocyte tbojtanatsbaná y canŷe jantšetěshe chábiocyte ibojútsbotse y ndoňe más tmonjanobená cha jinŷama.

¹⁰ Jesús celoye yojtsetsjuama chěnga bën imojtserreparáněntscuana, nŷe ndeolpe, uta boyabásata uafjantse entšayaca bopormánata chěngbe juachaca tbojabántsaye,

¹¹ y chěngbiocyte tmojaněyana: “Galileoca entšanga, ¿ndáyeca celoye šmojtsantjěšana? Jesús, chë tšěngaftangaftaca enjamná celoye tontá y ntšamo mora šmonjinŷcá cha celoye jtama, cachcá quem luaroye cha echanjěsabo ca.”

Júdasbe cuenta Matías tmojanábuayana

¹² Jesusbe ichmóněnga chë Olivos tjashocana Jerusalenoye tmojtaná. Chë tjocana Jerusalenóntscóňna bécóňe inamna, ndayěntscoca canŷe ochnaytě jama yojanlesenciana nŷetšá.

13 Jerusalenoye tmojtánashajna orna, chë yebnentša tsbanánoca tsoye tmojtánásëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiñá, Simón chë Celote ca uabobainá, y Judas, chë Santiagbe uaquiñá.

14 Chënga sempre imojanamana jtenefjnana Bëngbe Bëtsáftaca jencuéntama básefta shembásëngaftaca, María Jesusbe mamá y Jesusbe catšátangaftaca.

15 Chë tempo tmojánenefjna canye patse y uta bnëtsana Jesucristbeñe ošbuáchiyënga, y canye, Pedro tojantsá y tojanéyana:

16 “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrénguiñe iuabemancá chaochnënguama, y tempo, David chë Uámána Espíritbeyeca chiñe tojanábema ntšamo Júdasëftaca yochjanopásama; chcasna, Judas uayayënga tojanënatse Jesús chamuishachama.

17 Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuñe jtsoservénama.

18 Tsëngaftanga šmondëtatšëmbo, chë Judas bacna soye tojanmama tmojtánabuená crocenánacna fshantse tmojánbuamema. Chentšana cha tojtánótsatše y chabe bestšaše tsëntsaca tbojtsanashëtšena y chabe uafsbentšana nyëtsca chabe chunchullëjuangá tojtánáshana.

19 Jerusalenentše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’.

20 Salmos librëšañe, Jesucristo uayayëngbe cucuatšëñe boshjuanabiamama mëntšá enduábemana:

Chabe yebna éñañe chaotsemna

y ndocná chentše chaondëtsiyena ca.

Y mëntšánaca endayana:

Chabe cuenta inya chabe trabajo chaoma ca.

21 “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana,

22 Juan Jesúsbiyoe tbonjanabaye orscana y Bëngbe Bëtsá Jesúsbiyoe bëngbentšana celoye tbonanatsbanantscuana. Y mora šontsamna canya mënguentšá juabuáyanama, Jesús tojtánayenama entšángbiyoe bëngaftaca jábuayanama ca.”

23 As chora útata tmojanabocacá: José, nda Barsabás ca imojánabobuatma y inyëngna Justo ca; y chentšana Matías.

24 Chora Bëngbe Bëtsáftaca mëntšá tmojanencuentá: “Bëngbe Utabná, aca nyëtsangbe ainana icuabuatumá; chcasna, šminyané nda quem útatentšana cochjuábuayanana,

25 canye ichmonacá Júdasbe cuenta chaotrabajama. Judas ya ndoñe canye ichmoná quenátmëna, bacna soye tojama causa, y cha mora yojtsemna chë ndayentše jtsemnana ibomna luaroca ca” –chënga tmojánayana.

26 Y nda chë ichmoná yochtsemnana jtsotatšëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiamama imojanjuabná mo canye Jesusbe ustonacá, cachcá ntšamo chë bnëtsana canye uatsjëndayëngbiama chënga imojanjuabnacá.

2

¹ Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyëtscanga cánÿiñe canÿe luarentše imojtsemna.

² Ndeolpe, celocana mo canÿe jabuache binÿiëcá yojtsaishauenana y chca, tša jabuache shauenanana tojanóshjango nyëts yebnentše, chënga imojtsetbiámanentše.

³ Y chora bichtajënga mo iñeshcá yojónÿna y canÿánÿabeñe yojojátaye.

⁴ Chca chë Uámana Espiritu tojánamashëngo chëngbe ainaniñe jtsemándayama; chora nyëtscanga tmojanontsé inÿetsá biyangana, chënga tempo ndmabiyañe, ntšamo chë Uámana Espiritu yojtsamcá chënga inÿetsá chamotsebiyama.

⁵ Chë tempo Jerusalenentše imojtsemna ba judiënga, Bëngbe Bëtsá puerte adórayënga, nyëts luarëngocana áshjajnënga; chënga tmojánabo Bëngbe Bëtsá jëtschuayama.

⁶ Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetsá biyangana jtsóyebuambnayana, ntšamo cada ona chënga imojanbiyacá.

⁷ Chë soyëngama entšanga puerte imojenjaná y mëntšá imojtsentsëtsnaye: “Chë chca montsóyebuambnanga Galileoquënga mond mëna.

⁸ Chcase, ¿ntšámoyeca bënga imojtsobena chënga joyaunayana cach bënga mondëbiyacá ca?

⁹ Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca,

¹⁰ Frigioquënga, Panfilia, Egiptó y Libia, chë Cirene béconana luaroquënga. Báseftanga Romoquënga montsemna;

¹¹ chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

¹² Chë causa nyëtscanga imojtsenjanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojtsayana ca?”

¹³ Pero ínÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

Ntšamo Pedro chora tojanoyebuambá

¹⁴ Chentšana, Pedro tojantsá chë inÿe bnëtsana canÿe ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nyëtscanga Jerusalenentše oyenënga, tšabá šmochjouena. Ntšamo tojopasama cbochanjábuayenaye, as chacmësertama.

¹⁵ Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátmëna; cabá cachëse, base mošenana ora ctsomñe.

¹⁶ Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

¹⁷ Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atše chanjama, atšbe Espiritu nyëtscangbe ainaniñe cháumashënguama.

Chentšana, tsëngaftangbe uaquiñënga y bemianga atšbe soyëngama entšanga mochantšëtsësnaye;

tsëngaftangbe bobontšëngna, atšbe chanjama soyënga mochantsonÿaye mo ot-jenayoquëcá;

y tsëngaftangbe bëtsëjëmëngna atšbe soyënga mochantstotjénaye.

¹⁸ Chca ora, atšbe chanjama nÿetsca atšbe oservënëngbiana, boyabásenga y shembásenga,

chëngbe ainaniñe atšbe Espíritu cháumashënguama,

as chënga atšbe soyëngama entšanga mochantšëtsësnaye.

¹⁹ Atšbe chanjama bëts soyënga celoca;

y quem luariñe echántsemna buiñe, íñeshe y ngona mo jantšetëshcá, atšbe obenana jinÿanjÿiyama.

²⁰ Cabá chë puerte uamana te, chë Bëngbe Utabná bëts soyënga jamama ndobuache ora,

shinÿe ndoñe queochátsbuashinÿinÿana

y juashcona buánganëtema mo buiñcá echántsemna.

²¹ Y as, ndánaca Bëngbe Utabná tbojtsotšëmbuaná, cha bochanjatsbocá:

Chca Joel tempo tojanábema ca” –Pedro tojánayana.

²² Chora Pedro tojatanëyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmonjaninÿanjé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tcmonjaninÿanjé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinÿanjÿiyama. Cach tsëngaftanga chë soyëngama šmondëtatšëmbo, Bëngbe Bëtsabe obenánaca chë soyënga tsëngaftangbeñe Jesús tonjánmayeca.

²³ Ndegombre tsëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tsëngaftanga cháftaca šmochjanmámna cha inatátšëmbo. Tsëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë.

²⁴ Pero Bëngbe Bëtsá tojama cha cháuatayenama; y chë obanëngbe luar-entšana tbojatsbocá, er ndoñe yonjopodena cha obaná chaoquedama ca” – cha tojánayana.

²⁵ Chora Pedro tojatanëyana: “Rey David tempo Jesusbiana mëntšá tojéftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbëtsemna,

y sempre átšeftaca condboquedá atšbe juajabuáchama,

chíyeca ndocná queochatobenaye atšbe jauátjanama.

²⁶ Chíyeca atšbe corente oyejuayá sëntsemna,

y atšbe uayásaca cbontsatschuaná.

Atšbe masque chanjóbana, tsabá sëndëtatšëmbo aca atšbe Bëtsá, atšbe chaitayenama cochjamama.

²⁷ Aca, Bëngbe Bëtsá, obanëngbe luarentše ndoñe quešcochátsboshjona,

y ndoñe queochatsleséncia acbe uamana oservenabe cuerpo chaotsopochocama.

²⁸ Aca chë tsabe benache šconjaninÿinÿé, ntšamo tsabe vida jtsebmomna.

Aca átšeftaca condbëtsemnama, atšbe puerte oyejuayá sëntsemna ca –David tojéftsanabema ca.”

29 Chentšana Pedro tojatanéyana: “Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëtš taitá David tojanóbana y tmojanatbontsá, y bënga montsemna cha tmojanatbontsá luare béconana.

30 Cach David canye Bëngbe Bëtšabe juabna oyebuambnayá inamna. Cha tšabá inatátšëmbo Bëngbe Bëtšá bëtšcá tbojanšbuáchenama, Davidbe entšanguentšana canya, Cristo, cach Davidcá rey jabemama.

31 David inatátšëmbo chë Uámana Uabuayaná, chë Cristo, cháuatayenama Bëngbe Bëtšá yochjanmama. Chama cha tojánayana y tojéftšanabema, obanëngbe luarentše Cristo ndoñe ntjéftšeboshjonana y Bëngbe Bëtšá ndoñe ntjalesénciana chabe cuerpo chaotsopochocama ca.

32 Bëngbe Bëtšá tojama Jesús cháuatayenama y bënga cha fsënjinye. Chíyeca bënga fsëntsetatšëmbo chca ndegombre bëtsemnama.

33 Bëngbe Bëtšá, Jesús celoye tbotanatsbaná chabe catšbioica jtatsmënama jtsemándayama, y Bëngbe Bëtšá chë Uámana Espiritu Jesúsbiolye tbojanëntšabuaché ntšamo chë Taitá tbojanšbuachenacá. Ntšamo tšëngaftanga šmontsonyá y šmontsuenancá entsemna, Jesucrísoftaca chë Uámana Espiritu bëngbe ainaniñe cháumashënguama Bëngbe Bëtšá tojámayeca.

34 David ndoñe Jesuscá celoye tonjána, pero mëntšá tojéftšanábema:

Bëngbe Bëtšá atšbe Utabná Crístbiolye tbonjanianyana:

‘Atšbe catšbioica cochtsetbemana,

35 acbe uayayënga acbe cucuatšifne chamoquedama atšbe obenánaca chamëntscuana ca.’ ”

36 Chora Pedro tojatanéyana: “Tšëngaftanga nyets Israeloquënga šmochtsetátšëmbo, atše ndegombre cach Jesusbiana sëntsóyebuambnama. Cha tšëngaftanga šmonjancrucificá, pero Bëngbe Bëtšá chábiolye tbonjábema Bëngbe Utabná y chabe Uámana Uabuayaná, chë Cristo ca.”

37 Chë soyënga tmojanuena ora, entšanga cochtsetšënanënga imojtsemna, y Pedro y chë inye ichmónëngbiolye tmojanéyana: —Baconga, ¿ndayá mora jamama šojtsamna ca?

38 As Pedro tojanéjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtšabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtšá tšëngaftangbe bacna soyëngama cmochanjáperdonaye y echanjama chë Uámana Espiritu tšëngaftangbe ainaniñe jtsemándayama cháumashënguama.

39 Bëngbe Bëtšá chë soyënga tmonjanašebuachená tšëngaftangbiana, tšëngaftangbe básengbiana y nyets chë bën luarënguenache imomna entšangbiana, nyetscanga chë Bëngbe Utabná Bëngbe Bëtšá chábiolye jabama chaojubuáyayënga ca.

40 Inye palabrëngnaca Pedro tojatanéyana y bëtšcá tojanabuayená mëntšá: “¡Bëngbe Bëtšá chë Israeloca bacna entšanga echanjácastigaye. Chašmótsbocamna, chëngbentšana šmochtsojuánañe ca!”

41 Ba entšanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entšanga nyetsá tmojanoboté, Jesucrístbeñe ošbuachiyënga jtsemnama.

42 Chënga corente imojtseboše jtsamama chë Jesusbe ichmónënga imo-
jtsabuatambá soyënga. Tšabá yojtsacochebiona nÿetscanga cánÿiñe jtsem-
nama y imojanamana mo chë Jesucristbeñe ošbuachiyëngcá cánÿiñe jt-
sesayana y cánÿiñe Bëngbe Bëtsáftaca jtsencuéntayana.

Ntšamo chë natsana Cristbeñe ošbuachiyënga vida imnabomna

43 Nÿetscanga imojtsenjanaye, chë ichmónënga bëts soyënga y inÿe soyënga
chabe obenana jinÿanÿiyama chamomama Bëngbe Bëtsá tojánmayeca.

44 Nÿetsca chë Jesucristbeñe ošbuachiyënga sempre cánÿiñe mo canÿacá
imojtsemna y nÿetsca chëngbe bomna soyënga nÿetscangbiamama yojtsemna.

45 Chënga imojanamana fshantsënga jtsatobuiyana y chë imojánbomna
soyëngnaca, y chë crocénana jujátayana ntšamo chë ínÿenga tojtsëjabotcá.

46 Cada te imojanamana Bëngbe Bëtsabe bëts yebnentše jénefnana cha
jëtschuyama, y yebnënguenache cánÿiñe imojtsesaye oyejuayënga y ndoñe
ojëndayënga.

47 Chënga imojanamana Bëngbe Bëtsá jtsatschuanayana, y nÿetsca entšanga
imojtsejuabnye chë Jesucristbeñe ošbuachiyëngbiamama tšabe entšanga imo-
jamna ca. Y cada te Bëngbe Bëtsá yojtsama más ošbuachiyënga chamóbotema,
chë ndëmuanyënga cha yojtsatsebacayënga.

3

Pedro canÿe coshëtbiye tbojanshná

1 Canÿe te, Pedro y Juan Bëngbe Bëtsabe bëts yebnoye tbojánata bëts
mošenana ora. Chca ora entšanga imojanamana Bëngbe Bëtsáftaca jtsen-
cuéntayana.

2 Bëngbe Bëtsabe bëts yebnentše canÿe cosheto yojtsemna; tojanonÿná
orscana chca šocá inamna. Entšanga imojanamana cada te cha juanatsana
canÿe luaroye, Bëngbe Bëtsabe bëts yebnoca, Botamana Amashjuana ca
uabáinoye, chë tmojtsachñëjuanënga lemošna chaótejañama.

3 Pedro y Juan Bëngbe Bëtsabe bëts yebnoye jamashënguama chë cosheto
tojánanÿe ora, canÿe lemošna chátbiye yojótejañe.

4 Chatna chë šocá imojtsonÿaye, y Pedro tbojaniyana: “Scochtsëñÿaye ca.”

5 As cha yojtsëñÿaye y yojtsejuabnaye ndayá chjójëngacñe ca.

6 Chora Pedro tbojaniyana: “Quetsátsbomna ni crocénana, ni castellano
aca jatšetayama, pero atše chanjama Jesucristbe obenánaca ndayá acbiamama
jamama atše stsobencá: Jesús chë Nazaretocá obenana endbomna; chíyeca
atše cbëyana chabe mándoca, matëtsbaná y cochtsana ca.”

7 Pedro chca tbojaniyana ora, tbojanábuacueshache catšbióicatše y tboj-
tanatsbaná, y cachora chë cosheto shecuatšične y shëmiabeñe añemo yojtsats-
bomna.

8 As chë cosheto, canÿe jontsëñÿe tšabá tojtantsá y tojanontšé tšabá
jtsanana, y Bëngbe Bëtsabe bëts yebnoye Juan y Pédroftaca tojánamashëngo;
yojtsayontsëñÿaye y Bëngbe Bëtsá ibojtsatschuanaye, tbojanshnama.

9 Chë Bëngbe Bëtsabe bëts yebnentše imojétssemnënga nÿetscanga cha
tmojáninÿe tšabá jtsanana y Bëngbe Bëtsá jtsatschuanayana.

10 Chënga imnatátsëmbo cha chë cosheto yojamnama, chë nda yojanamana
Bëngbe Bëtsabe bëts yebnoca, chë Botamana Amashjuanentše jótbemana,
entšanga lemošna jotejañama. Cha tšabá yojtsatsmënamna entšanga oj-
nanánënga imojtsemna.

Ntšamo Pedro tojanoyebuambá Salomonbe Amashjuana ca uabáinentše

11 Chë cosheto ya shnaná ora, ndoñe yontseboše Juan y Pédrëbentšana joluárana. As, nyetsca entšanga ojnánänënga tmojanótjajo chë amashjuana otsbojebniñe, Salomonbe Amashjuana ca uabáinoe, chë Juan, Pedro y chë cosheto shnaná imojétsemnoe.

12 Pedro chë entšanga tojánanyë ora, tojanëyana: “Taitanga y mamanga, Israeloquënga, ¿ndáyeca chë soyëngama ojnánänënga šmojtsemna? ¿Ndáyeca nyë šcojtsëbuáutja? ¿Šmojtsejuabná nyë bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca?

13 Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëtš taitanga imojanošbuaché, cha tonjinñanyé chabe oservená Jesús chë más uamaná yomnama. Cha tšëngaftanga chë mándayëngbe cucuatšinë šmonjáboshjona chamóbama. Pilato enjëtseboše Jesús jëtšboshjonama, pero tšëngaftanga Pilatbe delantë šmonjánayana chca ndoñe šmontsanboše ca, y chíyeca Pilato ndoñe tbtontanboshjona.

14 Jesús uamaná y nyetsca soyënguñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjonama.

15 Y chca, chë ndegombre tšabe vida chašmotsebonnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninye y chama fsëndétatšëmbo.

16 Jesús puerte obená endmënyeca, quem cosheto añémoca entsatsmëna. Ntšamo šmonjinye y šmonjatatšëmboñcá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

17 “Taitanga y mamanga, atše sëndétatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbcá.

18 Tempo, Bëngbe Bëtsá chë chabe juabna oyebuambnayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngmënanana yochtsanbomnama. Morna, ntšamo Bëngbe Bëtsá tojanayancá ya tonjochnëngo.

19 Chcasna, ngmënacá menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama,

20 y tšëngaftangbiöye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá.

21 Canye te echanjóshjango, Bëngbe Bëtsá lempe tsmëmácá jëtšbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá.

22 Moisés bëngbe bëtš taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtsëtsëtnacá cha jtseyeanana.

²³ Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentšana luaroca jtsemnama y chamotsepochochama ca' –cha tojánayana.

²⁴ “Y nÿetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonÿacá.

²⁵ Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canÿe trato tojánbema; chë soyënga cabá tšëngaftangbiama entsemna. Bëngbe Bëtsá Abrahámioye mëntšá tbojaniyana: ‘Chë ácbentšana entšángbeyeca tšabe bendicionënga chanjama nÿetsca quem luarentša entšangbiama ca.’

²⁶ Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” –Pedro tojánayana.

4

Pedro y Juan Jerusalemntša mandadëngbe delante

¹ Pedro y Juan cabá entšanga imojtsëtsëtsnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga.

² Chatna entšángbioye imojtsabuátambaye Jesús tojtayanenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna.

³ As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana.

⁴ Masque chca, banga entšanguentšana, ntšamo Pedro y Juan tojtayanancá tmojanuenënga, aiñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

⁵ Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuatambayënga Jerusalemntšë tmojánenefjna.

⁶ Chëntsnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca.

⁷ Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: –¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

⁸ As Pedro, chë Uámana Espíritu chabe ainaniñe corente jtsemándayëse, mëntšá tojanëjua: –Israeloca mándayënga y bëtsëjemënga,

⁹ mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.

¹⁰ Chcasna, ntšamo tojopasama cbochanjabuayená, chca, tšëngaftanga y nÿetsca Israeloca entšanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiamama Bëngbe Bëtsá tojanma cháuatayenama.

11 Jesusbiana Bëngbe Bëtsabe uabemana palabrenguiñe mëntśá endayana: “Chë yebna jebuanënga tmontsanaboté ndëtsbé, mora chë más bëts uashacuanësentse entsejájona ca”. Tšëngaftanga šmondmëna mo chë yebna jebuanëngcá, er Jesúsbiyoe šmontsanaboté y mora cha chë más uamaná entsemna.

12 Nye cha yobena tšëngaftanga játsebacama. Bëngbe Bëtsá ndocna inye entśábiyoe tbonjatsetá chabe obenana chca jamama; chíyeca quem luarentse ndocná más quenátobena bënga játsebacama. Nye Jesucristbe obenánaca aïne ca —Pedro tojánayana.

13 Chënga imojenjnaná Pedro y Juan tša añémoca ibojtsóyebuambnama tojáninye ora, y chata tempo nduatsjínýenata y librëša nduabuatmata bësemnama tmojántatsëmbona ora. Chca chë mándayënga tmojántatsëmbona chata Jesúseftaca bayté ibojamnama.

14 Y entšanga imojtsonýaye chë tmojanshná cha chentse chátaftaca yojtsemnama; chë causa, chënga ndocá más tmonjanobená chatbe contra jatichámuana.

15 As chora tmojanamëndá chentšana chábuaisebocnama y chentse tmojanouedangna chë soyama imojtsenatsëtsnaye.

16 Chënga imojtsentjanaye: “¿Ndayá chátaftaca mochjama ca? Jerusalemntse oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.

17 Pero entšanga chama ndoñe más chamondëtsencuëntamna, chata mochjáuyana: ‘Ndoñe más entšángbeñe Jesús šmattsebáyana; y ndoñe chašmonjounëse, jabuache castigo šochántsebomna ca.’ ”

18 As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiama entšángbeñe jtsabuátambayana.

19 Pero Pedro y Juan tojánayana: “¿Ntšamo tšëngaftanga šmatjayana ntšamo fchanjayana ca? Ndegombre, Bëngbe Bëtsabe bominiñe ndoñe tšabá quenátsmëna tšëngaftangbiyoe aïne joyaunayana y chábiyoe ndoñe.

20 Er bënga queftsátobena jtsajbanana oyebuambnayana chë tifjinýe y tifjouena soyëngama ca.”

21 Chë mandayëngna chátbodye tojtsanautatjá, pero chentšana tmojtanabáshejuana. Nýetsca entšanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinýenana ntšamo chata jácastigama.

22 Chë boyabása, ndáftaca chata chë bëts soye Bëngbe Bëtsabe obenánaca tbojana, inabomna canta bnëtsana uatama más.

Jesucristbeñe ošbuáchiyënga Bëngbe Bëtsá tmojanimpadá más añemo chauatšatama

23 Pedro y Juan ya tmojtanabáshejuana ora, tojánata chë inye ošbuáchiyëngaftaca jateninýenama y lempe ntšamo chë bachnangbe amëndayënga y bëtsëjemëngcá mándayënga chátbodye tmojanëyancá, chëngbiyoe tmojanantá.

24 Chënga chca tmojanuentšana, nýetscanga cánýiñe tmojanontsé Bëngbe Bëtsáftaca mëntśá jencuëntama: “Bëngbe Utabná, aca chë nda tojama celoca, fshantse, nýetsca béjayënga y lempe ntšamo chenache yomncá,

25 chë Uámana Espiritbijana tcojánayana y acbe oservená David, ntšamo tcojanayancá tojanábema, mëntśá:

¿Ndáyeca entšanga yapa imojtsetsátjaye ca?

¿Ndáyeca imojtsejuabná n̄ye bonamentiama soyënga jamana?

²⁶ Quem luarentša reyënga y amëndayënga imoprontánënga, n̄yetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnana ca —cha tojanábema.

²⁷ “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefna, jenóyeunayama ntšamo jamana, Jesús chë acbe uámana oservená y chë Uámana Uabuayaná tojabemábioye jóbama.

²⁸ Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnana, y chënga chca Jesúseftaca tmonjama.

²⁹ Morna Bëngbe Bëtsá, mouena ntšamo chënga montsichamo, bënga jasúfriama cašojsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama,

³⁰ y cochjama acbe obenánaca šoquënga tšabá chamotsatsmënama y cochjama bënga fchayobená bëts soyënga jamana, Jesús chë uámana oservenabe obenánaca y cha jótšëmbonëse ca” —chënga tmojánayana.

³¹ Bëngbe Bëtsáftaca jencuéntama tmojanpochocá orna, chë tmojánenefnientše tojanangmëmana; y n̄yetscangbe ainaniñe chë Uámana Espiritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

N̄yetsca bomna soyënga n̄yetscangbiama yojtsemna

³² Jesucristbeñe ošbuáchiyënga, n̄yetscanga can̄ye juabna imojtsebmna y ainaniñe cach can̄ye ebionana. Ndocná ntjatichamuana chabe soyënga n̄ye chabiama yojtsemna ca, pero aĩne imojtsichamo, “atše sëndbomna soyënga n̄yetscangbiama entsemna ca”.

³³ Chë Jesusbe ichmónënga puerta obenánaca mëntšá imojtsichamo: “Fsëjn̄yë y fsëntsetatsëmbo Bëngbe Utabná Jesús obanënguentsana tojtayenama ca.” Y Bëngbe Bëtsá yojtsama chë ichmónënga bëtscá tšabe bendicionënga chamotsebmnama.

³⁴ Jesucristbeñe ošbuachiyëngbeñe ndocná yonjamna ndayánaca uajabotá, er n̄yetscanga fshantse o yebna bomnënga imojanamana jtsatobuíyana, y chë crocénana

³⁵ chë ichmónëngbiocyte jayentšbuáchiyana, ntšamo tojtsëjabotcá n̄yetscanga jujátayama.

³⁶ Chca tojanma can̄ya Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá.

³⁷ Chana, fshantse yojtsatobuiye, y chë crocénana Jesusbe ichmónëngbiocyte vojáyentšbuachiye, chë uajabótëngbiama chaoservema.

5

Ntšamo Ananías y Safraftaca tojanopasá

¹ Inamna can̄ye bacó, Ananías ca uabainá, y chabe shemna, Safira ca. Chatna can̄ye fshantse tbojáníye.

² Ananías y Safirna tbojanenóyeunata; chcasna, batšá crocénana cachatbiama tbojanobuajó y chë tojanójama crocénana ichmónëngbiocyte Ananías

tojanamba, pero tojanëyana chana canjamna nyets crocénana ntsachetšá chë fshantsama tbojanosháchiñe ca.

³ As Pedro tbojaniana: “Ananías, ¿ndáyeca tcojalesenciá Satanás acbe ainaniñe bacna juabñenga chacmócochënguama, Uámana Espíritu chë crocénánama jabuambayama ca? Acna chë fshantsama tmojttabuená crocénantšana cach acbiana batšá tcontábojama.

⁴ Cabá ntsatobuiye ora, chë fshantse ábeshe endánmëna y tojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocénánama chca jobostérama? Chca jamëse, ndoñe nye entšángbioye quecatabuambná, sinó Bëngbe Bëtsánaca ca” —Pedro tbojaniana.

⁵ Ananías chë palabrenga tojanuena ora, obaná tojánshajaye. Y nyetscanga chama tmojántatšëmbonënga corente imojtsauatja.

⁶ Chentšana, básefta bobontšënga tmojánshajajna y Ananíasbe cuerpo entšëjuaca tmojanandmaná y jauátbontsama tmojanamba.

⁷ Mo unga horëntscope, Ananíasbe shema Safira tojánshajango, pero ndoñe yontsetatšëmbo ntšamo chabe boyáftaca tojanopasama.

⁸ Chora Pedro tbojantjá: —Ndegombre šmëyana, ¿chë šmonjayana nyetšnama chë fshantse šmojiye ca?

As chë shema tbojanjuá: —Aíñe, nyetšnama fsënjiye ca.

⁹ Pedro tbojaniana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebomnama ndoñe šontsobatmana ca? Acbe boyá jauátbontsama tmonjuambënga muentše bësoca montsemna y mora ácnaca cmochanjuamba ca.

¹⁰ Cachora Safira Pédrëbe shecuatšentše obaná tojánshajaye. Chë bobontšënga tmojtanamáshjna ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontsá.

¹¹ Y nyetsca Jesucristbeñe ošbuáchiyënga chentše imojtsemnënga y nyetscanga chë soye tmojántatšëmbonënga, corente imojtsauatja.

Ba bëts soyënga chë ichmónënga tmojanma, Bëngbe Bëtsabe obenana jinýanýiyama

¹² Chë Jesucristbe ichmónëngaftaca ba bëts soyënga entšángbeñe yojtsebinýna Bëngbe Bëtsabe obenana jinýanýiyama; y nyetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše.

¹³ Chë inýenga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtseñutana; pero entšangna chë ošbuáchiyëngbiana tšabá imojtsencuéntaye.

¹⁴ Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengna.

¹⁵ Tša bëts soyënga chë ichmónëngaftaca yojtsebinýna; chíyeca entšanga imojanamana jutsnëshangañe y tjuashënguñe tsáshenoye šoquënga jubuacnana, chca, Pedro chëjana tojtsachñëjuana ora, nye mo chabe sómbrenaca chëngbe cuerpejana chaochñënguama, shnánënga jtsatsmënama.

¹⁶ Jerusalén chábuáñe publënguëntšana ba entšanga imojanamana jabanana, y šoquënga y bacna bayëjbe juabna uambayënga imojtsëyabó; y nyetscanga shnánënga imojtsatsmëna.

Béngbe Bětsá tojanma Pedro y chě inye ichmóněnga cárcelocana natjěmbana chámuaisebocnama

¹⁷ Chě ichmóněnga tša tšabá imojtsamama, chě judío bachnangbe más uámana aměndayá y chabe ústoněnga, chě saduceunga, puerte envidia imojsebomna.

¹⁸ As chě ichmóněngbioye tmojánishěche y chě běts pueblentša cárceloye tojtsanětame.

¹⁹ Pero ibetna, Béngbe Utabná canye ángel tbojanichmó y chě utámenentša běšašangá cha tojánatěfjo, chěnga tojtaněbuacna y měntšá tojaněyana:

²⁰ “Motsajna, Béngbe Bětsabe běts yebnentše šmochjámashjna, y entsanga šmochjabuayená ntšamo cuanjama chě nyětsca tescama yomna tšabe vida jtebomnana, Jesucrístoftaca cányiñe mo canyácá jtsemněse ca.”

²¹ Ntšamo tmojanuencá, yěfsana cabá cachěse Béngbe Bětsabe běts yebnoye tmojána y tmojanontsé entsanga jabuátambana.

Chěntscuana, chě bachnangbe más uámana aměndayá y chabe ústoněnga, chě Israeloca bětsějeměngcá mándayěnga y inye chentša aměndayěnga tmojánachembo jénefnama y jenóyeunayama; as chora chěnga tmojanmandá chě utámenocana chě ichmóněnga jobiatšama.

²² Pero chě soldaděnga chě utámenoye tmojánashjajna ora, chěnga chentše ndoñe tmojánanýena. Chcasna, chěnga tojtaná chě mándayěnga chca jaúnayama.

²³ Y tmojánayana: “Chě utámenoca fsěnjínýena lempe tšabá endětsětámeñe y soldaděnga nyětsca běšašangá monduabojanýanga; pero fsějnatěfjo y tsoye fsějámashjna orna ndocná chibiátinýena ca.”

²⁴ Chě bachnangbe aměndayěnga y chě Béngbe Bětsabe běts yebnentša soldaděngbe aměndayá chca tmojanuena ora, yojtsětěmnana y imojtsentjanaye ndayá chentšana yochjanopásama.

²⁵ Chorna, chěnga imojtsemnentše canye boyabása tojánashjango y měntšá tojaněyana: “Chě šmojutámieंगा mora Béngbe Bětsabe běts yebnocna montsemna, entsanga montsabatambá ca.”

²⁶ Chě soldaděngbe aměndayá tojána soldaděngaca, chě Jesusbe ichmóněnga junatsama; pero nye tšabá tmojaněnatse, er chěnga entsangbiana imojtsauatja, nderado cachěngbioye ndětsbėngaca muantsėbaye.

²⁷ Chěngbioca tmojaněshejajna ora, mándayěngbioye tmojaněnatse; chora chě bachnangbe más uámana aměndayá měntšá tojaněyana:

²⁸ —Bėnga jabuachana tcbontsėuyaná y tcbonjáuyana ndoñe šmontselesenciana jtsóyebuambnayama chě boyabása Jesús tojánayana yojtsemna jabuátambana soyěngama ca. Masque chcasna, mora tšěngaftanga nyětsca chě Jerusalenentša oyeněnga chabe soyěngama šmojtsabatambá y šmojtseboše, cha tojanóbana castigo bėngbeñe chaotsemnana ca.

²⁹ Chorna, Pedro y chě inye ichmóněnga tmojánayana: —Bėnga šontsamna natsana Béngbe Bětsá joyeunayana y chentšana entsángbioye.

³⁰ Chě Taitá, nda bėngbe běts taitanga monjánadorana, cha tojama Jesús cháuatayenama, chě nda tšěngaftanga šmonjanóba canye cruciñe juajabonjese.

³¹ Béngbe Bětsá tbontatsbaná y chabe catšbioica tbojětšbema, jtsaměndayama, y tbojábema entsangbe Unachayá y Atsebacyá, chca, Israeloca entsanga ngmėnaca chamuenójuaboma bacna soyěnga imojtsamama y chca amana chamotsajbanama, y chěngbe bacna soyěngama perdonáněnga chamotsemnana.

³² Bënga fsëntsichamo ndayá bënga ndegombre tifjinje Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháumashëngo chë tmojtseye-unanëngbe ainaniñe jtsemándayama ca –chënga tmojánayana.

³³ Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsëbáyama.

³⁴ Pero chë mándayënguentše yojtsemna canye fariseo, Gamaliel ca uabainá. Chana canye ley abuatambayá inamna y entsanga puerte inarrespetana. As cha tojantsá y tojanmandá chë ichmónënga ratotema chentšana jubuacnama.

³⁵ Chentšana chë inye mándayënga tojanëyana: “Israeloca taitanga, puerte cuedado šmochtsebozna ntšamo quem boyabásengaftaca šmochjamama.

³⁶ Quem soyama šmochjenójuaboje: Ndoñe bayté quenátsmëna, Teudas tonjánbocna y cha enjánichamo canye uámana entšá canjamna ca, y mo canta patse entsanga cha tmojanasto. Pero chora inyënga cha tmonsanóba y chabe ústonënga tmonsanáshana, y chca lempe tontsanopochocá.

³⁷ Chentšana, chë entsanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca inyënga tmonsanóba y nyetsca chabe ústonënga tmonsanáshana.

³⁸ Chíyeca atše cbéyana, quem boyabásenga matabáshejuana y ndocá mataborlánana. Ntšamo chënga montsamancá, nye entsangbe juabna y nye chëngbe trabajo tojtsemnëse, betscó echanjopochóca.

³⁹ Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëjanama. Cuedado šmochtsebozna, nderado mo Bëngbe Bëtsabe uayayënga šmuatjanenobiama ca” –cha tojanëyana.

Y as chënga Gamaliel tmojanoyeuná.

⁴⁰ Chcasna, chë ichmónëngbiyoje tmojánachembo, tmojtšanachebuánganja y tmojanëyana Jesusbe uabáinaca entšángbeñe ndoñe chamondëtsoyebuambná ca; y chentšana tmojtanabáshejuana.

⁴¹ Chora chë ichmónënga chë amëndayëngbentšana puerte oyejuayënga tmojésanbocna, er Bëngbe Bëtsá tojanalesencia jasúfriama, chënga Jesusbiana oservénënga bëtsemnayeca.

⁴² Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entšángbiyoje imojanabuayiyiná, Bëngbe Bëtsabe bëtš yebnentše y yebnënguenáchnaca.

6

Chë ichmónëngbiama ujabuáchanënga tmojanëbuáyana

¹ Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuachiyëngbentše, chë judiënga griego biyanga batsá imojtsetsátjaye y chë judiënga hebreo biyangbiama mëntšá tmojánayana: “Chë griego biyangbe viudángbiyoje ndoñe cachcá quemnatëjabuáchana ntšamo chë hebreo biyangbe viudángbiyoje cada te montsëjabuachancá ca.”

² Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyeambuambnayana nye chë viudanga jtsanýenama chë tojtšëjaboto soyënguiñe.

3 Chcasna, bacongá y batanga, ts̄ēngaftanguents̄ana can̄ys̄ēftanga mēbuáyana, ts̄abá mandbomngcá smēbuátmēnga, chamotsemna osertánēnga y chē Uámana Espírítu chēngbe ainaniñe chaotsemánda, as chēnga chē ujabótēnga jts̄ējabuáchanama trabajo fchanjában̄yíye.

4 Y bēngna šontsamna n̄yets tempo Bēngbe Bētsáftaca jtsencuéntayana y Bēngbe Bētsabe palabra entšanga jtsabuayiyayana ca” —chēnga tmojánayana.

5 N̄yetscanga tojanogusetá ntšamo chē ichmónēnga tmojanayancá; as, Esteban tmojanábuayana; can̄ye boyabása puerto ošbuachiyá cha inamna y chē Uámana Espírítu chabe ainaniñe yojanmánda. Chents̄ana tmojanēbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bēts pueblócá, y cha yojanamana Bēngbe Bētsá jtsadoránana mo cach judiēngcá).

6 Chents̄ana chēnga tmojanēnatse Jesucristbe ichmónēnga imojtsemnoye; chocna, chē Jesusbe ichmónēnga Bēngbe Bētsá tmojanimpadá chē ichmónēngbe trabajēnguiñe chē ubuáyanēnga chaújabuachama, chēngbe cucuatšēnga chēngbe bestšašentse jajájuase.

7 Más banga Bēngbe Bētsabe palabra imojtsuenana, y chca, Jesucristbeñe ošbuáchiyēnga más imojtsóbotena, y Jerusalemntse más ošbuáchiyēnga betscó imojtsóbotena. Y ba judiēngbe bachnángnaca tmojanontsé Jesucristbeñe jtsóšbuáchiyana, ntšamo chē ín̄yēnga imojtsanošbuachecá.

Esteban tmojánishache

8 Esteban, Bēngbe Bētsabe obenana y chábentšana ts̄abe bendicionēnga yojtsebomñese, entšángbeñe bēts soyēnga yojtsama.

9 Báseftanga “Ya Cachcá Atabashejuana Oservénēnga ca” uabainēngna tmojanontsé Estébanofaca enatsētsayana. Chēnga imojamna judiēnga Cirenoquēnga, Alejandriquēnga, Ciliciá y Asioquēngnaca, y chēngbe enefjanya luare yojanabaina “Ya Cachcá Atabashejuana Oservénēngbe Yebna ca”.

10 Pero chē Uámana Espírítu tojanma Esteban chaóyebuambama bētscá osertanacá, y chíyeca chēnga ndoñe imontsobena ntšamo cha jojuana.

11 As chēnga báseftanga tmojanēbuénaye Estébanbe contra podesca soye chamuayanama, mēntšá: “Cha fs̄ēnjoyeuná Moisesbiana y Bēngbe Bētsabiana ndoñe ts̄abá jtsóyebuambnayana, mo cuafjoyanguangcá ca.”

12 Chcace chēnga tmojanma entšanga, bētsējemēngcá mándayēnga y ley abuatambayēnga Estébanbe contra chamóntša enbouenanana; y as, Esteban tmojanotbá y chē mándayēnga imojtsemnoye imojúichēmo.

13 Y tmojanēnatse básefta entšanga, uayátsenaye soyēnga y podesca soyēnga Estébanbe contra chamuayanama; as chēnga mēntšá tmojánayana: “Mua bacna soyēnga entsichamo chē Bēngbe Bētsá jtsadoránama bēts yebnama y Moisesbe leyēngama.

14 Y fs̄ēnjoyeuná cha jayanana, Jesús Nazaretocá Bēngbe Bētsabe bēts yebna caochtsepochóca y caochjama bēnga n̄ye chabe mándēngaca mandánēnga chamotsiyenama y ndoñe ntšamo Moisés bēngbe bēts taitanga tojētsanabatambacá ca.”

15 Chē mándayēnga y n̄yetscanga chentse imojétsetbiamanēnga Esteban tmojanon̄yinjé ora, tmojánin̄ye chabe jubíá yojtsebuashin̄yinjána mo can̄ye ángelbe jubiacá.

7

Ntšamo Esteban tojanenëuyaná

1 Chora chë bachnangbe más uámana amëndayá, Estébanbioye tbojantjá: –
 ¿Ntšamo acbiama montsichamcá ndegombre yojtsemna ca?

2 As Esteban tojanëjua: –Taitanga y baconga, mouenënga. Bëngbe
 Bëtsá, chë corente uamaná endmëná, Abrahámbioye tbojánëbëbocna, cha
 Mesopotamioca yojaniyena ora; tbojánëbëbocna, Harán bëts puebloca
 joyénanama cabá nda ora,

3 y Bëngbe Bëtsá tbojaniyana: “Metseboshjona acbe fshantse y acbe
 pamillanga y chochanjinÿinÿiye luaroye cochjá ca.”

4 As Abraham chabe luare Caldea tojëftsamboshjona y tojána Haránoca
 joyénanama. Chabe taitá tojanóbanentsana, Bëngbe Bëtsá Abrahámbioye chë
 luaroye tbojanánatse, chë mora tšëngaftanga šmontsiyenentse.

5 Pero quem luariñe ni mo base fshantse ndoñe tbonjëftsanatsetá, ni
 mo ndayentse jtsiyenama. Pero añe Abrahámbioye tbojanšbuachená
 chë fshantse jatšetayama, chabiama y chabe básengbiana, Abraham
 tojóbanentsana. Chca tbojanšbuachená ora, Abraham ni canÿe šešona
 bonjánbomna.

6 Y Bëngbe Bëtsá mëntsá tbojaniyana: “Chë ácbentsana entsanga, ínÿengbe
 luaroca áshjajnënga mochántsemna, y choca oyenënga chëngbe oservënega
 chëngbioye mochanjábiama y canta patse uatëntscuana jabuache mochanja-
 sufrina ca.”

7 Y mëntsánaca tbojaniyana: “Pero atše chanjácastigaye chca oservënega
 chacmojábiama luarentša entsanga; y as, chentsana chë ácbentsana entsanga
 mochanjësebocana y mora bontsemna luaroye mochanjésabo y muentše atše
 šmochántadorana ca.”

8 Bëngbe Bëtsá Abrahámbioye tbojanšbuachená nÿe cha y chabe básengbe
 Taitá cha jtsemnama y jamama tšabe bendicionënga chëngbeñe chaot-
 semnama, y chama, chaotsinÿnamna tbojanmandá chabe šešona, boy-
 abásetema tojonÿná ora, base bobachtema chë más delicadentše jatëšana.
 Chíyeca, chabe uaqiñá Isaac tojanonÿná ora, posufta tianoye Abraham
 base bobachtema chë más delicadentše tbojantëtse. Isaac cachcá tojanma
 chabe uaqiñá Jacóboftaca y Jacob cachcá tojanma chë chabe bnëtsana
 uta uaqiñëngaftaca. Chënga monjamna chë Israeloca bnëtsana uta bëts
 pamillangbe taitanga.

9 “Quem uaqiñënga bëngbe bëts taitanga monjamna. Chëngna, chëngbe
 uabentsá Josébioye envidia imnabomna y tmojtsatanobuiye, Egiptoye canÿe
 oservenacá chamotsánatseñama. Pero Bëngbe Bëtsá Josébioye nÿets tempo
 ibnauájabuachana,

10 chíyeca nÿetsca chabe ngmenënguentšana tbojanatsbocá y Bëngbe
 Bëtsá tojanma cha chaotsetatšëmbuama tšabá jóyebuambayama chë Egiptoca
 réybentše, Faraón ca uabainá. Bëngbe Bëtsá tojanma chë Faraón chaoyejuá
 ntšamo José yojamnama; chíyeca Faraón Josébioye tbojánbema Egiptoca
 mandado y chabe yebnënguentše oyenëngbiámnaca.

11 “Chë tempo, Egiptó y Canaán luariñe bëts shëntsana tojanóshjango y
 puerte ngménana yojtsemna y bëngbe bëts taitanga ndoñe imontsobena saná
 jónÿenama.

12 Pero Jacob tojántatsëmbona Egiptoca saná yojtsemnama; asna, chabe uaqüñënga, chë bëngbe bëts taitanga choye tojanichamó. Chora yojamna chë natsanama chënga Egiptoye jama.

13 Uta soyama chënga tmojtésaná ora, José chabe catšátanga tojanëyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiana tojántatsëmbona.

14 Chentsana, José tojanmandá chabe taitá Jacob y nyëtsca pamíllanga Egiptoye chamotsama. Canyësëfta bnëtsana shachnënga imojamna chë Egiptoye tmojánanga.

15 Chcasna, Jacob Egiptoye tojána choca joyénanama. Choca cha tojanóbana y chë inye bëngbe bëts taitángnaca.

16 Jacob y chabe básenga, ntšamo imojtsobancá, chëngbe cuerpo Siquem bëts puebluye imojtsatambaye y tmojanëtebuantsá, Abraham tojëftsanbuamé cuvëshënguiñe. Abraham canye crocenánama Hamorbe uaqüñëngbioye, chëshënga yojtëyentsbuamiñe Siquem puebloca.

17 “Ntšamo Bëngbe Bëtsá Abrahambioye tbojansbuachenacá jamama yojt-sobeco ora, Egiptoca corente tmojanoboté Israeloca entsanga y banga chënga imojtsemna.

18 Cabana, Egiptoca inye rey tojanojayé y cha Josébioye ndoñe tbon-janabuátmana.

19 Chë reyna, bëngbe entsanga, chë bëngbe bëts taitángbioye tojanaingñe y tojanma chënga puerte chamosufrima; tojanamëndá, chë tmojtsónyña šesonatëmënga cachcá jtsënyayana chamotsóbanama.

20 Chë tempo canye básetema tojanonýña y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ishinyëntscuana.

21 Cachcá jonýayama yojtsamna orna, Faraonbe bembe tbojanocñe y mo cachabe uaqüñá cuenta tbojanboché.

22 Chca, chë Egiptoquënga imnatátšëmbo soyënga Moisés tmojanbuatëmbá y canye uámana entsá tojánocna jóyebuambayama y ndayánaca jamama.

23 “Canta bnëtsana uata tojánashjache ora, tojanenujubó jama jtsetatsëmbuama ntšamo chë Israeloquënga, chabe entsanga imojtsemnama.

24 Canye, Moisés tojáninye canye Egiptocá canye Israelocábioye ibojtse-jantšetaye ora; as Moisés tbojanoboguiyana y chë Egiptocábioye tbojtsanába.

25 Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentsana chëngbioye játsebacama ca. Pero chë Israeloquënga ndoñe yontšësertana.

26 Yëfsana, Moisés tojánanyëna útata, cach Israelocata, ibojtsentsjanaye; chora cha betesco tojána jetsëuyanama y tojanëyana: ‘Tsëndata catšata šondmëna, ¿ndáyeca šojtsentsjanata ca?’

27 As, chë inyabioye ibojtsetsjanayá Moisésbioye tbojtsanajuatsëntše y tbo-janiyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuyanama ca?’

28 ¿Cojtseboše átsnaca jóbama, ntšamo tonjopasá yëfse chë Egiptocábioye tconjobacá ca?’

29 Moisés chca tojanuena ora, Madián luaroye tojtsanachá y choca yoyena inye luarocana ashjangonacá. Chentše uta uaqüñata yojëftsabamna.

30 “Chentsana canta bnétsana uatése, entsanga ndoyena luariñe, Sinaí tjañe béconana, canye ángel tbojánebëbocna zarzësha yojtsángbototjuanentse.

31 Moisés yojenjaná ndayá yojtsonyama y tšabá jinýama tojanobeconá ora, tojanuena Bëngbe Bëtsá mentsá ibojtsatsëtsnaye:

32 ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebomna choye jontješiyama.

33 As Bëngbe Utabná tbojaniyana: ‘Motsenóshecbotsca, er aca contsemnentse nye atšbiama luare endmëna, er átšnaca chentše séntsemna.

34 Ndegombre sënjinýe ntšamo atšbe entsanga Egiptoca montsesufrina y sënjouena chëngbe oyabojuayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ –Bëngbe Bëtsá tbojaniyana.”

35 Chentsana Esteban tojanëyana: “Quem Moisés entsanga tmojtsanaboté y tmojaniyana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinýna ángeloftaca.

36 As Moisés, bëngbe bëts taitanga Egiptocana tojésanëbuacna y bëts soyënga tojanma, y inýe soyënga Bëngbe Bëtsabe obenana jinýanýiyama Egiptentše, chë Buángana ca uabaina mar béjayentše y entsanga ndoyena luarentše, canta bnétsana uatëntscuana.

37 Cach Moisés Israeloca entsanga mentsá tojanëyana: ‘Bëngbe Bëtsá tšëngaftanguentsana canýa bochanjábema atšcá Bëngbe Bëtsabe juabna oye-buambnayá ca.’

38 Moisés Israeloca entsángaftaca yojëftsemna chë entsanga ndoyena luaroa. Choca chë entsanga tmojánenefjna Sinaí tjañe béconana. Chentsna canye ángel Moisésoftaca tojanoyebuambá, bëngbe bëts taitángbïoye chë buayenana soye Moisés chaóyebuambama, chë entsanga tšabe vida jónýenama palabrënga; y Moisés chca tojanma, bëngnaca chë palabrënga jouenama jobenayama.

39 “Pero bëngbe bëts taitanga ndoñe tmonjánbošena joyeunayama, masna nye tmojtsanaboté y Egiptoye jesshëconama imojtsaisëboše.

40 Moisés cabá chë tja tsjuanoca chë ángeloftaca yojtsemna ora, chëngbe bachnangbe más uamana amëndayá Aarónbïoye mentsá tmojaniyana: ‘Bëngbe Bëtsabe cuenta šmayentšpormá canye buashinýinýana soye jadórana, bënga chašúnatsama. Er bënga qomátststšëmbo ndayá yojtsopasana Moisés, chë Egiptocana šonjëtsëbuacnáftaca ca.’

41 As tmojanma canye buashinýinýana soye mo canye uacnabecá y cha jadórana ba bayënga tmojanëbaye, y tmojanóboyejuanga cachënga chë soye tmojanpormáyeca.

42 Chë causa, Bëngbe Bëtsá chëngbentsana tojtsanojuánañe y cachcá tojesanënyaye chëngbe bacna soyënga causa, estrellatëmënga chamotsadoránama. Chca jochnënguama, Bëngbe Bëtsabe juabna oyebuambayëngbe librëšañe mentsá endayana, ntšamo Bëngbe Bëtsá tojanayancá:

Israeloca entsanga,

¿Atše jëtschuayama bayënga chešmëñjanëbaye y chë soyënga chešmëñjanátšëmbona,

chë canta bnëtsana uata entsanga ndoyena luarentşe tşëngaftanga şmonjëftsemna ora?

43 Atşe jadóra cuentna, chë Molochbiana jebna soye şmonjanacutsá y cha şmonjánadorana,

y chë Refánbe estréllacnaca cachcá şmonjánama.

Chë soyënga mo Bëngbe Bëtsá cuenta şmonjánbomna y cach tşëngaftanga şmonjanobopormá jadórama.

Mora chë causa atşe chanjama, Babilonientşana más chcoye tşëngaftanga chacmotsénatsama ca” —chiñe endayana.

44 “Bëngbe tempsca bëts taitanga entsanga ndoyena luaroca, chë jatsjacama opodena yebna inmabomna; chë yebnentşe Bëngbe Bëtsá chëngaftaca tojanoyebuambá. Inajebna ntşamo Bëngbe Bëtsá Moisésbioye tbojanmandacá, y cha tojanma ntşamo chaojebuama Bëngbe Bëtsá tbojaninÿinÿecá.

45 Bëngbe bëts taitangna chëngbe taitángbentşana chë jatsjacama opodena yebna chëngbiana tmojanóyëngacñe, y chënga chë Canaán luaroye Josuéftaca, chë inÿe luaroquëngaftaca jéntsama tmojána ora, chë jebna soye tmojanamba y chocna, Bëngbe Bëtsábeyeca chentşa entsángbioye Israeloquëngbentşana tmojanëbuacna; y chë jebna soyna chë tmojanayënjaná luarentşe tojanomedá, rey David yojëftsiyenëntşucana.

46 David tşabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentşe chaotsiyenama.

47 Pero Salomón inamna nda chë Bëngbe Bëtsabe bëts yebna tojanjebuá.

48 Masque chë celoca Bëngbe Bëtsá, entsangbe jebna yebniñe ndoñe quenatiyena. Ntşamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

49 “Celoca endmëna chë luare ndayentşana atşe tsmánda, y quem luare endmëna nÿe mo canÿe tşenëtemcá ndayentşe atşbe shecuatşënga chjacjaye.

As, ¿ntşamo atşbiana jebna yebna şmochjajebo ca?” —chë Utabná jayanana—;

‘o ¿ndaye yebnentşe atşe jóchnama chjobenaye,

50 ndegombre cach atşe nÿetsca chë soyënga tijamëse ca?”

51 Esteban mëntsánaca tojanëyana: “Tşëngaftanga nÿets tempo josértama ndëboşënga şmondmëna; şmondbomna ainana mo chë Bëngbe Bëtsábeñe ndoşbuáchiyëngbe ainancá, y Bëngbe Bëtsabe soyëngama nduauenanënga şmondmëna. Tşëngaftanga ndocna te queşmátsboşe chë Uámana Espiritu joye-unayana. Ntşamo tşëngaftangbe bëts taitanga monjanियencá, tşëngaftángnaca cachcá.

52 ¿Bëngbe Bëtsabe juabna oyebuambnayënguentşana, ndábioye tşëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtsanëbaye, y mëngna entsángbioye imojanabuayiyná Cristo, chë ntşamo Bëngbe Bëtsá yoboşcá amá yochjánabama. Pero morna, uayayëngbe cucuatşifne cha şmojáboşhona y şmojóba.

53 Bëngbe Bëtsabe mandënga angelëngaftaca tşëngaftanga şmonjanóyëngacñe, pero chë soyënga ndoñe queşmátsyeunana ca” —cha tojanëyana.

Esteban ndëtsbéngaca tmojanóba

⁵⁴ Chentša mándayënga chca tmojanuena ora, Estébanoftaca tmojanot-jayaná y tmojanenafëtšbonzentsé, rábiaca imojtsemnama.

⁵⁵ Pero chë Uámana Espiritu Estébanbe ainaniñe corente yojtsemándaye. Celoye yojntješiyé y Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catšbioica yojtsatsana.

⁵⁶ As, Esteban tojánayana: “¡Mouenënga, séntsonÿá celoca entsatëfjna y Bëngbe Bëtsá Entšá tojanbemá Bëngbe Bëtsabe catšbioica entsemna jt-samëndayama ca!”

⁵⁷ Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontšënja.

⁵⁸ Chentšana, chënga chë pueblentšana tmojtsanábcocna y ndëtšbéngaca tmojtsanatëchénganja. Chë Estébanbioye mal tmojanquedangna entsayangá tmojtsanenátsejca y canÿe bobontse, Saulo ca uabainá, tmojesanábonÿiñe chaotsinÿenama.

⁵⁹ Ndëtšbéngaca imojtsénanantscuana, Esteban Bëngbe Bëtsáftaca ibojtsencuéntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

⁶⁰ Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8

¹ Saulo chentše yojtsemna y tšabá imojtsama ca yojtsejuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, inÿenga tmojanontšé Jesucristbeñe ošbuáchiyënga Jerusalemntše ucamenana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tojanáshana. Nÿe chë Jesucristbe ichmónënga ndócnoye tmonjánacheta.

² Básefta boyabásenga, Bëngbe Bëtsá adórayëngna, Esteban tmojanamba jauábontsama y chabiama puerte tmojánenobošachna.

³ Chëntscuana, Saulo yojtsentšena Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamia.

Felipe Samaria luaroca tšabe noticiëngama yojanabuayiyná

⁴ Y Jesucristbeñe ošbuáchiyënga tmojanáshanëngna nÿetsquénache imojnabuayiyayé Jesusbe tšabe noticiënga.

⁵ Chca, Felipe Samarioye tojána y tojanontšé chë Bëngbe Bëtsabe Uámana Uabuayaná, Cristbiamia, chentša entsanga jábuayenama.

⁶ Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana.

⁷ Banga bayëbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna.

⁸ Chë soyama chë pueblentša oyenënga corente imojtsóyejuaye.

⁹ Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entsanga

chabe soyëngama imojánenjanaye. Cha yojánichamo cha canye uámana entśá canjamna ca.

¹⁰ Y chábioye corente inmayerunana nyetscanga, uámanënga y nduámanëngnaca. Entśanga imojánichamo: “Mua entsemna chë Bëngbe Bëtsabe bëts obenana inyanynayá ca.”

¹¹ Y ndegombre chënga corente inmayerunana, er cha chë bocjuanana soyëngaca baytë chë entsanga ingñëngnga y ojanánënga yojtsabamna.

¹² Pero chë luarentśa entsangna, Felipe tmojanoyeuná chë cha yojtsëtsësná tśabe noticiënga Bëngbe Bëtsabe amëndayama y chë Jesucristbiana tśabe soyënga. Chorna chënga Jesucristbeñe imojtsoşbuáchiye, y boyabásenga y shembásenga tmojánenabaye.

¹³ Y cach Simónëngaca Jesucristbeñe yojtsoşbuáchiye y tojanenábaye, y chentśana cada te Felípeftaca cha yojtsanmëna. Cha tojáninye Felipe chë bëts soyënga Bëngbe Bëtsabe obenánaca jamana, y chama ojananá yojtsemna.

¹⁴ Chë Jerusalenoca imojtsemna ichmónënga tmojánatşëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó.

¹⁵ Pedro y Juan Samarioye tbojánashjango ora, chentşe Jesucristbeñe oşbuáchiyëngbiama Bëngbe Bëtsá tmojanimpadá, as chë Uámana Espiritu chëngbeñe cháumashënguama jtsemándayama.

¹⁶ Er cabá ni mo cánýabeñe chë Uámana Espiritu tonjánamashëngo; chënga tmojánenabaye Bëngbe Utabná Jesús jótşëmbonëse, chábeñe oşbuáchiyënga jtsemnama imojtsebóşeyeca.

¹⁷ As Pedro y Juan chëngbe bestśaşiñe cucuatşënga tbojancjá, y chca, chë Uámana Espiritu tojánamashëngo chëngbe ainaniñe jtsemándayama.

¹⁸ Simón tojáninye, chë ichmónënga entsángbeñe cucuatşënga tmojancjá ora, chë Uámana Espiritu chëngbeñe jamashënguana. As chora Simón chë ichmónënga tojanëyana: —Quem crocëngana mosháchiñe,

¹⁹ y átsnaca chë obenana şmatşetá, y ndábeñnaca cucuatşënga chajajajó ora, chábeñnaca chë Uámana Espiritu cháumashëngo ca.

²⁰ As Pedro tbojaniana: —¡Acbe crocëngana infiernoye chaotsá y ácnaca, chë Bëngbe Bëtsabe tşetana soye crocëngana jobuámiñama yopodena ca tcojajuabó causa!

²¹ Ndegombre, aca bëngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tśabe juabnënga ndoñe quecátsbomna causa.

²² Ngmëngaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna.

²³ Atşe sëntsetatşëmbo, acbe ainaniñe tśa bacna juabnënga inyëngbiama yojtsemnama; y bacna soyënga amana jtsajbanama ndoñe quecátobena causa, aca mo canye ntsacjuanacá contsemna ca —Pedro tbojaniana.

²⁴ As chora Simón tojanëyana: —Bëngbe Utabná atşbiana şochjaimpáda, ntśamo şmonjauyancá ndoñe chandëpasama ca.

²⁵ Pedro y Juan, ntśamo Bëngbe Utabná Jesucristbiana tbojaninycá y ibnatatşëmbcá entsanga imojtsëtsësnaye. Chentśana, Jerusalenoye tbojésanata y tbojánachnëngo ba Samarioca pueblëngüejana, tśabe noticiënga entsanga abuayinaye.

Felipe y chë Etiopía luaroca reinabe uajabuachaná

²⁶ Chentsana, Bëngbe Utabnabe canye ángel Felípbioye tbojaniyana: “Moprontá y tsmana luarëngoye motsa, Jerusalemëntšana Gaza ca uabaina bëts puebløye benachëjana ca.” Chë benachna entsanga ndoyena luarëjana yojachnëngona.

²⁷ As Felipe yojëftsëtsbaná y tojána. Benachiñe tbojáneninýena canya Etiopía luarocáftaca. Etiopía luaroca canye reiná inamna y chë boyabásana chabe uajabuachaná y chabe crocénana bojanýá inamna. Chana Jerusalemoye tojánabo Bëngbe Bëtsá jadórama.

²⁸ Chora Etiopía luaroye yojtsataye, chabe cochëshañe inayësenotbemañe, y chë Bëngbe Bëtsabe juabna oyebuambnayá Isaíasbe uabemana librësha yojtsaiualíaye.

²⁹ Chora chë Uámana Espíritu Felípbioye tbojaniyana: “Mobeconá y chë cochësha juachaca cochtsaye ca.”

³⁰ As Felipe betesco yojobeconá. Chora yojouena chë Etiopía luarocá, Isaíasbe uabemana librësha yojtsaiualíaye; as tbojantjá: —¿Chë contsalía soye quecmojtsosertana ca?

³¹ Y chë Etiopía luarocá tbojanjúá: —¿Ntsamo sochjosërta, ndocná soñabuayenase ca?

Y Felípbioye tbojaniyana: —Diosmanda, atsbe cochëshoye másëngo y atsbe juachaca mabótbema ca.

³² Isaíasbe uabemana librëshañe mëntsá yojtsalíaye: Cha tmojanánatse mo canye oveshá jóbama cuafjuanatscá; y chë mo canye oveshá tmojtsëtsbotjñá ora, cha iytëca jtsemnana, chánaca cachcá, chacá tondaye chenátanayana.

³³ Entsanga tmonjanma cha puerte chaosufrima, mo cha canye nduamaná cuaftsemncá y ntsamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana, quem luarentsa chabe vida tmontsanbojuaná causa ca.

³⁴ Chora chë Etiopía luaroca uajabuachaná Felípbioye tbojaniyana: —Diosmanda, smobuayená, ¿ndabiama Bëngbe Bëtsabe juabna oyebuambnayá chca yojtsichamo, cachabiana o inýabiana ca?

³⁵ As Felipe tojanontsé, chë Isaíasbe librëshañe yojtsayana sóyeca, Jesusbe tsabe noticiënga jábuayenama.

³⁶ Chentsa bënëse, canye béjaye obëjniñe juachañe ibojtsachnëjuana. Chora chë uajabuachaná tojánayana: —Muentse béjaye entsemna. ¿Ndáyeca ndoñe nanjopódia atse muentse uabainá jtsemnana ca? Diosmanda, smabayé ca.

³⁷ As Felipe tbojaniyana: —Jesucristbeñe nyëts acbe ainánaca tcojtsosëbuáchese, añe echanjopódia juabáyama ca.

Y chë boyabása tbojanjúá: —Añe, sëntsošbuaché Jesucristo Bëngbe Bëtsabe Uaquiná yomnama ca.

³⁸ As chë Etiopiacá tojanmandá chë cochësha chauátotonama. Chentsana, nyëts úata chë béjaye tbojanashëbëbuástjango y Felipe, chë Etiopiaca uajabuachanábioye tbojanabayé.

³⁹ Chë béjayentsana tbojtanbocna ora, chë Uámana Espíritu Felipe ibojtsánatseñe y chë uajabuachaná ya ndoñe más Felípbioye ibontsonýaye, pero corente oyejuayá yojtsatoñe.

⁴⁰ Felipe tojántatšëmbona Azoto bëts puebloca yojtsemnana, y chentšana tojána nÿetsca pueblënguenache chë tšabe noticiënga abuayiyaye, Cesarea puebloye jashjanguëntscuana.

9

Ntšamo Saulo Crístbeñe ošbuachiyá tojanóbema (Hch 22.6-16; 26.12-18)

¹ Saulo chëntscuana cabá Bëngbe Utabnábeñe ošbuáchiyënga yojanautatjná jtsëbáyama. Chama cha tojána chë bachnangbe más uámana amëndayábioye,

² uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanÿé Benache ustoniñe, boyabásenga o shembásenga tojánÿenëse, jótabayama y Jerusalenoye junatsama. Y chca jamama tojánbocna.

³ Pero ya Damasco béconana yojtsaye orna, nÿe ndeolpe chabe juachañe celocana canÿe bëts tcuinÿe tojanbuashinÿinÿena.

⁴ Chora Saulo fshantsoye tojánshajaye y canÿe oyebuambnayana tojanuena, mëntšá: —Saulo, Saulo, ¿ndáyeca chca šcojtsacmena ca?

⁵ As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšë entšanga chamotsesufrinama.

⁶ Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnana ca.

⁷ Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nÿe chë oyebuambnayana tmojanuena, pero ndocná tmonjáninÿe.

⁸ As Saulo fshantsentsana tojtantsbaná y tojtanobuchatéfjona ora, tondaye yontsobena jinÿana. Chcasna, chë inÿenga tmojëftsanobuacuetëntsé y chca, Damascoye tmojanánatse.

⁹ Chentše yojëftsemna unga te, jinÿama ntobencá, ni ntjascá y tondaye ntjofšiyá.

¹⁰ Damascoca Jesucristbeñe canÿe ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninÿe y Bëngbe Bëtsá tbojaniyana: —Ananías ca.

As cha tbojanjuá: —Bëngbe Utabná, ¿ndayá chjama ca?

¹¹ Y Bëngbe Utabná tbojaniyana: —Moprontá y motsa chë “Ndericho tsáshenañe ca” uabáinoye, y Júdasbe yebnentše cochjanotícia canÿe boyabásabiama, Saulo ca uabainábiami, Tarso puebloca; cha mora Bëngbe Bëtsáftaca bentsencuënta.

¹² Saulo ya tonjinÿe mo otjenayoquécá, canÿe entšá Ananías ca uabainá entsamashjuana y chabe cucuatšënga chabe bestšašifne entsejájua, chca, cha chabuatabinÿinama ca.

¹³ Ananías chca tojanuena ora, tojánayana: —Bëngbe Utabná, banga ba soyënga chabiami šmonjacuentá; Jerusalenoca tša bacá acbe entšanga imomnënga tojáborye.

¹⁴ Y mora entsebmoma mando chë bachnangbe amëndayëngbentšana, muentše aca otšëmbuanënga jótabayama ca.

¹⁵ As Bëngbe Utabná tbojaniyana: —Motsa, er atše cha sënjuábuayana atšbiami chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbiami chamotatšëmbonama.

16 Atše cha chanjinjinyiye ntsachetšá ibojtsemna átsbeyeca jasúfriama ca.

17 As Ananías tojána Saulo yojtšanmëna yebnoye. Tojánamashëngo ora, Saulëbe bestšašinë chabe cucuatšënga tojanajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjan-abó ora cmonjanebëbocná, šonjichmó aca chacmatabínyama y chë Uámana Espíritu acbe ainaniñe jtsemándayama cháuamashënguama ca.”

18 Cachora, Sálulëbe bominyentsana mo beonhe bobachëshëngcá tojan-tquëcjana, y chca, ibojtsatabinýna; chora tojantsbaná y tojanenábaye.

19 Chentšana, Saulo tojanse y añemo yojtšatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damasco puebloca Saulo entsanga yojanabuayýná

20 Saulo cachorscana tojanontšë jábuayenama judiëngbe enefjuana yebnënguenache, Jesús Bëngbe Bëtsabe Uaquiná bëtsemnama.

21 Chë imojtsuenanënga nyëtsanga imojtsenjanayeye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšinë jabáshejuanama.”

22 Pero Saulo cada ora más añémoca yojtšóyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

Ntšamo Saulo judiëngbentsana tojtšanachá

23 Bayté tojanochnëngo ora, judiënga tmojanenoyeuná ntšamo jamëse Saulo jóbama,

24 pero Saulo chë soye tojántatšëmbona. Bnëté y ibeta, chë bëts pueblentša bëšašanguenache chënga chabiamana imojananýá, jtsóbama;

25 pero chë Jesucristbeñe ošbuáchiyënga, ibeta, cha canýe bëts sbarëcuiñe tojtšanatsuaná, y chë pueblentša shëconana tapiëšëjana tmojtšanëštjango. Chca cha tojanotsbocá.

Saulo Jerusalemoca

26 Saulo Jerusalemoye tojánashjango ora, yojtseboše chë Jesucristbe ichmónëngaftaca jenútanama, pero nyëtsanga imojtsebiauatja y ndoñe imontsošbuaché Saulo Jesucristbe ustoná yojtsemnama.

27 Chcasna, Bernabé Sálulëbioye tbojëftšanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninýama, ntšamo Bëngbe Utabná tbojanianama y ntšamo cha Damascoca tša añémoca Jesusbiamana entsanga tojánabuayenama.

28 As Saulo Jerusalementše tojanototóna y chë Jesucristbe ichmónëngaftaca yojánana. Bëngbe Utabnabiamana bëts añémoca entsanga yojanabuayýná y

29 yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama.

30 Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso pueblöye tmojanichmó.

31 Y chca, Jesucristbeñe ošbuáchiyënga Judeoca, Galilea y Samaria luarentše chora y ndoñe más montsansufrina y natjëmbana imojtsemna, y nyëtsanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

Pedro Enéasbiøye tbojanshná

³² Pedro yojánabuache nyetsca chë Jesucristbeñe ošbuáchiyëngbenache. Y chca, Lida puebløca Bëngbe Bëtsabe entsanga jabuachámnaca tojána.

³³ Lida pueblentse canya tbojáninyëna, Eneas ca uabainá. Cha jama ndobená inamna y posufta uata jutsnéshañe chca inajájona.

³⁴ Pedro tbojaniana: “Eneas, Jesucristo tcmõnjashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

³⁵ Nyetscanga chë Lida pueblentse y Saronoca oyenënga chë entsá shnaná tmojáninyë. Y as, chënga bacna soyënga amana tmojtsanajbaná y cach orscana tmojanontsé Bëngbe Utabnábeñe ošbuáchiyana.

Pedro tojanma Dorcas cháuatayenama

³⁶ Chë tempo, Jope puebløca yojaniyena canyë shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyets tempo tsabe soyënga yojánama y yojanamana chë tojtsëjabortënga jujabuáchana.

³⁷ Pero chora, šocana tbojanshache y tojtsanóbana. Tmojtsanbebë chentsana, canyë tsoye tsbanana tsañoca chabe cuerpo tmojtanaajá.

³⁸ Jope inamna Lida bëconana, y Lidentse Pedro yojtsemna; y chë Jope pueblentse Jesucristbeñe ošbuáchiyënga tmojántatsëmbona Pedro choca yojtsemnama. Asna, uta boyabásata tmojanichamó Pedro jauyanama: “Dios-manda, betso Jope puebløye mabo ca.”

³⁹ As Pedro tojëftsantsbaná y chë uta boyabásaftaca tojána. Choye tmojánashjajna ora, tmojanánatse chë Dórcasbe cuerpo yojtsemnoye, tsbanánoca; chora, nyetsca viudanga šachénaca Pédrëbiøye tmojanóbobuashcona y imojtsinýinýnaye chë Dorcas yojuajonaná entsayangá y cmešëjuangá, cabá chëngaftaca yojëftsemna ora.

⁴⁰ Pedro tojanmandá nyetscanga chentšana chamotsebocanama; chora Pedro yojoshëntsamentsiye y Bëngbe Bëtsáftaca ibojencuentá. Chentšana, Pedro chë obanábiøye tbojanonýinýë y tbojaniana: “Tabita, matëtsbaná ca.” As Dorcas tojtanoBuchatëfjona y Pédrëbiøye tbojáninyë ora, tojanótbema.

⁴¹ Chora Pedro tbojanábuacueshache y tbojtantsbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë ínýënga, y Dorcas ainá tojtandinýanýë.

⁴² Chë soye nyets Jope pueblentse tojanótatsëmbona y banga Bëngbe Utabnábeñe imojtsošbuáchiye.

⁴³ Y Pedro baytë Jope pueblentse tojanoquedá, Simón chë bobáchëshiñe trabajayabe yebnentse.

10

Pedro y Cornelio

¹ Cesarea pueblentse inamna canyë boyabása Cornelio ca uabainá; cha inamna chë Italiano ca uabaina soldadëngbe amëndayá.

² Cornelio Bëngbe Bëtsábiøye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcñaye chë judiënga ndbõmnëjëmënga jujabuáchama y sempre Bëngbe Bëtsáftaca ibnëncuentaye.

³ Canyë te, mo bëts mošenana ora, cha botamana tojáninyë mo otjenayoquécá, mëntsá: Bëngbe Bëtsabe canyë ángel Cornelio yojtsemnoye yojtsamashjuana y tbojaniana: —¡Cornelio ca!

4 Cornelio chë ángelbioye ibojtsonyaye y auatjananá tbojanianyana: –Taita, ¿ndayá yojtsemna ca?

Y chë ángel tbojanianyana: –Bëngbe Bëtsá condbétseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye.

5 Chcasana, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse.

6 Cha posada entsebmna inye Simónbentse, chë bobáchëshiñe trabajayabe yebnentse. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

7 Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentšana útata tojánachembo y canye soldádnaca, chabe uajabuachaná, Bëngbe Bëtsá adorayá;

8 lempe ntšamo yojopasacá chënga tojanacuntá y chentšana Jope puebloye tojanichamó.

9 Yëfsana mo nýetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánášëngo, Bëngbe Bëtsáftaca jencuëntama.

10 Becá tbojánishëntsená y jasama yojtseboše; pero imojtsebo-próntantscuana, Pedro mo otjenayoquécá mëntšá tojáninýe:

11 Celoca yojtsatëfna y mo canye bëts entsáyëjuacá yojtsabá y nýets canta sibientšana yojtsëjonýana.

12 Chë entsáyëjuañe imojtsemna nýetscna bayënga, ósjojnaye bayënga y nýetscna shloftšëngnaca.

13 Y tojanuena canye oyebuambnayana mëntšá: –Motsbaná, Pedro; mobaye y quem bayënga mose ca.

14 Chora Pedro tojánayana: –Ndoñe, atšbe Utabná. Atše ndocna te chiyáise Moisesbe leyíñe ndoñe yondëlesenciana jasama bayënga y chë jasama ndoñe tšabá imomna bayënga ca.

15 Y cachiñe tojtétanuena chë oyebuambnayana mëntšá: –Bëngbe Bëtsá tojalesenciá y canye bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

16 Chë soye unga soyama chca tojanopasá chentšana, chë entsáyëjua celoye tojtanátsjua.

17 Pero Pedro ndoñe yontsetátšëmbo ntšamo tojaninýcá ndayá chabiama yojtsayanama. Chëntscuana, chë Cornéliëbe ichmónënga noticiánana Simónbe yebnoca tmojánashhajna y shjoca bëshoca imojtsobátmana.

18 Tmojanchembo ora, tmojanënoticiá Simón, chë Pedro ca uabobainá, chentše taibojatanama.

19 Pedro, ndayá tojáninýama chabosertama yojtsenójuabnantscuana, chë Uámána Espíritu tbojanianyana: “Mouena, muentše mora unga boyabásenga cmontsenguá.

20 Motsbaná, mocana matastjango y yapa ntjatenojubnaycá chëngaftaca cohjá, er atše chënga sënjichamó ca”.

21 As Pedro tojtanastjango y chë tmojánashjajnënga tojanéyana: –Atše sëndmëna chë šmontsenguá cha. ¿Ndáyeca moye šmojabo ca?

22 Chora chënga tmojanjuá: –Cornelio šonjichamó. Cha endmëna chë soldadëngbe amëndayá, canye tšabá mándbomna entsá y Bëngbe Bëtsábioye adorayá, y nýetsca judiënga chabiama tšabá mondbétsoyeuambnaye. Bëngbe

Bëtsabe canÿe ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

²³ As chënga tojanëmashengo y posada tojanëyentsame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentsënga Pedro tmojantjëmbambá.

²⁴ Chë inÿe yëfsana Cesarea puebloye tmojánashajna. Chentše Cornelio Pédrëbiana yojtsoatmana, y Cornelio tojanëbuaja pamíllanga y tsabe amiguëngnaca chentše imojtsemna.

²⁵ Pedro tojánashjango ora, Cornelio tojánbocna jajëbenguama y chabe shecutšentše yoJoshëntsamentšiye cha jadórama.

²⁶ Pero Pédrëna tbojtansbaná y mëntšá tbojanianyana: —Matëtsbaná, atše cach aquëcá nÿe canÿe entšá sëndmëna ca.

²⁷ Pedro Cornélioftaca encuëntaye chë yebnentše tojánamashëngo y ba entšanga tojánanÿena, chentše tmojanótotënga.

²⁸ Chora Pedro tojanëyana: —Cach tšëngaftanga šmondëtatšëmbo chë judiëngbe leyënguiñe endayana ndoñe yondopodena canÿe judío ndoñe judío entšángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿé atše ndocna te šondmëna inÿabiama jatsjuabnayana cháftaca jenútanama ndoñe tsábá yondmëna ca.

²⁹ Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmojobetše ca?

³⁰ As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinÿe atšbe delante canÿe boyabása uabuashinÿinÿana entšayaca bopormaná.

³¹ Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtšëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca.

³² Básefta boyabásenga Jope bëts puebloye michamó y Simón chë Pedro ca monduabobuatmá moye chamuáyatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.”

³³ Chcasna, cachora sënjichamó aca jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

Ntšamo Pedro tojanoyebuambá Cornéliëbe yebnentše

³⁴ Pedro chora tojanontšé mëntšá jóyeuambayama: —Mora atše šontsosertana, ndegombre Bëngbe Bëtsabiama nÿetscanga cachcá uámanënga imomnama.

³⁵ Nÿets luarënguenache Bëngbe Bëtsá júbuajana cha tmojtsatschuaná y tsabe soyënga tmojtsamënga.

³⁶ Tšëngaftanga šmondëtatšëmbo, Bëngbe Bëtsá Israeloca entšanga tojánabuayenama, tsabe noticiënga jtsóyeuambnayëse, chënga nÿetscanga ainaniñe tsabe ebionana chamotsebomnama, Jesucristbeyeca; y cha endmëna nÿetsca entšangbe Utabná.

³⁷ Tšëngaftanga šmondëtatšëmbo ntšamo nÿets Judeoca tonjanopasama. Chë soye Galilea luaroca tojanobojatšé, Juan entšanga yojanabuayiná

orscana, chënga bacna soyënga amana chamotsajbanama y chamuenabayama.

³⁸ Smondëtatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espiritu chabe ainaniñe cháumashënguama, y tojanma Jesús corente obená chaotsemnama; y smondëtatšëmbo ntšamo Jesús enjánana entsangbiana tsabe soyënga amiñe y nyëtsanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

³⁹ “Bënga fsënjáninye y fsëndëtatšëmbo lempe ntšamo Jesús tojanmcá Jerusalenoca y nyëts Judea luariñe; y cha tmonjanóba, canye cruciñe jacruccifcase.

⁴⁰ Pero Bëngbe Bëtsá tonjanma unga tianoye cha cháuatayenama y bëngbeñe chaonñnama.

⁴¹ Cha nyëtsca entsangbe delante ndoñe chenátanbocna, pero aifñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinñama. Y tojtanayenentšana bënga cháftaca fsënjanse y fsënjanošé.

⁴² Cha šonjichamó entsanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiana y ainëngbiana yochjayana tsábá o ndoñe tsábá tmonjamama.

⁴³ Bëngbe Bëtsabe juabna oyebuambnyënga nyëtsanga cach Jesusbiana tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

Ndoñe judiënga chë Uámana Espiritu tmojanóyëngaçñe

⁴⁴ Pedro chë palabrenga cabá yojtsóyebuambnantscuana, chë Uámana Espiritu tojánamashëngo nyëtsca chë imojtsuenanëngbe ainaniñe jtsemándayama.

⁴⁵ Chë judiënga Jesucristbeñe ošbuáchiyënga Pédroftaca tmojánabënga imojenjananá, chë Uámana Espiritu ndoñe judiëngbeñinaca cháumashënguama Bëngbe Bëtsá tojanmama.

⁴⁶ Chënga imojtsuenana chënga inyëtsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

⁴⁷ Chora Pedro tojánayana: “Pero mëngna chë Uámana Espiritu tmonjóyëngaçñe ntšamo bënga tmonjóyëngaçñécá. Chcasna, ndocná queochatobenaye jamana chënga uabáinënga ndoñe chamondësemnama ca.”

⁴⁸ As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

11

Ntšamo Pedro chë Jerusalenoca imojánenefjuana ošbuachiyëngbioye tojanëyana

¹ Jesucristbe ichmónënga y chë Judeoca Jesucristbeñe ošbuáchiyënga tmojántatsšëmbona, chë ndoñe judiëngnaca Bëngbe Bëtsabe palabriñe imojtsošbuáchemna.

² Pero Pedro Jerusalenoye tojesaná ora, báseftanga chabiana ndoñe tsábá tmonjánayana. Chënga imojamna chë juabnyënga, chë ndoñe judiënga ošbuáchiyënga boyabásenga canjánamna chë más delicadentse base bobachtema tëtšenënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca.

3 As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

4 Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana:

5 —Atše Jope pueblaca sënjamna y Bëngbe Bëtsáftaca sënjencuénta ora, mo otjenayoquécá sënjáninÿe celocana mo canÿe bëts entšëjuacá átšbioye enjétsabeconaye y nÿets canta sibiocana enjétsëjonÿana.

6 Y botamana sënjanrrepará ndayá chë tsoye bëtsemnama y sënjáninÿe choye monjëtsemna uamna y tjoca bayënga, ósjojnaye bayënga y nÿetscna shloftšëgnaca.

7 Y sënjanuena canÿe oyebuambnayana mëntšá: “Motsbaná, Pedro; mobaye y quem bayënga mose ca.”

8 Chora atše sënjánayana: “Bëngbe Utabná, ndoñe; atše ndocna te chiyáisece chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.”

9 Chentšana cachinë sëntëtanuena chë celocana oyebuambnayana mëntšá: “Bëngbe Bëtsá tojalesenciá y canÿe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.”

10 Chë soye unga soyama chca tonjanopasá y chentšana chë entšëjuaceloye tontanátšjua.

11 Y cachora unga boyabásenga Cesarea pueblocana ichmónënga, chë posada sëndbomnentšë tmonjánashjajna, atše janguanguama.

12 Y chë Uámana Espiritu šonjanmandá atše yapa ntjanetjuabnacyá chëngaftaca jama; y quem chnënguana Jesucristbeñe ošbuachiyëgnaca átšeftaca tmonjána. Nÿetscanga canÿe entšá Cornelio ca uabainabe yebnoye fsënjánamashjna;

13 y chana bënga šonjanacuntá ntšamo tojáninÿe, cachabe yebnentšë canÿe ángel ibojtsebiatsana y mëntšá tbojaniyana: “Básefta boyabásenga Jope bëts puebloye michamó y moye chamuánatse Simón, chë Pedro ca monduabobu-atmá,

14 y cha cmochanjabuayená ntšamo aca y acbe yebnentšä oyenënga šmochjotsbocá ca.”

15 As, atše jóyebuambayama sënjanbojatšé orna, chë Uámana Espiritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

16 “Chora sënjanenojuabó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espiritu bochanjichmua, tšëngaftangbe ainaniñe jtsemándayama cháuamashënguama ca.’

17 Chcasna, chëngnaca Bëngbe Bëtsá chë Uámana Espiritu tonjatšatá, ntšamo bënga, chë Utabná Jesucristbeñe ošbuáchiyënga, šonjanatšatacá. Y chca, atše ndoñe quetsátmëna canÿe tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

18 Jerusalenoca Jesucristbeñe ošbuáchiyënga chë soyënga tmojanuena ora, ndocá más tmojantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënacá chamuatenójuaboma y chca amana chamotsajbanama, chë nÿetsca tescama yomna tšabe vida chamotsebomnama ca!

Ntšamo Antioquia puebloca tojanobojaťsé, entšanga Jesucristbeñe ošbuáchiyana

¹⁹ Esteban tmojanóba chentšana, tmojanontsé chë Jesucristbeñe inye ošbuachiyëngnaca jatëcamiyama. As chentšana báseftanga yoťsamna bën luarëngoye jtsachetëngana Fenicioye, Chipre y Antioquia luarëngoye, y chenache chënga Jesucristbe soyëngama imojanoyebuambná, pero nye judiëngbiama.

²⁰ Pero báseftanga imojamna Chipre y Cirene luaroquënga, y chënga Antioquia bëts puebloye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase.

²¹ Bëngbe Utabnabe obenana chëngaftaca yoťsemna, y chca, ba entšanga tmojanabjaná bacna soyënga amana y tmojanontsé Bëngbe Utabnábeñe jtsóšbuáchiyana.

²² Jerusalemoca Jesucristbeñe ošbuáchiyënga chë soye tmojántatšëmbona ora, Antioquia luaroye Bernabé tmojanichmó.

²³ Bernabé choye tojánashjango orna, tojáninye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nýetscanga tojanabuayená chamotsiyena nýets ainánaca Bëngbe Utabnábeñe jtsóšbuáchiyëse.

²⁴ Bernabé inamna canye entšá tšabe soyënga amá, chë Uámana Espiritu chabe ainaniñe yoťsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsóšbuáchiyana.

²⁵ Chentšana, Bernabé Tarso puebloye tojána Saulo janguanguama,

²⁶ y tbojáninyëna ora, Antioquia luaroye tbojëťtsanbetše. Antioquia luarentšna canye uata nýetsá Jesucristbeñe ošbuáchiyëngaftaca canýiñe ibojëťsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

²⁷ Chë tempo, básefta Bëngbe Bëtsabe juabna oyebuambnayënga Jerusalemocana Antioquia luaroye tmojána.

²⁸ Chënguentšana canya Agabo ca uabainá tojantsá y chë Uámana Espiritbeyeca tojánayana, mëntšá: “Nýets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora.

²⁹ Tchcasna, chë Antioquia bëts pueblentša Jesucristbeñe ošbuáchiyënga imojenóyeunaye ntsachetšá crocënanëñaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama.

³⁰ Chca tmojanma, y Bernabé y Sáuloťtaca chë crocëñana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

12

Santiago tmojanóba; Pedro tmojanëtame

¹ Chë tempo, rey Herodes básefta Jesucristbeñe ošbuáchiyënga tojánishëche jutámia y jatsetšenama.

² Tojanmandá espadëjaca chamóbama Santiago, Juanbe catšata;

³ y Herodes tojántatšëmbona judiënga chë soye tojanogúsetama; as, cha tojanmandá Pédrëñaca chamutámia. Chca tojanopasá chë levadúraca ndëpormana tandëse sayté, Bashco fiesta ora.

4 Pedro tmojánishache orna, Herodes tojanmandá chamutámiamia, y chë cárceloca soldadënga cantátanga tmojanenajatá cántentse cha chamotsebojanýama. Herodes yojétsejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama.

5 Chcasna, Pedro yojtsétámëna y chë soldadëngna corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiamia.

Bëngbe Bëtsá tojanma Pedro natjëmbana cárcelocana cháuaisebocnama

6 Canýe te yojtsájamna Herodes entsangbe delante Pedro juabocnama. Chë te ibetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bësócana chë utámëniñe imojtsebojanýá.

7 Ndeolpe, Bëngbe Utabnabe canýe ángel tojánbocna, y lempe chë utámëniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojaniana: “Betsco motsbaná ca.” Y cachora chë cadenëjuangá Pédrëbe buacuatšënguentshana tojanatquëcjana,

8 y chë ángel tbojaniana: “Matichëtjo y matóshecochëtjo ca.” Pedro tojanma ntšamo chë ángel tbojaniancá, y chora chë ángel tbojátaniyana: “Mataquëfsayé y šmasto ca.”

9 Pedro utámënocana chë ángel ibojtsëstona, pero ndoñe yontsetátšëmbo aiñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canýe otjénayoca cuaftsemncá ca.

10 Y útentse chë soldadënga imojtsebojanýajana chata tbojánachnëngo y yerëša bësásoye tbojánashjango, chë ndayëša yojanamna tsáshenoye jabocnama; y chë bësásana nýe cachabe ponto yojotëfjo. Chentsana tbojéftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentshana yojtojuánañe.

11 Nýa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentshana y lempe ntšamo judiënga átšeftaca jamama imojuabnámnaca ca.”

12 Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentse banga cánýiñe imojtsemna, Bëngbe Bëtsáftaca encuéntaye.

13 Pedro chë tsashenoica bësásoca tojanchembo ora, canýe oservená, Rode ca uabainá, tojánbocna jarrepárama.

14 Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jáunayama, Pedro bësoca yojtsemna ca.

15 Chë tsoca imojtsemnëngna chora tmojaniana: “¿Opá chectsebocna ca?” Pero chë oservená yojtsichamo ndegombre ca. Y chënga tmojaniana: “¡Chabe ángel ctsemna ca!”

16 Chëntscuana Pedro cabá yojtsechembuana; tmojánëbiatëfjo y tmojáninýe ora, chënga puerte imojenjnaná.

17 Pero Pedro tojánëfjatšëmbo iytëca chamobiamama y tojanacuntá ntšamo Bëngbe Utabná utámënocana tbojánatsbocama. Chentsana tojanéyana: “Ntšamo tonjopasama Santiago y chë Jesucristbeñe inýe ošbuáchiyënga šmochjáunaye ca.”

Chora Pedro chë yebnentšana tojtáisebocna y ínýoye yojáta.

18 Tojanbinýna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa.

19 As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentšana, Herodes Judea luarentšana tojéftsanbocna y Cesarea luaroye tojtsanoñe, y chocha tojtsanoquedañe.

Herodes tojanóbana

20 Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entsanga vida imnabomna Heródesbe luaroca sanángaca.

21 Chcasna, rey Herodes inýe tescama tojánachembo. Chë tena, jóyebuambayama Herodes uámana entsayaca yojtopórma y yojótbema chabe mándaye tbeamentše; chentšana tojanonguamé.

22 Chora entsanga tmojanontsé mëntšá uayebuáchana: “¡Chë entsoyebuambná cha entsá ndoñe quenátsmëna! ¡Chana canýe dios entsemna ca!”

23 Cachora, Bëngbe Bëtsabe canýe ángel tojanma Herodes šocana chaboshachama, chabe cuenta Bëngbe Bëtsá chamuatschuama entsanga ndoñe yonjáuyana causa. Herodes tojanóbana mamángaca sasná.

24 Pero chë tempo más bëtsá entsanga Bëngbe Bëtsabe palabra imojtsueana y Jesucristbeñe imojtsošbuáchiye.

25 Bernabé y Saulo chatbe trabajo tojéftsanma ora, Jerusalenocana Antioquía luaroye tojésanata y Juan, chë Marcos ca uabobuatmá, chátaftaca tmojéftsanbetše.

13

Bernabé y Saulo tbojanbojatsé Bëngbe Bëtsabe trabajo jamama

1 Antioquía luaroca Jesucristbeñe ošbuáchiyënguentsé imojtsemna Bëngbe Bëtsabe juabna oyebuambnayënga y ošbuachiyëngbioye abuatambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cánýiñe Herodes, chë Galileoca réyefraca) y Saulo.

2 Canýe te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espíritu tojánayana: “Mora šmochjaleséncia Bernabé y Saulo tšëngaftangbentšana chabuétsebocnama; chatna canýe traba juama sënjabacá ca.”

3 Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuëntantscuana, chëngbe cucuatšënga chatbe bestšaše juatsboica tmojancjá, chatbe trabajuñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

Bernabé y Saulo Chipre luaroca

4 As Bernabé y Saulo, chë Uámana Espíritbeyeca ichmónata, Seleucia ca uabáinoye tojánata y chentšana bejaycá, Chipre luaroye.

⁵ Salamina bêts puebloye tbojánashjango ora, tbojanontsé Bèngbe Bètsabe palabrama entsanga jábuayenama, chentsa judièngbe enefjuana yebnènguenache. Juan Marcos mo chatbe uajabuachanacá ibojtsebomna.

⁶ Nÿets chë luarèjana tmojánachnèngo orna, Pafos puebloye tmojánashjajna; y chentše tmojáninÿena canÿe judío tatsëmbuá, Barjesús ca uabainá. Cha yojánichamo cha canjamna canÿe Bèngbe Bètsabe juabna oyebuambnayá ca, pero ndoñe chca yonjamna.

⁷ Chë tatsëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bèngbe Bètsabe palabra jouenama; as tojanmandá Bernabé y Saulo jobiatšana.

⁸ Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyènga imojanošbuachecá.

⁹ Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatsëmbuábioye yejuana ibojonÿinÿiye,

¹⁰ y tbojaniyana: “¡Abuambnayá, puerta bacna entsá, Satanasbe uaquiñá y tsabe soyènga ndoñe chaondëtsebínÿnama trabajayá! Bèngbe Utabnabe nÿetsca ndegombre soyèngama aca contsichamo uayátsenaye soyènga yojtsemna ca.

¹¹ Mora, Bèngbe Bètsá cmochanjacastíga, jtaná cochanjoquéda y baseftayté jinÿama quecochatobenaye ca.”

Cachora Elimas mo ibetiñcá yojoquéda y ibojtsonguaye canÿa buacuetèntšnana chabuánatsama, jtaná yojtsemna causa.

¹² Chë mandado chca tojáninÿe ora, Jesucristbeñe yojtsošbuaché y yojenjananá Bèngbe Utabnabe soyènga tojanatsjinÿama.

Pablo y Bernabé Antioquía pueblentse, Pisidia luaroca

¹³ Pablo y chabe enutènga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalemoye tojésanshècona.

¹⁴ Pergentšana Antioquía puebloye tbojátanata; chë pueblo inamna Pisidia luare béconana. Chentsna, ochnayté, chë judièngbe enefjuana yebnoye tbojánamashèngo y tbojanótbema.

¹⁵ Moisesbe leyíñe y Bèngbe Bètsabe juabna oyebuambnayèngbe uabemana librèšangañe tmojanalía orna, chë enefjuana yebnentša mándayènga canÿa tmojanichmó chènga jáuyanama: —Israeloquènga, bènga fsèntseboše entsanga chašmabuayená, nderado ndayá jayanama šmojtsebonnèse, muentša entsanga añemo chamotsebomnama ca.

¹⁶ As Pablo tojantsá y entsángbioye cucuátseca tojánéjatsëmbo iytèca chamobiamama, y tojánayana: —Smochjouena Israeloquènga y ndoñe judiènga Bèngbe Bètsá adórayènga.

¹⁷ Israeloca entsanga mondadorana Bètsá, Bèngbe Bètsá, bèngbe bêts tai-tanga tojanèbuáyana, y tojanma chènga corente bètscanga chamotsemnana, chènga Egiptoca inÿe luarocana ashjajnèngcá imojoyena ora. Y chentsana, cachabe obenánaca chë luarocana chènga tojésanèbuacana.

¹⁸ Canta bnètsana uata nÿetsá, Bèngbe Bètsá entsanga ndoyena luaroca chènga yojanèuantana,

19 y cha tojanma chë Canaán luaroca canýsëftentša entsanga chamopochocama y bëngbe bëts taitanga chëngbe fshantsënga nduiñënga tojánabiamá.

20 Chë tempo, chë Bëngbe Bëtsá Abrahámbioye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentsána, Bëngbe Bëtsá chëngbiamá mandadënga tojánabiamá, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana.

21 Chentsána, Israeloquënga Samuel tmojanimpadá canýe rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquíñá y Benjaminbe bëts pamillanguentšá.

22 Más chcoyna, Bëngbe Bëtsá Saúlbioye chë mándayentšana tbojtsanjuaná, y chentsána Davidbioye mo chëngbe reycá tbojánbema. Chabiamá Bëngbe Bëtsá tojánayana: ‘Atše sëndëtatšëmbo, David, Isaíbe uaquíñá, canýe tšabe entšá yomnama y chama atše sëndoyeuá, y cha sempre endëprontana ntšamo atše stseboščá jtsamama ca.’

23 Davidbentsána canýe entšá Jesús enjamna, nda Bëngbe Bëtsá tbojanichmó Israeloca entsanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá.

24 Cabá Jesús ndëbocna ora, Juan nyetsca Israeloquënga tojanabuayená bacna soyënga amana chamotsajbanama y chamuenáabayama.

25 Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átsbentsána echanjabo canýa, y atše mercedo taitatobuajoñe ni mo jotsejbiyama chabe she-cohëtjonëshentša corriëja jajafjonama ca.’

26 “Chcase morna, Abrahámbentsána entsanga y ndoñe judiënga Bëngbe Bëtsá adórayënga; bëngbiamá entsemna quem buayenana soye, chë Bëngbe Bëtsá entsanga játsebacana.

27 Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusale- nentša oyenënga y chentsána mándayënga ndoñe quenjátanësertana nda Jesús bëtsemnama, y chë tmojtsalía soyëngama cach ndoñe. Y chca, chënga Jesús chamóboma tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá.

28 Y masque ndocna bacna soye tmonjáninyëna Jesús jóbana chabotsem- nama, Pilato tmojanimpadá chaomandá chábioye jóbama.

29 Chentsána, lempe ntšamo Bëngbe Bëtsabe uabemana palabrenguiñe iuayancá Jesúseftaca tojanochnëngo ora, chabe ústonënga chë cruzocana tmojtanëstjango y tmojanatbontsá.

30 Pero Bëngbe Bëtsá tojanma Jesús cháuatayenama.

31 Chë Galileocana Jerusalenoye cháftaca tmojánanga, baytentscuana Jesús yojánebëbuacana; y morna, lempe ntšamo Jesusbiamá tmojaninýcá, chënga entšángbeñe montsoyebuambná.

32 “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá,

³³ cha tonjama, bënga chë chëngbe entšanguentsëngbiana, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrënguiñe, segundo salmentše mëntšá tojanábema, ntšamo Bëngbe Bëtsá Jesúsbioye tbojaniyanama:

Aca atšbe uaquiniá condmëna.

Mënté entšanga sënjinÿanjë aca atšbe Uaquiniá comnama ca.

³⁴ Y tempo Bëngbe Bëtsá chabe uabemana palabrënguiñe tojaninÿanjë cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo David sënjansbuachenacá,

tšëngaftanga cbochanjátšataye ca.

³⁵ Inÿoca Bëngbe Bëtsabe uabemana palabrënguiñe, Salmos librëša uabi-amnayá, mëntšá tojanábema ntšamo Jesús Bëngbe Bëtsábioye tbojaniyanama:

Aca ndoñe queochatslesencia atšbe cuerpo,

chë acbe Uámana oservenabe cuerpo chaotsopochocama ca.

³⁶ David, chabe tempo imojoyenëngbiana tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbioye tmojanëtabuantsá luarentše, y chabe cuerpo tojanopochocá.

³⁷ Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

³⁸⁻³⁹ “Asna, baconga y batanga, atše sëntseboše tšëngaftanga quem soye chašmotsetátšëmbo; Ndayá Jesús tojanmama, entšanga chëngbe bacna soyëngama perdonánënga montsemna. Jesús beyeca, nÿetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyíñe iuayancá tmojanmama, chënga ndoñe tmonjanobená chca perdonánënga jtsemnana; nÿe Jesúsbeñe jtsošbuáchiyëse chënga perdonánënga jtsemnana.

⁴⁰ Cuedado šmochtsebmna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama.

⁴¹ Bëngbe Bëtsá mëntšá tojánayana:

Smochjouena. Tšëngaftanga chë ntšamo atše tijayancá šmojtšábotenga, ojanánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema, y masque ndánaca chë soyëngama chacmojtšacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

⁴² Pablo y chabe enutënga chë judiëngbe enefjuana yebnentšana tmojëftsanbocna ora, chë ndoñe judiënga chëngbioye tmojanaimpadá, chë inÿe ochnaytescama chë soyëngama más jábuayenama.

⁴³ Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanëseto. Y chatna chënga tmojanabuayená nÿets tempo chamotsejuabnama, Bëngbe Bëtsá chëngbiana tšabe soyënga yojtšamama.

⁴⁴ Chë inÿe semana, chë ochnaytena, nÿa mo nÿetsca chë pueblentše oyeñënga tmojanobeconá Bëngbe Bëtsabe palabra jouenama.

⁴⁵ Pero ba entsanga choye jouenama tmojánama chë judiënga tmojáninye ora, tmojanotjayaná, ba entsanga Pablo imojtseyeunanama; as chënga tmojanontsé mocá ichámuana ndayá cha yojtsoyebuambnama, y chábioye oyen-guayana.

⁴⁶ As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmommënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiana ndoñe tšabá yontsemna chë nyetsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama.

⁴⁷ Er Bëngbe Bëtsá chama šjanichamó, mëntšá jauyanëse:

Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiana cochántsemna mo canye binÿnayacá.

Chca, ácbeyeca nyets luarënguenache entsanga atše chanjatsebacá ca.”

⁴⁸ Chë ndoñe judiënga chca tmojanuena ora, puerta imojtsoyëjuaye y tmojanontsé mëntšá ichámuana: “Bëngbe Utabnabe palabra tšabá bëngbiana entsemna ca.” Y chora, chë nyetsca tescama yomna tšabe vida jtsebomnana Bëngbe Bëtsá tempo tojánabacacanga, tmojanontsé Jesúsbeñe jtsošbuáchiyana.

⁴⁹ Y chca, nyets chë luariñe más entsanga Bëngbe Bëtsabe palabra imojtsue-nana.

⁵⁰ Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama.

⁵¹ As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio puebloye tbojtsanoñe.

⁵² Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemándaye.

14

Pablo y Bernabé Iconio puebloca

¹ Iconioca, Pablo y Bernabé cánÿiñe tbojánamashëngo chë judiëngbe ene-fjuana yebnentše y corente obenánaca Bëngbe Bëtsabe palabra tbojanoye-buambá. Chíyeca, ba judiënga y ndoñe judiënga Jesucristbeñe imojtsošbuaché.

² Pero chë judiënga Jesucristbeñe ndošbuáchiyënga, chë ndoñe judiëngbioye tmojanayënjaná, Pablo y Bernabebiana podesca chamotsejuabnama.

³ Chíyeca, Pablo y Bernabé bayté chentše tbojanototoná y nduatjca Bëngbe Utabná Jesucristbiana tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entsanga tojaninÿanÿé, ndayá chë ichmónata ibojtsoyebuambnacá ndegom-bre bëtsemnama, chë Bëngbe Bëtsá nyetscanga iuababuánÿeshanana.

⁴ Pero nyetsca chë pueblentša entsanga ndoñe cachcá imontsejuabnaye; inÿenga chë judiëngaftaca imojtsemna, y inÿengna chë Jesucristbe ich-monátaftaca.

⁵ As, chë judiënga y ndoñe judiënga chentša mandayëngaftaca tmoja-nenoyeuná chata jtsatsetšenama y ndëtšbéngaca jtsëbáyama.

⁶ Pero Pablo y Bernabé chama tbojántatšëmbona orna, tbojtsanëchañe Listra y Derbe puebloye, Licaonia luaroca, y choca chábuañe luarëngoye;

7 y chë luarënguenáchnaca, chata Jesucristbe tšabe noticiënga entšanga tmojanabuayená.

Listra pueblaca, ndëtsbéngaca Pablo tmojtsanatëchënganja jtsóbama

8 Listra pueblaca inamna canÿe boyabása jama ndobená. Ndocna te yon-dobena jana, chca cosheto inónÿna causa. Chë boyabásana yojtsetbemana

9 ouenana ntšamo Pablo yojtsichamcá. Y Pablo chábioye tbojanonÿinÿé ora, tojántatšëmbona chë šocá tša yojtsošbuáchema, shnaná jtsatsmënama;

10 as Pablo, juayebuáchenëse tbojanianya: “¡Motsbaná y acbe shecu-atsšëngaca tšabá motsa ca!”

Chora chë boyabása, canÿe jontsënjëse tojantsá y yojóntša anana.

11 As chë entšanga, ndayá Pablo tojanmcá tmojáninÿe ora, tmojanontšë uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátšma mo entšatcá ca!”

12 Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inÿe diosëngbiam a oyebuambnayacá. Páblëbioye chca imojtsábobuatma, er cha más yotsoyebuambná.

13 Zeusbiam a chentša bachna inabomna canÿe yebna chë pueblo chaboca, chábioye jadórama. Chë bachna, uacnënga tojanënatsë y uantšëfushangá tojanëyamba chë Zeus jadórama yebnentša amashjuanoye; y cha y chë entšanga imojtseboše chë uacnënga jashebuáyana y jajuinÿiyana, chca, chë ichmonátbioye jadórama.

14 Bernabé y Pablo chama tbojántatšëmbona ora, entšayá tbojtsa-nenántšajatanëca, entšanga jinÿanÿiyama, ntšamo chënga imojtsamcá chata tondaye yonjógusetama, y tbojëftsantjajo entšangbe tsëntsajana y mëntšá ibojtsaychembumbuana:

15 “Baconga y batanga, ¿ndáyeca chca šmojtsama ca? Bëndata cach tsëngaftangcá entšata fsëndmëna. Muentšë bëndata fsëntsemna nÿe jábuayenama Bëngbe Utabná Jesucristbe tšabe noticiënga, tsëngaftanga chë quem ndoservena soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nÿetsca béjayënga y lempe ntšamo chenache yobinÿncá.

16 Masque tempo, Bëngbe Bëtsá entšanga tojanalesenciá cada ona chaoma ntšamo tojtsejuabnacá, tšabá cachëngbiam a yojtsémnayeca,

17 Bëngbe Bëtsá ndocna te ntjájbanana tsëngaftanga jtsinÿanÿinayana, cachá tojama tšabe soyëngaca, mocna Bëtsá cha yomnana. Cha endama tsëngaftangbiam a chauaftema y chë matënga botamana chaoshájonama, y becá saná cmondatsatná; y cha endama tsëngaftangbe ainaniñe corente oyejuayana chašmotsebomnama ca” —chata tbojánayana.

18 Masque chë soyënga tbojánayana, nÿe batšatema más bën y ya ndoñe matbëñjanobenata chë entšanga jtsëuyanana uacnënga jashebuáyama, chca, chátbioye jadórama.

19 Chca ora, béšëfta judiënga tmojánashjajna Pisidioca, Antioquíocana y Iconiocana, y chentša entšangbioye tmojanayëñjaná, Jesucristbe ichmonatbe contra chamotsemnana. Chcasna, Pablo ndëtsbéngaca imojtsénanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca.

²⁰ Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë pueblöye tojtesaná; y chë yëfsana, Bernabéftaca Derbe pueblöye tojána.

²¹ Derbe puebloca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiöye.

²² Chë luarënguenache chata ibojánana chë Jesucristbe ustonëngbiöye atañémuaye, cada te chábeñe más chamotsošbuáchema. Y entšángbiöye tmojanéyana: “Bëngbe Bëtsabe amëndayöye jamashënguamna, bënga šontsamna quem luarentše bëtscá jëftsepadecénana ca.”

²³ Njetsca ošbuachiyëngcá neffjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentšana, cachënga chentša ošbuachiyëngbiöye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuënta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnama, ndábeñe chënga imojtsošbuaché.

Pablo y Bernabé, Sirioca Antioquia pueblöye tbojtanata

²⁴ Pisidia luarëjana tbojánachnëngo ora, Panfilia luaröye tbojánashjango.

²⁵ Perge pueblentše Jesucristbe tšabe noticiënga entšángbiöye tmojanabuayená, y chentšana Atalia pueblöye tbojánata.

²⁶ Chentšana, Bernabé y Pablo, bejaycá tbojtanata Sirioca Antioquia pueblöye. Chentša entšanga Bëngbe Bëtsá tmojanimpadá chata chabe cucuatšinë chabotsemnama, chë trabajuiñe chaotsanýenama; y chorna, chë trabajo ya tbojanpochocá.

²⁷ Chöye tbojtanashjango ora, njetsca Jesucristbeñe ošbuachiyëngbiöye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninýanýé, chë ndoñe judiëgnaca chamotsobenama Jesucristbeñe jtsöšbuáchiyama.

²⁸ Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

15

Ichmónënga y bëtsëjemëngcá mándayënga Jerusalemoca tmojánenefjna jencuëntama

¹ Chë tempo, báseftanga Judeocana áshjajnënga tmojanontsé, Antioquia pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyinë endayancá, ndoñe quenátopodena tšëngaftanga atsebácánënga jtsemnama ca.”

² Chiyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y inýënga Jerusalemöye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

³ Chcasna, chë Antioquioca imojánenefjuana Jesucristbeñe ošbuáchiyënga Jerusalemöye chënga tmojanichamó. Fenicia y Samaria luarëjana imojtsachnéjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtsanajbanama y chora Bëngbe

Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

4 Pablo y chë inyënga Jerusalemoye tmojánashajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbiyoye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá.

5 Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentse base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

6 As, chë Jesucristbe ichmónënga y bëtsëjemëngcá mándayënga tmojánenefjna jencuentama, chë ndoñe judiënga aife o ndoñe yonjánamnama chë más delicadentse base bobachtema tëtšenënga jtsemnana, ntšamo chë judiënga imojanamancá.

7 Bën y bëtscá chënga tmojanencuentá chentšana, Pedro tojantsbaná y mëntšá tojanëyana: “Jesucristbeyeca catšátanga, tšëngaftanga šmondëtatsëmbo, ya baytë entsemna Bëngbe Bëtsá tšëngaftangbentsana atše šonjanábuayana, Jesucristbe tsabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema.

8 Bëngbe Bëtsá jtsetatsëmbuana lempe ntšamo entsanga tmojtsejuabnacá. Y cha šonjaninýanýé, chë ndoñe judiëngnaca inmobenana chabe entsanga jtsemnana, chábeñe tmojtsošbuáchese, chë Uámama Espíritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmca.

9 Y chca, Bëngbe Bëtsabiamana nyëtscanga cachcá monduámama, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tsabe juabna chamotsebonnama, Bëngbe Bëtsabe palabriñe jtsošbuáchiyëse.

10 Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda inýabiye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsoobenana jocúmpliana.

11 Y chca ndoñe chaondëtsemna. Bënga mondošbuaché bënga atsebácanënga imomnana Bëngbe Utabná Jesús chabe tsabe juabna šojaninýanýeyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

12 Chorna, chentše imojtsemna entsanga nyëtscanga iytéca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entsanga jinýanýiyama, y inýe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmca.

13 Chë útata jóyebuambayama tbojanpochocá ora, Santiago mëntšá tojánayana: “Jesucristbeyeca catšátanga, šmochjouena:

14 Simón šonjabuayená ntšamo Bëngbe Bëtsá natsana tojaninýanýé, chë ndoñe judiëngnaca cha iuanýenama, y chíyeca cha chënguentšana banga tojubuáyana chabe entsanga chamotsemnana.

15 Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrénguiñe endayancá, mëntšá:

16 Chentšana atše chanjésabo y chë Rey Davidbe pamíllanga cachiñe uámanënga chantabiama; mo nda canye uáshajayena yebna tojëtsjebcá, atše, Davidbe pamíllanga cachiñe uámanënga chantabiama;

17 chca, chë inye entsanga chamonguango ndayá jamana atše, tšëngaftangbe Utabná, más chašmotsábuatmama, nyetsca ndoñe judiënga, chë atšbe entsanga chamotsemnama atše tijábacacanga.

18 Chca atše, tšëngaftangbe Utabná sentsichamo, nda ya bayté entsemna tonjanma entsanga chë soyënga chamotsetatšëmbuama ca —chiñe endayana.”

19 Chentšana Santiago mëntšá tojanëyana: “Chíyeca atše sëntsejuabná, bënga ndoñe šontsamna chë ndoñe judiëngbiama jamana más totcá chaotsemnama Jesucristo jtséstonama.

20 Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entsanga tmojuabná diosënga yomna ca jadórama tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tšešana bayëngbe mëntšena, y buiñe cach ndoñe ca.

21 Er chë natsana tempënga orscana, nyetsca pueblënguenache mondmëna chë Moisés tojëftsanayana soyënga entsángbioye abuayinyayënga; y chabe leyënga, nyetsca ochnayté mondbetsaliaye chë bënga judiëngbe enefjuana yebnënguenache ca” —cha tojanëyana

Chë Jerusalenoca ichmónënga y bëtsëjemëngcá mándayënga canye tsbuanácha tmojanichmó chë ndoñe judiëngbiama

22 Chentšana, chë Jesucristbe ichmónënga y bëtsëjemëngcá mándayënga, nyetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše.

23 Y chëngaftaca canye tsbuanácha tmojanichmó, y chiñe mëntšá yojétsayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá saludoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

24 Bënga fsëntsetatšëmbo bëngbentšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnama.

25 Chcasna, bënga fsënjenoyeuná y šonjúnynana tšabá yojtsemna báseftanga bënguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama.

26 Chë útatna ba soye tbojotsbocá vida jáshbiana, Bëngbe Utabná Jesucristbiana oservëniñe.

27 Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama.

28 Chë Uámana Espíritu y bēnga cachcá fsēntsejuabná, bēnga ndoñe sōntsamna tšēngaftanga jamēndana bētscá jabuache mandēnga Moisesbe leyēnguīñe chašmotocumplínama. Nye quem uámana soyēnga chiñe aīñe cmōntsamna jtsobedecēnana:

29 Ndoñe šmattsesaye mēntšena, chē ndaye soyēnga entšanga tmojuabná diosēnga yomna ca jadórana tmojóba bayēngbiana; ndoñe šmatjofsiye buiñe, ni šmatjase tsešana bayēngbe mēntšena; y shembásenga y boyabásengaftaca bacna soyēnga ndoñe šmattsama. Chē soyēnga ntšamcá, tšabá šmochanjama.

Bēngbe Bētsá salúdoca chacmotsábouamna ca —chiñe yojétsayana.

30 Chcasna, chē quem Jerusalenocana ichmónēnga tmojésanodiošoftanentšana, Antioquía pueblōye tmojána; y chocna, nyētsca chē Jesucristbeñe ošbuachiyēngbiōye tmojanēbuaja y chē tsbuanácha tmojanayentšbuaché

31 Chē Antioquía pueblentša Jesucristbeñe ošbuachiyēnga ntšamo chē tsbuanáchañe yojtsabemancá tmojanalía ora, bēts añemo tmojtanca y corente imojtsóyejuaye.

32 Judas y Silas Bēngbe Bētsabe juabna oyebuambnayata ibnamna; as, chátnaca chē chentša Jesucristbeñe ošbuachiyēngbiōye ba soyēnga tmojanēyana, chēnga añemo chamotsatsbomnama y Jesucristbeñe corente chamotsošbuáchema.

33 Chentšana baseftaytese, chentša Jesucristbeñe ošbuachiyēnga chēngbiōye tmojtanadiošoftá, chē ndēmuanýenga tmojanichamóngbiōye jtama.

34 Pero Sílasna tšabá ibojtsinýana cachentše más jéftsajētanama.

35 Pablo y Bernabé baseftayshinýe Antioquía pueblentše tbojanototoná y ba inýengaftaca Bēngbe Utabná Jesucristbe tšabe noticiēnga entšanga tmojanabuatamá y tmojanabuayená.

Pablo cachiñe inýe luarēngoye tojána, Bēngbe Bētsabe trabajo jamama

36 Chentšana baseftaytese, Pablo Bernabébiōye tbojaníyana: “Bēngbe Utabnabe palabra tbojanabuayená luarēngoye bochjésa, choca Jesucristbeñe ošbuachiyēnga jábuachama y jányama ntšamo imojtsemnama ca.”

37 Bernabé yojtseboše, Juan chē Marcos ca uabobuatmábíōye chátaftaca jéftsbetšama.

38 Pero Páblēna ndoñe tšabá ibontsinýana cha jéftsbetšana, er Juan chátbentšana tojtsanojuánañe Panfilia luarocana, y ndoñe tonjanatjēmbambá, Bēngbe Bētsabe trabajo japochócantscuana.

39 Y chē palabrama tondaye tbojanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojéftsanbetše, y bejaycá Chipre luaroye tbojánata;

40 y Páblēna, Silas tbojanábuayana jéftsbetšama. Chē Antioquía pueblentša Jesucristbeñe ošbuachiyēnga Bēngbe Bētsá tmojanimpadá Pablo y Silas Bēngbe Utabnabe cucuatšíñe chabotsemnama, chatbe trabajuiñe chaotsanýenama. Chentšana, Pablo Sílaseftaca tbojánbocna y

41 Siria, Cilicia luarēnguējana tojánachnēngo entšanga añemo atšatnaye, chē luarenache enefjuana ošbuachiyēnga Jesucristbeñe más chamotsošbuáchema.

1 Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiná y chabe taitana griego entśá inamna.

2 Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná.

3 Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nýetsca judiënga innatátšëmbo Timoteobe taitá griego inamnana.

4 Chë ibojtsachnějuana pueblënguenache chata ibojtsana Jesucristbeñe ošbuachiyëngbiyoe abuayinaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá.

5 Nýets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsošbotena.

Pablo mo otjenayoquëcá canýe Macedonioca entśábioye tbojáninýe

6 Chë Uámana Espiritu, Pablo y Silasbiyoe tojaninýanjé, chata ndoñe yontsanamna Asia luaroca Bëngbe Bëtsabe palabra entśanga jábuayenana; asna, tbojánachněngo Frigia y Galacia luarëjana.

7 Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espiritu tojanabuayená choye ndoñe chabondëtsama.

8 Misia luarëjana tmojánachněngo ora, Troas luaroye chënga tmojána.

9 Chë te ibeta, Pablo mo otjenayoquëcá tojáninýe canýe Macedonioca boyabása ibojtsebiatsana y mëntśá ibojtseimpadana: “Diosmanda Macedoniyoe mabo y šmabëjabuache ca.”

10 Pablo chca tojáninýe y cachora lempe tmonjanprontá Macedoniyoe jama. Atšnaca, chë quem soyënga uabiamnayá, chënga sënjëtšatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entśanga jábuayenama.

Pablo y Silas Filipos puebloca

11 As, Troasentšana bejaycá fsënjána Samotracia luaroye, y yëfsana Neápolis pueblöye,

12 y chentšana Filipošoye. Filipos enjamna canýe uámana bëts pueblo Macedonioca y bëtscá romanënga oyeñiñe. Chë luarentše baseftayté fsënjanouquedanga.

13 Canýe ochnaytena, chë pueblentsana fsënjëftsanböcna y chë fshájaye tsachoye fsënjána. Fsënjanuena chentše canjamna canýe luare Bëngbe Bëtsáftaca jencuëntama ca, y fsënjána janguanguama. Fsënjáninýena ora, chentše fsënjanotbiana y Bëngbe Bëtsabe palabra fsënjanoyebuambá chentše tmojanójoto shembásëngbiana.

14 Enjamna canýe shembása, Lidia ca uabainá, Tiatira pueblócá, y cha enjamna uámana uabuángana uafjatsenga entśayá uená. Cha inamna Bëngbe Bëtsábioye adorayá y chentše Páblëbiyoe ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambncá, Jesucristbeñe chaotsošbuáchemá.

15 Cha y chabe yebnentše oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átšbentše chašmoquedama ca.”

Y sonjanětarié bënga chentše joquédama.

16 Canye te, chë Bëngbe Bëtsáftaca encuéntaye luaroye fsënjétsajna orna, šonjanëbiatše canye tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojánócafe, chë tobiáše yojanmalisiaye soyëngama.

17 Chë tobiáše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservénënga y tšëngaftanga cmontsabuaiyina ntšamo Bëngbe Bëtsá yobena tšëngaftanga játsebacama ca!”

18 Y bayté chca enjanchembumbuana; chë causa, Pablo bonjétssetana y cabana, tonjanobuértana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

19 Pero, chë bayëjbe juabna chábenšana tojésanbocnama y chëngbiamá más crocénana jabemama chora chë tobiáše ndoñe yontsobenama, chë tobiáše nduiñënga tmojáninje ora, Pablo y Sílasbioye tmojánishëche y tmojtsanasjo-ye plazoye, mandayëngbioye.

20 Chë mandayëngbioye tmojanënatse ora, chënga mëntšá imojtsichamo: “Quem boyabásata judío entšata bondmëna, y muatbe causa bëngbe pueblentša entšanga montsenbouenana,

21 y bontsabuatabá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnatamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

22 Chora chë entšanga tmojanontsé uayebuáchana; as, chë mándayënga tmojanaméndá chata entšayá jtsëtsejquécana y niñëfjéngaca jtsachebuánganjana.

23 Jabuache tmojanachebuánganjentšana, cárceloye tmojanautame y chë utámenënga shanýá tmojanmandá yejuana chaotsabuajënyama.

24 Chca tmojanmandá ora, chë utamianá chata tojanënatse chë más tsoye utámenoye y shecuatšentšana tsbuanësiñe tojanatsebuá.

25 Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inje utámenëngna chca imojtsuenana.

26 Ndeolpe, corente jabuache yojtsëbánjua y chë utámena yebna fshantso-cana yojtsábonjnaye. Cachora, nyetsca chë utámenentša bëšašangá tojantëfjo y nyetsca utámenënga chë cadenëjuangá yojtsayentšjafjona.

27 Pero chë utámenënga shanýá tojanofšená y chë utámenentša bëšašangá yojtsatëfjnama tojáninje ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama.

28 Pero Pablo tbojánbochembo: —¡Acbe cuerpo ndocá matenábomana; nyetscanga camuentše fsëndëtsomñe ca!

29 Asna, chë utámenentša shanýá canye uajuinýanësha tojanëyá y chë utámenoye ochamanana tojánamashëngo y auatja causa ngmëmnyá Pablo y Sílasbe shecuatšentše yojoshëntsamentšiyë.

³⁰ Chentsana tojtanëbuacna y tojanëyana: —Señórata, ¿ndayá šojtsemna jamama atše atsbocaná jtsemnama ca?

³¹ Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

³² Y cha y nyëtscanga chë yebnentše imojtsemnënga, Bëngbe Utabnabe palabra tmojanabuayená.

³³ Cach ora chë ibeta, chë utamianá chata tojanënatse chë lisianënguñe jetsajabiana. Chentsana, cha y chabe pamíllanga tmojánenabaye.

³⁴ Chentsana, chë utamianá chata tojanënatse chabe yebnoye y saná tojanacaredadó. Cha y nyëtscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchemá.

³⁵ Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama.

³⁶ Chë utamianá Páblëbioye tbojaniyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

³⁷ Pero Pablo chë soldadënga tojanëyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinýanýiye ora, y cárceloje šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

³⁸ Chentsana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsuatja.

³⁹ Chcasna, cach mándayënga tmojána chata perdón jatëtejañama; chentsana tmojtanëbuacna y tmojanëyana: “Diosmanda, muentšana inýe luaroye motsoñata ca.”

⁴⁰ As chata chë utámenentšana tbojëftsanbocna y Lídiëbe yebnoye tbojëftsanata. Chentsna, Jesucristbeñe ošbuáchiyëngaftaca tmojánenefña y chata tbojánayana soyëngaca chëngbioye tmojanañemó. Y chentsana, chata ínýoye tbojtsanoñe.

17

Tesalónica pueblaca, Pablo y Silasbioye ndoñe tšabá tmonjanëbuaja

¹ Pablo y Silas inýe luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna innabomna chënga jénefnama.

² Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrenguñe iuayana soyëngaca,

³ chënga yojanabuayiyiná y ndegombre yojaninýanýná, Bëngbe Bëtsabe Uámana Uabuayaná jóbanama y chentsana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiana atše cbontsabuayiyiná ca.”

⁴ Judiënguentsana báseftanga chiñe imojtsošbuáchiye y Pablo y Silas tmojanéseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca.

⁵ Pero chë judiënga ndošbuáchiyënga chca tmojáninýe ora, puerte envidia imojtsebmna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyëtsca chë pueblentsa entšanga chamotsenbouénanama; y canýe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšifne jabáshejuanama.

⁶ Pero chentše ndocná tmonjáninýena; as chë entšanga Jasón imojtsejjoye y chentša mándayënga imojétsemnoye tmojanánatse y Jesucristbeñe inýe ošbuachiyëngnaca choye tmojanënatse, y mëntsá imojtsáyebuache: “¡Chë boyabásata, chë ndëmuanyáta ibojtsama nyëtsca luarentša entšanga chamuenbouénanama, quem luaróynaca tbojabo,

⁷ y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguifne ndoñe quenatslesenciancá, er chënga montsichamo inýe rey canmëna, Jesús ca, y cha, César chë Romoca mandadbe cuenta nyëtscángbeñe yojtsemánda ca!” —chënga imojtsáyebuache.

⁸ Chë entšanga y chë pueblentsa mándayënga chca tmojanuena ora, corente imojnbouéna.

⁹ Pero Jasón y chë inýenga, cháftaca imojtsemnënga, crocénana tmojtanjajó, y as tmojtanabáshejuana.

Pablo y Silas Berea Puebloa

¹⁰ Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts pueblloye chabuétseboचना. Y chata choye tbojánashjango ora, chë judiëngbe enefjuana luaroye tbojánata.

¹¹ Chentša judiënga imojamna más tsabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jsetatšëmbuama, ntšamo Pablo y Silas ibojtsëtsëtsnacá aifne o ndoñe ndegombre yojtsemnama.

¹² Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca.

¹³ Pero, Pablo Bereoca chë Bëngbe Bëtsabe buayenana soyama entšanga yojtsabuayiyinama chë Tesalonicoca judiënga tmojántatšëmbona ora, chënga choye tmojána y tmojanma chentša entšanga chamuenbouénanama.

¹⁴ Chcasna, banga Jesucristbeñe ošbuáchiyënga tmojanma cachora Pablo chentšana chauétseboचना y bėjaye tsachoye chaotsoñama; chëntscuana, Silas y Timoteo Bereoca tbojanoqedá.

¹⁵ Pablo tmojantjëmbambá entšangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená chamuauishéconama Silas y Timoteo jaúnayama betesco jtsayana, Pábloftaca jataninýenama.

Pablo Atenas puebloa

¹⁶ Pablo Atenas bëts puebloa Silas y Timoteo yojtsëbatmanëntscuana, puerte tbojanongmé, er cha tojáninýe chentša entšanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca.

17 Chiyeca, chë judiëngbe enefjuana yebnentse, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanyënga chentse imojanashjajuanëngaftácnaca.

18 Y báseftanga, ntšamo jtsejuabnayama entšanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Chëyënga imojtsichamo: “¿Ndayama quem bostero yojtsoyebuambná ca?” Y inyënga: “Chana inye luarëngoca entšangbe diosëngbiana muentše entsabóyebuambnaye ca.”

Chënga chca imojtsichamo, er Páblëna Jesusbiana y chë obanënga jtayenama yojanoyebuambná.

19 Asna, chentša entšanga cha tmojanánatse canye luaroye, entšanga jénefnama y oyeuambnayënga joyaunayama luare, Areópago ca uabáinoe. Chentse imojanamana uámanënga jénefnana, nderado ndabiana jayanama tsábá o ndoñe tsábá tonjamama. Chora Pablo tmojantjá: —¿Chë aca contsabatambá soyënga ndayá bétsayanana bënga quefstsobena jtsetatšëmbuama ca?

20 Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bétsayanana.

21 Er nyetscanga Atenasentša oyenënga y inye luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

22 As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entšanga: ntšamo bominye sënjajajcá, atše sëntsetatšëmbo tsëngaftanga ba diosënga puerte šmayaunana y šmadoránama.

23 Atše sëndánrreparana tsëngaftangbe diosënga šmétsadorana luarënguenache y sënjinýena canye altar y chentše mëntsá iuábemana: “Chë Bëtsá nduabu-atmabiana ca”. Y morna, chë Bëtsá chë nda ntsabuatumcá šmadoránabiana, atše cbontsabuayiyná.

24 “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórana entšangbe jebna yebnënguifë,

25 ni quebnatájaboto ndocná chabiana tondaye chaondëtsama, er cha endmëna nda inëtšama bënga vida chamotsebomnama y jtseshachnayama chamotsobenama, y cha nyetsca soyënga šnetsatšatnaye.

26 “Cha nye canye boyabásabentšana nyets luarënguentša entšanga tojánabiana, nyets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama;

27 chca, Bëngbe Bëtsá chamonguanguama, masque chabiana ndoñe corente tmontsetatšëmbo, y chamuinýena y chábeñe chamotsošbuáchema; pero ndegombre, Bëngbe Bëtsá bëngbentše cada cánýabentšana ndoñe bënoca quenátšmëna.

28 Ntšamo canya tojanayancá: ‘Bënga Bëngbe Bëtsáftaca cánýiñe mo canýacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tsëngaftanguentša báseftanga bëts soyëngama uabiamnayëngnaca tmojanayancá: ‘Bënga nyetscanga Bëngbe Bëtsabe básenga mondmëna ca’.

29 Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entšangbe

castellano, midio o chë ndëtsbeca pormana soyëngcá ca, er chë soyëngna nÿe ntšamo entsanga tmojajuabocá y tmojtsobencá japórmana.

³⁰ Pero Bëngbe Bëtsá tojanjuabó ndoñe ntjatonÿayana chë entsangbe temp-sca ndosertánana, y morna, nÿetsca luarënguentša entsanga entsamënda, ndaye bacna soyënga tmojtsamama ngmënacna chamuenojuabó, chca amama chamotsajbaná y Bëngbe Bëtsabe benache chamuatishache ca.

³¹ Bëngbe Bëtsá canÿe te tojuinÿnaná, y chë tena, ndocnábioye ínÿabiamá más tsabá ntjatonÿaycá, cha echanjayana entsanga tsabá o ndoñe tsabá tmonjama; lempe chca cha echanjama canÿa cachá tbojabocacá entsáftaca, Jesús; y chca yochtsemnamna, Bëngbe Bëtsá entsanga tojinÿanyé, chë bocacaná Jesús cháuatayenama cachá tojánmayeca ca” —Pablo tojánayana.

³² Chë obanënga mochtayenama ichámuana chë entsanga tmojanuena ora, báseftanga Pablo imojtsáboyejuana, y ínÿengna mëntsá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

³³ As Pablo chëngbentsana tojésanbocna.

³⁴ Pero báseftanga aiñe Jesucristbeñe imojtsošbuáchiye y Pablo tmojanasto más jatuenama; chënguentše imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

18

Pablo Corinto puebloca

¹ Chë soyënga tojanochnëngüentšana, Pablo Aténasentšana Corinto bëts puebloye tojána.

² Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama,

³ y ntšamo chata jamama Páblënacna jamama inatátsëmboyecna, chátaftaca yojtsoquedañe y cánÿiñe chënga imnatrabájaye; chënga imnatátsëmbo mo tambotemëngcá entsëjuaca japórmana.

⁴ Y nÿetsca ochnayté, Pablo yojanamana chentša judío entsangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentšena judiënga y ndoñe judiënga chamotsošbuáchemá, ntšamo cha yojtsanëtsëtsnacá ndegombre bëtsemnama.

⁵ Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entsanga yojtsabuayiyenaye y puerte tsabá chë judiënga yojaninÿanyná, Jesús ndegombre Bëngbe Bëtsabe Uámana Uabuayaná bëtsemnama.

⁶ Pero chë judiënga Páblëbe contra imojtsemna y tmojanontsé podesca chabiamá ichámuana. Asna, Pablo chabe uichëtjonyangá yojtsenántšasajaye, chënga jinÿanÿiyama chënga ndoñe tsabá tmonjánchjanguama, y tojanéyana: “Tsëngaftanga ndatsebácanënga chašmojóbanëse, cach tsëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

⁷ Chorna, chë judiëngbe enefjuana yebnentšana tojëftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena.

⁸ Y Crispo, canÿe chë enefjuana yebnentša mandayá, Bëngbe Uabná Jesucristbeñe yojtsošbuáchiye y nÿetsca chabe pamíllangnaca; y banga chë

Corintentsšengnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye.

⁹ Canýe ibeta, Bëngbe Bëtsá Páblëbioye mo canýe otjenayoquécá tbojaniyana: “Ndoñe matauatjana; nýe cochtsana atšbe soyëngama oyebuambnaye y ndoñe iytëca cattsemana.

¹⁰ Er atše ácaftaca sëntsemna y ndocná quecmochátsbojajo ntšámnaca jáborlama; atše bëtscá entsanga quem pueblentše sëndábamna ca.”

¹¹ Chcasna, Pablo Corintentsë canýe uata y chnënguana shinýe tojanotoná, Bëngbe Bëtsabe palabra entsanga abuátambaye.

¹² Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojánatse.

¹³ Chocna, chë mandado tmojaniyana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

¹⁴ Pablo jóyebuambayama uatajanóntša orna, Galión chë judiënga tojanéyana: —Quem entšá nderado inýabioye mathbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama;

¹⁵ pero ntšamo šmontsichamcá entsemna nýe बातëmbana soyëngama, nýe tšëngaftanga šmëbuatma entsangbiama y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

¹⁶ As Galión tojanamëndá chë tribunal luarentšana chë judiënga jtëbuacnama.

¹⁷ Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

Pablo Antioquiye tojtaná y chentšana cachiñe inýe luarëngoye tojána, Bëngbe Bëtsabe trabajo jamama

¹⁸ Pablo cabá bayte Corintentsë tbojántotona. Chentšana, Jesucristbeñe ošbuachiyëngbentšana tojesanodiošoftá y bejaycá Siria luaroye tojána, Priscila y Aquilaftaca. Cabá Sirioye nda ora, Cencrea puebloca nýets stjénashe yojtsenátsbotje, Bëngbe Bëtsábioye jinýinýiyama canýe soye tbojanšbuáchenama.

¹⁹ Efeso puebloye tmojánashajna ora, Páblëna Priscila y Aquila tojésanabashējuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye.

²⁰ Báseftanga Pablo tmojanimpadá inýe baseftayté chentše chauesomñama, pero chana ndoñe tonjanoyauná;

²¹ chentšana, chëngbentšana tojesanodiošoftá, mëntšá jëftsëyanëse: “Nderádoe cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna.

²² Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentšana Antioquiye tojána.

²³ Chentše baseftayté yojéftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

Apolos, Efeso puebloca Bëngbe Bëtsabe soyëngama yojanabuayiyiná

²⁴ Cach tempo, Efesoye tojánashjango canye judío, Apolos ca uabainá, Alejandría bëts pueblócá; cha puerte obená inamna jonguamiyama y corente inatátšëmbo Bëngbe Bëtsabe uabemana palabrëngama.

²⁵ Bëtscá tojánatsjinýe chë Bëngbe Utabná tojaninýanýe benachama; añémoca yojanoyebuambná y Jesusbe soyëngama botamana yojanabuatambá, masque cha nye ntšamo Juan entšanga tojánabuatambama y tojanëbáyama inatátšëmbo.

²⁶ Nduatjácá Apolos tojanontsé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inýinýena benache bëtsemnama.

²⁷ Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañémó y choca Jesucristbeñe ošbuáchiyëngbiamá canye tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiamá yojanjuabnýeca, chënga Jesucristbeñe corente imojtsošbuáchiye.

²⁸ Entšangbe delante chë judiëngaftaca jabuachana imojánenatsëtsnaye y nyetscanga tojaninýanýe, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabrëngaca chënga tojaninýanýe, Jesús Bëngbe Bëtsabe Uámana Uabuayaná bëtsemnama.

19

Pablo Efeso puebloca

¹ Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanýena, pero chëngna nye ntšamo Juan chë Ubayaná tojanabuatambacá imnatatšëmbo.

² Pablo chënga tojanatjá: —¿Uámana Espíritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamá ora ca?

Chora chënga tmojanjuá: —Ni mo queftsátstatšëmbo chë Uámana Espíritu yomnama ca.

³ Y Pablo tojanéyana: —As, ¿ntšamo šmojánenabayé ca?

Y chënga tmojanjuá: —Fsënjánenabayé ntšamo Juan entšanga yojanëbayancá ca.

⁴ As Pablo tojanéyana: —Juan tojanëbayé chë bacna soyënga amama ngmënacá tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábensana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

⁵ Chca tmojanuena ora, chënga tmojánenabayé Bëngbe Utabná Jesús jótšëmbonëse, chábeñe imojtsošbuáchema.

⁶ Pablo chëngbe bestšašine chabe cucuatšënga tojanjájó ora, Uámana Espíritu chëngbe ainaniñe tojánamashëngo jtsemándayama; tmojanontsé inýetšá biyangana, chënga tempo ndmabiyañe, y Bëngbe Bëtsabe juabna imojtsoyebuambná.

⁷ Chentše imojtsemna bnétsana uta entšanga.

⁸ Unga shinýentscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entšangaftaca imojänenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema.

⁹ Pero ba nduauenanënga ndoñe imontsošbuaché y Bëngbe Utabná tojaninýanjé Benachama entšangbeñe bacna soyënga imojtsichamo. Chcasna, Pablo chëngbentšana tojtsanojuánañe y nýe chë Jesucristbeñe ošbuáchiyënga tojanëbuaja canýe scueloye, canýe entšá Tirano ca uabainabe yebnoye. Chentše cada te chë ouenanëngaftaca yojanoyebuambná,

¹⁰ y chca yojánama uta uatëntscuana; y chca, nýetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca.

¹¹ Y Bëngbe Bëtsá puerte bëts soyënga Pábloftaca yojtsama.

¹² Tša bëts soyënga tojanma; chíyeca, nýetsca chë Pablo tojuabojajo entšayá y pañuelëjuangá, entšanga imojanamana soquëngbiyoye juyambana, y chca tmojama orna, chë šocanënga juenatjëmbana y chë bacna bayëjënga entšangbentšana jésebocanana.

¹³ Pero básefta judiënga tsáshenañe bacna bayëjënga entšangbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbiyoye mëntšá imojtsëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentšana chašmuaisëbocnana ca.”

¹⁴ Chca imojánama chë judío Esceva ca uabainabe canýësëfta uaquiñënga. Esceva inamna bachnëngbe amëndayá.

¹⁵ Pero canýe, Escévëbe uaquiñënga chca tmojánayana orna, chë bacna bayëja mëntšá tojanëjua: “Atše Jesús sënduábuatma y sëndëtatšëmbo nda Pablo yomnana; pero tšëngaftanga, ¿ndëmuanyënga šmomna ca?”

¹⁶ As, cachora chë bacna bayëjbe juabna uambayá chëngbiyoye tojanontsënja y tša añemo bomná bëtsemnayeca chënga tojtsanayëñaná, jabuache jtsajantšetayëse; chë causa, chënga chë yebnentšana tmojtsanacheta enašënga y lisiánënga.

¹⁷ Nýetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

¹⁸ Jesucristbeñe imojtsošbuachiyënguentsana, banga imojánashajuana y entšangbe delante imojtsecompšaye, tempo bacna soyënga tmojanmama;

¹⁹ banga, chë bocjuanana soyënga jamama imojanëntšënënga, chëngbe bocjuanana librëšangá tmojaniyëbo y entšanga imojtsantšëšna ora, chëšangá imojtsajuinýiye. Tmojanjuabó ntsachetšá chë librëšangá betšámanama y tojanóbozna shachna bnétsana uaranga crocénana nýetšá.

²⁰ Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšangbeñe yojtsinýinýnaye.

²¹ Chca tojanochnëngüentsana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenantsana Romoye jama ca.

²² Asna, chabe uajabuachanënguentsana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

Efesoca entsanga tmojánenbouenana

23 Chë tempo, Efesoca entsanga corente tmojánenbouenana, chë Bëngbe Utabná yojtsin'yan'ná Benache imojtsisháchichanëngbe causa.

24 Chë entsanga chca tmojanma, er can'ye ent'sá mídioca soyënga pormayá, Demetrio ca uabainá, chënga tojanayëjnaná chca jamama. Cha yojanmana binche soyetëmënga japórmana y chëtëmënga yojánin'na mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájanga bëtscá crocénana imojanójacañe chë soyetëmënga eniñe.

25 Demetrio tojanëbuaja cháftaca imojantrabájanga y ín'nga cach mídioca soyënga pórmayënga, y mënt'sá tojanëyana: “Baconga, tsëngaftanga šmondétatšëmbo, bënga bëtscá crocénana jtsebomnamna quem trabajuentsana chca jopódiana.

26 Pero tsëngaftanga šmontson'ya y šmontsuenana ntšamo chë Pablo ca uabainá yojtsichamcá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsanga tojabuayená y chënga añte montseyunana. Chë soyna ndoñe n'ye muentše Efesentše chca quenátopasana; n'yets Asia luaríñnaca chca entsopasana.

27 Resjo entsemna; chca causa, entsanga bëngbe trabajuama ndoñe tsabá quemochátichamo y chë uámana Artemisa jadórama bëts yebnama mochántichamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabatma, nda Asientše y n'yets luaríñnaca mondadorana ca.”

28 Chca tmojanuena ora, chca pórmayënga puerta tojánëtëna y tmojanáyebuachena: “¡Efesoquëngbe Artemisa corente bëtsá endmëna ca!”

29 Y chca, n'yetsca chë pueblent'sa entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambayata; y sjojónana tmojanënatse chëngbe enefjuana yebnóntscoñe.

30 Pablo tojánbošena choye jamashënguama chë ent'sángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá.

31 Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

32 Chëntscuana, entsanga imojtsejotonocna, ín'nga imojtsechembumbuana can'ye soye y ín'yengna in'ye soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobëconama.

33 Pero básefta judiënga, can'ye ent'sá, Alejandro ca uabainá, chë entsangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánëfjatšëmbo cucuátšëca iyteca chamobiamama, er cha yojtseboše entsangbe delante chë judiënga jobuauyanama.

34 Pero, Alejandro judío bemnama chë entsanga tmojántatšëmbona ora, n'yetscanga tmojanáyebuachena uta horëntscuana, mënt'sá: “¡Efesoquëngbe Artemisa corente bëtsá endmëna ca!”

35 Chë pueblent'sa mándayëngbe uajabuachaná, entsanga iyteca jábiamama tojanobená ora, tojanëyana: “Efesoquënga, n'yets luaríñe endótatšëmbo, quem pueblentše oyenënga iuamna jtsin'yenana chë Artemisa jadórama bëts yebna y chë cha jadórama celocana otsatšëna ndëtsbé.

³⁶ Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá.

³⁷ Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiana ndoñe podesca tmonjoyebuambá.

³⁸ Demetrio y cháftaca šmotrabájanga, nderado ndabiana ndaye demanda šmojtsebomnësna, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda.

³⁹ Y tšëngaftanga inye soye šmojtsenguasna, cmontsamna ntšamo bëngbe leyënguife yomandancá, nyetsca quem pueblentše oyenëngaftaca jonyeunayana.

⁴⁰ Ndayá mëntë tojopasá causa, resjo entsemna bëngbiana chamuayana, ntšamo leyënguife yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanéyana.

⁴¹ Y chca jayanëse, chë entšanga tojtanichamó.

20

Pablo, Macedonia y Grecia luaroye tojána

¹ Chë enbouenanana tojanochnëngo ora, Pablo chë Jesucristbeñe ošbuachiyëngbioye tojanëbuaja jábuayenama, añemo chamotsatsbomnama; tojesanodiošoftá y Macedoniye tojëftsanbocna.

² Chë luarënguëjana cha tojánachnëngo Jesucristbeñe ošbuáchiyënga beca añemo atatšatnaye, ba chabe palabréngaca; chentšana, Grecia luaroye tojánashjango,

³ y chentše unga ishinye tojanoquedá. Barquëshañe Sirioye játama Pablo yojtseprontana orna, tojántatšëmbona chë judiënga cha jtsóbama tmojanenóyëunama. Asna, tojanenojuabó jeshhéconama, cach Macedonia luarëjana jésachnënguse.

⁴ Pablo quem boyabásenga tmojantjëmbambá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófímnaca, Asia luarocata.

⁵ Chënga tmonjanonatsé y šonjanëbatma Troasoca.

⁶ Chë levadúraca ndëpormana tandëse saye fiestentsana, Filípomentšana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canye semana fsënjanoquedanga.

Ntšamo tojanopasá Troas puebloca

⁷ Chë inye semana jobojátsama te, fsënjánenefjna Jesucristbeñe ošbuachiyëngcá tandëse jajátayama, cányiñe jasama; y Pablo entšanga enjëtsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana.

⁸ Fsënjamna canye tsoye tsbanana tsañoca y chentše ba uajuinyanëshangá enjanamna;

⁹ y canye bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocnayana tbojanábuahe. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná.

¹⁰ As, Pablo tonjánastjango, chë bobóntsbioye tbonjanotsbuajó y tbonjanot-sejjuá. Y chë entsanga tonjanëyana: “Ndoñe nyetsá matauatjëngana; ainá cha entsatsmëna ca.”

¹¹ Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entsángaftaca tonjanse y tontëtanontšë oyebuambnayana, jabinÿnëntscuana. Chora Pablo chentšana tontsanoñe.

¹² Y chë otsatšëna bobontsna ainá imojtsatánatseñe, y chama chë entsanga corente oyejuayënga imojtsemna.

Pablo Troasentsana Mileto pueblöyë tojána

¹³ Bëngna fsënjanonatsé y barquëshañe fsënjána Aso pueblóntscoñe, chentšana Pablo jtesbetšama, ntšamo fsënjanenoyeunacá, er Pablo tonjánbošëna fshantscá choyë jana.

¹⁴ Asoca Pábloftaca fsëntaneninÿyëna ora, bëngaftaca barquëshañe cha tonjána Mitilene pueblöyë.

¹⁵ Chentšana fsënjëftsanbočna y yëfsana Quío luarëjana fsënjánachnëngo, y chë inÿe yëfsana Samos luaroyë fsënjánashjajna. Chentšana fsënjána y yëfsana Mileto pueblöyë fsënjánashjajna.

¹⁶ Chca tonjanochnëngo er Pablo ndoñe chenátanbošëna Efesoyë jama, Asia luariñe ndoñe yapa ndétsemnama. Chca tojánbošëna er cha enjëtsebošë betscó Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

Ntšamo Pablo chë Efesoca ošbuachiyëngbeñe bëtsëjemëngcá mándayënga tojanëyana

¹⁷ Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana.

¹⁸ Chënga tmonjánashjajna ora, Pablo tonjanëyana: “Tšëngaftanga šmondëtatšëmbo ntšamo atšë quem Asia luaroyë sënjabánashjango orscana tšëngaftangbeñe snetsamana.

¹⁹ Nyets tempo Bëngbe Utabná sëndëserveda y cach atšë uamaná ndoñe quetsatenobiamná. Corente shëchbuiye tijëftsoperdë y ba soyënguiñe tijasufri, chë judiënga atšë jóbama mondošë causa.

²⁰ Y lempe ntšamo tšëngaftangbe tšabiamna yomncá tbonjabuayená; ton-daye ntjatsbuetamencá. Nyetscangbe delante sënjabuatambá y tšëngaftangbe yebnënguenáchnaca.

²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmënenaca chamuenójuaboma y chca amana chamot-sajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchemna.

²² Y mora Jerusalenoyë chanjá; Uámana Espíritu chca šontsemánda y ndayá choca chjapásamna ndoñe quetsátstatsëmbo.

²³ Nÿe mëntsá aiñe sëndëtatšëmbo: Nyetsca bëts pueblënguenache ndayëjana atšë chandbétsana, Uámana Espíritu šondbëtsebuayiyayë entsanga cašmochjutame y puerte chaisufrima camochjama ca.

²⁴ Atšë vida cach atšbiamna ndoñe yapa quenatámana, chaitsaina o chayóbana. Pero atšbiamna iuámanana endmëna ndayá atšë jobenayana atšbe trabajo jëftsepochočana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entsángaftaca tšabia yomnana jábuayenama.

²⁵ “Y mora atše ndegombre sěntsetatsěmbo, tsěngaftangbentšana, chě nděmuanjěngbentše Běngbe Bětsabe aměndayama sěnjabuayená, ndocná atše más quešmochátinyě.

²⁶ Chíyeca, atše ndegombre měnté cbetsěyana: Atše tondaye quetsátstatsěmbo nderado nda ndatsbocaná chaojóbaniabiamá,

²⁷ er atše ntšamo Běngbe Bětsá jamama jojuabnacá lempe tcbonjabuayená, tondaye ntsebuetaamencá.

²⁸ Chcasna, cach tsěngaftangbiamá šmochtsantješna y njětscanga muentše Jesucristbeñe ošbuachiyěngbiámna. Chěngbeñe mo chěngbe abujěnyāngcá Uámama Espírítu tcmónjajayé, Běngbe Bětsabe entšanga chašmotsanjenama, chěnga Běngbe Bětsá chábenga tojábiamá, chabe Uaquiñabe buiñe juabuáshaněse y jóbaneše, mo bětscá cuafjopagacá.

²⁹ Atše sěntsetatsěmbo, atše chaitsoñe orna, banga mochanjabo y chěnga mochántsemna mo corente tsátjaye tjañe quešěngcá, Jesucristbeñe ošbuachiyěnga chábene ošbuachiyana chamotsajbanama chěnga jamama.

³⁰ Y tsěngaftangbentšaněmna báseftanga mochanjábocana y entšāngbiōye uayátsenaye soyěnga mochanjabuatambá, chca, báseftanga Jesucristbeñe ošbuachiyěnga chě ínjěngbentšana chamotsoluarema y nje chě abuámbayěngbiōye chamotsěsetonama.

³¹ Chcasna, sempre šmochtsantješna; ndoñe chacmondébnětjomba, atše unga uatěntscuana, bnět y ibeta, tsěngaftanga cada ona cbondětsabuayiyana y chama atše puerte tijasufri.

³² “Y morna, Jesucristbeyeca catsátanga, Běngbe Bětsabe cucuatšíñe chétsabashejuana y ntšamo tsěngaftangbiamá chabe tsabe juabna yomnama palabréngaca, tsábá chašmuesomñe. Cha endobena jamama tsěngaftangbe ainaniñe más chašmotsošbuáchema, y endobena tsabe soyěnga tsěngaftanga jatsatayama, ndayá jatsatayama tojanašebuachenacá mo tsěngaftangcá entšāngbiōye, nděmuanjěnga cha tojáchembo chabe entšanga chamotsemnama.

³³ Atše ndocnabe crocénana, o castellano o entšayá atšbiamá quetsatántšaboše;

³⁴ más ínjetšá, y tsěngaftanga lempe šmondětatšěmbo, atše cach atšbe cuatšeca tijěftsetrabajama, atšbiamá y átšeftaca imojamněngbiamá opresido enjamna soyěnga janguanguama.

³⁵ Atše njěts tempo sěndinjanyná entšá chca ibomnama, chě jabuache jatrabájana y chě ujabótěnga jujabuáchana, quem Běngbe Utabná Jesusbe palabréngama sempre jtsejuabnayěse: ‘Canjě entšá más oyejuayá jtsemnana ndayánaca ínjabiōye tbojtsatšetná ora, y ínjabiōye tbojtseyěngacá ora ndoñe njá njětšá ca’ ” –Pablo tonjanoyebuambá.

³⁶ Pablo chě soyěnga tonjánayanentšana, tonjanoshamentšé y njětscanga chentše monjětsemněngaftaca Běngbe Bětsá tmonjanótsěmbona.

³⁷ Njětscanga tmonjánenobošachna y Pablo tmontanotsejcuá y tmontanámochó.

³⁸ Y entšanga corente ngmėnaca monjětsemna, chěnga ndocna te más cha mochántinyě ca Pablo tojaněyana causa. Chentšana, chěnga chě barquěsha enjetsamněntsoñe cha tmonjantjěmbambá.

1 Chë Jesucristbeñe ošbuáchiyënga fsënjëftsanabashejuana ora, barquëshañe fsënjanojoyé y ndericho Cos luaroye fsënjána; chë yëfsana Rodasoye y chentšana Pátara puebloye.

2 Pátara pueblentše canýe barquësha fsënjáninýena, Fenicioye enjétsaye; asna, chëshañe fsënjanojoyé y chentšana fsënjëftsanbocna.

3 Fsëntsanachñejuana ora, fsënjáninýe Chipre luare; Chipre bëngbe uañicuayoica tonjanoqedá y bëngna Sirioye fsënjétsaye. Tiro pueblentše chë barquëshentša uasmanëshangá jëftsáboshjonama yojámnyeca, chë puebloye bënga fsënjëftsanamashjna.

4 Chentšana, Jesucristbeñe ošbuáchiyënga fsënjánanýena y canýsëfta te chëngaftaca fsënjanoqedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama.

5 Chë canýsëfta te tonjanochnëngo ora, chentšana fsënjëftsanbocna y nyëtscanga parejo chëngbe shémangaftaca y básangaftaca šonjanatjëmbambá chë pueblo chabóntscóñe; y chentše, chë chënyáñe fsënjanošamentšé y Bëngbe Bëtsá fsënjanimpadá.

6 Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

7 Tirentšana fsënjëftsanbocna y Tolemaida puebloye fsënjánashjajna; y chentše tonjanopochocá bëngbiama bejaycá chë te ayana. Tolemaidentše Jesucristbeñe ošbuáchiyënga fsënjana cheuá y chëngaftaca canýe te fsënjanoqedanga.

8 Yëfsana, bënga chentšana fsënjëftsanbocna y Cesarea luaroye fsënjánashjajna. Chocna, bënga fsënjána Felipe chë Jesucristbiama tšabe noticiënga abuayinyayabe yebnoye y cháftaca fsënjanoqedanga. Felipe enjamna canýa chë Jesucristbe ichmónëngbioye ujabuachanënguentsá, Jerusalenoca ubuáyanënga.

9 Felipe enjánabamna canta ndëbouamna bemianga y chënga monjamna Bëngbe Bëtsabe juabna oyebuambnayënga.

10 Ya bayté chentše fsënjëtsemna orna, Judeocana tonjánashjango canýa Bëngbe Bëtsabe juabna oyebuambnayá, Agabo ca uabainá.

11 Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduññioye chë judiënga mëntšá camochjama y ndoñe judiëngbe cucuatšëne camochjáboshjona ca.”

12 Chca fsënjanuena ora, bënga y chentša entsanga Pablo fsënjanimpadá Jerusalenoye ndoñe chaondëtsama.

13 Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngmënanana chaotsemnama ca? Atše sëntseprontana y ndoñe nýe chašmobatsëcama; Jerusalenoca jobanámnaca sëntseprontana, Bëngbe Utabná Jesusbiama ca —cha tonjánayana.

14 Jáyënjana ndoñe chibiatanobená ora, ndoñe más chibiatanimpadá; nýe mëntšá fsënjaniyana: —Ntšamo Bëngbe Utabná yojtsebošcá chaotsemna ca.

15 Chë soyënga tonjanochnëngüentsana, fsënjano prontá y Jerusalenoye fsënjána.

16 Cesareoca, básefta Jesucrístbeñe ošbuáchiyënga choye šonjanatjëmbambá y chocna, chënga šonjanënatse canye Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucrístbeñe ošbuachiyá.

Pablo tojána Santiago jauatsëtsayama

17 Jerusalenoje fsënjánashajjna orna, chentša Jesucrístbeñe ošbuáchiyënga oyejuayënga šonjanëbuaja.

18 Yëfsana, Pablo bëngaftaca tonjána Santiago jábuachama, y chentše, nyetsca chë ošbuachiyëngbeñe bëtsëjemëngcá mandayëngnaca monjëtsemna.

19 Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

20 Chca tmonjanuena ora, Bëngbe Bëtsá tmontanchuá y Pablo mëntšá tmonjaniana: “Morna, Jesucrístbeyeca bëngbe catšata, contsonyá ntšamo ba uaranga judiënga Jesucrístbeñe imojtsošbuáchema, y chënga nyetscanga montsantješna nyetsca Jesucrístbeñe ošbuáchiyënga chë Moisesbe leyentša nyetsca mandënga chamotocumplínama.

21 Y entsanga chëngbioye noticia tmojatsatá, aca chë inye luarënguenache imoyena judiënga cojtsabatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtsama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca.

22 Y morna, çntšamo chë soyëngama cochtsemana? Ndegombre, chënga mochanjátatšëmbona aca moye tcojabama.

23 Chcasna, ntšamo cbochanjabuayenacá cochjama: Bëngbentše canta boyabásenga montsemna y chënga entsamna Bëngbe Bëtsabiama canye šbuachenana soye jamama.

24 Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tsábenga jtsatsmënama ntšamo chamojtsama ora, y ntsachetšá jëtsjáyuama chaojtsamncá, aca cochjëtsjájuua, as chënga chamobená nyets stjënashë jtsenátšbotjiamá, jinyanjyiyama, ntšamo Bëngbe Bëtsábioye tmojašbuachenacá ya tmojamama. Y chca, nyetsca judiënga mochanjinye ndoñe ndegombre yontsemna chë ntšamo chëngbioye acbiama tmojacuntacá; masna, chënga mochanjátatšëmbona aca ndegombre ntšamo Moisesbe leyitšë yomandancá icuamama.

25 Y chë ndoñe judiënga Jesucrístbeñe imojtsošbuachengbiamna, bënga ya fsënjubuábiamá y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtsesá mëntšena, chë entsanga tmojtsejuabná diosënga imomna soyënga jadórama tmojiyëbana; ni buiñe, ni tšešana bayëngbe mëntšena; y ndoñe chamondëtsama bacna soyënga shembásenga y boyabásengaftaca ca’ ” —chënga tmojánayana.

Bëngbe Bëtsabe bëts yebnentše judiënga Pablo tmojánishache

26 As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tsábenga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnayama, ndayténtsoñe yojamna chë cantangbiama soyënga jtsamama, Bëngbe Bëtsabe delante tsábenga jtsatsmënama, y jayanama ndayté chëngbiama yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiama juatšëmbonama.

27 Chënga tmojanenoyeuná y tmojánayana canýsëfta tentscuana chca jamana ca. Chë canýsëfta te ya jochnënguama yojtsemna orna, básefta judiënga Asioquënga Pablo tmojáninýe Bëngbe Bëtsabe bëts yebnoca y tmojanma entsãnga chamuenbouënanama. Y cha tmojánishache,

28 mëntšá jtsayebuáchëse: “¡Israeloca entsãnga, šmabëtsëjabuache ca! Quem boyobáša entsemna chë nýets luarënguenache iuana abuátambaye soyënga bëngbe entsangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominiñe ndoñe tšabá chaondëtsemnama ca” —chënga imojtsichamo.

29 Chca imojtsichamo, er entsãnga Pablo tmojáninýe chë bëts pueblentše Tróximo Efesocáftaca; y imojëtsejuabnaye chábiye Bëngbe Bëtsabe bëts yebnoye Pablo tbojanánatse ca.

30 Nýetsca chë pueblentša entsãnga tmojánenbouenana, y ochamanana chë Pablo yojtsemnoye tmojánashajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojanatame.

31 Jtsóbama ya imojtsebuachéta ora, chë Romoca soldadëngbe mandayá tojánatšëmbona nýetsca chë bëts pueblentša entsãnga imojtsenbouenana.

32 Asna, chë mandayá chabe soldadënga y inýe chentša amëndayënga tojánachembo y cánýiñe chë entsãnga imojtsemnoye tmojëftsanótjajo. Entšanga, chë mandayá y chë soldadëngbiye tmojánanýe ora, tmojtsanajbaná Pablo jantšetayana.

33 Chorna, chë soldadëngbe amëndayá tojanobeconá, Páblëbiye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojana ca?”

34 Pero chë entsãngbeñe, inýenga canýe soye imojtsáyebuache y inýengna inýe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama.

35 Chë soldadëngbe oyenoca grádasbengoye tmojánashajna ora, chë soldadënga tojanotocá Pablo cutsnana juambama, chë entsãnga tša rábiaca imojtsemna causa,

36 er chënga ústonoye imojëtseye y “¡Chaóbana ca!” imojtsaiuáyebuache.

Ntšamo Pablo entsangbe delante tojanenëuyaná

37 Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábíoye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama!

38 As, ¿aca ndoñe condmëna chë Egiptocá, chë ndoñe bayté quenátsmëna entsãnga yojanëtsësná chë mándayëngbe contra chamotsemnama y chë canta uaranga podëca uamana entsãnga puñálaca uajatëngaftaca, entsãnga ndoyena luaroye tojanbocná ca?

39 Chora Pablo tbojanjuá: —Atše judío sëndmëna, Tarso puebloca onýnaná, canýe uamana pueblentše Cilicia luaroca; Diosmanda šmoleseñciá entsãnga jáuyanama ca.

⁴⁰ As, chë soldadëngbe amëndayá chca tbojanlesenciá. Páblëna chë gradas-benguiñe tojantsá y cucuatše tojanatsbaná entsanga iytëca chamobiamama. Nyetscanga iytëca imojtsemna orna, Pablo hebreo biyañe mëntšá entsanga tojanëyana:

22

¹ “Baconga y taitanga, mora šmochjouena atše jenëuyanama ntšamo chjayancá ca.”

² Pablo cachëngbe biyañe, hebreo biyañe vojtsóyebuambnama entsanga tmojanuena ora, más iytëca tmojanobiamama. As Pablo tojanëyana:

³ “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalenentše sënjanoboché y sëndëtatšëmo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nyets atšbe ainánaca Bëngbe Bëtsá sëndëserveda, ntšamo nyetsca tšëngaftanga mora šmontsamancá.

⁴ Atše sënjánama chë Jesucristo tojaninÿanyé Benache ústonënga chamofufrima y chamóbanama; boyabásenga y shembásenga sënjanëtabaye y cárceloje sënjanautame.

⁵ Chë judío bachnangbe más uámana amëndayá, nyetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sëntsicamcá ndegombre yomnama. Chënga uabemana tsbuanachangá šmonjaniyé, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacistigayama.”

Pablo tojanacuntá ntšamo Jesucristbeñe ošbuachiyá tojanóbema (Hch 9.1-19; 26.12-18)

⁶ “Pero canÿe te benachiñe Damasco béconana sënjëtsaye orna, mo nyetsto ora, nÿe ndeolpe atšbe juachañe canÿe bëts tcuinÿe celocana tonjanbuashinÿinÿena.

⁷ Y fshantsoye sënjëtseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’

⁸ Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjúa: ‘Atše sëndmëna Jesús Nazaretocá, y aca condama atšbe entsanga chamotsesufrinama ca.’

⁹ Chë átšëftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena.

¹⁰ Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaniyana: ‘Matëtsbaná y mëtëtontéšé Damascoye jama. Chentše canÿa cmochanjabuayená ndayá jamama cmojtsemnna ca.’

¹¹ Chë tcuinÿe yapa tonjanbuashinÿinÿena causa, atše jtaná sënjanoqueá. Chcasna, chë inÿënga šmontanobuacuetëntsé y chca, Damascoye sënjánashjango.

¹² “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguiñe iuayancá, y nyetsca chentša judiënga monjanamana chabiama tšabá jtsóyebuambnayana.

¹³ Cha tonjánabo atše jinÿama y tonjánashjango ora, šonjaniyana: ‘Jesucristbeyeca atšbe catšata, Saulo, chacmotsatabinÿna ca.’ Cachora y cha sënjáninÿe.

14 “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamá yobošcá chacotsetatšëmbuama, chë nyëtsca soyënguifë Tšabá Amá chacuinýama y cachabe uayásentšana chacóyeunama.

15 Bëngbe Bëtsá chca tojama, aca chë chabe buayenana soyëngama entšángbeñe chacóyeubambama, y chamna nyëts luarentša entšángbeñe cochacuéntá, ntšamo tcojinýe y tcojouená.

16 Y mora, jndoñe más matobátmanana! Motsbaná y cochjenábaye Jesucristo jótsëmbonëse, chca, acbe bacna soyëngama perdonaná chacotsemnama ca’ –cha šonjaníyana.

Pablo tojanacuntá ntšamo chë ndoñe judiëngbiøye tmojánichmoma

17 “Jerusalenoýe sëntaná ora, Bëngbe Bëtsabe bëts yebnoýe sënjána cháftaca jencuéntama, y ndeolpe atše mo otjenayoquécá sënjanoquedá.

18 Chca orna, Bëngbe Utabná sënjáninýe y cha mëntšá šonjaníyana: ‘Betsco motsa y cam ora Jerusalenentšana métsebocna; quemuentša entšanga ndoñe quecmochatóyeunaye ntšamo atšbiamá condétatšëmbo y consëtsëtsnacá ca.’

19 Atše sënjanjuá: ‘Bëngbe Utabná, chënga mondétatšëmbo atše sënjánana nyëtsca chëngbe enefjuana yebnënguenache y chë áceñe ošbuáchiýënga sënjanëtámiana y sënjanatsetšenaye;

20 y acbiamá ndegombre oyeubambnayá Esteban tmonjanóba ora, átšnaca chentše sënjamna y tšabá imojtsama ca chama sënjetsejuabnaye, y cabá chë monjanóbanangbe entšayëjuangá atše chora sënjanabojanjýa ca’ –atše sënjanjuá.

21 Pero chca sënjánayana ora, Bëngbe Utabná šonjaníyana: ‘Motsa; atše bën luarëngoye, ndoñe judiëngbiøye chochanjíchmuá ca.’ ”

Pablo y chë soldadëngbe amëndayá

22 Chë entšanga chëntscoñe tmojanuena; pero chë ndoñe judiëngbiamá tojanoyebuambá orna, chënga tmojanontšë uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!”

23 Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtsana;

24 chë causa, chë mandayá tojánayana chë soldadëngbe oýenoye Pablo chamotsëmashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache.

25 Pero jtsetjanjama ya tmojanbatséca orna, chentše imojtsemna soldadëngbe amëndayábíoye Pablo tbojantjá: –¿Tšëngaftanga šmobena canýe entšá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

26 Chë básefta soldadëngbe mandayá chë soye tojanuena ora, tojána y nyëtsca soldadëngbe amëndayábíoye chama ibojuenaye, mëntšá: –¿Ndayá cochjama? Chë entšá derecho bomna mo canýa Romoca onýnanacá canmëna ca.

27 As chë amëndayá tojána Pablo yojtsemnoýe y tbojaníyana: –Smëyana, ¿aca derecho bomná mo canýa Romoca onýnanacá comna ca?

Y cha tbojanjuá: –Arseñor ca.

28 Chora chë amëndayá tojánayana: –Atše becá crocénana sënjetšajájó mo canýa Romoca onýnanacá derecho jtsebonnma ca.

As Pablo tbojanjuá: –Y atšna derecho bomná mo canýa Romoca onýnanacá sëndmëna atše tijananýná orscana, er atšbe taitá chca derecho bomná inamna ca.

²⁹ Chcasna, chë jatjanjama imojtseprontanënga, Páblëbentšana tmojanjuaná; y chë mandayánaca tojanjuaná y yojtsauatja, Pablo derecho bomná mo canya Romoca onýnanacá yojamnama tojántatšëmbona ora, er cha tojanmandá Pablo chamotsebátsëcama.

Pablo, Jerusalenentša uámana mándayëngbe delante

³⁰ Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyëtsca chë judiëngbe amëndayënga chamobëconama. Chentšana, Pablo tbojanábocna y chëngbe delante tbojanatsá.

23

¹ Chora Pablo, nyëtsca chë mandayëngbiuye tojanëñyané y tojanëyana: — Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

² As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama.

³ Pero chora Pablo Ananíasbiuye tbojanjuá: — ¡Bëngbe Bëtsá ácnaca cmochanjëtsjantšetá, bacna entšá, ntšamo ndegombre tcojuabnacá ndinýnýnayá! Aca chentše contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

⁴ As, chabe béconana imojtsemna entšanga tojánayana: — ¿Chca chë Bëngbe Bëtsabe bachnangbe más uámana amëndayábiuye cochjýenguango ca?

⁵ Chora Pablo tojánayana: — Taitanga, atše ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrënguiñe mëntšá endayana: “Entšangbe mandayabe contra ndoñe catjayana ca.”

⁶ Pablo tojáninýe chë mándayënguentše báseftanga saduceunga y ínýengna fariseunga imojtsemnama; as, mëntšá tojanáyebuachena: — Taitanga, atše fariseo sëndmëna; atšbe bëtsëtsanga fariseunga mondmëna. Atše, jtsošbuáchiyëse chë obanënga mochtayenama tsobatmana causa, atše ndoñe tšabá séntsama ca tšëngaftanga šmochjayana ca.

⁷ Pablo chca tojánayana ora, chë fariseunga y saduceunga tmojanontšë enatsëtsnayana, y chë causa nyëtsca entšanga ndoñe cachcá imontsejuabnaye.

⁸ Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga añe chë soyënguiñe jtsošbuáchiyana.

⁹ Y nyëtscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canýe ángel o espíritu muábíoye ndegombre tbojauyana ca.”

¹⁰ Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšangbentšana jaisábocnama y chë soldadëngbe oyenoye cachiñe jesánatsama.

¹¹ Yëfsana ibeta, Bëngbe Utabná Páblëbiuye tbojánëbëbocna y tbojaníyana: “Pablo, ainaniñe añemo cochtsebomna. Ntšamo aca atšbiama condëtatšëmbo

y muentše Jerusalenentše condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹² Chë inÿe yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

¹³ Chca jamama tmojanjuabó entsanga imojamna canta bnëtsanëngama más.

¹⁴ Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana.

¹⁵ Morna, tsëngaftanga y chë inÿe muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶ Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama.

¹⁷ Chorna, Pablo canÿe básefta soldadëngbe mandayábioye tbojanchembo y tbojanayana: “Diosmanda quem basa mánatse chë nÿetsca soldadëngbe amëndayábioye; canÿe soye entsebmna chábioye juenayama ca.”

¹⁸ As, cha chë bobontse tbojëftsanbetse, chë nÿetsca soldadëngbe amëndayábioye tbojanánatse y tbojanayana: “Chë utamená Pablo šonjachembo y šonjaimpadá quem bobontse ábioye juanatsana; mua caojtsebmna canÿe soye aca jauyanama ca.”

¹⁹ Chë soldadëngbe amëndayá chë bobóntsbioye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebmna atše jauyanama ca?

²⁰ As chë bobontse tbojanayana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca.

²¹ Pero ndoñe catjóyaunaye; chënguentšana canta bnëtsanëngama más entsanga iytémenënga Pablëbiamá montsanjá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojanayana.

²² Chentšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentšana tbojtanichmó.

Pablo tmojanánatse Félix, chë Cesareoca mandádbioye

²³ Chentšana, chë soldadëngbe amëndayá tojánachembo útata chë inÿe soldadëngbioye mándayënguentšana, y tojanamëndá chamoprontama uta patse soldadënga, inÿe canÿsëfta bnëtsanënga couayënguiñe y inÿe uta patse lanzëšangaca, Cesareo puebloye ibeta, las nueve ora jabocanama;

²⁴ y tojanamëndá couayënga chamoprontá Pablo chamuánatsama, Félix chë Cesareoca mandádbioye.

²⁵ Y canÿe tsbuanácha chéngaftaca tojanichmó y chěchañe mēntśá yo-
jtsábemana:

²⁶ Claudio Lisias, chě bēts uámana mandado Felixbiama: Salud bomná
chacotsomñe.

²⁷ Judiēnga quem boyabása tmojishache y montseboše jtsóbama; pero cha
mo canÿa Romoca onÿnanacá derecho bomná yomnama sēnjátatsēmbona
ora, atśbe soldadēngaftaca sēnjá y chēngbe cucuatśentśana cha sēnjatsbocá.

²⁸ Atśe sēntseboše jtsetatsēmbuana ndaye soyama chēnga chabe contra
imojtsichámuama; as, cha sēnjuánatse nÿetsca chě judiēngbe amēndayēnga
montsemnoye;

²⁹ y chentśana, atśe sēnjátatsēmbona chēnga chabe contra imojtsichamo
ana cachēngbe leyentśa soyēngama, pero cha tondaye tonjobuachjanguá, cha
jóbama bēnga chaśotsamnama, ni mo cárceloye jutámiamana.

³⁰ Pero atśe sēnjátatsēmbona chě judiēnga tmojenoyeuná cha jtsóbama;
chíyeca, cam ora cha ácbioye sēntsichamná, y chabe contra ichámēngna
sēnjáuyana, ndayá muabe contra jayanama imojtsebošncá acbe delante
chamuayana ca.

³¹ Chentśana, chě soldadēnga tmojanma ntśamo tmojanamēndacá, ibeta
Pablo tmojēftsanbetśe y Antípatris puebloye tmojanánatse.

³² Yēfsana, chě shecuátśeca tmojána soldadēngna cach soldadēngbe oyenoye
tmojésanshēcuaana, y chě couayíñe enjaquenēnga Pábloftaca tmojána.

³³ Cesareoye chēnga tmojánashjajna ora, chě tsbuanácha chě mandádbioye
tmojanantśabuaché, y Páblēnaca chabe cucuatśiñe tmojánboshjona.

³⁴ As chě mandado chě tsbuanácha tojanalía; chentśana, cha tojanēnoticiá
ndaye luarocá Pablo inamnana, y Cilicia luarocá cha inamnana cha
tojántatsēmbona ora,

³⁵ tbojaniyana: “Acbe contra ichámēnga chamobeconá ora, ácbioye oído
cbochjabuájua ca.”

Chentśana, cha tojanmandá Rey Heródesbe bēts yebnoca Pablo chamotse-
bojanÿama.

24

Ntśamo Pablo chě mandado Félixbe delante tojanenēuyaná

¹ Shachna tianoye, Ananías, chě bachnangbe más uámana amēndayá,
Cesareoye tojána báseftangaftaca chě judiēngbeñe bētsēmēngcá
māndayēnguentsana y canÿa entśanga obuauyayáftaca, Tértulo ca uabainá; y
chě mandádbioye chēnga tmojána Páblēbe contra jayanama.

² Pablo tmojanábocna ora, Tértulo tojanontśé chabe contra jayanama y
Félixbioye tbojaniyana: “Aslēpaye, taita mandado, ácbeyeca bēnga natjēmbana
fsēndoyena y aca puerte obiashjáchá cómnayeca ba tśabe soyēnga quem luar-
entśa entśangbiama yojtsebinÿna.

³ Nÿets tempo y nÿetsquénache chě soyēnga fsēndoyēngacañe, bēts uámana
mandado, y bēnga chama corente cbondetsechuaná.

⁴ Pero ndoñe yapa bēn jatenbiamnayamna, Diosmanda ratotema
śmotsoyauná.

⁵ Bēnga fsēntsetatsēmba quem boyabása entśanguentśe entsemna mo
bacna shacuaná, nÿets luarēnguenache yojtsana y yojtsama chě judiēnga
nÿetscanga cachca soye ndoñe chamondētsejuabnama, y cha yojtsemna chě
Nazaretocabe ustonēngbe uanatsaná.

6 Y tonjábošena jamama Bëngbe Bëtsabe bëts yebna, Bëngbe Bëtsabe bom-inyíñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiamama jayanana tšabá o ndoñe tšabá tonjamama, ntšamo bëngbe leyënguñe endayancá;

7 pero chë soldadëngbe amëndayá Lisias tonjontremeté y jabuachana bëngbe cucuatšentsšana tbojtsánatseñe,

8 y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

9 Y chë judiënga chentše imojëtsemnëngna imojtsanichamo añe chca tojanopasá y lempe ndegombre yojtsemna ca.

10 Chentšana, chë mandado Páblëbioye tbojánefjatšëmbo chaóyebuambama; as Pablo tojánayana: “Atše sëndétatšëmbo aca ba uatama comna muentša entsangbiamama tšabá o ndoñe tšabá tmonjamama ichamuá; chcasna, tondayama ntsauatjácá y puerte oyejuayá acbe delante šcuenëuyaná.

11 Ntšamo cach aca jtsetatšëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama.

12 Y quemënga ndoñe chešmátinýena nderado ndáftaca jabuachana enatsëtsnayıñe, ni entsanga chamuën bouënanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inye luarënguenache chë bëts pueblentše.

13 Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca.

14 Pero ndegombre endmëna y chanjayana, atše bëngbe taitangbe Bëtsá sëndëserveda, jtšiyenëse ntšamo Bëngbe Bëtsá šonjaninýanyé benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga ftsošbuachecá, ndoñe ndegombre yondmëna ca. Pero atšna nyetsca chë Moisesbe leyiñe y Bëngbe Bëtsabe juabna oyebuambnayëngbe uabemana librësanguentša soyënguñe sëndošbuaché;

15 y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nyetsca entsanga, lempe tšabá amënga y chë ndoñe tšabá amëngnaca.

16 Chíyeca, atše nyets tempo puerte tšabá sëndama, tondayama nt-jatenócochinýenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

17 “Básefta uatama inye luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtšchuayama.

18 Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínýena, pero ndoñe chešmátinýena ni ba entsángaftaca, ni enbouenaniñe.

19 Chë šmonjinýenënga entsamna ácbioye jabana y acbe delante atšbe contra chamuayana, nderado ndáyá tmojtsebomñese.

20 O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá ti-jobuáchjanguama chešmënjínýena, atše castiganá jtsemnama šojtsemna ca chënga chamuayana;

²¹ o nderado nántsemna chë atše chëngbentše sëntsemna ora, mëntšá ti-juáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tsëngaftanga atšbe contra šmochjajana ca.’ ”

²² Félix bëtscaá inatátšëmbo Bëngbe Utabná tojaninýinýé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entšanga tojanëyana: “Chë soldadëngbe amëndayá Lisias chaojáshjango ora, chanjayana ntšamo quem tsëngaftangbe sóyeca jamama ca.”

²³ Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

²⁴ Chentšana baseftaytese, chë mandado Félix Cesareoye tojtanashjango, chabe shema Drusíaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucristbeñe ošbuachiyá jtsemnama.

²⁵ Pero, nýetsca soyënguiñe tšabá jtšamama, cachá jenomándama jtsobenama y ntšamo tmojamama nýetsca entšangbiamama Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanijana: “Mora, mata; luare quétstsebozna ora, chochjachembo ca.”

²⁶ Jjëtšboshjonama Pablo crocénana chabuatabuenámnaca Félix inobátmana; y chca, ba soye ibojanófajana cháftaca jencuéntama.

²⁷ Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcá tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

25

Pablo Festbe delante

¹ Festo chë luaroye tojánashjango y unga tianoye, Cesarea pueblentšana Jerusalenoye cha tojána.

² Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama.

³ Y tmojanimpadá, mo chëngbiamama canýe bëts pavor cuenta, cha chao-mandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama.

⁴ Pero Festo tojanëyana, Páblëna Cesareoca utamená yojtsemna y baseftaytese cha choye jtama ca.

⁵ Y tojanëyana: “Chamna, tsëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjajana ca.”

⁶ Festo Jerusalenentše posufta o bnëtšana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama.

⁷ Pablo choye tojánashjango ora, Jerusalenocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canýe chë soyëngama tmonjanobená jinýanýiyana chca ndegombre bëtsemnama.

⁸ Y Pablo, cachá jenëuyanama mëntšá vojtsichamo: —Atše tondaye chiya-tobuachjuguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

⁹ Festo vojtsëboše chë judiëngaftaca tšabá joquédama; as Páblëbioye tbo-jantjá: —¿Tacatjábošena Jerusalenoye jama, choca atše quem acbe soyama jayanama ca?

¹⁰ As Pablo tojánayana: —Atše sëntsemna chë Romoca bëts mandado tojichamá amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma.

¹¹ Nderado atše ndaye bëts soye tijobuachjuguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Dios-manda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

¹² As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošëñsna, chábioye cochjá ca.

Festo, Rey Agríptaftaca tbojanencuentá ntšamo Pábloftaca jamama

¹³ Chentšana baseftayté tojanochñëngo ora, Rey Agripa y Berenice Cesare-oye tbojána, Festo jauatsëtsayama.

¹⁴ Bayté chata chentše tojanajétana; y chca, Festo chë réybioye tbojan-cuentá Páblëbe soyama. Cha mëntšá tbojanayana: —Muentše endmëna canye entšá, Pablo ca uabainá; Félix utamená tbonjëftseboshjona, atše mandadca sënjontsé ora.

¹⁵ Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama.

¹⁶ Y atše sënjáuyana: “Chë romanënga ndoñe quematamana ndocnabiamana jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.”

¹⁷ Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntótbema y sënjamandá chë boy-abása jobetšana.

¹⁸ Pero chabe contra ichámënga, ntšamo atše sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama tonjóyentšbuache ora.

¹⁹ Chënga chabe contra montsichamo, nye cachëngbe Dios ntšamo jadórama yomnana y canya Jesús ca uabainábiamana; cha tojanóbana, pero Pablo entsichamo cha ainá yotsomñe ca.

²⁰ “Chora atše ndoñe quetstëtsetatšëmbo ntšamo chë soyiñe jamana; asna, Pablo sënjantjá Jerusalenoye jama tayojetseboše ca, choca atše jayanama tšabá o ndoñe tšabá cha tonjanmama.

²¹ Pero cha šonjaimpadá camuentše jaboshjonana, cach Romoca bëts uámana mandado chë soyama tojayanëntscuana ca. Chcasna, atše sënjamandá cha chamotsebojanýama, chë mandádbioye jíchmuama atše jobenayëntscuana ca” —Festo tbojan-cuentá.

²² Chca tbojanencuentá ora, Agripa Féstbïoye tbojanianyana: —Atšnaca sêntseboše chê boyabása joyeunayama ca.

Y Festo tbojanjuá: —Cach yêfse oïdo chábïoye cochanjabuájua ca.

²³ Chê yêfsana, Agripa y Berenice corente uachuanentše chê tribunaloye tbojánamashjna y chátaftaca tmojánamashjna chê soldadëngbe amëndayënga y chê pueblentša uámana taitanga. Chentšana Festo tojanmandá Pablo jobetsana;

²⁴ y chora cha tojánayana: “Rey Agripa y nyetsca taitanga bëngaftaca šmojtsemnënga: Chentše entsemna chê boyabása. Nyetsca judiënga chabe contra átšbentše montsabíchamo, Jerusalenoca y quem Cesarea puebléntšnaca, y nÿa jtsayebuáchëse tša šmontseimpadana cha chaóbanama;

²⁵ pero atše sêntsejuabná quem boyabása tondaye tonjama, jóbanama chabotsemnana ca. Y más, cachá šonjaimpadá chê Romoca bêts uámana mandado César chabe soyama cháuyanama; chcasna, chca chanjama, chábïoye cha chanjíchmu.

²⁶ Pero atše, atšbe bêts uámana mandádbïoye quem boyabásabïama juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bêts rey Agripa; chca, lempe chacojatjá chentšana, ndayá juabemama atše chaitsebomnana.

²⁷ Er atše sêntsejuabná ndoñe corente juabnyabe soye yomna, canÿe utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

26

Pablo tojanontsé rey Agripbe delante jóyebuambayama

¹ Chentšana, Agripa Pablëbïoye tbojanianyana: —Jóyebuambayama contselesenciana, cach aca chacuenëuyanama ca.

As Pablo, chê réybïoye jachuayama cucuatše tojanatsbaná y jenëuyanama tojanontsé mëntšá jayanama:

² —Atše ndegombre sêntsoyejuá mora chjjobenaye acbe delante jóyebuambayama, uámana rey Agripa, chca, atše jenëuyanama nyetsca soyëngama ntšamo judiënga atšbe contra montsichámuama;

³ y más sêntsoyejuá, taitá conduábuatmama lempe ntšamo judiënga mond-uamancá y condétatšëmbo chê judiënga ndayama imuenoboyebuambnana. Chcasna, Diosmanda uantádoca šmotsoyeuná.

Pablo tojanacuntá ntšamo cha tempo inamnama

⁴ “Nyetsca judiënga mondétatšëmbo ntšamo atše tempscana chëngbeñe tsiyenama, bobontse sënjamna orscana, atše sënjanonÿná luarentše y Jerusalenentše.

⁵ Chëngnaca mondétatšëmbo y montsobena jayanana, chënga tmojtsebošëse, chca ndegombre yomnama; atše nyets tempo fariseucá vida sëndbomna, y chê fariseunga mondoyena más soyënga jtsamëse chê judiëngbe leyëngaca chê inÿe judiëngbïama.

⁶ Y mora, ntšamo Bëngbe Bëtsá bëngbe bêts taitanga tojanašebuachenacá, chê obanënga jtayenama cha yochjamama puerte jtsošbuáchiyëse atše obamana causa, šmojuánatse atšbe contra jayanama.

⁷ Bëngbe bnëtsana uta Israeloca bêts pamíllanga mondobátmana chê šbuachenana soye chëngbïama chaóshjanguama y chíyeca, cada te bnëté y ibeta

chënga Bëngbe Bëtsá mondadorana y mondëserveda. Y atše cach soyama obamana causa, bëts rey Agripa, judiënga mora atšbe contra montsabíchamo.

8 ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

Pablo tojanacuntá, ntšamo tempo cha Jesucristbeñe ošbuáchiyënga yojan-aborlánama

9 “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima,

10 y chca Jerusalenentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiana montsanichamo ora, átšnaca aiñe chca chamoma ca sënjánichamo.

11 Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjëtsemna causa, chë inye luarëngoca bëts pueblënguenáchnaca chënga sënjanëcamena.”

Pablo tojanacuntá ntšamo cha Jesucristbeñe ošbuachiyá tojanóbema (Hch 9.1-19; 22.6-16)

12 “Y cachcá jamama canye te Damascoye sënjëtšaye; chë bachnangbe amëndayënga uabemanëchangá šmonjanëntšabuaché chca jamama y, cachënga choye šmonjanichmó.

13 Pero, uámana rey, chë benachëjana mo nyetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shëconana corente enjëtsebuashinýnyana.

14 Nyëtscanga fsënjánshajaye y atše sënjanuena canye oyebuambnayana, hebreo biyañe, mëntšá šonjëtšatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsoscunjná orcá, cachá jenótsëtšenana ca.’

15 As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca.’

16 Pero matëtšbaná y matëtšá. Atše chonjébëbocna jinýinýiyama aca tchojuábuayanama atše šcochjasérviana, y chacotsetatšëmbuama y entšanga chacuacuntama, mora tconjinýe soyama y más chcoye atšbiana chochanjinýinýiye soyëngámna.

17 Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye chbontsichamná,

18 chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmna, mo ibetiñe cuaftsemnëngcá, sinó mo binýniñcá chamotsemna átšeftaca, atše chë entšangbe juabnënga binýnayá. Satanasbe cucuatšíñe ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchemna, y chca, chëngbe bacna soyëngama perdonánënga chamotsemnama y chënga chamotsebmna canye luare entšangftaca, chë ndëmuanýengbioye Bëngbe Bëtsá tšabe entšanga y chabe entšanga tojábiana, chënga átšbeñe betsošbuáchiyama ca’ ” —cha šonjaniana.

Pablo tojanma ntšamo chë mo otjenayoquëcá tojaninÿcá

19 “Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo šonjaniancá;

20 y natsana, Damascoca entsanga chë tšabe noticiëngama sënjanabuayená; chentšana, Jerusaleñoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chãmuatishachama, y soyënga chamotsama jinÿinÿiyama chca ndegombre tmojanmama.

21 Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana.

22 Pero Bëngbe Bëtsá sempre šonduájabuachana, y chca, cada te mëntscoñama, nÿetscanga Bëngbe Bëtsabiana sëndabuayiná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe.

23 Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentsana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojšošbuáchenga atsebácanënga mochtsemnama ca.’”

Pablo tojanma rey Agrípbioye jáyëñanama, Jesucristbeñe ošbuachiyá chaóbbemama

24 Pablo, cachá jenëuyanama chë soyënga tojánayana ora, Festo mëntšá tojanáyebuchena: —¡Pablo, opá cojtsóbema! Yapa ualíaye causa, opá tcojtsóbemaca.

25 Pero Pablo tbojanjuá: —Opá ndoñe quetsásmëna, bëts uámana Festo; inÿetšá entsemna; atše sëntsoyebuambná nÿets juábnaca, y ndegombre soyënga.

26 Chentše rey Agripa entsuenana, y cha puerte tšabá chë soyëngama endëtatšëmbo, chíyeca, tondayama ntjatauatjácá, atše chabe delante sëntsoyebuambná; atše corente sëndëtatšëmbo chánaca chë soyëngama yotatšëmbuama, er ndayá Jesús tojanmcá, ndoñe tonjopasá ndaye iytëmena chaboye.

27 Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecošbuaché? Atše sëntsetatšëmbo aíñe chiñe cošbuáchemaca —Pablo tbojaniana.

28 Chora Agripa tbojanjuá: —Batsatema más y mašjayëñaná Jesucristbe ustoná atše jóbemamaca.

29 As Pablo tojánayana: —Nÿe batsatema más o bëtscamá más, atše Bëngbe Bëtsá sëntseimpadana, ndoñe nÿe bëndatbe barie, sinó nÿetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemncá ca.

30 Chorna, chë rey, chë mandado, Berenice y chë chëngaftaca imojantbiámanënga tmojantšbaná,

31 y luaroye tmojána chë soyama jencuëntama. Mëntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnásmëna ca.

32 Y Agripa Féstbioye tbojanियana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

27

Roma bëts puebloye Pablo tmojanichmó

1 Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inye utámenënga Julio ca uabainabe cucuatsiñe tmonjánabashejuana. Julio enjamna canya chë Romoca bëts mandadbe soldadënguentša mandayá.

2 Asna, fsënjánašëngo canye Adramitio puebloca barcuñe; ya chë Asioca bëts pueblëngoye juama enjëtsamna. Cesarea pueblentsana fsënjánbocna y Aristárncaca bëngaftaca enjëtsamna; cha enjamna Tesalónica bëts puebloca, Macedonia luaroca.

3 Chë inye yëfsana, Sidón puebloye fsënjánashjajna. Chentše Julio, tsabá mandbomná Pábloftaca enjëtsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama.

4 Sidonocana fsënjëftsanbocentšana, bëngbe contra corente enjëtsëbinýiaye. Chýeca, Chipre fshantsënga catšbioicajana, ndoñe yapa quentëtsëbinýiayëjana bënga fsënjána.

5 Cilicia y Panfilia luarënga bëconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

6 Chë soldadëngbe amëndayá, canye Alejandria puebloca barco chentše tonjáninýena, Italia luaroye yojëtsaye; asna, sonjanamëndá chë barcuñe jenójayiyana.

7 Baseftayentscuana uenana fsënjánana y pordonto fsënjánobená Gnido pueblentsa ndrichiñe jashjanguana. Cabá bëngbe contra enjëtsëbinýiaye causa, Salmón luarëjana fsënjánachnëjna, Creta fshantsënga bëconana, ndoñe yapa quentëtsëbinýiayëjana.

8 Y chca, pordonto bejaycá fsënjánana, fshantsënga bëconana; chentšana, canye pueblo, Tsabe Puertënga ca uabáinentše fsënjánashjajna, Lasea ca uabaina pueblo bëconana.

9 Chca, bayté tonjanochnëngo y chora chë bejaycá jama puerte resjo enjëtsamna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjëtsobeco.

10 Chýeca Pablo chë entsanga mëntsá tonjanabuayená: “Baconga, atše šontsinýana mora puerte resjo entsamna bejaycá játama, y ndoñe tsabá queochátsmëna, ni chë uasmanšhangama, ni chë barcuama y bëngbiana cach ndoñe, mo nderado muanjanóbana ca.”

11 Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduññbioye añe.

12 Ndoñe tsabá yonjamna, chë barco chora enjëtsëmmentše chë uaftena tempëtscuana jëftsemnana; chë causa, nya mo nyëtscanga tmonjanenoyeuná cachiñe bejaycá chentsana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashëngumna enjamna shinýe endbetsenatjëmbambana juachoica tsjuanoicajana y tsmanoicajana.

Mar béjayaíñe puerte uaftena y binýia tojanóshjango

13 Chentsana tonjanontsé tsmanoicana batśá binýiayana, chíyeca chē entsanga tmonjanjuabó ya yojtsanopodena jtétóntśana jama ca. As, chentsana fsēnjéftsanbocna y bejaycá fsēnjána, Creta fshantsēnga beconañjana.

14 Pero baseftayté chentsana, chē fshantsēngocana tonjanontsé corente jabuache binýiayana y chē barquēshoye enjétsoshajuana. Chē binýia yojanabaina Nordeste binýia ca.

15 Chē barcna nýe chē bínýiēbe ponto tonjanontsé uayana; chē binýia enjétsobayējana jama ndoñe quentétsopodena causa, šonjanotocá nýe ntśamo tojtsebinýiacá chaśúyambama.

16 Chentsana fsēnjánachnějna Cauda ca uabaina stēsoicajana, base fshantsēnga mar béjayoca; chíñe ya ndoñe tśa jabuache quentétsēbinýiaye y pordonto fsēnjanobená buyeshoicana jtabocnana chē barco enjanasjá canouše, ndoñe chaondétsóndbemama.

17 Ya chē barquēshoye fsēntanēšēngo orna, chē entsanga lazéjangaca chē barquēsha tmonsanabatsēcaca, más uamorochēsha chaotsamnama. Pero chēnga monjétsauatja nderado chē barco chē Sirte ca uabaina cascajuentše nanjétsánjua; asna, chē barcuentsa ancla tmonjanashēbēútsēna, chē barco ndoñe betesco chaondétsábonjnama, y ntśamo enjétsanbinýiaycá fsēnjána.

18 Chē inýe yēfsana y chē binýiayana cabá jabuache enjétsēma causa, chēnga tmonjanontsé chē barcuentsa uasmanēshangá jtsēshbuétsēšana;

19 y unga tianoye bēngnaca šonjanotocá, cach bēngbe cucuátšeca, chē barcuentsa soyēnga buyeshoye jtsētsánana.

20 Baytentscuana bēnga ndoñe chibiatanobená jinýana ni shinýe, ni estrellatēmēnga, tśa tonjétsēbetata causa; y tśa jabuache enjétsēbinýiaye causa, bēnga ya ndoñe quefstétsanobatmana chentsana jótsbocana.

21 Ya bayté enjétsēma y chēntscuana tondaye saná ntjascá fsēnjétsēma. Chentsana, Pablo bēngbe tséntsaca tonjantsá y tonjánayana: “Baconga, tśabá manjamna atše mašmēnjanoyeuná y Creta luarocana ndoñe matmēnjéftsanbocna; chca mora ndoñe mal mamojtsepasá y ndoñe nýa nýetśá matmēnjobuetše.

22 Pero mora ngmēnaca ndoñe matsmēnēngana; masque chē barco echantsenatjēmba, tśēngaftanguentśá ndocná queochatóbana.

23 Ibeta canýe ángel šonjébēbocna; Bēngbe Bētsá, ndabia atše sēndmēna y nda sēndēserveda, cha tbojichmó;

24 y chē ángel mēntśá šonjauyana: ‘Pablo, ndoñe matauatjana; entseyta aca chē Romoca bēts mandádbioye chacotsama, y aca Bēngbe Bētsábia cómnayeca, nýetsca quem barcuíñe ajnēnga jobanámentśana cha echanjatsebacá ca.’

25 Chcasna, baconga, ndoñe matauatjēngana, er atše Bēngbe Bētsábeñe corente sēntsošbuaché y lempe ntśamo chē ángel šonjauyancá echanjóbcna.

26 Pero mora entseyta canýe fshantse mar béjayaíñe chaśúshejanguama ca” —cha tonjanéyana.

27 Canýe ibeta, uta semana fsēnjánana chentsana chē Adriático ca uabaina mar béjayaíñe fsēnjétsēma, y nýe ínýoye y ínýoye chē binýia šonjétsēyambaye. Y mo tséntseto yojétsēma orna, chē barcuentsa trabájayēnga tmojanjuabó ya fshantse béconana imojétsēma ca.

28 As chënga tmonjanmedidá ntsachetśá chë búyeshe buatyoye inamnama y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canýsëfta metro tonjanóbocna.

29 Chënga monjétsautja nderado bëts ndëtsbéngaca nanjetsántšëtjiamá; asna, chë barco stëtsoicajana canta ancla buyeshoye tmonjanashëbëútsena, chë barco ndoñe más chaondëtsábonjnama, y tśa monjëtseboše betscó chaobínýnama.

30 Chëntscuana, chë barcuentsa trabájayënga tmojánbošena chentšana jt-sachetana; chamna, chënga tmojanontśé chë canouše buyeshoye just-janguana, pero chca imojétsama, mo chë anclënga chë barco natsanoica cuafstštjajuancá.

31 Pero Pablo chë soye tojáninýe, y chë soldadëngbe amëndayábioye y chë soldadëngbioye tonjanëná y mëntśá tonjanëyana: “Chë barcuentsa trabájayënga cach quem barcuentsé ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

32 As, chë soldadënga tmonjána y chë canoušentśa lazëjënga tmontsantëtsetše y buyeshoye chëše tmontsantsatše.

33 Enjëtsebinýana ora, Pablo nýetscanga tonjanaimpadá ndayánaca chamosëngama, mëntśá jáuyanëse: “Ya uta semana entsemna y tšëngaftanga ni mo batśatema chešmatamaná, y tondaye chešmatsbmuánanga.

34 Diosmanda, masque nýe mo batśatëmnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

35 Pablo, chca tonjánayanentšana, canýe tandëše tonjanca y nýetscangbe delante Bëngbe Bëtsábioye tbontanchuá. Chorna, tonjanjatá y tonjanontśé jasama.

36 Chentšana nýetscanga tmonjanenñemó y chëngnaca tmonjanse.

37 (Chë barcuentsé nýetscanga fsënjamna uta patse y canýsëfta bnëtsana y chnënguanënga.)

38 Ntśamo imnaboścá tmonjansentšana, buyeshoye trigo tmontsanashaná, chca, chë barco ndoñe yapa chaondëtsautama.

Chë barco tojtsanenatjëmba

39 Ya tonjanbinýna ora, chë barcuentsa trabájayënga ndoñe quemëntëtsetatšëmbo ndaye fshantse chentše bëtsemnama, pero tmojáninýe chë fshantsentše canýe luare jachañe, chë bëjaye chë luaroye omashjuanentše, y chiñe canýe chënyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana.

40 Asna, chë anclentśa lazëjënga tmontsantëtsetše y chë anclënga buyeshoye tmontsanboshjuana, y chë tímón, chë barco juyambama oservená soyentśa uabatsëcnëjëngnaca tmontsanjafjoná. Chorna, chë barcuentsa natsanoica niñëšifne entšëjua tsbanánoye tmontanëšëngo, y chë binýia tonjanma chë barco chaontśé chë chënyoye juabëconama.

41 Pero chë barco canýe luaroye tonjánashjango, y chentśe chë bëjaye catatoicajana enjetsobuá y chë barco cánýentše, bëtscá cascajo buyeshiñe binýnentše tontsananjó. Chë barcuentsa natsanoica lado chë cascajiñe entsanajuena, ndócnoye juabónjuama ntsopodencá, y chë stëtsoica lado

puerte entsanashatiyíná y lempe entsanandbiamnă, yapa binjia causa y búyeshe chentše enjëtsojantšetaye causa.

⁴² Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama.

⁴³ Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nýtscanga chë jachbabama obenëngna natsana chë buyeshoye joshbuetšana tsachoye chamuashjanguama,

⁴⁴ y chë ínÿengna tablëshënguiñe o chë barcuentsa pedazënguiñe chamoshbuetšama. Y chca, nýtscanga fsënjanobená tšabá y ndocá ntjapasacá fshantsoye jashjanguama.

28

Pablo Malta luaroca

¹ Ya nýtscanga fshantsoca tšabá fsënjëtsemna ora; fsënjántatsëmbona chë luare Malta ca yojanabaina.

² Chë luarentša entsanga bëngaftaca corente tšabá mándbomnënga monjëtsemna; canÿe iñeshe tmonjanangbotjó y šonjanëbuaja choca bënga jatšoboniyama, er tša enjëtsoftena y yapa enjëtšesëсна.

³ Pablo tojanatbaná básefta buashana chamesëfjënga y chë iñeshoye enjëtšeshacjnaye ora, canÿe mëtšcuaye tojánbocna y enjëtšachaye, chentše yapa obonÿaye causa, y Páblëbe cucuatšíñe tontsanonjýa.

⁴ Chë luarentša entsanga, chë mëtšcuaye Páblëbe cucuatšíñe yojtsajonÿanama tmonjáninÿe ora, monjëtšenatsëtsnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnana ca.”

⁵ Pero Pablo tontsanenacuestëtoná y iñeshoye chë mëtšcuaye tbontsantsatše y Pablo ndocá chenatanpasá.

⁶ Chë entsanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntëtsanjuabnaye y tmonjanontšé ichámuana Pablo canÿe dios inamna ca.

⁷ Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina.

⁸ Chë tempo, Públiëbe taitá šocá jutsnëshañe inajájona, calentóraca y buiñeca buamachnëjuanánaca. Pablo tonjána cha jinÿama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjëtšatsmëna.

⁹ Chca tonjanopasá chentšana, chë luarentša inÿe šoquënga Páblëbioye monjánajna y cha enjánashnaye.

¹⁰ Bëtscá tšabe soyënga chentše bëngbiama tmonjanma, y cachiñe játama ya chë barcuñe fsëntanenojayenga orna, lempe ntšamo bejaycá jama šonjanëjbotcá chënga šonjanatšatá.

Pablo Romoye tojánashjango

¹¹ Chë fshantsentše mar béjayoca unga ishinÿe fsënjëftsemna, y chentšana canÿe Alejandriocana yojanabá barcuñe fsënjanenojayé; chë barco nýtsc

uaftena tempo chë luarentse vojétsamna y enjanabaina Cástor y Pólux ca, mo chë romanëngbe uta diosata catsatcá.

¹² Chentšana, Siracusa bëts puebloye fsënjánashajjna y chentse unga te fsënjéftsemna;

¹³ y chentšana fshantse béconana bejaycá fsënjána, Regio puebloye jashjan-guentscuana. Yéfsana, tsmanoicana tsjuanoye enjétsëbinÿiaye, y chca, chë inÿe yéfsana Puteoli puebloye fsënjánashajjna.

¹⁴ Chentse básefta Jesucristbeñe ošbuáchiyënga fsënjánanÿena, y šonjanëbuaja chëngaftaca canÿe semana chentse jéftsajétanama; y chentšana Romoye fsënjéftsanbocna.

¹⁵ Romoca Jesucristbeñe ošbuáchiyënga ya imojétsetatšëmbo bënga choye fchjanashajjna; chcasna, chënga tmonjánbocna bënga jajébenguama canÿe luare Foro del Apio y Unga Tabernënga ca uabainóntscoñe. Pablo chënga tonjánanÿe ora, Bëngbe Bëtsá tbonanchuá y puerte añémoca enjétssemna.

¹⁶ Romoye fsënjánashajjna ora, soldadëngbe amëndayá Páblëbioye tbonjales-enciá cánÿabe yebnentse chaotsiyenama, y tonjanmandá canÿe soldado chabotsebojanÿama.

Ndayá Pablo Romoca tojanma

¹⁷ Choye fsënjánashajnentšana unga tianoye, Pablo tonjanmandá chentse imnoyena judiënga más uámanënga chamobéconama; y nÿetscanga ya tmojánenefjna ora, cha tojanÿana: —Catšátanga judiënga, masque atše tondaye chiyatma bënga judiënga mondbëtsama soyëngama contra, ni bëngbe bëts taitanga imojanamana soyëngama contra, judiënga Jerusalenoca šmonjanishache y romanëngbe cucuatšinë šmonjánboshjona.

¹⁸ Chë romanënga lempe šmonjantjá chentšana, monjétsëboše atše jëtsboshjonana, er ndocna bacna soye chemátaninÿena atše jóbanama chašotsemnana.

¹⁹ Pero chë judiënga ndoñe quemtétseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entsanga, judiëngbe contra jayanama.

²⁰ Chíyeca, atše tconjúbuaja jánÿama y jáuyanama, er ndayama chë Israeloca entsanga puerte jtsošbuáchiyëse mondobátmanama, chë obanënga mochtayenama, atše mora utamená séntsemna ca —tojanëyana.

²¹ Chora chënga tmojanianya: —Bënga ni mo canÿe tsbuanácha Judeocana fchiatáyëngaca acbiana noticiëngaca, y ni canÿe catsata judío, chocana moye ashjajnënguentšá, ndocna bacna soye acbiana chešnatacuntá.

²² Bënga fsëntseboše jouenana ntšamo aca cojuabnama, er ntšamo Jesucristbe ustonëngbiana fstsétatšëmbcá, entsemna ana nÿets luarenache chëngbe contra entsanga imojtsichamo ca.

²³ Asna, canÿe tescama Pablo tmojanianya chca chaotsemnana; y chë tena, ba entsanga chë Pablo posada inabomnoye tmojanobeconá. Y cachëscana tojanjétanëntscuana, Pablo entsanga yojanëtsëtsná Bëngbe Bëtsabe amëndayama, ndayama cha ininÿe y inatátšëmbo; y yojtsentšena chënga jáyëñjanama Jesúsbeñe chamotsošbuáchemá, Moisesbe leyënguentšá soyëngaca y Bëngbe Bëtsabe juabna oyebuambnayëngbe uabemana li-brëšangañe soyëngaca.

²⁴ Bášeftanga aíñe imojtsošbuáchiye ntšamo Pablo yojtšanětsětsnacá ndegombre bétsemnama, pero ínŷengna ndoñe.

²⁵ Nŷetscanga ndoñe cachcá montsanjuabnaye causa, tmojanontsé chentšana jésebocanana. As Pablo tojaněyana: “Nŷets razónaca chě Uámana Espíritu tšěngaftangbe taitanga tojaněyana, Běngbe Bětsabe juabna oyebuambnayá Isaíasbiajana, měntšá:

²⁶ Motsa chě entsanga jauyanama:

‘Bětscá šmochantsuenana, pero tondaye quecmochátěsertana; tša šmochantsafšna, pero tondaye quešmochátinŷe.

²⁷ Muentša entsanga ainánaca josértama ndoñe quemátsboše causa, chěnga nduauenaněnga montsemna y nduabinŷněngnaca;

chěnga bomínŷeca ndoñe chamondobená jinŷama,

ni chěngbe matscuašeca jouenama,

ni chěngbe ainánaca josértama ndoñe chamondobená,

chca, atšbe benache ndoñe chamondishachama,

atše ndoñe ntjátsebacama ca.’ ”

²⁸ Pablo chora měntšá tojaněyana: “Ndegombre šmochtsetátšěmbo, cach quem Běngbe Bětsabe buayenana soyěnga entsanga bacna soyěnguentšana játsebacama, chě ndoñe judiěngbioye mochanjábuayenaye, y ndegombre chěnga cocayé aíñe mochanjóyeunaye ca.”

²⁹ (Pablo chca tojánayana ora, chě judiěnga chentšana imojésebocana y tša imojtsenatsětsnaye.)

³⁰ Pablo uta uata chentše tonjanoquedá canŷe uántšamena yebnentše; y nŷetscanga cha jauatsětsayama monjánajněnga cha enjaněbuájajana.

³¹ Nŷetscangbe delante puerte añémoca entsanga enjanabuayiyná Běngbe Bětsabe aměndayama, y enjanabuatambá soyěnga Běngbe Utabná Jesucrist-biama, y ndocna Romoca mandayá quebějatanauyá chca jtsamama.

Romanos

Pablo Romoca ošbuáchiyënga jacheuayama

¹ Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tsabe noticiëngama entšanga chayábuayenama.

² Ya bayté entsemna, Bëngbe Bëtsá chabe juabna oyebuambnayëngaftaca chë tsabe noticiënga entšanga tojanašebuachená, y chënga chca tmojëtsanábema Bëngbe Bëtsabe uabemana palabrënguifë.

³⁻⁴ Chë tsabe noticiëngna, chabe Uaquiñá Bëngbe Utabná Jesucristbiamna jtsóyebuambnayana. Entšá quetsomñecana, tojanonýna canýe rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyë Jesucristo chabe Uaquiñá bëtsemnama. Cha chca tojaninýanyë chë Uaquiñá cháuatayenama cha tojanma ora.

⁵ Chábeyeca, Bëngbe Bëtsá atše canýe bëtš soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama.

⁶⁻⁷ Tsëngaftángnaca chëngbeñe šmontsemna, tsëngaftanga chë Romoca šmoyenënga, ndëmuanýyënga Bëngbe Bëtsá tcmojáchembo Jesucristbenga chašmotsemnama. Atše tsëngaftangbiamna sentsabiamná, tsëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama, y chaboma tsëngaftanga ainaniñe tsabe ebionana chašmotsebonnama.

Pablo tša inaboše Roma bëtš puebloye jama

⁸ Jabojátšamna, Bëngbe Bëtsá, Jesucristbiajana šcuatschuá, cada ona tsëngaftanguentšabiamna, er nyets quem luariñe entšanga tša monjesoyebuambná tsëngaftanga Jesucristbeñe bëtšcá šmojtsošbuáchema.

⁹ Bëngbe Bëtsá, nda nyets ainánaca sëndëservedna, tsabe noticiënga chabe Uaquiñabiamna abuayiynayiñe, endëtatšëmbo atše nyets tempo Bëngbe Bëtsáftaca stsencuënta ora, tsëngaftangbiamna sëndëtseimpadanama;

¹⁰ y mora Bëngbe Bëtsá sëntseimpadana, nya mora y cha tojtsebošëse, chašolesenciá jama tsëngaftanga jautsëtsayama.

¹¹ Er atše tša sënjëseboše tsëngaftanga jányama, chca, atše chayobená jamana chë Uámana Espiritbentšana yóbocana tsabe soyënga tsëngaftanga chašmotsebonnama; y chca, tsëngaftanga ainaniñe bëtš añemo chašmotsebonnama, y Jesucristbeñe corente chašmotsošbuáchema;

¹² o más tsábá jayanamna, tsëngaftanga y átšeftaca mochjenájabuache ainaniñe bëtš añemo jtsebonnama, tsëngaftanga y átšnaca Jesucristbeñe tša imošbuachéyeca.

¹³ Y morna, Jesucristbeyeca catšátanga, sëntseboše tsëngaftanga chašmotsetátšëmbo atše ba soye jama tijájuaboma, tsëngaftanga jautsëtsayama, pero mëntsoñama ndoñe tsjobenaye. Atše sëntseboše ndayá chayobená jamana ínýyënga tsëngaftangbioca Jesucristbeñe chamotsošbuáchema, ntšamo ínýyëngbeñe ndoñe judiëngbeñe tonjopasacá.

14 Atše Jesucristbiamá canye oservená sēndmēna, y chíyeca nyētscángaftaca obligaciōnaca sēntsemna, chē pueblēnguiñe oyenēngaftaca y bēn tjoye oyenēngaftaca, chē uatsjinñyenēngaftaca y ndoñe chcangaftácnaca.

15 Chíyeca atše tša sēntseboše tšēngaftanga chē Romoca šmoyenēngnaca chē tšabe noticiēnga jábuayenama.

Chē tšabe noticiēnga Bēngbe Bētsabe obenana jtsinñyanñyanana

16 Atše ndoñe quetsátēuatja chē tšabe noticiēnga jtsabuayinayama, er chē noticiēnga jtsinñyanñyanana Bēngbe Bētsabe obenana; y chē obenánaca, nyētscanga Jesucristbeñe ošbuáchiyēnga jtsobenana atsebácanēnga jtsemnana, natsana chē judiēnga chca ošbuáchiyēnga, pero chē ndoñe judiēngnaca.

17 Er chē tšabe noticiēnga jtsinñyanñyanana ntšamo Bēngbe Bētsá inétsama entšanga chabe bominiñiñe tšábenga chamotsemnana. Y entšanga chabe bominiñiñe tšábenga jábiamana, chēnga Jesucristbeñe tmojtsošbuáchema. Ntšamo Bēngbe Bētsabe uabemana palabrénguiñe endayaná: “Nyē ndabiamá Bēngbe Bētsá tojama chabe bominiñiñe tšabia chaotsemnana, cha Bēngbe Bētsábeñe betsošbuáchema, cha ndegombre chē nyētsca tescama yomna tšabe vida echántsebomna ca.”

Bēngbe Bētsabe delante nyētscanga culpa bomnēnga mondmēna

18 Bēngbe Bētsá celocana tojinñanyé, chē uabouana castigo, tša tbojetnama entšangbiamá chaotsemnana, ainaniñe bacna juabnēnga bomnēngbiamá y chē bacna soyēnga amēngbiamá y ndēmuanyēngbiamá, masque Bēngbe Bētsabe ndegombre soyēnga jtsotatšēmbñana, tša bacna soyēnga tmojtsama causa, ndoñe ntjalesénciana cachēnga jtsiyenama ntšamo ndegombre yomncá.

19 Bēngbe Bētsá echanjácastigaye, er ntšamo entšanga imobencá Bēngbe Bētsabiamá jtsetatšēmbuama soye, chēngaftaca sempre endétsemna. Y chca endmēna, Bēngbe Bētsá chē soye tojinñanyéyeca.

20 Bēngbe Bētsá quem luare tojanma orscana, entšanga mondetsovena botamana josértana, Bēngbe Bētsabe obenana ndocna te yochjéftsopochócama y cha ndegombre Bēngbe Bētsá yomnana. Chē soyēnga Bēngbe Bētsabiamá entšanga quemuátobena jinñana; nyē jtsetatšēmbuamna aññe. Entšanga mondobena chē soyēnga Bēngbe Bētsabiamá jtsetatšēmbuana, cachá tojanma soyēngaca. Chcasna, chēnga ndoñe quemuátobena jayanana bacna soye tmojama, cha nduabuatma causa ca.

21 Chēnga Bēngbe Bētsabiamá mondetatšēmbo, pero ndoñe ntsebošana chábioye jadórana, “aca ndegombre Bēngbe Bētsá condmēna ca” jtsichámēse, ni cha ntsatschuanayana. Pero, ntšamo chēnga tmojtsejuabnacá tondaye ntsámanana; ndoservena juabnēngaca y bacna juabnēngaca montsiyena, y chca, chēnga montsiyena, jtsamēse ntšamo cachēngbe juabnēnga yomncá, mo ibetiñe cuaftsajncá.

22 Chēnga jtsichámuana corente osertánēnga imomna ca, pero ndegombrna juabna ndbomnēnga mondmēna.

23 Chēnga ndoñe ntsadoránana Bēngbe Bētsá, chē ndocna te yochjéftsobaná; chē cuenta, soyēnga tmojobopormá mo entšangcá, y chēngna aññe jóbanana; o soyēnga shloftšēngcá o bayēngcá, o osjojnayēngcá, y chēnga diosēnga imomna ca jtsejuabnayēse jtsadoránana.

24 Chíyeca, Bëngbe Bëtsá cachcá tojónÿa, cachëngbe ainaniñe puerte bacna juabnëngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna.

25 Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentse tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

26 Entšanga chca ndoñe tšabá tmonjámayeca, Bëngbe Bëtsá cachcá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásëngnaca tmojtsajbaná boyabásëngaftaca jtsamana ntšamo tšabá yomncá, inÿe shembásëngaftaca bacna soyënga jtsamama.

27 Cachcá, boyabásënga tmojtsajbaná shembásëngaftaca jtsamana ntšamo tšabá yomncá; y tša imojtseboše inÿe boyabásëngaftaca bacna soyënga jt-samama. Chënga chë inÿe boyabásëngaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.

28 Chënga ndoñe tmonjábošena jtsiyenana jtsejuabnayešë, ntšamo entšanga Bëngbe Bëtsabiana imotatsëmbcá ndegombre bëtsemnana. Chíyeca Bëngbe Bëtsá cachcá tojónÿa, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá.

29 Chënga nÿetscna bacna soye jtsamana: ainaniñe nÿetscna bacna juabna jtsebomnana, nÿe cachëngbiana bëtscá soyënga jtsebomnana tša jésebošana, y ínÿengbiye ntšámncá jáborlama jtsebošana; chënga nÿe játsbošana inÿa tojtsebomna soyënga jtsebomnana, ínÿenga jtsëbánayana. Mondmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátsenayënga.

30 Chënga ínÿengbiana podësca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámna ca jésejuabnayana, tša jtšenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbiye ndoñe ntsayaunanana.

31 Chënga ndoñe ntsebošana chë tšabe soyëngama chaósertama, ton-dayama palabra ndbomnënga, ndocnábiye ntsebomnshánana y ndocnabi-ama ntjóngmiana.

32 Y chënga corente mondétatsëmbo chca soyënga amëngbiana, Bëngbe Bëtsá chabe leyíñe tojayana jóbana yojtsëmerecena ca; pero masque chca, chënga nÿets tempo chca jtsamana, y oyejuayënga jtsëñÿayana ínÿenga cachcá tmojtsama ora.

2

Bëngbe Bëtsá echanjama chë ndoñe tšabe soye amënga bëtš castigo chamot-sebomnana

1 Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiana šmojtsichamo ora, jtsinÿanÿnayana cach tšëngaftangnaca ndoñe tšabá

šmonjamama, y castigánënga jtsemnama cmontsamna, er tšëngaftanga cachëngcá šmojtšiyena.

² Bënga mondétatšëmbo, Bëngbe Bëtsá ntšamo ndegombre yomncá inétsamama, chë chca amëngbiama ndoñe tšabá tmonjama ca y castigánënga jtsemnama yojtšamna ca cha tojayana ora.

³ Y tšëngaftanga, chë inyënga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentšana šmochjotsbocá ca?

⁴ Bëngbe Bëtsá tšëngaftangbiama corente tšabe juabna endbomna; mora ndoñe quecmátacastigaye, y tšëngaftangaftacna puerte uantado nye chca endésemna. ¿Chama tšëngaftanga cha šmojtsábotena? ¿Ndoñe šmondétatšëmbo Bëngbe Bëtsá chca corente jtšababuányëshanëse cmojtsënyä, tšëngaftanga juabna chašmotrocama y chabe benache chašmuishachama cha yobóšeyeca?

⁵ Er tšëngaftanga ndoñe quešmátšboše chacmotsësertánama, y bacna soyënga amama jtsajbanama ndoñe quešmátšboše causa, šmontsama más bëts castigo chašmotsebonnama, chë ndayté Bëngbe Bëtsá ntšamo entšanga tmojamcá tšabá o ndoñe tšabá bétsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebonnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjnyänyiye cha tša tbojetna, entšanga ndoñe tšabá tmonjamama.

⁶ Chca, chë te, ntšamo cada ona tojëftsemama, Bëngbe Bëtsábentšana echanjóyëngacñe.

⁷ Ndëmuanýënga nyëts tempo tšabá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiama tšabá chaotsoyebuambná y tšabe vida jtsebonnama chaoma; chë te chëngbiama Bëngbe Bëtsá echanjama, chë nyëtsca tescama yomna tšabe vida chamotsebonnama.

⁸ Inyënga imoyena, nye cachëngbe juabnéngaca cachënga tšabá jtšomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nyëtsca tescama castigánënga jtsemnama chënga yojtšamna ca.

⁹ Bëngbe Bëtsá echanjama, chca amëngna puerte chamosufrima y lastemcá chëngbiama chaotsemnama, er yapa tsetšënaná chëngbiama echanjëftsemna; chca echántsemna chë chcángbeñe judiënga imomnëngbiama natsana, y ndoñe judiëngbiámnaca.

¹⁰ Pero chë te, Bëngbe Bëtsá echanjama, ntšamo tšabá yomncá amënga puerte uámanënga chamotsemnama, chëngbiama corente tšabá echanjóyëbuambaye, y echanjama chënga cháftaca tšabá tempcá chamotsatšmënama; y chca echántsemna chë chcángbeñe judiënga imomnëngbiama natsana, pero ndoñe judiëngbiámnaca.

¹¹ Er Bëngbe Bëtsabiama nyëtscanga cachcá monduámána.

¹² Chë Moisesbe ley ndoñe monduábomnënga, bacna soye tmojamamna castigo mochántsebonna, masque leyënga ndoñe tmonduábomnëse, ndayá yojtšamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebonna ca, chë leyënguiñe iuayana soyëngaca.

13 Chca endmëna, er Bëngbe Bëtsá ndoñe queonÿbatsma entšanga chabe bominiÿñe tšábenga chamotsemnama, nÿe ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojtsamncá tmojtsamëse.

14 Chë ndoñe judiënga chca leyënga ndoñe quematábomna, pero chëngbe ainantša juabnënga tojtsëtsëtsná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinÿanÿnayana tšabá imotátšëmbo ndayá aiñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaÿyanama.

15 Ntšamo tmojtsiyencá chënga jtsinÿanÿnayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabncá ndayá cachënga tmojamama, jtsinÿanÿnayana chënga ntšamo chë leyiñe yomandánama cachcá imojuabnama. Inÿe ora, chëngbe juabnënga echantsëtsëtsnaye aiñe o ndoñe tšabá tmonjama ca; y ndayté, Bëngbe Bëtsá nÿetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínÿanÿÿe ndayá tšabá o ndoñe tšabá tmonjamama.

16 Chë te, Bëngbe Bëtsá nÿetscangbiama echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninÿama; cha chca echanjama Jesucrístoftaca; y chë atše sëndabuayiná tšabe noticiënga entsichamo ndegombre chca yochtsemnama.

Judiënga y Moisesbe ley

17 Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jt-senábotamnayana Bëngbe Bëtsabe ubuáyana entšanga šmomna ca;

18 tšëngaftanga chë ntšamo Bëngbe Bëtsá yobošcá tšëngaftanga chašmotsamama tatšëmbënga, y chë leyentšana šmojuatsjinÿe jobocacayana ndayá más tšabá jamama tojtsemncá.

19 Tšëngaftanga tša jésejuabnayana, šmobena ínÿenga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaft-semnëngcá, o mo chë ndoñe binÿniñcá oyenëngbe juabnënga binÿnayëngcá;

20 tšëngaftanga jtsejuabnayana chë ntšamo tšabá yomncá ndosertánëngbiama abuayinayënga šmomna ca, y mo chë basengcá tondaye nduatsjinÿenëngbiama abuátambayënga ca. Tšëngaftanga tša jésejuabnayana chë ley šmobomnama, lempe smotátšëmbo ca y ntšamo šmojtsichamcá ndegombre yojtsemna ca.

21 Y chcasna, tšëngaftanga chë ínÿenga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínÿengbioye jtsabuayinayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana?

22 Tšëngaftanga jtsichámuana, acbe shema o boyábioye ndoñe ínÿaftaca cattšëngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyëñjana soyënga chë ndayama ínÿenga tmojtsichamo diosënga yomna ca y jtsadóraryana; as, ¿ndáyeca chë soyënga chënga jadórama yebnënguentšana uámana soyënga šmnëtsatbëbana?

23 Tšëngaftanga tša jtsenábotamnayana chë ley šmobomnama; as, ¿ndáyeca šmonÿbétsama ínÿenga Bëngbe Bëtsabiama podësca chamotsóyebuambnama, tšëngaftanga chë leyentša mandënga jobedësama ndocna te ntsebošana causa?

24 Chama, Bëngbe Bëtsabe uabemana palabrenguife mëntśá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiama ndoñe tšabá quematoyebuambná ca.”

25 Tšëngaftanga ntšamo leyife yomandancá šmojtsamëse, Bëngbe Bëtsábenga šmomnana jin'yan'yiyama, chë más delicadentse base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntoservénana, y chca, tšëngaftanga jtsemnana mo chë más delicadentse base bobachtema ndëtëtšenëngcá.

26 Y chë ndoñe judiënga chë más delicadentse base bobachtema tëtšenënga, judiëngcá ndoñe quemátsmëna; pero chënga ntšamo leyife yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá.

27 Y chca, tšëngaftanga judiëngbiama Bëngbe Bëtsá echanjayana ndoñe tšabá šmonjama ca, ntšamo leyife yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyife yomandancá mondocumplina, pero chënga ndoñe quemátsmëna tšëngaftangcá tëtšenënga, jtšin'ynama Bëngbe Bëtsábenga šmomnana. Tšëngaftanga, masque Bëngbe Bëtsabe uabemana ley šmonduábomna y chë más delicadentse base bobachtema tëtšenënga šmondmëna, cabá ndoñe šmontsama ntšamo leyife iuayancá, ndayá jamama cmojtsamnama.

28 Chcasna, nda chë más delicadentse base bobachtema tmojatëtse ora, chábioye chë soye ndoñe ntjábemana canye ndegombre judío. Y canye entśá ndoñe Bëngbe Bëtsábia ntsemnana nye in'yënga chë más delicadentse base bobachtema tmojatëtšama.

29 Y canye entśá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entśá yomnama tojtsin'yan'ynase. Y chca, canye ndegombre judío, Bëngbe Bëtsabe entśá yomnama chaotsin'ynamna ndoñe quenátsmëna chë más delicadentse base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebín'ynama. Bëngbe Bëtsabe Espiritu jamana entśá chca ainana chaotsebomnama, ndayá inétsin'yan'yenaye cha canye ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiama ichamuá; entšanga ndoñe.

3

1 Chcase, ndánaca šuatjatjaye, as ¿Bëngbe Bëtsabe entśá jtsemnana jëftsasháchama, más tšabá yojtsëmna canye judío jtsemnana ca? ¿Base bobachtema chë más delicadentse tëtšená jtsemnana becá yojtsámama ca?

2 Aíñe, chca jtsemnana corente enduámama y nyetsca soyënguife; natsana chjayana, Bëngbe Bëtsá, judiënga chabe palabra tojanaban'yé, nyetscangbiama chamotsin'yenama.

3 Y morna, ¿ndayá yochjopása nderado judiënguentse báseftanga ya ndoñe chca tmonsentsënëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana?

4 ¡Ndoñe, ndegombre ndoñe! Chca ndoñe cha queochatsma; tšëngaftanga šmondëtatšëmbo Bëngbe Bëtsá sempre endbëtsama ndayá jamama tojašebuachenacá, masque nyetsca entšanga bosterënga chamotsomñe.

Er Bëngbe Bëtsabe uabemana palabrënguifë Bëngbe Bëtsabiana mëntšá endayana:

Aca ntšamo chacojayana ora, nyëtscanga mochanjinÿe aca ntšamo ndegombre yomncá cnétsamama;

y chacojtsenëuyan ora, sempre cochanjinÿanÿiye acbe contra tmojtsoyebuambnángbioye, chënga ndoñe tšabá montsamama ca.

⁵ Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entšanga más tšabá jinÿama tmojt-sobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiana castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama mond-uamancá.)

⁶ ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nyëts tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nyëtsca quem luarentša entšangbiana, ntšamo tmojamcá tšabá o ndoñe tšabá bétsemnama.

⁷ Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamana y bëtsá yomnama jinÿanÿiyama, y Bëngbe Bëtsá sempre ntšamo ndegombre yomncá tojtsamama jinÿama entšanga tmojtsoebenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canÿe bacna soye amá stsemna ca?”

⁸ Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entšanga chámuinÿe Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabu-atambá ca; Bëngbe Bëtsá chca abuátambayënga echanjácastigaye, ntšamo castigánënga jtsemnama imomerecencá.

Ntšamo entsá tojtsamama, Bëngbe Bëtsabe bominÿiñe ndocná tšabia ntsemnana

⁹ Y asna, ¿Bëngbe Bëtsá bënga judiënga inÿengbiana más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe judiëgnaca, chë bacna soyënga jamama juabnéngaca mandánënga imomnana.

¹⁰ Er Bëngbe Bëtsabe uabemana palabrënguifë mëntšá endayana: Ntšamo entsá tojtsamama, ndocná Bëngbe Bëtsabe bominÿiñe tšabia quenátsmëna.

¡Ndoñe, ndegombre ndoñe, ni mo canÿa chca quenátsmëna!

¹¹ Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bëngbe Bëtsáftaca jtsemnama!

¹² Nyëtscanga ndoñe tšabe benache tmojtshache y chiñe montsajna.

Chënga nyëtscanga Bëngbe Bëtsabe bominÿiñe tondayama quemátoserverna.

Ndocná quenátsmëna ntšamo tšabá yomncá chaotsamama, ¡ni canÿa ndoñe!

¹³ Ntšamo tmojtsichamcá puerte bëts bacna soye jtsemnana, mo canÿe obanabe cuevëshe atëfnëshe puerte bacá tojtsonguëtsecá.

Chënga tmojtsoyebuambná soyëngaca inÿengbioye jtsaíngñayana.

Chë tmojtsichamo soyëngaca puerte bacna soye inÿengbiana jtsamana, mo canÿe mëtscuaye tbojtseftëtše orcá, chë veneno canÿe entšábioye jóbana.

¹⁴ Chënga, nyëts tempo inÿengbiana podesca jtsichámuana, y siempre jtsóyebuambnayana chë inÿenga ntšámncaca jáborlama.

15 Sempre jtseprontánana ínÿengbioye ntšámnaca jáborlama y jobáyama.

16 Chénga sempre jtsiyenana ínÿenga chamotsesufrínama jtsamése, y nÿe ntšámnaca jtsaborlánana.

17 Chénga ndocna te tondaye ntjamana nÿetscanga natjémbana chamotsiyenama;

18 Chénga ndoñe ntsiyenana Bèngbe Bètsabiana jtsejuabnayése, cha ché más bètsá nÿetscangbiana yomnama ca —chiñe endayana.

19 Er bènga mondétatšëmbo, lempe ntšamo leyíne iuabemancá, ché leyèngaca mandánènga imoyenèngbiana yomnama. Chcasna, ché ley endmèna, Bèngbe Bètsabe delante ndocná chaondobená jayanama, cha ndoñe tsabá tonjama, chama ndoñe yonjátatšëmbo causa ca; y endmèna jinÿanÿiyama, ntšamo tmojamcá tsabá o ndoñe tsabá bétsemnama Bèngbe Bètsá nÿetscangbiana yochjayana ora, nÿetscanga yojtsamna chabe delante jayanama, ndáyeca ntšamo tsabá yomncá ndoñe tmonjama ca.

20 Er, Bèngbe Bètsá ndoñe queochatsma ndocná chabe bominiñe tsabia chaotsemna, ntšamo leyíne yomandancá cha tojamama; ché ley bèngbiana jamana, nÿe bènga bacna soye tmojamama chamotsetatšëmbuama.

Ntšamo Bèngbe Bètsá inama entsanga chabe bominiñe tsábenga chamotsemnama

21 Pero mora, Bèngbe Bètsá tonjinÿanÿé ntšamo cha inama entsanga tsábenga chabe bominiñe chamotsemnama; y Bèngbe Bètsá ndoñe ntjamana canÿa chabe bominiñe tsabia chaotsemnama, ntšamo ibomncá cha tojtsamama, ntšamo ché leyènguiñe y mandènguiñe yomncá. Pero masque mora chca, Bèngbe Bètsá tonjinÿanÿé, Moisesbe leyíne y Bèngbe Bètsabe juabna oyebuambnayèngbe librèšangañe yopodena jinÿenana chca yochtsemnama.

22 Bèngbe Bètsá jamana entsanga chabe bominiñe tsábenga chamotsemnama, chénga Jesucristbeñe tmojtsošbuáchema. Bèngbe Bètsá nÿetscanga Cristbeñe ošbuáchiyèngbiana chca jamana, y chabiana nÿetscanga cachcá monduámama;

23 er nÿetscanga bacna soye tmojama, y ché causa, ndocna entsá tonjobená jashjáchana ndocna bacna soye ndbomná jtsemnama y puerte bètsá jtsemnama, ntšamo Bèngbe Bètsá tojanjuabocá entsanga chamotsemnama.

24 Pero Bèngbe Bètsá chéngbiana corente tsabe juabna bómnyeca, mo ndayá cuafjatšatacá, cha jamana chénga chabe bominiñe tsábenga chamotsemnama. Bèngbe Bètsá chca tojanma, Cristo Jesúsbeyeca, entsanga atsebácanènga chamotsemnama y ya ndoñe más bacna soyènga jamama juabnèngaca mandánènga chamondétsemnama cha tojanma ora.

25 Bèngbe Bètsá cha tbojanábuayana, chabe buíne juabuáshanése y jóbanése, cha chaotsemna ndábeyeca Bèngbe Bètsá entsanga bacna soyèngama jáperdonama; Jesucristbeñe jtsošbuáchiyése entsanga jobenayana perdonánènga jtsemnama. Bèngbe Bètsá chca tojanma, jinÿanÿiyama cha inétsama entsanga tsábenga chabe bominiñe chamotsemnama, ché entsanga bacna soyènga tmojanmama ché tempo ntjatonÿaycá, er cha ché tempo corente uantado chéngaftaca yojtsemna y chéngbe bacna soyèngama ndoñe yonjánacastigaye.

26 Cha lempe chca tojanma, jinÿanÿiyama cha sempre ntšamo ndegombre yomncá inétsamama, y nÿetscanga Jesucristbeñe ošbuáchiyènga chabe bominiñe tsábenga chamotsemnama inétsamama.

²⁷ Chcáyeca, entsá ndoñe ntobenana tondayama ntsenábotamnayana. Chca endmëna, er Bëngbe Bëtsá tšabia chabe bominiñiñe jabemana, ndoñe ntšamo leyiñe tomandancá cha tojtsamama, sinó nye Jesucristbeñe tojtsošbuáchema.

²⁸ Y chca jayanëse, mora bënga tšabá montsetátšëmbo, Bëngbe Bëtsá inétsama canye entsá tšabia chabe bominiñiñe chaotsemnama, nye Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

²⁹ ¿O Bëngbe Bëtsá nye judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna;

³⁰ er nye canye Bëtsá nyetscangbiama endmëna, y cha echanjama chë más delicadentse base bobachtema tétšenënga imomnëngbiama y ndoñe chcangbiámnaca, chabe bominiñiñe tšábenga chamotsemnama, Jesucristbeñe tmojtsošbuáchema.

³¹ Chcasna, Bëngbe Bëtsá jamana entsanga chabe bominiñiñe tšábenga chamotsemnama, Jesucristbeñe tmojtsošbuáchema; ¿chca yojsayana chë ley nye tondayama yondoservena ca? ¡Ndoñe, ndegombre ndoñe! Inyëtsá, chca jamana chë ley más chaotsámanama.

4

Ntsamo Abrahánofaca tojanopasá

¹ Morna Abrahambiana mochjóyebuambaye, bëngbe tempsca bëts taitá, y mochjinye ndayá tojánatsjinye Bëngbe Bëtsábeñe ošbuáchiyana bomnentšana.

² Abraham chabe bominiñiñe tšabia chaotsemnama, ndayá cha tojanmama Bëngbe Bëtsá matëñjanmëse, cha matëñjanobená entsángbeñe ndayama jtsenábotamnayana, pero Bëngbe Bëtsabe delante ndoñe;

³ er Bëngbe Bëtsabe uabemana palabrënguiñe mëntsá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñiñe tšabia yojamna ca.”

⁴ Canye entsá trabajayá, crocénana josháchiñana ndayá tojamama, pero chë crocénana ndoñe nye tsetánana ntsemnana, sinó chana jtsemnana ntšamo cha tojtsomerecencá.

⁵ Er menójuabonga, nda tondaye tontsama Bëngbe Bëtsá cháuyanama cha chabe bominiñiñe tšabia yomna ca, pero aíñe tojtsošbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiana Bëngbe Bëtsá echanjama chabe bominiñiñe tšabia chaotsemnama, chabe ošbuáchiyama.

⁶ Rey David cachcá chabe librëšañe tojánayana, chë ndabiama Bëngbe Bëtsá jayanana chabe bominiñiñe tšabia chaotsemna ca, masque chabiana chca cháuyanama tondaye tojanmëse. David chca entsabiama tojánayana, cha puerte echantsoyejuaye ca.

⁷ Chabe librëšañe mëntsá tojanábema:
¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga,
chë Bëngbe Bëtsá chëngbe bacna soyënga tojabuajuánanga!

⁸ ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

⁹ ¿David tojánayana nye chë más delicadentse base bobachtema tétšenënga imomnëngbiama oyejuayana yomna ca? Ndoñe; ndoñe chca mondmëñëngbiámnaca. Y muentse tmonjayana, Abraham Bëngbe Bëtsábeñe

yojtsosbuachéyeca, Bëngbe Bëtsá tojánayana cha chabe bominiñi tšabia yojamna ca.

10 Y ¿ntseco chca tojanopasá? ¿Abraham ya chë más delicadentše base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora.

11 Y cabá chentsána, Abraham base bobachtema chë más delicadentše tëtšená yojtsemna; y chca yojamna jinñanñiyama, Bëngbe Bëtsá tempo ya chabiamá tojánayana cha chabe bominiñi tšabia yojamna ca, cha Bëngbe Bëtsábeñe yojtsosbuáchema. Lempe chca tojanopasá, jinñanñiyama Abraham mo taitacá yomnama Bëngbe Bëtsábeñe imosbuachéngbiamá, masque ndoñe base bobachtema chë más delicadentše tëtšenénga mondmëna. Y cachcá Bëngbe Bëtsá chë ošbuáchiyéngbiamá tojánayana, chénga chabe bominiñi tšábenga imomna ca.

12 Y Abrahámnaca endmëna mo chë taitacá, chë más delicadentše base bobachtema tëtšenénga imomnéngbiamá, pero añe Bëngbe Bëtsábeñe corente jtsosbuáchiyëse imoyenéngbiamá, cachcá ntšamo bëngbe bëts taitá Abraham Bëngbe Bëtsábeñe yojtsosbuachecá. Y cha cabá chë más delicadentše base bobachtema ntsetëtšena ora, ya chca yojtsosbuáchiye.

Jtsosbuáchiyëse, ntšamo Bëngbe Bëtsá tojašebuachenacá jóshjanguana

13 Bëngbe Bëtsá tojanašebuachená Abrahambiamá y chábéntšana entsangbiamá, quem luare chéngbiamá yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojsanošbuáchema, y chíyeca Bëngbe Bëtsá tojánayana cha chabe bominiñi tšabia yojamna ca.

14 Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsaméngbiamá yojtsemna ca tmojanayëse, Bëngbe Bëtsábeñe jtsosbuáchiyana tondayama nantsoservena, y ntšamo Bëngbe Bëtsá tojanašebuachenacá tondaye ntsámanana.

15 Chë ley juabocnana, Bëngbe Bëtsá puerte etonaná entsanga cháuacastigama, chénga ntšamo chiñe iuayancá ndoñe tmontsamama; pero ndocna mandénga tontsemnése, ndocná ntšobenana chë ndoñe tontsayancá ndoñe ntjamana.

16 Y chca, Bëngbe Bëtsá Abrahámboye tbojansbuachená, cha yojsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imosbuáchema mo Abrahámbéntšana entsangcá imomnéngbiamá; y Bëngbe Bëtsá chca tojanašebuachená, cha chéngbe tšabiamá iuantjésnayeca. Chë mo Abrahámbéntšana entsangcá imomnéngbeñe, ndoñe quemnatmëna nñe chë ntšamo ley yomandacá imnëtsaménga, sinó nñetscanga chë ntšamo Abraham tojanošbuachecá Bëngbe Bëtsábeñe imosbuachéngnaca. Y Abraham nñetscanga bëngbiamá, Bëngbe Bëtsábeñe ošbuáchiyénga, mo taitacá endmëna.

17 Ntšamo Bëngbe Bëtsábe uabemana palabrénguiñe endayancá, Bëngbe Bëtsá Abrahámboye ibojtsatsëtsnaye ora: “Atše sënjama aca ba luariñe entsangbiamá atšbe bominiñi taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiamá yojanjuabná; y Bëngbe Bëtsá endmëna ndábeñe Abraham yojsanošbuaché, y nda inétsama entsanga chámuatayenama, y nda inamánda y entsanga jobenayana jinñama ndayá ndocna te tmonjaninýcá.

¹⁸ Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnama, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojaniancá: “Acbentsana entšanga tša mallajta mochántsemna, ndocná queochatobenaye jacúntana ca”.

¹⁹ Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonyaye ya bëtsanáñjema yojtsemnama, er ya mo patse uata yojtsebmoma, y chabe shema, Sara, ndoñe yonjobena šešonga jtsabamnana.

²⁰ Abraham ndocna te tonjanajbaná Bëngbe Bëtsábeñe ošbuáchiyana, y ni mo canyë ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparéjána ca; sinó más corente chábeñe yojtsanošbuaché, y chca Bëngbe Bëtsáboiyë ibojtsaschuanaye,

²¹ er cha tšabá inatátsëmbo, ntšamo tbojanšbuachenacá jamama, ndegombre Bëngbe Bëtsá obená inamnana.

²² Chíyeca, Bëngbe Bëtsá tojánayana cha chabe bominiñe tšabia yojamna ca.

²³ Pero, chabe bominiñe tšabia yojamna ca Bëngbe Bëtsá tojánayana ora, ndoñe nye Abrahamiama chca ntsóyebuambnayana;

²⁴ ndayá bëngbiámnaca, ndëmuanyëngbiama Bëngbe Bëtsá yochjayana chabe bominiñe tšábenga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama.

²⁵ Bëngbe Bëtsá tojanalescía entšanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominiñe tšábenga jábiamama.

5

Mora bënga Bëngbe Bëtsabe bominiñe tšábenga montsemna

¹ Er Bëngbe Bëtsá tojama bënga chabe bominiñe tšábenga chamotsemnama, bënga chábeñe imošbuachéyeca; mora tempcá tšabá Bëngbe Bëtsáftaca bënga montsásmëna, Bëngbe Utabná Jesucristbeyeca.

² Bënga Crístbeñe mondošbuáchemá, cha tojama bënga chamotsetatšëmbuama Bëngbe Bëtsá tša tšabia yomnama, y Bëngbe Bëtsábiocana tšabe soyënga jtsebmone mora chamotsiyenama. Bënga tša oyejuayënga jësemnana, er Bëngbe Bëtsábeñe jtsošbuáchiyëse mondobátmana cha puerte uámanënga y bëtsétsanga šochjábiama, batšá ntšamo cachá yomncá.

³ Y ndoñe nye chama bënga oyejuayënga jësemnana, ndayá bënga tmojtseufrina y padecena soyënguiñe tmojtajna órnaca. Chca mondbama, er bënga mondetatšëmbo bënga tmojtseufrina orna, bënga juatsjínýana ntšamo uan-tadënga jtsemnama padecena soyënguiñe tmojtsemna ora, Bëngbe Bëtsábeñe jtsošbuáchiyëse.

⁴ Bënga padecena soyënguiñe tmojtsemna ora, más tšabá uantadënga jtsemnama mondobéyayeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tšabá tmojachnëngo ora. Bëngbe Bëtsá oyejuayá bëngaftaca chaotsemnama bënga tmojama ora, bënga jtsobenana más jtsobátmanana, ntšamo šojašebuachenacá cha yochjamama.

⁵ Bënga chca tmojtsobatmanëse, ndocna te nye bonamente quemochatobátmana, er Bëngbe Bëtsá sojinýanyé tša bëtsá cha šuababuányëshanama.

Bèngbe Bètsá chca tojama chë Uámana Espíritbeyeca, y cha endmëna nda Bèngbe Bètsá tbojanichmó bèngbe ainaniñe chaotsemnama jtsemándayama.

6 Tempo bènga tondaye chemuatanobená jamana Bèngbe Bètsabe bominyiñe tšábenga jtsemnama, y chora Cristo tojanóbana bènga chë bacna soyënga tmojanmëngbe tšabiana, nÿa chama tempo yojamna ora.

7 Ndoñe paselo quenátsmëna jajuaboyana, ndáyeca canÿa nantseprontana jóbanama canÿa ntšamo chë leyiñe yomandancá jamama tojtsamanabiama; pero, canÿa bètsá jtsababuánÿeshanëse tšabe soyënga ínÿengbiana tojtsamabiama, nderádose chabiana jóbanama cuantseprontana.

8 Pero Bèngbe Bètsá bènga šojanÿanÿé tša šuababuánÿeshanama, er bènga cabá bacna soyënga ntsamcá imojoyena ora, Cristo bèngbiana tojanóbana.

9 Cristo, chabe buiñe juabuáshanëse bèngbiana tojanóbanayeca, Bèngbe Bètsá tojanama bènga chabe bominÿiñe tšábenga jtsemnama. Y chca endmënayeca, ndegombre Cristo šochanjátsebacaye, entsanga ndoñe tšabá tmonjama ca y castigo chëngbiana chaotsemna ca Bèngbe Bètsá chaojayana ora.

10 Bènga tempo Bèngbe Bètsá imojanáya; pero cha tojanma bènga cháftaca tempcá tšabá chamotsatsmënama, chabe Uaquiñá tojanóbanayeca. Y mora, bènga natjëmbana cháftaca chamotsemnama ya tojama ora, ndegombre atebácanënga mochántsemna, chabe Uaquiñá ainá yómnyayeca.

11 Y ndoñe nÿe chca, ndayá bènga bènga cháftaca puerte oyejuayënga chamotsemnámna Bèngbe Bètsá jamana, ndayá Bèngbe Utabná Jesucristo bèngbiana tojánmayeca. Y mora, chábeyeca Bèngbe Bètsá tojama bènga cháftaca tempcá tšabá chamotsatsmënama.

Adány Cristo

12 Canÿe entsá bacna soye tojanma causa, nÿetsca entsanga bacna soyënga amënga tmojábocana; y cha tojanóbana, bacna soyënga tojanma causa. Y chca, nÿetsca entsanga entsamna jóbanama, er nÿetscanga bacna soyënga tmojama.

13 Bèngbe Bètsá Moisésbioye chë leyënga cabá nduántšaboshjona ora, entsanga quem luarentše bacna soyënga tmojanma. Pero ndocna ley tontsemna ora, Bèngbe Bètsá ndoñe ntjatonÿayana entsanga bacna soyënga tmojamama.

14 Nÿetsca entsanga, Adánbentsana Moisésbentscoñe, nÿetscanga yojánamna jóbanama, ntšamo cach Adán tojanmá ndoñe tmonjanmëngnaca, ntšamo cha ndoñe chaondëmama Bèngbe Bètsá tbojanmandacá cha tojanma ora. Y Adánbeñe entsanga mondobena jinÿama, ntšamo chë jabama ibojamná canÿe soyënguiñe yochtsanmëna.

15 Pero ntšamo chë útata tbojanmá ndoñe cachca soye quenátsmëna; er Bèngbe Bètsá entsangbe tšabiana jtsejuabnayëse tšabe soyënga chëngbiana tojanma ora, ndoñe yonjamna mo ntšamo Bèngbe Bètsá tbojanmandacá ndoñe chaondëmama Adán tojanma orcá. Tšëngaftanga šmondétatsëmbo, nÿe canÿe entsá canÿe bacna soye tojanma causa, cha tojanma nÿetsca entsanga jóbanama chaotsamnama, pero Bèngbe Bètsá entsangbe tšabiana yojuabnáyeca, más bèts soyënga jamana, chë Adanbe bacna soye entsangbiana bacna soyënga tojanmama. Chca, Bèngbe Bètsá tojanma ba entsanga bètsá tšabe soyënga chamotsebomnoma; y chca tojama, nÿe canÿe entsá, Jesucristo, tšabe soyënga tojánmayeca.

16 Chë ba entsanga bètsá tšabe soyënga chamotsebomnoma Bèngbe Bètsá tojamentšana endóbocana soye, puerte inÿetsá comna, chë entsá

Adán, canye bacna soye tojanmentšana tojanóbocna soyama. Adán bacna soye tojanmentšana, Bèngbe Bètsá tojánayana chana bacna soye tojanma y castigo jtsebomnama ibojtsemna ca, y nyetsca entsángnaca chë causa; pero masque nyetscanga bacna soyënga tmojama, Bèngbe Bètsá entsangbe tšabiama ndoñe bëndëtsebnatjèmbayeyeca, tojanma entsanga chabe bominýiñe tšábenga chamotsemnama y chë bacna soyëngama castigánënga ndoñe chamondëtsemnama.

¹⁷ Ndegombre endmëna, canye entsá bacna soye tojanma causa, nyetsca entsanga jóbanama yojt samna. Pero puerte más, canye entsá Jesucristo tojanma. Ndëmuanýengbiana Bèngbe Bètsá tojama bètsá tšabe soyënga chamotsebomnama, ndëmuanýengbiana Bèngbe Bètsá tojama chabe bominýiñe tšábenga chamotsemnama, y Bèngbe Bètsábiocana chca tmojóyëngacñënga, chënga nyetscanga mochantsiyena bacna soyënga jtseyénjanayëse y nyetsca tescama mo bètsëtsangcá; y chca echántsemna ndayá Cristo tojánmayeca.

¹⁸ Y chca, ntšamo canye entsá, Adán, canye bacna soye tojanmama, Bèngbe Bètsá tojánayana nyetscanga bacna soye tmojanma y castigánënga chamotsemna ca; cachcá ntšamo canye entsá, Cristo, puerte tšabe soye tojánmayeca, Bèngbe Bètsá jayanana nyetscanga imojtsobena chabe bominýiñe tšábenga jtsemnama y chë nyetsca tescama yomna tšabe vida jtsebomnama ca.

¹⁹ Y ntšamo Bèngbe Bètsá tbojanmandacá ndoñe chaondëmama canye entsá tojanma causa, nyetsca entsanga bacna soye amënga tmojanobiama; cachcá, ntšamo Bèngbe Bètsá tbojanmandacá canye entsá, Jesucristo, tojánmayeca, Bèngbe Bètsá tojanma bètsá entsanga chabe bominýiñe tšábenga chamotsemnama.

²⁰ Chë ley entsangbe cucuatšíñe tmojanáboshjona, jinýanýiyama ntšamo ndegombre yomna bacna soyënga jtsamana; pero entsanga más bacna soyënga imojtsama ora, Bèngbe Bètsá cabá más chëngbe tšabiama yojt sanjuabnaye y más tšabe soyënga chëngbiana yojt sama.

²¹ Chcasna, mora mochjayana, entsanga bacna soyëngaca puerte mandánënga imojamna, y chca, nyetscanga jóbanama yojamna ca. Pero mora, ya ndoñe chca quenátsmëna, er Bèngbe Bètsá tojama entsanga chabe bominýiñe tšábenga chamotsemnama, Bèngbe Utabná Jesucristbeyeca chë nyetsca tescama yomna tšabe vida chamotsebomnama; chíyeca mora bënga montsobena jt siyenama, Bèngbe Bètsá sojatšatá tšabe soyënga lempe bëngaftaca jtsemnëse.

6

Crístbeyeca bënga tšabe vida jtsebomnana

¹ Y asna, ¿ntšamo mochjayana? ¿Sojt samna jt siyenana sempre bacna soyënga jtsamëse, chca, Bèngbe Bètsá šuababuánýeshanama más chašotsinýanýnama, cha más bacna soyënga bënga jtsaperdónayëse?

² ¡Ndoñe, ndegombre ndoñe! Tempo bënga monjaniiyena bacna soyënga jamama juabnëngaca mandánënga, pero mora bënga montsobena jt siyenana chë juabnënga tondaye bëngbioye ntsamcá, y chca, bënga montsobena mo obanëngcá chë soyëngama jtsemnana; y as, ¿ndáyeca bënga muatjátsjuabnaye ntšamo ndoñe tšabá tontsemncá jatiyenana?

³ Er ndegombre tšëngaftanga šmondëtatšëmbo, bënga uabáinënga tmojanuocuéda ora, tmonjaninýanýé bënga Cristo Jesúseftaca cánýiñe mo canýacá

bétsemnama; y bēnga uabáinēnga tmonjanoquedá ora, enjamna mo bēnga cuafjobancá, ntšamo Cristo tojanobancá.

4 Bēnga uabáinēnga tmonjanoquedá ora, enjamna mo bēngnaca cháftaca cuafjobancá, y cháftaca uatabuantsanēngcá. Chca yojamna, bēnga chamot-sobenama mo tsēm entsāngcá jtsiyenama, ntšamo Crístoftaca tojanopasacá, cha cháuatayenama Bēngbe Bētsá tojanma ora, chabe puerte bēts obenánaca.

5 Bēnga Crístoftaca cánýiñe mo canýacá jtsemnēse, cha tojanóbana ora mo bēngnaca cháftaca cuafjobancá enjámnayeca, ndegombre bēnga cánýiñe mo canýacá cháftaca mochántsemna, bēnga cachiñe vida nyetsca tescama chamotsatsbomnama Bēngbe Bētsá jtsamēse, ntšamo Cristo cháuatayenama cha tojanmcá.

6 Y bēnga mondētatsēmbó, chē ntšamo bēngbe vida enjamncá, bacna juabnēngaca mandánēnga, Jesucristbeñe cabá ntsošbuáchiye ora, mora ya ndoñe chca yontsemnama; y chca entsemna mo chē tempsca vida chaóbanama cuafjamcá, Cristo tmojanrucificá ora. Chca yojamna, Bēngbe Bētsá jobenayama chē bacna soyēnga jamama bēngbe juabnēnga jtse-pochócama; y chca, ya ndoñe más chē bacna soyēngaca mandánēnga chamondētsemnama, mo nyets tempo nye ínýabiama oservenēngcá.

7 Er canýe entsá tojóbana ora, chē bacna soyēnga chábioye ya ndoñe más ntsemándayana.

8 Er Cristo tojanóbana ora, mo bēngnaca cháftaca cuafjobancá endmēnayeca, cháftaca jtsiyenámna bēnga montsošbuaché.

9 Bēnga mondētatsēmbó Cristo cháuatayenama y ndocna te cha cachiñe jatóbanama Bēngbe Bētsá tojanmama; y ndocna obenana queochatsma cha cachiñe chauatóbanama.

10 Cha tojanóbana, y chē bacna soye jamama juabnēnga ndocna te ntjobenayana chábioye jamándana, y ínýenga ndoñe imontsobena ntšamo cha jabórlana; y ntšamo mora cha yoyencá, Bēngbe Bētsá jtseservénama yomna.

11 Cachcá, tsēngaftanga cmontsamna jtsejuabnayana, chē ya ndoñe más bacna soyēngaca mandánēnga šmojtsemnama, pero vida šmobomna lempe jtsamēse Bēngbe Bētsá tsēngaftangaftaca oyejuayá chaotsemnama, Cristo Jesúseftaca cánýiñe mo canýacá jtsemnēse.

12 Tsēngaftanga cmontsamna, chē bacna soyēnga jamama ainanentse šmobomna juabnēngaca ndoñe más mandánēnga ntsemnana, chca, tsēngaftanga ndoñe chašmondétsamama juabnēngaca nye cach tsēngaftanga, tsēngaftangbe cuerpiñe tsábá jtsomñama.

13 Tsēngaftanga ndoñe quecmátamna jalesénciana ndaye tsēngaftangbe cuerpentša soye, bacna soyēnga jamama chaoservema. Chamna, tsēngaftanga cmontsamna Bēngbe Bētsá jauyanana, lempe ntšamo tsēngaftanga šmomncá, cha jasérviana chaotsemna ca, tsēngaftanga chē šmomna mo ya ndoñe más obanēngcá Bēngbe Bētsabiama, y tojanma tsabe vida chašmotsebomnama; y jauyanana nyetsca tsēngaftangbe cuerpentša soyēngna Bēngbe Bētsá jasérviana juytsemna ca.

14 Ndoñe quecmátamna bacna soyēngaca mandánēnga jtsemnana, er tsēngaftanga ndoñe quešmátiyena leyiñe iuayana soyēngaca mandánēnga, y šmondoyena Bēngbe Bētsá tsēngaftangbiana tsábá jtsejuabnayēse.

Ošbuachiyá obligaciónaca jtsemnana ntšamo tsábá yomncá jamama

15 Y asna, ¿bënga imojtsobena bacna soyënga jamana, chë leyiñe iuayana soyëngaca ndëmandánënga imomnama, y Bëngbe Bëtsá bëngbiana tšabá jtse-juabnayëse bënga imoyenama? ¡Ndoñe, ndegombre ndoñe!

16 Tšëngaftanga tšabá šmondëtatšëmbo, ínÿabe cucuatšifne mo nyëts tempo nyë ínÿabiana oservenëngcá šmojoquedá ora, cha jtsobedecénama, ndegombre tšëngaftanga chë nduiñbiana nyëts tempo oservénënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nyëtsca tescama obanënga cuaftsemncá, o Bëngbe Bëtsá jtsobedecénama, y chca, chabe bominiñe tšábënga jabocanana.

17 Pero šontsamna Bëngbe Bëtsá jtsatschuanayana, er tempo tšëngaftanga mo nyë ínÿabiana oservenëngcá šmojamna, bacna soyënga jamama juabnëngaca mandánënga; pero mora nyëts ainánaca šmojoyeuná, ntšamo chë tcmojanabuatambá soyënguiñe šmojoyëngacñëcá.

18 Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiana oservenëngcá šmojabocna, ntšamo tšabá yomncá jtsamama.

19 Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jaleséciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nyë ndaye bacna soyënga jamama juabnëngaca. Cachcá, mora tšëngaftanga cmontsamna jaleséciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

20 Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligacónaca quešmënjatsmëna ntšamo Bëngbe Bëtsabiana tšabá yomncá játamama.

21 ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóbocnana, entšá nyëtsca tescama castiganá chaotsemnana, mo Bëngbe Bëtsabe bominiñe nyëtsca tescama obaná cuaftsemncá.

22 Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtsentšëna Bëngbe Bëtsá jtseyeunanana y jtservénana. Chca jtsamana, tšëngaftangbiana puerte tšabá entsemna, er chca, Bëngbe Bëtsabe entšanga šmochántsemna, y cabana, chë nyëtsca tescama yomna tšabe vida šmochántsebomna.

23 Bacna soyënga tcojtsamentšana jóbocnana entšá nyëtsca tescama castiganá chaotsemnana, mo Bëngbe Bëtsabe bominiñe nyëtsca tescama obanënga cuaftsemncá; pero, Bëngbe Bëtsá šojtsatšatná soyënguentšana, jóbocnana chë nyëtsca tescama yomna tšabe vida jtsebomnana, Cristo Jesús Bëngbe Utabnáftaca cánÿiñe mo canÿacá jtsemnëse.

7

Chë bouamnátbentsana ndayá bëngbiana mochjuatsjinÿe

1 Jesucristbeyeca catšátanga, tšëngaftanga šmotátšëmbo ntšamo chë leyënga entšangbiana inëtsemnana; tšëngaftanga šmotátšëmbo, ntšamo chë leyiñe

tojtsayancá canye entsá chaotsamamna, nye chë entsá tojtsainëntscuana chábioye jtsemándayana.

² Chcasna, canye bouamna shembása, ntšamo chë leyíñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanëсна, chë leyíñe endayana, chë shemna canya jtoquédana, chë boyabíama ndëmandaná ca.

³ Y chca, chë shema inye boyabásaftaca chabe boyábíoye tbojaingñë, chë boyá cabá vida totsóbomñe ora, chë shemna jtsabáinana chabe boyábíoye ínÿaftaca ingñayá ca. Pero chabe boyá tojtsóbanëse, chë leyíñe endayana chë shemna canya jtoquédana, chë boyabíama ndëmandaná ca, y cha jtsobenana ínÿaftaca jtoubouamayana; y chca tojama ora, boyábíoye ínÿaftaca ingñayana ndoñe ntsemnana.

⁴ Tsëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmójánbočna, mo chë soyëngama obanënga cuafjoquedangcá, ínÿabe entsánga jtsemnana, Crístbënga, ndabíama Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama.

⁵ Bënga chë nye ntšamo cabënga innabošcá monjaniyena ora, chë ley enjanoservena bëngbe ainaniñe chamotsebmnama bacna soyënga jamama puerte bëts juabnënga, nye bënga tšabá jtsomñama. Ba bacna soyënga tmonjanma, y chë causa bënga šonjánamna nyetsca tescama castigánënga jtsemnana, mo Bëngbe Bëtsabe bomínÿiñe nyetsca tescama obanënga cuaftsemncá.

⁶ Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbíama mo canye amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aiñe tsmëcá chamotsiyenama, ntšamo chë Uámana Espiritu iuamcá bënga vida chamotsebmnama.

Bacna soye jamama juabna tcojtsebmñëse, chë ley jamana entsá bacna soye chaomama

⁷ Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndëtatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínÿabíoye jtsántšabošana”, “ínÿabíoye ndoñe cattsantšaboše ca” chë leyíñe ndoñe matmëñanábemëse.

⁸ Pero bacna soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguñe ndayá iuayanama jtsejuabnayëse. Er ndocna ley tondmëna ora, entsá ndoñe ntsetatšëmbuana ndayá yomna bacna soye jtsamana.

⁹ Canye tempo enjamna, chora atše sënjaníyena leyëngama ntsetatšëmbcá, pero ntšamo leyíñe iuayancá sënjanabuátmana ora, ndayá jamama ndoñe yonjamna, atše sënjanontsé chë bacna soyënga jamama juabnëngaca mandaná jtsemnana;

¹⁰ y chora atše sënjántatšëmbona, chë causa šojtsanmëna nyetsca tescama castiganá jtsemnana, mo Bëngbe Bëtsabe bomínÿiñe nyetsca tescama obaná cuaftsemncá. Bëngbe Bëtsá chë mando tojanma, atše chë nyetsca tescama yomna tšabe vida jtsebmnama chayobenama, chë ley jtseyëunanëse; pero

ndoñe chiyatanobedecé causa, chë mando tonjanma atše chašotsemna nÿetsca tescama castiganá jtsemnama.

11 Chë leyentša mandíñe inÿe soyënga ndoñe šonjëtsemna jamama ca yotsayánayeca, chë bacna soyënga jamama juabnënga átšbeñe, šmonjaningñe bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama, mo Bëngbe Bëtsabe bominÿiñe nÿetsca tescama obaná cuaftsemncá.

12 Pero bënga mëntšá mochjayana: chë leyña tšabe soye endmëna, er Bëngbe Bëtsábiocana tojanóbocna, y chë mandëgnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana.

13 Y asna, ¿quem tšabe soye tojanma atše chašotsemna nÿetsca tescama castiganá jtsemnama, mo Bëngbe Bëtsabe bominÿiñe nÿetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nÿetsca entšanga mondobena jinÿana canÿe bacna soye, mo canÿe puerte bëtš bacna soycá.

14 Bënga mondëtatšëmbo chë ley Bëngbe Bëtsabe ley yomnama, pero atšna nÿe canÿe entšá sëndmëna, canÿa nÿets tempo nÿe bacna soyënga jamama juabnëngaca mandaná.

15 Ndegombre ndoñe quešnátšertana ntšamo sëntsamcá, er ndoñe ntsamana ndayá jamama stsebošcá, pero aiñe jtsamana ndayá jamama ndoñe šontsoğustancá.

16 Pero chë atšbe ainaniñe stsejuabná ndoñe tšabá tontsemna soye stsamëse, ndayama leyíñe iuayana ndoñe candmëna ntsamana ca, chca atše jtsinÿanÿayana chë ley ndegombre tšabe soye yomnama.

17 Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama.

18 Atše sëndëtatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama.

19 Atše ndoñe quetsátama chë tšabe soye ndayá jamama sëndbošcá, pero aiñe sëntsama chë bacna soye ndayá jamama ndoñe sëndbošcá.

20 Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

21 Chca, atše tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama.

22 Atšbe ainanoca puerte sëntsoyejuá, Bëngbe Bëtsábiocana yóbocana mandëngama.

23 Pero atše sënjinÿena inÿe soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca yomna mo ndegombre soycá, mo chë bacna soyëngaca mandaná cuaftsemncá.

²⁴ ¡Tša lastema atšbiamá! Chë bacna soye jamama juabnënga átšbeñe entsemánda, y entsama atše chašotsemna nÿetsca tescama castiganá jtsemnama, mo Bëngbe Bëtsabe bominyiñe nÿetsca tescama obaná cuaftsemncá. ¿Nda nanjobenaye chentšana atše jatsbocama?

²⁵ Nÿe Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atše aifne sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atše bacna soyënga séntsama, ntšamo chë juabnënga šontsemandacá.

8

Ntšamo Bëngbe Bëtsabe Espiritu yomandacá jtsiyenana

¹ Y chca, Bëngbe Bëtsá ndoñe ntjayanana, Cristo Jesúseftaca cánÿiñe mo canÿacá imomnënga, chëngbe bacna soyëngama nÿetsca tescama castigánënga jtsemnama yojsamna ca.

² Er, chë Uámana Espiritoftaca mandánënga mondmënayeca, Bëngbe Bëtsá šojatsebacad, bënga chë bacna soye jamama juabnëngaca mandánënga ndëtsemnama, y nÿetsca tescama castigánënga ndëtsemnama, mo Bëngbe Bëtsabe bominyiñe nÿetsca tescama obanënga cuaftsemncá. Chë Uámana Espiritu jamana bënga ndegombre tšabe vida chamotsebomnama, cánÿiñe mo canÿacá Cristo Jesúseftaca jtsemnëse.

³ Bëngbe Bëtsá tojanma ndayá Moisesbe ley ndoñe tonjanobenacá, er entsanga mondoyena nÿe ntšamo cachënga imobošcá, y nÿe cánÿenga ndoñe ntsoyobanana jamana ntšamo tojtsamncá. Bëngbe Bëtsá tojánayana entšángbeñe bacna juabnëngbe mando jtsepochócama ca, y chama chabe Uaquiñá tbojanichmó. Cha quem luaroye mo canÿe entšacá tojánabo, canÿe ainánaca, mo chë entsanga bacna soye amëngbe ainancá, pero ndocna te ni mo canÿe bacna soye ndoñe tonjëftsema; y tojánabo, chábeyeca entsanga bacna soyëngama perdonánënga chamotsemnama.

⁴ Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espiritu ainaniñe yomandacá y ndoñe nÿe ntšamo bënga entsanga tmojtsebošcá, chamobenama tšabá jamana ntšamo chë leyiñe yomandacá, ntšamo šojtsamncá.

⁵ Chë nÿe cachënga tšabá jtsomñama cachëngbe juabnëngaca imoyenënga, nÿe sempre jésejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espiritu ainaniñe iuamëndacá oyenëngna, sempre jésejuabnayana tšabe soyënga jamama, ntšamo chë Uámana Espiritu yobošcá.

⁶ Ntšamo chë nÿe cachá tšabá jtsomñama juabnëngaca mandaná oye-
nentšana jóbocnana entšá nÿetsca tescama castiganá chaotsemnama, mo Bëngbe Bëtsabe bominyiñe nÿetsca tescama obaná cuaftsemncá; y ntšamo chë Uámana Espiritu tojtsemandacá oyeentšana jóbocnana chë nÿetsca tescama yomna tšabe vida jtsebomnama y ainaniñe tšabe ebionana.

⁷ Chë nÿets tempo oyenënga nÿe ntšamo tmojtsebošcá nÿe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntсамana ntšamo cha tojtsamëndacá, y chca jamama ndoñe ntsoyobanana;

⁸ y chca, chë nÿe chca bacna juabnëngaca oyenënga, ndoñe ntsoyobanana jamana ntšamo Bëngbe Bëtsá tšabá tbojtsinyancá.

⁹ Pero tsëngaftanga ndoñe quešmátiyena nÿe cach tsëngaftanga tsábá jt-somñama cach tsëngaftangbe juabnëngaca, sinó šmojtsiyena ntšamo chë Uámana Espíritu tsëngaftangbe ainaniñe cmamëndacá, er chë Uámana Espíritu sempre tsëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana.

¹⁰ Pero Cristo sempre tsëngaftangbe ainanentše vida totsóbomñëse, masque tsëngaftangbe cuerpënga yochjopochóca, quem luarentše entšanga bacna soyënga jtsamana causa, tsëngaftangbe espíritu nÿets tempo vida echan-jesóbomñe, er Bëngbe Bëtsá tojama tsëngaftanga chabe bominiñe tsábenga chašmotsemnana.

¹¹ Y Bëngbe Bëtsabe Espíritu, Jesús cháuatayenama tojamabe Espíritu, siempre tsëngaftangbe ainaniñe tojtsemñëse, Bëngbe Bëtsá, chë Cristo cháuatayenama tojamá, echanjama chë tsëngaftangbe yochjóbana cuerpo, cachiñe vida chaot-satsbomnana. Cha chca echanjama chabe Espíritoftaca, y mua siempre tsëngaftangbe ainaniñe iuétsemna.

¹² Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nÿe bënga tsábá jt-somñama cabëngbe bacna juabnëngaca;

¹³ er nÿe bënga tsábá jt-somñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominiñe obanënga cuaftsemncá; pero Uámana Espíritbeyeca, chca juabnëngaca nÿetsca bacna soyënga jtsamana jtsajbanama šmojobenase, chë nÿetsca tescama yomna tsabe vida šmochántsebomna.

¹⁴ Ntšamo chë Uámana Espíritu yomandacá tmojtsamëngna, Bëngbe Bëtsabe básenga jtsemnana.

¹⁵ Er Bëngbe Bëtsá ndoñe tonjama bënga ainaniñe canÿe espíritu chamotse-bomnana, mo nÿe ínÿabiama nÿets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnana Espíritu jamana bënga Bëngbe Bëtsabe básenga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechembuanama.

¹⁶ Y chë Uámana Espíritu y bëngbe espíritu canÿe ora jayanana bënga Bëngbe Bëtsabe básenga imomna ca.

¹⁷ Y Bëngbe Bëtsabe básenga mondmënayeca, bëngnaca mochanjóyëngacñe ndayá cha chabe básenga jatšatayama tojašebuachenacá; bënga y Cristo canÿiñe chë soyënga mochanjóyëngacñe, er bënga inÿe soyënguini tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chásuabiamama, ntšamo cach Cristo yomncá.

Bëngbe Bëtsá bëtsëtsanga y uámanënga šochjábiamama

¹⁸ Atše ndegombre sëndétatšëmbo, ntšamo quem tempo bënga imosufrincá, puerte batšatema yomna chë bëngbe tsábiamama uámanana y buashinÿinÿanana Bëngbe Bëtsá šochjínÿanÿiyama.

¹⁹ Lempe ntšamo Bëngbe Bëtsá tojamcá endmëna mo tša cuaftsobat-mancá, chaobuache chë Bëngbe Bëtsá ntšamo chabe básenga imomnana jinÿanÿiyama ora.

²⁰ Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnana cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnana tojánbošenayeca,

ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canye te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátšana ora chama cha yojanjuabnacá;

²¹ Bëngbe Bëtsá canye te yochjama lempe ya ndoñe más chaondet-sopochocama. Y chora, ntšamo Bëngbe Bëtsá yochjamcá chabe básenga chamotsemnana, lempe ntšamo cha yojanjuabnacá, chabe uámanana y buashinÿinÿanana jtsebomnana, cachcá yochjama lempe chë cha tojanma soyëngaca.

²² Er bënga mondëtatšëmbo lempe ntšamo Bëngbe Bëtsá tojanmcá mëntsoñama yomna mo canye shembása šešona jtsebomnana ora tbojtsetsetšana tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá.

²³ Pero ndoñe nÿe chë lempe ntšamo Bëngbe Bëtsá tojanmcá yojtsemna mo chë shemasacá, sinó bëngnaca; y bënga ainaniñe mondbomna chë Uámana Espiritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtscá soyënga sochjátšatayentšana; bënga bëngbe ainanoca tša jesobësnayana, bënga chabe básenga chamotsemnana Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebomnana.

²⁴ Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga sojatsebacá; pero ndayama tmobatmancá, ya tojtsëchnëjuanama bënga tmojtsonÿase, chora chama ya ndoñe ntjátobatmanëngana. Er ndocná jatobátmanana chë ndayá jinÿama ya tojobenacá.

²⁵ Pero ndayama bënga tmobatmancá, cabá ndoñe jinÿama tmontsobena soye tojtsemnëse, bënga jtsamnana Bëngbe Bëtsábeñe jtsobatmanana, uantadënga jtsemnëse, ntšamo tojayancá Bëngbe Bëtsá chaomëntscuana.

²⁶ Uámana Espíritnaca bënga sochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatšëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espiritu Bëngbe Bëtsábioye bëngbiamna jtsojtjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama.

²⁷ Y Bëngbe Bëtsana, ntšamo entšanga ainanoca tmojtsebošcá yonÿá, y ntšamo chë Espiritu jayanama tojtsebošcá yotátšëmbo, er chë Espiritu chabe entšangbiamna ibotjanañe, ntšamo Bëngbe Bëtsá yobošcá.

Bënga ayëñjanayëngama más tmojábocana

²⁸ Y bënga mondëtatšëmbo, Bëngbe Bëtsá nÿetsca soyënguiñe inétsama cha imobobonshánëngbe tšabiama, ndëmuanÿenga cha tojáchembo chabe entšanga chamotsemnana, ntšamo cha jamama yojanjuabnacá.

²⁹ Jesucristbeñe imošbuachëngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempscana tojaninÿnaná chënga chabe Uaquiñacá chamotsemnana; chca, chabe Uaquiñá chë bëtscá catsátangebeñe chë natsaná chaotsemnana.

30 Y chë Bëngbe Bëtsá chca tojánabacangnaca, tojánachembo chabe entsanga chamotsemnana; chëngbiana tojanma chabe bominiñi tšábenga chamotsemnana, y chëngbiámnaca yochjama chabe uámanana y obenanentsana chamotsebmomnana.

31 Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca.

32 Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entsanga chamóba, nyetsca bëngbe tšabiama. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye.

33 ¿Nda nanjobenaye jayanama chë Bëngbe Bëtsá tojábacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominiñi tšábenga imomna ca.

34 Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiana tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsabe catsbioica yojtsethemana, jamándama y puerte bëtsá chentše jtsemnana; y choca, chánaca bëngbiana Bëngbe Bëtsábioye ibotjanañe.

35 ¿Ndayá nanjobenaye Crístbentsana, chë tša šondababuanyëshanábentsana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínÿenga tmojtsama ora, tondaye saná shëntsana ora, tondaye entsáyá tmonsábomna ora, o resjo bëngbiana tojtsemna ora, o bënga jtsëbáyama ínÿenga tmojtseboše ora?

36 Ntšamo Bëngbe Bëtsabe uabemana palabrenguiñe endayancá, canÿe entsá Bëngbe Bëtsábioye ibojauyana ora:

Acbe causa entsanga cada te šontsëtsëtsná bënga jtsëbáyama ca;

entsanga bëngbioye nÿe ntšámnaca jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

37 Pero ndoñe; nyetsca chë soyënguentšana bëngna ayëñjanayëngama más tmonjábocana, cha bënga šuababuanyëshanayeca.

38 Er atše tšabá sëndëtatšëmbo tondaye yondobena, bënga Bëngbe Bëtsábentsana, chë tša šondababuanyëshanábentsana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe;

39 ndocna quem luarentša tsbanánoca soye, ni quem luarentša tajsoica soye; ni ndocna inÿe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentsana, chë bënga šondababuanyëshanábentsana jtsajuánayana, chë Cristo Jesús Bëngbe Utabnáftaca Bëngbe Bëtsá šojanÿanÿe bonshánentsana!

9

Bëngbe Bëtsá Israeloca entsanga tojabacacá, uámanënga chamotsemnana

1 Atše, Crístofaca cánÿiñe mo canÿacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmonsatsëtsná atše ndoñe stsebostera.

² Ndegombre, atše puerte ngménaca atšbe entsangbiana, chë Israelo-quëngbiana séntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa.

³ Tšabá tojtsemnëse, atše stjobenaye jtsebošana cach atše Bëngbe Bëtsábeyeca nyëtsca tescama castiganá y Cristbentsana luaroca jtsemnama, atšbe entsanga, chë cach atšcá buiñe bomna entsanga jujabuáchama.

⁴ Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiana y chë tša bëtsá y uamaná cha yomnama chënga tojaninñanyé. Bëngbe Bëtsá ba soye chënga tojanabuayená ndayá cha chëngbiana yojánboše y ndayá chëngbiana jamama, y chë ley chëngbe cucuatšifne tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játebacana.

⁵ Chënga mondmëna chë bëngbe tempsca uamana bëts taitangbentsánënga, y Cristnaca mo canye entsacá, mo canye Israeloca entsangbentsacá tojánabo; y cha endmëna Bëngbe Bëtsá, nyëtsca soyënguiñe mandayá. Nyëtsca entsanga nyëts tempo cha chamotsatschuaná. Chca chaotsemna.

⁶ Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nyëtsca Israeloca entsangbentsënga ndoñe Bëngbe Bëtsabe ndegombre entsanga quemátsmëna.

⁷ Ni nyëtsca Abrahábentsana entsanga, ndoñe chabe ndegombre básenga quemátsmëna; er Bëngbe Bëtsá Abrahámioye tbojanianyana: “Chë ácbentsana entsanga nyë Isaácbentsana mochanjabo ca.”

⁸ Chca entsayana, bëngna ndoñe šontsamna jtsejuabnayana Abrahábentsana nyëtsca entsangbiana mo Bëngbe Bëtsabe basengcá; inyëtsá, nyë chë Bëngbe Bëtsá tbojanšbuachenáyeca Abraham yojánabamna básengbiana cocayé entsemna jtsejuabnayana, Abrahábentsana ndegombre entsanga bëtsemnama.

⁹ Er mëntšá endmëna ntšamo Bëngbe Bëtsá tojánayana, Abrahámioye tbojanšbuachená ora: “Camëntša tempo entsba uata chanjésabo, y Sara canye šësona bochántsebmna ca.”

¹⁰ Pero nyë nyëtsá ndoñe quenátsmëna. Chë Rebeche uta básatna canye taitá ibnabomna, bëngbe tempsca bëts taitá Isaac.

¹¹⁻¹² Bëngbe Bëtsá, Rebécbioye tbojanianyana: “Acbe mayor uaquiñá, acbe ngomënche uaquiñábioye bochanjasërvia ca.” Cha chca tojánayana jinñinñiyama chë básatbentsana canya cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojanianyana chë básata cabá ndonýna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chë básatbentsana canya y ndoñe chë inya chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmna.

¹³ Ntšamo Bëngbe Bëtsá chabe uabemana palabrénguiñe tojanayancá: “Jacob sënjanbobonshana, y Esaú sënjanáboyënja ca.”

¹⁴ Y asna, ¿ntšamo mochjayana? ¿Bëngbe Bëtsá ndoñe cachcá nyëtscángaftaca endëtsemna ca? ¿Ndoñe, ndegombre ndoñe!

¹⁵ Er Bëngbe Bëtsá Moisésbioye tbojanianyana:

Atše sochanjóngmia nda chaitsebošabiama, y nda chaitsebošá chanjalastéma ca.

16 Y chca, Bëngbe Bëtsá canye entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama.

17 Er Bëngbe Bëtsabe uabemana palabrenguine, Faraón chë Egiptoca réybioye cha tbojaniana: “Atše rey tchonjábema, tša bëtscá atšbe obenana yomnama nyetscanga ábeñe chayinñyema, y nyets luarentša entsanga atšbiam chamotatsëmbonama ca.”

18 Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiam nduauenaná chaotsomñama.

19 Pero ndánaca tsëngaftangentsá šuatjatjaye: “Bëngbe Bëtsá chca tojt-samëse, çntšamo cha nantsobena jayanana canye entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra tsemnana?”

20 Pero, nye entsá quecotsemñecá, çntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canye soye chca yojt-sama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”?

21 Chë fshantse soyënga pormayá jtsobenana canye fshantsentsana ja-mana, canye matbaja uámana tescama, y inñajna cada te chaotsoservénama. Cachcá, Bëngbe Bëtsá jtsobenana jamana ntšamo cha tojtsebošcá, ndayá cha tojama sóyeca.

22 Bëngbe Bëtsá yojáboše jinñanñiyama entsángaftaca tbojánatnama, chëngbe bacna soyëngama; y yojáboše cha puerte obená yomnama jinñanñiyama. Chíyeca, chënga tša yojanëuantana, chënga chë ndëmuanyëngbiam Bëngbe Bëtsá yochjánayana chëngbe bacna soyëngama castigánënga jtsemnana yojánamna ca, chë ndëmuanyënga jtsapochócama Bëngbe Bëtsá yojtsanprontana.

23 Y chánaca yojáboše jinñanñiyama cha puerte uamaná y bëtscá yomnama. Cha tojama, bënga chë ndëmuanyënga cha šojanalastemá, chabe obenantšana y uámanantšana chamotsebomnama; y cha tempo chca tojan-juabó bënga uamanënga y bëtšetsanga jábiamama.

24 Bënga mondmëna chë ndëmuanyënga Bëngbe Bëtsá chama šojánachembo, inñëngna judío entsanguentsana, y inñëngna ndoñe judiëngbentsana.

25 Ntšamo chabe uabemana palabrenguine, Oséasbe librëšañe Bëngbe Bëtsá tojanayancá:

Entšanga ndoñe átšbënga mondmënënga, chënga “atšbe entsanga ca” chantsëbobuatma;
y canye luarentša entsanga ndoñe sënjánababuanñyeshanënga, chëngna “atšbe bonshánënga ca” chantsëbobuatma.

26 Y cach luare ndayentše Bëngbe Bëtsá tojánayana: “Tsëngaftanga atšbe entsanga ndoñe quešmátsmëna ca”,
cachentše Bëngbe Bëtsá ainá chënga echanjáuyana “atšbe básënga ca”.

27 Israeloca entsangbiam, Isaías jabuachana tojánayana:
Masque Israeloca entsanga puerte banga chamotsemna, nña mo chë mar béjayoca chëñyañe cascajá,
Bëngbe Bëtsá nye básëftanga chentšana echanjátsebacaye;

28 er, ndoñe bën y Bëngbe Utabná canye y nyetsca tescama echanjayana,
nyets quem luarentša entsangbiam ndayá chënga tmojamama tšabá o
ndoñe tšabá bëtsemnana,
y chëngaftaca echanjama ntšamo chaojayancá ca –cha tojánayana.

²⁹ Ntšamo Isaías tojanayancá, Běngbe Bětsá Israeloca entšángaftaca ntšamo jamama tojanoyebuambá ora:

Běngbe Utabná, n̄yets obenana bomná,

in̄yenga bēnga jtsapochócama cha tojanalesenciá ora,

báseftanga bēngbe entšanguentšēnga ainēnga chamotsomñama ndoñe matēnjanmēse,

bēnga mora pochocánēnga mamojtsemna, mo chē Sodoma y Gomorra pueblēngoca entšangcá ca,

cha n̄yetscanga y n̄yetsca tescama tojtsanapochócaye ca.

Israeloca entsanga y chē tsabe noticiēnga

³⁰ Chcasna, mora mēntšá mochjayana: ndoñe judiēnga tondaye monjánama Běngbe Bětsabe bominiñiē tšábenga jtsemnama, pero cha tojanma chēnga chabe bominiñiē tšábenga chamotsemnama, chēnga chábeñe imojtsošbuáchiyama.

³¹ Pero, Israeloca entsanga imojánboše Běngbe Bětsabe bominiñiē tšábenga jtsemnama, ntšamo chē leyiñe iuayancá jtsamēse; pero ndoñe chca tmonjanobená.

³² ¿Y ndáyeca chca? Co chē Běngbe Bětsabe bominiñiē tšábenga jtsemnama, chábeñe jtsošbuáchiyēse, chēnga tondaye monjánama causa chca, sinó chca jtsemnama imojánboše n̄ye ntšamo leyiñe iuayancá jtsamēse. Y chca, chēngna Jesús tmojtsanaboté, ntšamo chē Běngbe Bětsabe uabemana palabrenguñiē chē tmojtsanábotengbiana endayancá, chēngbiana cha yomna mo chē ndētšbē ndayiñe chēnga jtsojestjiamcá ca.

³³ Chēnga Bětsabe uabemana palabrenguñiē cha chca tojánayana: Smochjin̄ye, atše sējnama Jerusalenentše can̄ya chaotsemna, y cha endmēna mo ndētšbecá ndayentše chēnga mochjojestje, y can̄ye peñēscá ndayēse yochjama chēnga chamotsótsatšama; pero nda chábeñe tojtsošbuaché, ndocna te n̄ye bonamente queochátobatmana ca.

10

¹ Jesucristbeyeca catšátanga, atše n̄yets ainánaca sēntseboše y Běngbe Bětsá sēntseimpadana, cha Israeloca entsanga cháuatsebacama.

² Atše sēndētatsēmbo y sēntsobena chēngbiana jayanama, chēnga puerta mondboše Běngbe Bětsá jaserviama, pero ntšamo chēnga yojtsēsertancá, ntšamo Běngbe Bětsá jaserviama yojtsamnamna, ndoñe quenátsmēna ntšamo ndegombre yomncá.

³ Chēnga ndoñe tonjanēsertá ntšamo Běngbe Bětsá inétsama entsanga chabe bominiñiē tšábenga chamotsemnama, y cachēnga tmojánguango ntšamo jamēse jobenayama Běngbe Bětsabe bominiñiē tšábenga jtsemnama; pero ndoñe chca tmonjanobená, chē entsanga chabe bominiñiē tšábenga chamotsemnama ntšamo Běngbe Bětsá inetsamcá ainánaca ntjoyēngacñécá.

⁴ Er Cristo tojama entsanga ndoñe chamondétsama ntšamo leyiñe iuayancá, Běngbe Bětsabe bominiñiē tšábenga jtsemnama, chca, chēnga chamobenama chabe bominiñiē tšábenga jtsemnama, Crístbeñe jtsošbuáchiyēse.

⁵ Chē Běngbe Bětsabe bominiñiē tšábenga jtsemnama bošēngbiana, ntšamo leyiñe iuayancá jtsamēse, Moisés mēntšá tojánayana, chēngbiana tojanábema

ora: “Nda tojtsama nÿetsca mandënga ntšamo leyënguiñe endayancá, tšabe vida echántsebomna, nÿets tempo chë leyëngaca mandaná ca.”

6 Mëntšá endmëna ntšamo Bëngbe Bëtsabe uabemana palabrënguiñe iuayana, entsanga chabe bominiñe tšábenga chamotsemnama ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama);

7 o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).”

8 Ntšamo Bëngbe Bëtsabe uabemana palabrënguiñe iuayancá mëntšá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca.

9 Chë buayenana soyënguiñe endayana, Jesús ndegombre Bëngbe Utabná yomna ca aca tcojyanëse, y Jesucristo cháuatayenama Bëngbe Bëtsá tojanmama, nÿets ainánaca tcojtsošbuáchese, Bëngbe Bëtsá cmochjatsbocá ca.

10 Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominiñe tšábenga chamotsemnama; palabrëngaca bënga jinÿanÿiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

11 Er Bëngbe Bëtsabe uabemana palabrënguiñe mëntšá endayana: “Nda Bëngbe Bëtsábeñe tojtsošbuaché, ndocna te nÿe bonamente queochátobatmana ca.”

12 Judiënga y ndoñe judiënga atsebácanënga mondmëna cach sóyeca, er canÿe Utabná nÿetscangbe Utabná endmëna, y cha tmojtsotsëmbuanëngbiama, cha bëtscá jtsamana.

13 Er Bëngbe Bëtsabe uabemana palabrënguiñe mëntšá endayana: “Ndánaca Bëngbe Utabná tbojtsotsëmbuanábioye, cha bochanjatsbocá ca.”

14 Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiamama jóyebuambayama ndoñe tmonjouenëse? ¿Y ntšamo chabiamama mochjouena, chabe buayenana soyënga chënga jáuyanama ndocná tontsemnëse?

15 ¿Y ntšamo chabe buayenánana mochtسابuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tšabá chë buayenánana abúátambayënga tmojáshajna ora ca!”

16 Pero nÿetscanga chë tšabe noticiënga ndoñe ntjoyeunayana. Cach Isaías mëntšá tojánayana: “Utabná, ¿nda chë mondabuayiyná soyënguiñe yojtsošbuaché ca?”

17 Chcasna, chë tšabe noticiënga jouenëse, entsanga jobenayana Jesucristbeñe jtsošbuáchiyana; y nda Cristbiamama tojtsabuayiynase, entsanga chabe buayenánana jouenana.

18 Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aiñe, chënga aiñe tmonjanuena! Ntšamo Bëngbe Bëtsabe uabemana palabrënguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nÿets quem luariñe tojóshjango, y chëngbe palabrënga nÿets luarënguentša entšangbenache tojuáshana ca.

19 Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsíyentsbuašama, chënga chë ndoñe monjamna mo tšëngaftangcá atšbe entšanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

20 Isaíasnaca, Bëngbe Bëtsabiama tojanoyebuambá ora, puerte añémoca tojánayana:

Chë atše ndoñe šmondënguanga, šmonjínÿena;

y chë atšbiama ndoñe mondënoticiangbioye sënjenonÿinÿé ca.

21 Pero Israeloca entšangbiama mëntšá tojánayana:

Nÿets tempo atše tša sënjánama, chënga átšeftaca tšabá tempcá chamot-satšmënama,

pero chënga ndoñe chemátanbošena jouenama, y atšbe contra monjëtsemnaca.

11

Bëngbe Bëtsá, Israeloca entšangbiama tšabe juabna yobomnama tojinÿanÿé

1 Y as mora šcotjá: ¿Bëngbe Bëtsá chabe entšanga tojtšanëbaté? ¡Ndoñe, ndegombre ndoñe! Cach atše canÿe Israelocá sëndmëna, Abrahámbentšana entšá y Benjamínsabe bëts pamillentšana entšá.

2 Bëngbe Bëtsá chabe entšanga ndoñe tonjubaté, chë tempscana tojánabacacanga. Tšëngaftanga šmondëtatšëmbo ntšamo Bëngbe Bëtsabe uabemana palabrënguiñe endayancá, Bëngbe Bëtsabe juabna oyebuambnayá Elías, Israeloca entšangbe contra Bëngbe Bëtsábioye cha ibojanatsëtsná ora:

3 “Bëngbe Utabná, acbe juabna oyebuambnayënga tmojtšëbaye y acbiama pormana altarënga tmojtšepochocá; nÿe atše vídacá tijoquedá, y chënga montseboše átšnaca jóbama ca.”

4 Y mëntšá Bëngbe Bëtsá tbojanjuá: “Atše canÿsëfta uaranga boyabásenga atšbiama sënjacuedá, Baal ndoñe tmonjadoranga, ndayá entšanga tmojobopormá y imojtsejuabná canÿe dios yomna ca.”

5 Mórncaca cachcá entsemna, judiënguentsë báseftanga monduájamna Jesucristbeñe ošbuáchiyënga, ndëmuanÿenga Bëngbe Bëtsá tojabacacá, cha chëngbiama tšabe juabna bómnyeyca.

6 Bëngbe Bëtsá entšanga jabacacayana chëngbiama tšabe juabna bómnyeyca; y ndoñe chca ntjamana ndayá entšanga tmojamama. Er ndayá tmojamama Bëngbe Bëtsá entšanga tojabacacase, cha nanjínÿanÿiye cha chca inétsama, ndoñe nÿe chëngbiama tšabe juabna bómnyeyca.

7 ¿Y asna? Israeloca entšanga ndoñe chemátaninÿena ntšamo Bëngbe Bëtsabe bominiñe tšábenga jtsemnana, pero chënguentsënga básefta bocacánënga aiñe tmojanobená. Bëngbe Bëtsá tojanalesenciá chë ínÿenga Israeloquënguentsšana chabe buayenana soyënga ainaniñe ndoñe chamondóyëngacñama;

8 ntšamo Bëngbe Bëtsabe uabemana palabrënguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama,

y mēntscoñama chēnga ndoñe quemátobena chabe soyēngama ni jinjāna ni josértana, mo nduabínjñēnga o nduauenanēnga cuaftsemnēngcá ca.”

⁹ Davídnaca chēngbiana mēntśá tojánayana:

Mo chē entsānga canjē fiestentše oboyejuayēnga, chēngbe uayayēngbeyeca njē ndeolpe ishēchenēngcá,

y mo chē bayēngbiana uachmaniñe ishēchenēngcá, chēnga mal chamopasama chaomama Bēngbe Bētsá sēntseimpadana, mo nda ndētšbeñe cuaftsojestjca.

Chca Bēngbe Bētsá chaoma, chēngbe bacna soyēngama;

y cha cháuyana chēnga puerte castigánēnga jtsemnana yojtsamna ca, bacna soyēnga tmojama causa;

¹⁰ Bēngbe Bētsá chaoma ntšamo mochjapásama chēnga ndoñe chamondobená jtsetatšēmbuana,

y chaoma puerte chamosufrima, njets tempo padecena soyēnguiñe jt-siyenēse ca —cha tojánayana.

Bēngbe Bētsá ndoñe judiēnga tojatsebaca

¹¹ As mora šcotjá: ¿Israeloca entsānga Bēngbe Bētsá ndoñe tmonjanoye-uná ora, cha tojánayana chēnga njetsca tescama castigánēnga jtsemnana yojtsamna ca, ndocna injē soye chēngbiana ntsemncá? ¿Chēngbiana yojamna mo chē ndētšbeñe jójéstjiana y jtētšbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátšmēna. Chēnga Bēngbe Bētsá ndoñe chematanoyeuná causa, ndoñe judiēnga tmonjántatšēmbona ndayá bētsemnana Bēngbe Bētsábeyeca atsbocaná jtsemnana; y chē causa, mora, judiēnga, ndayá chē ndoñe judiēnga Bēngbe Bētsábentšana tmojoshachiñcá montsiyentšbuaše.

¹² Judiēnga bacna soyēnga tmojanma causa, injē entsānga quem luarentše tmojobená ba tšabe soyēnga jtsebonnama. Chē judiēnga tmonjanorrebajá causa, chē ndoñe judiēnga ba tšabe bendicionēnga Bēngbe Bētsábentšana tmojoshachiñe. Y chca, chē bētšcá judiēnga Bēngbe Bētsá játsebacama, chēnga atsebácanēnga chamojtsemna ora, más bētšcá tšabe bendicionēnga Bēngbe Bētsábentšana njetsca entsāngbiana echántsemna.

¹³ Ntšamo mora chanjayancá, tšēngaftanga ndoñe judiēngbiana entsemna. Bēngbe Bētsá šojichmó chabe soyēngama chē ndoñe judiēnga jábuayenama; atše sēntsejuabná puerte uámana trabajo stsebonma ca.

¹⁴ Atše sēntsobátmana, quem trabájoca atše jobenayana jamama chē cach atšcá buiñe bomna entsānguentsēnga, ndayá chē ndoñe judiēnga Bēngbe Bētsábentšana tmojoshachiñcá chamotsiyentšbuaše, y chca, ndayá tijamama, Bēngbe Bētsá chēnguentsana báseftanga cháuatsebacama.

¹⁵ Er chē judiēnga Bēngbe Bētsá tojtsanēbaté ora, cha tojanma injē entsānga quem luarentše cháftaca tempcá tšabá chamotsatšmēnama; y chēnga cha chamojoyeuná ora, corente tšabá echántsemna, njā chēnga mo obanēnga cuabmēncá y cuaftsatayanēngcá.

¹⁶ Nda canjē arninjēntšana chē natsana tandēse Bēngbe Bētsabiana joserviama yojtsemna ca tojananēse, jtsemnana mo njetsana chabiana cuaftsemncá. Canjē betiyentša tbētējēnga Bēngbe Bētsabiana yojtsemna ca canjā tojayanēse, njetsca chē betiyentša buacuafjēngnaca Bēngbe Bētsabiana jtsemnana.

17 Chê judiënguentse báseftanga Jesucristbeñe ndoñe montsanošbuaché ora, tsëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canye jena olivo betiyentšana entšanga tmojatëtse buacuafjëngcá, y tsëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tsëngaftanga Bëngbe Bëtsábentšana cachca tsabe soyënga chë judiëngaftaca šmontsebomna, mo chë jena buacuafjënga y cachtentša buacuafjënga cach tbëtëjentšana lempe cuaftsoyëngacañcá.

18 Ndoñe šmattsenábotamnaye, tsëngaftanga Bëngbe Bëtsabe tsabe soyënga šmojtsebomnama, chë Jesucristbeñe ndoñe montsanošbuaché judiëngbiana yojamna soyënga. Smochtsejuabnaye, buacuafjëngna chë tbëtëjëngayeca vida jtsebomnana, y ndoñe tbëtëjënga chë buacuafjëngayeca; cachcá, tsëngaftanga nye Bëngbe Bëtsábeyeca chë tsabe soyënga šmojtsebomna.

19 Pero tsëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsënjanobená mo buacuafjënga betiyiñe jenëfjëngcá chca tsabe bendicionënga Bëngbe Bëtsábentšana jóyëngacñana ca.”

20 Ndegombre, chënga Jesucristbeñe ndoñe montsanošbuaché causa, mo buacuetëtšëñëfjëngcá tmonjanoquedá, pero Jesucristbeñe šmojtsošbuáchema, tsëngaftanga šmojoquedá Bëngbe Bëtsábentšana tsabe bendicionënga jtsoyëngacañcá. Chcasna, chama ndoñe šmattsenábotamnaye; más tsabana cuedado jtsebomnana.

21 Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entšanga bëtsemnamna, monjamna mo cach betiyentša buacuafjëngcá; tsëngaftanga, chë mo betiyiñe jena buacuafjëngcá šmomnënga, cha cach ndoñe quecmochátaperdonaye, chábeñe ošbuáchiyana šmojtšajbanase.

22 Bëtscá šmochtsejuabnaye Bëngbe Bëtsá puerte tsabia yomnama, pero cha tsatjayá yomnámna smochtsejuabnaye; tsatjayá endmëna chë bacna soyënga mojtšamëngaftaca, pero tsëngaftangaftaca puerte tsabia. Cha tsëngaftangaftaca chca echántsemna, tsëngaftanga chca chašmojtšomerecénëntscuana; pero ndóñesna, Bëngbe Bëtsá echanjama tsëngaftangnaca mo buacuetëtšëñëfjëngcá chašmoquedama, chë tsabe bendicionënga Bëngbe Bëtsábentšana ntsoyëngacañcá.

23 Y ntšamo mora imojtsejuabnacá chë judiënga tmojatrocá y tmojtntsé Jesucristbeñe jtsošbuáchiyana, chëngnaca cachiñe chë tsabe bendicionënga Bëngbe Bëtsábentšana mochanjóyëngacñe, y mochántsemna mo betiyiñe jena buacuafjëngcá, er Bëngbe Bëtsá becá obenana endbomna jamama ntšamo chë judiënga tempo imojanbomncá cachiñe chamotsatsbomnama.

24 Chcasna, más paselo jtsemnana canye jena olivo betiyentša buacuatëtšëñëfja cach betiyiñe jëtšjena, y ndoñe, chë tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsanošbuaché judiëngbiana, jóntšana jtsošbuáchiyana y tsabe bendicionënga Bëngbe Bëtsábentšana jóyëngacñana, tsëngaftanga ndoñe judiënga chë tempo Bëngbe Bëtsá ndoñe šmonjanábuatmëngbiana.

25 Jesucristbeyeca catšátanga, atše sěntseboše tšěngaftanga chašmotsetátšěmbo chě tempo Běngbe Bětsá entšanga ndoñe tonjaninŷanyé soyěngama. Atše sěntseboše tšěngaftanga quem soyěngama chašmotsetátšěmbo, chca, tšěngaftanga ndoñe judiěnga chě judiěngbiana más uámaněnga šmomna ca ndoñe chašmondětsejuabnama. Ndayá Běngbe Bětsá tempo entšanga ndoñe tonjaninŷanyécá, quem soye endmēna: Běngbe Bětsá tojalesenciá, nŷe baseftatescama banga Israeloquěnga Běngbe Bětsabe soyěnga ainaniñe ndoñe chamondóyěngacñama; pero chca echántsemna, chě ndoñe judiěnguentše atsebácaněnga jtsamnama imomněnga, atsebácaněnga chamojtsemněntscuana.

26 Chca chaojopasá ora, nŷetsca Israelentša entšanga atsebácaněnga mochántsemna; ntšamo Běngbe Bětsabe uabemana palabrěnguiñe endayancá: Entšangbe atsebacayá Israelocana echanjabo, y echanjama nŷetsca Jacóběbentšana entšanga ndoñe más vida chamondětsebmna, bacna soyěnga jtsaměse ca.

27 Y mēntšá endmēna ntšamo chěngbiana chjašebuachená: chěnga játsebacana, chěngbe bacna soyěngama chaijaperdónaye ora ca —chiñe endayana.

28 Chě tšabe noticiěnga tmojtsanaboté causa, judiěnga Běngbe Bětsabe uayayěnga mondmēna, chca, tšěngaftangbe tšabiama chaotsemnama. Pero Běngbe Bětsá tojánabacacayeca, chěngnaca Běngbe Bětsabe bonsháněnga mondmēna, er Běngbe Bětsá chěngbe tempsca uámana běts taitanga chca tojanašebuachená.

29 Chca endmēna, er Běngbe Bětsá ndocna te juabna ntjatrócana; nŷetscanga chabe entšanga chamotsemnama tojáchemběnga, nŷets tempo cha echántsabuanŷeshana, y echanjama chěngbeñe tšabe bendicioněnga chaotsemnama.

30 Tšěngaftanga ndoñe judiěnga tempo ndoñe šmonjánama ntšamo Běngbe Bětsá inabošcá; y mora, Běngbe Bětsá tcmojalastemá, judiěnga Běngbe Bětsá ndoñe tmonjjoyeuná causa.

31 Cachcá, Běngbe Bětsá tšěngaftanga tcmojalastemama, judiěnga montsemna chě Běngbe Bětsá ndoñe montsobedecéněnga, chca, Běngbe Bětsá chěngnaca cháualastemama.

32 Er Běngbe Bětsá tojinŷanyé, cha ndoñe ntjjoyeunayama juabněngaca nŷetscanga mandáněnga imomnna, chca, nŷetscanga jálastemama cha jobenayama.

33 ¡Ndegombre, Běngbe Bětsá nŷetscangbiana puerta tšabia endmēna, puerta osertaná y puerta obiashjachá! Ndocná quenátobena Inŷyěnga jábuayenama ndayá Běngbe Bětsá jamama inetsejuabnaycá, y ndocná quenátobena corente joseršana ntšamo cha inetsamcá.

34 Ntšamo Běngbe Bětsabe uabemana palabrěnguiñe endayancá: Ndocná quenátstátšěmbo ntšamo Běngbe Bětsá inetsejuabnaycá; ndocná quenátobena cha jábuayenama ndayá jamana ibomnna.

35 Ndocná quenátobena ndayánaca cha natsana jshatšetayana, chě tbojatsětabiama ndebená cha jatsmēnama, y chě ndebénama ndayánaca jtoyiyama chabotsemnama ca.

36 Er lempe cha tojama, lempe cha iútabna, y lempe chabiama yomna. ¡Nŷetscanga nŷetsca tescama cha chamotsatschuaná! Chca chaotsemna.

12

Ntšamo jtsiyenēse Bēngbe Bētsá jtseservénama

1 Chcasna, Jesucristbeyeca catšátanga, Bēngbe Bētsá bēnga ba soye sojalastemáyeca, puerte chontsaimpadana, tšēngaftanga Bēngbe Bētsá chašmēyana tša šmojtseboše lempe jamana chábioye jadórama ca, Bēngbe Bētsá jadórama mo ndayá cuafjobacá y cuafjuatšēmoncá, mo cabá ainá cuafstomñcá. Smochjauyana tšēngaftanga sempre smochtsentšena cha servénana y jtsamēse cha tšabá bēngaftaca chaotsemnana. As, chca chašmojtsama ora, ndegombre oyejuayá Bēngbe Bētsá smochántsebiamnaye.

2 Ndoñe šmattsiyena jtsamēse ntšamo chē n̄ye quem luarama enójuabnaye entšanga monduamancá, y smochjaleséncia Bēngbe Bētsá mo tšēm entšangcá chácmabiamama, tšēngaftangbe ainana y juabna mo tšēmcá chaomēse. Chca, tšēngaftanga šmochanjobenaye jtsejuabnayana y smochántsetatšēmbo ntšamo Bēngbe Bētsá yobošcá: ndayá tšabá yomna, chē ndayá cha oyejuayá ibnabema, y ndayá ya ndoñe yondopodena más tšabá jtsemnana.

3 Ndayá Bēngbe Bētsá atšbiana tšabá jtsejuabnayēse šojatšetama, n̄yetsca tšēngaftanga cbochjáuyana, ndocná cachabiana chaondētsejuabná más uamaná yomna ca, n̄ye ntsachetšá jtsenójuabnayana ibomna n̄yetsá. Más tšabá, cada ona cachabiana tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chē Bēngbe Bētsá tbojatšetá ošbuáchiyana chabiana chaotsetrabájama.

4 Er, ntšamo bēnga cada ona mondbomna can̄ye cuerpo y chē cuerpiñe ba soyēnga jtsebonnana, y n̄yetsca soyēnga ndoñe cach soyama cuerpiñe ntoservénana,

5 cachcá bēnga ošbuáchiyēnga, masque bētscanga imomna, Crístoftaca cán̄yiñe mo can̄yacá mondmēnayeca, bēnga mondmēna mo chabe cuerpo cuafstsemncá, y cada ona cán̄yiñe mo can̄yacá n̄yetscāngaftaca.

6 Bēngbe Bētsá tojama bēnga cada ona chamotsebonnana ndoñe cachca chabe tšetana obenana, ntšamo Bēngbe Bētsá cada ona bēngbe tšabiana inajuabnaycá. Y chabe juábnaca bēnga jtsóyebuambnayama jtsobenama Bēngbe Bētsá tojamēse, chca mochtsama ntsachetšá chabeñe bēngbe ošbuáchiyana yomncá.

7 Ošbuáchiyēnga bētscá jaserviama bēnga chamotsobenama Bēngbe Bētsá tojamēse, chca mochtsama. Tšabá jtsabuátambayama bēnga chamotsobenama Bēngbe Bētsá tojamēse, chca mochtsama.

8 In̄yenga jañēmuama bēnga chamotsobenama Bēngbe Bētsá tojamēse, chca šontsamna. Lempe ntšamo bēnga tmobomncá in̄yengbiámnaca chaotsemnana bēnga jamama chamotsobenama Bēngbe Bētsá tojamēse, n̄yets ainánaca chca šontsamna. Amēndayēnga jtsemnana bēnga chamotsobenama Bēngbe Bētsá tojamēse, šontsamna bētscá jamana tšabá jtsamēndayama. In̄yenga jálastemama bēnga chamotsobenama Bēngbe Bētsá tojamēse, šontsamna oyejuayēnga chca jamana.

Ntšamo bēnga Jesucristbeñe ošbuáchiyēnga jtsamana šojtsamna

9 In̄ya chašmojtsebobonshana ora, n̄yets ainánaca chca smochtsama. Ndayá yomna ndoñe tšabe soye smochtsaboté y chentšana smochtsujuánañe; smochtsentšena ntšamo tšabá yomncá jtsamama.

10 Cmontsamna n̄yetscanga puerte jtsenbobonshánana, Jesucristbeyeca catśátanga quetsomñecá, chē ín̄yenga bēngbiana más uámanēnga imomna ca jtsejuabnayēse.

11 Ndoñe oyēnjayēnga šmattsemna, ndayá bētsá Bēngbe Utabnabiana šmochtsetrabájaye; ainaniñe corente añemo jtsebomñese, Bēngbe Utabná sempre šmochtseservena.

12 Tšēngaftanga Bēngbe Bētsábeñe jtsošbuáchiyēse, chábeñe šmobatmánayeca, puerte oyejuayēnga šmochtsemna; padecena soyēnguiñe chašmojtsachñējuana ora, puerte uantadēnga šmochtsemna, y siempre Bēngbe Bētsáftaca šmochtsencuéntaye.

13 Bēngbe Bētsabe entšanga opresido bomñēnga šmochjújabuache, y šmochtseprontana tšēngaftangbe yebnentše posada ín̄yenga júyentšamiana.

14 Bēngbe Bētsá šmochtseimpadana, chē tšēngaftanga chašmosufrima amēngbiana tšabe bendicionēnga cha chaotsamama; aĩñe, cha šmochjaimpáda tšabe bendicionēnga chēngbiana chaotsamama, bacna soyēnga ndoñe.

15 Oyejuayēnga ín̄yengaftaca šmochtsemna, chēnga oyejuayēnga chamojtsemna ora; ngmēnaca šmochtsemna, ín̄yenga ngmēniñe chamojtsemna ora.

16 Smochtsiyena n̄yetscanga jtsenēyeunanese. N̄ye cach tšēngaftanga uámanēnga ndoñe šmattsenobiamnaye, sinó chē nduámanēnga imomñēngaftaca tšabá mándbomñēnga šmochtsemna. Ndoñe šmattsejuabnaye yapa osertánēnga šmomna ca.

17 In̄yenga bacá chacmojtsaborlana ora, ndoñe šmattsatēchēnanguaye; corente šmochtsentšena ntšamo n̄yetsca entšangbiana tšabá yomncá jt-samama.

18 Ntsachetśá šmojobenacá, lempe šmochtsama natjēmbana n̄yetsca entšángaftaca jtseyenama.

19 Atšbe bonshánēnga, ín̄yenga bacá chacmojtsaborlana ora, ndoñe šmatjama chēnga chē causa chamotsesufrínama, ndayá Bēngbe Bētsá šmochjaleséncia chēnga cháucastigama; er Bēngbe Bētsabe uabemana palabrenguiñe cha tojánayana: “Atše chanjama chēnga chamosufrima, ín̄yenga chamosufrima tmojama causa; y chēnga chanjácastigaye, ín̄yengbioye bacá tmojaborlá causa ca.”

20 Chca játamama, mēntśá šmochjama, ntšamo cachánaca tojanayancá:

Acbe uayayá tbojtseshēntsane, saná cochjacaredáda,
y tbojtsajuendase, cochjuáfiye.

Chca chacojamēse, cochanjama cha puerte chaotsēuatja ntšamo tcmojabor-lama,
y aina corente chabotsetšena, mo chebana iñbenga chabe bestšašiñe cuaf-jacjacá ca.

21 Ndoñe šmatjaleséncia, ntšamo ndoñe tšabá tontsemncá tšēngaftanga chacmayēnjanama. Chamna, ntšamo tšabá yomncá jtsamēse, chē ndoñe tšabe soye šmochjayēnjaná.

13

1 N̄yetsca entšanga entsamna jtsamana ntšamo chē amēndayēnga tmojtsamēndacá, er ndocná obenana ntsebomnana, Bēngbe Bētsá ndoñe chca tbonjalesenciase, y n̄ye Bēngbe Bētsá tojama amēndayēnga obenana chamotsebomnana.

² Chca, chë amëndayëngbe contra tmojtsemnëngna, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna;

³ er ntšamo tšabá yomncá amënga, ndoñe quenátamna ndayama chë amëndayënga jatebëuatjana, nÿe chë bacna soye amëngna aíñe. Tšëngaftanga šmojtseboše jtsiyenama chë amëndayëngbioye ntjatebëuatjá; chcasna, ntšamo tšabá yomncá šmochtsama, y chë amëndayëngna tšabe bomínÿeca mochantsonÿaye ntšamo chašmojtsamcá;

⁴ er chë amëndayëngna Bëngbe Bëtsabe trabajo amënga mondmëna, tšëngaftangbe tšabiama. Pero bacna soyënga šmojtsamëсна, cmontsamna jtsiyenana chë amëndayënga jtsebëuatjëse, er chënga jacastígama obenana mondbomna, y chca mondbëtsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima.

⁵ Chíyeca, jtseytana ntšamo chë amëndayënga tmojtsichamcá jtsamana, pero ndoñe nÿe chë castigo ndoñe chašmondëtsebobnana, ndoñe chca šmotsama causa, sinó chë ainanentsa tšabe juabnënga ntšamo tbojtšëtsësnacá joyeunayama yómnyeca.

⁶ Cachca soyëngama, amëndayëngbiana impuesto tšëngaftanga jtsatsquëcñayana; er chë amëndayënga Bëngbe Bëtsabe oservëngna mondmëna, ntšamo chiñe jtsamama tojtsamncá corente tmojtsentšëna ora.

⁷ Chcasna, tšëngaftanga šmochjáyentsbuachiye ntšamo chënga jtsebomnana tojtsamncá. Chë crocënanana entšanga ayëngacayëngbioye, ndaye impuëstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

⁸ Crocënanana inÿa jëtsëntšabuáchiyama chacmojtsamnëse, nÿe ntoiyicá ndoñe šmatjoquëda, nÿets tempo ndebënéngna; nÿe quem soye sempre šmochtsama: nÿetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyíñe yomandancá.

⁹ Quem mandënga, “acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, inÿa tojtsebomna soye ndoñe nÿe acbiama cattseboše”, y chë inÿe mandënga leyíñe lempe quem mandíñe entsemna: “Ndëmua entšánaca cochtsebobonshana ntšamo cach aca cuenobobonshancá”.

¹⁰ Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyíñe yomandancá.

¹¹ Chë soyënga cmontsamna jtsamana, er bënga mondëtatšëmbo ya chë uámana tempíñe imojtsiyenama, chë mocna ora šojtsamna prontánënga jtsemnana, mo ocnayentsana cuafjofšenangcá, Jesucristo jaserviama jt-sentšënése. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontšë ora enjamnana.

¹² Mora bënga mondoyena canÿe luarentšë bëtscá bacna soyëngaca y ngmenánaca, y chca jtsemnana mo bënga nÿets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binÿniñe ya jontšamcá. Chíyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y

jayénjanama bēnga jtseprontánēse, mo canyē soldado jenēuyanama y inya jayénjanama ba soyēnga tojenocjacá.

¹³ Ntšamo šojtsamncá mochtsiyena, ntšamo entsānga ndaye tšabe sóynaca jamama monduamancá, ínɣēngbiama lempe chaotsinýnēse. Chcasna, ndoñe quešnátamna yapa tmoýēnga ntsemnana, ndoñe fiestēnguenache ndoñe tšabe soyēnga ntsamana, ndoñe bacna soye boyabása o shembásaftaca ntsamana y jenomándama ntobencá chca soyēnga ndoñe ntsamana, nýetscanga ndoñe cachcá ntsejuabnayama ndoñe ntsamana y ndoñe ínɣēnga yapa ntšiyentšbuašana.

¹⁴ Chca játamamna, šmochtsiyena jtsamēse ntšamo Bēngbe Utabná Jesucristo endbetsamcá, y ndoñe nýe šmatjésejuabnaye jtsamana nýe cach tšēngaftanga tšabá jtsomñama juabnēngaca, ndayá tšēngaftanga chašmotsamama chē juabnēnguifne tojtsemncá.

14

Ndoñe šmattsóyebuambnaye inýe ošbuáchiyēngbe contra

¹ Chē Jesucristbeñe nýe batšatema ošbuáchiyēnga tšabá šmochjúbuaja, y chēngaftaca ndoñe šmattsenatsētsnaye ndayá aifne o ndoñe jamana yontsamnama.

² Er básefta ošbuáchiyēnga corente imotátšēmbó chēnga nýe ndayánaca jasama imobenama, pero chē Jesucristbeñe nýe batšatema ošbuáchiyēngna, ndocna mēntšena ntsesayana, er chēnga jtsejuabnayana aifne jasana canyē bacna soye nántsemna ca.

³ Chē nýetsca saná sayēnga ndoñe chamondētsejuabná chē inýe soyēnga ndoñe mondētsesayēngbiama, chē causa chēnga más batšá uámanēnga imomna ca; y chē ndaye soyēnga ndoñe mondētsesayēngna, chē nýetsca saná sayēngbe contra ndoñe chamondētsoyebuambná, er Bēngbe Bētsá chēnga tojúbuaja mo chabe entsāngcá.

⁴ Tšēngaftanga ndoñe quecmátamna chē ínɣabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chē oservená jamana ntšamo tbojtsemncá, er Bēngbe Utabná obenana endbomna cha chca chaotsamama.

⁵ Báseftanga mondmēna, chēnga jtsejuabnayana canyē te inýe tescama más uámana te yomna ca; pero ínɣēngna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšēmbó, ntšamo yojuabnacá ndáyeca chca ca.

⁶ Nda tojtsejuabná canyē te inýe tescama más uámana te yomna ca, chca jamana Bēngbe Utabnábiana jtenójuaboyama. Y nda nýetsca saná tojttesá, chca jamana Bēngbe Utabnábiana jtenójuaboyama, er cha Bēngbe Bētsábioye chē sanama jētschuayana; y nda tojtsejuabná sananga yomna y ošbuáchiyēnga chcana chamotsesama Bēngbe Bētsá ndoñe yondboše ca, cha chē soyēnga ndoñe ntjasana, Bēngbe Utabnábiana jtenójuaboyama, y chánaca Bēngbe Bētsábioye chē sanama jētschuayana.

⁷ Bēnga ošbuáchiyēnguentšana ndocná ainá ntsemnana nýe cachabiana, ni jóbanana nýe cachabiana.

⁸ Bēnga tmojtšiyenēse, Bēngbe Utabnábiana jtsiyenana; y tmojóbanēsna, Bēngbe Utabnábiana jóbanana. Chca, masque ainēnga o obanēnga, bēnga Bēngbe Utabnábēnga jtsemnana.

9 Chama Cristo tojanóbana y Bèngbe Bètsá tojanma cha cháuatayenama, cha Bèngbe Utabná chaotsemnana, ainéngbeñe y chë ya tmojóbanéngbeñe chaotsemándama.

10 As, ¿ndáyeca tséngaftanguentse báseftanga, catsátangbe contra jtsóyebuambnayana, ndáyá chénga tmojtsamama? ¿Y ndáyeca ín'yenga tséngaftanguentse jtsichámuana, catsátanga ndoñe uámanénga montsemna ca, ndáyá chénga tmojtsamama? Er nyétscanga šontsamna Bèngbe Bètsabe delante jashjanguana, ntšamo cada ona tojéftsemcá tšabá o ndoñe tšabá bétsemnana cha cháuyanama.

11 Er Bèngbe Bètsabe uabemana palabrènguiñe Bèngbe Utabná mèntšá tojánayana:

Ndegombre atše ainá sèndètsomñe, y chíyeca atše scojurá,

nyétscanga atšbe delante mochanjoshèntsaméntša atše jadórama,

y nyétscanga šmochanjauyana, “ndegombre aca Bèngbe Bètsá condmèna ca”.

12 Chcasna, cada ona bènga šontsamna Bèngbe Bètsá jauyanana ntšamo tmojamama ndáyeca chca ca.

Ndoñe šmatjama in'ye ošbuáchiyènga bacna benachiñe chamótsatsama

13 Chíyeca, ya ndoñe quešnátamna ín'yengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te ton-daye ntjamana, ndáyá chaoma Jesucristbeyeca acbe catsáta, chaojuabó y bacna soyènga chaoma.

14 Atše sèndètatšèmbó, mo can'ya Bèngbe Utabnáftaca cán'yíñe mo can'yacá quetsomñecá, ndocna soye yondmèna, nye cachabe ponto chaotsemna ndoñe tšabe soye. Pero can'ye entšá tojtsejuabná ndayánaca ndoñe tšabe soye yondmèna ca, ni jasama, ni jabojuama, chabiama cocayé chë soye nyets tempo jéftsemnana ndoñe tšabe soye.

15 Tséngaftanga in'ya becá šmojtsatsètsná, in'ye soyènga tšabá endmèna jasama ca, y cha tojtsejuabná, chca soyènga jasama ndoñe tšabá yondmèna ca, pero tséngaftanga tša šmojtsatsá causa, cha chca soyènga tojase, y chentšana tbojtsebiona puerte bacna soye tojamama, chca, tséngaftanga jtsin'yan'ynayana ndoñe šmondoyena jtsamése chë ín'yenga jtsababuán'yeshanése. Nye tséngaftanga in'ye soyènga šmétsesayama ndoñe šmatjaleséncia chë soye chaoma in'ya, ndabiama Cristo tojanóbana, chë ndoñe ndegombre benachiñe chaoquedama.

16 Ndoñe šmatjaleséncia ndáyá tséngaftanga tšabá šmétsamama, ín'yenga ndoñe tšabá tséngaftangbiamá chamotsóyebuambnana. Chca šmochanjobenaye, ntšamo šmojtsamcá jtsajbanase, ín'yenga ndoñe tšabá tmontsoyebuambná ora.

17 Bèngbe Bètsabe améndayana bèngbeñe ndoñe quenátsmèna in'ye soyènga aiñe jasana o in'ye soyènga ndoñe, can'ye soye aiñe jofsiyana o in'ye soye ndoñe. Pero chabe améndayana bèngbeñe aiñe endmèna jtsamana soyènga ndayama Bèngbe Bètsá tojayana aiñe tšabá jamama yomna ca, cháftaca tempcá tšabá jtsatsmènana y ainaniñe oyejuayana jtsebomnana; y Uámana Espíritbeyeca bènga jobenayana chca jamana.

18 Y nda Cristbiye chca tbojtsešervena, jamana Bèngbe Bètsá cháftaca oyejuayá chaotsemnana, y entšangbe bominiñe tšabia jtsemnana.

19 Sempre šontsamna tšabe soyènga jtsamana y chë soyèngaca chaopodé jamana nyétscanga natjèmbana chamotsiyenama, y ndaye

sónaca šmochtsama, ndayá ínŷenga chaújabuache Jesucristbeñe corente jtsošbuáchiyama y ainaniñe bētsca añemo jtsebomnama.

²⁰ Tšēngaftanga ndaye sanánaca jasama šmobénayeca, ndoñe šmatjama chaotsopochocama ndayá Bēngbe Bētsá ainaniñe tojamcá. Ndegombre, nŷetsca sananga tšabá jasama endmēna; pero ndayá tšēngaftanga šmojasama, ínŷa bacna benachiñe chaótsatsama šmojamēse, chē soye cocayé ndoñe tšabá ntsemnana.

²¹ Tšabá endmēna mēntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chē soye añe tcojama ora, Jesucristbeyeca canŷe catšata chaojuaboma y bacna soye chaomama tojoservese.

²² Asna, ntšamo tšēngaftanga chē soyēngama ndegombre šmošbuachecá, nŷe Bēngbe Bētsá y tšēngaftangaftaca chaotsemna. Canŷe entšá ndegombre oyejuayá jtsemnana, canŷe soye jamama tšabá yomna ca tojtsejuabnase, y chē soye tojamentšana, ndoñe tšabá chca yonjamna ca juabnēnga ainaniñe ndoñe tontsebomnēse.

²³ Pero canŷe entšá ndayá tojamentšana tojayana, bacna soye tojama ca chē ndayá tojasama o tojamama, as Bēngbe Bētsánaca echanjayana cha ndoñe tšabá tonjama ca, er ntšamo tojamcá ndoñe tonjama chē soye añe tšabá yomnama jtsošbuáchiyēse; y ndayánaca chca ora tojtsamēse, chca jamana bacna soye jtsemnana.

15

Ntšamo ínŷengbiana tšabá tojtsemncá mochtsama, ndoñe nŷe bēngbiana

¹ Bēnga, chē Jesucristbeñe corente ošbuáchiyēnga, šontsamna chē nŷe batšatema ošbuáchiyēnga jujabuáchana, chēnga bacna soyēnga tmojtsama ora, nŷe batsá ošbuáchiyana bomna causa; y ndoñe nŷe jatsēnguayana nŷe ndaye soyēngaca yopodena bēnga tšabá jtsemnana.

² Cada ona bēnga šontsamna jamana ntšamo cach bēngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bētsca Jesucristbeñe chaotsošbuáchema, y ainaniñe más añemo chaotsebomnama.

³ Er Cristo, ntšamo tojanmcá cach ndoñe tonjanma nŷe cha oyejuayá jtsemnana. Inŷetšá, cháftaca tojanopasá ntšamo Bēngbe Bētsabe uabemana palabreñguiñe endayancá, mo Cristo Bēngbe Bētsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsētsná ca.”

⁴ Er lempe ntšamo tempo Bēngbe Bētsabe uabemana palabreñguiñe tmojanabemcá, bēnga jabuátambama endmēna. Ndayá bēnga chiñe tmojuatsjínŷama, bēnga jtsobenana padecena soyēnguiñe tmojtsachnějuana ora uantadēnga jtsemnana, y ainaniñe más añemo jtsebomnama; y chíyeca bēnga montsobena, chábeñe jtsošbuáchiyēse, chábeñe jobátmana, ntšamo tojanayancá chaomama.

⁵ Atše, Bēngbe Bētsá séntseimpadana, nda inétsama bēnga padecena soyēnguiñe uantadēnga chamotsemnana, y nda inétsama bēnga ainaniñe más añemo chamotsebomnama, cha chaoma nŷetscanga canŷe juabna chašmotsebomnama, ntšamo Cristo Jesús yojanjuabnacá tšēngaftanga jtsejuabnayēse;

6 cha chca chaoma, n̄yetsca ts̄əngaftanga mo cán̄yĩne cuaftsemncá, y mo n̄yetscanga can̄ye ora cuafjayancá, B̄əngbe B̄ətsá, B̄əngbe Utabná Jesucristbe Taitá, puerte b̄ətsá y uamaná yomnama chašmuin̄yan̄yema.

Ch̄e ndoñe judiəngbiámnaca ch̄e ts̄abe noticiənga jtsemnana

7 N̄yetscanga oyejuayənga šmochjenofja, nt̄samo Crístnaca ts̄əngaftanga tcmojan̄əbuajcá, chca, entsanga chamuin̄yan̄yé B̄əngbe B̄ətsá puerte b̄ətsá y obená yomnama.

8 Atse s̄əntseboše ndayá jayanana, Cristo tojánabo judiənga jabáserviamaca, chca, jin̄yan̄yiyama B̄əngbe B̄ətsá sempre in̄étsamama nt̄samo tojašebuachenacá; tojánabo nt̄samo B̄əngbe B̄ətsá b̄əngbe tempsca uámana b̄əts taitanga tojanašebuachenacá chaocumplima;

9 y B̄əngbe B̄ətsá puerte b̄ətsá yomna ca ch̄e ndoñe judiəngnaca chamuayanámnaca, cha ch̄ənga in̄étsalastemanama, nt̄samo B̄əngbe B̄ətsabe uabemana palabrenguiñe endayancá, y chca tojanocumplí:

Chíyeca, atse ch̄e ndoñe judiəngbeñe chaitsemna ora, aca cbochantsatschuanaye, B̄əngbe B̄ətsá;

y jacántase chanjayana aca puerte b̄ətsá y uamaná comna ca.

10 In̄yoca m̄ənt̄sá endayana:

Puerte oyejuayənga ch̄e ndoñe judiənga šmochtsemna, B̄əngbe B̄ətsabe bocacana ents̄əngaftaca cán̄yĩne ca.

11 Y in̄yoca m̄ənt̄sá endayana:

B̄əngbe Utabná šmochtsatschuanaye ts̄əngaftanga ndoñe judiənga, y cha šmochtsatschuanaye n̄yetsca ts̄əngaftanga n̄yets luarənguenache ents̄ənga ca.

12 Y Isaíasnaca B̄əngbe B̄ətsabe uabemana palabrenguiñe m̄ənt̄sá tojanábema:

Can̄ya Isaibe ents̄ənguent̄šana echanjabo,

y B̄əngbe B̄ətsá chábioye uamaná bochanjábema, n̄yets luarənguenache ents̄ənga chaotsaməndama,

y ch̄ənga chábeñe jtsošbuáchiyēse, chábeñe mochantsobátmana ts̄abe soyənga ch̄əngbiama chaotsamama ca.

13 Atse, B̄əngbe B̄ətsá s̄əntseimpadana, nda in̄étsama b̄ənga chábeñe chamotsobátmanama ts̄abe soyənga b̄əngbiama chaomama, cha chaoma ts̄əngaftanga ainaniñe puerte oyejuayənga chašmotsemnana y ainaniñe ts̄abe ebionana chašmotsebonnana, chábeñe jtsošbuáchiyēse; y B̄əngbe B̄ətsá chca ts̄əngaftangbiama chaoma, ts̄əngaftanga cada te más chábeñe chašmotsobátmanama, ch̄e Uámana Espiritbe obenánaca.

14 Jesucristbeyeca atse catšátanga, atse corente s̄əndétatšəmo ts̄əngaftanga puerte ts̄ábenga šmomnana, ndayá cmannama corente šmotatšəmbuama, y jtsebuayin̄yayama šmobenámnaca.

15-16 Quem tsbuanáchañe básefta soyəngama s̄ənjuábema, nt̄samo šmatjátsjuabnayama atse nt̄jatauatjácá; chca s̄ənjama, básefta soyəngama chašmuatenójuaboma; y chca s̄əntsobena juabemana, er B̄əngbe B̄ətsá tojama atse chaitsebonna ch̄e uámana trabajo, Cristo jtse servénana, ch̄e ndoñe judiənga jtsejabuáchanēse. Atse bachn̄écá s̄əntsoservena, Cristo stseservena ora, ents̄ənga ts̄abe noticiəngama jtsebuayin̄yayēse; atse chca s̄əndama ch̄e ndoñe judiənga Jesucristbeñe chamotsobuácheyama, y ndayánaca chamotsamama B̄əngbe B̄ətsá oyejuayá ch̄əngaftaca chaotsemnana, mo chabiama can̄ye uatšəmbonancá. Chcánaca atse s̄əndama, ndoñe judiənga ndegombre B̄əngbe B̄ətsábenga chamotsemnana, ch̄e Uámana Espiritbeyeca.

17 Chca, atše Cristo Jesúseftaca cányiñe mo canyáca quetsomñecá, ndegombre sentsobena jtsejuabnayana ntšamo Cristo jaserviama atše sëndamcá, puerte uámana soye yomnana.

18 Atše añemo sëntsebomna nye chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayana y tijamama,

19 chë Bëngbe Bëtsabe obenana jinýanýiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabojátšase, nyetsca luarënguëjana Iliria luaróntscoñe, Cristbe tšabe noticiëngama nyets luarënguenache entsanga tijabuayená.

20 Atše sempre canye soye inye soyëngama más sënjánboše, y enjamna chë tšabe noticiëngama jábuayenana, entsanga ndocna te Cristbiamama oyebuambayana tmonjanuena luarënguenache; y chca sënjanma, atše ndoñe játamama inya tojanbojátšé trabajo, mo ínýabe bojátšena yebnentše jajebuama cuafjantontšecá.

21 Ntšamo Bëngbe Bëtsabe uabemana palabrënguiñe endayancá, chë tempo Cristbiamama ndoñe tmonjanuenëngbiamama:

Chë ndëmuanyënga tempo ndocná chabiamama tonjanabuayená, chënga tšabá mochanjinýe ntšamo cha yomnana;

y chë ndocna te chabiamama tmonjoudenënga, chabe soyëngama echanjósertayeca.

Pablo yojanjuabná Roma bëts puebloye jama

22 Y nýa chë causa, atše ndoñe chiyjobená tšëngaftangbiöye jama tšëngaftanga jányama, masque ba soye tsjenojuabná choye jama.

23 Pero mora atšbe trabajo quem luarënguiñe sënjapochocá y tempscana tšëngaftanga jányama tša sëndánbošeyeca,

24 sëntsejuabná mora aiñe chjobenaye choye jama, tšëngaftanga jautsëtsayama, chëjana chajjachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátšetaye jobenayama Españoloye ayana jtëtóntšama.

25 Morna Jerusalenoye chanjá, choca entsanga Bëngbe Bëtsábenga imomnënga jaujabuáchama;

26 er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entsanga, Bëngbe Bëtsábenga imomnënga y ndbomnjëmënga imomnënga jujabuáchama; y oyejuayënga chca tmonjama.

27 Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábicocana tmojanóyëngacñe soyënga ndoñe judiëngnaca chamotsebomnana; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatšatayëse, chënga vida jtsebomnana chamotsobenama.

28 Y chca, quem trabajo chajjapochocá ora, y chë ndoñe judiënga ošbuáchiyënga lempe tmojátbanana chajjäftsayentšbuachiye ora, chanjontsé Españoloye jama, y tšëngaftangbiajana chanjachnëngo tšëngaftanga játsanýama, tšëngaftangaftaca baseftayté jëftsemnana.

²⁹ Atše corente sěntsetatšēmo tšěngaftangbioye chajjá ora, chjášhjangó y chjama tšěngaftanga bětscá tšabe bendicioněnga Crístbentšana chašmotsebmnama, tondaye chacmondětsabuáshebeněntscuana.

³⁰ Jesucristbeyeca catšátanga, Běngbe Utabná Jesucristbeñe ošbuáchiyěnga quetsomñecá, y běnga bonshánana chamotsebmnama chě Uámana Espiritu inětsamayeca, tšěngaftanga cbontsaímpadana, bětscá chašmotsentšena Běngbe Bětšá nýets ainánaca jtseímpadánama, ntšamo atše sěndbetseímpadancá, cha atše chašotsinýenama.

³¹ Cha šmochtseímpadana chě Judea luaroca ndošbuáchiyěnga ndocá chašmonděborlama, y chě Jerusalenoquěnga Běngbe Bětšábenga, tšabá chamoyěngacñama ndayá chěnga jujabuáchama chajjátsayentšbuachiye ora.

³² Y chentšana, y Běngbe Bětšá chca chaojábošeně, atše chayobená bětscá oyejuayá tšěngaftangbioca jashjanguana tšěngaftanga jányama, y tšěngaftangaftaca chaitsemna ora, batšá jóchnama chayobená.

³³ Atše, Běngbe Bětšá sěntseímpadana, nda inětsama běnga ainaniñe tšabe ebionana chamotsebmnama, nýetsca tšěngaftangaftaca chaotsemnama. Chca chaotsemna.

16

Ubuátměnga jacheuyama

¹ Atše sěntseboše tšěngaftanga jáuyanana Febe, Jesucristbeyeca běngbe uabena, canýe tšabe entšá endměnama; cha chě Cencrea puebloca enefjuana ošbuáchiyěnga endújabuachana.

² Tšabá cha šmochjofja, mo canýa Běngbe Utabnábia quetsomñecá, ntšamo Běngbe Bětšabe entšanga entsamncá inýengaftaca jenofjana. Šmochjuájabuache ntšamo tbojtsajabotcá, er cha banga tonjúabuache; átšbioynaca.

³ Atšbe cuenta Prisca y Aquila šmochjácheuaye, chě átšeftaca tbonjatrabajata, Cristo Jesusbíama oservěniñe.

⁴ Jobanámna bonjanprontana, atše jatsbocama, ndoñe chašmondóbama. Atše chama chata sěntsatacheuaná; y ndoñe nýe atše, sinó nýets luarenache enefjuana ndoñe judiěnga ošbuachiyěngnaca chca.

⁵ Chě ošbuáchiyěnga, chě Běngbe Bětšá jětschuayama chatbe yebnentše jénefnama imuamaněngnaca, šmochjácheuaye. Atšbe bonshana Epeneto šmochjachuaye; cha endměna chě natsaná Asia luaroca Jesucristbeñe jtsošbuáchiyama.

⁶ María šmochjachuaye; cha tšěngaftangbeñe bětscá tojatrabajá.

⁷ Chě cach atšcá judeocata Andrónico y Junias šmochjácheuaye. Chata canýe ora átšeftaca cárcloye bonjanětáměna, y Jesucristbe ichmóněngbíama chata puerte uámanata bonjamna, y atšbíama más natsana tbojanontšé Jesucristbeñe jtsošbuáchiyama.

⁸ Ampliato šmochjachuaye, atšbe bonshaná, er atšcá cha Běngbe Utabnáftaca cánýiñe mo canýacá bondměna.

⁹ Urbano šmochjachuaye, chě běngaftaca Crístbíama oservěniñe trabajayá; y atšbe bonshana Estáquínaca šmochjachuaye.

¹⁰ Apesles šmochjachuaye; cha ba soye tonjinýanýe Jesucristbeñe puerte yošbuáchema; y Aristóbulbe yebnentšěngnaca šmochjácheuaye.

¹¹ Chě cach atšcá judeocá Herodión šmochjachuaye, y chě Narcisbe pamilentšana Běngbe Utabnábeñe ošbuachiyěngnaca.

¹² Trifena y Trifosa šmochjácheuaye; chata Bëngbe Utabnabiana puerte bondëtrabája; y bëngbe bonshaná Pérsidnaca šmochjachuaye; cha bëtsá endëtrabája, Bëngbe Utabnabiana oservéniñe.

¹³ Rufo, chë Bëngbe Utabnabiana uamana trabajayá, šmochjachuaye, y chabe mamánaca; cha mo atšbe mamacá endmëna.

¹⁴ Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucristbeñe ošbuáchiyënga chëngaftaca inmënutanangnaca.

¹⁵ Filólogo y Julia, Nereo y chabe uabena, Olimpas y nÿetsca Bëngbe Bëtsabe entšanga chëngaftaca inmënutanangnaca šmochjácheuaye.

¹⁶ Nÿetscanga mo Jesucristbeyeca catšatangá šmochjenuchaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanayá. Nÿets luarenache enefjuana Cristbeñe ošbuáchiyënga cmontsacheuaná.

¹⁷ Jesucristbeyeca catšátanga, atše cbontsaimpadana tšabá šmochjuáfšna y cuedado šmochtsebmna chë cánÿenga ínÿengaftaca contra chamotsemnama y ínÿenga Jesucristbeñe ošbuáchiyana chamotsajbanama inmëtsamëngbiama; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana.

¹⁸ Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nÿe cachëngbe cuerpama tšabá tojtsemncá; y tšabe y botamana palabrëngaca chë paselo jáingñama yomna entšanga jáingñana, chëngbe ainaniñe chëngcá chamotsejuabnama.

¹⁹ Nÿetsca entšanga tmojouena, chë Bëngbe Bëtsabe soyëngama ntšamo ínÿenga tmojabuatambacá, tšëngaftanga corente šmnëtsayaunanama, y chíyeca atše puerte oyejuayá tšëngaftangafaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá.

²⁰ Y Bëngbe Bëtsá, nda inëtsama bënga ainaniñe tšabe ebionana chamotsebmnama, ndoñe bën y echanjama tšëngaftanga Satanás chašmoyënjana, mo cha tšëngaftangbe cucuatšíñe cuafjaboshjoncá. Atše sëntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

²¹ Timoteo, chë átšeftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

²² Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñecá.

²³ Gayo cmontsacheuaná; atše Pablo chabe yebnentše posada sëntsebmna, y cha enduamana nÿetsca chë muentša ošbuáchiyënga tšabá júbuajana. Erasto, chë quem pueblentša crocénana bojanÿá, tšëngaftanga cmontsacheuaná, y Jesucristbeyeca bëngbe catšata Cuártënaca.

²⁴ Atše, Bëngbe Utabná Jesucristo sëntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

Quem tsbuanácha juapochócama, Pablo Bëngbe Bëtsábioye tbojtanchuá

²⁵ Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchema; y chca, cha echanjama ntšamo chë bënga fsëndabuayiyñá tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo

chë Bëngbe Bëtsá šojinÿanjé ndegombre soyënga yomncá. Nÿets tempo mëntscoñama, Bëngbe Bëtsá chë soyënga entšanga ndoñe tonjinÿanjé, y chë causa chënga chë soye ndoñe ntsetatšëmbuana.

²⁶ Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entšanga chë ndegombre soyëngama chamotsetatšëmbuama; Bëngbe Bëtsá, chë nÿets tempo vida bomná, tojanmandá entšanga nÿets luarënguenache chë ndegombre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

²⁷ Nÿe canÿe Bëngbe Bëtsá endmëna, y cha nÿets osertánana endbomna. ¡Nÿetscanga chamotsinÿanjáná cha puerte bëtsá y uamaná yomnama, ndayá Jesucristo tojanmama! Chca chaotsemna.

1 Corintios

Pablo chënga jacheuayama

¹ Atše Pablo, ndábioye Bëngbe Bëtsá tbojanchembo Jesucristbe ichmoná jtsemnana, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca,

² quem tsbuanácha sentsabiamná tšëngaftanga chë Corinto bëts puebloca Jesucristbeñe ošbuáchiyëngbiam; ndëmuanyënga Cristo Jesúseftaca Bëngbe Bëtsá tojábiama chabe entšanga nýe chábioye oservénënga, ndëmuanyënga Bëngbe Bëtsá tojáchembo chabe entšanga chašmotsemnana, chë nýe quem luarama enójuabnaye entšanguentšana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná.

³ Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana, y tšëngaftangbe ainaniñe tšabe ebionana chašmotsebonnana.

Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebonnana

⁴ Bëngbe Bëtsá tšëngaftangbiam sempre sëndbëtsatschuanaye, er tšëngaftanga cánýiñe mo canýacá Cristo Jesúseftaca šmómnyayeca, Bëngbe Bëtsá tšëngaftangbeñe tojajuabó, tšëngaftangbe tšabiam.

⁵ Chca Crístoftaca šmómnyayeca, Bëngbe Bëtsá tojama tšëngaftanga chašmotsebonnana chábentšana nýetsca tšabe soyënga, tšëngaftanga obenana chašmotsebonnana cha jamëse, Bëngbe Bëtsabe soyëngama jóyëuambayama y chë soyëngama chacmésertama.

⁶ Chca, ntšamo chonjanabuayinacá mo Jesucristbe ndegombre soyëngcá, tšëngaftángnaca ínýëngbioye tšabá šmojinýanjé ndegombre soyënga bëtsemnana, chë ntšamo jtsiyenama.

⁷ Y chca, Bëngbe Bëtsá chabe entšanga inétsatšatnaye tšabe soyënguentšana tondaye quecmochatabuáshebena, Bëngbe Utabná Jesucristo quem luarentšë yochtónýna tescama Bëngbe Bëtsabeñe jtsošbuáchiyëse chašmojtsobátmanëntscuana.

⁸ Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebonnana, ndayá tšëngaftangaftaca jamama cha yoyuabnacá chaojapochocantscuana; chca, chë Bëngbe Utabná Jesucristo nýetsca entšangbiam tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca.

⁹ Bëngbe Bëtsá nýets tempo jtsamana ntšamo tojašebuachenacá, y cha endmëna nda tcmojánchembo cánýiñe mo canýacá chašmotsemnana chabe Uaquiná Jesucristoftaca, Bëngbe Utabná.

Choca ošbuachiyëngbeñe nýetscanga ndoñe cachcá montsanjuabná

¹⁰ Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nýetsca bëngbiam yomnana, tšëngaftanga nýetscanga cachcá chašmotsejuabnana, y tšëngaftangbeñe ndoñe más báseftanga canýe soye y ínýënga inýe soye chamuatsjuabná. Y aíñe šmochtsiyena mo canýacá, nýetscanga cachcá jtsejuabnayëse y cachcá jamama jtsebošëse.

11 Jesucristbeyeca atšbe catšátanga, atše chca sēnjayana, er Cloebe yebnentsēnga šmonjabēuenaye, tšēngaftangbeñe šmojtsenpenzentserama.

12 Ntšamo sēntsichamcá entsemna ndayá tšēngaftangbentše báseftanga šmojtsichamo: “Atše Páblēbe ustoná sēndmēna ca”; ínŷengna imojtsichamo: “Atšna Apólosbe ustoná sēndmēna ca”; ínŷenga: “Atšna Pédrēbe ustoná sēndmēna ca”, y ínŷengna: “Atšna Cristbe ustoná sēndmēna ca” imojtsichamo.

13 Chca šmojtsamama, jtsóbocanana mo cada básefa ošbuáchiyēnga canŷe Cristo tmojtsebmncá. ¿Pablo yojamna nda tmojanrucificá tšēngaftangbe tšabiama? ¿O tšēngaftanga uabáinēnga šmomna, atše jótšēmbonēse, tšēngaftanga atšbe ústonēnga bétsemnana?

14 ¡Bēngbe Bētsá sēndbētsatschuanaye atše ndocná tšēngaftanguentšá tianábayama; nŷe Crispo y Gáybioye aiñe!

15 Chca, ndocná quenátobena jayanana, atše jótšēmbonēse uabainá cha tojanokedá ca, mo átšbeñe ošbuáchiyēnga cuaftsemncá.

16 Estéfnasbe pamillentsēngnaca sēnjanēbaye, pero ndoñe quetsatabouínŷa inŷa tianábayama.

17 Er Cristo ndoñe chešnatanichmó ínŷenga jubáyama, ndayá chē chabe tšabe noticiēngama entšanga jábuayenama. Ndoñe chešnatanichmó chē soyēnga jayanama, corente osertana entšangbe soyēnga jtsichámēse; chca, entšanga Cristbeñe chamotsošbuáchema, ndoñe chē atšbe osertánanēšana palabrengama, sinó nŷe chē buayenánama, Cristo cruzoca bēngbiama tojanóbanama.

Cristbeñe yomna Bēngbe Bētsabe obenana y osertánana

18 Quem buayenánana, Cristo entšangbiama cruzoca tojanóbanama, chē pochocánēnga jtsemnana tmojtsajnēngbioye jtsinŷanana mo ndoñe corente juabna bomnēngbe soycá; pero bēngbiama, chē Bēngbe Bētsá nŷetsca tescama šochjátsebacangbiama, quem buayenánana jtsinŷanŷanayana Bēngbe Bētsabe obenana.

19 Ntšamo Bēngbe Bētsá chabe uabemana palabrenguiñe tojanayancá: Atše chanjama chē tša osertánēngbe osertánana tondayama chaondētsoservénama; y chanjama chē ba soyēngama osertánēngbe osertánana tondayama chaondētsámanama.

20 ¿Ntsachetšá yojtsámama chē tša osertaná y chē puerte uatsjinŷená tbojayana soyēnga? ¿Ntsachetšá yojtsámama chē tša tšabá chē soyēngama juabnáyá, morscá, y ínŷengaftaca enatsētsnaye ora chēngbe ayēnjanayá tojayana soyēnga? Ndegombre Bēngbe Bētsá tojinŷanŷé, chē quem luarentša bēts osertánanaca tmojayana soyēnga tondaye yonduámanama.

21 Bēngbe Bētsá, nŷets osertánana bomná quetsomñēca y puerte tšabá jtsejuabnaye, ndoñe tonjanalesenciá quem luarentša entšanga cha chamotsábuatmama, chē quem luarentsēnga tša osertánēnga tmojánayana soyēngama. Chamna, cha tšabá tbojanínŷanana chábeñe ošbuáchiyēnga játsebacana chē bēnga fsēndabuayinŷá soyēngama, masque ínŷēngbioyna mo ndoñe corente juabna bomnabe soycá jtsinŷanana.

22 Judiēnga tša jtsebošana y Bēngbe Bētsábioye jtsotjanañana bēts soyēnga chaomama, chabe obenana jinŷanŷiyama; y ndoñe judiēnga tša jtsen-guayana chē puerte osertánēngbe soyēnga jtsetatšēmbuama.

23 Pero bēngna Cristbiama entšanga fsēndabuayinŷá, chē ínŷenga tmojanrucificabiama. Quem buayenánana chē judiēnga ndoñe tšabá ntjéuanana.

Y ndoñe judiënga mondbétsejuabnaye chca yomna mo canye ndoñe corente juabna bomnabe soyca ca;

²⁴ pero bëngbiamna, nyetscanga Bëngbe Bëtsá chabe entšanga chamotsemnama sojáchembëngbiamna, masque judiënga o ndoñe judiënga, Crístbeñe endmëna nyets Bëngbe Bëtsabe obenana y osertánana;

²⁵ er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinýanana mo canye ndoñe corente juabna bomnabe soyca, pero ndegombre endmëna canye puerte más osertaná tojama soye, lempe ntšamo entšanga imotatsëmbuama. Y ndayá cha tojamcá masque bångbiøye jtsinýanana mo canye tondaye obenabe soyca, ndegombre chë soye jtsinýanýanana Bëngbe Bëtsá puerte más obenana yobomnama, nyets obenana ntšamo entšanga imobomnama.

²⁶ Jesucristbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entšanga chašmotsemnama tcmojánachembo ora. Tšëngaftangbentše nye báseftanga tša osertánënga šmojamna, ntšamo chë osertánana bomnënga imomnama entšanga mondbetsejuabnaycá; y báseftanga šmojamna becá mando atšetanënga o uámana pamillentšënga.

²⁷ Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama.

²⁸ Bëngbe Bëtsá quem luarentšana tojanbocacá ndayá tondaye yonduamancá y ndayá inyënga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama.

²⁹ Y chca, Bëngbe Bëtsabe delante ndocná quenátobena jayanana tša bëtsá cha yomna ca.

³⁰ Bëngbe Bëtsá tojama bënga Crístoftaca cánýiñe mo canýacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bom-inýiñe chamotsemnna, chabe entšanga jtsemnna chamobenama, puerte tšábënga cach Bëngbe Bëtsacá, y atsebácanënga chamotsemnna.

³¹ Y chca, ntšamo Bëngbe Bëtsabe uabemana palabrënguiñe endayanacá: "Nda tojtseboše jayanama cha canye uamaná yomna ca, chamna más tšabá cha bontsemna jayanama Bëngbe Útabná puerte uamaná yomna ca."

2

Ntšamo Pablo Cristo crucificanábiamna chënga tojanabuayená

¹ Pero, Jesucristbeyeca atšbe catšátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabrëngaca, ni chë tša osertánëngbe palabrëngaca.

² Y tšëngaftangaftaca sënjamna ora, ndoñe quetstëtseboše nye ndayíñnaca jat-sjuabnayana, ndayá nye Jesucristbeñe, nda bëngbe tšabiamna tmojanrucificá.

³ Atše tšëngaftangbeñe sënjamna, mo canýa ba soyënga jamama ndobenacá, y mo canýa puerte auatjacá y tbojtsengmëmnacá, chabe trabajo jamama ndoñe jobenayama juabnaye causa.

⁴ Ntšamo chonjanëtsëtsná y chonjanabuayinacá atše sënjanoyebuambá ndoñe chë tša osertánëngbe palabrëngaca, tšëngaftanga jáyëñjanama chiñe

chašmotsošbuáchema; pero aífne tchbonjanayējaná, Bēngbe Bētsabe Espírítu y chabe obenana tšēngaftanga jinŷanŷiyēse,

⁵ chca, tšēngaftanga Bēngbe Bētsábeñe chašmotsošbuáchema, ndoñe nŷe entšangbe osertánana, sinó Bēngbe Bētsabe obenanama.

Uámana Espírítbeyeca, Bēngbe Bētsá jamana entsanga cha chamotsábuatmama

⁶ Pero, chē ya tmojashjáchénga Bēngbe Bētsábeñe puerte jtsošbuáchiyama y chabe soyēngama corente jtsoertánama, chēngbeñe bēnga fchandóyebuambaye beca osertánana bomna soyēnga. Pero ndoñe quenátsmēna quem luarentša entsanga quem tempo mondbétsichamo soyēnga, ni mora quem luarentše amēndayēngbe soyēnga, ndēmuanŷenga ndoñe bēn y ndocna obenana bomnēnga mochanjēftsoquéda.

⁷ Y aífne, chē bēnga fsēndoyebuambná osertánana bomna soyēnga endmēna chē Bēngbe Bētsá quem luarentša entsángbioye baytentscuana ndoñe tonjaninŷanŷé soyēnga, y chca, entsanga baytentscuana chē soyēnga ndoñe tmonjanábuatmana. Cha yojanjuabná chē soyēnga chca yochtsanmēnama, quem luare cabá cha ndēma ora, y yojanjuabná, chē soyēngaca bēnga mocht-sanobena puerte bētsétsanga y uámanēnga jtsemnana, cháftaca chē nŷetsca tescama yomna tšabe vida jtsebomnana.

⁸ Quem Bēngbe Bētsabe puerte osertánana bomna soyēnga endmēna canŷe soye ndayá quem luarentša amēndayēnga ndoñe ntsēsertánana, er chēnga aífne matēnjanēsértase, Bēngbe Utabnábioye chēnga ndoñe matmēnjancrucificá, Bēngbe Utabná nda puerte bētsá y uamaná yomna.

⁹ Bēngbe Bētsabe uabemana palabrēnguiñe quem Bēngbe Bētsabe puerte osertánana bomna soyēngama mēntšá endayana:

Cha imobobonshánēngbiama Bēngbe Bētsá tojaprontá soyēnga, ndocná tonjinŷe, ni tonjouena y ni mo tonjajuabó ca.

¹⁰ Pero Bēngbe Bētsá quem soyēnga chabe Espírítuftaca bēnga šojanŷanŷé, er chē Espírítu lempe jtsetatšēmbuana, chē Bēngbe Bētsabe soyēngama puerte totcá josértama yomna soyēngámna.

¹¹ Entšángbeñe ndocná quenátobena jtsetatšēmbuana ndayá entsabe ainaniñe tomnana, sinó nŷe chē entsabe espírítu, chē chábeñe yomná. Cachcá, nŷe Bēngbe Bētsabe Espírítu jtsetatšēmbuana ndayá Bēngbe Bētsá tojuabnacá.

¹² Y bēngna, Bēngbe Bētsábiocana Espírítu tmojóyēngacñe, ndoñe canŷe quem luarentša espírítu, chca, bēnga chašosertama chē Bēngbe Bētsá tojama bēnga chamotsebomna soyēngama, bēngbe tšabiama cha jtsejuabnayēse.

¹³ Bēnga chē soyēngama fsēndoyebuambná, ndoñe chē quem luarentša entsángbentšana tifjuatsjinŷe osertánana bomna palabrēngaca, sinó chē Bēngbe Bētsabe Espírítu šojabuatambá palabrēngaca. Chca, Bēngbe Bētsábiocana soyēngama bēnga fsēndabuayiyná, Bēngbe Bētsabe Espírítbentšana yóbocana palabrēngaca, chē Uámana Espírítu ainaniñe imobomnēngbioye.

¹⁴ Bēngbe Bētsabe Espírítu ndoñe tondbomná, chabe ainaniñe ndoñe ntjóyēngacñana chē Bēngbe Bētsabe Espírítbiocana yóbocana soyēnga, er chē entsábiama chē soyēnga jtsemnana mo canŷe ndoñe corente juabna bomnabe soyēngcá, y chabosertama cach ndoñe ntsobenana. Chca endmēna, er entsá jobenayana quem soyēngama jtsetatšēmbuana y josértama, nŷe chabe ainaniñe chē Uámana Espírítu tbojtsájabuachanēse.

¹⁵ Pero nda aíñe chë Espíritu tbojtsebomna jtsobenana nyetsca soyënga tsabá jinýama chabosertama, y ndocná chë Espíritu ndoñe tbondbomná ntsobenana josértana ntšamo chë Espíritu bomná yomnama.

¹⁶ Er Bëngbe Bëtsabe uabemana palabrenguifne mëntšá endayana: “Ndocná quenátabuatma Bëngbe Utabnabe juabna, chábioye jabuátëmbama chaotsobemana ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

3

Jatrabájama enutanánënga Bëngbe Bëtsá jaserviama

¹ Pero, Jesucristbeyeca atšbe catšátanga, atše ndoñe chiyatanobená jóyebuambayama, mo tšëngaftanga chë Uamana Espíritoftaca mandánënga šmojtasmëncá, sinó nye cachënga tsabá jtsomñama juabnënga bomna entšangbioycá, mo basetemëngbioycá, Cristbe soyëngama josértama ndobenënga.

² Mo canýe bebmácá, chabe basetémbioye nye létsiye jafsiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabiana nye chë más paselo josértama soyëngama, y ndoñe inýe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmatobena Bëngbe Bëtsabe soyëngama josértana, chë josértama más totcá yomna soyëngama;

³ er tšëngaftanga cabá šmojtsama, nye ntšamo cach tšëngaftanga tsabá jtsomñama tšëngaftangbe juabnënga yomncá. Y tšëngaftanga ínýengaftaca cabá yapa šmojtsenántšaboše y nye ínýengbioye jayëñjanama soyënga šmojtsamëntscuana, tšëngaftanga šmojtsama nye ntšamo cach tšëngaftanga tsabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nye quem luarama enójuabnaye entšangcá.

⁴ Er canýa: “Atše Páblibe ustoná sëndmëna ca”, y ínýana: “Atše Apólosbe ustoná sëndmëna ca” tojayana ora, chca jtsamana mo chë nye quem luarama enójuabnaye entšangcá.

⁵ Tšëngaftanga chca šmojamama, atše šontsemna tšëngaftanga játajana: ¿Ndayá Apolos yomna? ¿Ndayá Pablo? Chatna co nye Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanýanjé trabajo.

⁶ Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguifne béjaye cuaftsebuešcijnacá, enjantrabája cach atše sënjanbojatsé chiñe; pero Bëngbe Bëtsá, ntšamo matatëmënga chauájuama endbetsamcá, tojama banga tšëngaftanguentše Jesucristbeñe chamotsošbuáchema.

⁷ Ntšamo, chë jená y chë matënguifne béjaye buešcijnayá ndoñe yapa ntsámanana chiñe shajuanënga chaóbocnama, nye Bëngbe Bëtsá aíñe, cachcá, nda Bëngbe Bëtsabiana entšanga jábuayenama trabajo tojabojatsé y nda chentsana tojáshjango cach trabajuifne jóntšama, ndoñe ntjamana entšanga Jesucristbeñe chamotsošbuáchema; nye Bëngbe Bëtsá chca jamana.

⁸ Chë jená y chë matiñe béjaye buešcijnayá cach trabajuifne jtsentšénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

⁹ Bëndata fsëndmëna trabájayata Bëngbe Bëtsabiana oservéniñe, y tsëngaftanga šmondmëna mo Bëngbe Bëtsabe jajañcá, ndayentše cha yojtseboše tsabe jaja saná chaóbcnama, y šmondmëna mo chë cha yojtsejebuana bëts yebncá.

¹⁰ Er Bëngbe Bëtsá atšbe tsabiana jtsejuabnayëse, chë trabajo šojabonyë, y atše mo canye puerte tsabe jebuanacá, canye yebna ndayiñe chaotsëcuatjonama tojapormacá, sënjanbojatsé chë trabajo, Bëngbe Bëtsabe soyëngama tsëngaftangbeñe jábuayenama. Chentsana inya, mo chë inye yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama.

¹¹ Mo chë cánÿabentšana inye trabajayacá, ndoñe ntso benana chë yebna jajebuama tojanbojatsé cha chë yebna chaotsëcuatjonama tojanpormañe inye soye cachá chaoservema jatspórmana, cachá, ndocná chaondëtsabuatambá inye soyënga, nye ntšamo Jesucristbe soyënga yomncá aiñe, chë ntšamo atše natsana sënjanabuatambacá.

¹² Chë Jesucristbiana más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiana nye nduámana soyënga buatëmbayana mo chë niñëbenga, butsjajësha y tëshenjinësheca yebna jebuanacá.

¹³ Y Cristo chaojësabo te, Bëngbe Bëtsá echanjínÿanÿiye ntšamo cada cánÿabe trabajo yomnama. Cha chë te iñesheca chca echanjínÿanÿiye, y chë iñesheca, Bëngbe Bëtsá echanjinÿe y echanjínÿanÿiye ndaye trabajo cada ona tojamama.

¹⁴ Ntšamo cada cánÿabe trabajo yojtsámanama jtsetatšëmbuama Bëngbe Bëtsá chaojinÿe ora, cha chabe trabajo aiñe yojtsámana ca queojayanëse, chë tsabe trabajayá Bëngbe Bëtsábiocana canye uacanana soye echanjóyëngacñe, er cha jtsemnana mo canye entšacá, nda canye yebna tojtsejebuana jtsejuinÿama ndoñe paselo tondmëna soyëngaca.

¹⁵ Pero chë te cánÿabe trabajo nye batsá yojtsámanama Bëngbe Bëtsá iñesheca chaojinÿanÿese, chora chabe trabajo echántsemna mo chë jtsejuinÿama paselo tomna soyëngaca jebuanabe soyëngcá, chentsana nyets yebna jtsejuinÿana. Chë jebuaná jtsachana, pero chabe trabajo lempe jobuëtsana. Cachá, chë Bëngbe Bëtsabiana trabajo tojtsamá, nye batsá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

¹⁶ ¿O tsëngaftanga ndoñe šmondëtatšëmbo nyetscanga cánÿiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tsëngaftanguentše Bëngbe Bëtsabe Espiritu yomnama?

¹⁷ Nderado nda tojama, tsëngaftanga nyetscanga cánÿiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cánÿiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye jasérviana; y tsëngaftanga chca šmondmëna.

¹⁸ Ndocná cachá chaondësenoingña. Nderado nda tsëngaftanguentšá tojtsejuabná cha tša osertaná yomna ca, ntšamo quem luarentša entšanga mondëtsëjuabnaye ntšamo canye puerte osertaná inëtsemnana, cha bontsemna jóbemama mo canya ndabiana quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama.

¹⁹ Er chë quem luarentša entsānga tša osertánēnga imotátsēmbo soyēnga, Bēngbe Bētsabe bominiñiñe yomna mo chë corente juabna ndbomnabe soyca. Bēngbe Bētsabe uabemana palabreñguñiñe mēntšá endayana: “Bēngbe Bētsá chë tša osertánēnga jáyēñanana, ndayá cachēnga ínŷēnga jáingñama tša osertánanaca tmojtsama soyēngaca ca.”

²⁰ Y mēntšánaca endayana: “Bēngbe Utabná endétatsēmbo chë tša osertánēngbe juabnēnga tondayama yondoservénama ca.”

²¹ Chiyeca, ndocná chaondétsichamo corente uamaná yomna ca, ndaye entsabe ustoná tomnama, er lempe ntšamo šmобomncá, Cristbeñe ošbuáchiyēnga bētsemnana, tšēngaftangbe tšabiana endmēna, y nyetscanga chë tcmojubabuachēngnaca cachcá.

²² Lempe tšēngaftangbe soye endētsomñe: ndayá Páblēbeyeca yomncá, Apólosbeyeca, Pédrēbeyeca, ndayá quem luarentše yomncá, ndayá yomncá ainá tcojtsamna ora, tcojóbana ora, ndayá mora yomncá y chë más chcoye yochtsemncánaca.

²³ Y tšēngaftanga Cristbēnga šmondmēna, y Cristna Bēngbe Bētsábía.

4

Jesucristbe ichmónēngbe trabajo

¹ Entšanga entsamna bēngbiana jtsejuabnayana bēnga fstsemna Cristbe uajabuáchanēnga y Bēngbe Bētsabe soyēngama jtsabuátambayama trabajo bomnēnga, chë Bēngbe Bētsá baytentscuana entšāngbioye ndoñe tonjan-inyānyé, pero mora aíñe tojinŷānyé soyēnga jtsabuátambayama trabajo bomnēnga.

² Chca, nda canŷe trabajo tojtsebojanŷabiamna, chabe mandayá jtsobátmanana cha aíñe tšabe palabra bomná chaotsemnana.

³ Atšbe bariēna, tondaye quenátamana, ntšamo tijamcá šmojinŷe y ndoñe tšabá tijama ca šmojananēse, o inŷe entsānga cachcá tmojananēse mo canŷe tribunaliñcá. Ni cach atše ndoñe chca quetsátama, jtsētatšēmbuana ntšamo atšbe trabajuama tijayancá ndegombre tayojtsemnana.

⁴ Atšbe ainaniñe ndocna juabna quetsátsbomna atšbe chašuyanama bacna soye tijama ca, pero chca ndoñe quenátayana, ndegombre Bēngbe Bētsabe delante ndocna bacna soye ndbomná atšbe stsemna ca. Er Bēngbe Utabná endmēna nda atšbe trabajo yonŷá y nda ndegombre yobena jayanama atšbe tšabá o ndoñe tšabá tijamama.

⁵ Chiyeca, tšēngaftanga ndoñe quecmátamna jinŷana y jayanana ínŷēnga ndoñe tšabá tmonjama ca, chë nŷa chama tempo cabá ndóshjanguéntsacuana, Bēngbe Utabná chama chaojésabo ora. Cha chaojésabo ora, puerte tšabá echanjínŷānyē chë iytēmencá yomna soyēngama, mo ibetiñe cuaftsemncá, y botamana echanjínŷānyē, mo binŷniñcá, ndayá jamama nŷe chēngbe ainanoca entsānga tmojajuabocá. Y chora Bēngbe Bētsá cada entsabiana echanjayana tšabe soyēnga, ntšamo tbojtsomerecencá.

⁶ Jesucristbeyeca atšbe catsátanga, chë soyēngama tšabá jábuayenamna, atše sēnjama ntšamo Apolos y atše tífjatrabájama botamana chašminŷama, y chca sēnjama tšēngaftangbe tšabiana, ntšamo bēndata tífjamentšana chašmuatsjínŷama jtsiyenana nŷe ntšamo Bēngbe Bētsabe uabemana palabreñguñiñe iuayancá, y ndocná tšēngaftanguentšá canŷe entsabiana chaot-senábotamnaye, y ínŷabiana ndoñe tšabá chauátoyebuambnana.

⁷ Er, ¿nda chë ínÿengbiana más uámanënga tsëngaftanga cmojtsabiamná? ¿Y ndayá šmobomna, Bëngbe Bëtsá ndoñe tcmónjatšatá soye? Y tsëngaftanga chca chašmotsebomnana cha tojanmëse, ¿ndáyeca šmojtšenabotamná mo Bëngbe Bëtsabe tšetana soyënga ndoñe tontsemncá, y nÿe cach tsëngaftangbeyeca šmojonÿencá?

⁸ Tsëngaftanga šmojtsejuabná ya lempe ntšamo cmëjabotcá Bëngbe Bëtsábiocana šmojtsebomna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentsana tondaye ntšëjabotcá. Malaye tsëngaftanga mo reyëngcá šmojtsemna, Cristoftaca cánÿiñe jtsemándayëse; chca, bëngnaca tsëngaftangftaca jtsemnama, cánÿiñe jtsemándayëse.

⁹ Atše sontsinÿana, bënga chë Cristbe ichmónënga Bëngbe Bëtsá šojábiana mo chë nÿetscangbiana más nduamanëngcá, mo chë jóbanama yojtšamna entsangcá. Nÿetscanga chë Bëngbe Bëtsá tojábiamënga bëngbioye jtsënÿayana mo ndoñe cachca entsanga fstsemncá; angelënga y entsángnaca cachcá bëngaftaca montsama.

¹⁰ Bënga, Cristbiana oservena causa, quem luarentša entsangbiana fsëntsinÿana mo corente juabna ndbomnëngcá; chë cuenta, tsëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entsangbe bominÿiñe ndocna obenana ndbomnënga; y tsëngaftangna šmojtsejuabná puerte obenana bomnënga šmomna ca. Tsëngaftangbioye ínÿenga puerte uámanënga y bëtsëtsanga jtsabiamnayana, pero chënga bëngbioye jtsëbuayënjana.

¹¹ Y mëntscoñama, bënga šontsabuashebebiana saná, ndayá jofšiyama y entsáyá. Entšanga bëngbioye bacá jtsaborlánana, y tondaye yebna queftsátsbomna.

¹² Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tsabe bendicionënga chamotsebomnana. Bënga chamosufrima ínÿenga tmojtsama ora, bënga chë soye fchandbëtsoboyaye.

¹³ Inÿenga bëngbiana bacá tmojtsoyebuambná ora, jtsababuánÿeshanëse fsënduamana jtëjuana. Quem luarentša entsangbe bominÿiñe bënga jtsemnana chë puerte nduámanënga, mo chë quem luarentša basurëšhëngcá, chë quem luarentša entsanga tondayama ndoservénënga, mo chë quem luarentša tsengacá; y chca endmëna mëntscoñama.

¹⁴ Quem soyënga ndoñe quechatëbuabiamná tsëngaftanga chašmotsëuatjama, sinó ndayá jábuayenama mo cach atšbe basengbioycá, atšbe bonshánënga.

¹⁵ Er masque tsëngaftanga mallajta abuátambayënga chašmotsóbomñe, jacúntama ntjobenaycá, Cristbiana chacmotsabuátambana, ndoñe banga quešmátabamna tsëngaftangbiana mo taitangcá, Cristo Jesúsbeñe jtsošbuáchiyama tcmojanëjabuachama. Nÿe atše sëndmëna mo taitacá tsëngaftangbiana, mo ošbuachiyëngcá, er atše natsana tcbonjanabuayená chë tsabe noticiënga Jesucristbiana, y tsëngaftanga chiñe šmotsanošbuaché.

¹⁶ Chíyecna, cbontsaimpadana ntšamo atše tijamcá chašmotsamama.

¹⁷ Chama Timoteo tsëngaftangbioye sentsichamná, atšbe bonshaná, canÿe añe tsabe palabra bomná; Bëngbe Utabnábeñe tojanošbuachéyeca, atše Cristbiana sënjanbuayiyiná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tsëngaftanga chašmuatenójuaboma ntšamo atše tsëngaftangbeñe tsjoyenama,

Cristbeñe ošbuachiyacá, ndayama atše nyets tempo ošbuáchiyënga sëndbetsabatambaycá nyets luare ošbuáchiyënga enefjuanenache.

¹⁸ Tšëngaftanguentše báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tšëngaftangbioye jama jányama ca.

¹⁹ Pero Bëngbe Bëtsá chašojalesenciase, sëntsobátmana betscó tšëngaftangbioye jama jányama. As chjinye ntsache obenana imobomna chë Bëngbe Bëtsabe entšangcá jtsiyenama tša uámanënga imomna ca juabnayënga, y ndoñe nye ntšamo jayanama imobencá.

²⁰ Er Bëngbe Bëtsá canye ošbuachiyabe ainaniñe tojtsemánda ora, chca jtsinyñana ndoñe nye ntšamo tojtsichámuama, ndayá Bëngbe Bëtsabe obenana chábeñe tojtsemnana.

²¹ ¿Tšëngaftanga ndayá más šmattseboše: atše chayá tšëngaftangbioye jauacánana, o chayá tšëngaftangbioye jányama puerte bonshanánaca y ntsetšatjaycá tšëngaftanga jauyanama?

5

Ndayá cuanjama canye boyabása shembásaftaca bacna soye amáftaca

¹ Ndegombre nyets luariñe entsótatšëmbo tšëngaftanguentše yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canye entšá cachabe mamamnáftaca bacna soye yojtsama.

² Y tšëngaftanga cabá šmojatsjuabná corente tšábënga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngmëna jtsemnana, tša uabouana soye cha yojtsama causa. Canye entšá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá.

³ Y atšna, masque tšëngaftangaftaca choca ndoñe quetsátsmëna, atšbe juabna choca tšëngaftangaftaca entsemna; y chca atšbe espíritoca sëntsemnayeca, Bëngbe Utabná šojfëtsanatšetá mándoca, sënjajuabó y sëntsetatšëmbo ntšamo tšëngaftanga cmojtsamnana, chë entšá chca tojamáftaca.

⁴ Tšëngaftanga chašmojënefjna ora, chentše atšbe espíritoca tšëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca.

⁵ Y chora tšëngaftanga cmontsamna jamándana chë entšá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatšine cha cuafjaboshjoncá, chca, chë quem entšá nye cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnana.

⁶ Tšëngaftanga šmojtsejuabná puerte tšábënga y uámanënga šmomna ca, pero šmojtseleséncia canya tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondëtatšëmbo, ntšamo chë nye batšá levadura endbama, nyets arninýa chauábochema; cachcá, tšëngaftanguentše canya tša bacna soye chca tojama ora, nyetscangbiamana ndoñe tšabe soyënga jóbocnana.

⁷ Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninýacá, ndocna

levadúraca, chë bacna juabnëngaca ya ndëmandánënga šmojtsémnayeca. Ndegombre tsëngaftanga chca šmondmëna, er Bëngbe Bëtsá tojama tsëngaftanga tsëm vida chašmotsebomnama. Bashco fiesta ora, oveshá tmojanóba, Israeloca entšanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentsana bënga játsebacama.

⁸ Ntsamo chë judiënga chë fiesta ora mondbamcá, nyëts levadura ojanana cachcá jonjáyana, cachcá, bënga šontsamna jtsajbanana oyenana bacna soyënga ínÿëngbiamama jamama jtsebošëse, y ndaye bacna soye jtsamëse, ntšamo tempo imojanamcá. Ntsamo chë judiënga chë fiestiñe nyë levadúraca ndëpormana tandëse mondbetsesaycá, cachcá, bënga šontsamna jtsiyenana nyëtsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

⁹ Chë inÿe atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca.

¹⁰ Y chca ndoñe quetstëtsebošë jáuyanana nÿa tondayama chašmondëtsoyebuambná nyëtsca chë quem luarentšënga boyabása o shembásaftaca bacna soye amëngaftaca, chë nyë cachëngbiamama bëtscá soyënga jtsebomnama tša bošëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adorayëngaftaca ca; er nÿa chca jamamna, tsëngaftanga cmattsamna quem luarentšana jëftsebocanana.

¹¹ Ntsamo chora sënjanayancá endmëna ndayá tondayama ntsencuéntayana, chë Cristbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nyë cachabiamama bëtscá soyënga jtsebomnama tša tojtseboše, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsatmó, o tojtsatbëbana. Chca entšángaftacna, ni mo šmuatjót'bema chëngaftaca cánÿiñe jasama.

¹²⁻¹³ Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aiñe o ndoñe tsábá tmonjamama. Bëngbe Bëtsá echántsemna nda chëngbiamama yochjayana ntšamo tmojamcá tsábá o ndoñe tsábá bëtsemnama, tsëngaftanga ndoñe. Ndegombre nyë chë ošbuáchiyënga tsëngaftangafaca innënutanangbiamama cmontsamna chca jayanana. Chcasna, šmochjama ntšamo Bëngbe Bëtsabe uabemana palabrënguiñe endayancá: "Tsëngaftanga cmontsamna, chca bacna soye amá tsëngaftangbentsana jtabocnana ca."

6

Ošbuáchiyënga jendemándama tojtsemna ora

¹ Canÿe tsëngaftanguentsa ošbuachiyá inÿe ošbuachiyabiamama canÿe demanda tojtsebomna ora, ¿cha nanjá chë ndošbuáchiyënga mandadëngbiyoe chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entšángbiyoe nanjá chabe demanda chamouenama?

² Tsëngaftanga ndegombre šmondëtatšëmo, Bëngbe Bëtsabe entšanga mochjayanama quem luarentša entšangbiamama tsábá o ndoñe tsábá tmonjamama. Y chënga quem luarentša entšangbiamama chca jayanama tmojtsobenëse, ¿ndoñe montsobena más base soyëngama chca jayanama?

³ Tsëngaftanga ndegombre šmondëtatšëmo chë angelëngbiámna tsábá o ndoñe tsábá tmonjamama bënga mochjayanama. Chcasna, bënga más jtsobenana chë quem luarentše jëftsiyenama soyëngama chca játayanana.

4 Y chcase, tsëngaftangbeñe chca demandënga chë quem luarentse jëftsiyenama soyëngama tojtsemna ora, ¿ndáyeca šmatjâtëbuayana chë ošbuáchiyëngbiama tondaye tmontsámama entšanga, chë soyënga chamojandmanama?

5 Chca sënjayana tsëngaftanga chašmotsëuatjama: ¿O tsëngaftanguentše ni mo canya yondmëna corente osertaná, ošbuachiyëngbeñe demandënga chamojandmanama?

6 Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

7 Y tsëngaftangbeñe nýe demandënga jájandmanama tojtsemna ora, tsëngaftangbiama ya canye puerte bacna soye jtsemnana. ¿Ndáyeca ndoñe šmatšóboyaye ínýenga bacá cmojtsaborlana ora? ¿Ndáyeca ndoñe cachcá šmatjonýaye ínýenga cmojtsabiatbëbana ora?

8 Pero cach tsëngaftangaftacna inýetšá copasana, ínýengbioye bacá jtsaborlánana y jtsabiatbëbanana, y tsëngaftangcá Crístbeñe ošbuachiyëngbioynaca.

9 ¿Tsëngaftanga ndoñe šmondëtatšëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoingñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínýaftaca ingñayënga, ni chë boyabásenga mo shembasengcá jtsinýnama bošënga, ni chë boyabásenga inýe boyabásengaftaca bacna soye amënga,

10 ni chë atbëbanënga, ni chë nýe cachëngbiama bëtscá soyënga jtsebomnama tša bošënga, ni chë tša tmoyënga, ni chë uayátsenayënga, ni chë ínýengbiama bacna soye jtsamëse immëtsatbëbanënga, chënga nýetscanga ndoñe quemochatobenaye Bëngbe Bëtsabe amëndayoye jamashjnama.

11 Y tempo báseftanga tsëngaftanguentšënga chca šmojamna, pero Bëngbe Bëtsá tsëngaftangbe bacna soyëngama tcmojaperdoná, y chca entsemna mo bebënénga cuaftsemncá; cha tojama tsëngaftanga chabe entšanga chašmotsemnana, nýe cha chašmotseservénama, y tojama tsëngaftanga mo tšabengcá chabe bominiýiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espiritu tojamama.

Bëngbe cuerpo chaotsemna Bëngbe Utabná jtseservénama

12 Mondbétsichamo: “Atšbiana entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiama ntsemnana. “Atšbiana entselesenciana ndayánaca jamama ca”, pero ndoñe quichatsleséncia ndaye sóyecnaca nýets tempo mandaná jatsmënana.

13 Mëntšánaca mondbétsichamo: “Saná uafsbiana y uafsbíá saná chaóyengacñama ca.” Pero Bëngbe Bëtsá canye te echanjama chë uta soye chaóyopochocama. Bëngbe Bëtsá entšabiamu cuerpo ndoñe tojanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama.

14 Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

15 ¿Tšëngaftanga ndoñe šmondétatšëmbo, Crísoftaca cánÿiñe mo canÿacá šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jasérvíama endmënayeca, tšëngaftangbe cuerpo jtsemnana mo Crístbe cuerpentša soycá. ¿Ntšamo atše chjátobena atšbe cuérpoca, chë ndayá yomna mo Crístbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe!

16 ¿O tšëngaftanga ndoñe šmondétatšëmbo, canÿe entsá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabrënguiñe boyabása y shembása tbojéninÿenama mëntšá endayana: “Chë útata mo canÿacá bochántsema ca.”

17 Pero canÿe entsá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebmncá.

18 Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga jtsamana.

19 ¿Tšëngaftanga ndoñe šmondétatšëmbo tšëngaftangbe cuerpo yomna mo canÿe yebncá Uámana Espíritbíama, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye.

20 Chca endmëna, er Cristo bënga játsebacama tojanóbana ora, yojamna mo cha bëtscá cuafjopagacá tšëngaftanga Bëngbe Bëtsábenga chašmotsemnana. Chiyeca, chë tšëngaftangbe cuerpëngaca chašmojtsama soyëngaca šmochtsinÿanÿnaye Bëngbe Bëtsá puerte uamaná y bëtscá bëtsemnana.

7

Jobouamayama jábuayenama

1 Mora chanjóyebuambaye ndayá tšëngaftanga átšbioye šmojuábobemama. Ndegombre, canÿe boyabásabíama más tšabá endmëna ndoñe chaondobouamá.

2 Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá.

3 Boyábioye bontsemna jamana chabe shembíama lempe ntšamo jamama íbomncá, boyá bëtsemnana; y chabe shëmnaca cachcá chabe boyabíama chaoma.

4 Chë shembe cuerpo ndoñe nÿe cha cánÿabíama ntsemnana, sinó chabe boyabíámnaca. Cachcá, chë boyabe cuerpo ndoñe nÿe cha cánÿabíama ntsemnana, sinó chabe shembíámnaca.

5 Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nÿe chë útata chca básefta tescama tbojenóyeunase, Bëngbe Bëtsáftaca jencuéntama jtsentšénama. Pero chentšana chë útata entsamna cachiñe cánÿiñe jtësmënana, chca, Satanás ndoñe chaondobená jamama

bacna soye chaócochënguama, cachënga jenomándama ndoñe tmontsobena causa.

⁶ Atše chca séntsichamo, tsëngaftanga jábuayenama, ndayá jamama šmjtselesenciana, y chca ndoñe chašmondétsamama jamëndama.

⁷ Y atšbe bariëna, atšbe juabna entsemna malaye nyëtscanga chë soyënguïñe mo atšcá šmattsemna. Pero Bëngbe Bëtsá cada ona obenana tbojatsëtá tšabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna ínÿe soyama.

⁸ Chë cabá ndbouamnënga y viudanga séntsëtsëtsná, chëngbiana tšabá yojtsemna ntjoubouamaycá joquédana, atšcá.

⁹ Pero chca jtsemnama cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiana o shembásabiana tša nyëts tempo jësejuabnayana.

¹⁰ Pero chë bouamnënga séntsamënda shema chabe boyábioye ndoñe cachcá chabondetsonÿá. Chca ndoñe nÿe atšbe quetsatamënda, ndayá cach Bëngbe Utabná.

¹¹ Pero, shema cachcá chabe boyábioye tbojesonÿase, cha bontsemna ntjoubouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

¹² Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebmna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shëmbioye ndoñe cachcá chabondetsonÿá.

¹³ Nderado canÿe ošbuachiyá tbojtsebmna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondësejuabná cha cachcá jesonÿayana.

¹⁴ Er Bëngbe Bëtsá tojama, canÿe shembása ošbuachiyá chabe entšá chaotsemnana, nÿe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënayeca, canÿa o nyëts uta bëtsëtsatbe ošbuáchiyama, Bëngbe Bëtsá jtsejuabnayana chë básengbiana mo chabe entšangcá.

¹⁵ Pero chë boyá o shema Crístbeñe ndošbuachiyá cachcá jtsenónÿayama tša tojtseboše, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama.

¹⁶ Chca šmochjama, er aca shema žntšamo cattsetátšëmbo, tacuatjobenaye acbe boyá jayënjanana Crístbeñe chaotsošbuáchema, y chca, atsbočaná chaotsemnana? o aca boyá žntšamo cattsetátšëmbo, tacuatjobenaye acbe shema jayënjanana Crístbeñe chaotsošbuáchema, y chca, atsbočaná chaotsemnana?

¹⁷ Masque ntšámmaca, cada ona chaotsiyena jtsamëse ntšamo chë Bëngbe Utabná tbojatsëtá obenana yomncá, cada ona ndayá jamama Bëngbe Bëtsá tbojachembcá. Chca atšbe nyëts luare ošbuáchiyënga enefjuanenache šëndbëtsamëndaye.

18 Nderado Bëngbe Bëtsá cányabioye tbojachembo, y cha ínÿengbeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobiamná mo ndoñe judío cuafjatsmëncá; y nderado Bëngbe Bëtsá cányabioye tbojachembo, y cha ndoñe chca tëtšená tontsemñese, cha ndoñe chaondëtsejuabná tëtšená jatsmënana, ntšamo chë judiënga monduamancá.

19 Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana.

20 Cada ona bontsemna jtsiyenána, ntšamo vojoyencá, chabe entšá chaotsemnama Bëngbe Bëtsá tbojanchembo ora.

21 Bëngbe Bëtsá tmojanchembo ora, nyëts tempo ínÿabiamna oservená cojamnëse, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnama, cach acbiamna jatrábajama, as chca cochjama.

22 Er chë nye ínÿabiamna nyëts tempo oservená yojamná, Bëngbe Bëtsá chabe entšá chaotsemnama tbojanchembo ora, cha mora ošbuachiyacá, jtsemnana canÿa ya ndoñe más bacna soyënga jamama juabnëngaca mandaná, sinó Bëngbe Utabnabiamna oservená. Cachcá, chë nye cachabiamna trabajayá yojamná, Bëngbe Bëtsá tbojanchembo ora, mora cha nyëts tempo Cristbe oservená jtsemnana.

23 Cristo bëngbiamna tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnama. Ndoñe šmatjaleséncia nye entšangbe juabnëngaca nyëts tempo mandánënga chašmotsemnama, y Bëngbe Bëtsabiamna chacmotsebnëtjomba.

24 Chcasna, Jesucristbeyeca atšbe catšátanga, cada ona bontsemna Bëngbe Bëtsáftaca jtsiyenána, ntšamo vojoyencá Bëngbe Bëtsá tbojanchembo ora.

25 Y chë ndëbouamna shembásengbiamna, chënga aifne o ndoñe yontsamna jobouamayamna, atše chama ndoñe Bëngbe Utabnabe canÿe mando quetsátbomna, pero chanjayana ntšamo atše tsjuabnacá. Bëngbe Bëtsá atšbe tšabiamna tojanjuabóyeca, entšanga montsobena jtsejuabnayana aifne tšabe palabra bomná chiñe atše tsmënana.

26 Atše šontsinÿana, entšá ibojtsemna jtsomñana nye ntšamo mora yot-somñcá, er bënga mora montsiyena puerta padecena soyënguiñe.

27 Shema tcobomnëse, ndoñe cachcá catjëftsonÿaye; y ndoñe tcond-bomnësna, ndoñe catjátsënguaye.

28 Tcojobouamase, bacna soye ndoñe quecátama; y nderado canÿe tobiaše tojobouamase, cach bacna soye ndoñe quenátama. Pero chë tmojtsohouamangna padecena soyënguiñe mochanjoyena quem luarentse chamojëftsemnëntscuana, y atše sëntseboše chënga jujabuáchama chca jatiyena ndoñe chaondëtsamnama.

29 Jesucristbeyeca atšbe catšátanga, ntšamo sëntseboše jayanamna mëntšá entsemna: Cristo quem luaroye yochjésabo orscama ya nye batšá entsájamna. Chíyeca, morscana y nyëts tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jt-sentšénana Bëngbe Bëtsabe soyënguiñe, y ndoñe nye chë bouamná bëtsemnama tbojtsemna soyënguiñe.

30 Cachcá, chë puerta ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë puerta oyejuayënga, chamot-

siyena mo ndoñe chca tmontsemncá; chë soyënga buamnayënga chamot-siyena mo tondaye chëngbe soye tontsemncá.

³¹ Chë quem luarentša soyëngaca jtsiyenama imojtsentsénënga entsamna jtsiyenana mo ndoñe chca tmontsamcá, er quem luare ntšamo bënga mora monduabuatmcá, pronto echanjochnënga.

³² Atše séntseboše tšëngaftanga ndoñe chašmondëtsenocochinÿenama. Canÿe entsá ndoñe bouamná tontsemna ora, jtsobenana jtsentsénana Bëngbe Utalnabe soyëngama jtsejuabnayama, y ntšamo oyejuayá cha jabemama;

³³ pero chë bouamná nÿets tempo jtsenócochinÿenana quem luarentša soyëngama, jtsiyenama, y ntšamo chabe shema oyejuayá jtsebomnama;

³⁴ y chca, cha uta soyiñe canÿe ora jtsentsénana. Chë ndëbouamna shembása y chë tobiáše bontsobena jtsentsénana Bëngbe Utalnabe soyënguifne sempre jtsejuabnayama. Chënga mondobena jtsentsénana Bëngbe Bëtsá jaérviamá, ndayá chëngbe cuérpoca y chëngbe espíritoca tmojamama. Pero inÿetšá, chë bouamna shembásana, nÿets tempo jesenócochinÿenana quem luarentše vida jtsebomnama soyëngama, y ntšamo chabe boyá oyejuayá jtsebomnama.

³⁵ Atše chca cbontsëtsësná tšëngaftangbe tšabiamá, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyenama, y nÿe Bëngbe Utalná jtseservénama chašmotsentsénama.

³⁶ Nderado nda tojtsejuabná chabe uatsëtsnaye tobiášeftaca jtsebouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntšamana.

³⁷ Pero nderado inÿa, tondaye obligaciönaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátsëmbo, ndoñe ntšobouamayana tšabá yomna ca, cha tšabá chca jtsamana.

³⁸ Chcasna, chë tobiášeftaca tojtsobouamá chana, canÿe tšabe soye jamana; pero chë ndoñe cháftaca tonjobouamá chana, canÿe más tšabe soye jamana.

³⁹ Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebomnëntscuana; pero chë boyá tojóbanëse, cha jtsobenana cachiñe jtobouamayana, nda cha tojtsebošáftaca, pero chca chaoma mo canÿa Bëngbe Utalnáftaca cánÿiñe mo canÿacá quetsomñecá.

⁴⁰ Pero atše jayanamna, cha más oyejuayá nántsemna ndoñe tontóbouamase; y sëntsejuabná, átšnaca tsbomna chë Bëngbe Bëtsabe Espiritu chašotsebuaiynama.

8

Uátsëmbona saná entsangbe pormana soyëngama

¹ Mora chanjóyebuambaye ndayá tšëngaftanga atše šmojatjama, ndayá jtseyayama, chë tempo inÿënga cachëngbe pormana soyënga, diosënga yomna ca jtsejuabnayëse jadórama tmojanátsëmbona soyëngama. Bënga mondëtatšëmbo bënga nÿetscanga osertánënga imomnama. Canÿa tbojtsosertana ora, cha nderado nanjájuaboje, chca bëtsemnama puerte uamaná cha yojtsemna ca, pero canÿa, inÿënga tojtsababuánÿeshana ora, cha jtsobenana chënga becá juabuáchana.

² Nderado nda tojtsejuabná ndegombre canye soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá.

³ Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

⁴ Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uatšëmbona soyëngamna, atše šcuayana: bënga corente mondëtatšëmbo chë chënga innëtsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna.

⁵ Pero masque celoca y quem luarentše chamomna entšangbiana “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entšangbiana diosënga ca ubuátmënga, y banga bëts mándoca entšangbiana “utabnënga ca” uabáinënga),

⁶ bënga chë ošbuáchiyëngbiamna nÿe canÿa Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y nÿe nda jtseservénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

⁷ Pero nÿetsca ošbuáchiyënga ndoñe chca quemátstatsëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojtšesá ora, jtsejuabnayana chca uatšëmbonana bëtsemnama, y ainaniñe juabnënga jtsebmomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca.

⁸ Ndegombre, ndayá bënga tmojtšesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aiñe tmojtšesama; ni ndoñe chcanga, ndoñe tmontšesá causa.

⁹ Pero cuedado šmochtsebmomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguñe más batšá ošbuáchiyënga y osertánënga, ntšamo tšëngaftanga šmojtšamcá chamuatšmama, y chentšana, chëngbe ainaniñe juabnënga chamotsebmomna y chëngbiyoe chaotsëtsësná ndoñe tšabá tmonjama ca.

¹⁰ Er, aca chë soyëngama tatšëmbuá, nderado tcojótšbema jasama canÿe luarentše, canÿe soye ndayama entšanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebmomna ainaniñe juabnënga ndoñe tšabá tonjamama, chca tojáseyeca, aquécá chë soyëngama ndoñe yondëtatšëmbo causa, y cha nderado chentše cojtšesama tcmojinÿëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná.

¹¹ Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquécá chë soyëngama corente tatšëmbuá, cha pochocaná chaotsemnama, er chabe ainanentše echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama.

¹² Jesucristbeyeca acbe catšatbiama chca bacna soye tcojama ora, chca causa cha canye soye tojama, ndayama chabe juabnenga ainaniñe chabotsatsetsná ndoñe chca chaondetsama ca; y chca, chentšana tša tojesejuabná cha canye bacna soye tojamama, acna canye bacna soye jamana, ndoñe nye chë catšatbiama, ndayá cach Cristbiámnaca.

¹³ Chiyeca, nderado ndayá atše stesama, atše tsjama Jesucristbeyeca atšbe catšata chaoma canye soye y chca jamama chabiama canye bacna soye tojtsemñese, más tšabá nántsemna ndocna te chë soye atše ntjasana, chca, atše ndoñe jatsmama cha canye bacna soyiñe chaótsatsama.

9

Jesucristbe ichmónengbe derecho

¹ Ndegombre endmëna, atše ndayánaca jamana stselesenciánama y Moisesbe leyengaca ndoñe más mandaná séntsemnama. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinyama; y cach tšëngaftanga mora ošbuáchiyënga jtsemñese, šmondmëna ndayá tojóocna Bëngbe Utabnabiama atšbe trabajuentsana.

² Masque inyënga atšbiama ndoñe quematsjuabná atše canye Jesucristbe ichmoná tsmëna ca, tšëngaftangbiamna aiñe chca endmëna; er tšëngaftanga Cristbeñe ošbuáchiyënga šmondmënama y Bëngbe Utabnáftaca cányiñe mo canyáca šmondmënama, puerte tšabá šmontsinyanýna atše Jesucristbe canye ichmoná tsmënama.

³ Mëntsá chanjayana chë atše ndoñe tšabá tijama ca imojtsichámëngbiama:

⁴ Ndegombre bënga nyets derecho fsëndëtsóbomñe jtsobátmanama tšëngaftangbentsana, chë tchojujubuáchëngbentsana, bëngbe trabajuama saná o ndayá jofšiyama chašcuacaredadama.

⁵ Y bëngnaca derecho fsëndëtsóbomñe canye shema ošbuachiyá jtsebomnama y bëngaftaca cha jëftsbešama inye luaroye fstsajna ora, ntšamo chë Jesucristbe inye ichmónënga, Bëngbe Utabnabe catšátanga y Pédrënaca mond-betsamcá.

⁶ ¿O nye Bernabé y atše šojtsëtocana cabëndatbe cucuátseca jatrabájana vida jtsebomnama, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiama trabájayama?

⁷ ¿Ndëmua mo canye soldadcá tojtsoservená, ndayá tbojtsájabotama cachá nantsatopagana, vida jtsebomnama? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba létsiyentsana ndoñe ntjofšiyama.

⁸ Ntšamo atše muentše séntsichamcá ndoñe nye entsangbe juabna quenátsmëna; y Moisesbe leyíñnaca cachcá endayana,

⁹ er chabe leyíñe mëntsá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca.” Y chca ndoñe quenátayana Bëngbe Bëtsá nye toronga inétsanýena ca,

¹⁰ sinó inye más bëts soye; chca endayana ndayá ndegombre bënga, chë Bëngbe Bëtsabiama soyëngama abuayiynayiñe trabájayënga cha šnetsanýena ca. Chca tmojanábema bëngbiama, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuantšana batšá jýëngacñama.

¹¹ Y chca, bënga chë tšabe noticiëngama tchojábuaenase, y chca, Bëngbe Bëtsábicana tšabe bendicionënga chašmotsebomnama bënga tifjama, ndoñe

yapa tanandátsmëna tšëngaftanga jótjañana, chë šmобomna soyënguentšana bënga jëftsienama chašcuatšatama.

12 Inyënga derecho tmojtsebomna tšëngaftanga jótjañana chë šmобomnentsana chašmuacaredadama, tšëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye checbatamëndá, bënga chë derecho bëtsebomnayeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entšanga ndoñe chašondétsayaunana, bënga chë tšabe noticiënga fstsbabuayiyná ora.

13 Tšëngaftanga šmondétatsëmbo, Bëngbe Bëtsabe bëts yebnoca trabájayënga Bëngbe Bëtsabiana oservëniñe, mondbóyëngacñe chënga jasama, ndayá entšanga Bëngbe Bëtsá jadórana chabe bëts yebnoye tmojiyëbo sananguentsana. Y chë Bëngbe Bëtsá jadórana soyënga amënga, altaroca, chë juatšëmbonama laurentše, chënga jasanya ndayá chentše tmojuatšëmbona soyënguentšana.

14 Cachcá, Bëngbe Bëtsá tojamandá, chë tšabe noticiënga abuyayiyayëngna, vida jtsebomnamna lempe ntšamo tojtsëjabotcá chamóyëngacñe ca, chë tšabe noticiënga abuyayiyayama.

15 Pero atše ndocna te chiyaisemandá inyënga chca chašmotsecuedánama, atše chë tšabe noticiënga abuyayiyayá bëtsemnana chca derecho tsbómnyeyeca, y cach ndoñe mora quem soye quecbatëbuabiamná, tšëngaftanga ndayánaca atše chašmuatšetama. Atšbiana más tšabá nántsemna jóbana, y ndoñe ntjalesénciana inya chaoma atše cach atšbiana oyejuayá ndoñe ntjátsmënama, inyëngbentsana soyënga stjóyëngacñe causa.

16 Atše ndoñe quetsatsjuabná atše canye bëts soye stsama ca, chë tšabe noticiënga stsabuayiyayama, er atše obligaciönaca séntsemna chca jtsamama, Bëngbe Bëtsá chama šojanchëmboyecca. ¡Tša lastemcá atšbiana nántsemna, chë tšabe noticiënga ndoñe séntsabuayiyayase!

17 Chiyeca, atše chë tšabe noticiënga stsabuayiyayá nye atše chca jamama stsebóšeyeca, atšbe uacanana soye ya stsebomna; pero atše chca stjama, y ndoñe tontsemna nye atše chca jamama stsebóšeyeca, masque chca, atše stsama, ndayá jtsamama Bëngbe Bëtsá šojanbonyëcá.

18 Y chca, atšbe uacanana soye endmëna atše oyejuayá jtsemnana chë tšabe noticiënga abuyayiyayama, ošbuachiyëngbentsana atše vida jtsebomnama tondaye ntjatoyëngacñecá; chca, atše tondaye quetsátama chë tšabe noticiënga abuyayiyayama tsbomna deréchoca, chë atšbe trabajuentsana vida jtsebomnama.

19 Atše, masque ndocna entšábeyeca nyets tempo mandaná quetsátsmëna, puerte nduaman sënjobema, mo canya nyets tempo inyábeyeca mandanacá, nyetscanga jaserviama, chca, atše chca jtsamëse, jobenayama becá entšanga, ntšamo tojopodecá, jayënjanama Crístbeñe chamotsošbuáchema.

20 Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe chamotsošbuáchema.

21 Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjanama Crístbeñe chamotsošbuáchema, masque nde-

gombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá.

²² Chë nÿe batsatema ošbuáchiyëngbiana y Bëngbe Bëtsabe soyëngama nÿe batsatema osertánëngbiana, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Cristbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnama, endmëna atše jobenayama báseftanga jáyëñjanama Cristbeñe chamotsošbuáchema.

²³ Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnama y chëngcá atše chayóyëngacñama, chë atsebácanënga Bëngbe Bëtsá yochjatšataye tšabe soyënga.

²⁴ Tšëngaftanga šmondétatšëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama.

²⁵ Nÿetscanga chë tmojótjajënga ínÿenga jáyëñjanama, chënga jopróntana nÿetsca soyënguiñe jtsemándayëse, chca, canÿe uacanana soye, tsbuanachëngaca uapormana coronëshá juayëngacñama; y chësha betscó jtsancatana. Pero bënga ndoñe; bënga mondoyena Cristbiana soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nÿetsca tescama bënga mochanjëftsebmoma.

²⁶ Y atšna, atšbe bariëna sëndëntšena Bëngbe Bëtsá jtserervénama, ndoñe mo canÿa ínÿengbiyoe jáyëñjanama tojtjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtpeleliá orcá, chora, cha nÿe ínÿoye chabe buacuatšënga tojtsëtšana y chë ínÿabe cuerpoye ndoñe.

²⁷ Mo canÿe tšabe peliyacá, chabe cuerpo játsetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainantëšá juabñënga chašotsemándama; y chca, Cristbiyoe jtserervënëse chamotsiyenama ínÿengbiyoe stjabuayená chentsana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

10

Cach entsangbe pormana soyënga ndoñe chamondëtsadoránama jábuayenama

¹ Jesucristbeyeca atšbe catšátanga, atše sëntseboše tšëngaftanga chašmotsetátšëmbo bëngbe tempsca bëtš taitanga judiënga, chënga nÿetscanga Bëngbe Bëtsá canÿe jantšëtësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá.

² Chë jantšëtësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga.

³ Chënga nÿetscanga tmojanse cachca saná, chë Bëngbe Bëtsá celocana tojanichmó saná;

⁴ y nÿetscanga tmojanofšë chë Bëngbe Bëtsá tojanma chë peñësentšana chaóocna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñësentšë chëngaftaca tojanopasacá, yojaninÿanÿná Cristo chënga yojtsanÿenama.

5 Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

6 Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama.

7 Chíyeca, tsëngaftanga ndoñe šmattsadorana entsangbe pormana soyënga, ndayama inÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrenguiñe chëngbiama endayancá, chënga canÿe ternerá castellánoca tmojanpormá ora, mo dios cuaftsemncá jadórama: “Entsanga tmojanotbiama jasama y jatmuama, y chentšana tmojantsbaná joboyejuaama ca”.

8 Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nÿe canÿe te, uta bnëtsana y unga uaranga entsanga tmojanóbana

9 Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnana y ndoñe šochanjacastigayama. Báseftanga chënguentsënga chca tmojanma, y chë causa tmojanóbana mëtscuayëngaca ftëtsenënga.

10 Bëngbe Bëtsabe contra ndoñe šmattsóyeuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

11 Lempe chca bëngbe tempsca bëts taitangftaca tojanopasá, bënga jinÿanÿiyama ntšamo jtсийenana šojtsamnana, y Moisés, Bëngbe Bëtsabe uabemana palabrenguiñe chca tojëftsanboshjona bënga jabuátambama, bënga, chë Jesucristo yochjésabo orscama ya batsatema yojtsájamna ora oyenëngbiama.

12 Chcasna, nda tojtsejuabná Bëngbe Utabnabiama tsábá yojtsama ca y bacna soyënga ndocna te yochanjama ca, cuedado chaotsebmna, bacna soyënga amiñe ndoñe chaondótsatsama.

13 Ndocna entšá jatócochënguana bacna soyënga jamama, ntšamo tempo inÿenga ndoñe tonjanocochëngcá cachca bacna soyëngama, pero tsëngaftanga corente šmondëtatšëmbo Bëngbe Bëtsá sempre cmochtsëjabuachanama chë padecena soyënguiñe, y cha ndoñe yochanjalesenciama bacna soyënga jamama chacmócochënguama, tsëngaftanga chca soyënga jamama jtsóboyayama obenana ntsebmncá; pero chë padecena soyënguiñe chašmojtsemna ora, cha cmochanjinÿanÿiye ntšamo chë bacna soyënga ora tsábá jabocanama, y chca, jtsóboyayama chašmotsobenama.

14 Chíyeca, atšbe bonshánënga, ndocna te šmattsadorana cach entsangbe pormana soyënga, ndayama inÿenga jtsejuabnayana diosënga yomna ca.

15 Atše sëntsoyeuambná mo tsëngaftanga corente osertánënga cuaftsemncá. Cach tsëngaftanga smochjenójuaboje y smochjayana, ntšamo cbojtsëtsësnacá añe o ndoñe tsábá bëtsemnana.

16 Ntšamo Jesús chë coptema vinoyama Bëngbe Bëtsábioje tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿayana bënga Crísoftaca cánÿiñe mo canÿacá imomnana, chabe buiñe juabuáshanëse bëngbiama tojanóbanayeca. Y chë mondbajataye tandëse tmojase ora, jtsinÿanÿayana bënga Crísoftaca cánÿiñe mo canÿacá imomnana, cha bëngbiama tojanóbanayeca.

17 Bënga ošbuáchiyënga masque banga mondmëna, chca orna nyëtscanga cach tandësentšana bënga jasana, y chíyeca bënga jtsemnana mo canyáca, mo Cristbe cuerpca.

18 Tsëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentšana jasana, y chca chënga chora jtsinyányayana chënga cányíne mo canyáca imojtsemnana Bëngbe Bëtsáftaca, chë chca tmojtsadoranäftaca.

19 Y chca, atše ndoñe quetsátsboše jayanama chë entsangbe pormana soyënga mo diosënga cuaftsemncá, uámana soyënga yomna ca. Ni chë cach entsangbe pormana soyënga diosënga yomna ca jtsejuabnayëse jadórama uátšëmbona saná inye sanama más iuámana ca.

20 Pero aiñe, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbiocyte jtsadoránana, y ndoñe Bëngbe Bëtsábioye. Y atše ndoñe quetsátsboše, tsëngaftanga chca uatšëmbonana šmojasama, cányíne mo canyáca chë bayëjëngaftaca chašmotsemnana.

21 Tsëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptementšánëna. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbiocyte jtsadoránana.

22 Bënga chca tmojtsamama, bënga mochanjama Bëngbe Utabná puerta etonaná bëngaftaca chaotsemnana, er chë bayëjëngaftaca bënga chca jt-samana. ¿O imojtsejuabná bënga chabiamana más obenana bomnënga imomna ca?

Lempe šmochjama Bëngbe Bëtsá puerta bëtsá y uamaná yomnana jinyanjyama

23 Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyëtscangbe tšabiamana ntsemnana. “Entselesenciana ndayánaca jamana ca”, pero nyëtsca soyënga ntšamo bënga tmojamcá, ošbuachiyëngbiocyte ndoñe ntjyabuáchana Jesucristbeñe más chamotsošbuáchema, y ainaniñe más añemo chamotsebomnana.

24 Ndocná chaondëtsama lempe ntšamo tojobenacá nyë cachabe tšabiamana, ndayá más chaotsama chë inyëngbe tšabiamana.

25 Lempe mercadoca tmojtsena soyënguentšana šmochjase, ntjatstjanaycá chë mëntšena aiñe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tsëngaftangbe ainaniñe juabnënga šmojtsebomnana;

26 er ntšamo Bëngbe Bëtsabe uabemana palabrenguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

27 Nderado canye ndošbuachiyá tmojúbuaja chábioca jasama, y tsëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana chë saná tojóboconama ndocá ntjatstjanaycá, ntšamo tsëngaftangbe ainaniñe juabnënga šmojtsebomnana.

28 Pero nderado nda tcmojáuyana: “Quem mēntšena cach entšangbe pormana soyēnga mo diosēngcá jadórama tmonjanátšēmbona ca”, as ndoñe chana šmatjase, er canýa chca tcmojáuyana, y ainanentše šmojtsebomna juabnēnga, chē chca jamama ndoñe tšabá bétsemnana.

29 Atše sēntsoyebuambná ndayá chē chca tcmojauyanabe ainaniñe juabnēngama, chē soye jasanya ndoñe tšabá yondmēnana, ndoñe chē tšēngaftangbe ainanentša juabnēngama.

Pero tšēngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnana, ntšamo chē ínýabe ainaniñe juabna yobomnana ca?”

30 Y atše chē ndayá stsesama Bēngbe Bētsá tijētschuase, ¿ndáyeca ínýa šochjauyana atše ndoñe tšabá tijama ca, chē soye tijasama, chē ndayama Bēngbe Bētsá tijētschuá ca?”

31 Masque ntšámnaca, cachcá, chašmojtšesá, o chašmojtsofšēšná, o ndaye ínýe soye chašmojtsama, ndayama Bēngbe Bētsá ndocá tonjayana, lempe šmochtsama Bēngbe Bētsá puerte bētsá y uamaná yomnana jtsinýanýnayama.

32 Tondaye šmatjama ndayá chaobená jamana, ínýenga Cristo chamotšábotema. Ndoñe chca šmatjama, ni judiēngbiana, ni ndoñe judiēngbiana, ni chē Bēngbe Bētsábeñe ošbuachiyēngcá enefjuanēngbiana.

33 Šmochtsama ntšamo atše sēndēntšencá, nyētsanga nyētsca soyēnguiñe oyejuayēnga jtsabamnana, lempe ntšamo stjobenacá jtsamēse, ndoñe nýe atšbe tšabiana, ndayá masna chē ínýengbe tšabiana, chēnga chamotsobena chēngbe bacna soyēnguentšana atšebacánēnga jtsemnana.

11

1 Tšēngaftanga šmochtsiyena ntšamo atše sēndamcá jtsamēse, cach ntšamo atše sēndoyencá, ntšamo Cristo inetsamcá jtsamēse.

Ntšamo yomna shembásēnga tšabá jtsemnana, ošbuachiyēngcá tmojénefnjna ora

2 Atše sēntseboše tšēngaftanga jáuyanana tšabá šmojama ca, tšēngaftanga nyētsca soyēnguiñe atšbiana šmnētsenojuabnana, y tšēngaftanga šmojtsabuátambana y šmojtsamama ntšamo tchbonjanabuatambacá, cachcá ntšamo atše sēnjēftsanboshjoncá.

3 Pero atše sēntseboše tšēngaftanga chacmēsertá: nda nyētsca entšanga iuamēnda cha, Cristo endmēna; y nda shēmbioye ibománda cha, boyá endmēna; y nda Crístbioye ibománda chana, Bēngbe Bētsá endmēna.

4 Nderado canýe boyabása chabe bestšaše tojtsenátšbotse, ínýe ošbuáchiyēngaftaca canýiñe Bēngbe Bētsáftaca tbojtsencuénta ora o Bēngbe Bētsabe juabna tojtsoyebuambná ora, cha jamana cachá chaotsēuatjama, chabe bestšáseca chca tojama causa.

5 Pero nderado canýe shembása chabe bestšaše ndoñe tontsenátšbotse, ínýe ošbuáchiyēngaftaca canýiñe Bēngbe Bētsáftaca tbojtsencuénta ora o Bēngbe Bētsabe juabna tojtsoyebuambná ora, cha jamana chama cachá chaotsēuatjama; jtsēuatjana mo cha lempe jshetētšená cuaftsemncá.

6 Er, nderado canýe shembása ndocna te tontseboše chabe bestšaše jtšenátšbotsana, chabiana más tšabá nántsemna lempe chaotsenójshetētše. Pero tojtsejuabná utšbotjená o chca lempe jshetētšená jtsemnana cha yochtsēuatja ca, as chabe bestšaše chaotsenátšbotse.

⁷ Boyabása ndoñe quebnátsmëna chabe bestšaše jtsenátsbotsana, er Bëngbe Bëtsá tojanma ntšamo cachá yomncá cha chaotsemnama, y chë boyabása chca jtsemnëse, jtsinÿanÿayana Bëngbe Bëtsá chabe mandayá yomnama. Pero ntšamo chë shembása yomncá, jtsinÿanÿayana chë boyabása chabe mandayá yomnama;

⁸ er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana.

⁹ Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca.

¹⁰ Chiyecca, y chca jamama angelënga tšabá jtsinÿanáneyeca, shembása jtsemnana chabe bestšaše chaotsenátsbotsama, chca, chaotsinÿnama inÿa chábeñe yomámdama.

¹¹ Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseytëtanana.

¹² Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

¹³ Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canÿe shembásabiama Bëngbe Bëtsáftaca jencuëntana, bestšaše ntsenatsbotscá.

¹⁴ Ntšamo entšanga sempre mondbetsejuabnaycá, ndayá tšabá bëtsemnama, bëngbioye jtsabuátambayana, boyabása bën stjënësha chabuájua tojalesenciase, cha jamana cachá chama chaotsëuatjama.

¹⁵ Pero shembásabiamna, chë bën stjënësha jtsinÿanÿayana chabe botamanana y uámanana, er Bëngbe Bëtsá tojanma shembása bën stjënësha chaotsábomnama, chca, cha chaotsebomna ndáyeca chabe bestšaše jtsenátsbotsama.

¹⁶ Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondëtsemnama.

Bëngbe Utabnabiama jtenójuaboyama jasama ora, chënga ndoñe tšabá imonjánama

¹⁷ Mora cbochanjamënda soyënguiñe atše ndoñe quetsátobena tšëngaftanga jáuyana tšabá šmojama ca, er tšëngaftanga Crístbeñe ošbuachiyëngcá šmojënefna ora, Bëngbe Bëtsá jadórama, atše šontsinÿana chë soye yojt-soservena tšëngaftanga más bacá chašmotsemnama, y ndoñe tšëngaftangbe tšabiama.

¹⁸ Natsana cbochjáuyana, atše sënjouena tšëngaftanga ošbuachiyëngcá šmojënefna ora, báseftanga canÿe soye immétsejuabnaye y ínÿengna inÿetšá ca, y atše sëntsejuabná batšana ndegombre chca yojtsemna ca.

¹⁹ Ndegombre jtseytana tšëngaftangbeñe chamotsemna báseftanga canÿe soye juabnayënga y ínÿengna inÿetšá, chca, nÿetscanga chamotsetatšëmbuama ndëmuanÿenga imojtsemna chë Bëngbe Bëtsá tojayana chënga tšabá tmojama ca.

²⁰ Tšëngaftanga tandëse jasama y vínoye jofšiyama šmojënefna ora, ntšamo bënga fsënduamancá, Bëngbe Utabná bëngbiama tojanóbanama jtenójuaboyama, ndayá chora tšëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiama jtenójuaboyama jasama ora;

21 er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nyetscanga ndayanaca jasama chamotse-bomnëntscuana; báseftanga shéntseca joquédana, y inyengna tša jéftsesana y jofšiyana jéftsótmenantscuana.

22 ¿Tšëngaftanga ndoñe yebna šmondobomna ndayentše jasama y jofšiyama? ¿Ndáyeca tšëngaftanga šmojtsejuabná chë imnénefnja ošbuáchiyënga nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiamia jasama ora chca šmojamama? ¡Ndegombre ndoñe!

Bëngbe Utabnabiamia jtenójuaboyama saná

(Mt 26.26-29; Mc 14.22-25; Lc 22.14-20)

23 Er atše cach Bëngbe Utabná bentsana ntšamo cbontsabatëmbacá sënjanóyëngacñe: Bëngbe Utabná cach uayayëngbe cucuatšinë tojánboshjona ibeta, tandëse tojanca,

24 Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiamia chanjóbana. Ntšamo mora montsamcá šmochtsama, atšbiamia jtenójuaboyama ca.”

25 Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entsanga tojanašëbuachenacá pronto yochtsemnana. Cada vínoye chašmojtsofšëšná ora, chca šmochjama atšbiamia jtenójuaboyama ca.”

26 Er tšëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinýanýnaye cha entšangbiamia tojanóbanama.

Ntšamo yomna jamana, Bëngbe Utabnabiamia jtenójuaboyama jasama ora

27 Chcasna, Bëngbe Utabnabiamia jtenójuaboyama jasama ora, ndánaca tandësentšana tojase y coptémentšana tojofšë, ndoñe chë ntšamo chaotsemnana Bëngbe Utabná yojanjuabnacá, chabiamia Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinýanýnayana, Bëngbe Utabnabe cuerpo y buiñe chabiamia tondaye yonduámanama.

28 Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšë ora.

29 Er nderado nda tojase y tojofšë, chë Bëngbe Utabnabiamia jtenójuaboyama jasama ora, cach Bëngbe Utabnabe cuerpo yomnana ntjajuaboycá, cha chë sóyeca jamana Bëngbe Bëtsá chabotsecastigama.

30 Chíyeca, banga tšëngaftanguentšënga šoquënga šmojtsemna, inyënga añemo ndbomnënga, y inyengna ndoñe nyë báseftanga tmojóbana.

31 Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játa castigana, ntšamo tšabá yomncá ndoñe tmonjase causa.

32 Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínýama, y chca, bayté chentšana, Bëngbe Bëtsá ndoñe chabondëtsemna játayanana bënga šojtsamna nyëtsca tescama castigánënga jtsemnana ca, cánýiñe chë nyë quem luarama enójuabnaye entšangaftaca.

³³ Chca, Jesucristbeyeca atšbe catšátanga, tšëngaftanga chë Bëngbe Utabnabiama saná jasama chašmojënefjna ora, cánýiñe nyëtscanga šmochjabojátša.

³⁴ Y nderado nda tbojtseshëntsana, cachabe yebnoca chauëtsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë inýe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

12

Bëngbe Bëtsabe tšetana obenana, tšabe soyënga jamama

¹ Jesucristbeyeca atšbe catšátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Cristbeñe ošbuáchiyënga jujabuáchama.

² Tšëngaftanga šmondëtatšëmbo, tšëngaftanga Cristbeñe ndošbuáchiyënga šmonjamna ora, inýenga cmonjanabuatambá soyënga, y chora tšëngaftanga šmonjamna inýabeyeca uasjanëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsobenana.

³ Chýeca, atše mora sëntseboše tšëngaftanga chašmotsetátšëmbo, ndocná ntsobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsoyebuambnase.

⁴ Espíritu jamana bënga ndoñe chamondëtsebomnama cachca tšetana obenana tšabe soyënga jamama, pero lempe jobayana cach canýe Espíritbeyeca.

⁵ Bënga, Bëngbe Bëtsá mondëserveda, nyëtscá soyënguñe jtsetrabájayëse, pero cach Utabná nyets chë trabajënga šojabanýe.

⁶ Nyëtscá soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnama.

⁷ Bëngbe Bëtsá inétsama cada ošbuachiyá chaotsebomnama canýe tšetana obenana tšabe soyënga jamama, y chë soye jtsinýanýayana Bëngbe Bëtsabe Espíritu chabe ainaniñe yomnama; y chë tšetana obenana jtsemnana nyëtscangbe tšabiamá.

⁸ Bëngbe Bëtsá, Espíritbeyeca, canýa obenana jatštayana puerte oser-tanáca chaóyebuambama, y inýana obenana cach Espíritbeyeca ndayámnaca corente jtsetatšëmbëse chaóyebuambama;

⁹ inýana cach Espíritbeyeca, obenana Cristbeñe puerte chaotsošbuáchema, y inýabianna, cach nye canýe Espíritbeyeca, obenana jatštayana šoquënga jáshnama;

¹⁰ inýana, obenana tšabe soyënga Bëngbe Bëtsabe obenánaca jamama, y inýana, obenana Bëngbe Bëtsabe juabna jóyebuambayama. Inýana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiritëngbeyeca tojtsemnana, y inýana, obenana chë tempo ndmabiyáñnaca chaóyebuambama, y inýana, obenana josértama ntšamo chë ndaye biyáñnaca jóyebuambayama obenana bomná tojtsichenmá, y inýengna chama jábuayenama.

¹¹ Pero cach Espíritu, chë nye canýe Espíritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

Njetsca ošbuáchiyënga cánÿiñe, mo Cristbe cuerpcá jtsemnana

12 Cuerpo nÿe canÿe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Cristbeñe ošbuáchiyënga, pero Cristbeyeca, bënga cánÿiñe mo canÿacá jtsemnana.

13 Er bënga nÿetscanga, judiënga o ndoñe judiënga, nÿe ínÿabiama nÿets tempo oservënënga o cachëngbiana trabájayënga šojanëbaye, Cristoftaca cánÿiñe mo canÿacá, jtsemnana mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

14 Cachcá, canÿe cuerpo ndoñe nÿe canÿe soye ntsebomnana, ndayá ba soyënga.

15 Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana.

16 Nderado matscuaše tojayana: “Bominÿe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana.

17 Nÿets cuerpo bominÿe tojtsemnëse, bënga ndoñe muantsobena jouenama. Y nÿets cuerpo matscuaše tojtsemnëse, bënga ndoñe muanjobenaye jnguëtsetsiyana.

18 Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše.

19 Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna.

20 Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

21 Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”.

22 Inÿetsá, chë cuerpentša soyënga, chë tojtsinÿana mo obenana ndbomna y nduámana soyëngcá, jtsemnana chë cuerpama más iyta soyënga.

23 Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entsayaca jtichëtjëse. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entsayaca jtichëtjëse.

24 Pero chë cuerpentša soyëngaca, chë nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojttsinÿenama.

25 Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabiama.

26 Nderado canÿe cuerpentša soyama bacna soye tojopasá, chora nÿetsca chë cuerpentša soyëngámnaca chca ndoñe tšabe soye jtsebínÿnana; pero canÿe cuerpentša soyama tcojama más uámana soye chaotsemnana o ndaye tšabe soye tojopasase, chora nÿetsca chë cuerpentša soyëngámnaca chca tšabe soye jtsebínÿnana.

27 Cachá, tsëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpcá jtsemnana, y cada ona tsëngaftanguentsá mo chë cuerpentša soyëngcá, jtsemnana mo chabe cuerpentša soyëngcá.

28 Ntsamo Bëngbe Bëtsá cuerpentše soyënga tojancjá ndayentše inabošcá, cachá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínÿengbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe.

29 Ndegombre, ošbuachiyëngcá enefjuanëngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oyebuambnayënga, nÿetscanga ndoñe abuátambayënga, nÿetscanga ndoñe Bëngbe Bëtsabe obenana bomnënga, bëts soyënga jamama.

30 Nÿetscanga ndoñe šoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe; ni nÿetscanga ndoñe obenana bomnënga quemátsmëna, chë tempo ndmabiyañe nÿetsca biyañe jtsóyebuambnayama obenana bomnënga ntšamo tmojtsichamcá josértama y ínÿengbioye chama jtsabuayiynayama.

31 Pero tsëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftšashjáchama.

Bonshánana jtsebomnana

Y inÿe soye más, atše chochanjínÿanÿiye ntšamo šmojtsobena cabá más tšabá jtsiyenana, Bëngbe Bëtsá jtseeservénëse.

13

1 Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe.

2 Y atše obenana stsebomna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entsanga ndoñe tonjaninÿanÿé soyënga šojtsésertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjšhënga chamobonjoma jamama, pero ínÿenga ndoñe sentsababuánÿeshanëсна, atše tondaye sëntsemna.

3 Y atše lempe ntšamo stsebomncá ndbomnëjmënga stsëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

4 Canÿe entsá ínÿenga ababuanÿeshaná, uantado jtsemnana masque pade-cena soyënguñe tmojtsemna órnaca, y ínÿengaftaca tšabe ainánaca mando jtsebomnana. Inÿenga ababuanÿeshaná ndoñe ntsántšabošana ntšamo inÿa tojatsbomncá, ni ntšenábotamnyana, ni cachá chë ínÿengbiama más uamaná ntjáténobiamnyana;

5 ndoñe bacá mandbomná ínÿengaftaca ntsemnana, ni nÿets tempo ntsebošana y lempe jtsamana nÿe chabiama tšabe soye jónÿenama; cha

nÿe ndayámna nadoñe ntjetnana, ntšamo ínÿenga tmojaborlá ora jt-saperdónayana.

⁶ Inÿenga ababuanÿeshaná nadoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna añfe.

⁷ Inÿenga ababuanÿeshaná, ainaniñe añemo jtsebmomnana nÿetsca padecena soyënguñfe, lempe ntšamo más tšabá yomna soyënguñfe jtsošbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

⁸ Bonshánana nÿetsca tescama jëftsemnana. Canÿe te echántsemna, chora chë Uámana Espíritu nadoñe más queochátama entsanga Bëngbe Bëtsabe juabna chamotsóyeuambnana, ni chë ndocna te ndmabiyañe chamotsóyeuambnana, ni chë puerte jtsetatšëmbëse jóyeuambayama obenana chamotsebmomnana;

⁹ er ntšamo mora bënga imotatsëmbcá y Bëngbe Bëtsabe juábnana jóyeuambayëse tmojayana soyënga, nÿe batšatema bëngbioye jtsinÿanÿnayana Bëngbe Bëtsabe soyëngama, nadoñe lempe;

¹⁰ pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiana yojanjuabnacá, quem soyënga, chë nÿe batšatema bëngbioye jtsinÿanÿnayana Bëngbe Bëtsabe soyëngama, ya nadoñe más queochátsbinÿna.

¹¹ Atše básatema ora, sënjanoyebuambná, sënjanjuabná, y soyëngama tšabá jtsetatšëmbuambna sënjanjuabná mo canÿe basetemcá; pero bëtsá sënjanóbema ora, sëntsanajbaná lempe amana mo canÿe basetemcá.

¹² Cachcá, mora bënga quem luarentše nÿe batšatema Bëngbe Bëtsabe soyëngama jtsetatšëmbuana, mo canÿe espejuñfe tmojtsonÿacá, pero nadoñe nÿa corente tšabá. Pero canÿe te bënga mochántsetatšëmba lempe nÿetsca soyëngama, bënga Bëngbe Bëtsabe delante chamojtsemna ora. Mora atše sëntsetatšëmba nÿe batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente šuabuatmá.

¹³ Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nÿetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

14

Ndmabiyañe obenana Bëngbe Bëtsabe tšetánana

¹ Bëtscá šmochtsama nÿetscanga jtsababuánÿeshanëse chašmotsiyenama, y puerte šmochtseboše jtsebmomnana chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyeuambayama obenana.

² Er chë tempo ndmabiyañe mora jóyeuambayama obenana bomná, Bëngbe Bëtsábioye jtsatsëtsnayana y nadoñe entsángbioye, er ndegombre entsanguentše ntšamo cha tojtsoyeuambnacá ndocná ntjosértana; chana chabe espíritoftaca jtsóyeuambnayana y nadoñe nÿe chabe juábnana, chë tempo Bëngbe Bëtsá ndocna entsábioye tbonjaninÿinÿe soyëngama.

³ Pero chë Bëngbe Bëtsabe juabna oyeuambnayana entsanga jtsëtsëtsnayana, chënga más chamotsošbuáchema y ainaniñe añemo chamotsebmomnana, Bëngbe Bëtsabe soyëngama jábuayenama, y jamama padecena soyënguñfe tmojtsemna órnaca añemo chamotsebmomnana.

⁴ Chë tempo ndmabiyañe mora jóyebuambayama obenana bomná, jtsamana nñe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyebuambnayana jtsamana chë ošbuachiyëngcá enefjuanënga chca soyënga chamotsebomnama.

⁵ Atse sëntseboše nyëtscá tsëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más sëntseboše tsëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyebuambnayá más uamaná jtsemnana chë inñe biyañe oyebuambnayabiama; chca ndoñe nántsemna, ntšamo canñe biyañe tojayancá chë biyañe oyebuambnayá tbojtsësertánese y chë ošbuachiyëngcá enefjuanënga tojábuayenase, y chca, chë soyënga tmojuenama, chënga chamotsobena más jtsošbuáchiyama y añemo jtsebomnama.

⁶ Y mora, Jesucristbeyeca atšbe catsátanga, atše nderado tbojábuache y nñe inñe biyañe tbojáuyanese, ¿chca ntšamo cbatjúabuache? Atše jtsebomnana jujabuáchana, nñe ntšamo chë biyañe tijayancá átšnaca šojtsësertánese, y ndayá Bëngbe Bëtsá šojinñinñecá entsanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tsëngaftanga jabuátambama cha yoboše soye.

⁷ Entsanga monduamana ndayánaca juénanana, mo flautéjja o arpa, vida ndbomna soyënga; cada sóyeca inñetsá juénanama ndoñe tontsopodénese, ndocná nantsobena jtsetatšëmbuama ndayá canña chë soyëngaca yojtsénanama.

⁸ Y nderado nda trompetéjja tojuájatëta ora, soldadënga japéliama chamoprontama, chë uajatëtana inñetsá, nña chama ndoñe tonjuájatëtëse, ndocná buanjósëta y jempéliama ndoñe nanjoprónta.

⁹ Tsëngaftangafácnaca cachcá jtsopasánana. Inñenga paselo josértama jobenaycnana tsëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nñe cánñenga cuaftsoyebuambnacá.

¹⁰ Atše sëntsejuabná, ndegombre quem luarentse ba inñe biyañe entsanga imnétsoyebuambnayana, y ndaye biyáñnaca tmojoyebuambá ora, sempre jtsemnana inñenga ntšamo chënga tmojtsichamcá osertánënga.

¹¹ Pero ntšamo inña chabe biyañe šojauyancá atše ndoñe šontsësertánese, atše stsemna canñe chabiama ndosertana biyañe oyebuambnayá, y chánaca cachcá atšbiana.

¹² Chcasna, chë Uámana Espiritu šondinñanñá obenana jtsebomnama tsëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnama inétsama obenana.

¹³ Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inñe biyañe tojayancá chabosertama y ošbuáchiyënga jábuayenama obenana chaotsebomnama.

¹⁴ Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá.

¹⁵ Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritu, pero ntšamo stsihámuama jtsejuabnayësnaca. Bëngbe Bëtsá

jětschuayama chanjavérsia atšbe espíritoca, pero chca chanjama chífnaca jtsejuabnayése.

¹⁶ Nderado aca Běngbe Bětsá cojtsatschuaná nŷe espíritoca, y canŷa quem Běngbe Bětsabe tšetana obenanama ndosertaná tcmojóyeunase, cha ndoñe ntsoberenana jayanana “chca chaotsemna ca”, cach aquécá cha yojtsejuabnama jinŷinŷiyama, er ntšamo cojtsichamcá cha ndoñe ntšesertánana.

¹⁷ Aca jtsobenana chca puerte tšabá Běngbe Bětsá jětschuayana, pero ntšamo tcojtsamcá ndoñe ntjamana inŷa ndaye tšabe soye chaotsebomnana.

¹⁸ Atše, Běngbe Bětsá sěntsatschuaná inŷe biyañe jóyebuambayama tšěngaftangbiana más tsoberenama;

¹⁹ pero Crístbeñe ošbuachiyěngcá tmojénefná ora, atše más sěndbětseboše nŷe mo shachna palabratémnaca jóyebuambayana, chěnga aiñe catafjoser-tacá, chca, inŷenga jabuátambama, y ndoñe bnětsana uaranga palabrenga jatóyebuambayana inŷe biyañe, chěnga chaósertama ndoñe tontopodénese.

²⁰ Jesucristbeyeca atšbe catšátanga, šmochtsajbaná baseteměngcá juabnayanana. Mo šešonateměngcá šmochtsemna, bacna soyěnga jamama ntsetatšěmbcá; pero mo bětšětsangcá tšabá šmochtsejuabnaye.

²¹ Běngbe Bětsabe uabemana palabrenguiñe, Běngbe Utabná měntšá tojánayana:

Atše quem entsángbioye chanjáuyana,

inŷenga inŷe luarěngocana ashjajněngaftaca, chěngbiana canŷe ndosertana biyañe oyebuambnayěnga;

y chanjáuyana ndayá chěngbe biyañe chamojtsichamo soyěngaca;

pero ni chca, chěnga ndoñe quešmochatóyeunaye ca.

²² Chcasna, inŷe biyañe jóyebuambayama obenana jtsebomnana endmēna, Běngbe Bětsá ndayánaca chě chábeñe ndošbuachiyěngbioye jinŷanŷiyama, y chábeñe ošbuachiyěngbioyna ndoñe. Pero, Běngbe Bětsabe juabna jóyebuambayama obenana jtsebomnana endmēna, Běngbe Bětsá ndayánaca chábeñe ošbuachiyěngbioye jinŷanŷiyama, y chábeñe ndošbuachiyěngbioyna ndoñe.

²³ Er tšěngaftanga nŷetscanga ošbuachiyěngcá šmojénefná ora, nŷetscanga ba biyañe šmojtsoyebuambná, y choye tojámashěngo canŷa chca Běngbe Bětsabe tšetana obenanama ndosertaná o chábeñe ndošbuachiyá, cha nanjájuaboje tšěngaftanga opěnga šmojtsóbema ca.

²⁴ Pero nŷetscanga tmojtsichamo, Běngbe Bětsabe juábna jtsóyebuambnayése, y choye tojámashěngo canŷa Běngbe Bětsábeñe ndošbuachiyá o canŷa chca Běngbe Bětsabe tšetana obenanama ndosertaná, ntšamo chašmojtsichamcá cha bochanjosérta; y chě soye cha bochanjayěnjaná cha bacna soyěnga tojamama, y ndayá cha tojamiñe corente echántsejuabnaye, ntšamo nŷetscanga tmojtsichámuama.

²⁵ Y Běngbe Bětsá chábioye bochanjinŷinŷiye ntšamo cha ainaniñe toja-juabó y tojabošencá, ndayá ndocnábioye tbonjinŷinŷecá, y cha echan-joshěntsamentšiyē Běngbe Bětsá jadórama, y tšěngaftangbe delante echan-jayana Běngbe Bětsá ndegombre tšěngaftangbeñe yojtsemna ca.

Ošbuachiyěngcá šmojénefná ora, ntšamo tšabá yomncá lempe šmochtsama

²⁶ Chcasna, Jesucristbeyeca atšbe catšátanga, šmojénefná ora, cada ona ndayánaca jtsebomnana nŷetscangbiana: inŷengna jtsobenana javérsiana, Běngbe Bětsá jětschuayama, inŷengna jtsobenana jabuátambana

o jábuayenama ndayá Bèngbe Bètsá tojinÿanjecá, o tempo ndmabiyañe chora jtsóyebuambnayana, o entsanga jábuayenana ntšamo inÿa inÿe biyañe tojayancá. Pero lempe šmochjama, ošbuáchiyènga más chamotsošbuáchema y más añemo chamotsebomnama Cristo jaserviama.

²⁷ Nderado inÿe biyañe jóyebuambayama tojtsemnèse, útata o nÿa másese únganga chca chamoyebuambá, y canÿánÿa; y jtseytana ndánaca ntšamo tmojtšichamcá chabosertá y nÿetscanga chama chauabuayená.

²⁸ Y chca chabosertama y nÿetscanga jábuayenama ošbuachiyèngbeñe ndocná tontsemnèse, as ošbuachiyèngcá chamojénefna ora chë chca oye-
buambnayá bontsemna ndoñe chca biyañe ntsóyebuambnayana, sinó nÿe canÿa tojtsemna ora cha jtsobenana chca Bèngbe Bètsáftaca jencuéntana.

²⁹ Utata o únganga entsamna jayanana soyènga, Bèngbe Bètsabe juábnaca jtsóyebuambnayèse; y chë inÿenga jtsamnana botamana jajuaboyana y jayanana ntšamo chènga tmojayancá aife o ndoñe Bèngbe Bètsábiocana tay-
ojtsóbocanama.

³⁰ Pero canÿa Bèngbe Bètsabe juabna tojtsóyebuambnantscuana, inÿa chentše ouenana tbemanábioye Bèngbe Bètsá tbojinÿinÿé ndayánaca yojtsebomna jayanama, as chë natsana oyebuambnayá iytèca chaóbema, y chabolesenciá chë inÿa chaóyebuambama.

³¹ Chca, nÿetscanga, canÿánÿa jtsobenana jayanana soyènga, Bèngbe Bètsabe juábnaca jtsóyebuambnayèse, nÿetscanga chamuatsjinÿama y nÿetscanga añemo jatšatayama.

³² Chë Bèngbe Bètsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora;

³³ er Bèngbe Bètsá endmèna nda inétsama bènga natjèmbana chamotsiyenama, y ndoñe chë bènga nÿetscanga cachcá ndoñe chamondètsejuabnama, y nÿe ntšamo cada ona tojtsebošcá chaotsamama.

Ntšamo nÿets luarènguenache, chë ošbuáchiyènga, chë Bèngbe Bètsabe entsanga mondbénefna luarènguenache endbetsemncá,

³⁴ tšèngaftangbéntšnaca, shembásenga entsamna iytèca jobiamèngana, ošbuachiyèngcá šmojénefna ora, er ndoñe quenátslesenciana chènga chora chamuátoyebuambnama, y aife chènga entsamna chèngbe boyanga jtsayaunanana, ntšamo Moisesbe leyifne endayancá.

³⁵ Chènga ndayánaca jtsetatšèmbuama tmojtsebošèse, cachèngbe boyángbioye yebnoca chamotjanga; er ndoñe corente tšabá ntsemnana canÿe shembása jtsóyebuambnayana tšèngaftanga ošbuachiyèngcá šmojénefna ora.

³⁶ ¿Tšèngaftanga šmojatsjuabná, Bèngbe Bètsabe tšabe noticiènga tšèngaftangbeñe tojanobojatšé ca, o nÿe tšèngaftanga chë soyènga šmojanóyèngacñe ca? Ndegombre ndoñe chca; chíyeca tšèngaftanga nÿe canÿènga ndoñe ntsoebenana jayanama ndayá jamama cmojtsamnana.

³⁷ Nda tojtsejuabná cha Bèngbe Bètsabe juabna oyebuambnayá yomna ca, o chabe ainaniñe chë Espiritu jtsemándayama yojtsebomna ca, cha bontsemna tšabá jtsetatšèmbuana, ntšamo Bèngbe Utabná šojamandacá atše stsabiamnama.

³⁸ Pero cha ndoñe chca tontsetátšèmba y chca ndoñe yondmèna ca to-
jayanèse, ndayá cha tojayancá ndoñe šmatjóyèngacñe.

³⁹ Chcasna, Jesucristbeyeca atšbe catšátanga, puerta šmochtseboše Bèngbe Bètsabe juábnaca soyènga jtsóyebuambnayama obenana

jtsebomnama, y ndoñe šmattsama chë tempo ndmabiyañe ínÿenga ndoñe chamondëtsóyebuambnama;

⁴⁰ pero lempe šmochjama ntšamo jamama yomncá, y ndoñe nÿe ntšamo cada ona tojatsjuabnacá.

15

Cristo tojtanyenama

¹ Morna, Jesucristbeyeca atšbe catšátanga, atše sëntseboše tšëngaftanga chašmuatenójuaboma atše tchbonjanabuayená tšabe noticiënguñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtseservénëse šmojtšiyena.

² Chca šmobómnyeca, tšëngaftanga atšebacánënga šmojtsemna, pero tšëngaftanga sempre chiñe šmojtsošbuachese, ntšamo chbonjanabuayinacá; chca ndóñesna, nÿe ndoñe corente tšabá ntjajuaboycá chë buayenana soyënguñe šmojtsošbuaché.

³ Er atše tšëngaftangbeñe sënjëftsanboshjona, Bëngbe Bëtsábiocana atše tijanóyëngacñe más uámana buatëmbana soyënga. Atše tchbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguñe chabe juabna oyebuambnayënga chama tmojanayancá;

⁴ chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguñe chabe juabna oyebuambnayënga chama tmojanayancá;

⁵ chë Pédrëbioye tbojánëbëbocnama, y chentšana chë bnëtsana útata ca uabobáinëngbioynaca.

⁶ Chentšana mo shachna patsama más chábeñe ošbuáchiyënga tojánëbëbuacna, chënga cánÿentše imojtsemna ora; chënguëntšanga banga cabá vida imotsóbonñe, masque báseftanga ya tmojóbana.

⁷ Chentšana Santiágbioye tbojánëbëbocna, y chentšana nÿetsca chabe ichmónëngbioye.

⁸ Y chentšana átsnaca šonjánëbëbocna. Mo canÿe šešona cabá shbená tojonÿnacá, Cristo chabe ichmoná šonjánbema, chë tempo chama jopróntama ntsebomncá, ndayëntscuana ínÿenga cha tojanabuatambá.

⁹ Er atše sëndmëna chë más batšá uamaná Jesucristbe ichmónëngbeñe; y ni meredico taitsoabuojoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrinama.

¹⁰ Pero Bëngbe Bëtsá atšbe tšabiana yojanjuabná, y chíyeca atše mora tsmëna ntšamo sëndmëncá, y chabe tšabe juábna atšbiana jtsamana, ndoñe nÿe bonamente quenátsmëna. Er atše más sënjatrabajá, chë inÿe Jesucristbe ichmónëngbiana; pero ndegombre atše ndoñe nÿe canÿa chca chiyatsma, sinó masna Bëngbe Bëtsá chë trabajo tojama, tšabe juabna atšbiana jtsebomnëse.

¹¹ Ndayá más yojtsámama ndoñe quenátsmëna, atše o chënga, Jesucristbe soyëngama abuayinayañe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

Chë obanënga cachiñe vida mochtsatsbomnama

¹² Pero bëngbe buayenana soye endmëna, Bëngbe Bëtsá tojanma Cristo cháuatayenama; as çndáyeca básefta tšëngaftanga šmnëtsichamo Bëngbe Bëtsá ndoñe yochanjama chë mora obanënga chámuatayenama ca?

13 Pero chca tojtsemna, chë obanënga ndoñe mochántayenasna, Cristo cach ndoñe tontanayena;

14 y Cristo ndoñe matenjésayenëse, bënga nÿe bonamente chabiamas ftsabuayiyiná, y tsëngaftanga nÿe bonamente chábeñe sñojtsošbuaché.

15 Y canÿe más bëts soye: chca tojtsemnësna, bënga muanjábocna mo chë Bëngbe Bëtsabiamas soyënga tmojinÿe ca ichamëngcá, pero ndoñe ndegombre chca tontsemna; er bënga fsëndbëtsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama.

16 Pero chë obanënga ndoñe mochántayenasna, Cristo cach ndoñe tontanayena.

17 Y Cristo cháuatayenama Bëngbe Bëtsá ndoñe matënjannëse, tsëngaftanga nÿe tondayama chábeñe sñojtsošbuaché; tsëngaftanga chë bacna soyëngama cabá ndoñe perdonánënga smontsemna.

18 Y chca, chë tmojanóbánënga, Crístbeñe ošbuáchiyënga, chënga cach ndoñe chëngbe bacna soyënguentšana atsebácanënga quemochátsmëna, sinó nÿetsca tescama castigánënga.

19 Bënga tmojtsobátmana Cristo bëngbiamas tsabe soyënga chaotsamama, pero chca nÿe quem luarentse bënga vida tmojtseboñnëtscuana, as bënga nÿetscangbiamas más muantsomerecena, nÿetscanga bëngbiamas chaot-sangmënama.

20 Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinÿanÿnayana más shajuanënga chentšana yochjóbocnama, cachcá, Cristo tojtjanayana ora, cha tojaninÿanÿé Bëngbe Bëtsá yochjanma ínÿenga chábeñe ošbuáchiyënga chámuatayenama vida chamotsatsboñnama.

21 Chca, ndayá canÿe entšá, Adán, tojanmamas, nÿetscanga jóbanamas yojtsamna, cachcá, ntšamo inÿe entšá, Cristo, tojanmamas, Bëngbe Bëtsá yochjama entšanga chámuatayenama.

22 Er ntšamo, Adánbentšana entšanga bëtsemnayeca jóbanamas jtsamnana, cachcá, Crístbeñe ošbuáchiyënga bëtsemnayeca, Bëngbe Bëtsá jamana chë nÿetsca tescama yomna tsabe vida chënga chamotseboñnama.

23 Pero Bëngbe Bëtsá jamana cada ona cháuatayenama nÿa chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nÿetscanga chë Crístbe entšanga imomñënga.

24 Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nÿetsca mandadënga, mando y obenana boñnënga corente jtsayënjanayëse.

25 Er Cristo bontsemna inÿenga mo reycá jtsamëndayana, chabe uayayënga chabe cucuatšiñe chamoquedama Bëngbe Bëtsá tojamëntscuana.

26 Canÿe uayayá inétsamas entšanga jóbanamas; pero Cristo último echanjamas chabe obenana pronto chaotsopochocama.

27 Er ntšamo Bëngbe Bëtsabe uabemana palabrënguiñe endayancá: “Bëngbe Bëtsá tojama Cristo nÿetsca soyënguiñe chaotsemándama ca.” Pero “tojamas Cristo nÿetsca soyënguiñe chaotsemándama ca” tojajana ora, jtsopodénana puerte tsabá jinÿama, chca ndoñe yontsayana, Bëngbe Bëtsá Crístbeyecamas mandaná yojtsemna ca; Bëngbe Bëtsá nda tojanma Cristo nÿetsca soyënguiñe chaotsemándama.

28 Y Cristo nyetsca soyënguifne chaojtsemánda ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguifne chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínÿniñe.

29 Inÿetšánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye?

30 Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Cristbiamama oservena causa?

31 Atšbiamama cada te resjo endmëna jóbanama. Jesucristbeyeca atšbe catšátanga, atše séntichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canÿe oservenacá, tšëngaftanga chábeñe šmojtsošbuáchema.

32 Mo canÿa tšátjaye bayëngaca tojtsentsjaná orcá, atšbiamama puerte resjo enjamna jóbanama, Efeso puebloca; pero nÿe chë entšanga mondbétsējuabnaye jëftsashjáchama soyënga jtsebošëse chca matsjamnëse, ¿ndaye tšabe soye matënjanoócna, chca atšbiamama resjo jóbanama enjamna ora? Obanënga ndoñe mochántayenësna, mochtsama ntšamo entšanga jayanana monduamancá: “¡Mochjase y mochjofsiye, nderado yëfse muatjóbanama ca!”

33 Ndoñe matenoíngñana. Ntšamo canÿa tojanayancá: “Nderado nda bacna amiguëngftaca tojtsenutaná, cha jtsajbanana chë tšabe soyënga, ntšamo jtsamëse yojoyena.”

34 Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca séntichamo tšëngaftanga chašmotsëuatjama.

Ntšamo chë obanënga mochtayena

35 Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebmna ca?”

36 ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebmnnama.

37 Ndayá tcojajecá ndoñe ntsemnana chë juábocnana matatema, ndayá nÿe chë meshe, trigo meshe o ndaye mata mëšnaca jtsemnana.

38 Pero Bëngbe Bëtsá jamana chë jénayentšana mata chauábocnana, ntšamo jamama cha tojajuabocá; y cha jamana cada jénayentšana canÿe mata chauábocnana, ntšamo chë jénayentšana chauábocnana tojsemncá.

39 Nyetsca cuerpënga ndoñe cachcá ntsemnana. Entšanga canÿe cuerpo mondbomna, bayënga inÿe cuerpo, shloftšënga inÿe cuerpo, y beongna inÿe cuerpo.

40 Chë celoca vida bomnënga inÿetšá jtsinÿnana, y chë quem luarentše vida bomnëngna inÿetšá. Pero chë buashinÿinÿanana y botamanana ntšamo celoca vida bomnënga jtsinÿnancá, ndoñe cachcá ntsemnana chë quem luarentše vida bomnëngbe botamanancá.

41 Cachcá, shinÿe ndoñe quenátšbomna cachca buashinÿinÿana juashconcá, ni estrellëngcá; y estrellënguentše cach ndoñe cachcá ntsebuashinÿinÿanana.

42 Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojëftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, ínÿenga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántsatsomna y ndocna te queochatopochóca.

43 Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántseuashinÿinÿana y echantsámana. Bënga quem luarentše imoyenëntscuana imobomna cuerpo, nÿe batsá obenana jtsebomnana; pero chë Bëngbe Bëtsá šochjatšataye tsëm cuerpo, puerte obenana bomna cuerpo echántsemna.

44 Quem luarentše imobomna cuerpo endmëna cam luarentše vida chaotsebomnana; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíribeyeca echántsemandana. Canÿe cuerpo quem luarentše vida chaotsebomnana yómnaÿeca, canÿe cuérpëna, jtsemnana celoca vida chaotsebomnana.

45 Chca Bëngbe Bëtsabe uabemana palabrënguiñe endayana: “Bëngbe Bëtsá, chë natsana entšá tbojanma chaotsainama ca.” Adánbentšana nÿetsca entšanga jabocanana, pero Crístbeyeca, Bëngbe Bëtsá tojama banga mo tsmëna entšangcá chamotsemnana; chca, Cristo jtsemnana mo chë ústonoye Adancá; pero Cristina canÿe espíritu endmëna, y chë espíritu jamana entšanga chë nÿetsca tescama yomna tšabe vida chamotsebomnana.

46 Pero chë celoca nÿetsca tescama vida jtsebomnana cuerpo na ndoñe natsana ntjóbcnana, ndayá chë quem luarentše vida jtsebomnana cuerpo; chentsana chë celoca vida jtsebomnana cuerpo.

47 Bëngbe Bëtsá, chë natsana entšá tbojanma fshántseca, y chca, cha fshantsentšana tojánbcna; Cristina, mo entšángbentšana chë natsaná tsmacá bemanacá, celocana tojánbcna.

48 Adánbentšana, chë natsana entšá, chë fshántseca tmojanmábentšana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiámëngna, Crístcá jtsemnana; Cristo nda celocana tojánabo.

49 Ntšamo bënga jtsinÿnana chë Bëngbe Bëtsá fshántseca tbojánbema entšacá, cachcá bëngnaca mochtsinÿna ntšamo chë celocá yomnacá.

50 Jesucrístbeyeca atšbe catšátanga, atše cbochjáuyana, nÿe quem luarentše vida jtsebomnana cuerpëngaca, bënga ndoñe ntsoobenana Bëngbe Bëtsabe amëndayoye jamashënguana; ni ndayá yochjopochóca soye, ntsoobenana ndayá ndoñe yochanjopochóca soye jtsebomnana.

51 Smochjouena, atše canÿe soye cbochanjáuyana, y chë soye Bëngbe Bëtsá entšanga tempo ndoñe tonjaninÿanÿé: Bënga ošbuáchiÿënga nÿetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá.

52 Nÿe betesco, mo tcojofshetá y cachora tcojafšnacá, quem luare ya jopochócana ora, canÿe ángel trompetëfjua chaojuátëta ora, er chora trompetëfjua echanjuénana, Bëngbe Bëtsá echanjama obanënga chámuatayenama, nÿetsca tescama vida jtsebomnana; y bënga, chë ainënga mochtsemnëngna, cha šochanjátrocaye mo tsmëmangcá jtsemnana;

⁵³ er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe.

⁵⁴ Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochñengo ntšamo Bëngbe Bëtsabe uabemana palabreñguíñe chama endayanacá:

Bëngbe Bëtsá tojayënjaná chë entsanga chamóbanama endbëtsama obenana; entsanga ndoñe más quemochatóbana ca.

⁵⁵ ¡Mora entsanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojayënjaná ca!

⁵⁶ Entšanga bacna soyënga tmojama causa, obenana endmëna entsanga jóbana chaotsamnana. Ndayá leyiñe iuayanama, entšá jtsetatšëmbuana ndayá yomna bacna soyënga jamana, y chca tátsëmbo causa, chca bacna soyënga jamama juabnëngaca mandaná jtsemnana, y cabana, jóbana jtsemnana.

⁵⁷ ¡Pero Bëngbe Bëtsá mochtsatschuanaye, bënga mo ayënjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bërjibiama tojanma sóyeca!

⁵⁸ Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerta šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiama trabájayiñe, er tšëngaftanga šmondëtatšëmbo, Bëngbe Utabnabiama trabájayiñe ndayá šmojamcá, ndocna te nje bonamente ntsemnana.

16

Jerusalenoca ošbuáchiyëngbiama crocenánama

¹ Mora chanjóyebuambaye chë Jerusalenoca Bëngbe Bëtsabe entsanga ndbomñëjmëngbiama tšëngaftanga šmochjuícmua crocenánama. Atše sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá.

² Cada tmengo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atše choye chajjá ora, ndoñe chacmondëtsamna quem uajabótama chora crocénana játatbanayana.

³ Y atše choye chajjášhjangora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbiyoe tšëngaftangbe crocénana chámuaýentšbuachema, y tšbuanachangá chanjúyentšbuachiyë ndayá imojtsamama chënga jábuayenama.

⁴ Y nderado, átšnaca chëngaftaca jama tšabá tojtsemnëse, chënga átšeftaca chamua.

Ntšamo Pablo yojanjuabná chë luarëngoye jama

⁵ Atše sëntsejuabná tšëngaftangbiyoe jama jautsëtsayama, Macedonia luarëjana chajjachnëngüentšana, chentša ošbuáchiyënga jaftsanyëse, er atše sëntsejuabná natsana Macedonia luaroye jëftsana.

⁶ Nderado baseftayté tšëngaftangbeñe chašuetsejetana, o nderádose nyets uaftena tempo; as tšëngaftanga inye luaroye játama chašmuájabuachama, ndëmoye jama chašojtsemnoye.

⁷ Atše ndoñe quetsásboše nye betscó tšëngaftanga jáftsanjána, er atše sentsobátmana más bayté tšëngaftangbeñe jaftsemnana, Bëngbe Utabná chca šojalenciasie.

⁸ Pero Efesoca šochanjajétana Pentecostés fiesta chaojobuáchëntscuana.

⁹ Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chíyeca banga Cristbeñe montsošbuaché; pero bángnaca atšbe contra montsemna.

¹⁰ Timoteo tšëngaftangbiyoe chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiana endëtrabája, ntšamo atše sëndamcá.

¹¹ Chcasna, ndocná chábiyoe chabondëtsáboyënja. Bëtscá šmochjama cha natjëmbana átsbiyoe chauatábama, er atše cha sentsobátmana, chë inyenga muentše Cristbeñe ošbuáchiyëngaftaca.

¹² Y Jesucristbeyeca bëngbe catšata Apólosna, atše bëtscá cha sënjaimpadá, chë Jesucristbeyeca catšátanga tšëngaftanga jánjama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

Pablo chënga jtadiósoftanama

¹³ Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nyets tempo, Cristbeñe y chabe soyënguñnaca šmochtsašbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca.

¹⁴ Y nyetsca soyënga ntšamo chašmojtsamcá, bonshanánaca šmochtsama.

¹⁵ Jesucristbeyeca atšbe catšátanga, tšëngaftanga šmondëtatšëmbo, Estéfanas y chabe pamíllanga chë natsanënga monjamnama Jesucristbeñe jtsošbuáchiyama, Acaya luaroca, y bëtscá imojtsentšëna Bëngbe Utabnabiana jtstrabájayana, chabe entšanga jtsëjabuáchanëse.

¹⁶ Atše cbaimpadá, tšëngaftanga lempe šmochtsama ntšamo cmojtsamëndacá, chca entšanga mo tšëngaftangbe uanatsanëngcá, y ntšamo nyetsca chë inyenga mo bëngcá quemuiñe uajabuáchanëse trabájayënga cmojtsamëndacá.

¹⁷ Atše tša oyejuayá sëntsemna tšëngaftangbe pueblentšana Estéfanas, Fortunato y Acaico moye tmojáshjajnama, er atše sentsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sentsobëntscuana.

¹⁸ Er chënga átsbiyoe tmonjabo y tšëngaftangbiana šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsëtabna mo puerte uámana entšangcá.

¹⁹ Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbëtsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bëtsemnayeca.

²⁰ Muentša ošbuáchiyënga nyetscanga cmontsacheuaná. Nyetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondëtsacheuanaycá.

²¹ Quem palabrënga tšëngaftanga jacheuayama cach atšbe cucuátšeca sëntsabiamná.

²² Nderado nda Bëngbe Utabnábioye ndoñe tbontsebobonshana, Bëngbe Bëtsá nÿetsca tescama chabocastigá. ¡Bëngbe Utabná cachiñe cochjésabo!

²³ Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnana.

²⁴ Atše, nÿetsca tšëngaftanga cbondábabuanÿeshana, canÿa mo tšëngaftangcá, Cristo Jesúseftaca cánÿiñe mo canÿacá jtsemnëse.

2 Corintios

Jacheuayama

¹ Atše Pablo, Jesucristbe canye ichmoná, Bëngbe Bëtsá atše chca jtsemnana yojánbošeyeca, Jesucristbeyeca bëngbe catšata Timotéoftaca quem tsbuanácha séntsabiamná, Corinto pueblaca Bëngbe Bëtsábeñe ošbuachiyëngcá enefjuanëngbiana, y nyëts Acaya luarentše Bëngbe Bëtsabe nyëtsca entšangbiámnaca.

² Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana y ainaniñe tšabe ebionana chašmotsebonnana.

Ntšamo Pablo tojansufrí

³ Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, Bëngbe Taitá, chë bëngbiana lastemado yomná, y ndaye padecena soyënguiñe tmojtsemna ora, bënga šondbetsañemuayá.

⁴ Cha bënga jtsañëmuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañëmuayama, ntšamo Bëngbe Bëtsá šojujabuachcá chënga jujabuáchëse.

⁵ Er ntšamo Cristo tojansufricá, bënga tša fsëndësufrina chabiana oservëniñe; cachcá, Cristbeyëcnaca Bëngbe Bëtsá jamana bënga puerte añemo ainaniñe fchaitsebonnana.

⁶ Er bënga tmojtseufrinëse, jtsemnana bënga jobenayama tšëngaftanga jañëmuayama chë šmojtseufrina ora, y atsebácanënga chašmotsebonnana, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañemose, jtsemnana bënga fchayobenama tšëngaftanga jañëmuayama, padecena soyënguiñe šmojtsemna ora. Chca, bënga jobenayana tšëngaftanga jujabuáchana, Bëngbe Bëtsábeñe chašmotsobátmanama, chábeñe jtsóšbuáchiyëse, y lempe jtsóboyayama, ntšamo bënga fsënjasufricá šmojtseufrina ora.

⁷ Bënga sempre fsëndobátmana y tšabá fsëndëtatsëmbo chë padecena soyënguentšana tšabá šmochjábocanama, er bënga fsëndëtatsëmbo, chë ntšamo bënga fsënjasufricá tšëngaftanga šmojasufrima; y cachcá, Bëngbe Bëtsá yochjama tšëngaftanga ainaniñe puerte añemo chašmotsebonnana, ntšamo bënga fchaitsebonnana cha tojamcá.

⁸ Jesucristbeyeca atšbe catšátanga, bënga fsëntseboše tšëngaftanga chašmotsetátšëmbo ntšamo bënga Asia luaroca tša fsënjansufrínama. Bënga puerte padecena soyënguiñe fsënjanियena, nya ndoñe más jauantacá, chentšana vídaca jabocanama ntjatobatmancá.

⁹ Bënga šontsanënnana mo jóbanama cuaftsamncá. Pero chë soye tonjansóservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana.

¹⁰ Cha šojatsebacá bënga jóbanama puerte resjo enjamntšana, y cachcá šochjátsebacaye bëngbiana cachiñe cachcá tša resjuñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama.

11 Tšəngaftáŋnaca cmontsamna bəŋga jujabuáchana, bəŋgbiana Bəŋgbe Bətsá jaimpádase; chca, ba entšanga Bəŋgbe Bətsá mochanjətschuaye, er cha tojama bəŋga chábensana tsabe bendicionəŋga fchayóyəŋgacñama, cha jaməse ntšamo chəŋga bəŋgbiana tmojanimpadacá.

Ndayeca Pablo Corinto puebløye ndoñe tonjána

12 Canyē soye endmēna ndayá oyejuayəŋga šojtsabiamná: bəŋga bəŋgbe ainanentša juabnəŋgaca jtsetatšəmbuana puerte tsabá jtsaməse fstsiyena ca, ntšamo chē Bəŋgbe Bətsabe entšanga endbetsamncá, nḡetsca quem luarentša entšangbeñe, y más tšəngaftangbeñe, y bəŋga jtsetatšəmbuana ntšamo tsabá tifjamcá nḡets ainánaca tifjamama. Bəŋga tondaye chibiatsma quem luar-entša entšangbe osertanánaca, ndayá Bəŋgbe Bətsá tša tsabia bəŋgaftaca bətsəmnayeca, šojjúbuache chca chamotsiyenama.

13 Er ntšamo fsəntsabiamnamna ndoñe queftsátsboše, ntšamo tšəngaftanga šmojtsalía y cmojtsəsertánentšana inḡetsá játayanana, y səntsobátmana puerte tsabá lempe chacmósertama.

14 Mora ndayá atše stsamama ndoñe lempe quecmátəsertana. Pero atše səntseboše tšəngaftanga chama corente chacmósertama; chca, Bəŋgbe Utabná quem luaroye chaojésabo ora, tšəngaftanga bəŋgbiana oyejuayəŋga chašmotsemnaca, ntšamo bəŋgnaca tšəngaftangbiana oyejuayəŋga fchantsemncá.

15 Chca ndegombre yomnama atše səndétatšəmboycə, atše sənjanjuabná tšəngaftangbiøye jshətsana jáŋyama, y chca, chē tsabe soye tšəngaftangbiana uta soye jamana, tšəngaftangbiøye uta soye jáŋyəse.

16 Atše sənjanjuabná tšəngaftanga jshaftsanyana, Macedonioye ayiñe chəjana matijánachnəŋgo ora; y chentsana, ya camoye ataboye ora, tšəngaftanga cachíñe jáftsanyana. Chca, tšəngaftanga mašmənjanobená atše juajabuáchana Judea luaroye játama.

17 Atše chca jamama tsjanjuabná ora, ¿chca tijanma ndoñe corente tsabá ntjenøjuaboycá? ¿Tšəngaftanga šmatjájuaboye, ntšamo nḡe quem luarama enøjuabnaye entšanga monduamancá, cachora canyē soyama “aiñe” y “ndoñe ca” jayanəse, atše ndayánaca jamama snétsejuabnaye ca?

18 Canyē soye ndegombre endmēna: Bəŋgbe Bətsá sempre endbama ntšamo tojayancá, y chca puerte ndegombre endmēnayeca, atše ndayánaca ch- jama ca stjayana ora, chca ndoñe questsatayana chentšana atšbe juabna jatstrócama, mo canya cachora canyē soyama “aiñe” y “ndoñe ca” cuafjatichamcá.

19 Er Cristo Jesús, Bəŋgbe Bətsabe Uaquiñá, ndabiama Silvano, Timoteo y atše tšəngaftangbeñe fsənjanabuayiyná, ndoñe ntsejuabnayana canyē soye jamama y chentšana jatsjuabnayana inḡetsá jatsmama, mo canyē entšá cachora canyē soyama “aiñe” y “ndoñe ca” cuafjatichamcá, ndayá chana nḡets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocaycá.

20 Er ndayá cha tojamiñe, lempe ntšamo Bəŋgbe Bətsá tojašebuachenacá jocúmplicana, mo chē lempe ntšamo Bəŋgbe Bətsá tojašebuachenama cha “aiñe ca” cuafsichamcá. Chiyeca, Bəŋgbe Bətsá bəŋga tmojtsatschuaná ora, Cristo Jesúsbeyeca bəŋga jayanana “chca chaotsemna ca”.

21 Pero Bəŋgbe Bətsá endmēna nda inétsama bəŋga y tšəngaftanga puerte Crístbeñe chamotsošbuáchema, cháftaca cányiñe mo canyáca jtsemnəse; y

Bëngbe Bëtsánaca endmëna nda bënga šojabacacá chabe entsanga chamotsemnana.

²² Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinýanýnayana bënga Bëngbe Bëtsabe entsanga imomnana. Y bëngbe ainaniñe chë Espíritu imobómnyeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatsatayama šojašebuachenacá.

²³ Bëngbe Bëtsá entsonyá atše ndegombre stsihámuama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tbojaucacánëse.

²⁴ Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Cristbeñe jtsošbuáchiyana. Bëngbe fséntseboše ndayá tšëngaftanga jujabuáchana, corente oyejuayënga chašmotsemnana.

2

¹ Chíyeca atše ndoñe chiyjá jautsëtsayama, er atše sënjanjuabó y sënjanényana choye ndoñe jama ca, bacna soyënga šmojtsanmama jábuayenama, y chca, ngmënënga játabiamana, ntšamo chanýe sënjamcá.

² Tšëngaftanga ngmënaca chašmotsemnana atše stjamëse, ¿nda yochjama atše oyejuayá chaitsemnana, sinó nýe tšëngaftanga, chë atše ngmënënga tijábiamënga?

³ Chíyeca tcbonjanëbuábiamia chë ntšamo šmojualiaca, chca, atše choye stjáhjango ora, tšëngaftanga átsbioye ndoñe ngmená chašmondëbemama. Chca játamamna, tšëngaftangbiamia más tšabá endmëna oyejuayá atše chašmobema. Atše tšabá sënjántatšëmbo ndayá átsbioye oyejuayá šojabemcá, tšëngaftángnaca chca mašmënjánbošena y oyejuayënga chë soye matcmënjánabiamia. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora.

⁴ Pero chë tsbuanácha tcbonjanëbuábiamia ora, atše corente šonjanongmé y ainana šonjántsetšëna chca jabuache soyënga tšëngaftanga jubuábiamama, y chca jamama shëchbuýnaca sënjanoperdé. Pero atše ndoñe checbátanëbuábiamia atše jatsmama tšëngaftanga puerte ngmënaca chašmotsemnana, ndayá chašmotsetatšëmbuama atše tša cbababuánýeshanama.

Perdón chë bacna soye amabiamia

⁵ Y mora, chë tšëngaftangbeñe puerte ngmënana chaotsemnana tojama boyabásabiamna, cha átsbioye ndoñe ngmená chešnátsbema, ntsachetšá tšëngaftanga tcmojabiamcá, ínýengbioye ínýengbiamia más. Chca sënstichamo, er atše ndoñe quetsátsboše jayanama ntsachetšá tojamama cha más bacna soye tojama ca.

⁶ Banga tšëngaftanguentsënga ntšamo šmojamcá, chë entšabiamia ya bëts castigo entsemna. Nýe nýetšá ponto.

⁷ Chamna, ndayá mora cmojtsamna jamamna entsemna, cha jtseperdnana y jañëmuana, chca, ndocna tšabe soye jamama ndobená ndoñe chaondëtsemnana, chë castiguama puerte ngmënaca bëtsemna causa.

⁸ Chíyeca, tšëngaftanga cbaimpadá cachiñe tšabá chašminýinýe chábioye corente šmobobonshánama.

⁹ Tempo ya chama tcbonjanëbuábiana, atše jinýama tsëngaftanga aíñe o ndoñe šmotsanprontánama, lempe ntšamo tcbonjanamëndacá jamama.

¹⁰ Chcasna, ndánaca ndayánaca tsëngaftanga chašmojaperdoná ora, átsnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tsëngaftangbe tsábiana y Cristbe delante.

¹¹ Atše tsëngaftangcá, quem entšábioye šcoperdoná chë bëngbiana tojama bacna soye; chca, Satanás ndoñe chaondobenama bënga jáingñama, er bënga mondétatšëmbo cha inétseboše ndaye bacna soye entšá chaotsamama.

Ndáyeca Pablo ndoñe natjëmbana Troas puebloca tontsanoquedañe

¹² Atše Troas puebloca sënjánashjango ora, Cristbe tsabe noticiënga jábuayenama, atše sënjáninýe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama.

¹³ Masque chca enjamna, atše ndoñe quetstétsobena natjëmbana ainana jtsebmomana, er atše sënjanjuabná Jesucristbeyeca bëngbe catšata Tito chentše jinýenana, pero ndoñe chca. Chíyeca, Troas pueblentša entšanga sëntanadiošoftaná, y Macedonia luaroye sënjána.

Cristofaca cánýiñe mo canýacá jtsemnëse, bënga mo ayëñjanayëngcá jtsemnana

¹⁴ Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëyëñjanama, tempo šojanamënda juabnënga; y chë mora bënga Cristofaca cánýiñe mo canýacá jtsemnëse, nýets tempo cha šnetsënachayama, mo canýe ayëñjanayacá, y chë nýets luarenache entšanga Cristbiana soyënga chamotsábuatmama bëngaftaca cha yojtšamama, mo nda canýe botamana uanguëtše soye nýets luarënguenache chauáshanama cuaftsamcá.

¹⁵ Er chë incienso tojtsejuínýinýana ora, entšábioye tsábá juanguëtšenana; cachcá Cristbe tsabe noticiënga ftsabuayinýa ora, Bëngbe Bëtsabiana bënga jtsemnana chë ndëmuanýënga tmojtšama cha oyejuayá chaotsemnana. Incienso tcojtsejuinýna ora, nýetscángbioye juanguëtšenana. Cachcá, Bëngbe Bëtsabe palabra fstsoyebuambná ora nýetscanga joudenana, Cristo yojtšatsebacanga y chë pochocánënga jtsemnana imojtsajñëngnaca.

¹⁶ Chë pochocánënga jtsemnana imojtsajñëngna, pochocánënga mochanjábocana, er ntšamo bënga fsëndabuayinýacá y tmojouencá chënga tmojtšaboté; y chca, chëngbiana chë tsabe noticiënga jtsemnana mo canýe obanabe uanguëtšancá. Pero chë Cristo yochjátsebacangna, tsabe noticiënga tmojóyëngacñeyeca, mochanjobenaye tsabe vida nýets tempo jtsebmomana; y chca, chëngbiana chë tsabe noticiënga jtsemnana mo canýe puerte botamana uanguëtšancá. Y asna, ¿nda obenana yojtsebmomna chë tsabe noticiënga jábuayenama trabajo jtšamama?

¹⁷ Bënga chë tsabe noticiënga ndoñe queftsatabuayinýa, ntšamo ba entšanga imojtsamcá, mo nýe batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsemncá. Banga chca mondana; bënga ndoñe. Bënga, Cristofaca cánýiñe mo canýacá jtsemnëse, fsëndabuayinýa mo Bëngbe Bëtsabe delante cuaftsemnëngcá, ndegombre nýe ntšamo tsábá yomncá nýets ainánaca jtsebošëse, y mo Bëngbe Bëtsabe ichmonëngcá.

3

Chë Bëngbe Bëtsabe tsëm tratama buayenana soye

1 Chca bëngbiana fstsjayana ora, tsëngaftanga cmojtsinýana ÷bënga cachiñe tiftëtontsé cabënga bëtsétsanga enobiamnayana? ¿O bënga sojtsamna, mo inýengcá, tsëngaftanga juyentsbuáchiyana o juátjañana tsbuanachangá, bënga tsabá fstsamama chëchangaca jinýanýiyama?

2 Bënga bëngbe ainaniñe puerte tsabá fsëndétatsëmbo, nyetsca entsanga, ntšamo tsëngaftanga jtsamése smoyencá tmojinýe ora, tsëngaftanga jtsinýanýayana bënga ndegombre ntšamo tsabá yomncá fstsamama. Chca, tsëngaftanga jtsemnana mo canýe tsbuanachacá, nyetscanga jtsabuatmana y jtsobenana jualiána, bënga tsabá fstsamama.

3 Nyetscanga tsabá mondétatsëmbo Cristo tojanma tsëngaftanga chábeñe chašmotsošbuáchema, y bëngaftaca cha chca tojanmámna. Chca, tsëngaftanga šmondmëna mo Cristbe canýe tsbuanachacá, ndayëcha quem luarentša entsángbiye tojuyentsbuaché bëngaftaca. Tsëngaftanga ndoñe chešmatanobená Cristbeñe ošbuáchiyënga jtsemnana entsangbe trabájoca, er Cristbeñe šmonjanošbuaché chë Bëngbe Bëtsá Ainabe Espiritbeyeca; y chca, tsëngaftanga šmondmëna mo canýe tsbuanácha cháftaca uabemanëchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguiñe tojanábema, entsanga chamotsobedecënana, pero tsëngaftangna Cristbe buayenana soye tsëngaftangbe ainaniñe šmojóyëngacñe.

4 Cristbeyeca Bëngbe Bëtsábeñe jtsošbuáchiyëse, bënga corente fsëndétatsëmbo chca ndegombre bëtsemnana.

5 Ndoñe quenátsmëna, nyë bënga canýenga quem trabajo jamama fstsobena y játayanana bëngbe soye chë trabajo yojtsemna ca, er bënga jtsobenana chca jamama, nyë Bëngbe Bëtsabe ujabuáchenanaca;

6 er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe entsángbiye tojanašebuachená soyëngama, ndayá Cristo tojanma sóyeca, mo canýe tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbiye léyeca tojanašebuachená soyëngcá. Inýetsá; entsanga mondama Bëngbe Bëtsabe tsëm trato, Uámana Espiritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbana jtsemnana; pero Cristbe tsabe noticiënga, chë tsëm trato, entsanga ainaniñe tmojóyëngacñe ora, chë Uámana Espiritu jamana, chë nyetsca tescama yomna tsabe vida chënga chamotsebomnana.

7 Quem Moisesbe ley, chë ndoñe tmonjobedecema entsanga jóbana jtsamnana, ndëtsbé tablëbenguiñe letrëngaca tmojanábema, y Bëngbe Bëtsá Moisésbiye tbojanantšabuaché ora, cha tša buashinýinýaniñe tojánabo. Chë causa entsanga ndoñe imontsobena ni mo jinýana Moisesbe jubíá, er tša ibo-jtsanjuebëbuashinýinýana, Bëngbe Bëtsáftaca tbojánencuentëšana tojtana ora. Pero betesco tojanëjbana chë jubíá chca buashinýinýanana. Chë ley, chë natsana trato, Bëngbe Bëtsá tojanayentšbuaché ora, tša buashinýinýanáca cha tojanmëse;

8 ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espiritu bëngbe ainaniñe cháumashënguama Bëngbe Bëtsá tojama ora.

9 Bèngbe Bètsá chë ley tojanayentsbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinýinýanana jinýanyiyése; ndegombre más bën y uámana tempo entsemna chë mocna ora Bèngbe Bètsá yojtsama entsanga chabe bominýiñe tsábenga chamotsemnana.

10 Er chë Bèngbe Bètsá ley tojanayentsbuaché ora tojaninýanyé buashinýinýanana, mora jtsinýnana mo ya tondaye cuabndétsemncá, chë Bèngbe Bètsá entsangbiama tsëm soyënga tojtsamama tcojtsonyá ora, chë tša buashinýinýanana yojtsemna ora.

11 Er chë leyama tempo, chë ya jochnënguama tempo entsemna ora, Bèngbe Bètsá chabe buashinýinýanana y uámanana tojinýanyése; ndegombre chë Bèngbe Bètsá tsëm soyënga entsangbiama jamama ora, chë ndocna te yochanjochnëngo tempo ora, Bèngbe Bètsá más chabe buashinýinýanana y uámanana echántsinyánayae.

12 Y chca, Bèngbe Bètsá chca bèts soyënga yochjamama fsëndobatmánayeca, bënga fsëntsobena jóyebuambayama, nýetsca soyëngama jayanése, tondayama ntjatauatjá.

13 Y chca, bënga ndoñe Moisescá queftsátama, chë chabe jubíá chaobuashinýinýenama Bèngbe Bètsá tojanma ora, canýe entséjuaca yojtsenamochécjua; cha chca tojanma, chë Israeloca entsanga ndoñe chamondobená jinýama chë jubíá buashinýinýanana ya yojtséchnëjuana ora.

14 Pero Bèngbe Bètsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bèngbe Bètsá Moisésbioye tbojanšbuachenacá chëngbiama jamama, Israeloca entsanga tmojtsalía ora, ndoñe ntsésertánana Bèngbe Bètsabe ndegombre soyënga, mo chëngbiama iytëmena soyënga cuaftsemncá, mo chë Moisés yojtsenamochécjua entséjuacá. Y chca endmëna, er nýe Crísoftaca cánýiñe mo canýacá jtsemnëse, chënga jtsobenana chë soyëngama jósertana, y iytëmená ya ndoñe ntsemnana.

15 Y mëntscoñama, Moisesbe librësangá chënga tmojtsalía ora, ndoñe ntsésertánana Bèngbe Bètsabe ndegombre soyëngama, ntšamo chiñe tojtsayancá jamama ndoñe montseboše causa.

16 Pero canýe entsá chë Bèngbe Utabnabe benache tojishache ora, cha jtsobenana chë soyëngama josértana.

17 Y Bèngbe Utabná y Espíritu canýa bondmëna, y Bèngbe Bètsabe Espíritu tojtsemnente, chë bacna soyënga jamama juabnënga, ni chë ley ndoñe ntsemándayana.

18 Moisés chabe jubiañe Bèngbe Bètsabe buashinýinýanana y uámanana tojaninýanyé, y chíyeca, canýe entséjuaca yojtsenamochécjua, chca, chënga ndoñe chamondinýama. Pero bënga ošbuáchiyënga nýetscanga jtsinýanyayana Bèngbe Utabnabe buashinýinýanana y uámanana, mo canýe espejo canýe soye tojtsinýanyacá, y ndoñe queftsátsboše ntšámnaca jamëse chë soye jatsëytamianana. Cha bëngaftaca yojtsama cada te más chë ntšamo cha yomncá bënga chamotsemnana, cada te más bètsëtsanga chë ntšamo cha yomncá jtsemnëse. Chca endmëna ntšamo Bèngbe Utabná yojtsama; y Bèngbe Utabná y Espíritu canýa bondmëna.

4

1 Y chca, Bëngbe Bëtsá bëngbiana lastemado yómnyeca, quem trabajo sojabanyé, jtsabuayinayama chë Crísoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana.

2 Bënga fsëntsaboté chë ínÿenga iytëmencá imnétsama soyënga, chë ínÿenga tmojinÿe ora chama jtsëuatjana, y chë ínÿenga entsãnga jáingñama imnétsama soyëngnaca, y Bëngbe Bëtsabe buayenana soye ndoñe queftsatstróca ndoñe ndegombre soyëngaca. Chamna, bënga sempre nÿe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entšabe ainanentša juabnbënga chamuayanama, bënga ndegombre soyënga fstsoyebuambná ca.

3 Y nderabad bënga chë tšabe notiçiënga fstsabuayiná ora, báseftanga chë soyënga chaósertama ndoñe tontsopodënse, nÿe chë pochocánënga jtsemnana tmojtsajnéngbiana chca jtsemnana.

4 Chëngbiana, chë Crístbeñe ndošbuáchiyëngbiamna, chë quem luarentše mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinÿama chë tšabe notiçiënguentšana puerte bëts y tšabe soyënga, chë Cristo puerte bëtsá y obená yomnana ínÿanÿnaye soyënga, nda nÿetsca soyënguiñe Bëngbe Bëtsacá yonna.

5 Bënga ndoñe nÿe cabëngbe soyama queftsatabuayiná, ndayá Jesucristbiana mo Bëngbe Utabnacá. Bënga bëngbiana fsëndbáyana mo oservenëngcá fstsmëna ca, tšëngaftanga jujabuáchama; y chca fsëndbëtsama Jesús jasérviana.

6 Er Bëngbe Bëtsá, nda quem luare jobojátšama ora tojanmandá binÿniñe ibetentšana chaóboconama, chánaca tojama bënga ainaniñe tšabá chabe soyëngama chaóšësertánama, chca bënga fchayobená juabuátmanana chë Bëngbe Bëtsabe uámanana y obenanentšana inétsobocana osertánana, ndayá Crístbeñe bënga mondonÿá.

Bënga fsëndoyena Crístbeñe jtsošbuáchiyëse

7 Pero chë puerte tšabe y bëts soye, chë Crístbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebmnnana, chca, jinÿanÿiyama tša bëts obenana Bëngbe Bëtsábocana yóbocanama, y ndoñe bëngbentšana.

8 Y chca, bënga nÿetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tšabá jacobanama; ndoñe queftsátstatšëmbo ndayá jamama šojtsamna, pero ndoñe queftsátsmëna ntsoyobencá jtsobátmanama quem padecena soyënguentšana tšabá jacobnana.

9 Inÿenga montsama bënga puerte fchaisufrima, pero Bëngbe Bëtsá ndoñe nÿe cachcá šontsabashejuana; mo nda ínÿabioye cuafjutšencá tmojtsentsjaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšinë fsëntsemna, pero cabá ndoñe ntjobáyana.

10 Inÿenga sempre jtsamana bënga bëngbe cuerpiñe puerte fchaisufrima, y jobanámna resjo jtsemnana, ntšamo Jesúseftaca tmojanmcá, cha chao-sufrima y chaóbanama. Chca bëngaftaca endopasana, chca, ínÿenga chamobená jinÿama Jesús bëngbeñe vida yobomnana.

11 Er bënga vida fchabomnëntscuana, sempre puerte resjo bëngbiana jëftsemnana jóbana, Jesúsbioye servena causa; y chca endmëna, ínÿenga

chamobená jinŷama Jesús vida yobomnama bēngbe cuerpiñe, chē canŷe te yochjopochóca cuerpo.

12 Y chca, bēnga tša fsēndēsufrina y jobanámnaca resjo endmēna; y tšēngaftanga tšabe noticiēnga šmojóyēngacñayeca, Bēngbe Bētsá tojama chē nŷetsca tescama yomna tšabe vida chašmotsebomnama.

13 Bēngbe Bētsabe uabemana palabrenguiñe endayana: “Atše sēntsanosbuachē y chíyeca sēnjanoyebuambá ca.” Bēnga cachca ošbuáchiyana fsēndbomna chē chca tojanayanacá, y chíyeca bēngnaca Bēngbe Bētsábeñe fsēntsošbuachē y chabiama fsēntsoyebuambná.

14 Er bēnga fsēndētatsēmo, Bēngbe Bētsá, nda tojanma Bēngbe Utabná Jesús cháuatayenama, chánaca yochjama bēnga Crístoftaca cánŷiñe mo canŷacá jtsemnēse, bēnga chámuatayenama, y tšēngaftangaftaca cánŷiñe cha yochtsemnoŷe šochjúshejango.

15 Lempe ntšamo bēnga fstsama y fstsesufrincá tšēngaftangbe tšabiama endmēna; chca, más becá entšanga chábēñe chamojtsošbuachē ora, ba tšabe bendicionēnga Bēngbe Bētsá entšangbiama jtsamēse, más becá entšángnaca chábioye chamotsatschuaná, ndayá chēngbiama cha yochjamama; y lempe chca, Bēngbe Bētsá puerte uamaná y obená yomnama nŷetsca entšanga chamotsichámuama.

16 Chíyeca bēnga ndoñe ntjájbanana ainaniñe añemo bomnana. Masque quem luarentša bēngbe cuerpo cada te jtsopochóca yana, Bēngbe Bētsá jamana chē bēngbentšana nŷets tempo vida yochtsebomna soye, cada te más obenana chaotsebomnama; y chca, bēnga jtsemnana mo tsmēma entšangcá.

17 Ntšamo bēnga mora fsēndēsufrencá endmēna nŷe quem luarentše vida tmojtsebomnēntscuana, y chca, chē soye jtsemnana mo canŷe nduámana soyá; pero ntšamo bēnga fsēndēsufrencá josérviana bēnga jtsebomnama chē Bēngbe Bētsá šochjatsataye puerte bēts uámanana y obenana, cháftaca nŷets tempo vida jtsebomnama, chē ndayá yomna nŷetsca soyēngama más bēts y uámana soye.

18 Er bēnga nŷe chē tojtso podena jinŷama soyēnguiñe ndoñe nŷets tempo queftsatsjuabná, ndayá chē ndoñe yondopodena jinŷama soyēnguiñe; er chē bēnga imobena jinŷama soyēnga ndoñe nŷetsca tescama ntsemnana; pero chē bēnga ndoñe mondobena jinŷama soyēnga cocayé nŷetsca tescama jtsemnana.

5

1 Bēnga mora mondbomna canŷe cuerpo quem luarentše vida jtsebomnama. Quem cuerpo yomna mo chē jtsatsjacama yopodena yebncá, cánŷentše ndoñe nŷets tempo ntjéftsemnana. Bēnga mondetatsēmo, quem cuerpo canŷe te tojtso pochocase, Bēngbe Bētsá yochjama bēnga tsmēma cuerpēnga chamotsatsbomnama, celoca nŷetsca tescama vida jtsebomnama, Bēngbe Bētsabe pormana cuerpēnga y ndoñe entšangbe pormana cuerpēnga.

2 Chíyeca, bēnga quem luarentše chca vida tmojtsebomnēntscuana, yapa tmojtseufrina causa, bēnga tša jtsebošana betesco Bēngbe Bētsá celoye chašúyambama, y bēnga nŷets tempo celoca jtsiyenama tsēm cuerpo jtsebomnama cha chaomama;

3 chca, Cristo yochjésabo ora, bēnga chē tsēm cuérpoca chamotsemnana, y ndoñe nŷe espíritu ndocna cuérpoca.

4 Bēnga quem cuerpiñe, chē quem luarentše vida jtsebomnama cuerpiñe chamojtsiyenēntscuana, yapa padecena soyēnguiñe sufrina causa, bēnga

jabuache mochanjášhachna; chca echántsemna ndoñe n̄ye ch̄e espíritu ndocna cuérpoca jtsemnama b̄enga imojtsebóseyeca, ndayá masna, b̄enga ch̄e ts̄em cuerpo chamotsebomnama B̄engbe B̄etsá chaomama imojtsebóseyeca. B̄enga fs̄éntseboše ch̄e b̄éngbeñe jopochócama yomna soye B̄engbe B̄etsá lempe chaotrocama, chca, b̄enga chamotsobenama celoca n̄yetsca tescama vida jtsebomnama.

⁵ Y B̄engbe B̄etsá endm̄ena nda tojama b̄enga chamotseprontánama ch̄e ts̄em cuerpo jtsebomnama, y nda tojama Esp̄iritu b̄engbe ainaniñe cháumash̄enguama, chca b̄éngbioye jin̄yan̄iyama, b̄enga ndegombre mochj̄oȳengacñe ndayá B̄engbe B̄etsá tojašebuachenacá.

⁶ Y chca, b̄enga sempre ainaniñe b̄ets añemo fchandb̄etsebomna. B̄enga fs̄ëndétat̄s̄embo, quem cuerpiñe cabá vida b̄enga mochj̄éftsebomn̄entscuana, b̄enga ndoñe mochántsemna B̄engbe Utabná yojtsemnantse.

⁷ Er mora b̄enga b̄enga fs̄ëndoyena jtsam̄ese, nt̄samo Crístbeñe b̄enga imošbuachecá, y ndoñe n̄ye ndayá jin̄yama tmojtsoyobanama.

⁸ B̄engbe fs̄éntsemna ainaniñe b̄ets añemoca, y más fs̄éntseboše jájbanana quem cuerpiñe vida jtsebomnana, jama B̄engbe Utabnáftaca n̄yetsca tescama vida jtsebomnama.

⁹ Ch̄iyeca b̄enga b̄etscá fs̄ëndéntsena B̄engbe Utabná sempre oyejuayá jabemama, masque b̄enga quem luarentse quem cuérpoca tmojtsiyena, o ya ndoñe.

¹⁰ Er n̄yetscanga šontsamna jashjanguana Crístbe puestoca tribunalentse, cada ona nt̄samo yomerecencá chaóȳengacñama, nt̄samo t̄sabá o ndoñe t̄sabá quem luarentse chabe cuerpiñe vida yoj̄éftsebomn̄entscuana toj̄éftsemcá.

Jábuayenama nt̄samo B̄engbe B̄etsá inama ent̄sanga tempcá t̄sabá cháftaca chamotsat̄sm̄enama

¹¹ Chcasna, B̄engbe Utabná n̄yetscangbiana ch̄e más b̄etsá yomnama jtsejuabn̄aȳese, b̄enga b̄etscá fs̄ëndama ent̄sanga jáȳenjanama, b̄enga t̄sabá fstsamama chamotsejuabnama. Pero B̄engbe B̄etsá ya end̄état̄s̄embo nt̄samo b̄enga fstm̄enama, y at̄se s̄entsobátmana t̄šengaft̄agnaca chca t̄sabá chašmotset̄at̄s̄embo, t̄šengaftange ainant̄sa juabn̄engaca, ch̄e b̄engbiana aĩñe ca cmojts̄ets̄sná juabn̄enga.

¹² B̄enga ndoñe cachiñe cab̄engbiana queftsatoyebuambná; chca fs̄éntsichamo ndayá t̄šengaftanga oyejuaȳenga b̄engbiana chašmotsemnama, chca, t̄šengaftanga jojuama chašmobenama, ch̄e uamana soȳenga tmojtsebiamn̄angbioye ndayá ent̄sanga can̄ye ent̄sabeñe tmojtson̄yacá y ndoñe chca ch̄e ent̄sabe ainaniñe tomna soȳengaca.

¹³ Er b̄enga mo ch̄e ndoñe corente juabna ndbomn̄engcá fstsam̄ese, nt̄samo báseftanga mondbetsichamcá, jtsemnana B̄engbe B̄etsá jas̄erviama; y b̄enga corente juabna bomn̄engcá fstsam̄ese, jtsemnana t̄šengaftange t̄sabiana.

¹⁴ B̄enga chca fs̄ëndm̄ena, Cristo šondábabuan̄yeshanayeca, y ch̄e soye endama b̄enga n̄ye cha fchait̄seserv̄enama, er b̄enga fs̄ëndenojuabná y puerte t̄sabá fs̄ëndétat̄s̄embo, can̄ya, Cristo, n̄yetscangbiana tojanóbana; y cha n̄yetscangbiana tojanóbana, endm̄ena mo cha tojanóbana ora, n̄yetscanga cháftaca cuafjobaná.

¹⁵ Y Cristo n̄yetscangbiana tojanóbana, ch̄e quem luarentse vida bomn̄enga ndoñe más n̄ye cach̄engbiana chamond̄etsiyenama, sinó chabiana, nda ch̄engbiana tojanóbana y tojtayanena.

¹⁶ Chíyeca, bēnga ya ndoñe ndocnabiana queftsatsjuabná ntšamo entšanga quem luarentše jtsejuabnayama monduamancá; masque ndegombre bēnga chca Cristbiana fsēnjanjuabná, mora ya ndoñe chca chabiana queftsatsjuabná.

¹⁷ Chcasna, nderado nda Crístoftaca cányiñe mo canýacá tojtsemna, Bēngbe Bētsá tojama cha mo canýe tsēm entšacá chaotsemnana. Ntšamo chē Crístbioye cabá nduabuátmana ora cha yojamncá, mora ya ndoñe quenátsmēna. Morna cha jtsejuabnayana y jtsamana inýe soyēnga y tsēm soyēnga.

¹⁸ Bēngbe Bētsá endmēna nda chca inétsama, entšanga mo tsēm entšangcá jábiamama; y cha Crístoftaca tojama bēnga tempcá tšabá cháftaca chamot-satmēnana. Y cha bēnga canýe trabajo šonjanabanýé, bēnga entšanga jábuayenama, Bēngbe Bētsá inétsama entšanga tempcá tšabá cháftaca chamot-satmēnana, y entšanga jujabuáchama chca chamotsemnana.

¹⁹ O mēntšá, Cristo tojanma sóyeca Bēngbe Bētsá yojtsama entšanga chamot-sobenama tempcá tšabá cháftaca jtsatsmēnana, y chca, chēnga chamot-sobena chēngbe bacna soyēngama perdonánēnga jtsemnana, y chē soyēngama nýetsca tescama castigánēnga jtsemnana ndoñe chaondétsamnana. Y bēnga šonjanabanýé chē trabajo, entšanga jtsabuayinayama ntšamo Bēngbe Bētsá inama entšanga tempcá tšabá cháftaca chamotsatmēnana.

²⁰ Y chca, bēnga jtsemnana Cristbe cuenta oyebuambnayēnga y amēnga, mo cach Bēngbe Bētsá bēngaftaca cmojtsaimpadancá. Cristbe cuenta cbaim-padá, bētscá šmochtsentšena Bēngbe Bētsáftaca tempcá tšabá jtsatsmēnana.

²¹ Cristo ndocna bacna soye tonjanma, pero bēngbe bacna soyēnga jabua-juánama, Bēngbe Bētsá cháftaca tojanma mo cha canýe bacna soyēnga amá cuaftsemncá, chca, bēnga Crístoftaca cányiñe mo canýacá jtsemnēse, Bēngbe Bētsabe bominýiñe tšábēnga jtsemnana chamotsobenama.

6

¹ Chcáyeca, bēnga Bēngbe Bētsáftaca cányiñe trabájayēnga quetsomñecana, cbontsaimpadana ndoñe nýe bonamente chašmondóyēngacñe chē Bēngbe Bētsá yojtsama soyēnga, tsēngaftangbiana tšabe juabna jtsebmñese.

² Er Bēngbe Bētsá chabe uabemana palabrenguiñe mēntšá tojánayana:

Chē tšabe soye jamama tšabá šonjaninýana ora, atše tcbonjanoyeuná;

chē ácbioye jatsbocama te, tcbonjanájabuache ca.

Smochjinýe. Mora entsemna chē mocna ora Bēngbe Bētsá tšabá ibojtsinýana tšabe soye jamama; mora entsemna chē mocna ora Bēngbe Bētsá yojtseboše aca jatsbocama.

³ Bēnga ndocna bacna soye queftsátama, ndayá chaoma entšanga chē tšabe noticiēnga chamotsábotema, chca, ndocná podesca chaondétsóyebuambnama bēngbe trabajuama, Cristbiana.

⁴ Inýetšá, bēngna nýetsca soyēnguiñe fsēnjaniyena mo Bēngbe Bētsabe oser-venēngcá; Bēngbe Bētsábeñe obatomancá puerte uantadēnga jtsemnēse, fst-sesufrina ora; puerte padecena soyēnguiñe bétsemna causa, ndayá jamama ndoñe fsēntsetatšēmo ora; y ainaniñe puerte ngmēnaca fstsemna ora;

⁵ Inýēnga šojtsatsetšená ora; cárceloye šojautame ora; entšanga bēngbe contra tmojtsenbouénana ora; jabuache trabájayíñe puerte uamēntšnayēnga fstsemna ora; bayté ntsamanacá fstsemna ora; y jasama tondaye fsēntsebmna ora.

6 Běngnaca fsěntsin'yan'yná Běngbe Bětsabe oservéněnga fstsměnama, puerte tšabe vídaca, ndocna bacna soye ntjamcá jtsiyeněse; Běngbe Bětsabe soyěngama corente jtsetatšěmběse; ín'yenga ntšamo šojáborlaye ora puerte uantaděnga jtsemněse; ín'yengbioye puerte bonshanánaca jtsěnyayěse; Uámana Espíritu běngbe ainaniñe jtsebmnněse; y ndegombre n'yets ainánaca n'yetscanga jtsababuányeshaněse;

7 ntšamo Běngbe Bětsabiana ndegombre yomncá jtsabuayiynayěse; Běngbe Bětsabe obenánaca ba soyěnga jtsaměse; y mo chě soldaděngcá, uayayěnga jáyějanama y chěngbiama jeněuyanama soyěnga jtsebmnnana, chě Satanásbioye jáyějanama y chabiana jeněuyanama ndayá Běngbe Bětsá šojatšatacá jtsebmnněse; y Běngbe Bětsá chca tojama, er cha tojama běnga chabe bomin'yiñe tšaběnga chamotsemnana.

8 Běnga fsěntsin'yan'yná Běngbe Bětsabe oservéněnga fstsměnama, ín'yenga běngbiama tšabe soyěnga tmojtsejuabná ora y běnga nduámaněnga jtsemnana chěnga tmojtsama ora; ín'yenga tšabe soyěnga běngbiama tmojtsoyebuambná ora y chěnga běngbiama podesca tmojtsichamo ora; běnga áingñayěnga fstsměna ca básietfanga tmojtsejuabná ora, pero běnga ntšamo ndegombre yomncá jtsóyebuambnayěse.

9 Mo nduamaněngcá běnga entšangbeñe jtsěnyayana, pero banga corente tšabá běnga šondéubuatná; běngbiama sempre resjo endměna jóbana, pero šmochjin'ye, běnga sempre vídaca chentšana jatóbocañana; běnga juatsjín'yama jobenayama, Běngbe Bětsábeyeca castigáněnga fchandbétsemna, pero n'ya jóbana ndoñe.

10 Masque ngméněnga fstsemna, ainaniñe sempre oyejuayěnga fchandbétsomñe; masque ndbomnějeměngcá, pero fchandbétsama banga Běngbe Bětsábocana bétscá chamotsebmnnama; quem luarentša soyěnga tondaye queftsátbomna, pero Běngbe Bětsabe entšanga quetsomñecana, ndegombre lempe fsěndětsóbomñe.

11 Tšěngaftangbiama, Corintoca entšanga, lempe fsěnjayana, tondaye ntjaitěmcá; n'yets ainánaca, corente cbondábabuan'yeshana.

12 Běnga puerte cbondábabuan'yeshana, pero tšěngaftangna ndoñe yapa queścátababuan'yeshana.

13 Atše cbontsaimpadana, mo can'ye taitá chabe básenga cuaft-saimpadancá, atše puerte chašmotsebobonshánama, er atše corente cbondábabuan'yeshana.

Běnga mondměna mo Běngbe Bětsabe běts yebncá

14 Crístbeñe ndošbuáchiyěngaftaca ndoñe šmatjenutaná ndayánaca jamama, er chca, chěngaftaca šmatjábocana mo chě jaárama uacnata ndoñe cachěncechata tboñsemncá. Ndegombre, chě tšabe soyěnga amá y Běngbe Bětsabe bomin'yiñe tšabia měná, n'ya tondayama cachcá ntsejuabnayana, chě Běngbe Bětsá tojamandacá ndoñe tontsamacá y bacna soyěnga amacá. Ndegombre, chě entšangbe juabna bin'yayáftaca vida bomná, n'ya tondaye ntsebmnnana chě n'ye mo ibetiñcá juabnayáftaca.

15 Crísto y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca.

16 Ndocna soyiñe cachcá ntsemnana, Běngbe Bětsabe běts yebna, chě n'ye can'ye Běngbe Bětsábioye jadórana yebna, y chě entšangbe pormana

soyënga, mo diosënga cuaftsemncá jtsadoránana soyënga; chca endmëna, er bënga, nyetscanga canyiñe Jesucristbeñe oşbuachiyëngcá, mondmëna mo Bëngbe Bëtsá Ainabe bëts yebncá, ntşamo Bëngbe Bëtsá chabe uabemana palabrënguiñe chabe entşangbiamana tojanayanca:

Chëngbeñe vida chántsebmoma y chëngbenache chántšana;

atşe chëngbe Bëtsá chántsemna

y chëngna atşe entşanga ca.

¹⁷ Chíyeca mëntsánaca Bëngbe Utabná chabe entşanga tojanëyana:

“Chë bacna soye amëngbentsana şmochjësebocana, y chëngbentsana şmochtsojuánañe;

tondaye şmattsebana, ni şmattsama ndayá Bëngbe Bëtsabe entşangbiamana ndoñe tşabá tontsemncá.

As cbochanjúbuaja,

¹⁸ y chántsemna mo canye taitacá tşëngaftangbiamana,

y tşëngaftangna mo atşe uaquiñënga y bemiangcá.

Chca séntsiçhama atşe, tşëngaftangbe Utabná, nyets obenana bomná ca” –
chiñe enduábemana.

7

¹ Chcasna, atşe bonshánënga, chca endmëna ntşamo Bëngbe Bëtsá sojaşebuachenacá. Chíyeca şontsamna, Bëngbe Bëtsabe delante nyetsca soyënguiñe tşábënga jtsemnana, bëngbe cuerpama o espíritbiamana bacna soye ndoñe más ntsamcá; y Bëngbe Bëtsá nyetscangbiamana más uamaná yomna ca mondëjuabnáyeca, lempe ntşamo tmojobenacá moçhtsiyena mo chabe entşangcá, nyetsca soyënguiñe puerte tşábënga jtsemnëse.

Ntşamo chë Corintoca entşanga juabna tmojantrócá

² Bëngbiamana şmochtsenójuabnaye tşëngaftangbe ainaniñe puerte bonshanánaca. Bënga ndocnabiamana bacna soye chibiatsma, ndocnabiamana chibiatsma más bacna entşá chaotsemnana, y ndocnábioye chibiatsingñe.

³ Atşe chca ndoñe quetsátichamo, ndoñe tşabá şmonjama ca tşëngaftangbiamana jayanama, er ntşamo ya tçbonjauyancá, atşe tşëngaftangbiamana sempre ainaniñe puerte bonshanánaca sëndbëtsenojuabnaye; y chca, mo átşeftaca canyiñcá şmochántsemna, masque chayóbana o cabá vida chaitsóbmñëse.

⁴ Atşe puerte tşabá sëndëtatşëmbo, ntşamo tşabá yomncá şmochtsamama; y tşëngaftangbiamana puerte oyejuayá sëntsemna. Lempe ntşamo tsëufrincá tsiyenama, atşe ainaniñe bëts añemo sëndëtsóbmñe y corente sëntsoyejuá.

⁵ Macedonia luaroye fsënjánashjajna orscana, ndoñe luare queftsátsebmoma jóçhnama, sinó nyetsca soyënguiñe fsëndëpadecena: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsautatjëse.

⁶ Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fçhaitsebmomana, Tito moye tonjánashjango ora.

⁷ Y cha tonjánabo ora, bënga ndoñe más añemo quefstëtsebmoma nyë cha tojánashjanguama, sinó tşëngaftanga şmojanájabuachama y ainaniñe añemo chaotsebmomana şmojanmama. Cha şonjanëyana tşëngaftanga tşa şmojánboşe bënga jányama ca, y şonjanacuntá ntşamo tşëngaftanga ngmënaca şmojanma, atşbiamana ndoñe tşabá şmonjanma causa, y

ntšamo tšëngaftangbiam a tsbe tsabiana puerte iuámanana; y quem chabe noticiëngaca, cabá más sëntsoyejuá.

⁸ Er masque tšëngaftanga tša ngménaca šmojamna chë tcbonjanëbuábiam tsbuanáchama, mora ndoñe quetsatsjuabná más tsabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatšëmbo chë tsbuanácha básefta tescama ngménënga tcmojánabiam,

⁹ mora atše puerte oyejuayá sëntsemna, ndoñe tšëngaftanga ngménënga šmojamnama, ndayá chë šmojánbomna ngménana tojanmama tšëngaftanga chašmuenójuaboma ndoñe tsabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiam chibiatsma.

¹⁰ Ntšamo Bëngbe Bëtsá tojtsebošcá ngménana bomnentšana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entšábioye juanatsana atsbocaná chaotsemnana, y cha ndocna te ntjátsjuabnayana más tsabá yojamna ndoñe chca ntjatstrócana ca. Pero ntšamo chë nÿe quem luarama enójuabnaye entšanga mondbetsebomncá ngménana bomnentšana, ndoñe ntjóbocnana juabna jatrócana; chentšana jóbocnana nÿe nÿetsca tescama castiganá jtsemnana, mo nÿetsca tescama cuañjobancá.

¹¹ Smochjinÿe ndayá tojóbocna, ntšamo Bëngbe Bëtsá inabošcá ngménana bomnentšana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnama jtsauatjámna. Chentšana, tšëngaftanga tša šmojtsanboše atše jinÿama; y šmojtsanprontana lempe jamama chca bacna soye ndoñe más chaondëtsemnana y chca tojanmábioye jacastígama. Nÿetsca chë soyënguiñe tšëngaftanga šmonjinÿanjé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnama chacmotsamnama.

¹² Y chca, atše chë tsbuanácha tcbonjanëbuábiam ora, ndoñe checbátanëbuabiam chë puerte bacna soye tojanmábeyeca, ni chë bacna soye tojanoyëngacnábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminÿanjé tšëngaftanga bëngbe tsabiam puerte šmenójuabnama.

¹³ Chíyeca bënga más añemo ainaniñe fsëntsebomna.

Pero ntsachetšá añemo fstsboimnama, masna puerte oyejuayënga fsëntsemna, er bënga fsëjinÿe Tito tša oyejuayá, er chabe ainaniñe lempe ntjëmbana yojtemna nÿetsca tšëngaftangbiam.

¹⁴ Tito tšëngaftanga jányama cabá nda ora, atše cha sënjanianana tšëngaftanga šmochjanóyeunaye chë atše tcbonjanëbuaja palabra ca; y tšëngaftanga ndoñe chešmatsma atše chaitsëuatjama chca tijánayanama. Inÿetšá, lempe ntšamo tchojauyancá ndegombre endmëna; cachcá, ntšamo bënga Titbioye fsëjanianancá ndegombre entsemna, chë tšëngaftangbiam fstsóyejuama.

¹⁵ Y mora Tito más cmontsababuánÿeshana, ntšamo cha tcmojanamëndacá ndayá tšëngaftanga šmojanmama, y ntšamo puerte respëtoca y mo uamaná cuaftsemncá chabiam jtsejuabnayëse šmojanofjama tojtenojuabó ora.

¹⁶ Atše puerte oyejuayá sëntsemna, er atše sëndëtatšëmbo tšëngaftanga ntšamo tsabá yomncá nÿetsca soyënguiñe šmochtsamama.

8

Chënga jañëmuayama, inye ošbuachiyëngbiowe nyets ainánaca jujabuáchama

¹ Y mora, Jesucristbeyeca catšátanga, bënga fsëntseboše tšëngaftanga chašmotetátšëmbo ntšamo Bëngbe Bëtsá bëtsá tšabe bendicionënga tojama Macedonia luarentše ošbuachiyëngcá enefjuanëngbiama.

² Chënga puerte tmojasufrí, y chora chca, chënga tmojinñanyë beca imošbuáchema y tša imoyejua; y masque puerte ndbomnjëmënga, chënga nyets ainánaca bëtscá tmojanacaredadó Jerusalemntša ošbuáchiyënga ndbomnjëmëngbiama.

³ Atše sëndëtatšëmbo y sentsobena jayanama chënga ndegombre tmojatšatá ntšamo tmojobenacá, y ntsachetšá imobenentšana cabá más, chënga chca imobóšeyeca.

⁴ Tša šonjánaimpadana chëngbiowe jálesenciamá ndayánaca jamama, Jerusalemoca ošbuachiyëngbiowe jujabuáchama.

⁵ Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianama lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjama ntšamo Bëngbe Bëtsá inabošcá.

⁶ Ndayá Macedoniaoca ošbuáchiyënga tmojanmama bënga añemo fsëñjanóyëngacñeyeca, bënga Tito fsëñjaimpadá chë tšabe trabajo chaopochocama, chë tšëngaftangbeñe crocénana játbanana, Jerusalemoca ošbuáchiyënga jujabuáchama, ndayá cha jamama tojanbojatšecá.

⁷ Y morna, ntšamo tšëngaftanga nyetsca soyënguñie tša šmomncá —puerte ošbuáchiyënga, beca obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jasërviamá y bëngbiowe corente ababuánñeshanënga —cachcá, mórnaca bëtscá šmochjama quem trabajuñie chë ošbuáchiyënga ndbomnjëmëngbiama, tšëngaftangbe bonshánana jtsinñanyëse.

⁸ Chca ndoñe quecbatëtsëtsná mo canye mandcá; atše sëntseboše ndayá nye tšëngaftanga jáuyanana ntšamo inyënga bëtscá tmojatrabajá chë ndbomnjëmëngbiama, tšëngaftánacá cachcá chašmotsamama; y chca, chašminñanyëma chë tšëngaftanga šmobomma bonshánana ndegombre bëtsemnama.

⁹ Er tšëngaftanga šmondëtatšëmbo ntšamo Bëngbe Utabná Jesucristo puerte tšabe soyënga bëngbiama tojamama, bëngbiowe puerte jtsababuánñeshanëse. Celoca, cha cabá quem luaroye ndabo ora, cha bëtscá inabomma; pero tšëngaftanga ababuánñeshanayeca, mo canye puerte nduamanacá tojanóbema. Y mora, Cristo mo canye nduamanacá tojóbmeyeca, Bëngbe Bëtsá puerte tšabe soyënga šojatšatá.

¹⁰ Tšëngaftangbe tšabiamá mëntšá cbabuayená, ntšamo quem soyñie šmochjamama. Chë inye uata tšëngaftanga šmonjanbojatsé, ndoñe nye chë ndbomnjëmëngbiama jacjayama, ndayá chca jamama jtsebošánaca.

¹¹ Morna, chë ndbomnjëmëngbiama trabajo šmochjapochóca; chca, ntšamo tšëngaftanga beca šmonjanprontana y jujabuáchama tša šmonjanbošcá, mórnaca cachcá chašmomama chë trabajo japochóca, ntšamo šmojobenacá jacjayëse.

¹² Er canye entśá, jatštayama ndegombre tojtsebošese, ndayá cha tojatštacá Bēngbe Bētsábioye oyejuayá jabemana, ntśamo cha tojtsobencá, y ndoñe ntśamo cha ndoñe tontsobencá.

¹³ Ndoñe quenátsmēna, tšēngaftanga puerte ujabótēnga chašmoquedá, ín̄yēngbioye atśatnaye causa, chēnga ndoñe yapa ujabótēnga chamondētsemnana.

¹⁴ Atše sēntsichamo ndayá n̄yetscanga chamotsenajabuachana, chca tojtsējaboto ora ca. Mora, chē bētsćá śmobomnentsana śmotsobena chēnga jujabuáchana, ndayá tojtsabuáshebencá jatśatayēse; y in̄ye orna, chēnga entsamna tšēngaftanga jujabuáchana chē cmojtsabuáshebena soyēngaca. Chca, n̄yetscanga jóyēngacñana ndayá tojtsējaboto ora.

¹⁵ Ntśamo Bēngbe Bētsabe uabemana palabrenguñie endayancá: Chē tśa bomnábioye ndoñe chebatanójama; y chē n̄ye batśá bomnábioye, ndoñe quebēnjatanbuášhbena ca.

Tito y chabe enutēnga

¹⁶ Bēngbe Bētsá ścuatschuá, tšēngaftanga jtsan̄yēnana Tito ainaniñe juabnēnga chaotsebomnana cha tojanmama, cachcá ntśamo bēnga fsēndbomncá.

¹⁷ Er tšēngaftangbioye chaotsama bēnga fsēnjanimpadá ora, cha oyejuayá aife ca tonjānayana choye jama; y chabiama puerte enduámama tšēngaftangbe tśabiana; chíyeca mora echanjá tšēngaftanga jányama, chca jamama cachá yobóseyeca.

¹⁸ Títoftaca, canya Jesucristbeyeca bēngbe catśata fsēntsichamná; chabiama puerte tśabá ośbuachiyēngcá enefjuanēngbenache mondoyebuambná, chabe trabajuama chē tśabe noticiēnga abuayinyayama.

¹⁹ Y ndoñe n̄ye chē soye, sinó quem luarentše ośbuachiyēngcá enefjuanēnga cha tmonjuábuayana bēngaftaca Jerusalenoye jama, y jujabuáchama chē ndbomnējémēngbiama trabajuiñe; chē trabajo endmēna bonshánana jin̄yan̄iyama; chca fsēntsama, Bēngbe Utabná jtsatschuanayama y jin̄yan̄iyama bēnga chca jujabuáchama tśa fstsbošama.

²⁰ Títoftaca cha fsēntsichamná, chca, ndocná chaondētsichamo bēnga ndoñe tśabá tifjama ca, ntśamo játbana cmojtsamniñe, chē becá juabónana játbana, ndbomnējémēnga jujabuáchama;

²¹ er bēnga fsēndama lempe ntśamo fstsobencá, ndoñe n̄ye ntśamo Bēngbe Bētsabe bominiñe tśabá yomncá jamama, ndayá ntśamo entśangbe bominiñe tśabá yomncánaca.

²² Chátaftaca in̄ya Jesucristbeyeca bēngbe catśatnaca fsēntsichamná; cha bēnga ba soyiñe šonjin̄yan̄yé cha yojtseboše bētsćá jamama, Cristo jaserviama, y mora más, er cha puerte bētsćá entsejuabná tšēngaftanga puerte tśabá śmochjamama.

²³ Y Titbiamna, cha quem trabajuiñe atśbe enutá endmēna, y atścá tšēngaftangbiama endētrabája; y chē in̄yata Jesucristbeyeca bēngbe catśatatbiamna, chata bontsemna quemuentśa ośbuachiyēngcá enefjuanēngbe ichmónata, chēngbiama chabóyebuambama; y chē bontsama soyēna, chata Cristbioye corente jtsatschuanayana.

²⁴ Chíyeca, chēn̄bioca ośbuachiyēngcá enefjuanēnga chca chamotsetatśēmhuama, chē ichmona boyabásēngbioye śmochjin̄yan̄iyē tšēngaftanga ndegombre chēnga śmojtsababuán̄yeshanama, y bēnga razón fstsobomnana tšēngaftangbiama oyejuayēnga jtsemnana.

9

Chë inÿe ošbuáchiÿëngbiana crocénana játbanama

1 Chë Jerusalenoca Bëngbe Bëtsabe entsangbiana crocénana játbanamna ndoñe quenátsiyta tšëngaftangbioye jatëbuabiannayama,

2 er atše ndegombre sëntsetatšëmbo tšëngaftanga tša šmojtseboše chca jujabuáchama. Macedonioca entsanga puerte oyejuayá sempre sëndbëtsëtsënaye, Acaya luaroquënga chë inÿe uatscana quem trabajuiñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebonnama, chëngnaca chë trabajo jamama.

3 Pero Jesucrístbeyeca quem catsátanga sëntsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe nÿe bonamente chaondëtsemnama, y ntšamo sënjanayancá tšëngaftanga chašmotseprontánama;

4 er nderado báseftanga Macedonioquënga átšeftaca tmojá y choca ndëprontánënga tcmojánÿena chë ndbomñëjëmëngbiana ujabuáchenanaca, chë soye nanjama bënga fchaitšëuatjama, er ba soye fsëñjayana bënga ndegombre fstšëtátšëmbo tšëngaftanga prontánënga šmochtsemna ca; y ndegombre, tšëngaftangbiana cabá más ouatjca nántsemna.

5 Chíyeca, tšabá šonjuínÿnana Jesucrístbeyeca quem catsátanga jáimpadana chënga atšbe natsana chamotsama tšëngaftanga jáñÿama, y chacmëjabuachama chë juabónana játbanama, ndayá tšëngaftanga tempo šmonjanašëbuachenaca. Chca, atše choca chajjášhango ora, tšëngaftangbe juabónana chaotseprontana. Chca, tšëngaftanga šmochanjínÿanÿiye ndbomñëjëmëngbiana šmojacjá, chca jamama tša šmobóšeyeca, y ndoñe nÿe batšatema jatšatayama y tšëngaftangbiana bëtscá jobuájuaama šmojtseboše.

6 Quemuiñe šmochtsenójuabnaye: Nda nÿe batsá tojajé, cach batsá chentšana josháchiñana; y nda bëtscá tojajé, cach bëtscá chentšana josháchiñana.

7 Cada ona bontsemna jajájuana ntšamo chabe ainaniñe tojajuabocá; ndoñe ngménaca o nÿe inÿyënga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana.

8 Bëngbe Bëtsá endobena jamana chábtšana nÿetsca tšabe bendicionënga y bëtscá soyënga tšëngaftanga chašmotsebonnama; chca, ntšamo nÿetsca soyënguiñe cmojtšëjbotcá sempre chašmotsóbomñama, y cabá más bëtscá chašmotsebonnama, nÿetsca tšabe obrënguiñe inÿyënga chašmëjabuachama.

9 Bëngbe Bëtsabe uabemana palabrenguiñe, mëntšá endayana chë bëtscá tojacjabíama:

Cha nÿets ainánaca ndbomñëjëmënga bëtscá jatšatayana;

y chë tšabe soyënga ntšamo cha tojtšamcá nÿets tempo jëftsemnana.

10 Bëngbe Bëtsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtšëjbotcá, y echanjama, tšëngaftanga cabá más tšabe soyënga chašmotsamama.

11 Bëngbe Bëtsá echanjama tšëngaftanga nÿetsca tšabe soyënga chašmotsebonnama, chca, tšëngaftanga nÿets ainánaca puerte inÿyëngbioye chašmatšatama, y bëngbeyeca, chë mochjóyëngacñënga Bëngbe Bëtsá chamotsatschuanama;

¹² er chë ujabuáchenana Bëngbe Bëtsabe entšanga tcojatsatá ora, ndoñe nÿe ndayá tojtséjbotcá jatšatayana, ndayá chënga Bëngbe Bëtsá chamotsatschuanámnaca jamana.

¹³ Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanjÿyana, ntšamo Cristbe tšabe noticiënguñie iuayancá tšëngaftanga šmoberdecénama, y ntšamo tšëngaftanga tšabá jamëse, nÿets ainánaca bëtscá soyënga chënga y nÿetscanga šmójatšatama.

¹⁴ Y chënga tša mochántseboše tšëngaftanga jánÿyama y tšëngaftangbiana Bëngbe Bëtsá mochántseimpadana, er cha bëtscá tšabe soyënga tšëngaftangbiana tojama.

¹⁵ jBëngbe Bëtsá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

10

Ntšamo Pablo tojánayana inÿenga chabe contra imojtsichamo ora

¹ Y mora, atše Pablo, cbochanjáimpada, tšëngaftangbioye puerte bonshanánaca jtsénÿayëse, y tšëngaftangbiana tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentšana bënoca stsemna ora ca.

² Tšëngaftanga cbontsaimpadana, tšëngaftanga jánÿyama chajjá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanÿenga imojtsejuabná, nÿe bënga tšabá jtsomñama juabnëngaca bënga ftsiyena ca.

³ Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entšanga monduamancá;

⁴ er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nÿe quem luarama enójuabnaye entšanga japéliama monduamancá, ntšamo nÿe chënga tšabá jtsomñama juabnënga yomncá. Inÿetsá, chë ndaye soyëngaca bënga fsëndépelia, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayëñjanama, puerte jabuache soyënga jayëñjanama. Mo nda canÿe uayayábioye jtsepochoancá, chë Bëngbe Bëtsabe osertánana ndoñe yonduámana ca jinÿanjÿyama soyënga ichámëngbiana,

⁵ y Bëngbe Bëtsabe osertánana jtsabotema juabnënga bomnëngbiana, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo yomandacá jtsamana.

⁶ Bënga fsëntseprontana chë Cristbiana nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

⁷ Tšëngaftanga ndayánaca jtsonÿayana nÿe ntšamo tbojtsabinÿnëcá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crístbenga fstsmënama, ntšamo cha yomncá.

⁸ Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte

chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja.

⁹ Atše ndoñe quetsátsoše tšëngaftanga chacmotsinýana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama.

¹⁰ Er báseftanga mëntsá atšbiama imojtsichamo: “Chabe tsbuanáchangañe cha šontsamënda bëtsca soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canýe ndocna obenana ndbomnacá, y ntšamo tojtsichamcá tondaye ntsámanana ca.”

¹¹ Chca entsanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjamama.

¹² Ndegombre bënga ndoñe tša añemo queftsátsobmna jayanama nýetsá uámanënga fstmëna ca, mo chë cachënga jtšenábotamnayana uamanëngcá. Chënga jtsejuabnayana y jtsichámuana tšábenga imomna ca, nýe ntšamo cachëngbeñe ínýenga imomnama jtsonýayëse; y chca tmojtsama ora, chënga juabna ndbomnënga jtsemnana.

¹³ Bënga ndoñe yapa quifchatóyebuambaye cabëngbiama, chca, tša tšábenga bënga imomna ca jtšenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanýecá, y chíñnaca entsemna ntšamo tšëngaftangbeñe Corintoca tifjamcá.

¹⁴ Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tšëngaftangaftaca ndoñe mafsënjamnëse; er bënga chë natsanënga fsënjamna tšëngaftangbiyoe jama, Cristbiama tšabe noticiënga jábuayenama.

¹⁵ Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínýengbe soye yómnyayeca. Chamna, bënga fsëntsobátmana tšëngaftanga Cristbeñe más chašmotsošbuáchema, y chca chaojtsemna ora, bënga fchayobená ba luariñe entsanga jábuayenana, ntšamo tšëngaftangbeñe fsëntsamcá.

¹⁶ Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entsángbiyoe; chca, bënga ndoñe yapa quifchatóyebuambaye ínýengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

¹⁷ Ntšamo Bëngbe Bëtsabe uabemana palabrenguiñe endayancá: “Nda tojtseboše jayanama cha canýe uámana entšá yomna ca, más tšabá cha cháuyana Bëngbe Utabná puerte uamaná endmëna ca.”

¹⁸ Er Bëngbe Bëtsá jayanana canýe entšá ndegombre tšabá tojama ca, ndoñe nýe cachá tojtšenábotamnabiama, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiama.

11

Pablo y chë ndoñe ndegombre ichmónënga

¹ Malaye atše šmëntjëuánta, atše básefta soyënga mo canýe opá tojtsoyebuambnacá stsichámëntscuana, cach atše stsenabotamná ora. Masque ntšámnaca šmochtsëuánta.

² Bëngbe Bëtsábeyeca atše tša cbondábabuanýeshana y cbondánýena, tšëngaftanga nýe cha chašmotsëstonama y ndoñe ínýengbiyoe. Er atše Cristo

sënjašbuachená tšëngaftanga sempre cha šmochtsëstonama, y sëntseboše, cha quem luaroye yochjésabo ora, chábioye tšëngaftanga júshejanguana, mo nÿe chábioye sempre ustonëngcá, ntšamo canÿe taitá chabe bembe ndocna boyabása nduabuatmá nÿe canÿe boyabásaftaca chaóbuamama jushjanguaná.

³ Mëtscuaye Evábioye tbojaningñé, y cha tbojanínÿnana puerte oser-tanabe soyënga cuafatsatsësnacá, pero ndegombre ndoñe chca yonjamna. Atše sentsauatja nderado cachcá ínÿenga tšëngaftangftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana nÿe Cristo nÿetsca soyënguiñe jtse servénama.

⁴ Atše chama sentsauatja, er ndánaca jashjanguana y Jesusbiamá tojtsabuayiná, mo cha inÿe entsá cuaftsemncá, ndoñe ntšamo bënga Jesusbiamá fsëndabuayinacá, y tojtsama tšëngaftanga chašmobená canÿe espíritu jtse bomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháumashënguama espiritcá, chë Uámana Espiritu, tšëngaftanga tšabá cha jtsëuántana. Y atše sentsauatja, tšëngaftangbe ainaniñe inÿe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentšana šmonjouencá, y chora tšëngaftanga chábioye becá tšabá jtsëuántana.

⁵ Pero atše sëntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiamá.

⁶ Atše ndoñe sënjuatsjinÿe ntšamo corente tšabá entsángaftaca jóyebuambayama; pero atše puerte tšabá sëndëtatšëmbo ntšamo stsi chámuaama. Bënga puerte tšabá nÿetsca soyënguiñe tšëngaftanga tcbonjanÿanÿé, ndegombre chca osertánana ftsbomnana.

⁷ ¿O atše ndoñe tšabá sënjama, tšabe noticiënga chbonjanabuayiná ora, tšëngaftangbentšana atšbiamá tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chao-mama?

⁸ Mo ínÿenache ošbuachiyëngcá enefjuanënga crocénana cuafjabaquécá, crocénana sënjanóyëngacñe chë ošbuachiyëngbentšana, tšëngaftanga jujabuáchama jobenayama.

⁹ Y tšëngaftangftaca sënjamna ora y ndayánaca šojanájaboto ora, atše ndoñe chechátantjañe atšbe opresidama, chca, tšëngaftangbiamá totcá ndoñe chaondëtsemnana; er chë Jesucristbeyeca catšátang Macedoniocana tmonjánashjajñënga, šmonjanatšetà ntšamo šojanbuashbencá. Chca, atše sënjamna, atšbe causa tšëngaftangbiamá totcá ndoñe chaondëtsemnana; y sempre chca chántsama.

¹⁰ Serto, Cristbe ndegombre soyënga atšbe ainaniñe sëntse bomna; chíyeca, atše corente sëntsetatšëmbo ndocná Acaya luarentše yochjama atše chayan-jbaná puerte oyejuayá jtsóyebuambnayama, chë tšabe noticiënga stsabuayiná ora; y chca chanjama atšbe opresidama chašmoyema ínÿenga ntšamncá.

¹¹ ¿Y ndáyeca chca stsama? ¿Yojtsemna ndoñe chbondábabuanÿeshana causa? Ndoñe. Bëngbe Bëtsá endëtatšëmbo tša chbondábabuanÿeshanama.

¹² Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondëtse bomna ndáyeca jatenábotamnyama, ntšamo bënga ftsamcá chënga imojtsetrabája ca.

13 Er chënga ndoñe quemátsmëna Jesucristbe ndegombre ichmónënga, mondmëna chë inyënga jáingñama imotrabájanga, y mondama entšanga chaotsinýanama chënga mo Jesucristbe ndegombre ichmónënga cuaftsemncá.

14 Y chama ndoñe šmatjenjnaná, er cach Satanásnaca endbëtsama mo canýe buashinýinýana angelcá jtsinýnama;

15 chýeca, ndoñe muatjenjnaná, chabe oservenëgnaca tmojtsamama mo tšabe entšangcá jtsinýnama. Pero chënga mochanjopochóca, ntšamo tmojtsomerecencá, ndayá tmojamama.

Ntšamo Pablo tojansufri, Cristbe ichmoná bëtsemna causa

16 Cachiñe cbochtëtëyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canýe opabioycá šmochtsëuánta, chca, átsnaca jtsenábotamnayama jobenayama.

17 Chca jayanëse, ndoñe quenátsmëna ntšamo Bëngbe Utabná endbetsamcá, ndayá canýe opá inetsamcá; atše tšabá jtsetatšëmbëse ndegombre stsebomna ndáyeca jobenayama jtsenábotamnayana.

18 Banga mondmëna, cachënga jtsenábotamnayana ndayá quem luarentše chënga tmojamama, as átsnaca chantsenábotamnaye.

19 Tšëngaftanga chë tša osertánëga, oyejuayëga opëngbioye jtsëuantánana.

20 Atše sëndëtatšëmbo tšëngaftanga chë opëngbioye šmnetšëuantánama, er tšëngaftanga šmondbëtsëuantana chë nýets tempo tšëngaftanga mo chëngbe oservenëgcá tmojtsamëndayënga, o chë tšëngaftanga bëtscá tmojtsabacanga, o tmojtsaíngñanga, o chë uámanënga tmojtsenobiamnanga tšëngaftanga mo nduamanëgcá jtsamëndayama, o chë tmojtsajuebiantšëyënga.

21 Atše chca sentsichamo masque sentsëuatja chca jayanama. Bënga fšënjamna corente obenana ndbomnënga, ntšamo tšëngaftanga bëngbiana šmojayancá, tšëngaftangaftaca chca jamama.

Inyënga, chë tšëngaftangbeñe imotrabájanga, ndayama jtsenábotamnayama tmojtsebomnëse, puerte uámana ichmónënga imomna ca jtsichámëse, átsnaca añemo sëntsebomna chama jtsenábotamnayama; chca stjayana ora, mo canýe opá tojtsoyebuambnacá sëntsoyebuambná.

22 Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahábentšana entšanga imomnama. Atšnaca Abrahábentšana entšá sëndmëna.

23 Chënga jtsichámuana Cristo imoservena ca. Atše chëngbiana cabá más tšabe oservená sëndmëna. Chca stjayana ora, mo canýe opá tojtsoyebuambnacá sëntsoyebuambná. Atše chëngbiana más tijatrabájá, más šmojutame, más šmojatsetšená y ba soye atšbiana resjo endmëna jóbanama.

24 Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamanacá.

25 Unga soye niñëbéngaca šmonjanëtsjanganja, y ndëtsbéngaca canýe šmonjanatëchënganja. Unga soye chë atše sënjánenjaquena barco tontsanënatjëmbe, y chca ora, canýe šonjanotocá, chë mar béjayoca tsachocana bënoca canýe ibeta jëftsebobinýnana y canýe te jëftsejëtanana.

26 Atše becá sënjánana, y chca atšbiana resjo enjamna bëtš fshajayënguñe y uacucuatšënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëtš pueblënguentše, entšanga ndoyenentše y mar béjayoca. Atšbiámnaca resjo enjamna chë Jesucristbeyeca

atšbiamá catšátanga imomna ca jtsichámuana, pero ndegombre chca ndoñe mondmēnēngbeñe.

²⁷ Atše bētscaá tijatrabajá empás uamēntšnayá joquédantscuana; ba soye tijachnēngo ibeta ntsamanacá y ba soye tijachnēngo shēntseca y uajuendayá; ba soye ndayá jasama ntsebmncá; tijasufri sēsnama y tondaye entšayama.

²⁸ Quem soyēngama y inye ndoñe chiyátayana soyēngama más, atše cada te natjēmbana ainánaca ndoñe queschbatsmēna, er ndoñe quetsátstatšēmo ntšamo nyetsca ošbuachiyēngcá enefjuanēnga imojtsiyenana.

²⁹ Ndánaca tšabe soye jamama tondaye añemo tontsebmomna ora, atše chabiama šochandbóngmia, mo átšnaca cach tondaye añémoca cuabndētsemncá. Nderado inyēnga tmojama ndánaca bacna soyiñe chaótsatšama, atše ndegombre puerte ngmēnaca chandbētseufrina.

³⁰ Nderado nya tojátsiyta atše ndayama jatenábotamnayama, as chē atše tondaye obenana ndbomná tsmēnama inyanynaye soyēngama chtsenábotamnyae.

³¹ Bēngbe Bētsá y Bēngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endētatsēmo atše ndegombre stsichámuama chē sēntsoyebuambná soyēnguiñe.

³² Atše Damasco bēts pueblaca sēnjamna ora, chē rey Aretasbe uabuáyana mandado tojanmandá chē pueblayo amashjuaniñe soldadēnga chamotsebojanýama, atše chašmishachama chējana stsebocana ora;

³³ pero básefta enutēnga, canye sbarēcuiñe šmontsanéstjango chē pueblentša shēconana tapiēsiñe canye atēfjnējana, y chca atše sēnjanobená chēngbe cucuatšentšana jotsbocana.

12

Ndayá Pablo mo otjenayoquécá tojáninye y ndayá Satanás tojanma, Pablo chaosufrima

¹ Atše šontsemna más jtsenábotamnayana, masque chca tcojamentšana ndocna tšabe soye ntjóbochnana. Mora chanjóyebuambaye, chē mo otjenayoquécá sēnjinye Bēngbe Bētsabe soyēngama y Bēngbe Utabná šojinýinye soyēngama.

² Atše canye entšá sēnduábuatma, cha Crísoftaca cánýiñe mo canýacá endmēna y nda bnētsana canta uata entsemna, Bēngbe Bētsá tbojanánatse, chē celoca más tsbanánoye, Bēngbe Bētsá yomnoye. Atše ndoñe quetsátstatšēmo Bēngbe Bētsá cha tbojanánatse chabe cuérpoca o nye chabe espiritiñe. ¡Nye Bēngbe Bētsá chama yotátšēmo!

³⁻⁴ Atše sēndētatsēmo Bēngbe Bētsá chē entšábioye cloye tbojanánatsama, nyetscanga oyejuayēnga imomnoye (atše ndoñe quetsátstatšēmo Bēngbe Bētsá tbojanánatse chabe cuérpoca o nye chabe espiritiñe; nye Bēngbe Bētsá chama yotátšēmo), y chentše cha tojanuena palabrēnga, ndocná bontsemna jayanama palabrēnga, chē ndayama entšangbiamá ndoñe yontselesenciana jatichámuana.

⁵ Atše chē entšá sēndmēna. Canye entšá ndáftaca chca tojopasabiamá, tšabá nántsemna chama jtsenábotamnayana; pero cach atšbiamá jtsenábotamnayana ndoñe tšabá ntsemnana, ndayá nye chē atše mo obenana ndbomncá tsmēnama inyanynaye soyēngama chantsenábotamnyae.

⁶ Y nderado jtsenábotamnayama atše stseboše, chca ora atše ndoñe stsama mo canye opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondētsejubná

ntšamo atšbiana tbojtsinŷanama o ntšamo atšbiana cha tojouenama atše más tsmēna ca.

⁷ Chiyeca, tša uamaná tsjamna ca atše ntjátsjuabnayama, atše chē Bēngbe Bētsá tša bēts soyēnga tbojaninŷinŷé entsá bētsemnayeca, Bēngbe Bētsá tojanma atše chaitsebomna ndáyeca puerte chaisufrima, mo canŷe bēts uchmašéfja atšebe cuerpiñe tojtsashacuancá, mo Satanasbe ichmona soyca, atše chaisufrima chaomama.

⁸ Unga soye Bēngbe Utabná sēnjaimpadá chca sufrínana chašotsebojuánama;

⁹ pero Bēngbe Utabná šonjauyana: “Nŷe atšbe bonshánana endmēna lempe ntšamo cmojtsajabotcá; nŷetscanga atšbe obenana más tšabá jinŷana, chē obenana ndbomna entsángbeñe atšbe obenana stjínŷanŷiye ora ca.” Chcasna, atše puerte oyejuayá chanjōyebuambaye chē atše mo obenana ndbomnacá tsmēnama inŷinŷnaye soyēngama, Cristbe obenana átšbeñe sempre chaot-somñama.

¹⁰ Chiyeca, Cristo jaserviama, oyejuayá chandbētsemna atše mo obenana ndbomnacá stsemna ora, inŷyenga šmojtsoyenguá ora, puerte padecena soyēnga causa ndayá jamama ndoñe sēntsetatšēmo ora, atše puerte chaisufrima inŷyenga tmojtsama ora y puerte tšetšena ainánaca stsemna ora; er chca soyēnguiñe stsemna ora, mo canŷa obenana ndbomnacá, chora Bēngbe Bētsá jamana atše ainaniñe bēts añemo chaitsebomnama.

Nderado ndayá Corintoca ošbuáchiyēnga muanjamama Pablo yojánauatja

¹¹ Atše chca chē soyēngama sēntsenabotamná ora sēnjoyebuambá mo canŷe opá tojtsoyebuambnacá, pero ndegombre tšēngaftanga šmonjama atše chca chaimama. Er tšēngaftanga šmondmēna ndēmuanŷyenga yojtsamna atšbiana puerte tšabá jtsichámuana, atše chca jtsenábótamnayama ndoñe chašondētsemnama. Ndegombre, atše tondayiñe más batšá uamaná quetsátsmēna, chē Jesucristbe puerte uámana ichmónēnga imomna ca juabnayēngbiana, masque atše šontsebiona mo atše tondaye cuaftsamancá.

¹² Canŷa Jesucristbe ndegombre ichmoná bētsemnama inŷinŷnaye soyēnga, tšēngaftangbeñe tonjanopasá atše choca sēnjamna ora. Chca, chē Bēngbe Bētsabe obenana inŷinŷnaye soyēnga y chē tšabe soyēnga ntšamo chora tonjanopasacá, puerte tšabá jtsinŷanŷinayana atše canŷe ndegombre ichmoná tsmēnama; y atše chca sēnjanma, padecena soyēnguiñe puerte uantado jtsemñe.

¹³ ¿Ndayá tšēngaftanga ndoñe cachcá šmonjanóyēngacñe chē inŷe luarenache ošbuachiyēngcá enefjuanēngbiana? Canŷe soye aiñe, er tšēngaftangbiye tondaye ntjotjañcá, atše ndoñe chiyatslesenciá tšēngaftanga atšbe opresidama chašmuájabuachama, ntšamo inŷe ošbuáchiyēnga aiñe sēnjalesenciá. Smochtseperdóna chca bacna soye tšēngaftangbiana tijamama.

¹⁴ Atše ya sēntseprontana, móracna unga soyama jama tšēngaftanga jánŷama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chē tšēngaftanga šmobomna soye jatsbomnana, ndayá puerte sēntseboše tšēngaftanga Cristo sempre chašmotseservénama. Atše chca jamama sēntseboše, er atše tšēngaftangbiana mo canŷe taitacá, Cristbeñe šmotsanošbuachéyeca, atše chabiama tchonjanabuayená ora; sēntsejuabná chē taitanga inétsamna crocénana jájubana básenga jtsanŷenama, y ndoñe básenga chē taitangbiana.

15 Y atše corente oyejuayá lempe ntšamo tsbomncá chanjátsataye, y atše jopochócantscuanēnaca, tšēngaftangbe tšabiana. Atše cada te más cbojsababuánŷeshanēse, ¿tšēngaftanga más batšá atše šmochtsebobonshana?

16 Ndoñe; tšēngaftanga tšabá šmondētatsēmo, atše uajabotá sēnjamma ora, atše tondaye tconjanótjañama. Masque chca, báseftanga imojtsichamo ntšamo ínŷenga ndayíñnaca jáingñama atše tstátšēmo ca, chēngbentšana crocénana josháchiñama; y atše catijama, ínŷenga jáingñase, nŷe ntšamo atše tsbošcá chamotsamama ca.

17 ¿O nderado atše tcojoaingñé, canŷa chē tšēngaftangbioye sēnjichamó chentšáftaca?

18 Tito sēnjanimpadá tšēngaftanga jánŷama chaotsama, y cháftaca sēnjanichmó chē ínŷa bēngcá Crístbeyeca bēngbe catšata. ¿Nderado Tito tcmojaingñé? ¿Ndoñe ndegombre yondmēna, Tito y atše cachcá fstsuabná y fstsoše y cachca soyēnga jtsamēse fstsiyena? Ndegombre chca endmēna.

19 Nderado tšēngaftanga šmojatsjuabná bēnga jenēuyanama chca cbojtsētsēsná ca; pero ndoñe chca quenátsmēna. Inŷetšá, bēnga Crísoftaca cánŷiñe mo canŷacá entšangcá, Bēngbe Bētsabe delante fsēntsoyebuambná, y lempe ntšamo tijayancá, Jesucrístbeyeca atšbe bonshana catšátanga, tšēngaftangbe tšabiana tijayana, Crístbeñe corente chašmotsošbuáchema y ainaniñe bēts añemo chašmotsebomnana.

20 Er atše sēntsauatja, atše jánŷama chajjá ora, ndoñe chacbondánŷena ntšamo tsbošcá, y tšēngaftanga atše ndoñe chašmondínŷena ntšamo šmojtsebošcá. Sēntsauatja nderado bacna soyēnga šmattsama: jtsepenzentserana, ínŷengaftaca yapa jtseanátsabošana, ndayánaca rábiaca jtsamana, nŷe tšēngaftangbiama tšabe soyēnga jtsebomnana jtsebošana, ínŷengbiama podesca ichámuana, uayátseayēnga jtsemnana, ínŷengbiama cachēnga más uámanēnga jtse nobiamnayana, y nŷetscanga ndoñe cachcá ntsejuabnayana. Chca chacbojánŷenēse, tšēngaftanga ndoñe quešmochátsbošena jóyēngacñana ntšamo tšēngaftanga jucácanama atše sochtsemncá.

21 Atše sēntsauatja, cachiñe jánŷama chajjá ora, atšbe Bētsá chaoma atše chaitsēuatja chca šmojtsamama, y chašotsemna puerta ngmēnaca jošachnama bá tšēngaftangbiama, ndēmuanŷenga ya bayté bacna soyēnga imojtsama y chca juabnayana ndoñe tmonjatrocá, y ndoñe tmonjajbaná chē bacna soyēnga boyabása o shembásaftaca jtsamama juabnayana, y chca soyēnga jtsamana y nŷetsca bacna soyēnga jtsamana, jenomándama ntsobencá.

13

Inŷe soyēngama jábuayenama y jádiošoftama

1 Móraca ya unga soyama tšēngaftanga jánŷama chanjá. Atše chajjáshjango ora, tojtseytēse chanjayana ntšamo báseftanga tmojamcá tšabá o ndoñe tšabá bētsemnana. Nda bacna soye ntšamo Moisesbe leyiñe endēmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnēse, chēnga chamuayanama cha ndegombre chca tojama.

2 Atše tempo sēnjanabuayená, chē tšēngaftanguentšēnga bacna soye tmojánamēnga y chē ínŷenga, atše šojtsanmēna jácastigana, chca soyēnga amana ndoñe tmonjajbananga. Mora, tšēngaftangbentšana bēnoca sēntsemna ora, cachiñe cachcá cbētētabuayená, ntšamo sēnjanamcá chē tšēngaftangaftaca

uta soyama sënjamna ora: atše cachiñe jányama chajjase, ndoñe quichatsleséncia bacna soyënga chašmotsamama y chama ntjacastigacá jatábáshejuanana.

³ Atše chca chanjama, er tsëngaftanga šmotsenguá ndayánaca tsábá chacminyánjema Cristo atšbiajana yoyebuambnama. Cristo ndoñe quenátsmëna mo canya obenana ndbomnacá, ntšamo tsëngaftangaftaca cha tojamama; ndayá chabe bëts obenana tsëngaftangbeñe bëtscá jtsinyanynayana.

⁴ Er cha tmojanrucificá mo canya obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá bëngnaca, cháftaca cányiñe mo canyacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená betsómñeyeca, tsëngaftanga jtsaservénama.

⁵ Tsëngaftanga cada ona šmochjšhénojuaboye, tsábá jtsetatšëmbuama mocna entsanga bëtsemnana, jtsetatšëmbuama aiñe o ndoñe sempre Crístbeñe puerte tašmuetošbuáchema. Smochjšhénojuaboye chca šmošbuáchema ntšamo šmojtsemnana y tsábá ínÿenga šmochjínyanÿiye. ¿Ndoñe šmondétatšëmbo Jesucristo tsëngaftangbe ainaniñe yoyenama? Ndoñesna, tsëngaftanga ndegombre ndoñe Crístbeñe ošbuáchiyënga šmontsemna.

⁶ Pero atše sëntsobátmana tsëngaftanga ndegombre chašmotsejuabnama bënga Jesucristbe ndegombre ichmónënga ftsmënema.

⁷ Y Bëngbe Bëtsá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënema tsëngaftanga jinyanÿiyama, ndayá ntšamo tsábá yomncá chašmotsamama. Nÿetscanga chca tmojtsamëse, nántsinÿna mo Cristbe ndegombre ichmónënga bënga ndoñe cuabndmëncá, er chca ndoñe tašuatátëjajoboto jinyanÿiyana ntšamo bënga bëngbe mándoca ftsmënema mo ichmonëngcá, tsëngaftanga jábuayenama. Pero chë soye tondayana šattsentsámna,

⁸ er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aiñe.

⁹ Bënga fsëntseboše ntšamo tsábá yomncá tsëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá fstsemna ora, bëngbe mando jácastigama ntjatinyanÿnacyá, y tsëngaftanga ainaniñe bëtš añémoca šmojtsemna ora y puerte tsábá šmojtsemnómánda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tsábënga, y lempe ntšamo tsëngaftanga chašmotsemna Bëngbe Bëtsá yobošcá.

¹⁰ Quem tsbuanácha cbontšëbuanbiamná tsëngaftangaftaca cabá ndoñe sëntsemna ora; chca, atše choye chajjá ora ndoñe chašondëtsemna jabuache jucácanana, mo canya puerte mandayacá, ntšamo Bëngbe Utabná šojanbemcá, tsëngaftanga jujabuáchama chábeñe corente chašmotsošbuáchema y ainaniñe bëtš añemo chašmotsebomnana, y ndoñe tsëngaftanga jatapochócama.

¹¹ Morna, Jesucristbeyeca atšbe catšátanga, tsábá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Smochjouiëna ntšamo tšbonjabuayenacá, nÿetscanga cachcá šmochtsajuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tsëngaftangbe ainaniñe tsábe ebionana chašmotsebomnana endamá, tsëngaftangaftaca echántsemna.

¹² Njetscanga smochjenuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

¹³ Njetsca quem luaroca ošbuáchiyënga cmontsacheuaná.

¹⁴ Atše, Bëngbe Bëtsá sëntseimpadana, Bëngbe Utabná Jesucristo chaoma, njetsca tšëngaftangbeñe tšabe bendicionënga chaotsemnana. Bëngbe Bëtsabe bonshánana sempre chašmotsódomñe, y Uámana Espíritu sempre chašmotsódomñe, y chë Uámana Espíritoftaca cányiñe mo canyácá chašmotsomñe.

Gálatas

Pablo Galacia luaroca ošbuáchiyënga jacheuayama

¹⁻² Atše Pablo, quem tsbuanácha sěntsabianná Jesucristbeñe ošbuáchiyëngbiana, chë Galacia luaroca ošbuachiyëngcá enefjuanëngbiana. Jesucristo y Bëngbe Bětsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bětsá ndocna entšá tbonjanichmó atše chatbe ichmonacá jabuábuayanama. Atše y chë inyënga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná.

³ Atše sěntseimpadana Bëngbe Bětsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebonnama.

⁴ Cristo chabe derecho vida jtšobomñama cachcá tojanonjá y tojanóbana, bëngbe bacna soyënguentšana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bětsá, Bëngbe Taitá endmėná yojanbošcá.

⁵ Nyětscanga nyětsca tescama Bëngbe Bětsá chamotsatschuaná. Chca chaotsemna.

Nyë canyë ndegombre buayenana soyënga Cristbiana endmėna

⁶ Atšbe ainanoca inyětsá šontsebiona, er nda nanjouena, tšëngaftanga nyë baseftayšinnye y ya juabna šmojatstrocá y Bëngbe Bětsá stětsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerte tšabia tšëngaftangaftaca enjamna. Tšëngaftanga Bëngbe Bětsá stětsoye šmojtsequedá, inyëngbe buayenana soye jouenama, y chë inyënga jtsichámuana chë buayenana soyënga chë tšabe noticiënga canmėna ca.

⁷ Ndegombre, ndoñe quenátsmėna inyë ndegombre buayenánana. Ntšamo entsopasancá měntšá entsemna: báseftanga montsama tšëngaftanga ndoñe natjėmbana ainánaca chašmotsiyenama, y becá montsama chë Cristbiana tšabe noticiënguentše, ba ndegombre soyënga jtsejuánama, inyë soyënga jacjajama.

⁸ Nderado bënga o canyë celoca ángel soyënga cmojtsabuayiyiná, y ndoñe tontsemna mo chë tšabe noticiënga bënga tempo tčbonjanabuayenacá, as chë chca tojtsamabiana ¡Bëngbe Bětsá chaoma infiernoca becá chaosufrima!

⁹ Tempo ya chca sėnjánayana; mora cachiñe šcutětayana: Nderado nda soyënga cmojtsabuayiyiná, y ndoñe tontsemna mo chë tšabe noticiënga, ntšamo tempo šmonjanoyëngacñěcá, ¡Bëngbe Bětsá chabiana chaoma infiernocu puerte chaosufrima!

¹⁰ Atše chca stjajana ora, ¿tšëngaftanga cmojtsinýana atše soyënga stsama entšanga oyejuayënga átšeftaca chamotsemnama? Ndoñe chca quenátsmėna. Atše sėndboše ndayá Bëngbe Bětsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamėse, atše ya ndoñe Cristbe canyë oservená stsemna.

Ntšamo Běngbe Bětsá Páblěbıoye tbojanchembo, Jesucristbe ichmoná jtsem-nama

¹¹ Atše sěntseboše tšěngaftanga, Jesucristbeyeca atšbe catšátanga, chašmotsetátšěmbo chě tšabe noticiěnga ntšamo sěndabuayinacá quem luarentša entšangbe juabnentsana ndoñe yondóbocanama.

¹² Ndocna entšá chě tšabe noticiěnga chešnatanbuayená, ni chešnatanbuatěmbá, ndayá cach Jesucristo šonjaninjinýe.

¹³ Tšěngaftanga šmojátatšěmbona ntšamo atše tempo tsjanamana jtšiyenana, ntšamo judiěnga Běngbe Bětsá mondadorancá atše cha sěnjanadorana ora, ntšamo atše becá tsjánamama chě ošbuachiyěngcá enefjuaněnga puerte chamosufrima, y ntšamo atše becá tsjánamama ndocná Jesucristbeñe chaondětsošbuáchema.

¹⁴ Atše inýe judiěnga cach atšcá uata bomněngbıama más sěnjánama Běngbe Bětsá adórayiñe, ntšamo judiěnga cha jadórama monduamancá, y atše nýets añémoca tša sěnjantšena jtšamama ntšamo běngbe běts taitanga básenga jabuátambama monjanamancá.

¹⁵ Pero Běngbe Bětsá atšbe tšabıama yojanjuabná, y chíyeca, atše cabá ndonýna ora, canýe běts soyama cha šojanbocacá.

¹⁶ Y cha tojánbošena ora, šonjaninjinýe ntšamo ndegombre chabe Uaquiñá yomnana, y šonjanchembo. Cha chca tojanma, atše chě tšabe noticiěnga ndoñe judiěngbeñe chayábuayenama. Y atše ndocnábıoye chiyataná ndayá jamama šojtsanměnama chašobuayenama;

¹⁷ y Jerusalenoye cach ndoñe chiyataná chě atšbıama más natsana Jesucristbe ichmóněnga imojamněngaftaca jencuéntama. Chamna, cachora Arabia uabaina luaroye sěntsanoñe, y chentšana Damasco běts puebloye sěntaná.

¹⁸ Jesucristbeñe jtsošbuáchıyama sěnjanóntša orscana, unga uatěse Jerusalenoye sěnjána Pédroftaca jencuéntama, y cháftaca nýe uta semana sěnjěftsemna.

¹⁹ Y ndocna chě Jesucristbe inýe ichmóněnga chıyáisananye; nýe Santiago aıñe, Běngbe Utabnabe catšata.

²⁰ Běngbe Bětsá šontsonýá, ntšamo tšěngaftanga cbontsětsětsnacá ndegombre bětsemnama.

²¹ Jerusalenocana sěnjěftsanbocnentsana, Siria y Cilicia luarěngoye sěnjána.

²² Pero chě tempo, chě Jesucristbeñe ošbuáchıyěnga Judea luariñe bomínýeca ndoñe quešmějatanábuatma.

²³ Nýe inýengbıoye imojtsayaunana: “Nda tempo běnga puerte chamot-sesufrınama enjanamá, mora entšanga entsabuayiná, Jesucristbeñe jtsošbuáchıyama caojtsamna ca. Y tempo cha tša enjánboše jamama entšanga Jesucristbeñe ndoñe chamondětsošbuáchema ca” —chěnga imojtsichama.

²⁴ Y entšanga Běngbe Bětsá imojtsatschuanaye, ndayá cha atšbıajana tojanmama.

2

Chě inýe ichmóněnga tmojánayana Pablo aıñe tšabá yojtsama ca

¹ Jerusalenoye sěnjána orscana bnětsana canta uatěse, cachiñe choye sěnjesaná. Bernabé šonjantjěmbambá, y Tito bëndátaftaca fsěnjěftsanbetse.

² Choye sênjána, choye jama šojamnama Bëngbe Bëtsá šonjaninÿanyëyeca. Atše nÿe chë Jesucristbeñe ošbuáchiyëngbiana uámanënga imojamnëngaftaca sênjanencuentá, inÿengaftaca ndoñe; y chë tsabe noticiëngama chë ndoñe judiëngbeñe sëndabuayinmana chënga sênjanacuntá. Chca sênjanma atše jtsetatšëmbuama, ntšamo tijanma y sênjëftsamcá ndoñe nÿe bonamente yonjamnama.

³ Pero chënga tmonjánayana atše aïñe tšabá tijanma ca, y Tito, chë átseftaca enjamná, masque Grecia luarocá enjamna, chënga ndoñe chematanmandá base bobachema chë más delicadentše tëtšená chaotsemnama, ntšamo judiënga monduamancá, Bëngbe Bëtsábenga imomnama chaotsinÿnama.

⁴ Chca tonjanopasá, masque inÿenga monjánboše Tito base bobachema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbiana bacna soyënga jamama cuafseitëmëna cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánÿiñe mo canÿacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nÿets tempo mandánënga chamotsiyenama.

⁵ Pero bënga ndocna ora fchiyátanayana aïñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nÿets tempo Jesucristbe ndegombre tšabe noticiënga chašmotsóbomñama.

⁶ Pero chë ndëmuanÿëngbiana entšanga monjánichamo chë uánatsanënga imojamna ca (ndayá chënga tempo imojamna atšbiana ndoñe quenatámana; Bëngbe Bëtsabiana nÿetscanga cachcá monduámana), chëngna tondaye chešmatanbuayená, ntšamo tempo tijanmama inÿetšá chaimama.

⁷ Masna, chënga tmonjántatšëmbona, Bëngbe Bëtsá chë tsabe noticiënga ndoñe judiënga jábuayenama trabajo atše jamama šojanëntsabuáchemá, ntšamo judiënga jábuayenama cachcá Pédrëbioye tbojanëntsabuachecá.

⁸ Er Bëngbe Bëtsá atše chabe ichmoná šonjánbema, ndoñe judiënga chabiama jábuayenama, ntšamo cachá Pédrëbioye chabe ichmoná tbojanbemcá, judiënga chabiama jábuayenama.

⁹ Santiago, Pedro y Juan, chë ošbuachiyënguentša uánatsanënga, atše canÿe bëtš trabajo chaitsebonnama Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabëbioye, jinÿinÿiyama chënga šojanënbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayinayama trabajo jamama, y chëngna judiëngbeñe.

¹⁰ Chënga nÿe šonjanaimpádaye chë ošbuáchiyënga ndbomnjëmënga Jerusalemquëngbiana jtšenójuabnayama; y atše bëtscá sentsama chënga juabuáchama.

Pablo Antioquioca Pédrëbiana tojánayana cha ndoñe tšabá tojanma ca

¹¹ Pero Pedro Antioquíá bëtš puebløye tonjánabo ora, chabe delante sênjánayana cha ndoñe tšabá tonjanma ca, er ntšamo enjanamcá ndoñe tšabá quemjatsmëna.

¹² Mëntšá tonjanopasá: Santiago básefta entšanga Antioquiøye tojanichmó, pero chënga cabá choca ndáshjajna ora, Pedro yojanamana

chë ndoñe judiënga ošbuáchiyëngaftaca jtsesayana. Pero chë entsanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnama yojánamna ca tmojánayanënga, chabiama muanjájuaboyama yojtsauatja causa.

¹³ Chë inye judiënga ošbuachiyëngnaca tmojanontsé amana cachá ntšamo Pedro yojtsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabénaca, ntšamo chënga imojtsamcá jtsonyayëse, chëngcá yojtsama, jtsamëse ntšamo cha yojántatšëmbo chca jamama ndoñe ibonjamncá.

¹⁴ Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tsabe noticiënguentsa ndegombre soyënga endmëncá. Chca sënjaninyë ora, Pédrëbioye nyëtsca ošbuáchiyëngbe delante sënjaniyana: “Aca canye judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema

¹⁵ Bënga judiënga fsëndmëna, bëngbe bëtsëtsanga judiënga monjámnyeyca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna.

¹⁶ Y bënga mondëtatšëmbo, canye entšá Jesucristbeñe tojtsošbuáchema, Bëngbe Bëtsá jamana cha chabe bominyiñe tsabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominyiñe tsábenga chamotsemnama, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canye entšá chabe bominyiñe tsabia chaotsemnama, ntšamo chë judiëngbe leyënguiñe iuayancá jamama ibomna ca cha tojamama.

¹⁷ Pero, bënga bëtscá mondënguá, Bëngbe Bëtsá chaomama bënga chabe bominyiñe tsábenga chamotsemnama, bënga Cristoftaca cányiñe mo canyáca jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnama. Pero inye entsanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe!

¹⁸ Atše, ntšamo Bëngbe Bëtsá šojaninyiñecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsočuplínana perdonánënga jtsemnama, atše stsemna mo nda ndayá cachá tojtsembema y cachiñe tojtëtsjebuanacá; y ndegombre, atše stsemna canya ntšamo ndoñe tsábá yondmëncá amá.

¹⁹ Chë judiëngbe leyëngaca atše sëndëtatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominyiñe tsabia chaitsemnama; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnama. Chë léyeca ndoñe más mandaná ntsemnama jtsebošëse, atše

cachcá chë ley sënjanonýá, Jesucristbeñe jtsošbuáchiyama; y chca, atše chait-sobena jtsiyenana Bëngbe Bëtsá jtseservénese. Atše Cristoftaca cánýiñe mo canýacá sëndmënyeca, Cristo cruciñe tojanóbana ora enjamna mo átšnaca cuafjòbancá;

²⁰ y mora entsemna mo nýe atše ya ndoñe cuaftsiyencá, Cristo becá vida atše ainaniñe entsebómnyeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonýá y atšbe tšabiama tojanóbana.

²¹ Atše ndoñe quetsatábotena ntšamo Bëngbe Bëtsá entsangbe tšabiama juabna yobomncá. Nderado Bëngbe Bëtsá tojama canýe entšá chabe bom-inýiñe tšabia chaotsemnana, ntšamo chë leyiñe jamama yomna ca iuayancá cha tojtsamama, as Cristo nýe tondayama matëñjanóbana.

3

Ley jtsobedecénese o Jesucristbeñe jtsošbuáchiyëse

¹ ¡Tšëngaftanga Galacientša entsanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana chon-janabuayiyiná, Jesucristo cruciñe tojanóbana.

² Atše sëntseboše nýe canýe soye atše chašmëyana: ¿Uámana Espiritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema?

³ ¿Ndáyeca tša ndenójuabnayënga šmomna? Bëngbe Bëtsabe Espiritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nýe entsangbe juabnëngaca jtsiyenése?

⁴ ¿Nýetsca soyënga ndayëjana tšëngaftanga šmojachnëjna, tondayama ton-joservé? Ndegombre chca ndoñe taiuatsmëna.

⁵ Bëngbe Bëtsá, chë Uámana Espiritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

⁶ Menójuabonga ntšamo Abraham tojanpasama. Bëngbe Bëtsabe uabemana palabrénguiñe mëntšá endayana: “Cha Bëngbe Bëtsabeñe yojtsošbuáchiye, y chíyeca Bëngbe Bëtsá tonjánayana cha chabe bominýiñe tšabia yojamna ca.”

⁷ Chíyeca tšëngaftanga cmontsamna jtsetatšëmbuana, Bëngbe Bëtsabeñe ošbuáchiyënga mondëmëna mo Abrahámëntšana entsangcá, cachcá ošbuáchiyana bëtsebomnana, chë chábentšana ndegombre entsangbiama más.

⁸ Bëngbe Bëtsabe uabemana palabrénguiñe endopodena jualíama, Bëngbe Bëtsá yochjanma chë ndoñe judiënga chabe bominýiñe tšábenga chamot-semnana, chábeñe tmojtsošbuáchema ca. Y Bëngbe Bëtsabe uabemana palabrénguiñe, cabá chca ndëma ora, Bëngbe Bëtsá Abrahámioye quem tšabe noticiënga tbojanbuayená: “Acbeyeca, atše chanjama nýetsca quem luar-entša entsanga tšabe bendicionënga chamotsebomnana ca.”

9 Běngbe Bětsá tojanma Abraham ba tšabe bendicioněnga chaotsebomnama, cha chábeñe yojtsošbuáchema. Chca, Běngbe Bětsá, chábeñe ošbuachiyěngbiámnaca ba tšabe soyěnga jamana, cachcá ntšamo Abrahambiana tšabe soyěnga tojanmcá.

10 Chě Běngbe Bětsá chabe bominiñe tšábenga yochjábiama ca juabnayěnga, ntšamo leyiñe jamana yomna ca iuayancá lempe tmojtsobedecénama, chěnga nýets tempo jtsiyenana jtsetatšěmběse Běngbe Bětsá nýetsca tescama chěnga yochjácastigayama. Er Běngbe Bětsabe uabemana palabrěnguiñe měntšá endayana: “Běngbe Bětsá jayanana nýetsca tescama castigo chaotsebomna ca, nda nýets tempo ndoñe tontsama nýetsca manděnga ntšamo chě leyěnguiñe iuabemancá ca.”

11 Ndegombre, puerte tšabá entsinjiněna, Běngbe Bětsá ndoñe yochanjama ndocná chabe bominiñe tšabia chaotsemnama, ntšamo chě leyiñe jamana ibomna ca iuayancá tojtsobedecénese. Chca ndegombre endměna, er Běngbe Bětsabe uabemana palabrěnguiñe měntšá endayana: “Nýe ndabiama Běngbe Bětsá tojama chabe bominiñe tšabia chaotsemnama, cha Běngbe Bětsábeñe betsošbuáchema, cha ndegombre chě nýetsca tescama yomna tšabe vida echántsebmna ca.”

12 Jtsamana ntšamo chě leyěnguiñe jamama yomna ca iuayancá, ndoñe quenátměna mo Běngbe Bětsábeñe cuaftsošbuachecá. Ntšamo Běngbe Bětsabe uabemana palabrěnguiñe endayancá: “Nda tojtsama nýetsca manděnga ntšamo chě leyěnguiñe endayancá, tšabe vida echántsebmna, nýets tempo chě leyěngaca mandaná ca.”

13 Pero, Cristo jóbanama ibojamna ca tmojánayanama, y cha běngbe causa chca chamomama chěnga tojanalesénciayeyeca, Cristo tojama běnga nýetsca tescama castigáněnga ndoñe chamondětsemnama, ntšamo chě leyiñe iuayancá ndoñe tmonsama causa. Ntšamo Běngbe Bětsabe uabemana palabrěnguiñe endayancá: “Nýetsca tescama castigo chaotsebomna, nda canýe niñěsiñe tmojajonjá chaóbanama cha ca.”

14 Chca tojopasá, Běngbe Bětsá chaomama, chě tšabe bendicioněnga ntšamo cha Abrahambioye tbojanšbuachenacá, ndoñe judiěngnaca chamotsebomnama, Cristo Jesúsbeýeca; y Jesucristbeñe ošbuachiyánaca, Běngbe Bětsá chao-mama chě Uámana Espíritu běngbe ainaniñe cháumashěngo jtsemándayama, ntšamo Běngbe Bětsá tojanašebuachenacá.

Ndocna ley quenátobena Běngbe Bětsabe šbuachenana soye jatrócama

15 Jesucristbeýeca catšátanga, chě ndayá sěntsichamcá endměna ntšamo nýets tempo entšángbeñe endbetsopasancá. Uta entšata tbojenoyeuná canýe trato jénbemama, y ntšamo tbojenšbuachenacá chaotsinynama chatbe uabaina tsbuanáchañe tbojuábeměse, ndocná inýa más ntsofenana jayanana ntšamo tbojtratacá ndoñe yontsoservena ca; y inýe soyěnga chiñe jacjayama cach ndoñe.

16 Chcasna, Běngbe Bětsá ba soye Abrahambioye tbojanšbuachená puerte tšabe bendicioněnga chabiama jamama, y chabe entšanguentšana canýabiámnaca. Y Běngbe Bětsabe uabemana palabrěnguiñe ndoñe quenátayana: “chabe entšanguentšěngbiámnaca ca”, mo Běngbe Bětsá ba entšangbiana cuaftsichamcá; sinó měntšá endayana: “acbe entšanguentšana cánýabiama ca”. Y chca entsayana, nýe canýe entšá ca; y cha endměna Cristo.

17 Atše ndayá mēntšá cbontsētsētsná: Natsana, Bēngbe Bētsá Abrahánoftaca canye trato tojánbema, y tbojaniyana “aiñe ca”, ntšamo tbojanšbuachenacá jamama. Chentšana canta patse y unga bnētsana uatēse, Bēngbe Bētsá Moisesbe cucuatšīne chē leyēnga tbojanántšaboshjona; chíyeca, chē leyēnga ndoñe ntsobena jamana chē Bēngbe Bētsá Abrahánoftaca tojánbema trato ndoñe chaondētoservénama, ni jamana ndayá Bēngbe Bētsá tojanšbuachenacá ndoñe chaondētoservénama.

18 Er ndayá Bēngbe Bētsá chabe entšanga tojatšatacá, tojtsemna chēnga ntšamo chē leyīñe jamama yomna ca iuayancá tmojtsamama, chca, chē tsetana soyēnga ya ndoñe nantsóbocana ndayá Bēngbe Bētsá jamama tojanašebuáchenantšana. Pero ba tšabe bendicionēnga Abrahambiana jamama, Bēngbe Bētsá tbojanšbuachenáyeca, Bēngbe Bētsá chē soyēnga Abrahambiana tojanma.

19 Asna, ¿ndayama chē Moisesbe ley nantsoservena? Bēngbe Bētsá chē leyēnga tojanáboshjona, ba tšabe soyēnga jamama Abrahámbyoye tbojanšbuáchenantšana baytese. Bēngbe Bētsá yojanjuabná chē ley chaoservé entšanga jinŷanŷiyama ndayá tšabá o ndoñe tšabá jamama bétsemnama, chē Abrahábentšana Uámana Entšá jashjanguēntscuana, ndabiana Bēngbe Bētsá Abrahámbyoye tbojanšbuachená ba tšabe bendicionēnga jamama. Bēngbe Bētsá angelēngaftaca chē ley Moisesbe cucuatšīne tbojanántšaboshjona, y chē entšá Moisés enjamna chē oyebuambnayá Bēngbe Bētsáftaca y entšángaftaca.

20 Uta entšata canye trato jénbemamna, jtseytana inŷe entšá chē uta entšátaftaca chaóyeuambama; pero Bēngbe Bētsá Abrahámbyoye ba tšabe soyēnga jamama tbojanšbuachená ora, nŷe canya chca tojanma, y ndoñe bonjanájaboto inŷa chabiana Abrahánoftaca chaóyeuambama.

Ndayama chē ley yomna

21 ¿Chca nántsayana, ntšamo Moisesbe leyīñe iuayancá, chē Bēngbe Bētsá tojanšbuachená soyēngama contra yomna ca? ¡Ndoñe, ndegombre ndoñe! Bēngbe Bētsá entšangbe cucuatšīne canye ley tojanáboshjona, y chē ley tojtsobena jamana entšanga ndegombre tšabe vida chamotsebmoma, as Bēngbe Bētsá nanjama entšanga chabe bominiñe tšábenga chamotsebmoma, ntšamo chē leyīñe jamama yomna ca iuayancá tmojtsamama.

22 Pero Bēngbe Bētsabe uabemana palabrēnguiñe endayana, nŷetsca quem luarentša entšanga cachēngbe bacna soyēnga jamama juabnéngaca mandánēnga imomna ca, chca, Jesucristbeñe ošbuáchiyēnga chamobenama ndayá Bēngbe Bētsá tojašbuachenacá jóyēngacñama. Y chēnga, Jesucristbeñe imojtšošbuáchema imojtsebmoma ndayá Bēngbe Bētsá tojanašebuachenacá.

23 Jesucristbeñe jtšošbuáchiyama entšanga chamobenama tempo joshjanguēntscuana, bēnga monjamna corente mandánēnga chē léyeca, y chca enjamna mo presēnga cuaftsemncá, cárceloca utámenēnga. Chē ley chca enjamna, ntšamo entšanga Jesucristbeñe muanjobenaye jtšošbuáchiyama Bēngbe Bētsá jinŷanŷiyama tempo joshjanguēntscuana.

24 Cristo jabama tempo tonjanoshjanguēntscuana, chē ley bēngbiana enjamna mo canye pamillēntša oservenacá, cha jtsamana chentša básenga chamotsamama ntšamo tšabá tojtsemncá. Chē ley chca yojamna, bēnga Crístbeñe jtšošbuáchiyama chamobenama, y chca, Bēngbe Bētsá chaoma bēnga chabe bominiñe tšábenga chamotsebmoma.

²⁵ Pero Jesucristbeñe jtsošbuáchiyama bēnga chamotsobenama mora ya tonjóshjangoyeca, chē ley ya ndoñe más quenátsmēna mo canye entšacá, ndayá tšabá yomncá bēnga chamotsamama cuaftsamcá.

²⁶ Cristo Jesúsbeñe šmojtsošbuáchema, nýetsca tšēngaftanga šmojobená Bēngbe Bētsabe básenga jtsemnana, Cristo Jesúsēftaca cánýiñe mo canýacá jtsemnēse.

²⁷ Tšēngaftanga tcmonjanēbaye, y chca, Crístoftaca cánýiñe mo canýacá šmontsemna. Y mora šmojobená mo cach Crístcá jtsemnana.

²⁸ Chíyeca, ndayá Bēngbe Bētsá tojamama, judiēnga y ndoñe judiēnga cachcanga mondmēna; nýets tempo nýe ínýabiama oservēngca y chē nýe cachēngbiama trabájayēnga cachcanga, y boyabásenga y shembásēngnaca. Nýetsca tšēngaftanga mo canýacá šmondmēna, Cristo Jesúsēftaca cánýiñe mo canýacá jtsemnēse.

²⁹ Tšēngaftanga Cristbe entšanga šmondmēnayeca, šmontsemna mo Abrahámēntšana entšanga cuaftsemncá; y chca, ntšamo Bēngbe Bētsá Abrahámioye tbojašbuachenacá, tšēngaftanga šmochanjóyēngacñe.

4

¹ Atsnaca sēntseboše jayanama, chē uaquiñá nda yochjóyēngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canye basacá tojtsemnēntscuana, ndocna derecho chē soyēnguiñe ntse-bomnana; y chca, cha jtsemnana mo canya nýets tempo nýe ínýabiama oservenacá, masque lempe ntšamo chabe taitá tbojašbuachenacá chē uaquiñabiama tojtsemna.

² Chē uaquiñá tojtsobóchantscuana, entšanga jtsemnana ndēmuanýēnga ntšamo cha tbojtsajabotcá jtsoinayana, y ínýēnga jtsejuabnayana ndayá chē taitabe soyēngaca jamama, chē uaquiñá otocana soyēngaca. Y chca jtsemnana, chē taitá tojayana tempēntscuana.

³ Mo cachcá cuaftsemncá, bēnga chē ndegombre soyēngama cabá ndosértaye ora, bēngnaca mandánēnga monjamna mo nýets tempo nýe ínýabiama oservēngcá, quem luarentše imománda espiritēngaca.

⁴ Pero Bēngbe Bētsá chabe Uaquiñá quem luaroye tbojanichmó, nýa chama tempo tojanóshjango ora; cha mo nýetsca entšangcá, canye shembásabēntšana tojanonýná, y yojoyena jtsamēse ntšamo judiēngbe leyiñe jamama ibojamna ca yojanayancá jtsamēse.

⁵ Quem luaroye chca tojánabo bēnga jabátsebacama, y chamotsobenama Bēngbe Bētsabe basengcá jtsemnana, bēnga chē tempo šonjánamna chē ley jtsobedecánana.

⁶ Y chca, tšēngaftanga ya chabe básenga šmojtsemnana jinýanýiyama, Bēngbe Bētsá chabe Uaquiñabe Espíritu tbojanichmó, nýetscangbe ainaniñe cháuamashēnguama, y chē Espíritu endama bēnga Bēngbe Bētsá chamochembo, “Atšbe Taita ca”.

⁷ Mēntšá, cada ona tšēngaftanguentšá ya ndoñe quenátsmēna mo chē nýets tempo nýe ínýabiama oservēngcá, quem luarentše imománda espiritēngaca mandánēnga, y añe Bēngbe Bētsabe basa tojoquedá. Y chabe basa tojoquedáyeca, lempe ntšamo Bēngbe Bētsá chabe básenga jatšatayama tojašbuachenacá cha echanjóyēngacñe.

⁸ Tempo, Bèngbe Bètsá ndoñe šmonjanábuatma ora, tšèngaftanga šmojamna mo nýets tempo nýe ínýabiama oservenèngcá, ndoñe ndegombre diosènga mondmèna espiriténgaca mandánènga.

⁹ Pero mora, Bèngbe Bètsábíoye šmontsábuatma ora, o tšabá jayanama, Bèngbe Bètsá cmojtšèbuatma ora, ¿ntšámoyeca tšèngaftanga cachiñe chè quem luarentše imómánda espiriténga šmojtšayaunana? Chènga ndocna obe-nana quemátsbomna, y nduámanènga mondmèna. ¿Ndáyeca tšèngaftanga šmojtseboše cachiñe jtsemnana mo chè nýets tempo nýe ínýabiama oservenèngcá, chè espiriténgaca mandánènga?

¹⁰ Tšèngaftanga tša jtsejuabnayana diènguiñe, shinýènguiñe, canýe uatentša tempènguiñe y uatènguiñe, mo uámána tempèngcá Bèngbe Bètsá tšabá jadórana, y chama bèts fiestènga jtsebomnana.

¹¹ Atše corente šontsengmena, nderado atšbe trabajo tšèngaftangbeñe ton-dayama tonjoservé.

¹² Jesucristbeyeca atšbe catšátanga, bètscá cbontsaimpadana, šmochtsiyena jtšamèse ntšamo atše sèndamcá, er átšnaca sènjóbema ntšamo tšèngaftanga ndoñe judiènga šmondmèncá. Tšèngaftanga ndocna bacna soye atše chešatsborlá.

¹³ Tšèngaftanga šmondétatšèmo, atše sènjanobená chè natsana soyama tšèngaftanga chè tšabe noticiènga jábuayenama, canýe šocana šonjanontšáshjango causa.

¹⁴ Atše canýe šocana sènjánbomna causa, tšèngaftangbiana ndoñe paselo quenjatšmèna tšèngaftangbeñe atše jofjana; pero masque chca, tšèngaftanga ndoñe chešmatanaboté, ni quešmatanáboyènja; masna, tšèngaftangbeñe tšabá šmonjanofja; šmonjanofja mo canýe ángel Bèngbe Bètsabe ichmoná šmojofjá, o cach Jesucristbioycá.

¹⁵ Ndayá chora tšèngaftangftaca enjanopasancá, puerta oyejuayènga tcmónjábiana. ¿Y mora ndayá tojopasá? Ndegombre, atše sèndétatšèmo y sèntsobena jayanama, tšèngaftanga ndaye sóynaca atšbiana mašmènjannama. Chè más uámána šmojánbomna soyènga atšbe cucuatšíne mašmènjánboshjona, y nýa mo chè bominyèngnaca masmènjánenobuchjatsèca atše jatšetayama.

¹⁶ Y morna, ¿ntšamo ndegombre yomncá cbojtšétsètsnama, atšbiana šmojtsejuabná mo tšèngaftangbe uayayá cuaftsemncá ca?

¹⁷ Chè ndoñe ndegombre soyènga buátèmbayènga montsinýinýná mo tšèngaftangbiana ndegombre tšabá chašmotsiyenama cuaftsebošcá, pero chca ndoñe quenátšmèna; ndayá jamama imojtsebošcá, tšèngaftangbiana ndoñe tšabá quenátšmèna. Chènga montseboše atšbe contra y atšbe buátèmbana soyèngama contra chašmotsemnana, chentšana tšèngaftanga chèngaftaca jtsemnana chašmotsebošama y chènga chašmotsababuánýeshanama.

¹⁸ Puerte tšabá endmèna atše y ínýenga chafstseboše tšèngaftangftaca amiguènga jtsemnana, canýe tšabe soye jamama tojtsemnèse; y sempre chca chauétsemna, tšabiana tojtsemnèse, y ndoñe nýe atše chentše tšèngaftangftaca stsemna ora.

¹⁹ Tšèngaftanga, chè atšbiana mo atšbe basengcá šmondmènénga, Jesucristbeñe chašmošbuáchemna tcbonjanèjabuácheyeca; atše cachiñe sèntsesufrina tšèngaftangbe causa, ntšamo canýe šešona jtsebomnana ora canýe shembása jtšesufrinancá; y atše chca chanjèftsesentina, ntšamo Cristo endmèncá tšèngaftangbe vidiñe ndegombre chaojtšebínýnèntscuana.

20 Malaye atše, mora tšëngaftangafatac stsemna, atše jobenayama jinjanjyama, cach tšëngaftanga jáuyanëse, ntšamo ndegombre atše tšëngaftangbiana tsësëntinana. Atše tša šontsecochëngmena tšëngaftangbiana.

Ntšamo Agar y Sáraftaca tojanopasá

21 Canye soye šmochjauyana, tšëngaftanga chë Moisesbe léyeca mandánënga jtsemnana šmojtsebošënga. ¿Ntšamo chë leyinë endayancá tacmojtšësertana?

22 Chiñe endayana, Abraham uta uaquinãta yojánabamna ca; cánñana Agárbeñe, canya chabe shembiana nyets tempo oservená; y chë inñana, cachabe shëmbeñe, Sara, y mua ndocnabiana nyets tempo oservená yonjamna.

23 Chë chabe shembiana nyets tempo oservenabe šešona, tojanonýná nye Abraham y Agar chca chaotsemnana tbojánbošenayeca; y cachabe shembe šešona tojanonýná, Bëngbe Bëtsá chë soye jamama Abrahambioye tbojanšbuachenáyeca.

24 Ntšamo Agar y Sara, y chatbe šešónataftaca tojanopasacá, bënga canye uamana soye šontsabuatambá. Ndayá chë uta shembásataftaca tojanopasacá, uta trato entsinýinýná: chë shembása Agar, chë nyets tempo nye inýabiana oservená yojamná, entsinýinýná chë trato Bëngbe Bëtsá y Israeloca entšángaftaca, chë Moisésoftaca Bëngbe Bëtsá leyënga entsangbe cucuatšinë tojanáboshjona ora. Agar básenga yojsabamna ora, chëngnaca tmojanonýná nye inýabiana nyets tempo oservëñënga jtsemnana, y chë tratentša leyinë soyëngaca mandánënga jtsemnana tmojtsebošëngnaca jtsemnana mo nye inýabiana nyets tempo oservenëngcá.

25 Ndayá Agáraftaca tojanopasacá entsinýinýná chë Sinai batsjoca tmojánbema trato, Arabia luaroca; y chë morsca bëts pueblo Jerusalénëñaca entsinýinýná, er chentša entsanga montsemna chë leyëngaca mandánënga. Ntšamo Agar y chabe básenga nye inýabiana nyets tempo oservëñënga monjamncá, Jerusalenentša entšángnaca cachcá chëngcá mondmëna, chë leyëngaca nyets tempo mandánënga bëtsemnayeca.

26 Ndayá Sáraftaca tojanopasacá, chë nye cachabiana trabájaye shembása, entsinýinýná chë trato, chë tšabe bendicionënga Abrahambiana jamama chábioye tbojanšbuachená ora. Chánaca entsinýinýná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyënananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentše joyënanama, y chca, ndegombre chënga mondmëna celocama entsanga.

27 Chë celoca Jerusalén endmëna chë ndegombre bëts pueblo chë Jesucristbeñe ošbuáchiyëngbiana, y chca endmëna mo canye shembása šešonga ndabamná y aifne chaotsabamnana Bëngbe Bëtsá cuafjamcá. Quem luarentša Jerusalén endmëna chë uamana luare chë léyeca mandánënga imomnëngbiana, y chca endmëna mo canye shembása aifne boyaftaquécá, er Bëngbe Bëtsabe uabemana palabrënguiñe chë shembásatbiana mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnana,

moyejuá y moyó oyejuayá cojtsemnana.

Chca moma, er aca, chë shembása chabe boyabiamá utšená, chë shembása boyá bomnabiamá más básenga cochántsabamna ca.

²⁸ Chcasna, Jesucristbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbyoye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca.

²⁹ Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nýe chata chca tbojánbošenayeca onýnaná; Isaac, chë Bëngbe Bëtsabe Espíritbeyeca onýnaná), mórnaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá.

³⁰ Pero, ¿ndayá Bëngbe Bëtsabe uabemana palabrenguiñe Abrahambe básabiamá iuayana? Mëntšá endayana: “Moma, chë nýets tempo nýe ínýabiamá oservená y chabe basa acbe yebnentšana chábuaisebocnama, er chë nýets tempo nýe ínýabiamá oservenabe šësona ndoñe quenátobena chabe taitabe soyënga jtsebomnama. Nýe chë propio shembe šësona aíñe, er chë shemna ndoñe nýe ínýabiamá nýets tempo oservená quenátsmëna.”

³¹ Chcasna, Jesucristbeyeca atšbe catšátanga, bënga ndoñe quemuátsmëna mo canýa nýe ínýabiamá nýets tempo oservenabe básenga cuaftsemncá, er mora ya ndoñe más quemuátsmëna chë léyeca nýets tempo mandánënga. Y aíñe montsemna mo canýe shema ndoñe nýe ínýabiamá nýets tempo oservenabe básenga cuaftsemncá, er Bëngbe Bëtsabe básenga bënga mondmëna.

5

Cristo bënga šojatsebacá

¹ Cristo bënga šojatsebacá, ndoñe más mo chë nýets tempo nýe ínýabiamá oservenëngcá chamondëtsiyenama, chë léyeca mandánënga. Nýa šmochtsentsena nýets tempo chca atšebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínýenga chácmabiamama.

² Tšabá šmochjouena. Atše Pablo cbéyana: Nderado tšëngaftanga ndoñe judiënga, šmojalesenciá ínýenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiamá tojanmcá tondayama nantsoserverna.

³ Ndëmuanýe entsánaca, nda tojalesenciá ínýenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nýetsca chë judiëngbe leyentša mandënga jtsobedecénana.

⁴ Ndëmuanýenga tšëngaftangbentšana šmojtsenguá, Bëngbe Bëtsabe bominyiñe tšábenga jtsemnama, ntšamo leyiñe jamama yomna ca iuayancá jtšamëse, tšëngaftanga chca šmojtsamama, šmojama Crístoftaca cánýiñe mo canýacá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinýanýná tšëngaftanga ndoñe šmontseboše, Bëngbe Bëtsá tšëngaftangbe tšabiamá jtsejuabnayëse, chácmatsebacana.

⁵ Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominyiñe tšábenga nýets tempo chamotsemnama. Y bënga chca mondobátmana, Jesucristbeñe ošbuáchiyana bómnyeyeca, y chë ošbuáchiyana chë Uámana Espíritbiajana bëngbyoye endobá.

⁶ Er Crístoftaca cánÿiñe mo canÿacá tmojtsemna ora, aíñe base bobachtema têtsenēnga tmojtsemna o ndoñe, tondaye ntsámanana; ndayá puerte endúamana endmēna chē Jesucristbeñe bēnga mondbomna ošbuáchiyana, y chca bétsebomnamna bēnga montsinÿanÿná ínÿyenga jtsababuánÿeshanēse.

⁷ Tsēngaftanga tsábá šmonjánama, chē jtsiyenana ntšamo Bēngbe Bētsabe ndegombre soyēnga yomncá jtsamēse. Y mora, ¿nda tojama tsēngaftanga chašmotsajbanama chē Bēngbe Bētsabe ndegombre soyēnga jtsuenanama?

⁸ Ndegombre, Bēngbe Bētsá ndoñe quenátsmēna, er cha tsēngaftanga tcmojáchembo chabe entšanga chašmotsemnama.

⁹ Ntšamo entšanga mondēntšayancá: “Nÿe base levadura jamana nÿetsana chauabochama ca”; cachcá, tsēngaftanga chē judiēngbe básefta leyēngaca mandánēnga jtsemnama šmojabojátse, šmuatjábocna nÿetsca leyēngaca mandánēnga.

¹⁰ Bēnga Bēngbe Utabnáftaca cánÿiñe mo canÿacá bétsemnayeca, atše corente séntsetatšēmo, ntšamo atšbe juabna yomncá tsēngaftāngnaca cachcá šmochtsejuabnayama; y átšnaca corente séntsetatšēmo Bēngbe Bētsá puerte bochjacastiga, nda tsēngaftanga natjēmbana ainánaca ndoñe chašmondētsiyenama tojtsamábioye, masque ndánaca cha chaotsomñe.

¹¹ Y atšbiama chanjayana, Jesucristbeyeca atšbe catšátanga, Jesucristbeñe ošbuáchiyēnga base bobachtema chēngbe más delicadentse têtsenēnga chamotsemnama entšanga cabá stsabuayiynase, entšanga ya ndoñe muantsama atše chaitesufrínama. Atše chca stsamēse, Cristo cruciñe tojanóbanama ntšamo iuayancá entšanga stsabuayiyná ora, chēnga ya ndoñe átšeftaca nanjósentiaye.

¹² Pero chē natjēmbana ainánaca ndoñe chašmondētsiyenama imojtsamēngna, ¡malaye cachēnga muanjenocbóna!

¹³ Pero tsēngaftanga, Jesucristbeyeca atšbe catšátanga, Bēngbe Bētsá tcmojáchembo chē judiēngbe léyeca ndēmandánēnga chašmotsemnama. Pero chca bétsemnama, mora ndoñe šmatjátsjuabnaye šmojtsobena jalesénciana, nÿe tsēngaftangbe cuerpēnga tsábá chamotsemnama juabnēngaca mandánēnga jatiyenama. Chamna, tsēngaftanga šmuenbobonshánayeca, nÿetscanga šmochtsenájabuachana.

¹⁴ Er ntšamo Moisesbe leyentša nÿetsca mandēnguiñe endayancá, nÿe canÿe mandiñe lempe chca entsayana. Y chē mando endmēna: “Ndēmua entšánaca cochtsebobonshana ntšamo cach aca cuenobobonshanca.”

¹⁵ Pero ínÿyenga chamotsesufrínama jtsamēse tsēngaftanga šmojtsiyenēse, mo tsátjaye bayēnga tmojtsenashantsná y tmojtsenobanacá, cuedado šmochtsebomna. Ndóñese, nÿetscanga šmatjānenpochocaye.

Ntšamo chē Bēngbe Bētsabe Espíritbeyeca vida jtsebomnama

¹⁶ Chiyeca cbochjáuyana: Nÿets tempo šmochtsiyena ntšamo chē Uámana Espíritu cmojtsamēndacá, y chca, tsēngaftanga ndoñe quešmochátama soyēnga, nÿe cach tsēngaftanga tsábá jtsomñama juabnēngaca.

¹⁷ Er ndayá bēnga, nÿe entšangbe juábncaca jamama mondbošcá, jtsemnana ndayá chē Uámana Espíritu bēnga chamomama yobošcá contra; y ndayá chē Uámana Espíritu bēnga chamomama yobošcá, jtsemnana ndayá bēnga, nÿe entšangbe juábncaca jamama imobošcá contra. Chca endmēnayeca, ntšamo chē Uámana Espíritu chašmomama yobošcá šmojtsamēse, ndoñe

quešmátobena jamana, ndayá cach tšëngaftanga, nÿe entšangbe juábnaca jamama šmojtsabošcá.

18 Tšëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyíne iuayancá játamama.

19 Ntšamo entšanga, nÿe entšangbe juábnaca tmojtsamcá, nÿetscanga paselo jtsonÿayana: chënga bacna soye boyabása o shembásaftaca jtsamana, nÿe chca soyëngama jësejuabnayana, y ndoñe ntsofenana cachënga jenomándama, chca soyënga jtsamëse.

20 Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nÿetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nÿe rábiaca jtsamana, ínÿengaftaca tša jsenaleganana, y cánÿenga ínÿengaftaca contra chamotsemnana jtsamana.

21 Nÿe jtsebošana ntšamo inÿa tojatashjachcá jtseboznama, yapa tmoyënga jtsemnana, fiestënguine ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše chabuayená, cach ntšamo tempo sënjanmca: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

22 Pero, Uámana Espíritu ainaniñe tojtsemánda ora, quem soyënga chentšana jóbocnana: nÿetscanga jtsababuánÿeshanana, jtsóyejuayana, natjëmbana ínÿengaftaca jtšiyenana, puerte uantado nÿetsca padecëniñe jtsemnana, nÿetscanga corente bonshanánaca jtšënÿayana, tšabe ainana jtseboznana, y nÿetscañe tšabe palabra bomnënga jtsemnana,

23 jtsejuabnayana chë ínÿenga mo chabiana más uámanënga cuaftsemncá, y cachá nÿetsca soyënguine jenomándama jtsofenana. Y ndocna ley quenátsmëna, chca soyënga tmojtsama entšangbiama contra cháuyanama.

24 Jesucristbenga imomnënga tmojama, chënga chë nÿe entšangbe juabnëngaca mandánënga ndoñe ntsemnana; ya ndoñe más, chë nÿe cachënga tšabá jtsonñiama bacna juabnëngaca mandánënga quemátsmëna, y chë nÿe cachëngbiama soyënga jamama bëtscá juabnëngaca cach ndoñe.

25 Bënga ndegombre tšabe vida chamotseboznama Uámana Espíritu yojsámayeca, bënga mochtsiyena jtsamëse lempe ntšamo Uámana Espíritu sojtsamëndacá.

26 Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiyama, y ndoñe nÿe mochjatsboše ntšamo inÿa tojatashjachcá jatsboznama.

6

Nÿetscanga šmochtsenájabuachana

1 Jesucristbeyeca atšbe catsátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonÿayëse. Cuedado šmochtseboznama, er ndoñese, tšëngaftánacama cmatjócochëngo cachcá soye jamama.

2 Chë soyënguine chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama

šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

³ Nderado nda tojtsejuabná, cha canye uámana entšá yomna ca, pero ndoñe chca cha tondmënese, cachá jtsenoíngñayana.

⁴ Cada ona chauenujabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemñese, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse.

⁵ Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

⁶ Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

⁷ Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.”

⁸ Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nye cachá tšabá jtsomñama bacna juabñëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espiritu tojtsemandacá jtsamëse, chë nyetsca tescama yomna tšabe vida echántsebomna.

⁹ Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canye bëts te echanjóshjango, bënga bëtscá tšabe soyënga josháchiñama, mo tša tšabe shajuana tmojashaquëcá.

¹⁰ Chíyeca, tmojtsobena ora, nyetscangbiana tšabe soyënga mochjama, pero masna chë Jesucristbeñe ošbuáchiyana bómnyeca, bëngcá Bëngbe Bëtsabe básenga imomnëngbiana.

Quem tsuanácha juapochócamá cach Pablo tojanábema

¹¹ ¡šmochjinye, tša bëts letrëngaca cach atšbe cucuátseca mora cbontsëbuabiamná!

¹² Ndëmuanyënga imojtseboše, tšëngaftanga chë ndoñe judiënga jamëndama tšëngaftangbe más delicadentse base bobachtema tëtšenënga chašmotsemnama, ntšamo judiënga monduamancá, chënga chca jtsamana nye chë judiëngaftaca tšabá joquédama. Y chca jtsamëndayana, chënga chamosufrima ínÿenga chamotsamama ndoñe mondbóseyeca; er judiënga manjanya chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayiynase.

¹³ Pero ni mo chë más delicadentse base bobachtema tëtšenënga imomnënga, ndoñe quemátama lempe ntšamo chë leyinë iuayancá. Pero chënga jtsebošana tšëngaftanga chca tëtšenënga chašmotsemna, chënga jtsenábotamnyama jobenayama, ínÿenga base bobachtema chacmatëtšama tšëngaftanga šmojalesciana.

¹⁴ Atšeftacna ndocna te chca chaondopasá. Atše nyets tempo y becá chanjëftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana

tondaye quenatámana ntšamo entšanga quem luarentše imojuabnacá y chëngbiana puerte iuámana; y ndayá atšbiana puerte iuámana, entsangbiana tondaye quenatámana; y chë causa, atše chëngbiana mo obanacá sëndmëna.

¹⁵ Chë más delicadentše base bobachtema aíñe tëtšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entsangcá bënga šojábiana, Uámana Espíritu bëngbe ainaniñe jtsemándayëse.

¹⁶ Chë quem buatëmbana sóyeca jtsamëse šmoyenëngbiana, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nÿe chëngbiana chca quetsatsimpadana, ndayá nÿetscanga Bëngbe Bëtsabe entšanga imomnëngbiámnaca.

¹⁷ Y mora, nÿe canÿe soye cbochjáuyana: morscana ndocná chaondétsama atše jasúfriama chašotsemnama; er atšbe cuerpiñe endëtinÿna ntšamo atše tijasufri, Jesusbe oservená bëtsemnama.

¹⁸ Jesucristbeyeca atšbe catšátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

Efesios

Jacheuayama

¹ Atše Pablo, Jesucristbe ichmoná Bèngbe Bètsá chca yobóseyeca, quem tsbuanácha sèntsabiamná Efeso puebloca Bèngbe Bètsabe entsanga y Cristo Jesúsbeñe ošbuáchiyènga imomnèngbiana.

² Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tšèngaftangbeñe tšabe bendicionènga chaotsemnana, y chata chaboma tšèngaftangbe ainaniñe tšabe ebionana chašmotsebonnana.

Crístoŧaca cánýiñe mo canýacá jtsemnèse, bènga mochántsebonna nyètsca tšabe soyènga, ntšamo celoca yobinýncá

³ Bèngbe Bètsá y Bèngbe Utabná Jesucristbe Taitábioye mochjètschuaye, er bènga Crístoŧaca cánýiñe mo canýacá mondmènayeca, Bèngbe Bètsá tojama bènga nyètsca tšabe soyènga chamotsebonnana, ntšamo celoca yobinýncá.

⁴ Bèngbe Bètsá bènga šojanabacacá Crístoŧaca cánýiñe mo canýacá chamotsemnana, cabá quem luare cha ndama orscana, bènga chabe delante chamotsemnana chabe entsanga, bacna soyèngama perdonánènga y chabe oservénènga, y bènga ainaniñe bacna soye ndbomnènga imomna ca cha cháuyanama.

⁵ Bèngbe Bètsá šuababuánýeshanayeca, tempo cha tojanjuabó y tojánbošena bènga mo cachabe basengcá jábiamama, chè Jesucristo yochjanma sóyeca.

⁶ Chíyeca bènga Bèngbe Bètsábioye sempre jtsatschuanayana, cha bèngbe tšabiana juabna yobómnayeca, ndayá chabe Bonshana Uaquíñáftaca Bèngbe tšabiana cha tojama.

⁷ Bèngbe Bètsá puerte bonshanánaca bèngbe tšabiana bètscá jojuabnáyeca, cha bèngbe bacna soyèngama šojtsaperdoná y šojatsebacá, er Jesús bèngbiana tojanóbana, chabe buiñe juabuáshanèse.

⁸ Bèngbe Bètsá tojama bènga nyèts osertánana y becá juabna chamotsebonnana, cha becá bonshanánaca bèngbe tšabiana juabna yobómnayeca,

⁹ y tojama bènga chamotsetatšèmbuama ndayá jamama cha yobošcá, ndayá cachá tempscana yojanjuabná jamama, pero entsanga chca ndoñe tonjaninýanyé. Ndayá jamama Bèngbe Bètsá tempo yojanjuabnacá, ndayá cha tojama bènga chamotsetatšèmbuama, cachá yojanjuabná chca jamama.

¹⁰ Ndayá jamama Bèngbe Bètsá jojuabnacá, lempe echanjochnèngo nýa chama tempo chajóshjango ora, y quem Bèngbe Bètsabe juabna endmèna jamana, lempe ntšamo cha tojamcá celoca y quem luarentse, Cristo chamotsebonna nyètsca chè soyènguiñe mo chè mandayaca.

¹¹ Bèngbe Bètsá sempre jamana nyètsca soyènga ntšamo tojtsejuabnacá y tojtsebošcá. Y Bèngbe Bètsá bènga šojabacacá, ntšamo cabá chca ndama ora yojanjuabnacá; chca, bènga Crístoŧaca cánýiñe mo canýacá jtsemnèse, bènga chamóyèngacñama ndayá Bèngbe Bètsá chabe entsanga jatšatayama tojašebuachená, mo chèngbe otocana soycá.

¹² Y Bèngbe Bètsá chca tojama, bènga chè Crístbeñe natsana imojtsanošbuachenga, cha bènga šochjánatsebacama, tšabe soyènga jtsamèse chamotsiyenama, chca, chè inye entsanga Bèngbe Bètsabe obenanama cha chamotsatschuanama.

13 Y tsëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tsëngaftanga Crístoftaca cánýiñe mo canýacá chašmotsemnana y tcmojanainýnana tsëngaftanga chabe entšanga bëtsemnana. Bëngbe Bëtsá chca tojanma, Uámana Espíritu tsëngaftange ainaniñe cháumashënguama tojanma ora, ntšamo tempo cha tojanašebuachenacá.

14 Bënga chë Uámana Espíritu bëngbe ainaniñe mondbómnyeyca, corente mondetátšëmbo ndayá Bëngbe Bëtsá chabe entšanga tojašebuachenacá bënga mochjójyëngacñama. Uámana Espíritbeyca bënga montsobena chca puerte tsabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatsatayama tempo chaóshjanguëntscuana; y lempe ntšamo cha bëngbiana inëtšamama, nyetscanga cha mochántatschuanaye, cha bëtšá y obená bëtsemnana.

Pablo Bëngbe Bëtsábioye tbojanimpadá, ošbuáchiyënga osertánana chamotse-bomnana.

15-16 Chcáyeca, atšna, Bëngbe Bëtsá tsëngaftangbiana stseimpadana ora, sempre cha sëndbëtsatschuanaye, er atše sënjátatšëmbona ntšamo tsëngaftanga Bëngbe Utabná Jesúsbeñe tša šmojtsošbuáchema, y ntšamo tsëngaftanga nyetsca chë Bëngbe Bëtsábenga imomnënga šmababuánýeshanama.

17 Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmëjabuachama, corente osertánënga chašmotsemnana, y chacmínýanýé nda Bëngbe Bëtsá yomnana, chca, más tsabá cha chašmotsábuatmama.

18 Atše, Bëngbe Bëtsá sëntseimpadana, cha chaoma tsëngaftanga Bëngbe Bëtsabe soyënguiñe corente osertánana chašmotse-bomnana, tsëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tsëngaftanga šmojtsobatmancá cha cmochjátatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tsëngaftángnaca chašmotsetátšëmbo tša bëtšcá y bëtš soyënga yomna ndayá chabe entšanga cha tojašebuachenacá;

19 y chašmotsetátšëmbo tša bëtš soye y ndocna te ntjëtšopochócama chabe obenana yomnana, chë ndayá bëngbe ainaniñe tsabe soyënga yojtsama, bënga chë Crístbeñe ošbuáchiyëngbeñe. Cach quem puerte bëtš obenana endmëna,

20 ndáyeca Bëngbe Bëtsá tojanma Cristo cháuatayenama, y chabe catsbioica celoca tbojtantbema chaotsemándama.

21 Choca Cristo nyetsca soyënguiñe yojtsemánda, y más bëtšcá obenana y mando yojtse-bomna nyetsca mándayëngbiana, chë mando y obenana bomnëngbiana, y cha yomna más uamaná y bëtšá nyetsca chë entšangbiana mo bëtšëtsangcá utabnëngbiana, chëngbe uabaina respétoca jtsichámëse. Cristo puerte bëtšá endmëna lempe ntšamo quem luarentše yobínýnana y Cristo yochjésabentšana yochtsebinýnámna.

22 Bëngbe Bëtsá tojana Cristo nyetsca soyënguiñe chaotsemándama, y tbojanábuayana nyetsca soyënguiñe chaotsemándama, chábeñe ošbuáchiyëngbe tsábiana.

23 Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguñnaca, y lempe cha endëmánda.

2

Atsebácanēnga mondmēna, Bēngbe Bětsá šuababuán̄yeshanayeca

¹ Tempo tšēngaftanga Bēngbe Bětsabíama mo obanēngcá šmonjamna, er tšēngaftanga šmonjaníyena, ntšamo Bēngbe Bětsá yomandacá ntsamcá, y bětscá bacna soyēnga šmojánama.

² Chca, tšēngaftanga šmonjánama mo chē n̄ye quem luarama enójuabnayēnga monduamancá, y šmonjanēyeanana Satanás, chē bacna espíritēnga obenana bomnēnga y quem luarentša tsbanánoca imomnēngbe amēndayá, chē Bēngbe Bětsábíoye ndēyeananēngbe ainaniñe yománda espíritu.

³ Tempo bēnga n̄yetscanga fsēnjaniyena ntšamo tšēngaftanga šmonjaníyencá. Bēnga soyēnga fsēnjánama, n̄ye ntšamo ftsjanbošcá n̄ye bēngbe cuerpēngbe tšabíama, y n̄ye ntšamo bēngbe juabna enjamncá bacna soyēnga jamama. Bēnga fsēnjaniyena soyēnga jtsamēse mo chē Bēngbe Bětsábíoye nduabuatma entšanga mondbetsamcá; chē causa bēnga fsēnjanomerecena jtsebomnana chē Bēngbe Bětsabe uabouana castigo, cachcá chē Bēngbe Bětsábíoye nduabu-atmēngcá.

⁴ Pero Bēngbe Bětsá sempre tša lastemado entšangbíama endmēna y sempre corente bēnga šondábabuan̄yeshana;

⁵ y chíyeca, bēnga cabá mo obanēngcá chabíama fsēnjamna ora, bacna soyēnga fsēnjánama causa, chora cha tojanma bēnga tšabe vida chamotse-bomnana y Crísoftaca cán̄yiñe mo can̄yacá chamotsemnana. Bēngbe Bětsá tšēngaftangbe tšabíama juabna bóm̄nayeca, bacna soyēnguentšana tcmojatse-bacá.

⁶ Bēnga Jesucrísoftaca cán̄yiñe mo can̄yacá bétsemnayeca, Cristo Jesús cháuatayenama Bēngbe Bětsá tojanma ora y celoca tbojtantbema ora, enjamna mo bēngnaca chámuatayenama Bēngbe Bětsá cuafjamcá y Cristo Jesúseftaca celoca cuafatbiamcá.

⁷ Chca enjamna, Bēngbe Bětsá entšanga cháuin̄yan̄yema n̄yetsca joshjanguama tempēnguiñe, ntšamo cha bēngbe tšabíama bětscá juabna bétsebomnana, cha Cristo Jesúseftaca bēngbíoye tšabe juábnaca šojánan̄ye ora.

⁸ Er Bēngbe Bětsá tšēngaftangbíama tšabe juabna yojánbomnayeca, tcmojatsebacá, Jesucrístbeñe šmojtsanošbuáchema; pero atsebácanēnga šmondmēna, ndoñe cach tšēngaftanga ndayá šmojánmayeca, ndayá atsbocaná jtsemnana endmēna Bēngbe Bětsabe can̄ye tšetana soye.

⁹ Atsebácanēnga šmondmēna, ndoñe cach tšēngaftanga ndayá šmojánmayeca; chíyeca ndocná quenátobena jtsenábotamnayana atsbocaná yojtsemnana.

¹⁰ Bēngbe Bětsá šojtabíama ntšamo bēnga mondmēncá, y Cristo Jesúseftaca cán̄yiñe mo can̄yacá bétsemnayeca, Bēngbe Bětsá mo tsmēma entšangcá cuaf-tsatsmēncá šojtabíama, tšabe soyēnga jtsamēse jtsiyenama. Y ndayá bēnga tšabá mondamcá, Bēngbe Bětsá tempo tojanprontá bēnga chamotsamama.

Crístbeyeca tempcá tšabá Bēngbe Bětsáftaca jtsatsmēnana

¹¹ Tšēngaftanga ndoñe judiēnga, ndēmuan̄yēnga judiēnga cmondubuatma “chē más delicadentse base bobachtema ndētētšenēnga ca”, chēngcá uin̄yanánēnga ndoñe šmondmēnana; chēnga cachēnga jtsenábobuatmana “chē más delicadentse base bobachtema tētšenēnga ca”, y cachēngbe cuerpēnguiñe chca jtsamana. Mēntšá, tšēngaftanga chē ndoñe judiēnga,

¹² šmochjenójuaboye ntšamo tempo šmojamnana, Crístbeñe cabá ndošbuáchiye ora. Chora, tšēngaftanga Cristo ndoñe šmonjánbomna, Israeloca

entsangbiamá stěssoye šmonjanquedana, y ndoñe šmonjantátšēmo lempe ntšamo Bēngbe Bětsá chabe entsanga tojanašebuachenacá. Tšēngaftanga quem luarentše šmonjaniená ndocnábeñe ntsobatmancá y Bēngbe Bětsá ntšabuatmá.

¹³ Pero mora tšēngaftanga Cristo Jesúseftaca cánýiñe mo canýacá šmontsemna, chē tempo Bēngbe Bětsá ndoñe šmonjanábuatmēnga, y cha tojama chábioye chašmotsábuatmama; y chca yomna, er Jesús, chabe buiñe juabuáshanēse, tšēngaftangbiamá tojanóbana.

¹⁴ Cach Cristo yojtsama bēnga tempcá tšabá Bēngbe Bětsáftaca chamotsemnama. Cha tojama judiēnga y ndoñe judiēnga nyětscanga mo cachca entsangcá chamotsemnama, mo nda canýe tapiēše tojtsendbemcá, chē ndayēseca canýe luarentša entsanga tmojtsenjáta, chēnga enáyaye causa.

¹⁵ Cristo chēnga mo cachca entsangcá tojábiama, judiēngbe leyēnga y mandēnga ndocna obenana chamondětsebonnama jamēse. Chca tojama, cha jóbanēse, chē útoica entsanga mo nyē canýe tsmēma entsangcá jábiamama, cháftaca cánýiñe mo canýacá jtsemnēse. Cha chca tojanma chēnga nyětscanga tšabá chamotsiyenama;

¹⁶ y Cristo cruciñe tojanóbana yeca, cha tojanma chē útoica entsanga enáyayana chamotsajbanama, y tojanma chē útoica entsanga mo canýe entsangcá chamotsemnama, chēnga tempcá tšabá Bēngbe Bětsáftaca chamotsatsmēnama.

¹⁷ Cristo quem luaroye tojánabo tšabe noticiēnga jabábuayenama, tempcá tšabá Bēngbe Bětsáftaca jtsatsmēnama. Cha quem tšabe noticiēnga tojanabuayená tšēngaftanga chē ndoñe judiēngbioye, chē Bēngbe Bětsá ndoñe šmonjanábuatmēnga, y chē judiēngbioynaca, chē Bēngbe Bětsá imonábuatmēnga.

¹⁸ Er chábeyeca, canýányēnga y ínýēnga montsobena chē Taitábioye jobéconana, er bēnga nyětscanga cachca espíritu bēngbe ainaniñe mondbomna, chē Uámana Espíritu.

¹⁹ Chýyeca tšēngaftanga, Bēngbe Bětsabe entsanguentše ndoñe quešmátsmēna mo inýe luarocana ashjajnēngcá, y ni mo cachēngbe yebnentše ndoyenēngcá, tondayama derecho ndobomnēnga. Inyětsá endmēna; tšēngaftanga derecho šmondbomna cachcá ntšamo Bēngbe Bětsabe entsanga mondbomncá, y Bēngbe Bětsabe básēnga šmondmēna.

²⁰ Jesucristo y chabe entsanga mondmēna mo canýe jebna yebncá. Jesucristbe ichmónēnga y chē Bēngbe Bětsabe juabna oyebuambnyēnga mondmēna mo chē ndětšbēnga ndayiñe chē yebna tojtsēcuatjoncá; tšēngaftanga ošbuáchiyēnga šmondmēna chē jebna yebnentša soyēngcá, y cach Jesucristo mo chē más uámana luarentše uashacuana ndětšbecá.

²¹ Quem más uámana luarentše uashacuana ndětšbeñe, nyětsca chē běts yebnentša soyēnga jtsēcuatjonana, y tsbanánoye más tmojatsjebēse, chē běts yebnentše tsēm jebna sóynaca chiñe jtsēcuatjonana. Cachcá Cristo, mo chē más uámana luarentše uashacuana ndětšbecá, jtsamana nyětsca chábēñe ošbuáchiyēnga cháftaca cánýiñe mo canýacá chamotsemnama, y inýēngnaca cachcá chamotsemnama. Y nyětsca ošbuáchiyēnga Cristoftaca cánýiñe mo canýacá tmojtsemma ora, chēnga jtsemnana mo Bēngbe Útabnabiamá canýe běts yebna jebncá, chábioye jtsatschuanayama.

²² Y tšēngaftanga Efesoca ošbuachiyēngbiámna Cristo entsama, chē inýe chábēñe ošbuáchiyēngaftaca mo canýe entsangcá chašmotsemnama. Y chē

Uámana Espíritu bēngbe ainaniñe vojtsiyénayeca, bēnga nyetscanga cánýiñe mondmēna, mo canýe bēts yebncá ndayentše Bēngbe Bētsá yoyena.

3

Pablo Jesucristbe trabajo yojanbonýena, chē ndoñe judiēngbeñe jamama

¹ Chca, atše Pablo utamená sēntsemna, Cristo Jesusbiana soyēnga entšanga abuayiyenaye causa, tšēngaftanga chē ndoñe judiēngbe tšabiama.

² Er tšēngaftanga ya cmontsamna jtsetatšēmbuama, Bēngbe Bētsá tšēngaftangbe tšabiama juabna yobomnama; y chca, chē trabajo atše šojabonyé, tšēngaftangbe tšabiama jamama.

³ Tšēngaftángnaca cmontsamna jtsetatšēmbuama ndayá Bēngbe Bētsá šojinýinyé, ntšamo cha jamama tempo tojanjuabocá, pero entšanga chca ndoñe tonjaninýanyé, y chē soyama ya batšatema tbonjubuábiama.

⁴ Chašmojualiá ora, šmochanjátatšēmbona Cristbe soyēnga šosertánama, chē tempo ndocná yonjanábuatma soyēnga,

⁵ chē tempo Bēngbe Bētsá ndocnábiowe tbonjaninýinyé soyēnga; pero mora cha tojinýanyé, Jesucristbe ichmónēnga nýe Bēngbe Bētsabiama oservēngbiowe y Bēngbe Bētsabe juabna oyebuambnayēngbiowe; y cha chca tojama chabe Uámana Espíritoftaca.

⁶ Ndayá tempo Bēngbe Bētsá ndoñe tonjaninýanyecá mēntšá endmēna: chē ndoñe judiēnga Jesucristbe tšabe noticiēnguiñe chamojtsošbuaché ora, cachcá ntšamo chē judiēnga ošbuáchiyēnga Bēngbe Bētsábiocana mochjoshachiñcá, chēngnaca chábiocana mo otocancá chē soye mochanjóyēngacñe. Chēnga mo cach judiēnga ošbuachiyēngcá, Cristo mondbomna mo chēngbe mandayacá. Y chca Cristo endmēna mo bestšašcá y chēnga nyetscanga mondmēna mo cachabe cuerpentša soyēngcá. Chē ndoñe judiēnga ošbuáchiyēnga mochanjóyēngacñe lempe ntšamo Bēngbe Bētsá chē judiēnga ošbuáchiyēnga tojašebuachenacá. Chca echántsemna chē ndoñe judiēngaftaca, chēnga Cristo Jesúsēftaca cánýiñe mo canýacá bétsemnayeca.

⁷ Masque ndoñe šonjanomerecena, mo ndayá cuafjatšetacá, Bēngbe Bētsá šonjanábuayana cha jtseservénama, tšabe noticiēnga entšanga jtsabuayiyenayēse; y cha átšēftaca chca tojanma chabe obenánaca.

⁸ Atše nyetsca chē Bēngbe Bētsabe entšanguentše sēndmēna chē más nduamaná; pero Bēngbe Bētsá bēts pavor šontsebema, šonjalesenciá chē Cristbe bētscá tšabe soyēnga chē ndoñe judiēnga jábuayenama. Chē Cristbe soyēnga tša bētscá endmēna, y chca, quenátopodena chē soyēnguentšana lempe jtsabuamana.

⁹ Y chē trabajo šonjabonyé jamama, nyetscanga botamana jinýama chamot-sobenama ndayá Bēngbe Bētsá yochjama, ndayá cachá, chē nyetsca soyēnga tojamá, tempscana yojanjuabnacá. Mēntscónama Bēngbe Bētsá chē soye ndocnábiowe tbonjinýinyé, pero mora aínē.

¹⁰ Chca, Cristbeñe ošbuachiyēngbeyeca, mora chē celoca mándayēnga y obenana bomnēnga, chamobená juabuátmanana nyets osertánana ntšamo Bēngbe Bētsá yobomncá.

¹¹ Bēngbe Bētsá chca tojama, ntšamo cachá yojanjuabnacá nyetsca tescama jamama, y chca cha tojama Jesucristoftaca, Bēngbe Utabná.

¹² Bēnga Crístoftaca cánýiñe mo canýacá mondmēna, y chábeñe mondošbuachéyeca, bēnga montsobena Bēngbe Bētsábiowe jobéconama tondayama ntjatauatjácá, y corente jtsetatšēmbēse cha ndoñe chašondubatema.

13 Chýyeca atše cbontsaimpadana ndoñe chašmondětsajbaná ainaniñe añemo bomnana, atše sěntsesufrina causa, er chě tšěngaftangbe tšabiama tsěsufrinentšana, tšěngaftangbiana tšabe soyěnga endóbocana.

Cristbe bonshánana

14-15 Y chca, Běngbe Bětsá, chě Taitá, ndábentšana nyětsca pamíllanga celoca y quem luarentše uabaina imóyěngacañe, chabe delante joshaměntšase,

16 sěntseimpadana, chabe bětscá uámana bomnánaca chaoma, tšěngaftanga ainaniñe obenana y běts añemo chašmotsebomnana, chabe Espíritbeyeca,

17 y tšěngaftanga Cristbeñe jtsošbuáchiyěse, mua tšěngaftangbe ainaniñe chaotsiyenama. Běngbe Bětsánaca sěntseimpadana, cha y ín'yenga nyěts ainánaca jtsababuán'yeshaněse,

18 tšěngaftanga y nyětsca Běngbe Bětsabe entšágnaca tšěngaftangaftaca, chašmotsobena josértama Cristbe bonshánana běngbiana tša bětscá yomnana. Nderado nda tojontsé chabe bonshánana jatšěmbonana mo canye soye cuaftsemncá, cha ndocna te nanjobenaye jtsetatšěmbuana těntšoye ndayěntscoca yomna y nyanějoye ndayěntscoca, jashenoye ndayěntscóñe y tsbanánoye ndayěntscóñe yomna.

19 Atše sěntseimpadana tšěngaftanga chašmobená chě bonshánana juabuátmanana (chě bonshánana puerta bětscá endmėna causa, bėnga ndocna te quemochatobenaye josértama ntšamo chě soye lempe yomnana). Pero sěntseboše, tšěngaftangbe ainaniñe nye Běngbe Bětsabe soyěnga chaotsemna y tšěngaftanga chašmotsiyena jtsaměse, ntšamo tšěngaftanga chašmotsamama Běngbe Bětsá yojuabnacá.

20 Y mora, nyětscanga Běngbe Bětsá chamotsatschuaná. Cha obenana yobomna ntšamo bėnga tmojtsotjanañe o tmojtsejuabnama más soyěnga jamama, chabe puerta běts obenánaca; y chě obenana bėngbe ainaniñe yojtsemánda y yojtsama bėnga ainaniñe sempre ošbuáchiyana chamotsebomnana.

21 ¡Entšanga Běngbe Bětsá chamotsatschuaná nyěts tempo y nyětsca tescama, ndayá Cristbeñe ošbuáchiyěnga tmojtsamama y cach Cristo tojamámnaca! Chca chaotsemna.

4

Uámana Espíritbeyeca bėnga cán'yíñe mo can'yácá jtsemnana

1 As, atše chě cárceloye utamená, Běngbe Utabnabiama trabájaye causa, tšěngaftanga cbontsaimpadana, ndėmuan'yenga Běngbe Bětsá tmojáchembo chabe entšanga chašmotsemnana, sempre chašmotsiyena mo chě entšangcá ndėmuan'yenga Běngbe Bětsá cach soyama tojánachembo y chca imomerecena.

2 Cada ona chamotsenojuabná mo chě ín'yenga chabiama más uámanėnga tmojtsemncá, y nyětscángbioye puerta bonshanánaca šmochtsobátmana, y bětscá bonshánana jtsebomněse šmochtsenėuantana;

3 sempre šmochtsejuabnaye y šmochtsentšena tšěngaftanga nyěts tempo cán'yíñe mo can'yácá chašmotsemnana, nyětsca tšěngaftanga natjėmbana jtsemněse. Y tšěngaftanga šmotsobena cán'yíñe mo can'yácá jtsemnana chě Uámana Espíritbeyeca.

4 Bėnga Jesucristbeñe ošbuáchiyěnga bėtsemnayeca mondmėna mo cach cuerpentšěngcá, chě Cristbe cuerpo, y cachca Espírítu bėnga nyětscanga ainaniñe

mondbomna. Bëngbe Bëtsá sojáchembo, bënga chábeñe jtsošbuáchiyëse, nyëtscanga cachcá sochjátsatayama chamotsobátmanama.

⁵ Bënga nyëtscanga cach Utabná mondbomna, cachca ošbuáchiyana Jesucristbeñe mondbomna, y bënga nyëtscanga uabáñënga mondmëna chca betsošbuáchiyama.

⁶ Bënga ošbuáchiyënga nyëtscangbiamá cach Bëngbe Bëtsá y Taitá endmëna. Cha bëngbe amëndayá endmëna, chabe obenana nyëtscangbeñe jtsinýnana, y nyëtsca bëngbe ainaniñe chabe Espíritu endmëna.

⁷ Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama.

⁸ Chíyeca, Bëngbe Bëtsabe uabemana palabrënguiñe Jesucristbiamá mëntšá endayana:

Cha celoye tontantsjuá, y cháftaca tonjanëyamba nyëtsca chabe uayayënga, chë tojánayëñjananga,

y chabe entsángbioye obenana tonjanatšatá, tšabe soyënga jamama ca.

⁹ ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca.

¹⁰ Y Cristo, chë tojanastjanguá, cachá endmëna nda celoca chë más tsbanánye tojtantsjuá; chca, canýe ora nyétscañe cha chaotsemnama.

¹¹ Y cachá, chë tšabe soyënga jamama obenana tojanatšatá ora, tojanma chábeñe ošbuáchiyënguentše chamotsemna ínýengna chabe ichmónënga, ínýengna Bëngbe Bëtsabe juabna oyebuambnayënga, ínýengna tšabe noticiënga Cristbiamá abuayinayënga, y ínýengna ošbuáchiyënga anýenënga y Bëngbe Bëtsabe soyëngama abuátambayënga.

¹² Cristo tojanabacacangna chabe entsángbioye mochjanëjabuache, cha tojanabanyé trabajo chënga chamotsamama, y nyëtsca ošbuáchiyënga, chë nyëtscanga cánýiñe mondmëna mo Cristbe cuerpcá, cada te más ošbuáchiyana y bonshánana chamotsebonnama,

¹³ bënga nyëtscanga chamobenantscuana cachca ošbuáchiyana Jesucristbeñe jtsebonnama, y Bëngbe Bëtsabe Uaquiñabiamá nyëtscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsétsanga bëtscá juabna bomnëngcá,

¹⁴ y ndoñe nýe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nýe mo basengcá quemochátsmëna, ndëmuanýënga paselo jáingñama yomna. Mo canýe barquëshá nýe ndaye bínýiacnaca tojtsëyambancá, básefta entsanga nýe ndaye buatëmbana soye tmojatüencá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nýe ndaye tmojatüena tsëm sóyeca, ínýengbioye áingñayënga. Chënga becá montsetátšëmo ntšamo entsanga jáingñana, y montseboše chë montsabuatambá bostero soyënga bënga jtseyeunanama.

¹⁵ Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemdayancá.

¹⁶ Mo canýe bestšašcá, chëse jamana nyëtsca chë cuerpentša soyënga ndayentše chamuenefñama y chiñe jobónjuama chamotsobenama, chë cuerpo saná chaotsebonnama jtsamëse, chca, nyëts cuerpo tšabá

chaóbochema, cachcá Cristo, chë nyetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyets cuerpo tsábá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebomna, puerte jtsenbobonshánëse.

Cristofaca cányiñe mo canyáca jtsemnëse tsëm vida šmochtsebomna

17 Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tsëngaftanga chca jáuyanama: Ndoñe más šmatšiyena bacna soyënga jtsamëse, mo chë Bëngbe Bëtsábioye ndu-abuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá.

18 Chëngbe juabnoca obenana mondbomna nyë ndoñe ndegombre soyëngama josértama. Chënga ndoñe quemátsbomna chë Bëngbe Bëtsábocana yóbocana tsabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama.

19 Chënga bacna soyënga tmojtsama ora, tondayama ntsenócochinýenana; chënga nyets tempo jesentšénana nyetsca bacna soyënga amana, y chca jtsamana tondayama ntjatenojuabnycá.

20 Pero chca ndoñe quenjatsmëna ntšamo tsëngaftanga Cristbe soyëngama šmojanatsjinýe y ntšamo chábioye šmojanabuatmancá.

21 Ndegombre tsëngaftanga chabiamá šmojanuena y ínýenga tmojanabatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinýncá.

22 Chcasna, ntšamo tsëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tsëngaftanga šmojanjuabná, šmojansentina y šmojanamcá, canýe ondbiamnaye juabnentšana yojóbocana, tsëngaftanga bacna soyëngama juabnëngaca mandánënga jtsemnëse, y chë juabnënga tsëngaftangbioye cmojánaingñaye.

23 Tsëngaftanga cmontsamna tsëngaftangbe juabniñe tsëm y tsabe juabnënga jtsebomnana.

24 Tsëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tsëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiamá, tsëngaftanga chašmotsiyenama jtsamëse Bëngbe Bëtsabe bominýiñe tsábá yomna soyënga y chábioye jadórana soyënga, chë ndegombre soyënguentšana óbocana soyënga.

25 Chcasna, ya ndoñe más šmatsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nyetscanga cányiñe mondmëna mo nyë canýe entšangcá.

26 Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nyets te chacmondetëna.

27 Ndoñe šmatjaleséncia Satanás ndayánaca tsëngaftangaftaca chaomama.

28 Chë yojanabëbaná chauajbaná atbëbanama y jatrabájama chaontsé; cachabe cucuátseca tšabe trabajo chaotsóboma, chca, ndayánaca cha chaotsebomnama chë ujabótënga jatšatayama.

29 Bacna palabrénga ndoñe šmattsichamo, pero aíñe tšabe palabrénga y nŷa chorsca uajabótama palabrénga, chë ínŷe entšángbioye jujabuáchama más Cristó chamotsemnama, chënga Bëngbe Bëtsábíocana tšabe bendicionënga chamóyëngačñama, chë ndayá chašmojtsëtsësná sóyeca.

30 Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháumashënguama, y chca, tcmojanainŷnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nŷetsca tescama yochjatsebacaye orscama.

31 Inŷëngbiana bacna juabnénga ainaniñe ndoñe chašmondëtsebmna, etonánënga ndoñe chašmondëtsemna, ni ínŷëngaftaca ndoñe chacmondetëna. Inŷëngbioye ndoñe chašmondëtsabuachembuana, ínŷëngbioye ndoñe šmatjovýanguango y ndaye bacna sóynaca ndoñe šmattsama.

32 Nŷetscángaftaca tšábënga šmochtsemna, nŷetscanga šmochtsenlastemana y šmochjenperdóna, ntšamo Bëngbe Bëtsá, Cristbeyeca tcmojaperdonacá.

5

Ntšamo yomna Bëngbe Bëtsabe básënga chamotsiyenama

1 Tšëngaftanga, Bëngbe Bëtsabe bonshana básënga quetsomñecá, nŷa šmochtsentšëna cachacá jtsemnama.

2 Smochtsiyena nŷetsca soyënga bonshanánaca jtsamëse, ntšamo Cristo šojanababuanŷeshancá; chca, cha chabe derecho vida jtsobomñiama cachcá tojanonŷa y bëngbiana tojanóbana. Y ntšamo Cristo tojanmcá, yojamna Bëngbe Bëtsábíoye jëtschuayama, y chabe bominŷiñe tša tšabá yojtsemna, mo ndaye ora Bëngbe Bëtsá oyejuayá jóyëngačñana ndayá tcojóbá y altaroca tcojajuinŷese, y chë soye botamana jtsonguëtšiyana.

3 Tšëngaftanga, Bëngbe Bëtsábënga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayana y jtsebošana, y chë nŷe yapa jésebošana más soyënga ínŷëngbiana jtsebmnama cach ndoñe. Ni chë soyëngama ndoñe šmattsóyëbuambnaye.

4 Bacna soye ndoñe šmattsóyëbuambnaye, ni corente ntjenjuaboycá, ni nŷe ntšámñaca bacna soye jenbotatšëmbonana cach ndoñe, er chë soyënga tšëngaftangbiana ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye.

5 Er tšëngaftanga ya šmondëtatšëmbo, ndocna chë shembása o boyabásaftaca bacna soye amá, ndocna chë nŷe chabe bacna juabnéngaca soyënga jtsamama oyená, o chë nŷe más soyënga ínŷëngbiana jtsebmnama bošá y amá (chca jtsayanana chabiana más iuámana soyënga jtsebmnama, Bëngbe Bëtsábíoye jatsbobonshánama), chca amënguentšana ndocná tondaye queochatóyëngačñe ndayá Bëngbe Bëtsá chabe entšángbioye jatšatayama tojsebuachenantšana, Cristo y Bëngbe Bëtsabe amëndayoca.

6 Ndocná chacmondaingñe ndoñe ndegombre tondmëna palabréngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye.

7 Chíyeca, chca amëngbe soyënga tondaye šmattsama.

⁸ Tempo tsëngaftanga šmojanijena bacna juabnënga jtsebomnëse y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cányiñe mo canýacá bétsemnayeca, chabe soyënga šmontsetátšëmbo y sempre šmondétsemna cháftaca, chë entsangbe juabnënga binýnayáftaca. Šmochtsiyena jtsamëse mo chë binýnayabe entsangcá.

⁹ Chë binýnayábeyeca entsanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëngnaca.

¹⁰ Nýa šmochtsentšena soyënga jamama, Bëngbe Bëtsá oyejuayá chaotsemnama.

¹¹ Chë mo ibetiñe cuaftsiyencá oyenëngbe bacna soyënga tondayama ntoservénana, y tsëngaftanga chca ndoñe šmattsama. Chamna, chëngbioye šmochjinýanýiye chënga ndoñe tšabá tmojamama.

¹² Ndegombre, nýe chë ndayá chënga mo iytëmencá tmojamama jóyebuambayama ya cuantsëuatja;

¹³ pero nýetsca soyënga binýniñe tmojacjá ora jtsopodénana tšabá jinýama ntšamo ndegombre tomncá. Cachcá, ntšamo entsanga tmojamcá chë binýnayá chaojinýanýé ora, echantsopodena jtsotatšëmbuama ntšamo chë soyënga yomnana;

¹⁴ er ndayánaca binýniñe tojtsinýinýena, jtsopodénana jinýama ntšamo ndegombre chë soye tomncá. Cachcá, ntšamo entsanga iytëmencá tmojtsamcá chë binýnayá chaojinýanýé ora, chënga mochántsetatšëmbo bacna soyënga imojtsamama. Chýeca mëntšá jtsichámuana:

Botamana cochájajuaboye, aca ndoñe quecátobena jenomándana, mo canýa cuaftsomañcá;

chë bacna soyënga ama causa, Bëngbe Bëtsabe bominiñe mo obanëngcá imomnënguentshana šmochtsojuánañe,

y Cristo acbe juabnënga echantsebínýnaye ca.

¹⁵ Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero añe chë chca soyëngama osertanëngcá.

¹⁶ Lempe ntšamo chašmojobenacá nýets tempo tšabe soyënga šmochtsama, er quem tempo entsanga yapa bacna soyënga montsama.

¹⁷ Ntjenojuaboycá ndoñe šmattsama, mo chë ndosertanëngcá. Pero añe bëtscá šmochtsentšena ndayá Bëngbe Utabná jamama yobošcá chacmósertama.

¹⁸ Ndoñe šmattsótmenaye, er chë soye entsábioye juanatsana jenomándana ndoñe chaondëtsobenama; chamna, šmochjama Uámana Espiritu sempre y bëtscá tsëngaftangbe ainaniñe chaotsemándama.

¹⁹ Šmochjenatsëtsaye Salmos librësañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espiritu inétsama tsëngaftanga chašmotsobena jacántama soyëngaca; chca, nýets ainánaca Bëngbe Utabnabíama šmochjacántaye y cha šmochtsatschuanaye.

²⁰ Nýets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

Ntšamo yomna canýe yebnentsënga chamotsemnama

²¹ Nýetscanga šmochtsenëyeunana, tsëngaftanga Crístbioye puerte šmorrespetánayeca.

22 Shémanga, smochtsetátšëmbo tsëngaftangbe boyanga chë yebnentša mándayënga imomnama; y nyëts tempo chca smochtsama, Bëngbe Utabná chašmotsobedecénama.

23 Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebácá y mora cha chënga entsamënda, mo chë bestšaše nyëts cuerpo jtsemandayancá;

24 y chca, ntšamo chë ošbuáchiyënga, Cristo chëngbe amëndayá yomnama imotatsëmbcá y chca jtsamana, cachcá, chë shemágnaca entsamna jtsemnana nyëtsca soyënguiñe chëngbe boyángaftaca.

25 Boyanga, tsëngaftangbe shémanga smochtsababuánjeshana, ntšamo Cristo chábeñe ošbuáchiyënga yojanababuanjeshancá, y chca, chabe derecho vida jtsoptomñama cachcá tojanonýa y chëngbiana tojanóbana.

26 Chca tojanma, chënga chabe entšanga y puerte tsábenga jábiamama; y chënga tmojánenabaye ora, tmojaninýanjé Bëngbe Bëtsá chëngbe bacna soyënga tojánabuajuanama, y chabe delante tsábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiamabuayenana soyënga tmojanuena ora.

27 Cha chca lempe tojanma, chë ošbuáchiyënga japróntayama corente tsábenga y uámanënga cachabiamama chamotsemnana, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tsábá tmonjamënga ca, ni ndocna inye cachca sóyeca.

28 Ntšamo canye boyá cachabe cuerpo endbetsebobonshancá, cachcá cha bontsemna chabe shëmbioye jtsebobonshánana. Nda chabe shëmbioye tbojtsebobonshana, cachábioye jtsebobonshánana, er chata cánýiñe jtsemnana mo nye canye entšá cuenta.

29 Er ndocná cachabe cuerpo jtsáboyënjana, ndayá saná janguangoñana y jtsinýenana, ntšamo Cristo bënga chë ošbuáchiyëngaftaca endbetsamcá;

30 er bënga nyëtscanga cánýiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá.

31 Ntšamo Bëngbe Bëtsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canýacá bochántsemna ca.”

32 Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnama.

33 Pero morna, tsëngaftanga cada ona cachabe shëmbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

6

1 Básenga, Bëngbe Utabnáftaca cánýiñe mo canýacá bëtsemnayeca, tsëngaftangbe bëtsetsangbioye smochtsayaunana, er chca jamana tsábá endmëna.

2 Moisesbe leyiñe canye mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tsabe bendicionënga jamama: “Acbe taitá y acbe mamá ndoñe stëtsoye catjëtšaquédaye,

3 tsabe vida chacuetsobomñama y quem luarentše bayté chacuetsiyenama.”

⁴ Taitanga, ndoñe šmattsama tsëngaftangbe básenga chauetënama; más tsabana, chënga šmochtsabëchaye jtsabuátambayëse y jucacánëse, ntšamo Bëngbe Utabná endbetsabuatambaycá.

⁵ Tsëngaftanga, chë nyëts tempo nye ínÿabiana oservénënga, tsëngaftangbe nduññënga šmochtsayaunana; chca šmochtsama puerte respétoça, bëtscá cuedádoca y nyëts ainaniñe tsabe juabnëngaca, mo cach Crístbioye cuaftseser-
vencá.

⁶ Y chca chë nduññëngbioye šmochtsaservena, ndoñe nye chënga chacmo-
jtsënÿa ora, mo nda nye entšangbe delante tsabá joquédama cuaftseboščá, ndayá Crístbe oservenëngcá, chënga nyëts ainánaca jtsamana ntšamo Bëngbe Bëtsá tojtseboščá.

⁷ Nyëtsca trabajotémënga šmochtsama nyëts tsëngaftangbe añémoca, mo Bëngbe Utabnabiana cuaftsetrabajacá, y ndoñe nye entšangbiana.

⁸ Er tsëngaftanga ya šmondétatšëmbo, cada ona, nyëts tempo nye ínÿabiana
trabajayá o nye cachabiana trabajayá tomna, ntšamo tsabe soyënga tojamcá
Bëngbe Utabnábiocana yochjójyëngacñe.

⁹ Y tsëngaftanga, ndëmuanyëngbiana ínÿënga nyëts tempo imoservena,
cachcá tsabá chëngaftaca šmochjamna, tondayama ntsaútatjnyëse.
Smochtsenójuabnaye, Bëngbe Utabná chë celoca endmëná, tsëngaftanga y
chëngbe mandayá yomnana, y chabiana nyëtscanga cachcá monduámána.

Ndayá Bëngbe Bëtsá entšanga tojatsatá Satanasbiana jenëuyanama

¹⁰ Y morna, Bëngbe Utabnáftaca cánÿiñe mo canÿacá jtsemnëse, ainaniñe
bëts añemo šmochtsebomna, chë Bëngbe Utabnabe bëts obenanentšana
óbocana añemo.

¹¹ Mo canÿe soldadcá, ba soyënga jtochëtjuana chë tmojtsentsjananga ora
uayayëngbiana jenëuyanama, tsëngaftángnaca cachcá, nyëtsca chë Bëngbe
Bëtsá cmojatsatá soyëngaca šmochtseprontana jenëuyanama, tsëngaftanga
jáingñama Satanás ntšámnaca tojtsama ora, ndoñe chacmondáyënjanama.

¹² Er bënga ndoñe quemuatenojuerzana cach quem luarentša
entšángaftaca jenëyëñjanama, ndayá bacna espíritënga mando
bomnëngaftaca; bacna espíritënga obenana bomnëngaftaca; y quem
luarentša entšanga, chë bacna juabna bomna causa y Bëngbe Bëtsabe soyënga
nduabatma causa, mo ibetiñe cuaftsoyencá oyena entšángbioye amëndaye
espíritëngaftaca; y chë tsbanánoca luarënguiñe imomna y bacna soyënga
chaotsebínÿnama ama espíritëngaftácnaca.

¹³ Chíyeca, lempe ntšamo Bëngbe Bëtsá cmojatsatacá šmochjójyëngacñe
y chë soyënga jtsamëse šmochtsiyena jtseprontánama, mo canÿe soldado
jenëuyanama y jáyëñjanama bëtscá soyënga tojttochëtjácá. Chca šmochjama,
chë uayayá Satanás tsëngaftangbioye jáingñama chaojtsama ora ndoñe
chacmondáyënjanama, y jenëuyanama lempe jtsamëse, chašmobená cha
jayëñjanama.

¹⁴ Mo canÿe soldadcá, jabuache jtasnayana y cochaca canÿe moro-
cho soye jenácochjatsana jtsevalentiana y ndoñe chamondëyëñjanama,
tsëngaftángnaca cachcá, ntšamo ndegombre yomncá jtsamëse šmochtsiyena,
mo chë jabuache cuaftsnacá, y chë Bëngbe Bëtsabe bomínÿiñe tsabá yomna
soyënga jtsamëse, mo chë morocho soye cochaca cuafjenacochjatscá, chca,
Satanás tsëngaftangaftaca tondaye chaondobená jamama.

¹⁵ Mo canye soldadca jtshepochetjuana betscio jobonjuama jtseprontanama, tsengaftangnaca cachca, Bengbe Betsabe obenanaca sempre smochtseprontana jtsabuayiyayama ntshamo Bengbe Betsa inetsama entsanga tempca tsaba chaftaca chamotsatsmenama.

¹⁶ Canye soldado escudo jtsebmomnana che uayayabe uajuninyana flechejuangá chabe cuerpiñe ndoñe chaonduámashenguama. Cachca, tsengaftanga cmontsamna Jesucristbeñe puerte jtsošbuachiyana, mo escudo cuaftsebmomncá, chca, che bacna soyenga mandayá Satanás tsengaftangftaca tondaye chaondobená jamama, tsengaftangbe ošbuachiyana jabuajuánama cha tojtsama ora.

¹⁷ Mo che soldadca, canye morocho buchtsanese tojtabuchetsese chabe bestsaše jeneyuanama, tsengaftangnaca cachca, sempre smochjesejuabnaye Bengbe Betsa cmojatsebacama, y che juabna cmochanjújabuache, mo canye morocho buchtsanese cuafstsbuchetsancá. Mo canye soldadca, che uayayabioye jayenjanana, chabe espadéjaca japeliase, cachca tsengaftanga, Bengbe Betsabe palabra smochtsóyebuambnaye Satanás jayenjanama. Uamana Espiritu jt-samana, tsengaftanga Bengbe Betsabe palabra chašmotsebmomnana.

¹⁸ Nyets tempo che Uamana Espiritbe uajabuáchenanaca Bengbe Betsaftaca smochtsencuentaye, lempe ntshamo Bengbe Betsaftaca jencuentama yomncá y chabioye jtseimpadánese. Yejuana smochtsenójuabnaye ntshamo smojtsichámuama, Bengbe Betsaftaca chašmojtscuenta ora, y chca smochjama Bengbe Betsabeñe sempre jtsobátmanese, y Jesucristbeñe ošbuachiyengbiana nyetscangbiana cha smochtseimpadana.

¹⁹ Atšbiámnaca Bengbe Betsa smochtseimpadana, atše jóyebuambayama chajontšé ora, cha che buayenana soye chašuyanama; y atše chayobená tondayama ntjatauatjca jóyebuambayana, y chca, entsanga chayinyanyé Jesucristbiana tsabe noticienga, ndayá chenga tempo ndoñe monjantatšembo.

²⁰ Bengbe Betsa šojichmó mo canya chabe cuenta oyebuambnayacá, che buayenánama entsangbeñe jóyebuambayama, y chca bétsamama, mora atše utamená sentsemna. Atšbiana Bengbe Betsa smochtseimpadana, atše chayobinama Cristbe buayenánama tondayama ntjatauatjca jóyebuambayana, ntshamo atše jamama šojsemncá.

Pablo chenga jtadiósoftanama

²¹ Tiquico, Jesucristbeyeca bengbe bonshana catšata y canye entsá tsabe palabra bomná, Bengbe Utabnabe trabajo jamama oserveniñe, ntshamo atše stsemnana y ndayá stsamama tsengaftanga chašmotsetatšembuama, lempe cmochanjácuntaye.

²² Chama cha tsengaftangbioye senjichmó, ntshamo muentše fstsemnana chacméyanama, y tsengaftanga ainaniñe añemo chašmotsebmomnana chomama.

²³ Atše sentsseimpadana Bengbe Betsa che Taitá y Bengbe Utabná Jesucristo, chaboma che Jesucristbeyeca catšatangbe ainaniñe tsabe ebionana chašmotsebmomnana, y Bengbe Betsabioye y ingyengbioye puerte chašmotsababuányeshanama, Jesucristbeñe tsengaftangbe ošbuachiyánaca;

²⁴ y chaboma, che Bengbe Utabná Jesucristbioye bēts bonshanánaca imobobonhanengbeñe tsabe bendicionēnga chaotsemnana, canye ndocná yondobena jatrócama bonshanánaca.

Filipenses

Jacheuayama

1 Pablo y Timoteo, Jesucristbiana oservénata, quem tsbuanácha fséntsabianná Filipos béts puebloca Bèngbe Bètsabe entšanga imomnènga, y Jesucristoftaca cányiñe mo canyáca imomnèngbiana. Fséntsabianná nyetsca chë Jesucristbeñe ošbuáchiyèngbiana, nyetsca chentša uanatsanèngaftaca y chë inye ošbuáchiyènga ujabuáchaniñe trabajayèngaftaca.

2 Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tšabe bendicionènga chaotsemnana, y chaboma tsèngaftanga ainaniñe tšabe ebionana chašmotsebonnana.

Pablo Bèngbe Bètsábioye tbojtanchuá ošbuáchiyèngbiana

3 Cada tsèngaftangbiana stenojuabó ora, Bèngbe Bètsá tsèngaftangbiana sèndbètsatschuanaye;

4 y Bèngbe Bètsá tsèngaftangbe tšabiana stseimpadana ora, atše corente oyejuayá chca sèndbètsama,

5 ntšamo tsèngaftanga atše šmojuájabuachama, tšabe noticiènga Jesucristbiana entšanga abuayiyñayañe, tsèngaftanga Jesucristbeñe jtsošbuáchiyama šmonjanbojatšé orscana y mèntscoñama.

6 Atše corente sèntsetatšëmbo, Bèngbe Bètsá tojanbojatšé tsèngaftangbe ainaniñe tšabe soyènga jtsamama, y más tšabe soyènga yochtsamama. Y chca yochtsama, lempe ntšamo tsèngaftangbiana cha yojtsejuabnacá chaochnènguèntscuana, y chca, Cristo Jesús yochjésabèntscuana.

7 Atše tsèngaftangbiana sempre ainaniñe sèndbètsenojuabnaye, chíyeca atšbiana puerta tšabá entsemna chca tsèngaftangbiana jtsejuabnayana. Tsèngaftanga nyetscanga atše šmonjuájabuache jamama chë Bèngbe Bètsá tša tšabia bètsemnayeca šonjanèntšabuaché trabajo. Atše chë Bèngbe Bètsabe trabajo sèndbomna jamama, mora sèntsètámèna ora o natjèmbana shjoca stsana ora, nyetscángbioye tšabá inyinñayañe chë tšabe noticiènga ndegombre soyènga bètsemnana, y bètsá amiñe entšanga chë soyènguiñe corente chamotsošbuáchema.

8 Bèngbe Bètsá yotátšëmbo ntšamo sèntsichamcá ndegombre bètsemnana. Atše tša sèntseboše tsèngaftanga jányama y cbontsababuanñeshana cachcá ntšamo Cristo Jesús atše šondbobonshancá.

9 Atše, Bèngbe Bètsá sèntseimpadana tsèngaftanga cada te más cha chašmotsebobonshánama y chë inyèngbioynaca, chca, osertánana chašmotsebonnana ndayá chë ndegombre soye bètsemnana jtsetatšèmbuama, y chašmotsetátšëmbo ndayá tšabá o ndayá ndoñe tšabá tondmènama;

10 y chca, chašmotsobena sempre jabocacayama chë puerta tšabá yojsemna jamama soye. Chca, Cristo yochjésabo ora, tsèngaftanga puerta tšabe vida šmochántsebonna, bacna soyèngaca ndèmandánènga; y tondaye quemochátama, chora chë entšanga chca ndoñe tšabá quenátsmèna ca chamuátichamuama.

11 Y lempe ntšamo chašmojtšamcá ndegombre tšabá echántsemna, y nje Jesucristo endobena jamama entšanga chca chamotsamama. Nyetsca chë

tšabe soyënga echántsemna, Bëngbe Bëtsá puerte bëtsá y uamaná bëtsemnama jinÿanÿiyama.

Atšbe vida endmëna Cristo jtseservënana

¹² Jesucristbeyeca atšbe catsátanga, atše sëntseboše tšëngaftanga chašmotsetátšëmbo, ntšamo atše tijapasama, más bëtsá entšanga Jesucristbiana tšabe noticiënguiñe chamotsošbuáchema tojoservema.

¹³ Chca, nÿetsca chë romanëngbe mandadbe bëts yebna bojanÿá soldadënga y chë inÿe entšanga quem luarentše montsetátšëmbo atše utamená stsemna, atše Cristbiana tstrabája causa.

¹⁴ Atše utamená sëntsemnayeca, ošbuáchiyënguentsana banga ainaniñe más añemo montsebmna, y chíyeca chënga Bëngbe Bëtsabe palabra más y más añémoca y tondayama ntjatauátjá entšángbioye montsabuaiyina.

¹⁵ Ndegombre entsemna, báseftanga Cristbiana entšángbioye imojtsabuaiyina, pero chëngna nÿe ntšamo tijashjachá šmojtsántšabošama chca, y chënga imojtseboše, bëtsá jtsamëse, atše chayotjáyana; chíyeca chca imojtsama. Pero inÿengna, entšángbioye montsabuaiyina tšabe soyënga inÿengbiana jamama ndegombre imojtsebošeyeca.

¹⁶ Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondëtatšëmboycya, Jesucristbiana tšabe noticiënga ndegombre bëtsemnama entšanga jtsinÿanÿayana;

¹⁷ pero chë inÿengna chca imojtsama, ndoñe tšabe soyënga inÿengbiana imojtsebošeyeca, ndoñe chënga chë inÿengbiana tšabe soyënga imojtsebošeyeca. Chënga Jesucristbiana imojtsoyebuambná nÿe entšanga chënga chamotsarrespetánama, y nÿe cachëngbiana tšabe soyënga jtebmnomna imojtsebošeyeca. Chënga jtsejuabnayana mochjobenaye jamama atše más chašotsengménama ca, muentše utamená chjëftsemnëntscuana, chënga entšángbioye chca tmojtsabuatambá ora.

¹⁸ Pero ¿ndayase chë soye atšbiana? Masque ntšámnaca, tšabe soyënga inÿengbiana tmojtseboše o ndoñe, Cristbiana montsoyebuambná, y Cristbiana chënga montsoyebuambnama atše oyejuayá sëntsemna.

Y cabá más chanjóyejuaye,

¹⁹ er atše sëntsetatšëmbo quem utámenentsana atše chjësebcnana. Atše sëntsetatšëmbo muentšana chjësebcnana, tšëngaftanga Bëngbe Bëtsá šmoimpadánayeca y Jesucristbe Uámana Espíritu šuajabuachánayeca.

²⁰ Atše corente jtošbuáchiyëse Bëngbe Bëtsabeñe sëndobátmana, atše ndocna te tondaye chanjëftsema y chama chjaisëuatjama, pero aifñe nÿetscangbe delante becá añémoca chayoyebuambá, y nÿets tempo pero más mora, lempe ntšamo stsamama y stsihámuama, atše chaima entšanga chaminÿanÿema Cristo puerte bëtsá y uamaná bëtsemnama, y chca chántsama masque ainá o obaná chaitsemnëse.

²¹ Chca entsemna, er atšbe vida Cristo jtseservënana endmëna, y nderado atše chajóbanëse, nÿetscanga puerte bëts soye mochanjëftsashjache.

²² Pero atše ainá stsemnëse, chanjobenaye más uámana trabajo Cristbiana jëftsemama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsamna o ndoñe.

²³ Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentše ntjëftsemnana, Cristoftaca jtsatsmënama, y ndegombre chca atšbiana puerte tšabá nántsemna;

²⁴ pero, ínyoicana tsëngaftangbiana šontsemna ainá jëftsemnana.

²⁵ Atše corente séntsetatšëmbo chca ndegombre yochtsemnana, y chíyeca séntsetatšëmbo atše cabá ainá chjëftsemnana, tsëngaftanga jujabuáchama más Jesucristbeñe chašmotsošbuáchema, y chiñe bëtscá oyejuayana chašmotsebonnana.

²⁶ Chca, atše tsëngaftanga jutsëtsayama choye chajjá ora, chašmobená inye soyama más Cristo Jesús jëtschuayama.

²⁷ Morna, chë más uámana soye entsemna, tsëngaftanga chašmotsama ntšamo jtsiyenama ntšamo chë Cristbiana tsabe noticiënguñe endayancá. Y mëntšá, cachcá, jutsëtsayama chajjá o ndoñe, atše chántsetatšëmbo tsëngaftanga Jesucristbeñe ošbuáchiyama ndoñe šmotsajbanama, y añe becá ošbuáchiyana chábeñe šmotsobomñama; nyëtscanga cachcá šmojtsejuabnáyeca y nyëtscanga cach soye šmojtsebóseyeca, cányiñe nyëtscanga enutanánënga jtseñojuerzánëse, ndocná chë tsabe noticiënguñe tsëngaftanga šmobomna ošbuáchiyana chacmondábuajuanama.

²⁸ Tsëngaftangbe uayayëngbiana tondayama šmattsauatja, sempre bëtscá añemo šmochtsebonna. Chca tsëngaftanga šmochanjínyaníyie chënga pochocánënga mochtsemnana, y tsëngaftangna atsebácanënga šmochtsemnana. Y chë soye Bëngbe Bëtsá tsëngaftangbiana echántsama, Cristbeñe šmošbuachéyeca.

²⁹ Chca echanjopása, er Bëngbe Bëtsá tsëngaftangaftaca puerta tsabia endmëna, Cristbiana oservénënga Bëngbe Bëtsá tcmojábiana, pero ndoñe nye chábeñe chašmotsošbuáchema, ndayá chabiana chašmosufrímnaca.

³⁰ Tsëngaftanga y atše cachca soyama montsenojuerzana. Tsëngaftanga ya šmonjinye ntšamo atše sënjánenojuerzana, entšanga jinýanýiyama chë tsabe noticiënga ndegombre soyënga bëtsemnana. Y mora, tsëngaftanga noticiënga šmochanjóyëngacñe ntšamo atše cach soyama cachcá stsamama.

2

Ndoñe uámanënga šmattsenobiamnaye, ntšamo Cristo ndoñe tonjanmcá

¹ Tsëngaftanga, Crísoftaca cányiñe mo canýacá jtsemnëse, ainaniñe bëtscá añemo šmontsebonna. Cristo cmondábuanýeshana, y chë soye tsëngaftanga cmontsëjabuachana nyëtca trabajënguentšana tsábá jabocanama. Y tsëngaftanga Cristbe Espíritoftaca cányiñe mo canýacá šmontsemna; tsëngaftanga nyëtscanga šmondénbobonshana y nyëtscangbiana jóngmiana šmonduamana.

² Tsëngaftanga lempe chca šmobómnayeca, atše corente oyejuayá šmochjábema, er tsëngaftanga nyëtscanga cachcá cányiñe šmondëjuabná, cachcá nyëtscanga šmondénbobonshana, nyëtscanga mo canýe ainancá šmondobmna, y nyëtscanga cachca soye šmondboše.

³ Tondaye šmattsama nye ínýenga chë sóyeca chamotjáyana, o nye tsëngaftanga tša bëtš soyënga amënga šmomna ca entšanga chamotsejuabnana; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínýenga bëngbiana más uámanënga imomnana.

⁴ Yndocná tondaye chaondëtsama, nye chabiana tsabe soyënga jónýenama, sinó ndayánaca chaotsama nyëtscangbiámnaca tsabe soyënga jónýenama.

⁵ Tsëngaftanga cmontsamna jtsemnana ntšamo cach Cristo Jesús yojan-juabná y yojanamcá:

⁶ Cha nyëts tempo yomna cach Bëngbe Bëtsacá y uamaná cach Bëngbe Bëtsacá,

pero masque chca, ndocna te yonjanjuabná:

“Atše sěntseboše nyetsca entsānga nyets tempo atše chašmoterrespectana, ntšamo atšbe Taitá Běngbe Bětsá monděrrespectancá ca.”

⁷ Pero cha mo nduamanacá tonjanóbema, nyetsca chabe bomna soyēnga jěftsebošjoněse,

y ndegombre, mo canye oservenacá tojanóbema.

Cha canye entsacá tojanonyná,

y entsānga canye ndegombre entsacá tmojáninye.

⁸ Cachá tojanlesenciá nduamaná jtsemnana,

y sempre Běngbe Bětsábioye ibnayeunana, y jobanámna, cruciñe jobaněse.

⁹ Ndayá cha tonjanmama, Běngbe Bětsá, chě celoca más uamana luare tbojaninyně

y chě más uamana uabaina, chě más bětsětsangbe uabainěnguentša uabaina tbojabuajo;

¹⁰ y chca, celoca imomnēnga, y quem luarentše y fshantse jashenoye imomnēngnaca nyetscanga chamóshamentšema,

Jesúsbiye jětschuayama, chabe uamana uabaina jayaněse;

¹¹ y chca, nyetscanga chamuayana Jesucristo chěngbe Utabná yomna ca, chca, Běngbe Bětsá chě Taitá nyetscanga chamotsatschuanama.

Crístbeñe ošbuáchiyēnga entsamna mo buashinynyana estrellēngcá jtsemnana

¹² Chcasna, atšbe bonshana catsátanga, ntšamo atše tšěngaftangaftaca sějnamna ora, atše sempre šmonjaněyeunancá, mora más šmochtsatěnyeyunana, mora atše tšěngaftangbiama bēnoca stsemna ora. Bětsětsānga ntjatenobiamnaycá y Běngbe Bětsá jtserrespectānēse šmochtsama soyēnga, chca, tšěngaftangbe tšabe viděntše, Jesucristbeñe ošbuáchiyēnga quetsomñecá, tondaye chacmondětsabuáshebenama;

¹³ er Běngbe Bětsá nyets tempo tšěngaftangbe ainaniñe inětsama tšěngaftanga ndayánaca chašmotsebošama y chašmotsamama, ntšamo cha yojuabná y yobošcá chaotsemnana.

¹⁴ Ndayánaca jamama chacmojtšėjaboto ora, chě soye šmochjama, chca jamama yapa totcá comna ca ntjatichamcá y inyēngaftaca jabuachana ntjate-natsětsnaycá.

¹⁵ Chca cmontsamna, chca, tšěngaftanga šmojtšama soyēnguiñe ndocná ndocna bacna soye chaondinynama, y puerte tšabe vida chašmotsebomnana. Běngbe Bětsabe puerte tšabe basēngcá šmochtsiyena, tšěngaftanga chě šmojtsemnēnga canye luarentše puerte bacna entsāngbeñe y sempre bětscá bacna soyēnga jtsamana uamanēngbeñe. Chiyecna, tšěngaftanga šmochtsiyena puerte tšabe soyēnga jtsaměse, y chca tšěngaftanga šmochántsemna mo canye ibetiñe luarentše buashinynyana estrellēngcá.

¹⁶ Chě tšabe soyēngaca entsāngbiyoe chauinynyně ntšamo muanjobenaye tšabe vida jtsebomnana. Chca chašmojaměse, Cristo cachiñe yochjésabo ora, atše chantsobena tšěngaftangbeyeca puerte oyejuayá jtsemnana, er ntšamo chašmojamcá echanjínynyniye atše ndoñe nye bonamente jabuache tija-trabajá. Chca atše chántsemna mo nda bětscá tojoprontá, y chentšana inyēngaftaca tojtójajo ora, chěngbiyoe tojtsayējanacá.

¹⁷ Mo chě altaroca canye bachna buiñe tojabuashanacá, Běngbe Bětsá jětschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Běngbe Bětsábioye oyejuayá jabemama. Tšěngaftanga

bětská šmojalemošná, Crístbeñe tša šmošbuachéyeca, y tšěngaftangbe ošbuachiyánēnaca endmēna Běngbe Bětsábioye oyejuayá jabemama. Chē uta soye echántsemna mo chē buiñe y chē oveshacá, Běngbe Bětsábioye oyejuayá jabemama. Atše chca stjobanēse, puerte oyejuayá stsemna, y stjama tšěngaftángnaca cachcá chašmotsóyejuama.

¹⁸ Chca, tšěngaftanga cmontsamna oyejuayēnga jtsemnana, y šmochjama átšnaca oyejuayá tšěngaftangafata chaitsemnana.

Timoteo y Epafrodito

¹⁹ Atše becá ošbuachiyánaca Běngbe Utabná Jesúsbeñe jtsobátmanēse, sěntsejuabná pronto chjobenaye Timoteo tšěngaftangbioye jichmuama, tšěngaftangbiamu chašubocuéntama, y chca, atše más añemo chaitatsbomnana.

²⁰ Er nŷe cha endmēna canŷa cach atšcá ainaniñe juabnayá, y cha ndegombre puerte entseboše tšěngaftanga tšabá chašmuetsiyenama;

²¹ chē inŷengna nŷetscanga nŷe cachēngbe tšabiamu ndayánaca jamama jtsejuabnayana, y tondaye ntsebošana Jesucristbiamu jamama.

²² Pero cach tšěngaftanga ya šmondétatšēmo, ntšamo Timoteo chē pade-cena soyēnguentšana tšabá tonjétsobocñama, y ntšamo Timoteo y atše, mo canŷe uaquiñá chabe taitábioye cuafstajabuachancá, canŷiñe fsēnjantrabája, más bētscá entšanga chē tšabe noticiēnga chamóyēngacñama.

²³ Chcasna, atše sěntsobátmana cha jichmuana, ntšamo átšeftaca jopásama chaitsetátšēmo y cachora;

²⁴ pero bētscá ošbuachiyánaca sěntsobatmánayeca, sěntsejuabná, Běngbe Utabná chašojtábocnēse, pronto átšnaca chjobenaye choye jama.

²⁵ Atše sěntsejuabná yojtsemna, Jesucristbeyeca bēngbe catšata Epafrodítmna choye jichmuana, nda átšeftaca canŷiñe endētrabája y chē tšabe noticiēnga ndegombre soyēnga bētsemnana jinŷanŷiyama endenojuerzana, nda tšěngaftanga šmojanichmó atše chašubēuájabuachama.

²⁶ Cha chanjichmuu; cha puerte entseboše tšěngaftanga jánŷyama, y yapa ngmēnaca entsemna, cha šocá enjamna šmojátatšēmonama.

²⁷ Y ndegombre cha šocá enjamna, y enjétsinŷna mo jtsobanamcá; pero Běngbe Bětsá tbonjalastemá, y ndoñe nŷe chábioye sinó átšbioynaca, atše ndoñe más ngmenanēnga chayátsbomnana, ntšamo mora sěntsebomnana.

²⁸ Chíyeca atše más sěntseboše cha pronto jichmuana, as tšěngaftanga cha chašmojtinŷe ora, puerte oyejuayēnga chašmotsemnana, y atše ndoñe yapa chašondētsengmenama.

²⁹ Smochjofja nŷets oyejuayánaca, Běngbe Utabnábeyeca catšátanga quet-somñecá; y nŷets tempo chacá amēngbioye mo bētsétsangcá šmochtsétabna,

³⁰ er batšatema más y matēnjétsobana, Crístbiamu trabajayiñe uajabuachaniñe. Cha chē trabajo tonjanma atše juajabuáchama, ntšamo cach tšěngaftanga ndoñe chešmatanobenacá, atše juajabuáchama.

3

Ndayá Pablēbiamu ndegombre corente yojanámana

¹ Y morna, atšbe catšátanga, ndayá Běngbe Utabná tojamama móyejuanga. Ndoñe bacá quešnatámama, ntšamo chē inŷe tsbuanáchañe tcbonjanēbuabiamcá cachcá cachiñe jtētēyanama; y chē soye bētscá cmochanjúabuache ndoñe resjuiñe chašmondētsemnana.

² Cuedado smochtsebomna chë ndoñe tšabe entsangbiamna, mo quesëngcá imomnënga, chë puerte bacna soyënga mondbétsamënga, y entsangbe más delicadentše base bobachtema jatëtšana uamanënga;

³ er bënga mondmëna y ndoñe ínÿenga, chë ndegombre uinÿnanánana bomnënga, bënga Bëngbe Bëtsabe entsanguentšënga bétsemnana, bënga chë Uamana Espíritbe uajabuáchenanaca Bëngbe Bëtsá mondadóránana, bënga chë Cristo Jesúseftaca cánÿiñe mo canÿacá bétsemnana mondbétsosyejuama, y bënga chë ntšamo ínÿenga monduamancá bëngbe cuerpiñe jamama tondayama yondoservënama mondbétsejuabnayama.

⁴ Masque atše razón sëndëtsóbmñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chë soyënga yoservenca ca jtsejuabnayama, ndegombre atše chabiamna más razón chama stsóbmñe.

⁵ Sënjanonÿná y posufta tianoye base bobachtema chë más delicadentše smojantëtše; atšbe nÿets uta bëtšëtsata Israeloca entsanguentšata bonjamna, y atšna Benjaminbe bëtš pamillentsá sëndmëna; atšbe tempasca bëtš taitanga nÿetscanga hebreunga imnamna. Atšna fariseo sënjamna. Atše sënjánama, lempe ntšamo judiëngbe leyënguiñe endayancá, ndayá jamama šojanmëncá.

⁶ Atše tša sënjánboše Bëngbe Bëtsá jtseservënama, chíyeca Jesúseñe ošbuáchiyënga bëtscá sënjanëcamena; y ndayá canÿe entšá ibnëtsemna jtsamama, Bëngbe Bëtsabe bominÿiñe tšabia jtsemnana, judiëngbe ley jtsocumplínëse, chama ndocná tondaye quenjátšbomna jayanama, atše ndoñe tšabá sëntsanama ca.

⁷ Pero lempe chca ntšamo atše sënjamnama y ndayá sënjánamama, puerte sënjanjuabná atšbiamna puerte yojanámana ca; pero mora, Cristo atšbe ainaniñe tonjámashëngoyeca, chë soyënga atšbiamna ya ndoñe quenatámana.

⁸ Y cabá más, tondaye atšbiamna quenatámana, chë bëtš soye jtsonÿayëse, Cristo Jesús, Bëngbe Utabná jtsabuatomana. Chábeyeca, lempe chë nÿe quem luarentša soyënga sënjésebohšjona, y lempe chë soyënga atšbiamna tondayama quenátoservena; y chca entsemna, chë bëtš soye jëftsashjáchama, Cristo jtsabuatomana,

⁹ y cháftaca cánÿiñe mo canÿacá jtsemnana. Atše ya ndoñe quetsat-sngué Bëngbe Bëtsabe bominÿiñe tšabia jtsemnana, nÿe ntšamo atše tijamama chë judiëngbe ley jtsocumplínëse, pero Cristbeñe jtsošbuáchiyëse aíñe; Bëngbe Bëtsá entsama atše chabe bominÿiñe tšabia chaitsemnana, atšbe bacna soyëngama jtseperdónase, y lempe chca entsemna atše Cristbeñe sëndošbuachëyeca.

¹⁰ Atše sëntseboše ndayá cha jtsabuatomana, chë obanënguentšana tojtayanenama cha tojaninÿanÿé obenana atše chaitsebomnana, atše cháftaca cánÿiñe mo canÿacá chaitsemna ora; y ntšamo bënga játebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnana;

¹¹ y ntšámnaca, atše jëftsashjáchama Bëngbe Bëtsá chaoma atše chaitayenama.

Yejuana jtsentšëñe, Bëngbe Bëtsábiocana uacanámana josháchiñama

¹² Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominÿiñe stsemna ca, pero sempre natsanoye sëntsá, mo nda canÿe luaroye jashjanguama cuatšëchamancá; y puerte jtsošbuáchiyëse sëntsobátmana atše chjobenaye

jtsemnana, chë ndayama Cristo šojanchembo, er Cristo Jesús ya tonjama atše chabiama chaitsemnana.

¹³ Atšbe catsátanga, atše ndoñe quetsátichamo chca ya tijashjache ca. Pero chama canye soye sentsama: chë tempo atše sënjänbomna y sënjänama soyënga, mora lempse stëtsoye sënjaquedá, y bëtscá sentsama jobenayama chë jashjanguama yojtsemnoye jashjanguama,

¹⁴ chë ndëmoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juácana bëtscá jenojuérase cuaftséchamancá. Cachcá, átsnaca sentsá chë Bëngbe Bëtscá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nyetsca tescama yomna tšabe vida jtsebmna.

¹⁵ Chca bënga šontsamna jtsejuabnyana, chë Jesucristbeñe puerte ošbuáchiyana y nyets tempo cha ústonënga; y nderado tšëngaftanga ndayíñnaca inyetsá šmojatsjuabná ora, Bëngbe Bëtscá chë sóynaca tšabá cmochanjínñanye.

¹⁶ Pero morna šontsamna jtšiyenana ntšamo mëntscoñama Bëngbe Bëtscabe soyëngama šojosertacá.

¹⁷ Jesucristbeyeca catsátanga, ntšamo atše sëndmencá tšëngaftanga šmochtsemna, y chë ntšamo jtšiyenama tcbonjaninñanyecá imojtšiyenëngbioye šmochtsënñaye.

¹⁸ Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbëtsemna. Banga mondmëna, y chënga ntšamo vida imojtsebmna montsinñinñá, lempe ntšamo Cristo chë cruciñe jóbaniñe bëngbiama iuayancá contra chënga imojtsemnana,

¹⁹ y chëngbioye nyetsca tescama infernoca mochántsapochocaye. Chëngbiama chë más uámana soye yojtsemna jtšamana ntšamo cachënga tmojtsebošcá, nye cachëngbe cuerpiñe tšabá jtšomñama. Chënga nña mo bëtscá soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtšëuatjama; y chënga sempre jésejuabnyana chë nye quem luarama enójuabnyëngbe soyëngama.

²⁰ Chë cuenta bëngna, ndegombre celocama entšanga mondmëna, y mora montsobátmana, chë luarocana chauabo bëngbe atšebacayá, Bëngbe Utabná Jesucristo.

²¹ Cha bëngbe cuerpënga, chë pronto jopochócama cuerpënga echanjátrocaye, jtsemnana mo chabe cuerpcá, chë obanënguentšana tojtayenabe cuerpcá; y cha chca echanjama, cha puerte obenana lempe jtsemándayama bómnyeca.

4

Bëngbe Utabnáftaca cánñiñe mo canñacá jtsemnëse oyejuayana jtsebmna

¹ Chcasna, Jesucristbeyeca atšbe catsátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánñiñe mo canñacá šmochtsemna. Corente cbondábabunñeshana y tša sëntseboše tšëngaftanga jányama. Tšëngaftangbeyeca atše puerte oyejuayá sëntsemna, y atše corente sëndbëtsoyejuaye tšëngaftangbiama inñengbioye jáuyanama.

² Evodia sëntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá.

³ Y ácnaca, nda puerte tšabá átseftaca tconjatrabajá, cbontseimpadana chama chë shembásata chacújabuachama, er chata bëtscá átseftaca tbonjatrabajá tšabe noticiënga entšanga abuayinyaiñe. Clemente y inye entšanga átseftaca tmonjatrabajá cach soye amiñe. Nýetsca chëngbe uabjona entsábemana chë librësáñe, ndayentše yojtsábemana chë tšabe vida mochainjónyëngbe entsangbe uabaina.

⁴ Sempre oyejuayënga šmochtsemna, Bëngbe Utabnáftaca cányiñe mo canyáca jtsemnëse, y cachiñe šcutëtayana: ¡Móyejuanga!

⁵ Nýetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

⁶ Tondayama šmattsenócochinýena, pero cada Bëngbe Bëtsáftaca chašmojtscuénta ora, ndayá cmojtséjajotama cha šmochjaimpáda. Y chca chašmojtsama ora, chánaca šochtsatschuanaye.

⁷ Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebomnana; chë tšabe ebionana puerte bëtscá endmëna, y bënga entšanga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguiñe y ainaniñe tondayama quešmochátenocochinýena, er tšëngaftanga cányiñe mo canyáca Cristo Jesúseftaca šmondmëna.

Lempe ntšamo tšabá yomncá soyëngama jtsejuabnyana

⁸ Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nýetsca soyënguiñe entšangbe bominiñe tšabá yomniñe, nýets tempo corente tšabá yomniñe, nýetsca soyënga entšanga yogusetániñe, y lempe chë ndayama entšanga tmojtsejuabná tša iuámána ca soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

⁹ Sempre šmochtsama chë átšbentsana šmojuábouinýe soyënga, chë atšbiajana šmojóyëngacñe soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnana amá, tšëngaftangaftaca echántsemna.

Pablo tojtanacheuá tmojanájabuachama

¹⁰ Atše corente sëndoyejuá Bëngbe Utabnáftaca cányiñe mo canyáca tsmënama, er tšëngaftanga ba ishinýe chentsana, cachiñe šmojatobená atše jatinýinýiyana ntsachetšá atšbe tšabiana tšëngaftangbiama iuámanana. Chca, atše ndoñe quetsátichamo tšëngaftanga atšbiana cmojtsanebnëtjomba ca, ndayá ntšamo tšëngaftanga tšabá šmojuabnacá atše jinýinýiyama ndoñe yonjanopodena ca.

¹¹ Atše chca, ndoñe quetsátichamo uajabotá stsemna ca, er atše sënjuatsjinýe sempre oyejuayá jëftsemnana, nýe ndaye soyiñe masque batšatémnaca stsebonnëse.

¹² Atše sëndëtatšëmbo ntšamo yomna jtsiyenana chë vida jtsebonnana uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebonnëse. Atše tijuatsjinýe oyejuayá jtsemnana masque nýe ndaye soyënguiñnaca stsemna ora, jasama bëtscá stsebonna ora o masque nýe shëntseca jtsemnana šojtsemna ora, atše jtsiyenama bëtscá soyënga stsebonnëse o masque ndoñnaca.

13 Atše lempe chca sëndobena, atše obenana jtsebomnama Cristo endbétsamayeca.

14 Masque chcasna, tsëngaftanga tsabá šmonjama, atše padecena soyënguifne sënjamna ora atše juajabuáchana.

15 Tsëngaftanga, chë Filipos puebloca Jesucristbeñe ošbuáchiyënga, corente šmondétatsëmbo, Macedonia luarentšana sënjëftsanbocna ora, nÿe tsëngaftanga atše šmonjanájabuachama; inÿe ošbuáchiyënga ndoñe. Chora enjamna atšbe bojatsena tempo tsëngaftangbe luarentše chë tsabe noticiënga entsanga abuayiynayiñe; y nÿe tsëngaftanga atše šmonjanájabuache.

16 Ba soye atše Tesalónica puebloca sënjamna ora, y chašmuájabuachama šonjanájaboto ora, tsëngaftanga atšbe opresidëngama crocénana šmonjanafja.

17 Chca ndoñe quenátayana atše tsjuabná nÿe tsëngaftangbentšana ndayánaca jóyëngañama ca; chë sóyeca atše sëntseboše ndayá tsëngaftanga más tsabe soyënga chašmotsamama, Bëngbe Bëtsá tsëngaftangbiamá más chaotsóyejuama.

18 Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tsëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominiñe puente tsabá entsemna, mo juatsëmbonama ndayá tcojóba y altaroca tcojajuinÿe y botamana tojtsonguëtsecá, chora cha oyejuayá chca jóyëngacñana.

19 Atšbe Bëtsá, chabe bëtscá uámana y bëts bomnánaca, echanjama tsëngaftanga lempe ntšamo cmëjabotcá Cristo Jesusbiajana chašmóyëngacñama.

20 Entšanga nÿets tempo chamotsinÿanÿná Bëngbe Bëtsá y Bëngbe Taitá puente uamaná bëtsemnama. Chca chaotsemna.

Chënga jtadiósoftanama

21 Atšbe cuenta, nÿetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catšátangnaca cmontsacheuaná.

22 Nÿetscanga chë muentše Bëngbe Bëtsábenga imomnënga, y más chë romanëngbe mandadbe bëts yebnoca oyenënga, cmontsacheuaná.

23 Atše sëntseimpadana Bëngbe Utabná Jesucristo, chaoma tsëngaftangbeñe tsabe bendicionënga chaotsemnama.

Colosenses

Jacheuayama

¹ Atše Pablo, Jesucristbe ichmoná Běngbe Bětsá chca yobóseyeca, y Jesucristbeyeca běngbe catšata Timotéoftaca,

² quem tsbuanácha sěntsabiamná chě Colosas puebloca Běngbe Bětsábenga imomněngbiana. Tšěngaftanga běngcá Jesucristbeñe ošbuáchiyěnga šmondměna, y chca, Jesucristbeyeca běngbe catšátanga. Atše sěntseimpadana Běngbe Bětsá Běngbe Taitá, chaoma tšabe bendicioněnga tšěngaftangbeñe chaotsemnama, y chaoma tšěngaftangbe ainaniñe tšabe ebionana chašmotsebonnama.

Pablo, Běngbe Bětsábioye tbojanimpadá Colosas puebloca ošbuáchiyěngbiana

³ Běngbe Bětsá, Běngbe Utabná Jesucristbe Taitá tšěngaftangbiana fstseimpadana ora, cha sempre fchandbětsatschuanaye,

⁴ er běnga fsěnjátatšěmbona ntšamo tšěngaftanga Cristo Jesúsbeñe tša šmojtsošbuáchem, y ntšamo tšěngaftanga nyětscanga chě Běngbe Bětsábenga imomněnga šmababuánjěshanama.

⁵ Natsanama, chě ndegombre buayenánama, chě tšabe noticiěnga, tšěngaftanga tcmojanabuatambá ora, tšěngaftanga botamana šmojanuena ntšamo chě buayenániñe bejtsayancá, chě tšěngaftanga šmojtsobena tšabe soyama jobátmána, Běngbe Bětsábeñe jtsošbuáchiyěse. Chě šmotsobatmana soye entsama tšěngaftanga Jesucristbeñe puerte chašmotsošbuáchem y nyětscanga chašmotsababuánjěshanama. Běngbe Bětsá celoca enduaquěcjná chě tšěngaftanga šmojtsobatmana tšabe soye.

⁶ Chě tšěngaftanga tcmojanabuayená tšabe noticiěnga más bětscá entšanga montsuenana; y chca, nyěts quem luarentše entšanga montsiyena más tšabe soyěnga jtsaměse. Chca entsemna ntšamo tšěngaftangbentše tojopasacá, chě natsana te chě tšěngaftanga Běngbe Bětsabe tšabiánama šmojanuena orscana, y ntšamo Běngbe Bětsá puerte bonshanánaca y tšabiánaca běngbioye šuanjěnama ndegombre cmojanosérta orscana.

⁷ Y chca Epafras tšěngaftanga tcmojanabuatambá, Běngbe Bětsabe bonshánama y tšabiánama. Epafras endměna canya běngaftaca Cristbiana oservená, y cha běnga fsěndbobonshana; cha Cristbiana endětrabája běngbe cuenta tšěngaftangbentše.

⁸ Cha šonjáuyana ntšamo chě Uámana Espíritu vojtsama, nyětscanga Jesucristbeñe ošbuachiyěngbioye chašmotsababuánjěshanama.

⁹ Lempe ntšamo tšěngaftangaftaca tojopasama, chě natsana te tšěngaftangbiana fsěnjajuena orscana y měntscoñama, Běngbe Bětsá sempre tšěngaftangbiana fchandbětseimpadana, cháftaca fstsencuěnta ora. Běngbe Bětsá fsěnděimpadana, chabe Espíritu chaoma tšěngaftanga chašmotsobena jtsatšěmbuana y jtsosertánana, chca, ntšamo Běngbe Bětsá yobošcá chašmotsamama, tšěngaftanga tšabá chašmotsetatšěmbuana.

¹⁰ Y chca, tšěngaftanga šmochantsobena jtsiyenana jtsaměse ntšamo Běngbe Utabná yobošcá, y sempre šmochántsama ntšamo chabiana tšabá yomncá. Ntšamo tšěngaftanga chašmojtsiyencá tšabe soyěnga jtsaměse, chentšana

nýetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma.

11 Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëts añemo chašmotsebmoma; y chca, tšëngaftanga chë padecena soyënguiñe chašmojtsemna ora, puerte uantadënga chašmotsebmoma, y ainaniñe añémoca Bëngbe Bëtsábeñe becá chašmotsobátmanama.

12 Y puerte oyejuayënga Bëngbe Taitá šmochántatschuanaye, nda iuama bënga chamotsobena ntšamo cha chabe entšanga jatšatayama tojašebuachenacá jtsebmoma. Tšëngaftanga šmochanjóyëngacñe ntšamo cmojtsëtocancá celoca, chë corente buashinýinýana luarentše.

13 Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšentšana, y tojama chë chabe bonshana Uaquiñabe amëndayana bëngbe ainaniñe chamotsebmoma;

14 Chábeyeca Bëngbe Bëtsá Satanasbe cucuatšentšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

Cristo tojanóbana yeca, entsanga Bëngbe Bëtsáftaca tšabá jtsatsmënana

15 Cristo tmonjáninýe ora, bënga tmojántatšëmbona ntšamo Bëngbe Bëtsá yomnana; entsanga imojobena cha jinýama, pero Bëngbe Bëtsábiyoe ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna.

16 Chábeyeca Bëngbe Bëtsá tojama lempe ntšamo celoca y quem luarentše yobinýncá, lempe ntšamo chë entsanga imobena o ndoñe mondobena jinýama soyënga, y chë espíritëngnaca chë imobena ínýëngbiyoe jtsamëndayana y obenana imobomna. Bëngbe Bëtsá, chábeyeca y chabiamna tojama, lempe ntšamo quem luarentše yobinýncá.

17 Bëngbe Bëtsá cabá nýetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsebmoma yojamncá.

18 Cha endmëna nda nýetscanga Bëngbe Utabnábeñe ošbuáchiyënga iuamënda, ntšamo chë bestšaše nýetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotsebmoma, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochatsatsmëñënguentšana, cha chë natsaná chaotsebmoma; nýe cha canya chë más uámana luare chaotsebmoma, nýetscañe chaotsemándayama.

19 Er Bëngbe Bëtsá yojanjuabná cachabiamna tšabá yojamna, lempe ntšamo cha yomncá, chabe Uaquiñabeñnaca chaotsebmoma,

20 y Bëngbe Bëtsá tojánbošena, Crístbeyeca nýetsca soyënga quem luarentše y celoca, cháftaca tempcá tšabá chaotsatsmënana. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nýetsca soyënga quem luarentše y celoca, cháftaca tempcá tšabá chaotsatsmënana.

21 Tempo, tšëngaftanga Bëngbe Bëtsá stëtsoye šmojanquedá y chábeyoe uyayënga šmojamna, bacna soyënga šmojanjuabná y šmojánama causa;

22 pero mora chabe Uaquiñáftaca, cha mo canýe entsacá jóbanëse, Bëngbe Bëtsá tojama tšëngaftanga tempcá tšabá cháftaca chašmotsatsmënana; y chca tojama, tšëngaftanga chabe delante nýets tempo chašmotsebmoma; chora tšëngaftanga, chabe entsanga, ainaniñe ndocna bacna soye ndbomñënga

chašmotsemnana, y ndocná chaundayana ntšamo šmojamcá ndoñe tšabá yontsemna ca.

²³ Pero tšëngaftanga cmontsamna chë bëtscá ošbuáchiyana šmondobomnana nÿets tempo jtsebomnana, Bëngbe Utabnábeñe jtsošbuáchiyama ndocna te ntjajbanacá. Nÿets tempo chë tšabe noticiënguiñe šmochtsošbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nÿe chca puerte jtsošbuáchiyëse Bëngbe Bëtsábeñe šmochtsošbátmana, ntšamo tšëngaftanga šmojanmcá, Jesucristbiana buayenánana šmojanuena ora. Chë buayenánana endmëna ntšamo ba entsanga nÿetsca quem luarentša entšángbioye tmojabuayenacá, y atšbe trabajo endmëna cach tšabe noticiëngama entsanga jtسابuayiynayana.

Pablo, ošbuáchiyënga jasérviana trabajo tmojanbonjë

²⁴ Atše corente sënjesoyejuá mora tšëngaftangbiana jasúfriama stsobenama. Ba entsanga entsamna jasúfriana Cristo jasérviana, y atše sëntsesufrina ntšamo Cristo tojansufricá, mora atše jtseufrinëse chabe cuenta, ntšamo jasúfriama yomncá. Y ntšamo sëntsesufrincá entsemna Crístbeñe ošbuáchiyëngbe tšabiana, chë chabe cuerpcá imomnënga, chënga Crístbenga bëtsemnana.

²⁵ Bëngbe Bëtsá atše šojábema chë Jesucristbeñe ošbuáchiyëngbe canÿe ujabuachaná. Cachá chë trabajuama šojanábuayana, chca jamëse, tšëngaftangbe tšabiana chaotsemnana. Chë trabajo endmëna, lempe ntšamo cha tojayancá entsanga jábuayenana.

²⁶ Bëngbe Bëtsá nÿetsca entsanga ndoñe tonjanalesenciá, quem luare jobojátšama orscana y nÿets tempo chë buayenánana chamotsetatšëmbuama; pero mora, chábënga imomnënga chë soye cha tojinÿanjé.

²⁷ Bëngbe Bëtsá yoboše, chabe entsanga imomnënga chamotsábuatmama ndayá tempo chënga ndoñe tonjaninÿanjëcá; y yoboše chë ndoñe judiënga jinÿanjÿiyama tša bëts y tšabe soye yomna chë ndegombre buayenánana, ndayá tempo ínÿënga ndoñe tonjaninÿanjëcá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojt-siyena, y chábeñe puerte jtsošbuáchiyëse šmojtsobena jtsošbátmanana, Bëngbe Bëtsá puerte bëtsëtsanga y uámanënga chácmabiamama, batšá ntšamo cachá yomncá.

²⁸ Bënga nÿetscángbioye Jesucristbiana fchandbëtsabuayiynaye; fchandbëtsëtsësnaye ndayá chënga ndoñe yontsamna jtsamana, y fsëndbëtsabuatambaye nÿets osertanánaca ndayá chënga aiñe yojtsamna jtsamana, y chca, nÿetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crístoftaca cánÿiñe mo canÿacá jtsemnëse.

²⁹ Chca chaotsemnana, atše bëtscá sëndëtrabája; y chca séntsama, chë Cristo yojtsama atše chaitsebomnana bëts obenánaca.

2

¹ Atše sëntseboše tšëngaftanga chašmotsetatšëmbo, Bëngbe Bëtsá becá tsimpadánana, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinÿe ošbuáchiyëngnaca.

² Atše chca sëndama, tšëngaftanga y chënga ainaniñe bëts añemo chašmotsebomnana, y cánÿiñe mo canÿacá chašmotsemanama,

nÿetscanga jtsenbobonshánese. Chca, nÿets osertánana tsëngaftanga chašmotsebmoma, y chë tempo Bëngbe Bëtsá entsanga ndoñe tonjaninÿanyé buayenánama chašmotsetatšëmbuama, y chë buayenánana Cristbe soye entsemna.

³ Mo canÿe bëtscá bomnana iytëmena soycá pero mora ya uinÿenana, cachcá Cristbeñe entsemna nÿets osertánana y obenana Bëngbe Bëtsá jtsabu-atmama. Chë soye tempo Bëngbe Bëtsá entsanga ndoñe tonjaninÿanyé, pero mora Cristo yojtsama bënga chë uámana soyënga chamotsebmoma.

⁴ Atše chca séntsihamo, botamana palabrëngaca ndocná chacmondáingñema.

⁵ Er masque choca tsëngaftangaftaca atše ndoñe quetsátsmëna, atšbe ainana aiñe choca tsëngaftangaftaca entsemna; y atše puerte séntsoyejuá tsëngaftanga šmatenÿeunanama y nÿets tempo Bëngbe Bëtsábeñe šmojtsošbuáchemo.

Cristofaca cánÿiñe mo canÿacá jtsemnëse, entsanga ndegombre tsabe vida jtsebmomana

⁶ Tsëngaftanga Jesucristbeñe ošbuáchiyënga šmojanóbiamo ora, šmojanayana: “Cristo Jesús, Bëngbe Utabná jtsemna ca”. Chcasna, tsëngaftanga cmontsamna tsiyenana soyënga jtsamëse mo chë cháftaca cánÿiñe mo canÿacá tojtsemnacá.

⁷ Chca šmotsobena jamana, cháftaca cánÿiñe mo canÿacá nÿets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiamo buayenana soyëngama, ntšamo tcmojabatambacá; y Bëngbe Bëtsá sempre šmochtsatschuanaye.

⁸ Cuedado šmochtsebmoma, ndoñe šmatjaleséncia ndocná chaondëtsamama tsëngaftanga jtsajbanama Cristbeñe ošbuáchiyana jtsebmomana. Chca entsanga montseboše juabnëngaca tsëngaftanga jáingñama, nÿe básefta entsangbe juabnënga y tondayama ndoservena juabnënga. Chë juabnënga jtsóbocanana ntšamo bëtš taitanga básengbiyoye mondbetsabuátambayentšana y chë espíritëngbentšana, ndëmuanyëngbiamo entsanga jtsejuabnayana chënga nÿetsca soyënguiñe imománda ca; pero Cristbentšana chë juabnënga ndoñe ntšóbocanana.

⁹ Cristo endmëna cachcá ntšamo Bëngbe Bëtsá yomncá, masque mo canÿe entsacá quem luarentše yojëtsiyena;

¹⁰ y Bëngbe Bëtsá tojama tsëngaftanga ndegombre tsabe vida chašmotsebmoma, Cristofaca cánÿiñe mo canÿacá bëtsemnayeca; y Cristo, nÿetsca chë mándayënga y obenana bomnëngbiamo más uamaná endmëna.

¹¹ Tsëngaftanga Cristofaca cánÿiñe mo canÿacá bëtsemnayeca, mo uinÿenanëngcá šmontsemna, tsëngaftanga Bëngbe Bëtsabe entsanga šmomnana. Quem uinÿenanánana ndoñe quenátsmëna mo chë más delicadentše base bobachtema tmojatëtšcá, cach entsángbeyeca ntšamo judiënga monduamancá, pero aiñe entsemna cach Cristo nda tcmojauinÿaná; y chë uinÿenanánana entsemna, tsëngaftangbe ainanentšana Cristo bacna juabnënga jabuajuánayana.

¹² Tsëngaftanga šmojánenabaye ora, enjamna mo ntšamo cach Cristo tojoanabontsacá tsëngaftanga utebuantsánënga cuaftsemncá, er tsëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tsëngaftanga šmojánenabaye ora, enjamna mo tsëngaftanga chašmatayenama Bëngbe Bëtsá

cuafjamcá, er mora tsëngaftanga mo tsmëma entsangcá šmondoyena. Chca tojanopasá, Bëngbe Bëtsá obená bëtsemnama tsëngaftanga šmojtsošbuáchema, y chë obenana tojama Cristo cháuatayenama.

13 Inye tempo tsëngaftanga Bëngbe Bëtsabiana mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entsangcá ndoñe šmonjámnayeca, pero aíñe šmojanamana bacna soyënga jtsamana nye ntšamo šmojanbošcá. Morna Bëngbe Bëtsá tojama tsëngaftanga tsabe vida chašmotsëbomnama, Cristoftaca cánýiñe mo canýacá jtsemnëse, y Bëngbe Bëtsá bëngbe nyetsca bacna soyënga šoitsaperdoná.

14 Mo nda ba ndebënënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebënana pronto jtobocana ca, pero chë entsá chëchangá tojtsandbiama chë entsanga cha ndoñe más chamondëtsendebënana, Bëngbe Bëtsá cachcá tojama, bacna soyëngama bënga šoitsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebënana tojtsanpochocá cuenta.

15 Jesucristo cruciñe tojanóbanayeca, Bëngbe Bëtsá tojanayëñaná Satanás y chabe bacna espíritënga obenana bomnënga y ínýngbiöye amëndayënga; y nyetsca entsangbe delante tojaninýanýé cha chënga jtsamëndayama yobënama, mo canýe reyca chë ínýnga tojayëñaná ora, chabe entsángaftaca natsana jtsayana y chë ayëñanánëngna ústonoye.

Ainaniñe becá jtsebošana chë ošbuáchiyëngbiana celoca yomna soyënga

16 Ndoñe caso šmattsabiamnaye, ndoñe tsabá šmotsama ca ínýnga tsëngaftangbiana tmojtsichamo ora, ndayá tsëngaftanga šmétsesaye o šmétsöfšësnayama, o ndayá aíñe o ndoñe šmondëtsamama Bëngbe Bëtsá jadórama fiestënga ora o shbojueta fiesta ora, o jóchnama tese.

17 Bayté entsemna, Bëngbe Bëtsá entsangbe cucuatšíñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninýanýnaye ndayá más chöyöe jopásama; entsángbiöye yojaninýanýnaye ndayá Cristo yochjanmama.

18 Báseftanga mondmëna y chënga mo nduamanëngcá entsángbeñe jtsebinýnana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tsëngaftanga ndoñe tsabá šmotsama ca chënga tmojtsichamo ora, ntšamo chënga tmojtsichamcá tsëngaftanga ndoñe šmotsámayeca. Chënga jtsichámuana bëtš soyënga mo otjenayoquécá tmojinýe ca, y nye cachënga puerte jtsenábotamnayana, pero chca chamotsamama razón ndoñe quemátsbomna, er nye ntšamo inye entsanga imnetsejuabnacyá chëngnaca cachcá jtsejuabnayana.

19 Chënga Jesucristoftaca cánýiñe ndoñe tmonjoquedanga, y Cristo endmëna chë nyetsca ošbuáchiyëngbe amëndayá, mo chë bestšaše nyets cuerpo jtsemandayancá. Canýe cuerpiñe chë bestšaše jtsamana nyets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nyetsca chë cuerpentša soyënga chameneffjanama jtsamëse. Cachcá, Cristo jtsamana nyetsca ošbuáchiyënga cánýiñe mo canýacá cháftaca chamotsemnama, y cada te más tsabá cha chašmotsábuatmama.

²⁰ Cristo tojanóbana ora enjamna mo tšëngaftágnaca cuařjobancá, y Bëngbe Bëtsá tšëngaftanga cmořatsebacá chë quem luarentše imománda espíritëngbe cucuatšentsana. As, ¿tšëngaftanga ndáyeca šmořtsiyena jtsamëse mo chë nýe quem luarama enořuabnayëngcá? ¿Ndáyeca tšëngaftanga cabá šmobedecena chca mandënga, mo:

²¹ “Chë soye ndoňe matsbanana, chca soye ndoňe catjase, o chë soye acbe cucuatšeca ndoňe catjaca ca”?

²² Lempe chë mandënga, chë ndayá canýa ndoňe bontsemna jamana, nýe soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nýe ntšamo entšanga mondbetsamcá y ínýengbioye mondbetsabuatambaycá.

²³ Ndegombre, ba entšanga jtseřuabnayana chë mandënga tořamëngbiam, puerte osertanáncaca chca tmořama ca, pero ndegombre chca ndoňe quenátsmëna; er chënga jtsichámuana, ntšamo Bëngbe Bëtsá řadórana yomncá imořtsabuatambá ca, jtsabuátambayana entšá cabnmëna uamaná ndoňe ntsenobiamnayana ca, y řabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentsana ndoňe ntřajuánana chë bacna soyënga jtsamama řuabnënga.

3

¹ Cristo cháuatayenama Bëngbe Bëtsá tořanma ora, enjamna mo tšëngaftágnaca Crístbeňe ošřuáchiyënga, chašmatayenama cha cuařřamcá. Chíyeca, tšëngaftangbe ainaniňe puerte šmochťseboše ndayá Bëngbe Bëtsá celoca tšëngaftangbiam yobomncá; y choca, Cristo uámana puestentše endëťbemana, Bëngbe Bëťsabe catšbioica. Y šmochťsinýinýnaye chca šmořťsebošama, ntšamo jtsamëse mora šmořťsiyenama.

² Tšëngaftanga nýets tempo chë celoca soyëngama šmochťseřuabnaye, ndoňe chë nýe quem luarentše yomna soyëngama.

³ Tšëngaftanga Críštořaca cánýiňe mo canýacá jtsemnëse, jtsemnana mo tšëngaftanga ya cuařřobancá, er mora ya ndoňe quešmáťiyena tempcá jtsamëse. Cristo, Bëngbe Bëťsářtaca cánýiňe mo canýacá endmëna, y Cristo endmëna nda mora tšëngaftangbe vida yojťsinýena.

⁴ Ndegombre, Cristo endmëna nda endama tšëngaftanga řšabe vida chašmotsebomnama; y quem luarentše cha cachiňe chaořtonýná ora, tšëngaftágnaca chentše chářtaca šmochántsemna, y chora ntšamo Cristo corente uamaná y bëťsá yomnama Bëngbe Bëťsá yochjínýanýiycá, tšëngaftangbiámncaca echanjínýanýiye más bëťsętsanga y uamanënga šmořťsemnama.

Tempscá vida y morscá vida

⁵ Tšëngaftanga, ntšamo chë nýe quem luarama enóřuabnayënga mondbetsebošcá bošana lempe šmochťsajřaná. Ndocná chaondëťseboše ndaye bacna soye boyabása o šembásářtaca jtsamana, ni chca soyënguiňe ndoňe chaondëťseřuabná; ndoňe chaondëťsiyenana nýe ínýengbiam bacna řuabnënga jtsebomnëse, y ndoňe chaondëťseboše nýe bëťscá soyënga ínýengbiam más jtsebomnama, er chca jtsamana jtsayanana, chabiam más yojťsámana soyënga jtsebomnana, Bëngbe Bëťsá jatsbobonšánama.

⁶ Er entšanga mondmëna y chënga chca soyënga jtsamama jtsebošana, y Bëngbe Bëťsá ndoňe ntseyeanana. Chca entšangářtaca Bëngbe Bëťsá puerte

bochanjetna, y echanjamánda chë uabouana castigo chëngbeñe chaotsemnama.

⁷ Y tempo, tsëngaftanga šmojaniyena jtsamëse, sempre nÿe chca bacna juabnëngaca,

⁸ pero mora tsëngaftanga cmontsamna lempe quem soyënga stëtsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tsabe palabrënga jtsóyebuambnayana.

⁹ Ndoñe šmattsenbuambnaye, er ntšamo tempo šmojamncá mora tsëngaftanga ya ndoñe cachcá quemátsmëna, y mora ndoñe quemátiyena jtsamëse ntšamo tempo šmojanamcá.

¹⁰ Y mora tsëngaftanga šmojashjache jtsemnama mo tsmëma entsangcá, y ntšamo tempo šmojanamcá ndoñe cachcá quemátama. Bëngbe Bëtsá chca tsmëma entsangcá tcmojábiamia; y cha nÿets tempo yojtsama, tsëngaftanga cada te más ntšamo cha yomncá chašmotsemnana, chca, corente tsabá cha chašmuábuatmanama.

¹¹ Chiyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentse base bobachtema tëtšenënga ndoñe más uámanënga quemátsmëna chë ndoñe chca mondmënëngbiamia; chë ínÿe luarëngocana áshjajñënga, bën tjoye oyenënga, chë nÿe ínÿabiamia nÿets tempo oservénënga y chë cachëngbiamia trabájayënga, nÿetscanga cachcanga mondmëna. Chë nÿe ndayá iuámana endmëna Crístbeñe jtsošbuáchiyana y nÿetsca ošbuáchiyëngbe ainaniñe cha yojtsemna jtsemándayama.

¹² Tsëngaftanga Bëngbe Bëtsábënga šmondmëna. Cha cmondábuanÿeshana y tcmojabacacá chabe entsanga chašmotsemnana; chiyeca, tsëngaftanga cmontsamna ínÿenga jtsinÿanÿnayana nÿetscangbiamia jóngmiamia šmuamanama, tsabe juabna ínÿengbiamia sempre šmnétsebomnana, cada ona chë ínÿenga chabiamia más uámanënga cuaftsemncá imnétsejuabnayama, nÿetscanga puerte bonshanánaca šmnétsënÿayama, y nÿetsca padecena soyënguñe corente uantadënga šmomnana.

¹³ Nÿetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tsëngaftanga tcmojaperdonacá, tsëngaftángnaca cachcá ínÿenga šmochjáperdonaye.

¹⁴ Lempe chë soyëngama más enduámana nÿetscanga jtsenbobonshánana. Nÿetscanga šmojtsenbobonshánëse, tsëngaftanga šmochantsobena sempre lempe chë ínÿe soyënga corente tsabá jtsamana, ntšamo ndegombre chë soyënga jamama yomncá.

¹⁵ Cristo endama tsëngaftangbe ainaniñe tsabe ebionana chašmotsebomnana. Chë tsëngaftangbe ainaniñe tsabe ebionánaca šmochtsiyena nÿetscanga natjëmbana, Jesucrístbeñe ošbuáchiyënga quetsomñecá. Bëngbe Bëtsá tcmojáchembo tsëngaftanga nÿetscanga cánÿiñe mo canÿe cuerpcá chašmotsemnana, y chca, natjëmbana chašmotsiyenama. Bëngbe Bëtsá sempre šmochtsatschuanaye.

¹⁶ Chë Crístbe puerte tsabe buayenana soyënga tsëngaftangbe ainaniñe nÿets tempo šmochtsambaye. Nÿets osertanánaca šmochtsenbuátëmbaye y šmochtsenbuayiynaye. Nÿets ainánaca šmochjacánta chë Salmos librëšañe uabemana cantënga, chë Jesucrístbe soyëngama cantënga, y chë Bëngbe

Bètsabe Espiritu iuama tšèngaftanga chašmotsobena jacántama soyènga; chca šmochjama Bèngbe Bètsá jètschuayama.

17 Y lempe ntšamo chašmojtsama o chašmotsichamcá, Bèngbe Utabná Jesúsbeñe ošbuáchiyènga quetsomñecá chca šmochjama, sempre Bèngbe Bètsá Bèngbe Taitábioye, chábeyeca jtsatschuanayèse.

Ntšamo ín'yengaftaca jtsiyenama

18 Shémanga, šmochtsetátšëmbo tšèngaftangbe boyanga chë yebnentsa mándayènga imomnana, y nyets tempo chca jtsejuabnayèse šmochtsiyena, er tšèngaftanga Bèngbe Utabnábeñe ošbuáchiyènga quetsomñecá, chca cmontsamna.

19 Boyanga, tšèngaftangbe shémanga sempre šmochtsababuán'yeshana, y podesa palabréngaca ndoñe šmattsètsètsnaye.

20 Básenga, tšèngaftangbe bètsétsanga nyétscañe šmochtsayaunana; chca šmojtsamèse, Bèngbe Bètsá oyejuayá echántsemna.

21 Taitanga, ndoñe šmattsama tšèngaftangbe básenga chauetënana, ainaniñe tondaye añémoca chènga ndoñe chamondètsatsmènama.

22 Tšèngaftanga chë nyets tempo nye ín'yabiana oservénènga, tšèngaftangbe nduñiènga nyétscañe šmochtsayaunana, y ndoñe nye chènga tcmojtsén'ya ora, mo nda nye entsangbe delante tšabá joquédama tojtsebošacá, ndayá chènga šmochtsayaunana nyets ainaniñe ndegombre tšabe juabnéngaca, er tšèngaftanga Bèngbe Utabnabiana corente respeto šmond'bomna.

23 Lempe ntšamo chašmojtsamcá, nyets tšèngaftangbe añémoca šmochtsama, mo Bèngbe Utabná ndegombre cuafseservencá, y ndoñe nye entsangbioycá.

24 Tšèngaftanga ya šmondètatsëmbo, ntšamo cha chabe entsanga tojašebuachenacá mo uacanancá, Bèngbe Utabná tšèngaftanga cmochjátsatayama. Er Cristo, chë Utabná, endmèna ndábenga tšèngaftanga šmomnana, y cha šmondèservena.

25 Pero chë ndoñe tšabe soyènga tontsamábioye, Bèngbe Bètsá bochanjacastíga, ntšamo chë entsá bacna soyènga tojamcá, er Bèngbe Bètsabiana nyétscanga cachcá monduámána.

4

1 Y tšèngaftanga, ndëmuan'yèngbiana ín'yènga nyets tempo imoservena, nyetsca soyènguiñe tšabá šmochtsama, y nyétschangbiana cachcá šmochtsemna, chë nyets tempo nye tšèngaftangbiana oservén'ngaftaca, er tšèngaftanga šmondètatsëmbo celoca can'ya endmèna, ndabiana tšèngaftangnaca oservénènga šmondmèna.

Ošbuáchiyènga jábuayenama

2 Nyets tempo Bèngbe Bètsáftaca šmochtsencuéntaye, ntšamo šmojtsichámuama botamana jtsejuabnayèse y Bèngbe Bètsá jtsatschuanayèse.

3 Bèngbe Bètsáftaca cha šmojtsencuénta ora, bèngbiámnaca chašmochtseimpadana, cha chaoma bènga fchayobenama Bèngbe Bètsabe palabra Cristbiana entsanga jábuayenama, chë buayenana soye ndayama tempo entsanga ndoñe monjántatsëmbo. Atše chë buayenana soye entsanga abuátambaye causa, mora cárceloje sèntsétámèna.

⁴ Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše sontsemna chca jamana.

⁵ Smochtsiyena nÿetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nÿets tempo inÿenga šmochtsinÿanÿnaye tšëngaftanga Jesucristbeñe ošbuáchiyënga bëtsemnama.

⁶ Inÿëngaftaca chašmojtseucúenta ora, šmochtsama ntšamo šmojtsoyebuambnacá chëngbiana tšabá chaotsemnama, y soyënga šmochtsichamo nÿetscanga oyejuayana chamotsebonnama; y šmochtsetátšëmbo ntšamo cmojtsamna cada cánÿabioye jojuana.

Jtadiósoftanama

⁷ Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiana bëngaftaca oservená, tšëngaftangbioye noticiënga echanjuamba ndayá átšeftaca tojopasama.

⁸ Chÿeyca cha tšëngaftangbioye sëntsichamná, chca, tšëngaftanga chašmotsetatšëmbuama ndayá bëngaftaca yojtsofasana, y cha chacmañémuayama.

⁹ Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsofasaná.

¹⁰ Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamana cmojtsamnana, Marcos tšabá jojjama, cha tšëngaftanga jautšëtsayama tojase.

¹¹ Jesús, chë justo cánaca uabainá, chánaca cmontsacheuaná. Quem pueblentša nÿetsca judiënga ošbuáchiyënguentšana, nÿe chë unga átšeftaca mondëtrabája, Bëngbe Bëtsabe amëndayana entšangbioye chaóshjanguama, y chënga mondama atše ainaniñe bëtš añemo chaitsebonnama.

¹² Epáfrasnaca cmontsacheuaná, inÿe tšëngaftangbiocá y cha Cristo Jesusbiana jatrabájama endoservena. Cha nÿets tempo tšëngaftangbiana Bëngbe Bëtsábioye tša bochandbëtseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nÿets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtšamncá; y chca, tšëngaftanga corente šmochántsetatšëmbo ntšamo šmojtšamcá ndegombre yomna ntšamo Bëngbe Bëtsá yobošcá.

¹³ Cach atše sënjinÿe y sëntsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis pueblaca oyenëngnaca.

¹⁴ Lucas, bëngbe bonshana ashnayá, cmontsacheuaná; y Démasnaca.

¹⁵ Chë Laodiceoca Jesucristbeyeca catšátanga bëngbe cuenta šmochjácheuaye. Ninfábionaca šmochjachuaye, y nÿetsca ošbuáchiyënga chë Bëngbe Bëtsá jëtschuayama chabe yebnentše jënefnama imuamanëngnaca.

¹⁶ Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócnaca mëcha chamualiamia; y tšëngaftángnaca šmochjualia chë Laodiceoca ošbuachiyëngbioye tmonjaníchmó tsbuanácha, chëcha tšëngaftangbioye chaojuáshjango ora.

¹⁷ Arquipo šmochjauyana yejuana chaotsantješna chë Bëngbe Bëtsá tbojabonÿé trabajo sempre tšabá chaotsocumplínama.

¹⁸ Atše Pablo, n̄ye quem palabrēnga tšēngaftanga jacheuayama cach atšbe cucuátšeca sēntsabianná. Smochtsenójuabnaye atše utamená stsemnama. Atše, Bēngbe Bětsá sēntseimpadana, cha chaoma tšabe bendicionēnga tšēngaftangbeñe chaotsemnama.

1 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tsëngaftangbiana, chë Tesalónica bëts puebloca Jesucristbeñe ošbuáchiyëngbiana, tsëngaftanga chë Bëngbe Bëtsá chë Taitá y Bëngbe Utabná Jesucristoftaca cányiñe mo canyáca šmommënga. Atše sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnana, y tsëngaftanga ainaniñe tsabe ebionana chašmotsebonnana.

Pablo Bëngbe Bëtsábioye tbojtanchúa chë Tesalónica pueblentsa entsangbe ošbuáchiyama

² Bënga sempre Bëngbe Bëtsá fsëndëtschuaná tsëngaftangbiana, y bënga cháftaca ftsencuénta ora, tsëngaftangbiana fchandbëtseimpadana.

³ Bënga, Bëngbe Bëtsá chë Taitáftaca ftsencuénta ora, fsëndbëtseñojuabnaye ntšamo tsëngaftanga šmotrabájama, Jesucristbeñe ošbuáchiyana šmobómnyayeca; ntšamo tsëngaftanga tša ínÿenga šmëjabuáchana, Jesucristo šmobobonshánayeca; y ntšamo tsëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama.

⁴ Jesucristbeyeca catsátanga, bënga fsëndëtatsëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnana.

⁵ Bënga chë tsabe noticiënga Jesucristbiana tcbonjanabuayén ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácna, y bënga corente jtsejuabnaye chë buayenánana ndegombre soye bëtsemnana. Tsëngaftanga corente šmondëtatsëmbo ntšamo bënga ftsjamna tsëngaftangaftaca fsënjamna ora, tsabe soyënga tsëngaftangbiana nguayíñe.

⁶ Chora, ntšamo bënga fsënjanamcá y ntšamo Bëngbe Utabná enjaneyencá, tsëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatsátá oyejuayánaca, masque ínÿenga tmojamna tsëngaftanga puerte chašmosufrima.

⁷ Mëntsá, tsëngaftanga uánatsanënga šmonjanobiama ntšamo ndegombre jtseyenama, nÿetsca Macedonia y Acaya luarentša Jesucristbeñe ošbuáchiyëngbiana.

⁸ Tsëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatsëmbo —nÿets luarenache entságnaca montsetátšëmbo ntšamo tsëngaftanga Bëngbe Bëtsábeñe šmojtsošbuáchema —y chca, bënga tondaye más quešnátëjaboto tsëngaftangbiana jatichámuama.

⁹ Cach entsanga montsoyebuambná chë bënga tcbonjánabuache ora tšabá tsëngaftanga šcojanëbuajama. Chëngnaca montsichamo ntšamo tsëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tsabe benache jtishachama, y chë Bëngbe Bëtsá ndegombrá y ainá jasérviamá,

¹⁰ y chca, chabe Uaquiñá Jesús jobátmama; mua celocana echanjésabo; chabiana Bëngbe Bëtsá tojanma obanënguentšana cháuatayenama, y cha

šochanjátsebacaye chë uabouana castigüentsana, Bëngbe Bëtsá entsangbe bacna soyëngama chëngbiana yobomnentsana.

2

Ntšamo Pablo yojantrabája Tesalónica puebloca

¹ Cach tšëngaftanga, Jesucristbeyeca catšátanga, šmondëtatšëmbo bënga tcbonjánabuache ora ndoñe nýe bonamente quenjatsmënana.

² Tšëngaftanga šmondëtatšëmbo, bënga cabá tšëngaftangbiye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tšabe noticiënga bëtsá añemoca jabuátambama.

³ Er bënga entsángbiye bostero soyënga ndoñe queftsjatanabuayiná, tšëngaftangbiana bacna soyënga ndoñe queftsjatanboše, y entsanga jáingñama ndoñe queftsjatanoyebuambná.

⁴ Bëngna inýetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tšabe noticiënga entsanga jabuátambama, y chca bënga fsëndoyebuambná; chíyeca bënga ndoñe nýe entsangbe bominyiñe tšabá chaotsinýnama queftsátama, ndayá nýe Bëngbe Bëtsabiana, nda chë ndayá bëngbe ainaniñe yomnama yotátšëmbo.

⁵ Ntšamo tšëngaftanga corente šmondëtatšëmbcá, bënga ndocna te tšëngaftangbiana tšabe soyënga tifjánayana, tšëngaftanga bëngaftaca oyejuayënga chašmotsemnama; y ntšamo tšëngaftanga cbonjanëtsëtsnacá ndoñe quenjatsmëna nýe tšëngaftangbentsana ba soyënga bëngbiana josháchiñama. Bëngbe Bëtsá chama yotátšëmbo.

⁶ Ndocna te bënga queftsatsnguá entsanga más uamanëngcá bënga chašotsabiamnama, ni tšëngaftangbentsana, ni inýengbentsana.

⁷ Masque bënga, Cristbe ichmónënga bëtsemnama, matifjanobená tšëngaftanga nýe sempre jtsamëndayana, bënga ndoñe chca chibiátanma; bënga corente jtsababuányëshanëse cbonjánányena, ntšamo canýe mamá chabe básënga jtsabëchayana y corente bonshanánaca jtsanýenana.

⁸ Tša cbonjánababuanýëshanayeca, bënga ndoñe nýe chë Bëngbe Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiannaca fsënjanprontana tšëngaftangbe tšabiana. ¡Tša cbondábabuanýëshana!

⁹ Jesucristbeyeca bëngbe catšátanga, tšëngaftanga šmenabouíñna ntšamo bënga bëtsá y jabuache fsënjatrabajama, Bëngbe Bëtsabe tšabe noticiënga abuayinayíne y bëngbe vida onguayíne, chca, tšëngaftanga ndoñe chacmondëtsamnama bëngbe uajabótama bënga jatatšatnayama.

¹⁰ Cach tšëngaftanga šmondëtatšëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjaniyena ntšamo Bëngbe Bëtsá tšabá tbojtsinýancá, nýetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjanamcá ndoñe tšabá yonjamna ca.

¹¹⁻¹² Tšëngaftanga šmondëtatšëmbo, bënga bëtscá jóyebuambayëse cada ona tšëngaftanguentsá cbonjanëjabuachanama y cbonjánañemuama, ntšamo canýe taitá chabe básëngaftaca endbetsamcá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá

cmontsëbuájajana chabe amëndayoye jamashënguama y chabe obenana y buashinÿinÿanana jinÿama.

¹³ Bënga, Bëngbe Bëtsabe tšabe soyënga chonjanabuayinã ora, ntšamo tcbonjanëyancá tšëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nÿe entšangbe oyebuambnayanã. Y ndegombre Bëngbe Bëtsabe buayenãnana endmëna, y chë palábraca, tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yoÿtsama. Chama sempre Bëngbe Bëtsá fsëndëtschuaná.

¹⁴ Jesucristbeyeca catšátanga, cach tšëngaftangbe luarentša entšanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entšanga mondmëna. Chënga tmonjansufrí cach luarentša entšanga, chë judiënga, chëngbioye monjanëcamena ora.

¹⁵ Chë judiëngbe bëtš taitanga, Bëngbe Bëtsabe juabna oyebuambnayëngbioye tmoÿtsanëbaye, y ntšamo chëngbe bëtš taitanga tmoÿtanmã, chëngnaca Bëngbe Utabná Jesúsbioye tmoÿtanóba, y chënga mondama bënga chaftsesufrinama. Chënga ndoñe tšábenga Bëngbe Bëtsabe bominÿiñe quemátsmëna, y nÿetsca entšangbe contra montsemna.

¹⁶ Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama. Judiënga nÿets tempo bacna soyënga monjánama; pero chë entšanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imoÿtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

Pablo tša yojánboše, Tesalónica puebloca entšanga jánjama

¹⁷ Jesucristbeyeca catšátanga, bënga tšëngaftangbentsana baseftayté jëftseboचना šonjanotocá ora, masque ndoñe choca tšëngaftangftaca queftsátanmëna, sempre tšëngaftangbiana fsënjanenouabná, y tša fsënjánboše tšëngaftangbioye jtésana jautsëtsayama.

¹⁸ Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama.

¹⁹ Atše séntsanboše tšëngaftanga jautsëtsayama, er tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerte jtsošbuáchiyëse fchantsobátmana, corente oyejuayënga fchtsemna y más bëtšëtsanga fchtsemna.

²⁰ Añe, ndegombre, ntšamo tšëngaftanga šmoyenama, bënga bëtscá añemoca ntšamo tšëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

3

¹ Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nÿe bëndata Atenas bëtš pueblentše joquédana,

² y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservëniñe, tšabe notiënga Cristbiana entšanga abuayinayinë. Fsënjanichmó chacmañémuayama y chaotsamama tšëngaftanga Jesucristbeñe más chašmotsošbuáchema;

³ y chca, ndocná Jesucristbeñe ošbuáchiyana chaondáibanama, masque tsëngaftanga Jesúsbeñe ošbuáchiyënga bëtsemnama, ínÿenga imojtsama chašmotsesufrínama. Er cach tsëngaftanga šmondëtatšëmbo bënga šojtsamna chca quem luarentše jëftsepadecénana.

⁴ Y cabá tsëngaftangaftaca fsënjëftsemna ora, tcbonjanëyana bënga šojánama jasúfriana; y ndegombre chca tonjopasá, ntšamo tsëngaftanga ya šmondëtatšëmbcá.

⁵ As y chë tsëngaftangbiamá jtsetatšëmbuama más jatobátmanana ndoñe quetstétsobenayeca, sënjanjuabó šojëtsemna Timoteo jíchmuana. Sënjanichmó atše jtsetatšëmbuama aífne bëtscá o ndoñe tsëngaftangbe ošbuáchiyana Jesucristbeñe tajoamnama, er atše yapa sënjanjuabná nderado Satanás tojanma tsëngaftanga bacna soyënga chašmotsamama, y chca, bëngbe trabajo tondayama chaondëtsosevënama.

⁶ Pero mora, Timoteo tsëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tsëngaftanga bëtscá Jesucristbeñe šmojtsošbuáchema y nÿetscanga šmenbobonshánama. Cha šonjacuntá ntšamo tsëngaftanga corente oyejuayënga bëngbiamá šmuatenjuabnama, y ntšamo tsëngaftanga tša šmojtseboše bënga jányama, cachcá ntšamo bënga tsëngaftanga jányama tša fsëntsebošcá.

⁷ Quem sóyeca, Jesucristbeyeca catšátanga, y mora chë bënga nÿetscá chë padecena soyënga fstseboamna ora y ínÿenga bënga jasúfriana imojtsama ora, bëts añemo fsëntseboamna, ntšamo tsëngaftanga tša Jesucristbeñe šmojtsošbuáchema jtsetatšëmbëse.

⁸ Jtsetatšëmbuana tsëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama.

⁹ Mora fchantsobena Bëngbe Bëtsá jtsatschuanayana tsëngaftangbiamá, y chë tsëngaftangbeyeca chabe delante bënga oyejuayana ftsbomnámnaca.

¹⁰ Cada te, bnëté y ibeta, tša Bëngbe Bëtsá fsëndëtseimpadana jobenayama tsëngaftanga jautsëtsayama chašualesenciamá, Bëngbe Bëtsabe palabra tšabá chašmobedecema, chë buayenánana ntšamo yojtšashbencá jabuátambama.

¹¹ Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tsëngaftangbioye jama jautsëtsayama.

¹² Y Bëngbe Utabná chaoma más bëtscá chašmotsenbobonshánama, y cachcá corente nÿetscángaftaca, ntšamo bënga cbondababuanÿeshancá.

¹³ Chca, tsëngaftangbe ainaniñe bëtscá añemo šmochántseboamna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaondayana, ntšamo tsëngaftanga šmojamcá ndoñe tšabá yontsemna ca, er tsëngaftanga šmondmëna Bëngbe Bëtsábënga, nÿe cha jtsesevënama.

4

Ntšamo jtsiyenama, Bëngbe Bëtsá oyejuayá chaotsemnama

¹ Y mora inÿe palabra šmochjatspaséncia. Jesucristbeyeca bëngbe catšátanga, tsëngaftanga bëngbentšana šmonjanatsjinÿe ntšamo jtsiyenana cmojánama, ntšamo Bëngbe Bëtsábioye oyejuayá jabemama yomncá, y ndegombre chca tsëngaftanga šmondoyena. Y mora Bëngbe Utabná Jesusbe cuenta, cbontšaimpadana y becá cbontsëtsëtsná más chca chašmotsamama.

2 Tsëngaftanga šmondëtatšëmbo ndayá tífánayana ntšamo tsëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca.

3 Bëngbe Bëtsá endboše tsëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama,

4 y nyëtsanga chamotsobena ntšamo canye shema jonguanguana, chë ntšamo canya Bëngbe Bëtsábia yomná jamama ibomncá, y ntšamo entšangbe bominyiñe tšabá yomncá,

5 y ndoñe chabondónguango nye cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá.

6 Chë palabriñe ndocná chabe catšátbioye chabondëingñë, chë catšatbe shëmaftaca bacna soye jamëse, er chca amëngbioye Bëngbe Utabná corente echanjácastigaye. Chiyeca bënga ya bëtscá chama tcbonjabuayená.

7 Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entšanga mondbetsamcá.

8 Mëntšá, nda quem buatëmbana soyënga tojtsábotena, cha ndoñe nye entšanga jtsëbátenana, ndayá Bëngbe Bëtsábioye, nda tsëngaftangbe ainaniñe Uámana Espíritu cháumashënguama tojama.

9 Atše ndoñe quešnátsmëna juabuábiamana ntšamo cmojtsamna ínýenga Jesucristbeñe ošbuáchiyënga jtsababuánýeshanama, er cach Bëngbe Bëtsá tcbonjabuatambá nyëtsanga chašmotsenbobonshánama.

10 Y ndegombre, tsëngaftanga chca šmondama nyëtsca Macedonia luar-entše Jesucristbeñe ošbuáchiyëngaftaca. Pero cbontsaïmpadana, Jesucristbeñe catšátanga, más chca chašmotsamama.

11 Nya sempre quem soyënguiñe šmochtsentšëna: natjëmbana jtsiyenana, ínýengbe soyënguiñe ndoñe ntsontremeténana, y ndoñe ntjatobátmanana nye ínýenga tsëngaftangbiam chamotsetrabájama, ntšamo tcbonjanëyancá tsëngaftangaftaca fsënjamna ora;

12 chca šmochtsama, chë ínýenga Jesucristbeñe ndošbuáchiyënga chacmot-sarrespetánama, y ndocnábeñe ntjatobatmancá šmochantsobena jtsiyenana.

Bëngbe Utabná quem luaroye yochjësabo ora

13 Bëngbe catšátanga, bënga fsëntseboše tsëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tsëngaftanga ndoñe ngenánaca chašmondëtsëmnama, mo chë ínýengcá, chë tcojóbanentšana ndoñe yontsemna jtayenama ca juabnayëngcá.

14 Bënga fsëndošbuaché Jesús tojanóbana y tojtayanayenama, y cachcá bënga fsëndošbuaché chë tmojóbanënga y Jesúsbeñe tmojtsošbuachese, Bëngbe Bëtsá chëngbiam yochjama chë nyëtsca tescama yomna tšabe vida Jesucristoftaca chamotsebomnama, y quem luaroye cháftaca chamuatábama.

15 Chë soyama bënga cbontsëtsëtsná ntšamo cach Bëngbe Utabná tojëtšanabatambacá: Bëngbe Utabná chaojësabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiam.

16 Er entšanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéfjua

juajatétamnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena;

17 chentšana, chë ainënga chamojtsemnënga chëngaftaca cánýiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nýetsca tescama cháftaca bënga mochántsemna.

18 Quem palabréngaca nýetscanga ndoñe más ngménana ainaniñe chašmondëtsebomna.

5

1 Jesucristbeyeca catšátanga, ndoñe quenátsiyta atše jubuábiamana mocna ora chë soyënga yochjopásama.

2 Cach tsëngaftanga corente šmondétatšëmbo, Bëngbe Utabná yochjésabo chama ndocná chaondëtsejuabná ora, mo canýe atbëbanacá jashjanguana ibeta ndocná chama tonjatsjuabná ora.

3 Entšanga chamojayana: “Lempe tšabá endëtsomñe y tondayama quešnátamna játauatjana ca”, chora nýe ndeolpe chë entšangbiamana tša jasúfriama echanjóshjango, mo canýe shembása šešona jtsebomnana ora nýe ndeolpe jasúfriama jóntšancá; y ndegombre, entšanga chca jasúfriama quemochatotsbocá.

4 Pero tsëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tsëngaftanga ndoñe auatjanánënga quešmochátsmëna, mo ndábioye canýe atbëbaná tbojotbá ora, chábioye cuaftsauatjanacá.

5 Nýetsca tsëngaftanga šmondmëna entšangbe juabna binýnayabe básenga, y mo binýniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena;

6 chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero añe šontsamna mo chë fšnëngcá jtсийenana, bëngbe cuerpo jtsemándayëse y nýets tempo jtseprontánëse.

7 Ibeta ora entšanga jtsemangana, y cach ibeta tojtsemna ora entšanga jotmenangana;

8 pero bënga, chë binýnentšëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanasbiamana jenëuyanama y cha jayëñjanama, mo canýe soldadcá, canýe morochi soye cochaca jenáčochjatsana jtsevalentiana y ndoñe chamondëyëñjanama. Y chë castigüentšana Bëngbe Bëtsá šochjätsebacamnaca puerte jtsošbuáchiyëse jtsošbátmanana; y chca, bënga mochántsemna mo canýe soldadcá, cha canýe casquëse juabuchëtsana jenëuyanama.

9 Er Bëngbe Bëtsá ndoñe šonjáchembo bënga chašontsamnama chë nýetsca tescama castigo jtsebomnana. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama.

10 Cha bëngbiamana tojanóbana, bënga cháftaca cánýiñe jtсийenama chamot-sobenama, masque ainënga o obanënga chamojtsemnëse, cha chaojésabo ora.

11 Chíyeca, nýetscanga šmochtsenañémuaye y šmochtsenájabuachana más jtsošbuáchiyama, ntšamo tsëngaftanga mora ya šmontsamcá.

12 Jesucristbeyeca catšátanga, cbontsaïmpadana chašmotsarrespetana chë Bëngbe Bëtsabiana tšëngaftangbeñe trabajayëngbiöye, y chë Bëngbe Utabná tšëngaftanguentše tojábacacanga uánatsanënga chamotsemnama y ntšamo jt-siyenama cmojtsamnama chácmabuayenama.

13 Cmontsamna chënga jtsarrespetánana y jtsababuánÿeshanana, ndaye trabajo chënga imojtsamama. Natjëmbana nÿetscángaftaca šmochtsiyena.

14 Quem soyënga chašmotsamámna c bontsaïmpadana: jatrabájama ndoñe tmontsebošëngbiöye šmochjucácana, añemo ndbomnëngbiöye šmochjáñemuaye, bëtsca ošbuáchiyana ndbomnëngbiöye šmochjújabuache, y uantadënga nÿetscángaftaca šmochtsemna.

15 Cuedado šmochtsebonna, nderado nda bacna soye tbojaborlase, ndocná ndoñe cachcá chabondëtachnënguama. Masna, nÿe šmochtsentšena nÿets tempo tšabe soyënga jtsamama cach tšëngaftanguentšëngaftaca y nÿetsca entšangaftácnaca.

16 Nÿets tempo oyejuayënga chašmotsemna.

17 Sempre Bëngbe Bëtsáftaca šmochtsencuëntaye.

18 Nÿetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamot-samama.

19 Ndoñe šmattsama ntšamo chë Uámana Espíritu tšëngaftangbeñe yojtsamcá chaotsopochocama.

20 Ndoñe šmattsábotena chë Bëngbe Bëtsabe juabna oyebuambnayëngbe buayenana soye.

21 Yejuana šmochjúbuoye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama.

22 Nÿetsca bacna soyënguëntšana šmochtsojuánañe.

23 Cach Bëngbe Bëtsá, chë bëngbe ainaniñe tšabe ebionana chamotse-bomnama endamá, nÿetsca soyiñe tšábenga chacá chacmabiana, y nÿets tšëngaftangbe espíritu, ainana y cuerpo chaotsinÿena, Bëngbe Utabná Jesu-cristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaondayanama.

24 Nda tcmojúbuaja chábinga chašmotsemnama, cha sempre jtsamana ntšamo tojayancá, y lempe cha echanjama.

Inÿe rueguënga chëngbiana y jtadiósoftanama

25 Jesucristbeyeca catšátanga, Diosmanda, bëngbiámna Bëngbe Bëtsá šmochtseïmpadana.

26 Nÿetscángbiöye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerta bonshanánaca šmondetsacheuanaycá.

27 Cbontsaménda quem tsbuanácha nÿetsca Jesucristbeñe ošbuachiyënga chašmëbuáliama, y chca séntsama, Bëngbe Utabná chca jamama šojanmandáyeca.

28 Atše séntseïmpadana Bëngbe Utabná Jesucristo, chaoma tšabe bendi-cionënga tšëngaftangbeñe chaotsemnama.

2 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tsšengaftangbiamá, chē Tesalónica bēts puebloca Jesucristbeñe ošbuáchiyēngbiamá, tsšengaftanga Bēngbe Bētsá chē Taitá y Bēngbe Utabná Jesucristoftaca cānyīñe mo canyáca šmommēnga.

² Atše sēntseimpadana Bēngbe Bētsá, chaoma tsabe bendicionēnga tsšengaftangbeñe chaotsemnama, y tsšengaftangbe ainaniñe tsabe ebionana chašmotsebmnama.

Cristo chaojésabo ora, ntšamo entsānga tmojamama Bēngbe Bētsá echanjayana

³ Jesucristbeyeca bēngbe catšátanga, šontsamna nyets tempo Bēngbe Bētsá tsšengaftangbiamá jtsatschuanayana, ntšamo tsšengaftangbiamá jamama šojtsētocancá, er tsšengaftanga cada te más ošbuáchiyana šmontsebmnama, y ntšamo tsšengaftanga nyetscanga šmojtsenbobonshana, tempscama más yojtsemna.

⁴ Tsšengaftangbe ošbuáchiyama y bonshánama, bēnga nyets tempo oyejuayēnga fchandbētsemna, chē inyēnache Bēngbe Bētsábeñe ošbuachiyēngcá enefjuanēngbeñe tsšengaftangbiamá jóyebuambayama. Bēnga fchandbētsoyebuambnaye ntšamo tsšengaftanga inyētšá ntjatsjuabnaycá Jesucristo šmēstonama, y ntšamo tsšengaftanga chábeñe tša šmošbuachémnaca, masque inyēnga tša cmécamena y chašmosufriama bētscá imojtsama, tsšengaftanga Jesucristbeñe ošbuáchiyēnga bētsemnama.

⁵ Tsšengaftanga chca Cristo šmēstonayeca, corente entsinjinjēna Bēngbe Bētsá nyetsca soyēnguiñe tsabá amá yomnama, y entsānga ntšamo tmojamama tsabá o ndoñe tsabá bētsemnama jayanama ora, cha chca echanjayana ntšamo entsānga tmojtsomerecencá. Y chca entsayana tsšengaftanga aīñe merecido šmotsobuájoñe chabe amēndayoye jamashēnguama ca; y mora, tsšengaftanga choye jobenayama jashjanguama šmojtsamama, inyēnga imojtsama chašmotsesufrínama.

⁶ Bēngbe Bētsá echanjama ntšamo jamama ibomncá; echanjama chē tsšengaftanga chašmosufrima imojtsamēnga bētscá chamosufrima;

⁷ y echanjama tsšengaftanga y bēnga chē mondēsufriñēngbiamá, ndoñe más chamondētsesufrinama. Cha quem soyēnga echanjama, Bēngbe Utabná celoca chaojábobocna ora. Cha chabe puerte obenana bomna angelēngaftaca echanjabo, y chora bētscá inñetsēnga echántsemna.

⁸ Cha echanjabo chē Bēngbe Bētsábioye jtsabuatmama ndoñe montsebošēnga jabácastigayama, y chē tsabe noticiēnga Bēngbe Utabná Jesusbiamá ndoñe montsuenanēngbioynaca.

⁹ Chēnga Bēngbe Bētsá echanjácastigaye, nyetsca tescama jtsapochócase; y Bēngbe Utabnábentšana bēnoca mochantsemnēnga, y ndocna te quemochatobenaye jinýama Bēngbe Utabná tša bētsá y obená bētsemnama.

¹⁰ Quem puerte uámana te, Bēngbe Utabná chaojésabo ora, nyetsca chabe entsānga, nyetsca chábeñe ošbuáchiyēnga cha mochántatschuanaye y mochántichamo: “¡Tša obená cha yomna ca!” Y tsšengaftanga chēngaftaca

šmochántsemna, er tšëngaftanga šmotsanosbuaché bënga ndegombre fsënjántatsëmbo soyënguïñe, chë bënga tcbonjanabuayená soyënguïñe.

¹¹ Chíyeca, chca chaotsemnana, nyets tempo Bëngbe Bëtsábioye tšëngaftangbiana fsëndëmpadana merecido bomnënga chácmabiamama, chë vida chašmotsebmoma, ndayama cha tcmojúbuaja, y chabe obenánaca bëtscá chaoma tšëngaftanga chašmobená nyetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema.

¹² Chca jtsamëse, tšëngaftanga šmochanjínýanýiye Bëngbe Utabná puerte bëtśá y uamaná bëtsemnana, y cha echanjama tšëngaftanga más uamanënga chašmotsemnana. Chca echanjopása, er Bëngbe Bëtśá y Bëngbe Utabná Jesucristo tšëngaftangbiana tšabe juabna ibobomna.

2

Chë Bëngbe Bëtśabe contra yomná

¹⁻² Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entsanga imojtsichamo chë bëtś uamana te, chë Bëngbe Utabná jésabama te, ya tojóshjango ca; pero cbontsaïmpadana, Jesucristbeyeca catsátanga, bëtscá šmochtsentsëna chënga ndoñe chamondobená jamana tšëngaftanga inýetsá juabna tšëngaftangbe ainaniñe chašmátsbmoma. Ndoñe šmatjóyeunaye nderado nda mëntśá chacmojtśetsësná ora: “Canýe Bëngbe Bëtśabe juabna oyebuambnayá šonjáuyana chë Bëngbe Bëtśabe uamana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”.

³ Bëtscá šmochtsentsëna ndocná tondáyeca chacmondáingñema. Er chë Bëngbe Utabnabe uamana te cabá ndóshjango ora, mallajta entsanga Bëngbe Bëtśabe amëndayama contra mochántsemna, y chë Bëngbe Bëtśabe contra yomná echanjábocna. Y cha entsemna nda ibojtsemna infiernoca pochocaná jtsemnana.

⁴ Cha Bëngbe Bëtśabe contra echanjóyebuambaye, chë ndëmuanýengbiana y ndaye soyëngama entsanga imojuabná diosënga imomnana contra echanjóyebuambaye. Chentšana cha echanjayana chëngbiana más obená yomna ca. Y Bëngbe Bëtśabe bëtś yebnóynaca cha echanjámashëngo, choca echanjótbema y entsanga echantsëtsësnaye ndegombre cha Bëngbe Bëtśá yojtsemna ca.

⁵ ¿Chë soyama tšëngaftanga ndoñe šmondenabouínýa? Atše cabá tšëngaftangaftaca sënjamna ora, chama sënjanoyebuambná.

⁶ Y tšëngaftanga šmondétatsëmbo, nda mora yojtsama chë Bëngbe Bëtśabe contra yomná ndoñe chaondonýnama, cabá chë tempo chca jopásama ndóshjango ora.

⁷ Mora ya mallajta entsanga puerte bacna soyënga tmojontśé amana, ndoñe ntšamo Bëngbe Bëtśá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nýe Bëngbe Bëtśá chca šojinýanýese; pero ntšamo tcbonjauyancá chë Bëngbe Bëtśabe contra yomnabiana ndoñe queochatëchnëngo, nýa nda chë soyënga ndoñe chaondëtsemnana yojtsamábioye Bëngbe Bëtśá chabojtsejuaná ora aíñe.

⁸ Chora chë Bëngbe Bëtśabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y

tša buashinÿinÿanánaca y obenánaca echanjábocnama, chábioye bochantse-pochóca.

⁹ Chë Bëngbe Bëtsabe contra yomná, Satanasbe obenánaca echanjabo, y entsanga bèts obenana echanjínÿanÿiye, y chë bèts soyëngaca entsanga ingñënënga mochántsemna.

¹⁰ Cha ba bacna soyënga echanjama ntšamo Bëngbe Bëtsá ndoñe yond-bošcá, chca, ba entsángbioye nÿetsca soyënguifne jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiana chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnama.

¹¹ Chca causa, Bëngbe Bëtsá entseleséncia entsanga ingñënënga chamotsemnama, y chë ndoñe ndegombre soyënguifne chamotsošbuáchema.

¹² Bëngbe Bëtsá chca echanjama, nÿetscanga chë ndegombre soyënguifne Jesucristbiana ndoñe tmontsošbuáchenga, chë bacna soyënga amama oyejuayënga tmojtsemnënga, chë nÿetsca tescama castigo chamotsebomnama jayanama.

Bëngbe Bëtsá šojabacacá atsebácanënga jtsemnama

¹³ Pero bënga šontsamna nÿets tempo Bëngbe Bëtsá jtsatschuanayana tšëngaftangbiana, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnama tcmojánabacacama. Bëngbe Bëtsá tcmojatsebacá er chë Uámana Espiritu Bëngbe Bëtsabe entsanga tcmojábiana, y tšëngaftanga chë ndegombre soyënguifne šmojtsošbuaché.

¹⁴ Chë tšabe noticiënga bënga chondábuayiyayeca, Bëngbe Bëtsá tcmojúbuaja chábenga chašmotsemnama. Cha tcmojúbuaja Bëngbe Utabná Jesucristbe obenana y buashinÿinÿanánëncaca chašmotsebomnama.

¹⁵ Chcasna, ndocna te šmattsajbaná ošbuáchiyana chë ndegombre soyënguifne ntšamo tchbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inÿetšá šmatjátšjuabnaye.

¹⁶ Bëngbe Bëtsá puerte tšabia endménayeca, cha šuababuánÿeshana y tojama bënga sempre añemo ainaniñe chamotsebomnama y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana,

¹⁷ chata chaboma tšëngaftanga bètscá añemo ainaniñe chašmotsebomnama, y tšëngaftanga nÿets tempo chašmotsobena ntšamo tšabá yomncá jtsichámuama y jtsamama.

3

Bëngbiana Bëngbe Bëtsá šmochtseimpadana

¹ Y morna, Jesucristbeyeca bëngbe catšátanga, Diosmanda bëngbiana Bëngbe Bëtsá šmochtseimpadana, nÿetsca luarenache más ba entsanga chamotsobenama Bëngbe Bëtsabe buayenánana joudenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmcá.

² Bëngbe Bëtsánaca šmochtseimpadana cha chašotsëbuáyayama, y chë puerte bacna entsanga ndoñe chamondobenama jamama bënga

fchaisufrima, er nyjetscanga ndoñe quemochatošbuáchiye chë fsëndbuayiyná palabriñe.

³ Pero Bëngbe Utabná sempre jtsamana ntšamo tojayancá, y cha echanjama tsëngaftanga más chábeñe chašmotsošbuáchema, y ndoñe nye cachcá quecmatëñya chë bacna soyënga mandayá nye ntšámnaca ndoñe chacmondáborlama.

⁴ Y Bëngbe Utabná entsama bënga ndegombre ainaniñe fchaitsejuabnama, ntšamo bënga tcboganamëndacá mora šmojtsamama y cachcá sempre šmochtsamámncaca.

⁵ Bënga, Bëngbe Bëtsá fsëntseimpadana, Bëngbe Utabná benache chacmanñanyé bonshánana jtsebomnama ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnama, ntšamo Cristo tojansufrí ora yojanbomncá.

Nyjetscanga entsamna jtsetrabájayama

⁶ Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye.

⁷ Cach tsëngaftanga tsabá šmondëtatšëmbo ntšamo cmojtsamna jtsiyenana, ntšamo bënga fsënjoyencá: bënga tsëngaftangbeñe fsënjaniyena ora, nye ntjatrabajacá oyëñjayënga ndoñe queftsjatsmëna,

⁸ ni ndocnabe saná chibiáišese, tondaye ntabuenaycá. Inyëtšá enjamna; cada te bnëtë y ibeta jabuache fsëñjantrabája, chca, tsëngaftanga ndoñe chacmondëtsamnama bëngbe uajabótama bënga jatatšatnayama.

⁹ Y ndegombre, bënga derecho fsëñjábomna tsëngaftanga jamëndama chašcújabuachama; pero masque chca, bënga jabuache fsëñjantrabája tsëngaftanga chašmotsetatšëmbuama ntšamo yomna jtsiyenama, y chca chašmotsamama.

¹⁰ Bënga tsëngaftangaftaca fsëñjamna ora, mëntsá tcbonjanamëndá: Nda ndoñe tontseboše jatrabájama, cha cach ndoñe chaondëtsesá.

¹¹ Chca fsëntsichamo, er bënga fsëñjátatšëmbona, báseftanga tsëngaftanguentšënga imojtsiyena tondaye ntsamcá, pero tša chë inyëngbe soyënguiñe jtsontremetëñese.

¹² Chca oyena entšángbioye fsëntsabuyaiyná y fsëntsamënda Bëngbe Utabná Jesucristbe mándoca, natjëmbana cachëngbe vida onguayiñe chamotso-trabáñaama.

¹³ Jesucristbeyeca catšátanga, ndoñe chacmondëumantšé tsabe soyënga amana.

¹⁴ Nderado nda ntšamo quem tsbuanáchañe fsëñjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama.

¹⁵ Mo canýe uayayacá ndoñe šmattsonýaye; šmochjabuayená mo canýe catšatcá, chca ndoñe chaondëtsamama.

Jtadiósoftanama

¹⁶ Bëngbe Utabná fsëntseimpadana, cha, chë entšanga tsabe ebionana ainaniñe chamotsebomna iuamá, chaoma tsëngaftanga nyëts tempo y nyjetsca tescama chca chašmotsebomnama. Bëngbe Utabná tsëngaftangaftaca chaotsemna.

¹⁷ Nýe quem palabrënga tšëngaftanga jacheuayama cach atšbe cucuátšeca sëntsabiamná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinýinýná quem tsbuanácha atšbiácha iuamnama.

¹⁸ Atše, Bëngbe Bëtsá sëntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.

1 Timoteo

Jachuayama

¹ Atše Pablo, Jesucristbe ichmoná sêndmêna. Bêngbe Bêtsá bêngbe atsebacyá endmêna y Bêngbe Utabná Jesucristo endmêna ndábeñe bênga, puerte jtsošbuáchiyêse mondobátmana ba soyênga bêngbiama cha yochjamama. Atše Jesucristbe ichmoná sêndmêna, er chata tbojanmandá atše chca jtsemnana.

² Timoteo, atše quem tsbuanácha cbontsabobiamná. Atše Bêngbe Bêtsabe soyêngama entšanga sênjanabuayiyná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sêntseimpadana, Bêngbe Bêtsá Bêngbe Taitá, y Cristo Jesús Bêngbe Utabná, chaboma aca tšabe bendicionênga chacotsebomnana, chata chacmolastemama y ainaniñe tšabiana ebionana chacotsebomnana.

Pablo chë ndoñe ndegombre soyênga abuátambayêngbiama chênga tojanabuayená

³ Ntšamo chë Macedonia luaroye chocana sênjêftsanbocna ora tcbonjanimpadacá, mora cachiñe cbochtêtsimpáda. Efeso puebloca cochjoquéda, básefta entšanga chácuamêndama chë ndoñe ndegombre soyênga ndoñe chamondêtsabatambama,

⁴ ni nyêts tempo ndoñe nyê chamondetsejuabná anteungbe cuentêngama, ni chë ba uabemana uabáinênga chë tempsca bêts taitangbiama. Er nyê chca yapa jesejuabnayanentšana, jóbocnana nyê ínÿengaftaca jabuachana enatsêtsnayañe, y chca chêngbioye tondayama ntjujabuáchana ntšamo Bêngbe Bêtsá jamama yojuabnacá chaósertama. Chë soyna nyê chábeñe jtsošbuáchiyêse jobenayana josértana.

⁵ Chca mando entsemna nyêtscanga chamotsenbobonshánama, y chë bonshánana endóbocana nda chabe ainanentše ndocna bacna soyênga tondbomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšêmbuábentšana, y Jesucristbeñe ndegombre ošbuachiyábentšana.

⁶ Báseftanga tmojtsajbaná chca jtsemnana y inÿe soyêngama tmojontsé juabnayana; chíyeca chênga mora imojtsentšena nyê ndayámnaca ndoservena soyêngama enatsêtsnayana.

⁷ Chênga jtsebošana Bêngbe Bêtsabe ley abuátambayênga jtsemnana, pero chênga ndoñe yontsósertana ni ntšamo imojtsabatambacá, ni mo ndayánaca ntšamo chênga tmojtsichamcá, mo chë soyênga ndegombre cuaftsemncá.

⁸ Pero bênga mondêtatšêmbo chë leyênga tšabá yomnana; tšabá endmêna, chë ndayama chë leyênga tmojuamcá entšá chë leyêngaca tojtsamêse.

⁹ Bêngnaca mondêtatšêmbo, chë leyênga ndoñe tmonjuama chë nyêtsca soyênguiñe tšabá amêngbiama. Chë leyênga tmonjuama quemêntša entšanga jácastigama: ntšamo leyênguiñe ndoñe tontselesenciancá amênga y ntšamo Bêngbe Bêtsá yobošcá ndámênga, chë Bêngbe Bêtsá ndoñe imondadoránênga y bacna soye amênga, Bêngbe Bêtsá ndoñe mondêrrespetánênga y Jesucristbeñe jtsošbuáchiyana y Bêngbe Bêtsá jtsadoránana tondaye yondoservena ca juabnayênga, cachabe taitá o mamá obánayênga y ndêmuanyênga imomna entšanga obánayênga,

¹⁰ boyabásaftaca o shembásaftaca bacna soye amênga y boyabásenga cach boyabásengaftaca bacna soye amênga, entšanga enênga nyê ínÿabiama nyêts

tempo chamotseservénama, bosterënga y chë nÿe bonamente Bëngbe Bëtsabiana júrayënga; chca entsayana, chë leyënga yomna jácastigama nÿetscanga ndëmuanÿënga ndoñe tmontsama ntšamo chë ndegombre buatëmbana soyënguifne iuayancá.

11 Ntšamo muentše chë leyëngama tijayancá, entsebuátëmbana chë Bëngbe Bëtsábiana puerte tšabe noticiënguifne, chë ndegombre buatëmbana soye; Bëngbe Bëtsá, chë corente bendición homná, šonjichmó chë buayenánana entsanga jabuátambama.

Pablo Bëngbe Bëtsábioye tbojtanchuá, tbojanlastemama

12 Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjëtseprontanama, y chíyeca šojanábuayana atše chabiana chaitrabajama; y cha endmëna nda inétsama atše obenana chaitsebonnma chë trabajo jamama.

13 Cha chca átšeftaca tonjanma, masque tempo atše chabe contra ba soyënga sënjánichamo, chabe ústonënga sënjanëcamena, y chabiana tondaye respeto ntsebonncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama.

14 Y chca, Bëngbe Utabná ba tšabe bendicionënga atšbiana tonjanma, y chábeñe ošbuachiyá šonjánbema, y tonjanma atše cha chaitsebobonshánama y ínÿengbioynaca. Cha chca bëngbiana tojama, bënga cánÿifne mo canÿacá Cristo Jesúseftaca bëtsemnayeca.

15 Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnana jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna.

16 Chíyeca, Bëngbe Bëtsá šonjanlastemá, jinÿanÿiyama cha puerte uantado entsángaftaca yomnana. Y chë soye ínÿengbioye tojaninÿanÿé, chë nÿetsca tescoma yomna tšabe vida jtsebonnana, chë chábeñe mocht-sanošbuachëngbioye; chca tonjaninÿinÿé cachá átšeftaca uantado jtsemnëse, atše nÿetscangbiana chë más bëts bacna soye amá jtsemnëse.

17 ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnana! Cha endmëna chë ndocna te echanjëftsobaná, chë entsanga ndoñe ntšobenana jinÿamá y chë nÿe canÿe Bëngbe Bëtsá yomná. Chca chaotsemna.

18-19 Timoteo, aca mo atšbe uaqüñacá condmëna. Atše tcbonjaimpadá, ntšamo tcbonjauyancá entsanga chacúyanama, ntšamo báseftanga Bëngbe Bëtsabe juabna oyebuambnayënga acbiana tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacot-sama, Jesucristbeñe puerte jtsošbuachiyëse, y lempe ntšamo tcojtsamama tšabá yojtsemnana ainaniñe jtsetatšëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmojanuena y chë causa, Jesucristbe soyënguifne ošbuachiyana tmojtsana-jbananga y tmojanontsé inÿe buatëmbana soyënguifne jtsošbuachiyana.

20 Chca tonjopasá Himeneo y Alejandroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiana ndoñe bacá ntšoyebuambnayana.

2

Pablo tojanabuayená ntšamo Bëngbe Bëtsá jtsadoránama

¹ Njetsca soyama más chbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, njetsca soyëngama ntšamo tojtsëjbotcá cha chamotseimpadana, njetsca entšangbiama, y cha sempre chamotsatschuaná.

² Entsemna, njetscangbe tšabiama Bëngbe Bëtsá jtseimpadánama, pero masna quem luarentša reyëngbiama y inye mándayëngbiama, chca, njetscanga puerte natjëmbana jtsiyenama chamuetsobenama, y njetsca soyënguiñe tšabá jtsamëse, Bëngbe Bëtsá jtsatschuanayama, y entšangbe juabniñe tšabá chamotsemnana.

³ Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana;

⁴ y chca jtsóyejuayana, er cha endboše njetsca entšanga atsebácanënga chamotsemnana y chë ndegombre buayenánana chamotsábuatmama.

⁵ Chca njetsca entšangbiama endmëna, er nye canye Bëngbe Bëtsá njetscangbiama endmëna, y nye canya endmëna nda yobena jamama entšanga tempcá tšabá Bëngbe Bëtsáftaca chamotsemnana; cha endmëna Jesucristo, cach entšá.

⁶ Er Jesucristo, mo canya ínÿenga játsebacama cuaftopagacá, chabe derecho vida jtsobomñama cachcá tojanonýa y tojanóbana, chca, njetsca entšanga chamotsobenama atsebácanënga jtsemnana. Chë soye cha tonjaninýañé, nya chama tempo yojtsemna ora, chë Bëngbe Bëtsá njetsca entšanga atsebácanënga chamotsemnana yobošama.

⁷ Bëngbe Bëtsá chca njetsca entšangbiama yobóseyeca, Jesucristo šojanábuayana chabe ichmoná jtsemnana, chabe soyënga entšanga jtsabuayiyayama; ndegombre soye séntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

⁸ Ntšamo sënjayancá, atše séntseboše njetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuénta, y chora celoye, Bëngbe Bëtsábiyoye cucuatše chamatsbaná; pero chamna, ainaniñe bacna soyënga ntsebotmncá, ínÿengaftaca ntjatentjayanaycá, y ínÿengaftaca jabuachana ntjatenatsëtsnaycá chënga chamotsemna.

⁹ Y atše séntseboše shembásenga entšayangá chamuatíchëtjo, mo chë tšabe shembásenga mondbetsichëtjoncá, ndoñe nye entšanga chamotsëbuáuatjama y ntšamo tmojtsichëtjonama chëngna uámanënga imomna ca entšanga chamotsejuabnana. Ndoñe quenátamna jtsenóbotamnayana, nya mo chca chquëcnënga jtsemnëse, ni castellano soyëngaca o uámana fiantse ndëtšbéngaca, o yapa uámana entšayangaca, chca, nye entšanga jinýama tšabá jtsemnana.

¹⁰ Pero aiñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

¹¹ Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayaunana.

¹² Atše ndoñe quichatsleséncia, canye shembása boyabásenga chaotsabuatambá, ni chaotsamënda. Canye boyabása tojtsabuatambá o tojtsamënda ora, shembása ndocá chaondëtsichamo.

13 Chca chaotsemna, er Bëngbe Bëtsá natsana Adán tbojanpormá, y chentšana Eva;

14 y er Satanás Adánbioye ndoñe tbonjaningñé, ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciá.

15 Pero shembása atsbocaná echántsemna, básenga quem luaroye endbaúshejangoyeca, pero chamna, aíñe nyets tempo Bëngbe Bëtsábeñe tojtsosbuáchese, nyetscanga tojtsababuán'yeshanése, cachá nyetsca soyënguiñe jenomándama tojtsobenése, y nyets tempo tšabe soyënga tojtsamése, ntšamo Bëngbe Bëtsabe entšanga mondbetsamcá.

3

Ntšamo ibojtsemna chë ošbuachiyëngcá enefjuanëngbeñe mandayá

1 Mëntšá ndegombre endmëna: nderado nda tojtseboše canye trabajo jtsebmomna, cán'yentše ošbuachiyëngcá enefjuanentše chë inye ošbuáchiyënga jtsamëndayama, cha ndegombre yojtseboše canye puerte tšabe trabajo.

2 Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamése, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsemnama: nye canye shembásabe boyá; ntšamo jtsiyenama tšabá juabnayá chaotsemna, cachá nyetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entšanga júyentšamiama, y chaotsobena botamana abuatambayá jtsemnama.

3 Ndoñe yapa tmoyá o penzentero chaondëtsemna; pero chaotsemna tšabá mandbomná, entšanga natjëmbana chamotsiyenama bošá, y ndoñe chaondëtsejuabná nye crocénana jësebomnama.

4 Chaotsetátšëmbo ntšamo nyetsca chabe yebnentša entšanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtsoye chamondëquedama;

5 er, nda cachabe yebnentša entšanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsan'yenama?

6 Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nye cachá uámana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastiga.

7 Chánaca bontsemna jtsiyenana jtsamése, y chca chaojtsama ora, chë Jesucristbeñe ndošbuáchiyënga tšabá chabiana chamotsichamo. Chë entšá ndoñe chca tontsamése, chënga chabiana mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

Ntšamo ibojtsemna chë ošbuachiyëngcá enefjuanënga ujabuachaná

8 Cachcá, chë mándayëngbe ujabuáchanënga mëntšá entsamna: uámana entšangcá nyetscanga chamotsëtabna, uta palabra ndbomnënga; ndoñe yapa vinye chamondëtsetmó, y ndoñe chamondëtseboše nye paselo becá crocénana jtsebmomnama.

9 Chënga entsamna ndegombre jtsošbuáchiyana chë Bëngbe Bëtsá tojin'an'yé soyënguiñe, chë ndayiñe bënga mondošbuaché, chëngbe ainaniñe in'yëtšá juabnënga ntjatsbomncá.

¹⁰ Natsana, chëngbiana botamana šmochjshauarrepára jtsetatšëmbuama chënga aínë o ndoñe montsobena mo chë ošbuachiyëngbeñe mándayëngbe uajabuachanëngcá josérviana. Chënga nyetsca soyënguiñe tšabá tmojtsemnëse, šmochjálesenciaye chiñe chamoserrema.

¹¹ Cachcá, chë shémanga mëntšá entsamna: nyetscangbiana mo uamana entšangcá utabnënga, ndoñe uayátsenayënga, cachënga nyetsca soyënguiñe jenomándama obenënga, y nyétscañe tšabe palabra homnënga.

¹² Canye uajabuachaná chaotsemna nye canye shembásabe boyá, y chaotsetátšëmbo ntšamo chabe básenga y nyetsca chabe yebnentša oyenënga jt-samëndayana.

¹³ Chë uajabuáchanënga tšabá chiñe tmoservénëse, canye uamana puesto mochanjashache, y chënga mochantsobena bëts añémoca jtsóyebuambnayama ntšamo Cristo Jesúsbeñe tmošbuáchema.

Ndayá Bëngbe Bëtsá bënga šojinñanyecá, canye bëts buatëmbana soye endmëna

¹⁴ Atše sëntsobátmana pronto chjobenaye jama aca jauatsëtsayama; pero chca chontsabobiamná,

¹⁵ nderado atše betso jama ndoñe sënjobenase, chacotsetatšëmbuama ntšamo canya ibojtsemna nyetsca chë Bëngbe Bëtsábënga imomnëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uamana puestoca quem luarentše, y tša mondëntšena chama ín'yëngbioye jáyëñjanama.

¹⁶ Nya ndegombre endmëna, Bëngbe Bëtsá soyënga šojinñanyé, y chë soyëngaca bënga montsobena jtsiyenana, chë Bëngbe Bëtsabe entsanga imomnëngcá; chë soyënga bëngbiana ndegombre bëts buatëmbana soye endmëna, y chë buatëmbana soye mëntšá endmëna:

Cristo quem luarentše cach entsacá entšángbioye tojánebëbuacna.

Chë Uamana Espíritu tonjinñanyé cha nyetsca soyënguiñe tšabá amá yomnama. Angelënga cha tmojáninye, y chabiana ba luarënguentsa entšángbioye tmojanabuayená.

Ba entsanga quem luarentše chábeñe montsanošbuaché, y Bëngbe Bëtsá celoye tšontanatsbaná, cha puerte bëtsá y obená yomnama jinñanyëse.

4

Báseftanga chë tšabe benachentšana mochtsojuánañe

¹ Uamana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entsanga camochtsajbaná ošbuáchiyana chë ndayiñe bënga Jesucristbiana mondošbuaché soyënguiñe ca. Chëngna, espíritënga entsanga áingñayënga mochántsayanana, y chë ndoñe ndegombre soyënga chë bacna bayëjënga entšángbioye mochtsabuátambaye soyënguiñnaca.

² Chca buatëmbana soye jtsóbocanana chë bacna entsanga ntšamo ndegombre tmojuabnacá ndinñinñayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nye chca chëngbe ainaniñe jësejuabnayana.

³ Quem entsanga ndoñe ntjalesénciana ínÿenga chamotsobouamama, y jtsemándayana básefta sananga entsanga ndoñe chamondétsesama. Ntsamo chénga chíñe tmojtsebuatëmbacá ndoñe ndegombre soye ntsemnana, er Bèngbe Bètsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bèngbe Bètsábioye chama jtsatschuanayëse.

⁴ Er lempe ntšamo Bèngbe Bètsá entsanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bèngbe Bètsá chama tmojëtschuase;

⁵ er chca saná Bèngbe Bètsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

Jesucristbiana trabájayiñe canÿe tšabe oserverná

⁶ Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canÿe tšabe oserverná cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebonna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

⁷ Pero ndoñe nÿe quem luarentša entsangbe cuentënga y ndoserverna cuentënga cattsuenana. Ba soyënga cochjama aca bëts añemo ainaniñe chacotsebonnama, mo nda bëts añemo jtsebomnama cachabe cuérpoca ba soyënga cuaftsamcá, ntšamo Bèngbe Bètsá jadórama yomncá jtsiyenama jtsamëse;

⁸ cachabe cuérpoca ba soyënga jamana más añemo jtsebomnama, aíñe batšatema endoserverna; pero jtsiyenana Bèngbe Bètsábioye jadórama yomncá jtsamëse, puerte enduámana y juajabuáchana nÿetsca soyënga tšabá chaotsemnama; chca jtsamana puerte tšabá endmëna cachabe vidama quem luarentše, y chë ínÿe vidócnaca.

⁹ Ntšamo tijayancá ndegombre entsemna, y nÿetscanga entsamna jtsejuabnayana chca ndegombre bëtsemnama.

¹⁰ Y chë soyama bënga puerte mondëtrabája y mondësufrina, er chë Bèngbe Bètsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiana. Cha endmëna chë nÿetsca entsangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

¹¹ Ntšamo quem soyëngama tcbonjauyancá entsanga cochtsamëndaye y cochtsabuátambaye.

¹² Ndoñe ctjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chénga puerte chacmotserrespetánama, chca jtsamëse icoyenama jtsonÿayëse, cachcá chamotsamama: botamana jtsóyebuambnayëse, nÿets tempo tšabe soyënga jtsamëse, nÿetscanga jtsababuánÿeshanëse, Bèngbe Bètsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndobmná.

¹³ Atše choca chaijashjanguëntscuana, cochtsentšena chë Bèngbe Bètsabe uabemana palabrënga entsángbeñe jtsalíayama, y chénga jtsabuátambayama y jtsabuayinyayama.

14 Achioye Bëngbe Bëtsá obenana tmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oye-buambnayënga acbiama tmojanoyebuambá ora, y chë ošbuachiyënguentša bëtsëjëmënga chëngbe cucuatšënga ábeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinýëna.

15 As, aca cmontsemna sempre jtsamana chë soyënga ntšamo tcbon-jauyancá. Cochtsentšëna chë soyënga tšabá jtsamama, chca, entšanga chamobená jinýama, aca cada te más tšabá lempe cojtsamama.

16 Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye inýënga cojtsabuátambama. Cada te chca cocht-sama, y chca, cach aca cochanjenájabuache atsocaná jtsemnana y chë ácbioye ouenanëngnaca játsebacama.

5

Ntšamo Timoteo ibojtsemna chë inýe ošbuáchiyëngaftaca jtsemnana

1 Bëtsëjëmënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontšëngaftaca cochjama, mo chënga acbe catšátanga cuaftsemncá.

2 Chë bëtsanana shembásëngaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabëంగా cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntseboimncá.

Ošbuáchiyëngbenache viudanga tmojtsemna ora

3 Chë ndegombre viudanga, chë ndocná mondbomna chaújabuachama, chënga cochtsarrespetana y cochtsëjabuachana.

4 Pero canýe viudá nderado básënga o nietënga tuabamna, chënga entsamna natsana jshauatsjinýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanýenëse, y chëngbe bëtsëtsangagaftaca tšabá chamotsama, ntšamo chënga chëngaftaca tmojanmncá, er chca jtsamama, Bëngbe Bëtsá jtsóyejuayana.

5 Chë ndegombre viudá, chë juajabuáchama ndocná tbondbomná, Bëngbe Bëtsabeñe jtsóšbuáchiyëse, cha bochjuájabuachama jtsobátmanana, y nyets tempo jtseimpadánana, bnëté y íbeta, cha chabuájabuachama.

6 Pero canýe viudá, nýe quem luarentša entšangagaftaca oyejuayá jtsemnana soyënga tojtsamëse, cha masque ainá tojtsemna, Bëngbe Bëtsabe bominýiñe mo canýe obanacá jtsemnana, er chábioye ndoñe ntseeservénana.

7 Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtseboimnana.

8 Er, nda cachabe entšanga y más, cachabe pamíllanga ndoñe tontsacuedana, cha chca jtsinýinýanayana chë buatëmbana soyënga, ndayíñe bënga mondošbuaché, ndegombre soyënga ndoñe yondmëna ca yojtsejuabnana, y cha chë ndoñe ošbuáchiyëngbiana más bacna entšá jtsemnana.

9 Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nýe canýe boyá ibnabomná.

10 Entšanga cha chamotsábuatma mo canye tšabe soyënga amacá: chabe básenga botamana tojabëché, áshjajnënga chabe yebnentše posada júyentsámiamana prontaná, Bëngbe Bëtsabe entšanga imomnënga tojushecjabebé, chë imosufrínënga tojújabuache; jayanana, nda sempre nyetsca tšabe soyënga jamama yontšená.

11 Pero chë lístañe, chë viudanga chñënguana bnëtsana uata cabá nd-bomnënga ndoñe catjúbiama; er chë chëfta uata ndbomnënga, yapa nye cachënga tšabá jtsemnana juabnënga jtsebmomnana y soyënga jtsamana. Chcase, chënga Jesucristbioye ya ndoñe ntseservénana, y chora jtsebošana cachiñe jtëtóbouamayama;

12 y chca, ínÿenga chëngbiama mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama.

13 Y cabá más, tondaye ntsamcá tmojtsemna ora, chënga juabouinÿana oyënjayënga jtsemnana, y yebnënguenache jtsanama; y ndoñe nye oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámese.

14 Chíyeca, atše sëntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondétsama, chca, bëngbioye uayayënga chamuayana, chënga chca ndoñe tšabá montsama ca.

15 Atše chca séntsichamo, er básefta viudanga cabá tobiasënga tmojt-sajbaná Jesucristo obedecénana, y tmojontsé Satanás joyeunayana.

16 Canye shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá nefjuanënga ndoñe chaondétsama chëngbiama játantješnana; chca, chë ošbuachiyënga mochanjobenaye chë ndegombre viudanga, chë chaujabuachama ndocná mondbomnëngbioye jujabuáchama.

Ntšamo cuantsemna chë ošbuachiyëngbeñe amëndayëngaftaca

17 Chë bëtsëjëmënga, tšabá chë ošbuachiyëngcá nefjuanënga tmamëndangna, jtsomerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayinayama y jtsabuátambayama imontšëngbioye.

18 Er Bëngbe Bëtsabe uabemana palabrenguiñe endayana, mëntšá: “Aca canye toróftaca shajuana tmojtsatbaná luariñe chacojstetrabája ora, ndoñe catjuanguëtšenaye ca”; ínÿoca: “Chë trabajayá merecido jtsebuájonana juácana ca”. Chíyeca, chë bëtsëjëmëngcá amëndayënga jtsomerecénana entšanga chamotsarrespetánama.

19 Nderado nda tmojáuyana canye bëtsëjëma bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjëma mal quedayá ndegombre soye yojtsichamo ca ndoñe tmon-jayana, ndoñe catjóyeunaye.

Inÿe soyëngama jábuayenama

20 Chë bëtsëjëmënga nye bacna soyënga tmojtsamënga, nyetsca entšangbe delante cohjucácana, chca nyetscanga uatjana chamuishache, bacna soye amama castigo mochtsebmomnana.

21 Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe

catjayana canye bētsējema tšabá o ndoñe tšabá tonjama ca, cabá ndoñe lempe botamana ndabonye ora, ni canye entšá ín̄yengbiana más tšabá ntjatabacac-naycá.

²² Ndocnabe bestšasiñe cucuatšēnga catjájajua, Bēngbe Bētsábioye chabiana jaimpádama, jin̄jinyiama cha mo canye bētsējema amēndayacá joserviama yojtsohenama, nye betso, juabuáyanama botamana ntjenjuaboycá. Pero nye ntjenjuaboycá chca tcojamēse, y cha canye bacna soye amá tomñesna, ácnaca cochántsemna mo chabe bacna soyēnga cuafjamcá. Cochtsantješna ndocna bacna soyēnga ainaniñe chacondētsebomnama.

²³ Aca ba soye uafsbiaca condbētsešoca causa, ndoñe más nye ena býeshe cattseftmana, sinó base vínoynaca.

²⁴ Entšanga mondobena tšabá jin̄yana, básefta entšangbe bacna soyēnga, cabá chē soyēngama chēngbioye botamana ntjájaye ora; pero ín̄yengbe bacna soyēngama, nye tcojájayentšana entšanga chama jtsetatšēmbuana.

²⁵ Cachcá, báseftanga entšangbe delante tšabe soyēnga jtsamana, y cachora chē soyēngama jtsotatšēmbuana; y ín̄yengna iytēmncá tšabe soyēnga jamana, pero masque chca, ndaytēnaca chē tmojanma tšabe soyēngama ín̄yenga mochanjåtatsēmbona.

6

¹ Chē nyets tempo nye ín̄yabiana oservénēnga entsamna, chēngbe nduiñēngbiana jtsejuabnayana, chēnga uámana entšanga imomnama y nyets respeto jtsebomnama imomerecénama. Chca entsamna, Bēngbe Bētsabe Uabainama y chabe soyēngama, ndayiñe bēnga mondošbuaché y entšanga mondētsabuatambaye, ín̄yenga podesca ndoñe chamondētsóyebuambnama.

² Y chē imobomna Jesucristbeñe ošbuáchiyēnga nduiñēnga, chēngbioye nye batšá ndoñe chamondētsarrespectana, er chēnga Jesucristbeyeca chēngbe catšátanga mondmēna, y entsamna más tšabá jtsaservénana, er chēngbe traba-juentša tšabe soyēnga imóyēngacañe, Jesucristbeñe ošbuáchiyēnga mondmēna, y Bēngbe Bētsabe bonshánēnga.

Jtsiyenana Bēngbe Bētsá jadórama soyēnga jtsamēse, endmēna chē ndegombre bomnana

Quem soyēnga cmontsamna entšanga jtsabuátambayana, y becá jtsētsētsnayana chca chacmóyaunama:

³ Nderado nda in̄ye soyēnga tojtsabuatambá, y ntšamo bēnga mondējuabnacá, chē Bēngbe Utabná Jesucristbiana ndegombre buatēmbana soyama, ni chē buatēmbánana ntšamo jtsiyenama Bēngbe Bētsábioye jadórama yomna soyēnga jtsamēse, ndoñe cachcá bēngcá tontsejuabnase,

⁴ cha nye cachá puerte uámana entšá yojtsoeniámná, y tondaye ndosertaná yojtsemna. Cha tša jtsogustánana ba soyēngama y palabrēngama jabuachana jtsenatsētsnayana, y cha nye chama vida jésebomnana. Cha chca yomna causa, nye jtsebošana chē in̄ya tojashjache soyēnga jtsebomnama, nyetscanga ndoñe cachcá chamondētsejuabnama jtsamana, ín̄yengbioye joyánguanguama jtsebošana, bacna soyēnga ndoñe ndegombre soyēnga ín̄yengbiana jtsejuabnayana,

⁵ y ín̄yengaftaca nye sempre jtsenpenzētsiyana, er chēngbe juabniñe nye bacna soyēnga jtsebomnana, chē ndegombre soyēnga quematábuatma, y jtsejuabnayana chē soyēnga Bēngbe Bētsá jadórama jtsamana, nye más soyēnga jóyēngacñama yoservena ca.

⁶ Ndegombre canye entśá bĕtscá tśabiana jĕftsashjáchana, cha tojtsiyena Bĕngbe Bĕtsábioye jadórama soyĕnga jtsamĕse, y sempre oyejuayá nĕe chĕ tojtsebmna soyĕngaca tojtsemnĕse.

⁷ Er bĕnga tmojanonĕná ora, quem luaroye bĕngaftaca tondaye tmonjáníyĕbo, y quem luarentśana cach tondaye quemochatobenaye jĕftsocńana.

⁸ As, bĕnga ndayá jasama y ndayá jtichĕtjuama tmojtsebmĕse, chĕ soyĕngaca oyejuayĕnga mochtsemna.

⁹ Pero chĕ bomnĕnga jtsemnama tmojtsebośĕnga, bacna soyĕnga jamama tojócochĕngo ora, ndoĕne ntsemorochana y pronto chiĕe jotsatśana, mo bayá uachmaniĕe cuafjotsatścá, chĕ entśanga Satanasbe cucuatśiĕe ndeolpe jotsatśana; chora chĕnga jtsamana soyĕnga mo chĕ juabna ndbomnĕngcá, y chĕ cachĕngbiana ndoĕne tśabe soyĕnga tmojtsamĕngbe juabnĕngaca. Y mo chĕ uándbemana barco, bĕts búyeshe asentoye tojtseñatĕmbcá, cachcá, chĕ bacna juabnĕnga bomnama, chĕngbioye mochántsapochocaye y nĕetsca tescama mochántscastigaye.

¹⁰ Crocĕnana jtsebmnama yapa jtsebośana, jamana entśabe ainanentśana nĕetsca bacna juabnĕnga y soyĕnga chaóbocnama; y básefta entśanga, crocĕnana jtsebmnama yapa jtsebośana causa, tmojtsajbaná ośbuáchiyana chĕ Bĕngbe Bĕtsabe soyĕnguiĕe, chĕ bĕnga mondośbuachĕ soyĕnguiĕe, y chca cachĕngbiana tmojama puerte chamosufrima y bĕts ngmĕnana jtsebmnama.

Chĕ tśabe soyama jtseñojuerzánama, ośbuáchiyana sempre chaotsemnama

¹¹ Pero aca, Bĕngbe Bĕtsabiana oservená, chca benachentśana cochtsojuánaĕe. Nĕa cochtsentśena, chĕ Bĕngbe Bĕtsabe bominiĕe tśabá yomncá jtsamama, chĕ ndayá Bĕngbe Bĕtsá jadórama yomncá jtsamama, Jesucristbeĕe puerte jtsośbuáchiyama, nĕetscanga jtsababuánĕeshanama, Bĕngbe Bĕtsabeĕe jtsobatmanĕe puerte uantado padecena soyĕngiĕe jtsemnama, y corente jtsababuánĕeshanĕe nĕetscanga chacotsĕnĕyayama.

¹² Chĕ tśabe soyama, ośbuáchiyana joboguiyanama cochtseñojuerzana. Chĕ nĕetsca tescama yomna tśabe vida cochjashjache; chama Bĕngbe Bĕtsá tcmojanchembo y bĕtscá entśangbe delante tconjánayana tśabe soyĕnga Jesucristbiana, ndayiĕe aca ičośbuachĕ.

¹³ Y mora, Bĕngbe Bĕtsabe delante, nda endbama lempe ntśamo quem luarentśe yobinĕncá vida chaotsebmnama, y Jesucristbe delante, ntśamo cachabiana ndegombre bemncá Poncio Pilatbe delante lempe tojanayaná, chatbe delante cbontsemánda,

¹⁴ lempe cochjama ntśamo tcbonjauyancá, ndocna soye chacmondĕntśashbe jamama, y cochtsiyena, ntśamo ndocná tondaye chaondĕtsebmna jayanama aca bacna soye tcojama ca. Y chca cochtsama Bĕngbe Utabná Jesucristo quem luaroye yochĕsabĕntscuana.

¹⁵ Y nĕa chĕ soyama chĕ tempo chaojóshjango ora, Bĕngbe Bĕtsá chca echanjínĕanĕiye, er cha endmĕna chĕ corente bendición bomná y chĕ nĕe canĕe Mandado. Cha nĕetsca reyĕngbiana, chĕ más uámana Rey, y nĕetsca amĕndayĕngbiana, chĕ más uámana Utabná.

¹⁶ Nĕe cha ndoĕne bondmĕna ndocna te ntjóbanana, y cha canĕe bĕts buashinĕinĕyana luarentśe endoyena y choye ndocná yondobena jobĕconana. Cha ndocná tbonjinĕe y ndocná yondobena jinĕyana. ¡Entśanga nĕets tempo chamotsinĕanĕyá cha puerte bĕtsá y obená bĕtsemnama! Chca chaotsemna.

¹⁷ Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsemnana, ni lempe tšabá yochjóbcnana, bëtscá soyënga bëtsebomnana ndoñe chamondëtsobátmana, er chë tcobomna soyëngama ndoñe ntsótatsëmbuana ndayëntsoñama chca mochtsebomnana; pero aíñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtscá soyënga šnetsatšatnayá; y chca, cha jamana bënga chamotsobena nýetsca chë soyëngaca oyejuayënga jtsemnana.

¹⁸ Ntšamo tšabá yomncá chënga chamotsama, ba tšabe soyënga chamotsama, y sempre tšabe ainánaca chamotseprontana entšanga ba soyënga jatšatayama, y ndaye tmobomna soye entšángaftaca jenájatayama.

¹⁹ Mo nda bëtscá shajuana tojtsábuajo y jtsetatšëmbuana yochtsebomna más hcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtscá tšabe bendicionënga más hcoye mochtsebomnana. Y chënga chë soyënga tmojtsamëse, chënga chë ndegombre vida, chë nýetsca tescama yomna tšabe vida mochanjëftsashjache.

Inýe soye Timotéobioye tbojanbonýé

²⁰ Timoteo, ndayá Bëngbe Bëtsá tcmojabonýecá, botamana cochtsinýena. Entšanga nýe quem luarentša soyëngama encuéntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana.

²¹ Atše chca séntsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Bëngbe Bëtsá sëntseimpadana, ácebeñe tšabe bendicionënga chaotsemnana.

2 Timoteo

Jachuayama

¹ Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē nyetsca tescama yomna tšabe vida chamotsebmomna; y chca vida montsebmomna Cristo Jesúseftaca cānyīñe mo canyáca bētsemnayeca.

² Atše quem tsbuanácha cbontsabobiamná, acbiamama Timoteo, aca mo atšbe bonshana uaquíñacá, Cristbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma áceñe tšabe bendicionēnga chaotsemnana, chata ácbioye chacmolastemama, y acbe ainaniñe tšabe ebionana chacotsebmomna.

Ndoñe ntsēuatjana entšangbeñe Jesucristbiamama jóyebuambayama

³ Sempre Bēngbe Bētsáftaca stsencuēnta ora, acbiamama sēndbētsenojuabnaye, y acbiamama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnayēse y jtsetatšēmbēse, ntšamo atše stsamcá tšabá bētsemnana, cachcá ntšamo atšbe bēts taitanga tmojanmcá.

⁴ Atše sēndbētētenojuaboye ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētínýama, atše puerte oyejuayá chaitsemnana.

⁵ Bēngbe Bētsá acbiamama sēndbatschuaye, er atše sēndbátēnojuaboye aca Jesucristbeñe ndegombre ošbuáchiyana condbomnana. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndētatsēmbo.

⁶ Chíyeca sempre cochtsantješna quem uámama soyama: Mo nda canýe shinýañe tojtsajuinýinýnacá, chentše sempre chaotsoññama, cachcá aca, chē Bēngbe Bētsá tmojatšetá obenana tšabe soyēnga jamama, sempre cochtsinýena. Chē obenana aca conjanóyēngacñe, atšbe cucuatšēnga acbe bestšašñe sēnjanjájó y Bēngbe Bētsá acbiamama sēnjanimpadá ora.

⁷ Er Bēngbe Bētsá tonjama bēngbe ainaniñe Uámama Espiritu chaotsemándama, uatjana ndoñe ntsebmomnana, ndayá obenana bēnga chamotsebmomnana, bonshánana Bēngbe Bētsabiamama y nyetscangbiamama chamotsebmomnana, y cabēnga jenomándama chamotsobenama.

⁸ Chíyeca, ndoñe cattseuatja entšanga jáuyanama, ntšamo tcojinýe y cojtsetatšēmbcá Bēngbe Utabnabiamama ndegombre bētsemnana; ni atšbiamama ndoñe cattseuatja, atše cárceleye sēndutámenama, chabiamama oservena causa. Chamna, chē Bēngbe Bētsá cmochanjátšetaye obenánaca, sempre cochtseprontana jasúfriama, átšeftaca y ínýengaftaca, entšanga tšabe noticiēnga abuayiyenaye causa.

⁹ Bēngbe Bētsá endmēna nda bēnga šojatsebacá, y šojáchembo jtsiyenama mo chábēnga imomnēngcá jtsamēse. Y cha chca tojama, ndoñe nderado bēnga ndayate tšabe soye tmojamama, ndayá cachá chca chaotsemnana inabóseyeca y bēngbe tšabiamama juabna bómnyeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiamama jamama sóyeca.

¹⁰ Y mora, Bëngbe Atsebacayá Jesucristo tojáboyeca, Bëngbe Bëtsá šojinÿanÿé cha bëngbe tšabiama juabna yobomnama. Jesucristo tonjama, entšanga nÿetsca tescama obanënga ndoñe chamondëtsemnama, y tonjama bënga chamotsetatšëmbuama, chë tšabe noticiënga chabiama jouenëse y joyeunayëse, bënga chë nÿetsca tescama yomna tšabe vida mochjábomnama, ndoñe nÿe jopochócama cuerpënguiñe.

¹¹ Bëngbe Bëtsá šojanabuayana tšabe noticiënga entšanga jábuayenama, Jesucristbe ichmoná jtsemnama y entšanga jabuátambama.

¹² Chë causa, atše mora cárceloca quem soyënga séntsesufrina; pero chama atše ndoñe quetsátëuatja, er atše sëndëtatsëmbo ndábeñe atše stošbuáchema, y corente sëndëtatsëmbo cha yobena jtsinÿenana ndayá šojabonÿecá, chë ndayté cha yochjésabëntscuana.

¹³ Nÿets tempo, chë ndegombre buayenánana, ndayá átsbentšana tconjanuencá, entšanga cochtsabuayinÿaye, entšanga jtsinÿanÿayëse aca Jesucristbeñe icošbuáchema, y Bëngbe Bëtsá y nÿetscanga icuababuánÿeshanama, y chca yomna aca Cristo Jesúseftaca cánÿiñe mo canÿacá bëtsemnayeca.

¹⁴ Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonÿecá sempre cochtsinÿena.

¹⁵ Ntšamo ya condëtatsëmbcá, nÿetsca ošbuáchiyënga Asia luaroquënga cachca šmonjesonÿá, y chentše bontsemna Figelo y Hermógenes.

¹⁶ Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja.

¹⁷ Masna, Romoye tojabánashjango ora, cha botamana šojánguango y šonjáninÿena.

¹⁸ Bëngbe Utabná lastemado cháftaca chaotsemna, ntšamo nÿetscanga tmojamcá tšabá o ndoñe tšabá yontsemnama cha yochjayana ora. Aca corente condëtatsëmbo ntsachetšá Onesíforo Efeso puebloca šonjanëjabuachama.

2

Jesucristbiana canÿe tšabe soldado

¹ Y aca, atšbe uaquiñá, chë Cristo Jesús acbiana tšabe juabna yobomnentšana, bëtscá añemo ainaniñe cochtsebmoma.

² Ntšamo ba entšangbe delante šconjoyeunacá, cach buayenánana, boyabásenga nÿëtscañe tšabe palabra bomnënga cochjábanÿiye, y chamotsobena ínÿenga cachcá jabuátambama.

³ Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayinÿaye causa, ainaniñe bëtš añemo cochtsebmoma, mo canÿe tšabe soldadcá, cha chabe mándayabiana jasúfriana.

⁴ Ndocna soldado ntjátanana shjoca soyënguiñe vida jtsebmomna o crocénana juácana. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama.

⁵ Y canÿe travisiayá, ínÿenga jáyënjanama, canÿe soye juácana; pero ntšamo chë uacanánana jochñama tomncá ndoñe tonjatraviase, cha chë soye ndoñe ntjosháchiñama. Cachcá, ache trabajo cochjama ntšamo cmojtsemncá.

⁶ Chë jajañe trabajayá derecho jtsebmomna chë natsaná jtsemnama, chë tmojatbaná sananguentšana ndayánaca jtsebmomna. Acaftaca cachcá echanjopása, chë trabajo tšabá chacojamëse.

7 Chê chbontsatsëtsnañe cochtsenójuabnaye, y Bëngbe Utabná echanjama lempe chacmósertama.

8 Sempre cochtsenójuabnaye Jesucristbiama, ndabiama Bëngbe Bëtsá tojanma cháuatayenama y enjamna canya rey Davídbentsana entsá, ntšamo atše chabiama sëndabuayiyá ntšabe noticiënguñe endmëncá.

9 Chca abuayiyenaye causa, atše sentsesufrina, nya cadenëjuangácnaca utsbuaná, mo canye bëts bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínÿenga entsángbioye montsabuatabá.

10 Chíyeca atše nyetsca padecena soyëngaca sëndëtsóboyana, Bëngbe Bëtsabe bocacánëngbe tšabiama, chëngnaca atsebácanënga chamotsemnana, Cristbeñe jtsošbuáchiyëse; y Cristo Jesús bëtsëtsanga cháuabiamama, y cháftaca nyetsca tescama chamotsiyenama.

11 Mëntsá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmontsajbaná oyenana ntšamo tempo monjaninyencá y Jesucristbeñe montsošbuaché;

y chca, bëngnaca cháftaca mochantsiyena;

12 bënga chë padecena soyëngaca tmojtsemufrina ora, tmojtsemorochëse, bëngnaca Jesucristoftaca mochántsemundaye.

Bënga tmojayana, cha ndoñe monduabuata ca,

as cha bëngbiámnaca cachcá echanjayana;

13 bënga chábeñe ndoñe tmontsošbuáchese,

masque chca, cha cabá echanjama ntšamo tbojašebuachenacá,

er cha lempe jamana, ntšamo sempre iuetsemncá jtšinÿanÿnayëse.

Canye trabajayá, ndáftaca Bëngbe Bëtsá jtsoyejuayana

14 Chë tchonjauyana soyëngama, cochjama chë entsanga chamotsenójuabnana, y Bëngbe Bëtsabe delante cochjábuayenaye chënga ndoñe yontsamna nye palabrengama jabuachana enatsëtsnayana; er chca, ndocna tšabe soye ntjamana, y chca tmojtseatsëtsná ora, jamana chë soye ouenanënga más batšá chamotsošbuáchema, y jubabuáchana chëngbe tšabe juabnënga jtsondbiamama.

15 Lempe ntšamo icobencá cochtsama, aca chacotsemnana mo canye entsá ndabiama Bëngbe Bëtsá cháuyana nyetsca soyënguñe tšabá amá yomna ca; aca chacotsemnana mo canye trabajayacá, nda tondaye tontsebmna ndayama jatëuatjama; y chacotsemnana chë ndegombre buayenánana corente tšabá buatëmbayá.

16 Entšanga nye quem luarentša soyëngama, ndoservena palabrenga tmojtscuënta ora, chë soye ndoñe cattsuenana; er chë soye jamana entsanga puerte inÿetsá chamobocanama, ntšamo Bëngbe Bëtsá ndoñe yondmëncá, inÿetsá jtsejuabnayëse y jtsamëse.

17 Chëngbe buatëmbana soyëngaca puerte bacá ínÿengbioye jáborlana, nya mo canye uabouana šocana chamotsebmna cuafjamcá. Chca बातëmbayënguentše Himeneo y Fileto bontsemna.

18 Chata chë ndegombre benachentsana tbojtsojuánañe, y ibojtsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nyetscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entsanga chë ntšamo Jesucristbeñe imojanošbuachecá, mora y ndoñe chamondëtsošbuáchema.

19 Pero Bëngbe Bëtsabe ndegombre buayenánana nyëts tempo cachcá endesomñe, y ndocná quenátobena chë soye jatrócama. Chca endmëna mo chë ndëtsbenga ndayifne canye bëts yebna tojebncá, ndayifne mëntśá yojtśábemana: “Bëngbe Utabná endëubuatma chë chábenga imomnënga”, y “Nyëtscanga chë Bëngbe Utabnábenga imomnënga ca tmojtśichámënga, chamuajbaná nyëtsca bacna soyënga amana ca”.

20 Canye uámana entśabe yebntstse, tsafjoca soyënga ndoñe nye castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inyë soyëngna, nye nyëts tempo chaуетsoservënama.

21 Chca endmëna chë Jesucristbeñe imojtsoşbuachëngbeñe, ndoñe nyëtscanga tmontśajbaná bacna soyënga juabnayana y amana, ni chë chca tmojtśama entśángbentśana ndoñe tmontśojaná. Pero, chca jtsojuánañama tojtsebośá, echántsemna canya Bëngbe Utabnabiamá tśabe trabajayá; y chca, mo chë tsafjoca castellano y midio soyëngcá, canye uámana trabajuiñe echanjosërvia, y cha sempre echántseprontana ndaye tśabe soye jamama.

22 Chiyeca, ntśamo básefta bobontśënga bacna soyënga jamama mondboścá, ndoñe cattsama; pero aiñe cochtsiyena ntśamo Bëngbe Bëtsabe bominiñe tśabá yomncá jtsamëse, Jesucristbeñe puerte cochtsoşbuáchiye, Bëngbe Bëtsá y ínÿenga cochtsababuánÿeshana y nyëtscángaftaca natjëmbana cochtśomñe, chë chaújabuachama Bëngbe Utabná mondbetsotśëmbuanëngaftaca cányifne, ndocna bacna soye ainaniñe ntsebmncá.

23 Ndoservena soyëngama palabrënga y ndosertánentśana óbocana soyëngama ndoñe cattsuena; aca corente condëtatśëmbo chë soyënguentśana entśanga nye jabuachana enatsëtsnayifne jabocanana.

24 Pero chë Bëngbe Utabnabiamá oservená ndoñe quebnátśmëna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nyëtscanga jtsënÿayana, jtsemnana tśabe buatëmbayá y ínÿengaftaca uantadá.

25 Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnyacá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatśëmbuama;

26 chënga botamana chamuatsjuaboma, y Bëngbe Bëtsá, Satanasbe cuuatśënguentśana cháuatsebacama. Satanás chënga tojanëtabá ntśamo cha tojtseboścá jamama, mo bayënga canye uachmaniñcá.

3

Ntśamo entśanga mochtsemna, Cristo jësabama chaojtśobeco ora

1 Pero aca cmontsemna jtsetatśëmbuana, Cristo jësabama tempo chaojtśobeco ora, entśanga echántśamna puerte padecena soyënguiñe jtsiyenana.

2 Chca echántsemna, er entśanga, cada ona nye cachabe tśabiamá echanjësenojuabnaye, crocénana jtsebmomnana tśa mochántseboşe, mochántsemna enábotamnyënga y ínÿengbiyoe mo nduamánëngcá mochantsënÿaye. Bëngbe Bëtsabiamá y ínÿengbiama bacá mochantsóyebuambnaye, chëngbe bëtsëtsangbiyoe ndoñe quemochátayauana, ni chëngbiama tśabe soyënga tmojtśamëngbiyoe

quemochtétacheuanaye, y Bëngbe Bëtsabiana y chabe soyëngama ndoñe respeto quemochátsbomna,

³ ni cachëngbe pamíllangbioye quemochátababuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uaboténënga.

⁴ Chënga, uayayëngbe cucuatšinë entšanga ayentsbáshejuanënga mochántsemna, mochántsama soyënga tondayama ntjatsrreparánëse, y cachënga uámana entšangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše.

⁵ Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnama chënga ndoñe mondošbuáchema.

Nÿa tondayama chëngaftaca cattsencuéntaye.

⁶ Chënguentše báseftanga mondmëna, y chëngna botamana palabréngaca yebnënguenache jamashnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnama, ntšamo tmojtsebošcá.

⁷ Chënga nÿets tempo nÿe ndaye tsëm soye jatóntšana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama.

⁸ Ntšamo Janes y Jambres Moisesbe contra ibojamncá, cachcá, chë inÿenga jáingñama abuátambayënga nÿetsca ndegombre soyëngama contra jtsemnana. Chë entšanga chëngbe juabniñe nÿe bacna soyënga jtsebomnana, y Bëngbe Bëtsá chënga tojtšëbaté, chënga chë ndegombre soyënguñe ndoñe ntsošbuáchiyana causa.

⁹ Pero chënga ndoñe quemochatobenaye bëtscá entšanga jáyënjanama, er nÿetsca entšanga mochanjátatšëmbona chënga nÿe bacna soyënga juabnayënga imomnama, mo chë Israeloca entšanga tmojantatšëboncá Janes y Jambres nÿe chca juabnayata bëtsemnama.

Inÿe soye Timotéobioye tbojanbonÿé

¹⁰ Pero acna, puerta tšabá condétatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerta tsošbuaché, ntšamo inÿengaftaca uantado tsmëna; ntšamo atše, Bëngbe Bëtsá y inÿengbioye tsababuánÿeshana; ntšamo atše, Bëngbe Bëtsábeñe jtsobátmanëse,

¹¹ inÿenga šmonjanacmena ora; y sënjansufrina ora, padecena soyënguñe bëtš añemo tsjánbomna. Acnaca condétatšëmbo ntšamo atše chama Antioquía, Iconio y Listra bëtš pueblëngoca tsjansufrinama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá.

¹² Ndegombre endmëna, nÿetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúseftaca canÿiñe mo canÿacá imomnënga, puerta mochanjasúfria, chca bëtsemnama, chënga chamosufrina inÿenga chamojtsama ora;

¹³ pero chë bacna entsanga y chë ínÿenga áingñayënga, cada te más bacna entsanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñënënga mochántsemna.

¹⁴ Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tcmojanbuátëmbanga;

¹⁵ y aca, cabá básetema conjamna orscana, chë Bëngbe Bëtsabe uabemana palabrëngama condëtatsëmbo, chë ndaye sóyeca aca contsobena juatsjinÿana, Bëngbe Bëtsá chacmatsbocama, Cristo Jesúsbeñe jtsošbuáchiyëse.

¹⁶ Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrënguñe yobinÿncá entsanga chamuábemama. Chë uabemana palabra endoserverna, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatsëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamëse;

¹⁷ chca, canÿe entsá Bëngbe Bëtsabiamama oservená y obená chaotsemnana, tšabá chaotsetatsëmbo y sempre chaotseprontana nÿetsca tšabe soyënga jtsamama.

4

¹ Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiamama y chë ya mochjóbanëngbiamama, ntšamo chëngbe vidënguñe tmojëftsemcá tšabá o ndoñe tšabá bëtsemnana, chatbe delante cbomandá,

² Bëngbe Bëtsabe palabra entsanga chacotsabuayiyayama; sempre chca jamama cochtseprontana, masque entsanga aíñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetatsëmbo, chca tmojtsamama cochjucácana y cochjábuayenaye ndayá jamama vojtsam-nana. Sempre chca cochtsabuátambaye, chca ora puerte uantado jtsemnëse.

³ Chca cochtsama, er canÿe tempo echanjóshjango y chora entsanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatsëmbuama boše causa, ba abuátambayënga mochanjuánguango, y chënga mochántsicchamo soyënga nÿe ntšamo cach entsanga jouenama tmojtsebošcá.

⁴ Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana.

⁵ Pero aca, siempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiamama tšabe noti-ciënga entsanga abuayiyayabe trabajo cochtsama; y nÿa cochtsentsëna ndayá Bëngbe Bëtsá tcmojabonÿecá tšabá jtsamama.

⁶ Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oye-uayá chaotsemnana.

⁷ Cristo Jesusbe soyëngama corente sënjenouerzá. Mo canÿe travisiayacá, chë jashjanguama yomna luaroye ya tojashjangcá, átsnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché.

⁸ Chcasna, atšbiamá canÿe uacanana soye echántsemna, er Bëngbe Bëtsá tojama atše chabe bominiÿiñe tšabia chaitsemnama. Bëngbe Utabná endmëna chë ndegombre tšabá ichamuá entšanga aiñe o ndoñe tšabá tmonjamama, y cha chë uacanana soye sochántatšetaye, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešoçhtétatšetaye, ndayá nÿetscángbioye chca, ndëmuanyënga puerte imo- boše cha cachiñe cháuesabama, cha imobobonshánayeca.

Inÿe soyënga Timoteobiamá

⁹ Lempe ntšamo tcojobenacá cochjama betscó jabama atše jabínÿama;

¹⁰ er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica pueblöye tojtsoñe. Crescente Galacia luaroye tonjá y Tito Dalmacia luaroye.

¹¹ Nÿe Lucas, chë šmonjanájabuachanënguentsana, mora átšeftaca entsemna. Marcos cochjaftsenguango y ácaftaca cochjëftsbeše, er cha atše trabajuama puerte oservená endmëna.

¹² Tíquico, Efesoye sënjichmó.

¹³ Chacójabo ora, uabonjanía šcochjesacñe, atše Troas bëts puebloca, Carpbe yebnoca tijésaboshjona; chë librëšangánaca, pero chë uamana uabemana tšbuanachangá ndoñe chacmondétsebnatjëmbea.

¹⁴ Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastiga, ntšamo atše šojaborlama.

¹⁵ Chabiamá cuedado cochtsebmna; cha tojobenase ntšámñaca cmatjabórla, er cha chë bënga mondabuayiyná soyëngama contra entsemna.

¹⁶ Chë natsana soyama, mándayëngbe delante šonjanotocá jenëuyanama ora, atše ndocná chešnatánajabuache; nÿetscanga cachcá šmonjésonÿaye. Pero atše sëntsobátmana, Bëngbe Bëtsá chama chënga chaotsaperdoná.

¹⁷ Pero Bëngbe Utabná aiñe šonjanájabuache y tonjanma atše bëts añemo jtsebmñama, y chcase, atše sënjanobená Jesucristbiamá nÿetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canÿe uabouana resjuentšana šonjanatsbocá, mo canÿe león jtsosañámentšana ndábioye cuafjatsbocá,

¹⁸ y Bëngbe Utabná šochanjatsbocá, bacna soye ndocná chašondëborlama; y sempre jtšinÿenëse, celoye, chë ndayentše cha yománda luaroye šochanjebetše. ¡Nÿetscanga nÿetsca tescama cha chamotsatschuaná! Chca chaotsemna.

Pablo Timotébioye jadiósoftanama

¹⁹ Atšbe cuenta cochjácheuaye Prisca y Aquila, y Onesíforbe pamílnaca.

²⁰ Erasto, Corinto puebloca tontsoquedañe, y Trófimo Mileto puebloca šocá sënjëftsebohjona.

²¹ Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

²² Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

Tito

Jachuayama

¹ Atše Pablo, Bëngbe Bëtsabe oservená sëndmëna y Jesucristbe ichmoná entšanga jábuayenama, chë Bëngbe Bëtsá chabe entšanga chamotsemnana tojábacacanga, Jesucristbeñe chamotsošbuáchema y chë ndegombre soyëngama chamotsetatsëmbuama; chë soyënga endmëna ntšamo bënga, Bëngbe Bëtsabe básenga bëtsemnana, mondoyena jtsamëse.

² Lempe chca sëndama, er Bëngbe Bëtsábeñe jtsošbuáchiyëse, atše sëntsobátmana chë nyetsca tescama yomna tšabe vida jtsebonnana. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entšanga chca vida jtsebonnana;

³ y nÿa chama tempo tojóshjango ora, chë entšanga jábuayenama, soyëngaca Bëngbe Bëtsá chabe palabra šojinÿanÿé, ndayá Jesucristo entšangbiama yochjanmama; y chca jábuayenama atše palabra šmonjabonÿé, Bëngbe Bëtsá, bëngbe Atsebacayabe mándoca.

⁴ Tito, quem tšbuanácha chontsabobiamná. Atše Jesucristbe soyëngama entšanga sënjanabuayiná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaqüñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ácheñe tšabe bendicionënga chaotsemnana chata chaboma, y chaboma aca ainaniñe tšabe ebionana chacotsebonnana.

Titbe trabajo Creta luaroca

⁵ Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnana chacubuáyanama, ntšamo tcbonjftsemandacá.

⁶ Canÿa bëtsëjémama uabuayaná mëntsá bontsemna: chaotsiyena ntšamo chabiana ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntsobencá y nÿe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca.

⁷ Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonÿéyeca, cha bontsemna jtсийenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnana; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nÿe paselo becá crocénana jtsebonnana.

⁸ Pero chabe yebnentše posada entšanga júyentšamiamana sempre chaotseprontana, tšabe soyënga chaotsebinÿinama sempre chaotsentšena, botamana juabnayá chaotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyëngüiñe jenomándama chaotsobena.

⁹ Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre

buatëmbana soyëngaca ñyënga añemo chaotsatšatnama, y chë soyama contra tmojtsemnënga jáyëñjanama, ndoñe tšabá montsamama.

¹⁰ Cha chca bontsemna, banga nÿe ndëmandánënga jtsiyenama bošënga mondmëna causa, y chënga mondmëna, nÿe ndaye ndoservenana soyëngama yapa oyeubuambnayënga y ñyënga áingñayënga, y chcanga más mondmëna chë nÿetsca ošbuáchiyënga base bobachtëma chë más delicadentšë tëtšëngë jtsëmnama yojtšamna ca mondbëtsichamënguëntšë.

¹¹ Y entseyta chëngbiyoye jtayáchetana, er chënga jamana ba pamíllanguentšë nÿetscanga Jesucristbeñe ošbuáchiyana chamotsajbanama. Chënga chca mondbëtsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

¹² Enjamna canÿa, ndabiama entšanga jtsichámuana cach Creta luar-entša diosëngbiama oyeubuambnayá canjamna ca, y cha cachabe luarentša oyeñëngbiama mëntšá tonjánayana: “Creta luarentšë oyeñënga, nÿets tempo bosterënga mondmëna, ainana ndbomnënga y oyëñjayënga nÿe becá jasama bošënga ca.”

¹³ Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchemana y chamotsobedecena chë buatëmbana soyënga, chë ndayiñe bënga mondošbuaché;

¹⁴ y cach judiëngbe cuentënga ndoñe chamondëtšuenana, ni chë ndegombre soyënga uabotenëngbe mandënga.

¹⁵ Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámna jsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama.

¹⁶ Chënga jtsichámuana Bëngbe Bëtsá imuábuatma ca, pero ntšamo tmojtšama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe bominiñe puerte bacna entšanga mondmëna, y ntšamo cha tomandacá ndoñe ntšamana; chë causa chënga ndoñe ntšobënanana ndaye tšabe soye jamama.

2

Soyënga ntšamo chë ndegombre buatëmbánana endmëncá

¹ Ntšamo chacojtsoyeubuambnacá sempre chaotsemna ntšamo chë ndegombre buatëmbánana endmëncá.

² Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiama mo uámana entšangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

³ Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátšenayënga ndoñe chamondëtsemna, ni tmojënga. Entsamna chamotsiyena tšabe soyënga jtsamëse;

⁴ chë tobiašënga chamotsinÿanÿná y chamotsabuatambá ntšamo chëngbe boyanga y básënga jtsababuánÿeshanana,

⁵ ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšënanana, nÿetscángaftaca tšábënga jtsemnana, cachëngbe boyángbiöye jtsayaunanana, chca, ndocná chaondëtsobena Bëngbe Bëtsabe palabrama bacá jatóyeuambnayana, ntšamo chë tobiašënga tmojamama.

⁶ Cachcá, chë bobontsënga añemo cochtsatšatnayë cachënga jenomándama chamotsobenama,

⁷ y chënga cochjínÿanÿiye ntšamo yomna jtsiyenana, cach aca nÿetsca soyënguñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama,

⁸ chë ndegombre soyënga jtsóyeuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiana jayanama.

⁹ Chë nÿets tempo nÿe ínÿabiana oservénënga cochjábuayenaye, chëngbe nduiñëngbiöye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnana.

¹⁰ Ndoñe chamondëtsatbëbana, pero aiñe nÿetscañe tšabe palabra bomnënga chamotsemna. Chënga chca entsamna, chca, ínÿënga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiana yomna ca.

¹¹ Er Bëngbe Bëtsá bënga sonjinÿanÿé cha bëngbe tšabiana juabnënga yobomnana, y chca, cha tojama nÿetsca entšanga chamotsobena atsebácänënga jtsemnana.

¹² Chë Bëngbe Bëtsabe juabna bëngbe tšabiana, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámncaca šontsabuatambá, cabënga jenomándama jtsobenëse, ntšamo Bëngbe Bëtsabe bominÿiñe tšabá yomncá y cha jadórama soyënga jtsamëse.

¹³ Y chca jtsamëse, y Bëngbe Bëtsábeñe ošbuachiyánaca jtsiyenëse, jt-sobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora.

¹⁴ Cha chabe derecho vida jtsobomñama cachcá tojanonÿá y bëngbiana tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga játsebacama, ainaniñe ndocna bacna soye ndbomnënga jábiamama, bënga chábënga chamotsemnana, sempre prontánënga ntšamo tšabá yomncá jtsamama.

¹⁵ Chca cmontsemna jtsabuátambayana, chënga becá añemo jtsatšatnayëse, y jtsinÿanÿnayëse chënga bacna soye tmojamama, chë nÿets condbomna mándoca jucácänëse. Ndoñe catjaleséncia ndocná chaundayana aca mando ndoñe condbomna ca.

3

1 Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama.

2 Ndocnabiamama ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsënyãma entsãnga jtsinÿanÿnayëse.

3 Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñénënga y mandánënga monjamna nÿetsca bacna soyënga jamama juabnëngaca y nÿe quem luarentse tšabá jtsemnana juabnëngaca. Bënga monjaniyena nÿe bacna soyënguiñe juabnaye, ínÿenga uantšaboše. Inÿenga bënga šonjanëbuayënja y bënga nÿetscanga monjanenáboyënja.

4 Pero Bëngbe Bëtsá, bëngbe Atsebacayá, bëngbe tšabiamama juabna yobómnyecaya y tša šuababuánÿeshanama šonjaninÿanÿé ora,

5 cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanongméyecaya. Cha šonjanatsebacá, bëngbe bacna soyënga jabuajuánase, y chë Uámana Espiritu jujabuáchëse, bënga mo tsmëma entsãngcá chamotsemnana, ntšamo tempo yojamncá ntjatsjuabnycá y ntjatamcá.

6 Bëngbe Atsebacayá Jesucristbeyecaya, Bëngbe Bëtsá tojanma Uámana Espiritu bëngbe ainaniñe nÿets tempo chaotsemándama y bënga chašotsëjabuachanama,

7 chca bënga, Bëngbe Bëtsá bacna soyëngama šojaperdónanga y bëngbe tšabiamama juabna bómnyecaya tojayana chabe bominiñe tšábënga imomnënga, chamotsobena cha yobomna soyënguentšana bënga mo ndayá cuaftsëtocancá jýëngacñama, y chca, chábeñe jtsošbuáchiyëse, chë nÿetsca tescama yomna tšabe vida chamotsobátmanama.

8 Chca, lempe ntšamo tijayancá nÿa ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentšena chë tšabe soyënga jtsamama. Chë buatëmbánana puerte tšabá endmëna y nÿetscangbiama bëtscá endoserverna.

9 Inÿenga nÿe ndoserverna soyëngama jabuachana tmojtsenatsëtsná ora, y anteungbe cuentëngama chamojtsoyebuambná ora, ndoñe cattsontrëmetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe ínÿëngaftaca cattsenpéliaye. Chca jtsamana tondayama ntososervëna, y nÿe bonamente chca jtsamana.

10 Nderado nda tojtsama entsãnga ndoñe cachcá nÿetscanga chamondëtsejuabnama y chamotsenpéliama, canÿe o uta soye cochjabuayená ndoñe tšabá tonjamama; pero cha ndoñe tcomnjóyeunase, chentšana cháftaca ndoñe más cattsóyeubuambnaye.

11 Chca cochjama, er aca cochanjátatšëmbona canÿa chca tojtsemná, chabe juabna tojatrocá bacna soyënga jtsejuabnayama. Chë soye y chë inÿe bacna soyënga ntšamo cha tojtsamcá, jtsinÿanÿnayana cha ibojtsemna castiganá chama jtsemnana.

¹² Atše, Artemas o Tíquico ácbioye chaijichmó y choqa chaojášhjangora, ndayánaca cochjama Nicópolis puebloye aca jama atše jinŷama, er atše sēnjajuabó chentše chē uaftenēntscuana jēftsemnana.

¹³ Lempe ntšamo chacojobenacá, cochjuájabuache chē ínŷenga obuauyayá Zenas, y Apólosnaca; lempe ntšamo chata ibojtsējabotcá cochjátšataye, ínŷoye jama jatóntšama chamobenama y benachējana tondaye chaondētsabuáshebenama.

¹⁴ Atše sēntseboše, bēngbe entšanga, chē bēngcá Jesucristbeñe ošbuáchiyēnga, chamotsentšena chē tšabe soyēnga jtsamama y chē puerte ujabótēnga jtsējabuáchanama, chca, chēnga tondayama ndoservena vidēnga ndoñe chamondētsebonnama.

Pablo Títbioye jadióšoftanama

¹⁵ Nŷetscanga chē átšeftaca montsemnēngnaca cmontsechuaná. Atšbe cuenta cochjácheuaye nŷetscanga chē bēnga imuababuanŷeshanēngbioye, cach bēngcá Jesucristbeñe ošbuáchiyana bómnyeca. Atše, Bēngbe Bētsá sēntseimpadana, cha chaoma ácbeñe tšabe bendiciónēnga chaotsemnana.

Filemón

Jachuayama

¹ Atše Pablo, mora utamená Cristo Jesusbiana oservena causa, quem tsbuanácha séntsabiamná, Jesucristbeyeca bēngbe catšata Timotéoftaca, acbiama Filemón, bēngbe bonshaná y nda bēngaftaca condētrabája Jesucristo jaserviama.

² Atše séntsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenojuerzana; y nýetsca ošbuachiyēngnaca, ndēmuanýenga imuamana acbe yebnentše jénefnama Bēngbe Bētsá jētschuayama.

³ Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tšabe bendicionēnga tšēngaftangbeñe chaotsemnama, y chaboma tšēngaftangbe ainaniñe tšabe ebionana chašmotsebonnama.

Filemonbe bonshánana y ošbuáchiyana

⁴ Bēngbe Bētsáftaca stsencuénta ora, acbiama sēndbētsenojuabnaye, y sempre acbiama Bēngbe Bētsá sēndbētsatschuanaye,

⁵ er atše sēnjátatsēmbona ntšamo aca nýetsca chē Bēngbe Bētsábenga imomnēnga icuababuánýeshanama, y ntšamo aca Bēngbe Utabná Jesúsbeñe tša icosbuáchema.

⁶ Bēnga, Jesucristbeñe ošbuáchiyēnga quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá séntseimpadana, tšēngaftanga chašmobená más botamana josértana nýetsca chē Bēngbe Bētsábocana tmojóyēngacñe tšabe bendicionēnga, bēnga Cristo Jesúseftaca cánýiñe mo canýacá bētsemnayeca.

⁷ Jesucristbeyeca atšbe bonshana catšata, aca chē Jesucristbeñe ošbuáchiyēnga tša condábuanýeshanama, atše corente oyejuayá séntsemna y bēts añemo séntsebonna. Y aca tcojama, nýetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnama, chēnga jujabuáchese.

Pablo, Filemónbioye Onésimbiana tbojanimpadá

⁸ Y chca, atše Cristbe ichmoná quetsomñecá séntsobena, aca nýe jamándana ntšamo yomncá chacotsamama, pero atše chca ndoñe quichatsma.

⁹ Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiama oservena causa,

¹⁰ canýe ruego chochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Crístbeñe tonjanošbuachéyeca, cha mo atšbe uaquíñacá tonjanóbema.

¹¹ Tempo, cha ácbioye tondayama quecmēnjátanservena, pero mora cha becá entsámama, acbiama y atšbiana.

¹² Mora ácbioye séntsatichamná, y atše siempre chabiama sēndbētsenojuabnaye y sēndbobonshana.

¹³ Atšbiana puerte tšabá manmēna cha átseftaca matēnjoquedase, acbe cuenta atše chašoservema, cárceloye utamená séntsemnēntscuana, chē tšabe noticiēnga entšanga abuayiynaye causa.

¹⁴ Pero atše ndoñe chiyatsma cha chaoquedama atše chašujabuachama, er atše ndoñe quetsátsboše aca obligaciónaca chacotsemnama, atše jua-jabuáchama ndayánaca chacomama; y sěntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma, chě soye chca chaotsemnama aca cabá ndocá ntjayaná.

¹⁵ Atše sěntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnama ca,

¹⁶ y ndoñe nyē acbiamama mo nyets tempo canye oservenacá, ndayá chama más uamanacá, mo Jesucristbeyeca canye bonshana catšatcá. Atše puerte Onésimo sěndbobonshana, y acna cmontsemna más cha jtsebobonshánana, er cha mora ndoñe quenátsmēna canya nyē acbiamama nyets tempo oservená, ndayá Běngbe Utabnábeyeca canye catšata, ntšamo cach aca condmēncá.

¹⁷ Chca, aca atšbiamama condějuabná mo ácaftaca cányiñe Běngbe Utabnabiama trabajayacá; chíyecna cmontsemna cha jtsofjana, mo atše šcojofjá.

¹⁸ Nderado ntšamo cha tcmojanborlá o ndayánaca tcmondebena, atše chama cbochjětsěntsabuachiye.

¹⁹ Atše Pablo, cach atšbe cucuátseca quem soye sěntsabiamná. Atše chama cbochanjětsěntsabuachiye. Ndegombre, ndoñe quenátsiya atše chachěyana becá šcondebena ca, ntšamo atsbocaná jtsemnama atše tcojábuanayenama.

²⁰ Chcasna, Jesucristbeyeca atšbe catšata, Běngbe Utabnáftaca cányiñe mo canyacá quetsomñecá, Diosmanda chě pavor šcochtsebema. Diosmanda cochjama atšbe ainana ngmēnaca ndoñe chaondětsemnama.

²¹ Atše chca cbontsabobiamná, er atše tšabá sěndětatsēmbo, ntšamo cbontseimpadancá cochjama, y cabá más chama cochjatsmama.

²² Y mora inye soye, Diosmanda posada šcochjabopróna, atše jányama chajábocna orscama, er atše puerte jtsošbuáchiyese Běngbe Bětsábeñe sěndobátmana, cha tšěngaftangbiamama yochjama lempe ntšamo atšbiamama chašmojtjañcá, y chca, cha šochjaleséncia atše tšěngaftangbioye jésama.

Pablo Filemónbiye jadiósoftanama

²³ Epafra, muentše átseftaca cárceloye utamená, Cristo Jesusbiamama entšanga abuayinye causa, chánaca cmontsechuaná.

²⁴ Y Marcos, Aristarco, Demas y Lucas, chě bēngaftaca mondětrabájanga Cristo jaserviama, chěngnaca cmontsechuaná.

²⁵ Atše sěntseimpadana Běngbe Utabná Jesucristo, chaoma tšabe bendicionēnga tšěngaftangbeñe chaotsemnama.

Hebreos

Bëngbe Bëtsá bëngaftaca tojoyebuambá, chabe Uaquiñáftaca

¹ Tempo, Bëngbe Bëtsá ba soye y ba soyëngaca bëngbe bëts taitángbioye tojanëyana, chë chabe juabna oyeubambayëngaftaca.

² Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inye luarënga tojama.

³ Cha endinÿanÿná Bëngbe Bëtsabe corente buashinÿinÿanana y uámanana, y cha endmëna cach Bëngbe Bëtsacá, y chábeñe bënga mondobena jinÿama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinÿncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentsana Bëngbe Bëtsá tojaninÿanÿé cha puerte bëtsá y uamaná bëtsemnana, celoca játbemëse, Bëngbe Bëtsabe catsbioica, nyetscanga jtsamëndayama.

Bëngbe Bëtsabe Uaquiñá chë angelëngbiana más bëtsá yomna

⁴ Y chca, Bëngbe Bëtsá tbojánbema chë angelëngbiana más uamaná y obená, er Bëngbe Bëtsá tbojanbuajó canÿe más uámana uabaina y chë angelëngbiana canÿe más uámana trabajo tbojanbonÿé.

⁵ Ndegombre chca endmëna, er Bëngbe Bëtsá ndocna te ndocna ángelbioye mëntsá tbonjaniyana, ntšamo chabe Uaquiñábioye tbojaniancá:

Aca atšbe Uaquiñá condmëna.

Mënté entsanga sënjinÿanÿé aca atšbe Uaquiñá comnana ca.

Ni ndocna angelbiana mëntsá tojánayana, ntšamo chabe Uaquiñabiama tojanayancá:

Atše canÿe taitá chabiana chántsemna,

y cha canÿe Uaquiñá atšbiana ca.

⁶ Quem Bëngbe Bëtsabe Uaquiñá endmëna nyetscangbiana más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

⁷ Y chabe angelëngbiana, mëntsá tojánayana:

Atše sëndama atšbe angelënga, chë atšbe buayiynayënga, mo binÿiëngcá chamotsemnana,

y chënga, atšbe oservëngca, mo inÿëngcá ca.

⁸ Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemandaye, ntšamo tšabá yomncá jtsamëse.

⁹ Aca icontsena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nÿa tondayama cmondagustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnana,

chë inÿengbiana más oyejuayá ca –Bëngbe Bëtsá tojánayana.

10 Bëngbe Bëtsá mëntśánaca chabíama tojánayana:

Utabná, quem luare jobojátśama ora, aca quem luare tconjanma, y lempe chë celoca yomna soyéngnaca.

11 Lempe chë soyénga nÿets tempo ndoñe queochátsmëna; aca nÿetsca tescama cochántsemna.

Lempe chë soyénga echanjopochóca, mo tojuatanguaná entsáyaca.

12 Aca chë luarénga cochanjátrocaye, mo tsmécá cuaffabíamcá.

Chca, chë luaréngaca cochanjama, mo entsáyá tcojtenëjonëtse y tcojenotrocacá.

Pero aca nÿets tempo cach aca cochandesomñe,

y nÿets tempo vida cochandesóbomñe ca —cha tojánayana.

13 Bëngbe Bëtsá ndocna te ndocna ángelbioye mëntśá tbonjaniyana, ntśamo chabe Uaquiñábíoye tbojaniyancá:

Atśbe catśbioica cochtsetbemana,

acbe uayayénga acbe cucuatśiñe chamoquedama atśbe obenánaca chjamëntscuana ca.

14 Ndegombre, nÿetsca angelénga espíriténga mondmëna Bëngbe Bëtsá jasérvíama, ndëmuanyénga cha tojaníchamó bënga jabújabuachama, chë atsebácanénga mochtsemnëngbe tśabíama.

2

Canÿe bëts soye endmëna atsebácanénga jtsemnana

1 Chíyeca, bënga śontsamna sempre Bëngbe Bëtsabe soyénga jtsuenanana, chë bënga tmonjouena soyénga, chë tśabe benachentśana ndoñe chamondojuánama.

2 Ndayá Bëngbe Bëtsá tempo angeléngaca entsanga tojanamëndacá, canÿe ndegombre soye endmëna, y entsanga entsamna chca jtsobedecénana; y chë bacna soye tmojanmënga y ntśamo Bëngbe Bëtsá tojanmandacá ndoñe tmonjanmënga castigo tojanatśatá, chca tmojanma causa; y chca,

3 bënga chca bacna soyénga tmojtsamëse, ¿ntśamo mochjobenaye jtsejuabnayana Bëngbe Bëtsá chama ndoñe śochanjacastígaye ca? Ndegombre cha chca echanjama, bënga chábeñe ndoñe tmontsośbuáchese, chë bëts soye jëftsashjáchama, atsebácanénga jtsemnana. Bëngbe Utabná chë natsaná yojtsemna nda entsanga tojanabuayená Bëngbe Bëtsá entsanga yochjánatsebacama; y ínÿenga bënga śonjanabuayená cachcá ntśamo chábioye tmojanoyeunacá.

4 Y Bëngbe Bëtsánaca tonjaninÿanyé, ndayá chënga tmojanabuayenacá ndegombre bëtsemnana, chabe obenana jinÿanyíyama soyéngaca, entsanga chamenjnaná soyéngaca, bëts soyéngaca, y entsanga chë Uámana Espiritu ainaniñe chamotsebómnama cha jtsamëse. Chca jamëse, cada ona chaot-sobena jamama ntśamo Bëngbe Bëtsá yobośca.

Bëngbe Bëtsá tojanma Jesucristo entsangcá chaotsemnana

5 Bëngbe Bëtsá angelénga ndoñe tonjubuáyana chamotsemándama ndayá quem luarentse yochtsemniñe, lempe mo tsmécá chaotsemnana Bëngbe Bëtsá chaojama ora, chë ndayama mora bënga montsoyebuambná.

6 Chamna, ínÿoca Bëngbe Bëtsabe uabemana palabreñguiñe mëntśá endayana, ntśamo chábioye canÿa tbojaniyancá tojánayana:

Entśanga ndoñe yapa uámanénga quemátsmëna, as ¿ndáyeca tśa chëngbeñe cuanjésejuabnaye?

Chënga entsãnga mondmëna. ¿Ndáyeca tša chënga cuanjésanýena?

⁷ Aca tcojama entsá puerte uamaná chaotsemnama, y chë angelëngna nýe batšatema chabiamã más uãmanënga mondmëna.

Aca tcojama cha puerte uamaná y respeto merecido bomná chaotsemnama, ⁸ y cha chaotsemãndama nýetsca chë inýe soyënguiñe, chë quem luarentše aca tcojamiñe —chiñe canýa tojánayana.

Entsá lempe chaotsemãndama Bëngbe Bëtsá tojanma ora, tondaye tonjánboshjona entsáftaca ndëmandana soye ca. Pero mëntscoñama ndoñe nýa chca quemëntinýe, chë entsá lempe ntšamo quem luarentše yomncã jtsemãndayana.

⁹ Pero bënga mondetãtsëmbo y corente mondonýa Jesús aífne chca tojanmama. Bëngbe Bëtsá tojanma cha nduamanã chaotsemnama, mo canýe entsácã, baseftayté chë angelëngbiamã más batšã uamanã. Bëngbe Bëtsá, entsãngbe tšabiamã jtsejuabnayëse, yojãboše Jesús chaobanama, corente jasúfriase; Bëngbe Bëtsá yojãboše cha chca chaomama, nýets luarentša entsãngbe tšabiamã. Y Jesús ya chca tojánmayeca, Bëngbe Bëtsá ya tojinýanýé cha puerte bëtsá y uamanã bëtsemnama.

¹⁰ Nýetsca soyënga yobinýna Bëngbe Bëtsabiamã y chábeyeca. Tšabã enjamna, Bëngbe Bëtsá jamana Jesucristo chaotsemnama lempe ntšamo entsãnga tmojtšajabotcã, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entsãnga atsebãcanënga jtsemnama unachayã, chaosufrima jamëse, chca, ba entsãnga celoca, mo chabe basengcã, cháftaca bëtšëtsãnga chamotsemnama.

¹¹ Er Bëngbe Bëtsá cach Taitã nýetscangbiamã endmëna: Jesús, chë entsãnga Bëngbe Bëtsábenga chamotsemnama iuamabiamã, y chë entsãnga chca chamojtsemnëngbiãmnaca. Chiyeca Jesús, Bëngbe Bëtsabe Uaquiñã, ndoñe ntsëuatjana chëngbioye catšátanga ca jtsachembuanama.

¹² Bëngbe Bëtsabe uabemana palabrënguiñe Bëngbe Bëtsãbioye cha mëntšã tbojanianã:

Atšbe uabentsëngbeñe acbiamã chanjóyebuambaye,
y jacãntase cbochanjëtschuaye, ácbioye adórayënguentše ca.

¹³ Y mëntšãnaca cha Bëngbe Bëtsabiamã tojánayana:

Atše atšbe Bëtsãbeñe chantsošbuãchiye ca.

Y más chcoye mëntšã tojánayana:

Muentše Bëngbe Bëtsabe básengãftaca sëntsemna, chë atšbe cucuatšifne tojãbashejuanënga, atše jtsanýenama ca.

¹⁴ Quem Bëngbe Bëtsabe básenga nýetsca entsãngcã mondmënayeca, Jesúsna canýe entsá chëngcã tojanóbema. Cha chca tojanma, jóbãñese, chë entsãnga jóbãnama chaotsamnama obenana bomná Satanã, jayëñjanama.

¹⁵ Y chca, cha tojama chë jóbãnama y ndayã chentšana yochjopãsama auatjënga ndoñe chamondëtsauatjama; chënga nýets tempo corente ngmënacã imnoyena, jóbãnama auatja causa.

¹⁶ Er ndegombre, cha ndoñe tonjánabo chë angelënga jabújabuachama, ndayã chë Abrahãmbentšana entsãngbioye.

¹⁷ Y chama cha ibojamna jtsemnana nýetsca soyënguiñe cachcã mo chabe uabentsëngcã, chë entsãnga, chca, jobenayama jtsemnama chëngbiamã mo bachnangbe canýe más uãmãna amëndayacã, Bëngbe Bëtsã jtseimpadãnama chëngbioye chëngbe bacna soyëngama cháuaperdonama, puerte lastemado mëná y sempre ntšamo Bëngbe Bëtsã tbojauyancã amã. Chca, cha jóbãñese

jamama entsanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama.

¹⁸ Y mora cha entsobena, ndëmuanÿenga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

3

Cristo Moisesbiana más uamaná endmëna

¹ Chíyeca, Jesucristbeyeca catšátanga, Bëngbe Bëtsábenga, ndëmuanÿenga Bëngbe Bëtsá tojáchembo chabe entsanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbiuye tbojanichmó, y nda bëngbiana yomna mo chë más uamana bachnangbe amëndayacá, Bëngbe Bëtsábioye jtsempadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe.

² Er Jesús nÿets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbiuye cháuaservema.

³ Canÿe yebna jebuaná chë yebnama más uamaná jtsemnana; cachcá Jesús, nda inétsama entsanga Bëngbe Bëtsábenga chamotsemnana, más jtsomerecénana Bëngbe Bëtsá cha puerta bëtsá y uamaná bëtsemnana cháuinÿanÿema, nÿe ntšamo Moisés, canÿa Bëngbe Bëtsabe entšanguentsá yojanomerecénama.

⁴ Ndëmuanÿe yébnëcana canÿe jebuaná jtsebmomnana, pero Bëngbe Bëtsá endmëna nda tojanma lempe ntšamo yobinÿncá.

⁵ Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nÿetsca Bëngbe Bëtsabe entšángbeñe, y yojamna canÿa corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama.

⁶ Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canÿe uaquiñá jtsemándayana ndayá nÿetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsa entsanga jtsemnana, bënga chë ndayá tmošbuáchemba bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebmomnana puerta oyejuayënga tmojtsemnëse.

Chë jóchnama uamana luare Bëngbe Bëtsabe entšangbiana

⁷ Chcasna, ntšamo chë Uamana Espiritu Bëngbe Bëtsabe uabemana palabrënguiñe tojanayanacá:

Mënté tšëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entsanga ndoyena luaroca Moisésoftaca imojëftsemnëngcá, Bëngbe Bëtsabe contra nÿetsca soyënguiñe imojtsemna.

Chënga bëtscă bacna soyënga tmojanma, mo ndayá cuafksamcă jinÿama ntsachetsá más muanjobenaye jamana y Bëngbe Bëtsá cabá uantado chëngaftaca tayojtsemnama.

9 Bëngbe Bëtsá tojánayana: “Chentşe, tşëngaftangbe bëts taitanga bëtscă monjánama jinÿama ndayëntscoñe atşe uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentşe tmonjáninÿe chë atşe sënjánama bëts soyënga.

10 Chíyeca, atşe chorsca entşángaftaca şonjánetna y sënjánayana:

“Tşëngaftanga mora átşeftaca ndoñe queşmátajna, mo chë otşenënga tmojtsemnëngcă,

y ndoñe şmonjábosena jtsiyenana ntşamo atşe tşboşcă jtsamëse’

11 Chíyeca, atşe chëngaftaca etonaná sënjánayana, mo nda cuafjajuracá,

chënga ndocna te mochjëftsashjache chë átşeftaca jóchnama uámana luaroye jashjanguama ca” —cha tojánayana.

12 Jesucristbeyeca catşátanga, yejuana şmochtsantjeşna ndocná tşëngaftanguentsá chaondëtsebonna canÿe ainana bëtscă bacna juabnëngaca, y chë causa chaotsemna Bëngbe Bëtsábeñe ndoşbuachiyá, y Bëngbe Bëtsábentşana, chë sempre iuetsemnábentşana chaotsojuánañe.

13 Chamna, nÿetscanga añemo şmochtsatenatsetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrënguiñe “mënté ca” uabaina tempo. Chca cmontsamna, ndocná tşëngaftanguentsá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená.

14 Er, ndayá Jesús chabe amëndayoca yobomentşana bënga chamóyëngacñamna, bënga şontsamna sempre ainaniñe corente jtsetatşëmbuana Jesusbe soyënga ndegombre soyënga bëtsemnama, ntşamo bënga chábeñe jtsoşbuáchiyama tmonjanontsé ora monjanamcă.

15 Ntşamo Bëngbe Bëtsabe uabemana palabrënguiñe endayancá:

Mënté tşëngaftanga ntşamo Bëngbe Bëtsá tojtsichamcă şmojouenëse,

ndoñe şmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entşanga ndoyena luaroca Moisésoftaca imojëftsemnëngcă, Bëngbe Bëtsabe contra nÿetsca soyënguiñe imojtsemna ca.

16 ¿Y ndëmuanÿenga imojamna, chë Bëngbe Bëtsá tojanëyancá tmojanu-enentşana, nÿetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga.

17 ¿Y ndëmuanÿëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanÿenga entşanga ndoyena luaroca tmojanóbana y chëngbe cuerpo chentşe tojanoquedá.

18 ¿Y ndëmuanÿenga tojanëyana, mo nda cuafjajuracá, chënga ndocna te mochjëftsanashjache chë cháftaca jóchnama uámana luaroye jashjanguama ca? Co chë ndëmuanÿenga ntşamo cha tojanmandacá ndoñe tmonjanmënga.

19 Y ndegombre, bënga montsobena jinÿama chënga ndoñe tmonjëftsanashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsoşbuaché causa.

4

¹ Chíyeca, bēnga chē Bēngbe Bētsáftaca jóchnama uámana luare jashjáchama cabá imobenětscuana, ntšamo cha sojanašebuachenacá cachcá mēntscoñama iuētsemna, puerte cuedado mochtsebomna, nderado ndánaca tšēngaftanguentšá ndoñe nanjobenaye chca jashjáchama.

² Er bēngnaca chē tšabe noticiēnga tmonjouena, cachcá chē Bēngbe Bētsabe buayenana soyēnga chēngbe ainaniñe ndoñe chaondómashēnguama tmojanmēngcá; pero chēnga chē buayenana soyēnga tmojanuena ora, ndocna tšabe soye chēngbeñe tonjanopasá, er chca tmojanuena ora, chē palabrēnguiñe ndoñe montsanošbuaché.

³ Pero bēnga, chē Jesucrístbeñe tmojošbuachengna, mochanjobenaye chē jóchnama uámana luaroye jashjanguama, chē ndayama Bēngbe Bētsá tojánayana, chē tempo chábioye chca tmojtsanábotengbiana cha mēntšá tojánayana ora:

Chíyeca, atše chēngaftaca etonaná, sēnjánayana mo nda cuafjajuracá, ndegombre chēnga ndoñe mochjēftsashjache chē jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora;

⁴ er Bēngbe Bētsabe uabemana palabrēnguiñe cánŷentše mēntšá endayana, chē canŷsēfta tianoye ndayá cha tojanmama:

Bēngbe Bētsá nŷetsca trabajēngama tonjanochná chē canŷsēfta tianoye ca.

⁵ Y cachentše Bēngbe Bētsabe uabemana palabrēnguiñe endayana, chē tempo chábioye chca tmojtsanábotengbiana:

Chēnga ndocna te quemocháisashjache chē átšeftaca jóchnama uámana luaroye jashjanguama ca.

⁶ Chē entšanga monjamna chē natsanēnga chē tšabe noticiēnga jouenama, pero chē Bēngbe Bētsáftaca jóchnama uámana luare ndoñe tmonjēftsashjache, ntšamo cha inabošcá chēnga ndoñe tmonjanma causa. Chcasna, cabá ndegombre endětsomñe báseftanga, chē Bēngbe Bētsá tojánayana soyēnguiñe tmojtsosbuáchenga, mochjēftsashjache chē Bēngbe Bētsáftaca jóchnama uámana luaroye jashjanguama.

⁷ Chē entšanga ndoyena luaroca, Bēngbe Bētsá entšanga tojánachembo chē cháftaca jóchnama uámana luaroye chámuamashjnama, y chentšana ba uatēse cha cachiñe canŷe tempo tojuinŷnaná, chora entšanga chamobenama chē cháftaca jóchnama uámana luaroye jashjajnama, chē cha “mēnté ca” tojanabaye tempo. Cha chca tojanma Davidbiajana jóyebuambayēse, David Bēngbe Bētsabe uabemana palabrēnguiñe mēntšá tojánayana ora:

Mēnté tšēngaftanga, ndayá Bēngbe Bētsá tojtsichamcá šmojouenēse, ndoñe šmattsama, Bēngbe Bētsabe buayenana soyēnga ainaniñe ndoñe chaondómashēnguama ca.

⁸ Josué, Israeloca entšanga Canaán fshantsēngoye yojtsēnachaye ora, chē Bēngbe Bētsáftaca jóchnama uámana luare jtsebomnama cha choca matēnjammēse, Bēngbe Bētsá bayté chentšana, David yojēftsiyena ora, inŷe tempuama ndoñe matēnjanoyebuambá, chē ndaye ora entšanga muanjobenaye chē cháftaca jóchnama uámana luare jashjáchama.

⁹ Y chca, cabá endmēna canŷe uámana luare ndayentše Bēngbe Bētsabe entšanga mochjobenaye cháftaca jóchnama, ntšamo Bēngbe Bētsá tojanochnacá, chē quem luare jamama nŷetsca trabajēnga tojanpochocá ora;

¹⁰ er nda tojashjache chë Bëngbe Bëtsáftaca jóchnama uámana luaroye jashjan-guama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora.

¹¹ Chiyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmon-janoyeunangcá ndocná chaondëtsamama, y chë causa chënga chë soye ndoñe tmonjëftsashjache.

¹² Er Bëngbe Bëtsabe palabra endmëna mo canye aina soycá, nyets tempo entšángbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efšana espadëjaquécá, jobenayana puerta jashenoye jatëšana canye cuerpo tojatëtše ora, cachcá y cabá puerta más Bëngbe Bëtsabe palábraca, cha bënga jinýanýiyana ntšamo bënga nye bëngbe ainaniñe tmojtsejuabná y tmojtseboščá, y chë ndocnábioye tmonjinýinýe sóynaca; y chë palábraca cha endobena jáuyanana ntšamo bënga tmojajuabó y tmojabošencá aña o ndoñe tšabá bëtsemnana.

¹³ Ntšamo Bëngbe Bëtsá tojamentšana tondaye quenátopodena chabiama iytëmenana jtsemnana. Bëngbe Bëtsá lempe bominye iuetsequëcná, y nyetsca soyëngama y nyetscangbiama lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

Jesús endmëna chë más uámana bachnangbe bëts amëndayá

¹⁴ Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante siempre bëngbiama ibuëtseimpadana, mo chë bachnangbe canye más uámana amëndayacá. Chiyeca, bënga šontsamna siempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entšángbeñe tmojayana.

¹⁵ Er chë bëngbiama impadaná, mo bachnangbe canye más uámana bëngbe amëndayacá, Jesús, yobena bëngbiama jóngmiana, bënga inye ora ndoñe yapa obenana tmontsebojna ora, tšabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabot-sontšáshjajuanama, jayëñjanama bacna soye chaomama, nyetsca juabnënga ntšamo bëngnaca mondbetsebojncá, pero Jesús ndocna te ndocna bacna soye tonjëftsema.

¹⁶ As, ndauatjácá Bëngbe Bëtsá mochjótšëmbona, mo chábioye cuaftsobec-nangcá; cha canye uámana tbemaniñe yojtsetbemana canye bëtš reyca; chca mochjama, bënga chášualastemama, y bëngbiama tšabe juabna jtsebojnëse, chašujabuachama bënga chca chašojtsëjaboto ora.

5

¹ Ndëmuanýe bachnangbe más uámana amëndayánaca jtsemnana entšanguentšana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuperdonama.

² Chë bachna jtsoobenana jóngmiana, chë bacna soyënga amëngbiama chama ntsetatšëmbcá, y chë bacna soyënga jamama ingñëñënga imomnënga, mo otšenëngcá imomnëngbiama, er cachánaca inye ora ndoñe yapa obenana ntsebojnana, chë bacna soyënga jamama juabnëngama jtocochbuáchama.

³ Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nÿe entšangbiyoe bacna soyëngama cháuaperdonama, ndayá chábiyoe chaboperdonámnaca.

⁴ Ndocná quenátobena cachá quem uámana trabajo jentšetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmá.

⁵ Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiama impadaná, mo bachnangbe canÿe más uámana amëndayacá, ndayá Bëngbe Bëtsá tbojanábuayana chë uámana trabajo jtsebomnana. Cha endmëna nda Jesúsbiyoe mëntšá tbojanianyana:

Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá comnana ca.

⁶ Y ínÿocnaca, Bëngbe Bëtsabe uabemana palabrenguiñe mëntšá tbojanianyana:

Aca nÿetsca tescama canÿe bachna condmëna,

canÿe bëts bachna ntšamo Melquisedec yojamncá ca.

⁷ Jesús quem luarentše yojëftsiyenëntscuana, cha juayebuáchëse y shëchbuíyeca Bëngbe Bëtsáftaca ibnëncuentaye y ibnaimpadana, cha chë jobanámentšana jatsbocama yojanobená; y Jesús ntšamo Bëngbe Bëtsá yojanbošcá tojánmayeca y tša respeto chabiyama bómnayeca, chábiyoe tbojanoyeuná.

⁸ Chca, Cristo masque Bëngbe Bëtsabe Uaquiñá inamna, jasúfriase tojanábouinÿe ntšamo jamana ndayá Bëngbe Bëtsá tojtsebošcá.

⁹ Chca, Bëngbe Bëtsá chábiyoe tbojánbema lempe ntšamo entšanga tmojtsajabotcá, nda chëngbe bacna soyëngama cháuatsebacama; chentšana cha, Cristo, tojanma lempe ntšamo yojaniytcá, nÿetscanga chë entšanga chábiyoe imojánëyeunanënga chamotsobenama nÿetsca tescama atsebácanënga jtsemnana;

¹⁰ y Bëngbe Bëtsá tbojanábuayana, chë chabe delante sempre bëngbiama impadaná, mo bachnangbe canÿe más uámana amëndayacá chaotsemnana, canÿe bëts bachna ntšamo Melquisedec yojamncá.

Resjo endmëna, ošbuáchiyana jtsajbanana

¹¹ Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana.

¹² Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana ínÿengbiyoe chë soyënga jtsabuátambayana; pero tšëngaftanga cmontšëjaboto ndánaca Bëngbe Bëtsabe soyëngama cachiñe chacmëtëtabuayená, chë jtšošbuáchiyama šmojontsé ora natsana jshauatsjínÿana soyëngama. Y chca, tšëngaftanga šmojobiyama mo šësonatemëngcá, jtsëjabótana létsiye jofšiyana y ndoñe jobenayana jasana chë jabmuánama ndoñe paselo tontsemna soyënga.

¹³ Chë nÿetsca soyënguiñe ntšamo tšabá yomncá jtsamama buatëmbana soyënga ndoñe tontsabuatomá cha, jtsemnana mo canÿe šësonatemcá, nda vida jtsebomnana nÿe létsiye jtseftmanëse.

¹⁴ Pero chë tmojtsoyobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

6

¹ Chcasna, bënga šontsamna jtsajbanana nÿe jésebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontšé ora tmojanatsjinÿe soyënga, y šontsamna jtsatsjëndayana chabiamana nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattatsjëndaye, mo chë ndayá yomna bacna soyënga jtsamana y chë bënga ndoñe vida ntsebonnama junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana;

² chë juabáyana ndayá yomna; chë ínÿabe bestšasiñe cucuatšënga jacjayana Bëngbe Bëtsábioye chabiamana jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tojamama Bëngbe Bëtsá yochjayana, chënga chë nÿetsca tescama yomna tšabe vida chamotsebonnama o nÿetsca tescama castigánënga chamotsemnana.

³ Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábenga bëtsemnana, y chë Uámana Espiritu chëngbe ainaniñe chaotsemándama imobomna,

⁵ y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora,

⁶ chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtsoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá.

⁷ Smochjinÿe: fshantse jamana chë ba uafténënga chiñe chaómashënguama, y chë chiñe trabájayëngbiama bëtscá jaja sananga tojóboçnëse, Bëngbe Bëtsá jamana, chë fshantsentsana bëtscá tšabe soyënga entšangbiama chaotsebínÿnama.

⁸ Pero nÿe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnana, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

Bëngbe Bëtsábeñe sempre chamotsobátmanama y ainaniñe bëtscá añemo chamotsebonnama

⁹ Pero masque chca montsoyebuambná, atšbe bonshánënga, bënga tšabá fsëndëtatšëmbo tšëngaftangbeñe chë más tšabe soyënga echántsemna, chë atsbocaná jtsemnana tojtsá cha yobomna soyënga.

¹⁰ Er Bèngbe Bètsá sempre ntšamo tšabá yomncá nyetsca soyènguiñe jt-samana, cha ndegombre echántsejuabnaye ndayá tšèngaftanga šmojamama, y chè chabiamama šmojinjinyé bonshánama, chabe entšàngbioye jtsèjabuáchanése, ntšamo mórnaca šmojtsama.

¹¹ Pero bènga fsèntseboše, cada ona tšèngaftanguentšá, nyets tempo y Jesús chaoyésabèntscuana chaotsinjanyná corente yoboše chca jtsamama, Bèngbe Bètsábeñe chca jtsošbuáchiyése, chábeñe siempre chašmotsobátmanama, tšèngaftangbe tšabiamama cha chaomama.

¹² Ndoñe queftsátsboše tšèngaftanga oyènjayènga chašmotsobiamama chè Bèngbe Bètsá tcmojabanýe trabajo jtsamama, ndayá Jesucristbeñe ošbuáchiyana bomnèngcá y padecena soyènguiñe uantado mènèngcá šmochtsama. Chca, chènga mochanjójyèngacñe ndayá Bèngbe Bètsá jtašatayama tojašebuachenacá, chabe entšanga bètsemnama.

¹³ Bèngbe Bètsá Abrahámbyoye tbojanšbuachená ora, chca tbojanianyana cachabe uabaina jayanése, er inya chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnama;

¹⁴ cha mènšá tbojanšbuachená: “Aíñe, atse chanjama aca bètscá tšabe benediciónènga chacotsebomnama, y chanjama acbentša pamillentšana mallajta entšanga chamotsemnama ca.”

¹⁵ Y chca, Abraham Bèngbe Bètsábeñe jtsošbuáchiyése, puerte uantadiñe yojanobátmana ntšamo tbojanšbuachenacá Bèngbe Bètsá yochjanmama, y pronto chca tojanójyèngacñe.

¹⁶ Entšanga tmojajurá ora, chca jamana chèngbiamama canye puerte más uámanabe uabaina jayanése, y chca chèngbiamama más uamanabiamama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsètsnayana.

¹⁷ Y chca, Bèngbe Bètsá tojánbošena botamana jinjanjyiyana, ntšamo cha tojanašebuachenacá mochjanoyèngacñèngbiyoye, ntšamo tojanašebuachenacá cha ndegombre yochjanmama, y ndocna te chè ntšamo jamama yojanjuabnacá yochjantrócama. Chíyeca, botamana tojaninjanyé cha chca yochjanmana, cachabiamama jajúrase, chè ntšamo tojanašebuachenacá yochjanmama ndegombre bètsemnama.

¹⁸ Bèngbe Bètsabe šbuachenana soye y chama jinjanjyiyama ntšamo tojanayancá, ntšamo tojanašebuachenacá ndegombre yochjamnana, chè uta soye ndocná ntsoebenana jatrócama; y chca tojayana ora, ndoñe ntsopodénana Bèngbe Bètsá chaobená jobostérama. Y chca, chè uta soyama, bènga bètscá añemo ainaniñe jójyèngacñana, bènga chè Bèngbe Bètsábiyoye tmojobéconanga, cha chásuatsebacama y chašotsanjenama, mo canye bètš resjuentšana tmojtschetèngcá, ntšamo chentšana atsebácanènga jtsemnana cuafstengucá. Bèngbe Bètsá šojáuyana bènga imojtsobena chábeñe jtsobátmanama ca, y bètš añémoca chábeñe jtsošbuáchiyése, cha yejuana šochtsanjenama mondobátmana.

¹⁹ Mo ntšamo chè béjaye asentoca cuedádoca tcojajajo anlama, chè barcuíñe enjaquenènga tšabá jtsetatšèmbuana chè barco ndoñe yochántshatijyiyana, cachá bèngnaca, Bèngbe Bètsábeñe imobátmanama, montsobena ainanoca jtsetatšèmbuana lempe tšabá yotsomñama. Bènga Jesucristbeñe mondobátmana, y Bèngbe Bètsá yojtsemnoye celoca cha tojamashèngo y chabe delante entsemna mo chè bachnangbe más uámana

amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entsëjua ujonýana stëtsoica, Bëngbe Bëtsabe delante jtsemnama,

²⁰ ndayentše Jesús celoca, Bëngbe Bëtsabe delante tojámashëngo bëngbe tšabiama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nýetsca tescama, canýe bëts bachna ntšamo Melquisedec yojamncá.

7

Jesús, canýe bëts bachna ntšamo Melquisedec yojamncá

¹ Quem Melquisedec yojamna Salem puebloca rey y bachna chë celoca Bëngbe Bëtsabiama; Bëngbe Bëtsá, chë nýetscangbiana más uamaná. Abraham chë reyënga y chëngbe soldadëngaftaca imojentsjaná y tojanayënjaná chentsana yojsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama.

² Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnëtsanentšana canýe soye. Chë palabra Melquisedec endayana “nýetsca soyënguiñe tšabá ama rey ca”; y chánaca yojamna Salem puebloca rey, y chca endayana “nýetscanga natjëmbana chamotsiyenama ama rey ca”.

³ Chabe pamillangbiana tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo ntseco tojanonýnama, ni ntseco tojanóbanama; chca, inýe soyënguiñe cha yojamna mo Bëngbe Bëtsabe Uaquiñacá, y endmëna mo nýetsca tescama bachna cuaftsemncá.

⁴ Y mora, šmochjájuaboje tša uamaná Melquisedec inamnana, er bëngbe tempsca uámana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnëtsanentšana canýe soye.

⁵ Ntšamo Moisesbe leyíñe endëmandacá, chë bachnangbe más uámana amëndayá Leví, Aarónëna ca uabainabe pamillentšana tmomna bachnanga, jtsamnana chë Israeloca entsángbioye nýetsca chë tmobomna soyënguentšana bnëtsanentšana canýe soye jtsayëngacayana; y chca jtsamnana masque chë entsanga cachëngbe pamillentšënga tmomna y Abrahábentšana pamillentšëngnaca.

⁶ Pero Melquisedec, masque Aaronbe pamillentšá ndoñe yonjamna, Abraham, chë ntšamo Bëngbe Bëtsá tbojanšbuachenacá tojanóyëngacñabentšana, cha tojanóyëngacñe nýetsca soyënguentšana bnëtsanentšana canýe soye, y Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama.

⁷ Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná inýabiama tšabe soyënga chaomama, más uamaná inëtsemna chë chca tojóyëngacñabiama, inýa chabiama Bëngbe Bëtsábioye tbojaimpadá ora.

⁸ Quem tempo, bachnanga mochjóbanënga, entsángbioye jtsayëngacayana nýetsca chë tmobomna soyënguentšana bnëtsanentšana canýe soye, pero chë Bëngbe Bëtsabe uabemana palabra, Melquisedecbiama endoyebuambná cha mo canýa cabá ainá totsomñcá.

9 Y bēnga montsobena jayanama, Abraham Melquisedécbioye chē n̄yetsca soyēnguentšana bn̄etsanentšana can̄ye soye tbojanoyé ora, yojamna mo Leví, chē n̄yetscángbioye n̄yetsca soyēnguentšana bn̄etsanentšana can̄ye soye ayēngacayá, Melquisedécbioye chca cuaftopagacá;

10 er cha Abrahambe pamillentśá inamna. Melquisedec yojtśabó ora y chábioye chē lempe tojanosháchiñentšana bn̄etsanentšana can̄ye soye Abraham tbojanatśetá ora, yojamna mo n̄yetscanga, chē Abrahámbentšana entśanga más chcoye mochtsaniyenēnga, chēngnaca chē bn̄etsanentšana can̄ye soye cuaftajajocá, masque Abraham chca tojanma ora, Leví y chē Abrahámbentšana in̄ye entśanga cabá ndoñe tmonjanon̄yá.

11 Israeloca entśanga Moisesbe ley tmojanáyēngaca, chē bēts taitá Levibe pamillentśēnga bachnanga imojamnēnga Bēngbe Bētsá imojtśeserverna ora, y chēnga monjamna Aaronbentšana entśanga. Ntśamo chē leyíñe yomandancá imojánamēnga perdonánēnga jtsemnama y Bēngbe Bētsabe bominiñiñe tśábēnga jtsemnama quem bachnanga jamama matmēñjanobenase, ndoñe manjanēyta Bēngbe Bētsá in̄ye bachna chabuatschembuama, nda ndoñe yonjamna mo chē bēts bachna Aaroncá, ndayá ntśamo chē bēts bachna Melquisedec yojamncá.

12 Er, can̄ye bachnanga Bēngbe Bētsábioye jtśeservénama tmojajbaná y in̄ye bachnanga chábioye jaserviama tmojatontśé ora, jtseytana chē natsana bachnanga imojanoserverna ora mándaye leyēngnaca jtsetrócama.

13 Bēngbe Utabná, ndabiama quem soyēnga jtsoyebuambnayana, ndoñe Aaronbe pamillentśá quenjatśmēna, ndayá in̄ye pamillentśá, y quem pamillentśa entśanga ndocna te bachnangcá Bēngbe Bētsá tmonjanservé, chē altar ndirichiñe Bēngbe Bētsabe bēts yebnoca.

14 Er n̄yetscanga mondētatsēmo Bēngbe Utabná Judabe pamillentšana bētsemnama, y chē pamíllama Moisés ndocá tonjánayana, Bēngbe Bētsá mo bachnangcá chēnga jtśeservénama.

15 Y ntśamo tmojayancá montsobena más tśabá josértana, er chē tsēm bachna Cristo yojamna can̄ya mo Melquisedec yojamncá.

16 Cha bachna yojamna, ndoñe chē bachnanga chabe pamillentšana jabocanama yojánamnama can̄ye ley tojánayanayeca, ndayá n̄yetsca tescama jéftsiyenama cha inobénayeca.

17 Er mēntśá endmēna, ndayá Bēngbe Bētsá chabiama tojánayana: Aca bachna n̄yetsca tescama condmēna, can̄ye bēts bachna ntśamo Melquisedec yojamncá ca.

18 Cha tojánabo ora, Bēngbe Bētsá tojanma chē nda bachna jtsemnama y ntśamo joserviama mandēnga chaotsopochocama, er chē mandēnga ndoñe ntjobenayana entśanga jujabuáchama atebacánēnga jtsemnama, y chca, chēngbiamá ndoñe bētscá yonjanoserverna.

19 Er Moisesbe léyeca, entśanga ndoñe tmonjanobená Bēngbe Bētsabe bominiñiñe tśábēnga jtsemnama, pero mora chama can̄ye corente más uámana soye montsebmna: Jesucristbeñe jtsošbuáchiyēse, chábeñe montsobátmana Bēngbe Bētsáftaca tśábēnga chásuabiamama, y chca, Bēngbe Bētsábioye bēnga jtobéconama.

20 Y Bēngbe Bētsá lempe chca tojanma, cachabiama jajúrase, lempe ntśamo cha tojanayancá ndegombre chaotsemnama. Chē in̄ye bachnanga, chē Aaronbe pamillentśēngbioye tmojanēbuáyana ora, Bēngbe Bētsá ndoñe chca tonjánayana,

²¹ pero mo bachnëcá chaoservema Bëngbe Utabnábioye tbojanábuayana ora aife; cach Bëngbe Bëtsabiama jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrenguife endayancá:

Bëngbe Utabná Bëngbe Bëtsá, Jesucristbioye tbojanianya, cachabiama jajúrase, ntšamo tojanayancá ndegombre chaotsemnama, y juabna ndoñe ntjatrócama:

“Aca bachna nyetsca tescama condmëna ca.”

²² Bëngbe Bëtsá chca tojánayanama, Jesúsbeyeca bënga corente mondétatšëmbo, ndayá Bëngbe Bëtsá bëngbiama jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entšangbiama tojanašebuachená soyama.

²³ Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jtseservénana; cada ona básefta uatëngama tojëftsanoservé, tojanóbana y inyábioye chë trabajo jatontšabuáchana.

²⁴ Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjëftseservena, y ndocna te chabe trabajo inyábioye bochanjëftsinýiye, chë inya cachcá jtsamama chauatontsema.

²⁵ Chiyeca, cha yobena nyetsca tescama játsebacana ndëmuanýenga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiama jtseimpadánama.

²⁶ Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiama chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canye juabna inyabe contra yonjábomna, ainaniñe ndocna bacna juabna yonjábomna, chë bacna soyënga amënguentšana luaroca mëná, y Bëngbe Bëtsá tojanma celoca más bëtsá y obená nyetscangbiama cha chaotsemnama.

²⁷ Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámna, mo chë inye bachnangbe más uámana amëndayënga mondbetsamcá, cachëngbiama y chë judiëngbiámna. Cha tojanma lempe ntšamo yojaniytcá canye soye y nyetsca tescama, entšanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsohomñama cachcá tojanonýná ora; y tojanóbana entšanga chamotsobenama perdonánënga jtsemnama.

²⁸ Ntšamo Moisesbe leyife yojanmandacá, chëngbiama mo chë bachnangbe más uámana amëndayëngcá tmojanëbuáyana entšanga inye ora bacna soye amënga; pero Bëngbe Bëtsá cabá chë ley entšangbe cucuatšife tojanáboshjontšana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiama jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

8

Cristo, nda jóbänëse tojanma entšanga Bëngbe Bëtsáftaca mo canýacá chamotsemnama

¹ Chë más uámana soye ndayama bēnga montsichamo, chë Cristo mo bachnécá yomnama montsoyebuambná ora, entsemna: Bēnga chábeñe imojtsebomna canya nyetsca tescama Bēngbe Bētsabe delante bēngbiana impadaná, mo chë bēngbe bachnangbe más uámana amēndayacá, Bēngbe Bētsabe catšbioica yojtsetbemana jtsemādayama, y Bēngbe Bētsá chë más uámana tbermanentše.

² Chë inye bachnanga Bēngbe Bētsabe bēts yebnentše tmojánamashjna chë “más uámana ca” uabaina luaroye, Bēngbe Bētsabe delante jtsemnama; pero chë luare celoca ndayentše nyets tempo Cristo mo chë bachnangbe más uámana amēndayacá yoserverna, entšanga ndoñe chca tmonjanpormá, ndayá Bēngbe Bētsá.

³ Nyetscanga chë bachnangbe más uámana amēndayēnga tmojanēbuáyana, entšangbiana soyēnga y tmojóba bayēnga Bēngbe Bētsábioye juatšēmbonama, chēngbe bacna soyēngama perdonánēnga chamotsemnama; chíyeca, jtseytana Jesucristo ndayánaca chaotsebomnama, Bēngbe Bētsábioye juatšēmbonama.

⁴ Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmēna, y chēnga ba soyēnga jamana Bēngbe Bētsábioye jētschuayama, ntšamo jamama Moisesbe leyíñe yomandancá. Y chca, ndoñe nantseyta cha chca chauatoservēnama.

⁵ Chë inye bachnanga imobomna luarēnga Bēngbe Bētsá jadórama, y ndaye soyēngaca chēnga Bēngbe Bētsá imoserverna, ndoñe cachcá yontsemna chë ndayentše Jesucristo celoca yoserverna luarcá, ni ntšamo cha yoservencá; nye batšatema bēngbioye šuinjanýná ntšamo chë celoca luare yomnama, ndayentše Cristo mo bachnécá yoserverna. Y bēnga mondetatšēmo quem luarentše chë soyēnga chca yomnama, er chë Bēngbe Bētsábioye jadórama yebna, chë jatsjacama opodena yebna Moisés japórmama ora, Bēngbe Bētsá mēntšá tbojaniana: “Cuedado cochtsebomna chë atšbiana yebniñe nyetsca soyēnga jamama, ntšamo tbonjaninýinýecá chacomama, chë tjoca bonjamna ora ca.”

⁶ Pero bēngbe bachnangbe más uámana amēndayá Cristo, tojashjache canye más bēts trabajo jtsebomnama, ntšamo chë inye bachnanga imobomna trabajuama; cachcá, ndayá Bēngbe Bētsá tojayancá Crístoftaca bēngbiana jamama, bēnga tempcá tšabá Bēngbe Bētsáftaca jtsemnama jtsamēse, puerte más tšabá endmēna, chë ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyēnga bēngbiana jamama.

⁷ Chë Bēngbe Bētsá natsana tojanašebuachená soyēngaca matējanapodé entšanga chamotsamama ntšamo yojanamncá, ntšamo tojanašebuachenacá jýēngacñama, as ndoñe manjanēyta Bēngbe Bētsá cachiñe canye trato chauátšbemama entšangbiana.

⁸ Pero Bēngbe Bētsá tojáninýe ntšamo yojanamncá entšanga ndoñe tmonjanmama, ntšamo cha tojanašebuachenacá jýēngacñama, y Bēngbe Utabná Bēngbe Bētsá chēngbiana mēntšá tojánayana:

Canye tempo echanjóshjango, y chora Israel y Judabe pamillentsa entšangbiana básefta soyēnga jamama chanjašebuachená, chēnga átseftaca tempcá tšabá jtsemnama chamotsobenama.

⁹ Chë chanjašebuachená soye ndoñe queochátsmēna cachcá ntšamo chë chēngbe bēts taitanga sēnjanašebuachená soye enjamncá, atše chēnga sēnjanēnatse ora, Egíptó luarocana sēnjésanēbuacna ora;

pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa, atše cachcá chënga sënjesanénÿaye ca, Bëngbe Utabná tojánayana.

¹⁰ Chë Israeloca entsangbiamana ndayá jamama canÿe tempo chentsana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entsanga.

¹¹ Chë tempo ndoñe queochátsiyta cánÿenga ínÿenga chamotsabuátambama, cachabe luariñe oyenábioye o cachabe pamillentsa entsábioye, atše chë chëngbe Utabná chašmotsábuatmama.

Ndoñe queochátsÿyta, er nÿetscanga uámanënga y nduámanënga, corente tšabá atšbe šmochantsábuatma.

¹² Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca –cha tojánayana.

¹³ Bëngbe Bëtsá, chë entsangbiamana mora jamama tojášebuachenama tojt-sichamo ora, chca jtsemnana, er cha tojama chë tempo entsangbiamana jamama tojanašebuachená soye, mora ya ndoñe chaondëtososervënama; ndayá mo tanguá soycá tojtsemna y ya ndoñe tontsoservena, chë soyna nÿe batšatema más y ja jtsopchócana.

9

Bëngbe Bëtsá jadórana muentša luare y chë celoca luare

¹ Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiamana pormana yebnentše quem luarentše.

² Chíyeca, Bëngbe Bëtsá tojanmandá chaotsemna canÿe jatsjacama opodena yebna chábioye jadórana, mëntšá: Chë natsana tsañe quem Bëngbe Bëtsabiamana yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelerëšniñe, y canÿe mesësha ndayiñe yojacjana chë luarentše Bëngbe Bëtsá bëtsemnana inÿinÿnaye tandëšënga.

³ Inÿe ujonÿana entsëjua chentsana, inÿe luare inamna; inauabaina “chë más uámana luare ca”.

⁴ Chentše inamna chë castellano altar, incienso jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye quem soyënga inabomna: canÿe castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entsangbiamana chaótsatšama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga.

⁵ Chë cajontema juatsboca imnamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chéntšnaca bëtsemnana. Chënga, chë juatëngmiášangaca chë cajontémentša nÿets ústonëtema imojanëtsbotsana;

chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuéscjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

⁶ Lempe chca tmojanprontantsana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama.

⁷ Pero nýe chë bachnangbe más uámana amëndayá yojobena chë inýe luaroye jamashënguana, y nýe canýe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca.

⁸ Chca, chë Uámana Espiritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nýetscanga cabá ndoñe tmonjanobená chë inýe luaroye jamashjnama, chë “más uámana luaroye”.

⁹ Chë soyëngaca jtsopodénana bëngbioye jinýanýiyana, chë tempo, chë Bëngbe Bëtsábioye jadórama yebnentše entsanga uta luare imojábomna ora, ndoñe yonjopodena Bëngbe Bëtsabe delante nýetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiana uatšëmbona soyëngaca y bachnanga tmojanóba bayëngaca, ndoñe tonjanopodé jamana canýa Bëngbe Bëtsábioye adorayá, Bëngbe Bëtsáftaca tempcá tšabá chaotsatmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama.

¹⁰ Chënga, chë uatšëmbona soyëngaca y tmojanóba bayëngaca tmojanma nýe ntšamo Moisesbe leyíñe yojanayancá, ndayá chiñe yojanlesenciencá, ndayá jasama o jofšiyama, y chë cuerpo jabejana mo tšabe entsangcá Bëngbe Bëtsabe delante jtsatmënana; nýetsca mandënga nýe cuerpama, pero ainanama tondaye ntjamana. Pero chë entsanga chca yojánamna jtsamana, nýe Bëngbe Bëtsá inýe soyënga, más tšabe soyënga jamama tojamandantscuana, chë tsëm trato tojábema ora.

¹¹ Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnana chë tšabe soyënga ntšamo mochjoyëngacñécá. Chë luare celoca ndayentše cha Bëngbe Bëtsabe delante mo bachnécá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entsangbiana jamama inajuabnycá. Chë luare ndoñe entsangbe cucuatšëca yondëpormana, y chca jtsayanana, quem luarentša soye ndoñe yondmëna ca.

¹² Cha, canýe y nýetsca tescama chë luaroye Bëngbe Bëtsabe delante tojanamashëngo ora, cha ndoñe chivo o ternerbe buiñe tonjanabuyamba, ntšamo chë inýe bachnanga imojuamancá; ndayá jóbánëse, chabe buiñe juabuáshanëse, cha tojanma entsanga atsebácanënga jtsemnana chamot-sobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma

bënga chë nyetsca tescama yomna tšabe vida jtsebomnama chamotsobena.

13 Ndëmuanyënga ndayámna chë leyama tmojanocuéda mo chë Bëngbe Bëtsabe delante ndoñe tšabengcá, chë bachnanga imojuamana chëngbiyoe toronga y chivëngbe buiñe jabuéscacjana, y chë altaroca tcojajuinyé ternera-be jatinýa chëngbiyoe jatbótótana, chca, chënga jábiamama Bëngbe Bëtsabe delante mo tšabengcá. Chca tmojamantšana, chë bachnanga tmojánayana chënga imojtsobena chë ínýengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca.

14 Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínýengaftaca Bëngbe Bëtsábioye jadórama tmojanobenase, jtsachetšá más yojsámana Cristbe buiñe, ndëmuanyëye tojanábuashana Bëngbiana cha tojanóbana ora! Chë nyets tempo vida bomná Espiritbe obenánaca, Cristo, chabe derecho vida jtsobomñama cachcá tojanonýa y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canýe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservénëse.

15 Chýyeca, Cristo jóbanëse tojama entšanga Bëngbe Bëtsáftaca cánýiñe mo canýacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojamama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

16 Ntšamo canýe testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama.

17 Canýe testamento tondaye ntšamanana, chë chca jamama tojašbuachená cha cabá ainá totsomñëntscuana; nýa cha tojóbana orna aiñe.

18 Chýyeca chë Bëngbe Bëtsabe natsana trato, entšangbeñe tojanobojatšé, chora tmojanóba bayëngbe buiñe jabuéscjese.

19 Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternereña y chivëngbe buiñe býyesheca enajuabnëyiñe tojanfchecuacuá, y chora chë leyënga librëšañe tojanbuéscacja, y nyetsca entšangbeñnaca.

20 Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnama, y tšëngaftangbiana puerte yochtsámanama ca.”

21 Moisésnaca buiñe tojanbuéscacja chë jatsjacama opodena yebniñe, y lempe chentša soyënguñe, chë ndaye soyënga Bëngbe Bëtsábioye jadórama yojanoservena.

²² Er ntšamo leyiñe iuayancá, yojtsemna n̄ya mo n̄yetsca soyënguñe buiñe jabuëscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanëсна, ndoñe ntsopodénana entšanga bacna soyëngama perdonánënga chamotsemnana.

Cristo jasúfriase y jóbanëse, tojanma entšanga bacna soyëngama perdonánënga chamotsemnana

²³ Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batšatema jtsin̄yan̄nayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše innëtsama soyëngama.

²⁴ Er Cristo ndoñe tojánamashëngo can̄ye luarentše Bëngbe Bëtsá jadórama n̄ye entšangbe pormánentše, ndaye luare n̄ye batšatema jtsin̄yan̄nayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseïmpadánama.

²⁵ Chë bachnangbe más uámana amëndayana chë “más uámana luaroye” jamashënguana can̄ye cada uata, bayëngbe buiñeca, ndoñe cachabe buiñeca, chca, ndayánaca jamama entšanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentšana jtésebcnana, y chabe buiñe juabuáshanëse cachiñe jatóbanama, y ba soye cachcá chauëtsemnana.

²⁶ Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo can̄ye y n̄yetsca tescama tojenon̄ȳin̄yë quem luarentša entšanga bacna soyënga jabuajuánama, chëngbiana jóbanëse, mo entšangbe bacna soyëngama can̄ye tmojóba bayá, Bëngbe Bëtsábioye uatšëmbonacá.

²⁷ Cachcá, ntšamo n̄yetsca entšanga jtsamnana n̄ye can̄ye jóbanama, y chentšana Bëngbe Bëtsá chëngbiana jayanana chë imojëtsiyenëntscuana ntšamo tmojanmcá tšabá o ndoñe tšabá bëtsemnana, y chëngaftaca jamana ntšamo chora tojajuabocá,

²⁸ cachcá, Cristnaca, n̄ye can̄ye chabe derecho vida jtsobomñama cachcá tojanon̄yá, chabe buiñe juabuáshanëse jóbanama, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobatmanënga jabátsebacama.

10

¹ Chë Moisesbe leyentša mandënga, ntšamo chë bachnanga yojánamnana Bëngbe Bëtsá jadórama tmojóba bayëngaca y in̄ye soyëngaca, ndoñe ntsin̄yan̄nayana lempe chë Bëngbe Bëtsá chabe entšanga jatšatayana puerte tšabe soyënga, pero aíñe batšatema jtsin̄yan̄nayana ntšamo chë soyënga yochtsemnana. Chíyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë

Bëngbe Bëtsábioye jobéconama tmojtsebošënga, chca soyënga tmojtsamama cada uata nyëts tempo, chënga ainaniñe corente chamotsetatšëmbuama chëngbe bacna soyëngama nyëtsca tescama perdonánënga imojtsemnana.

² Er ndayá tcojtsamama Bëngbe Bëtsabiama uátšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnana matmëñjanobenase, chënga chë bacna soyënga tmojanmama ainaniñe ngmënaca ya ndoñe mamëñjëtsemna, y matmëñsanajbaná soyënga amana chë tmojóba bayëngaca.

³ Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma;

⁴ er chë toronga y chivënga tmojóbanëngbe buñëca ndoñe ntsopodénana entšangbioye bacna soyënga jabuajuánama.

⁵ Chíyeca, Cristo quem luaroye tojánabo ora, Bëngbe Bëtsábioye mëntšá tbojaníyana:

Ndoñe tconjábošëna entšanga chacmátšëmbona soyënga, ni tmojobaye bayënga,

pero aiñe tcojama atše canye entšacá chaitsemnana.

⁶ Ndoñe tšabá quecmátinýana chë tmojóba y tmojajuinýe bayënga, entšanga bacna soyëngama chacotsaperdonama.

⁷ As atše Bëngbe Bëtsá sënjaníyana: “Bëngbe Bëtsá, muentše séntsemna, ntšamo aca icobošcá atše chaimama, ntšamo acbe uabemana palabreñguñe atšbiama endayancá, chë ndayá atše chjanmama ca.”

⁸ Natsana, Cristo tojánayana, Bëngbe Bëtsá ndoñe tonjánbošëna, ni tšabá tbonjanínýnana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýe bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyíñe iuayancá ndayá chënga jamama yojtsamna.

⁹ Y chentšana, Cristo Bëngbe Bëtsábioye tbojátaníyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýe chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbanëse tojaninýanýe chë ntšamo Bëngbe Bëtsá yobošcá jtsamana, más iuámana chë inye soyënga játamama.

¹⁰ Bëngbe Bëtsá tojama, bënga chabe entšanga y chabe delante tšábënga chamotsemnana, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbanëse, canye y nyëtsca tescama.

¹¹ Judiëngbe nyëtsca bachnanga nyëts tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama.

¹² Pero Jesucristo entšangbe bacna soyëngama tojanóbana ora, yojamna mo canye tmojóba bayacá, Bëngbe Bëtsá entšanga bacna soyëngama cháuaperdonama; nye canye y nyëtsca tescama chca tojanma, y chentšana Bëngbe Bëtsabe catšbioica tojtánótbema, canye uámana puententše, jtsemándayama.

¹³ Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšiñe chamoquedama yochjamëntscuana.

¹⁴ Er nÿe canÿe, entsangbe bacna soyëngama cruzoca jóbanëse, Jesucristo lempe tojama, entsanga chë Bëngbe Bëtsábenga jtsemnama chëmbonënga, chabe delante nÿetsca tescama tšabengcá chamotsemnama.

¹⁵ Y Uámana Espíritnaca, Bëngbe Bëtsabe uabënana palabrenguiñe šontsinÿanÿná chca ndegombre bëtsemnama, mëntšá tojánayana ora:

¹⁶ Ndayá entsangbiana hjama, canÿe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsemama ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

¹⁷ Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

¹⁸ Chcasna, Bëngbe Bëtsá nÿetsca tescama entsanga bacna soyëngama tojaperdoná ora, ya ndoñe ntjátsiytana inÿe soyënga más játamama, mo bayënga cuařjobaycá, entsanga bacna soyëngama perdonánënga chamotsemnama.

Sontsamna Bëngbe Bëtsábioye jtobëconana

¹⁹ Y chca, Jesucristbeyeca catšátanga, Jesusbe buiñe tojanábuashanama y bëngbiana tojanóbanama, chábeñe jtsošbuáchiyëse, bënga montsobena, tondayama ntjatauatjčá Bëngbe Bëtsabe delante jamashënguama.

²⁰ Bënga montsobena jamashënguama chë tšëm benachëjana, Cristo bëngbiana tojamëjana; cha nda inétsama chë nÿetsca tescama yomna tšabe vida chamotsebomnama. Mo chë quem luarentše chë bachnangbe más uámana amëndayacá, chë ujonÿana entsëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entsacá tojanóbanayeca, bëngnaca montsobena Bëngbe Bëtsabe delante luaroye luaroye jamashënguama.

²¹ Bënga mondbomna canÿe bëtš bachnangbe más uámana amëndayá, Bëngbe Bëtsabe entsángbeñe jtsemándayama, y cha endmëna Jesús.

²² Chíyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobëconana. Ntšamo chë bachnángbioye buiñeca tmojanabuešcacjčá, Bëngbe Bëtsabe delante tšabengcá chamotsemnama cha jaserviama, cachcá, Cristbe buiñe juabuáshanëse y bëngbiana jóbanëse, bënga ainaniñe corente montsetátšëmbo Bëngbe Bëtsá nÿetsca tescama bëngbe bacna soyëngama šojtsaperdonama. Y bënga béjayeca uabainëngnaca mondmëna; chíyeca bënga jtsoobenana Bëngbe Bëtsábioye chca jobëconana.

²³ Bënga šontsamna nÿets tempo Bëngbe Bëtsábeñe puerte jtsošbuáchiyana, y ndocna te nÿe ndayámnaca játajbanana entsángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojajana.

²⁴ Bënga šontsamna janguanguana ntšamo muatjobenaye añemo jematšetayana, nÿetscanga jtšenbobonshánana, y ntšamo tšabá yomncá jtsemama;

25 pero ndoñe quešnátamna játajbanana, Bëngbe Bëtsábioye jadórama ene-fjuanana mo Crístbeñe ošbuáchiyënga quetsomñecá, ntšamo báseftanga imojtsamcá. Chamna, nyetscanga añemo mochtsenatšetnaye Cristo nyets tempo jtseservénama, y más mora, chë ndayá imojtsonyama, Bëngbe Utabná yochjésabama ya yojtsobecuama montsetátšëmbo ora.

26 Er chë ndegombre soyëngama tšabá tmojátatsëmbonentsana y chë soyënga tmojoyeuná chentšana, bacna soyënga jtsamëse tmojtšiyena, nye chca jamama tmojtseboše causa, muattsaboté ndayá Cristo bëngbiamá tojanmccá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama.

27 Y chca, ndayá bënga muattsobena jobátmana soye nántsemna nye chë Bëngbe Bëtsábiocana castigo, chë ndayama šojtsamna uatjana jtsebmomnana; y nye jobátmana chë tempo, ndaye ora Bëngbe Bëtsá puerte etonaná chabe uayayënga bëtscá iñesheca yochtsapochócaye.

28 Ndánaca chë Moisesbe leyama tojayana tondaye yondovalena ca, y úata o únganga chca tmojouena y añe cha chca tojayana ca chënga tmojayanëse, jtsemnana chë entšábioye jtsóbana, tondaye ntjalastemacá.

29 Canya, nyets ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe, chë ndëmuanyëye tojanábuashana bëngbiamá tojanóbana ora, tondaye yonduámána ca, ndayá nye ndaye entšabe buiñcá ca, chë buiñe chë ndëmuanyëye šojtsinyanýná ndayá Bëngbe Bëtsá tbojašebuachenacá bëngbiamá jamama, y ndáyeca Bëngbe Bëtsá chabe entšanga šojábiamá, cha jaserviama; chë entšá Uámána Espiritbioye tbojóyenguango, nda inétsama bënga tšabe soyënga chamotsebmomnana; y canya chca amá, çtšëngaftanga ndoñe šmontsejuabná cha ibojtsomerecena Bëngbe Bëtsábiocana canye puerte más uabouana castigo, chë Moisesbe leyama tondaye yondovalena ca tojyanabiama?

30 Bënga nyetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbiamá echanjayana ntšamo tmojëftsemcá tšabá o ndoñe tšabá bëtsemnana, y chëngaftaca echanjama ntšamo chora chaojajuabocá ca.”

31 ¡Tša uabouana, Bëngbe Bëtsá chë nyets tempo ainabe cucuatšíñe joquédana, castigáná jtsemnana!

32 Pero ntšamo tempo yojamnana šmochtsenójuabnaye, chë ndegombre soyënga Jesucristbiamá cabá chora šmonjanábuatmana ora, y chora tša jenojuzana cmonjanotocá padecena soyënguñe, y chë causa tša šmojansufrí.

33 Báseftanga tšëngaftanguentsëngbioye entšange delante tcmojanoyánguango, y ínÿenga tmojanma puerte chašmotsesufrínama; y ínÿenga tšëngaftanguentsënga chca imojansufrinëngaftaca šmojanama, chënga jujabuáchama.

34 Tšëngaftanga šmojánalastemana chë chënguentsënga cárceloje imojanëtámenënga; y oyejuayënga šmojanlesenciá ntšamo šmojanbmncá ínÿenga chacmotsabacama, er tšëngaftanga šmojátatšëmbona Bëngbe Bëtsábiocana más tšabe soyënga šmojtsebmomnana, chë nyetsca tescama šmochtssebmomna soyënga.

35 Chcasna, ndoñe šmatjajbaná ainaniñe bëtscá añemo jtsebmomnana, ni Bëngbe Bëtsábeñe sempre jtsobátmanana; er chca šmobatmánayeca,

Bëngbe Bëtsá echanjama tšëngaftanga bëtscá uacanana soyënga chábiocana chašmotsebonnama.

³⁶ Tšëngaftanga cmontsamna corente uantadënga jtsemnana, padecëniñe chašmojsachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñëna.

³⁷ Er Bëngbe Bëtsabe uabemana palabrënguñe cha mëntšá tojánayana: Betsco, ndoñe bën, y chë jabama ibomná echanjabo. Ndoñe bën quebochatóbema.

³⁸ Nye chë ndabiamama atše chajama atšbe bominyiñe tšabia chaotsemnana, átšbeñe cha betsošbuáchema, cha ndegombre chë nyetsca tescama yomna tšabe vida echántsebonna; pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyejuaye ca —cha tojánayana.

³⁹ Pero bënga ndoñe quemátmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnana imojtsajnënga; pero aiñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

11

Bëngbe Bëtsábeñe ošbuáchiyana jtsebonnama

¹ Ošbuáchiyana jtsebonnama endmëna corente jtsetatšëmbuana, ndayá tmojtsobatmancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnama.

² Bëngbe Bëtsá tojánayana bëngbe bëtš taitanga tšabá imojánama ca, chënga chábeñe imojtsošbuachéyeca.

³ Bënga, Bëngbe Bëtsábeñe mondošbuachéyeca, mondétatšëmbo cha quem luare y nyetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentšana.

⁴ Abel Bëngbe Bëtsábeñe yojanošbuachéyeca, oveshatëmënga chábioye tbojanátšëmbona, y chë soye Bëngbe Bëtsabiamama más tšabá yojtsemna, chë ndayá Caín, chabe catšata, Bëngbe Bëtsá jëtšchuayama tbojanátšëmbonama. Chíyeca, Bëngbe Bëtsá tojánayana Abel chabe bominyiñe tšabia yojtsemna ca, ndayá Abel chábioye jëtšchuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

⁵ Enoc Bëngbe Bëtsábeñe puere yojanošbuachéyeca, Bëngbe Bëtsá celoye tbojesanbëtšëñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbëtšëñe causa. Y Bëngbe Bëtsabe uabemana palabrënguñe endayana, Bëngbe Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe.

⁶ Pero Bëngbe Bëtsábeñe ntsošbuachiycá, ndoñe quenátopodena cha oyejuayá bëngaftaca jabemama, er chábioye jobëconamna, entšá jtsemnana jtsošbuáchiyana cha ndegombre bëtsemnana, y cha inétsamama chë cha jtsabu-atmama tša tmobošëngbiama bëtscá tšabe soyënga chamotsebonnama, mo chábiocana uacanana soyëngcá.

7 Běngbe Bětsá Noébioye tbojanbuayená uabouana soyěnga yochjanopásama, cachora ndopodena jinýama soyěnga, y cha Běngbe Bětsábeñe yojanošbuachéyeca, tojanma ntšamo Běngbe Bětsá tbojanmandacá y barquěsha tojanapormá chabe pamíllanga játsebacama. Cha chca tojanma ora, ošbuáchiyana bómnyayeca, cha tojaninýanýé entšanga tša bacna soyěnga tmojanmama y chě causa castigáněnga jtsemnama yojtsammama. Chabe ošbuachiyanámna Noé tojánashjache Běngbe Bětsabe bominýiñe tšabia jtsemnama, y chca entšá jashjáchana, nýe Běngbe Bětsábeñe jtsošbuáchiyese.

8 Běngbe Bětsá Abrahámioye tbojanchembo, inýe luaroye cháuama; Abraham Běngbe Bětsábeñe yojanošbuachéyeca, tojanma ntšamo Běngbe Bětsá tbojanmandacá, y tojánbocna chě luaroye jama, chě Běngbe Bětsá tbojanšbuachená jatšetayama luaroye, masque Abraham ndoñe yontsetátšēmo ndémoye yochjánama.

9 Běngbe Bětsábeñe yojanošbuachéyeca, yojobena mo inýe luarocana ashjanganacá jtšiyenana, cachabe luarentše ndoyená, chě Běngbe Bětsá tbojanšbuachená luarentše. Entšějuaca pormana tamběnguiñe yojoyena, cachcá ntšamo chě chábentšana básenga Isaac y Jacob ibojětsiyencá; y chátnaca Abrahamcá ibojanobátmana jójyěngacñama ntšamo Běngbe Bětsá Abrahámioye tbojanšbuachenacá.

10 Er Abraham corente uantadá yojanobátmana chě canýe luaroye celoca jamashěnguama tempo; chě luare inamna canýe běts pueblo, puerte tšabe ucuatjoniñe pormana pueblo, canýe luare chě ndayentšama Běngbe Bětsá tojanjuabó ntšamo chaotsemnama, y cachabe pormana luare inamna.

11 Sara, Běngbe Bětsábeñe yojanošbuachéyeca, Běngbe Bětsá tojanma cha canýe šešona chabotsebomnama, masque chora ya bětsanáñejema yojtsemna, šešona jtsebomnama. Běngbe Bětsá chca tojanma, er Sara corente yojanjuabná, cha chě canýe šešona yochtsanbomnama tbojanšbuachená cha, nýets tempo ntšamo tojayancá amá yojamna ca.

12 Y chca, quem entšá Abraham, chě šešonga jtsabamnama ya ndobenábentšana, ba básenga tmojanonýná, tša mallajta mo chě celoca estrellěngcá, y tša chěftanga mo chě mar bėjayoca chěnyañentša cascajca, ndocná jacúntama ntjobenayana.

13 Nýetsca quem entšanga imojětsiyena jtsaměse ntšamo chěngbe ošbuáchiyana yojamncá, y chca tmojanóbana, masque cabá ndoñe tmonjanóyěngacñe chě Běngbe Bětsá tojanašebuachená soyěnga. Pero chěngbe ošbuachiyanama corente imojtsetátšēmo, Běngbe Bětsá chentšana baytese ntšamo tojanašebuachenacá yochjánatšatayama y chě soyěnga ndegombre yochtsemnama, y chama oyejuayěnga chěnga imojtsemna. Chěnga tmojánayana quem luarentše chěnga imojoyena mo cachěngbe luarentše ndoyeněngcá, y quem luarějana mo nýe achnějuaněngcá ca.

14 Y chca tmojtsicháměngna, puerte jtšinýanýnayana chěnga tša imojtseboše inýe luaroca joyéanama, canýe luare cachěngbiama.

15 Chěnga nýe chě ndayentšana tmojětsanbocna luarama manjánjuabnase, matmėnjanobená tšabá cachoye jeshěconama.

16 Pero chěngna canýe más tšabe luare innaboše, canýe luare celoca. Chíyeca Běngbe Bětsá ndoñe yonjanėuatja, chěngbe Bětsá ca chěnga chamotsechembuanama, er celoca canýe běts luare, mo canýe běts pubblěcá chěngbiama tojanprontá.

17 Bëngbe Bëtsá Abrahámbyoye jinÿama, ndegombre aíñe o ndoñe Bëngbe Bëtsábeñe tayojsanošbuachema, tbojanmandá chabe uaquiñá Isaac chabuánatse jóbama, chábyoye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nÿe canÿe uaquiñá ibnabomná jóbama, Bëngbe Bëtsábyoye jëtschuayama, masque Bëngbe Bëtsá mëntšá tbojanšbuachená:

18 “Chë ácbentšana entsanga nÿe Isaacbiajana mochanjabo ca.”

19 Abraham corente yojanjuabná y yojátatsëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámbyoye tbojtsanauyaná Isaac jóbama ora, yojamna mo Abraham obanënguentšana chábyoye cuaftoyëngacñécá. Y chca, ntšamo Isaácaftaca tojanopasacá, batšá yojtsinÿanÿnaye ntšamo Jesucrístoftaca yochjanopasacá.

20 Isaac Bëngbe Bëtsábeñe yojanošbuachéyeca, Bëngbe Bëtsábyoye tbojanimpadá chabe uaquiñátbiana, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

21 Jacob Bëngbe Bëtsábeñe yojanošbuachéyeca, ya jóbana ora, tbojanimpadá cada ona chë Josebe básengbiana, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbënase Bëngbe Bëtsábyoye jadórama, y chabe jatjonëfjiñe tsbanánoca jojuáchase.

22 José Bëngbe Bëtsábeñe yojanošbuachéyeca, ya jóbana ora, tojánayana más hcoye chë Israeloca entsanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

23 Moisesbe bëtsétsata Bëngbe Bëtsábeñe ibojanošbuachéyeca, cha tojanonÿná ora, unga shinÿëntscuana cha tmojtsaniytëme, er chata tbojáninÿe cha canÿe botamana básetema bëtsemnama, y ndoñe tbojanëuatjaná chë reybe mandama, chë nÿetsca judiëngbe basetëmënga boyabásetëmënga jtsëbáyana.

24 Moisés Bëngbe Bëtsábeñe yojanošbuachéyeca, ya bëtsá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama.

25 Chamna, tojánbošena cha jasúfriama ínÿenga chamotsamama, cánÿiñe chë Bëngbe Bëtsábe entsángaftaca, y ndoñe nÿe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nÿe cachá tšabá jtsomñama.

26 Chamna, cha yojanjuabná, chë padecena soyënguiñe jasúfriana ntšamo Cristo tojansufricá, más tšabá yojamna chë Egiptoca uámana soyëngama, er cha Bëngbe Bëtsábeñe jtsošbuachiyëse chábeñe yojanobátmana, ba tšabe soyënga mo canÿe uacanana soyca cha ibochjanatšetayama.

27 Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luarentša rey cháftaca chábuetnama ntjatauátjá. Cha ainaniñe nÿets tempo añemo yojtsebomna, y chca yojáninÿna mo chë ndocná jinÿama tondobenacá, Bëngbe Bëtsábyoye cuaftsonÿacá.

28 Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entsángaftaca yebnëngoye amashjuañiñe buíñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

²⁹ Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayējana tmojánenachnëngo, mo chiñe bojojo fshantse cuafstomñcá; chentsana, chë Egiptoca entsanga cachcá jamama tmojánbošena ora, nÿetscanga chiyiñe tojtsanatajo.

³⁰ Israeloca entsanga Bëngbe Bëtsábeñe imojanošbuachéyeca, chë Jericó bëts pueblentša tapiëšënga shëconana canÿsëfta tentscuama chënga imojánajnentšana, chëšënga yojtsáshajaye.

³¹ Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínÿengaftaca, chë bëts pueblentse oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentšana ichmónënga tšabá tojanëbuaja, chë jarrepárama tmojánanga ntšámose chë luarentse oyenënga jáyënjanama jobenayama.

³² Atše sentsobena bangbiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chcangbiana jóyebuambayama, mo Gedeoncá, Barac, Sansón, Jefte, David, Samuel y Bëngbe Bëtsabe juabna oyeuambnayëngcá.

³³ Chënga Bëngbe Bëtsábeñe imojanošbuachéyeca ínÿengbe mandadëngbe entsángbioye tmojanayëñaná, bëtscá imojánama nÿetsca entsángaftaca ntšamo tšabá yomncá jtsamama y nÿetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama.

³⁴ Ošbuáchiyana bómnyeyeca, Bëngbe Bëtsá tojanma lempe chaotsefsanama, chëngbioye íneshiñe tmojanacjá ora, chënga ndocá chamondëpasama; tmojanotsbocá espadējaca jobanámentšana; ya tondaye añemo bëntsebomna ora, Bëngbe Bëtsá tojanma bëts obenana y puerta añemo chamotsebomnama; tmojánashjache bëts obenana jtsebomnama ínÿenga jáyënjanama, chëngaftaca imojtsentsjaná ora; y tmojanobená inÿe mandadënga y chëngbe soldadënga jáyënjanama, chamotsachetama jamëse.

³⁵ Ošbuáchiyana bómnyeyeca, básefta shembásenga chëngbe óbana pamíllangbioye cachiñe ainënga tmojtananÿe, chënga ainënga chamotsatmënama Bëngbe Bëtsá tojanma ora.

Ošbuáchiyana bómnyeyeca, ínÿenga tmojanma básefta ošbuáchiyënga, puerta chamosufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnama.

³⁶ Ošbuáchiyana bómnyeyeca, ínÿenga corente tmojansufrí, ínÿenga chëngbioye tmojanoyánguango ora y tmojanatsetšená ora; y ínÿenga tmojansufrí y cárceloje cadenëjuangaca utámenënga joquédamnaca.

³⁷ Inÿengbioye ndëtšbéngaca tmojtsanatëchënganja, serruchëshaca tmojt-sanëjátcacaye, espadējaca tmojtsanëbaye. Inÿenga imojánajna cánÿentšana ínÿecnoye nÿe oveshá y chivëbe bobácheca uichëtjonënga, ujabótënga, ainana tsetšanënga, y ínÿengbeyeca mocá borlánënga.

³⁸ Chë nÿe quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentšana ínÿecnoye aniñe, entsanga ndoyena luarënguenache, tjañenache, fshantsiñe atëbëfjniñe y cuevëshënguiñe.

³⁹ Nÿetsca quem entšanga, ndēmuanÿengbiamu muentše tmonjoyebuambá, Bēngbe Bētsá tšabá chēngbiamu tojánayana, ošbuáchiyana imojánbomna ca; pero ni canya chēnguentšá tonjanóÿengacñe, ndayá Bēngbe Bētsá chēngbe entšanga jatšatayama tojanašebuachenacá, nÿetsca tescama jtsebomnama.

⁴⁰ Bēngbe Bētsá, bēngbeñe jtsejuabnaye, tojanjuabó canye más tšabe soye bēngbiamu jamama, chca, Bēngbe Bētsá canye ora jamama, bēnga nÿetscanga, chēnga y bēnga chamotsemnama lempe ntšamo Bēngbe Bētsá yobošcá, ntšamo Bēngbe Bētsá tojanašebuachenacá jóÿengacñese.

12

Bēnga mochtsejuabnaye ndayá Jesús tojanmama

¹ Chíyeca, bēnga mochtsejuabnaye ba entšangbiamu, chē bēngbiamu más natsana imojaniyenēnga, ndēmuanÿenga puerte tšabá bēnga jtsinÿanÿayana ntšamo ndegombre yomnana Bēngbe Bētsábeñe ošbuáchiyana jtsebomnana, mo chēnga ndayá bēnga tmojtsamama cuaftsonÿangcá. Chcasna, mo chē tmochamanēngcá, ínÿengaftaca jenēÿenjanama, chē jashjanguama tojtsemna luaroye natsana jashjanguama, chēnga jotjajuamna, chē chorcama nduaserverna entšayá jtsenátsejcana, y lempe ndayá tojtsama más uenana chamotjajuama soyēngnaca jtsenójacana; bēngnaca cachcá, ndoñe matjaleséncia bēnga Cristbioye ndoñe tšabá ndētsoservénama, ni chē bacna soyēnga jamama juabnēnga, chē bēngbioye paselo jáÿenjanama juabnēnga cachcá chamotsamama. Chamna, sontsamna sempre Bēngbe Bētsá jtseervénana, puerte uantadēnga jtsemñese masque padecena soyēnguiñe moyena, bēnga chamobená chē trabajo jamama, chē ndayama Bēngbe Bētsá šojáchembo.

² Jesusbiamu mochtsejuabnaye, nda šuebēnatsana bēnga ošbuáchiyana chamotsebomnama, y šuinÿanÿná ntšamo nÿets tempo nÿetsca soyēnguiñe Bēngbe Bētsábeñe jtsošbuáchiyama. Cha chē cruzoca jóbanama sufrinana lempe tojanoboyá, er cha yojanobátmana chē chentšana yochtsanbomna bēts oyejuayánama; y yojanjuabná, chē más bacá uamana entšangcá jóbanana, chabiamu ndoñe canye uamana soye yonjamna ca; y chentšana chē uamana puestentše tojtanoítbema, Bēngbe Bētsabe catšbioica, jtsemándayama.

³ Chíyeca, šmochtsejuabnaye ntšamo Jesús Bēngbe Bētsábeñe jtsobátmanēse, puerte uantado yojamnama, chē bacna soye amēnga corente chabe contra imojtsemna ora. Chca chábeñe šmochtsejuabnaye, tšēngaftanga Cristbiamu oservēniñe ndoñe chacmondēumantšema, ni ainaniñe añemo jtsebomnana ndoñe chašmondájbanama.

⁴ Tšēngaftanga padecena soyēnguiñe šmojachnēngo, entšanga bacna soyēnga imojtsama causa, pero mēntscoñama ndoñe cmontsamna jóbanama, Cristbe soyēngama enojuerzániñe;

⁵ y tmojtsébnētjomba ndayá Bēngbe Bētsá tšēngaftangbioye, chabe básenga quetsomñecá tcmojábuayenama. Chē Bēngbe Bētsabe uabemana palabrēnguiñe mēntšá endayana:

Atšbe uaquiñá, Bēngbe Utabná aca jábuayenama tojtseboše ora, aca jasúfriase y padecena soyēnga jauántase,

chora ndoñe catjátsjuabnaye chiñe mo canye nduámama soye cuaftsemncá; y cha chacmojuácacana ora, ndoñe cattšajbaná ainaniñe añemo jtsebomnana.

⁶ Er Bēngbe Utabná jábuayenana nda cha tbobobonshanábioye, y jacastígana chē mo chabe uaquiñacá tbojofábioye ca —chiñe endayana.

7 Padedcena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canye uaquiña, y chábioye chabe taitá ndocna te buanjuácacana, más tšabá chaot-samama?

8 Nderado Bëngbe Bëtsá tšëngaftanga ndoñe tcmonjabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga.

9 Y bënga básenga monjamna ora, bëngbe bëtsësanga quem luarentše monjanamana bënga jácastigana, y bënga chëngbioye ndoñe stëtšoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiana, nda tojama entšanga espíritu chamotsebomnana, y chca, bënga tšabe vida chamotsebomnana.

10 Bëngbe bëtsësanga quem luarentše, nye básëfta tescama, bënga jëftsabuayiyayana, y chca jamana chënga tšabá tojtsinýana ora; pero Bëngbe Bëtsá bënga šojtsabuayiyiná ora, sempre chca jtsamana bëngbe tšabiana, bënga chabe entšanga jábiamama, cachacá puerte tšábënga, ntšamo cha nyets tempo yomncá.

11 Sempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aiñe cochtsetšënanënga. Pero bënga chë castigüentšana tmojuatsjinýe ndayá Bëngbe Bëtsá chë sóyeca tbojtsabuayiyinacá, as chentšana jóbcnana natjëmbana oyenana, nyetsca soyënguiñe ntšamo tšabá yomncá jtsamëse.

Bëngbe Bëtsábioye jtsabotena, entšangbiana ndoñe tšabá ntsemnana.

12 Mo nda puerte uamëntšayacá, jatrabájama tondaye añemo ntjtsebomncá, tsátšëna buacuatšëngaca y puerte uamëntšëna ntsamiasšëngaca, tšëngaftangbentše básëftanga ya uamëntšayënga šmojtsemna Bëngbe Utabnabiana trabájayiñe, y ainaniñe ndoñe añemo šmontsebomna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbomna.

13 Mo chë canye benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanëma chamuatatsjinýama, y chë benachentšana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nye batsatema ošbuáchiyana y chca jatrabájama nye tondaye añemo ndbomnënga šmochjúabuache; chë soye šmochjama, ntšamo Cristo tšabá jaserviama yomncá jinýanjyëse, y ntjalesenciácá ndocna soye chaotsama chë tšabe benachentšana tšëngaftanga chašmotsojuánañama.

14 Lempe ntšamo chašmojobenacá šmochjama nyetscángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservëñe; er chca ntjamcá, canýa ndoñe ntsobenana Bëngbe Utabnábioye jinýama.

15 Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšangbioye yochjatsataye tšabe soyënga chënga ndoñe chamondashjache. Šmochtsantješna, tšëngaftanguentše ndocná chaondëtsemna, mo canye untja thëtëjácá, chë chcaja sayëngbioye jásoyayana, nda chaotsama, ínýënga natjëmbana ainana ndoñe chamondëtsebomnana y bacna soyënga jtsamëse chamotsiyenama.

16 Yejuana šmochtsantješna ndocná tšëngaftanguentše shembása o boy-abásaftaca bacna soye amá chaondětsemnama, ni canya ndabiama Bëngbe Bëtsabe soyënga tondaye chaondětšamana. Esaú chca tojanma, chë lempe yochjanashjachcá, mayor uaquiná bëtsemnama, chabe uabentsábioye canye šcena sanama tbojtaname ora.

17 Y tšëngaftanga šmondétatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiamá tšabe bendicionënga chaomama, chë mayor uaquiná bëtsemnama yojanobena jtsebomnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

18 Tšëngaftanga ndoñe chešmatobecná, mo chë entšanga Israeloca Sinai ca uabaina tjoye tmojanobecnacá, ndayá chënga imojobena jabojuama, y iñesheca yojsángbototjuana, tondaye binýniñe luare, tša ibetiñe y puerte jabuache binýñëgaca;

19 ni chešmatuena chëngcá, canye trompetëfjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondětšóyebuambnama.

20 Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtšbëngcaca chamotsatëchënjanga jtsóbama ca.”

21 Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša šontsengmëmna auatjananá sëntsemna causa ca.”

22 Pero tšëngaftanga Bëngbe Bëtsábioye šmojobecná, y chca endmëna mo tšëngaftanga canye Sión ca uabaina tjoye celoca cuafjobecnacá, chë Bëngbe Bëtsá nýets tempo vida bomnabe bëts puebloye, mo celoca Jerusalén cuenta; y ba uaranga angelëngbioye šmojobecná, cánýiñe oyejuayënga enefjuanënga imojtsemnëngbioye, Bëngbe Bëtsá jtsatschuanayama.

23 Endmëna mo tšëngaftanga chë Bëngbe Bëtsabe entšángbioye cuafjobecnangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jóyëngacñama, ndëmuanýënga Bëngbe Bëtsá chabe librëšañe tojúbiamá. Tšëngaftanga šmojobecná Bëngbe Bëtsábioye, ntšamo nýetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tšëngaftanga cuafjobecnacá, chë entšanga mora ya obanënga y ntšamo tšabá yomncá jtsamëse imojëtsiyenëngbe espiritëngbioye, chë entšanga ndëmuanýëngbiamá Bëngbe Bëtsá tojanma chamotsemnama lempe ntšamo chabe entšángbiamá yojanjuabnacá, chca, cháftaca sempre vida jëftsebomnama.

24 Tšëngaftanga Jesúsbioye šmojobecná, chë jóbanëse, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiamá cha tojanóbana ora tojanábuashana buiñoye tšëngaftanga cuafjobecnacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéscacjama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana

buiñe Bëngbe Bëtsábioye cuaftsempadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tsabe soyënga jashjáchana; Jesusbe buñeca, bënga montsobena atsebácanënga jtsemnama.

²⁵ Cuedado šmochtsebmoma, bëngbioye tojtsoyebuambná ora cha joyeyunayama. Chë Israeloca entsanga ndoñe tmonjánbošena Bëngbe Bëtsá joyeyunayama, chë Sinái tjoca quem luarentse tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiyayá, ndoñe cachcá ndëcastigánënga quešochátabashejuana, ntšamo cha šojtsëtsësnacá ndoñe tmontseyeanëse.

²⁶ Bëngbe Bëtsá Sinái tjoca chë entsángbioye tojanoyebuambá ora, chabe oyeuambnayanáca tojanma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nje quem luare, sinó celócnaca ca.”

²⁷ Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë quem luarentse tmojama soyënga y chë jatrócama yopodena soyënga yochtsejuána ca, chca, nje chë nyetsca tescama yomna soyënga y ndoñe jatrócama soyënga chaoquedama.

²⁸ Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nyetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tsabá tbojtsinýancá mochtadorana, chabiamá bëts respeto jtsebmomñese, y nyetscangbiamá más bëtsá cha yomnama jtsejuabnyëse.

²⁹ Er Bëngbe Bëtsá puerte etonaná chë chabiamá nduauenanënga jabuache echanjácastigaye, y chca, cha jtsemnana mo canye íñeshe lempe jtsepochocamca.

13

Ntšamo jtsiyenama, Bëngbe Bëtsá oyejuayá bëngaftaca chaotsemnama

¹ Sempre nyetscanga šmochtsenbobonshana, Jesucristbeyeca catšátanga quetsomñecá.

² Sempre tsabá chë tsëngaftangbe yebnoye inye luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

³ Chë utámenëngbiamá sempre šmochtsenójuabnyaye, mo tsëngaftángnaca chëngaftaca utámenënga cuaftsemncá. Chë inyënga tmojtsama chamotseufrinëngbiamá šmochtsenójuabnyaye, er tsëngaftángnaca nderado cachcá šmatjatspáca.

⁴ Boyabása y shembása tbojanobouamá ora, ntšamo tbojanenšbuachenacá nyetscanga chamotserrespetana; y chë útata chabotsama nje ndayá y nje ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye inýaftaca ingñayëngnaca.

⁵ Ndoñe šmatsoiyena jtsejuabnyëse nje mallajta crocénana jëftsebmoma. Nje chë šmombmna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quechochatonýaye, ni canya quebocháiseboshjona ca.”

⁶ Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátauatja.

¿Ndayá canýe entšá nanjobenaye átšeftaca jamama ca?

⁷ Tšëngaftangbe amëndayëngbiama, chë Bëngbe Bëtsabe buayenana soyënga tcmojábuatambangiama, sempre šmochtsenójuabnaye. Sempre šmochtsenójuabnaye chë ntšamo chënga imojaniyenentšana tojanóbozna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnama.

⁸ Jesucristo cachá nýets tempo iuëtsemna, tempo, mora y nýetsca tescama.

⁹ Ndoñe šmatjaleséncia ínýenga chamotsamama tšëngaftanga chë be-nachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebmomnana, Bëngbe Bëtsá tšabe juabna bëngbiama yobómnyeyca, y ndoñe chë sanama, chë ndayá aiñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiama tempo tonjanoservé.

¹⁰ Bënga chë Jesucristbeñe mondošbuáchenga, canýe soye mondbomna mo chë Bëngbe Bëtsábioye jëtschuayama altaroca juinýena soycá, bacna soyëngama perdonánënga jtsemnama. Bënga mondbomna chë Jesucristo bëngbiama tojanma soye, cruzoca tojanóbana ora, bëngbe bacna soyëngama; y chë nýe tmojóba bayëngaca soyënga tmojtsama bachnanga ndoñe ntsebmomnana, chë Cristo tojanóbana ora, ndayá tojanmentšana tojanóbozna tšabe soyënga.

¹¹ Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuperdonama, y chë bayëngbe cuerpënga jtsejuinýiyana entšanga tmoyena luarentšana chaboca.

¹² Cachcá, Jesúsnaca tojansufrí y tojanóbana bëts pueblentšana chaboca, chabe buiñe tojánabuashana ora jóbanëse, entšanga Bëngbe Bëtsábënga chamotsemnama, y chabe delante mo tšabengcá chamotsemnama.

¹³ Chíyeca bënga šontsamna Jesúsbioye jobëconana, nda entšanga tmojtsan-aboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria.

¹⁴ Er quem luarentše bënga ndoñe quemátsbomna canýe bëts pueblo bëngbiama, nýets tempo chauesomñe bëts pueblo, ndayá bëngna tša mondböşe y puerte mondobátmana bënga joyënanama chë celoca yochtsemna Bëngbe Bëtsabe bëts pueblentše.

¹⁵ Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnama mo chábioye jëtschuayama canýe soye cuafjuatšëmboncá. Chcasna, jtsóyebuambnayëse cha mochtsadorana.

¹⁶ Sempre ntšamo tšabá yomncá šmochtsama, y chë šmobomncá inýengbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiamna tcojama ca, y jtsinýnana bënga Bëngbe Bëtsá imojtsatschuanama, ndayá cha tojamama.

¹⁷ Sempre šmochtsama ntšamo chë tšëngaftanga ošbuáchiyëngcá enefjuanëngbeñe amëndayënga tmojayancá, y sempre šmochtsiyena jtsamëse nýe ntšamo chënga tmojtsebošcá. Chënga sempre tšëngaftangbioye jtsanýenana, tšëngaftangbe tšabiama, ntšamo cmojánanýenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse,

šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

¹⁸ Bëngbe Bëtsá bëngbiana šmochtseimpadana, er bënga ainaniñe corente fsëndëtatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse.

¹⁹ Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciama tšëngaftangafaca cachiñe jtsatsmënama.

Bëngbe Bëtsábiye chëngbiana jaimpádama y chënga jacheuayama

²⁰ Atše, Bëngbe Bëtsá sëntseimpadana, cha chë nda endbëtsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánÿena mo oveshëngbe tšabe abuaijënÿacá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entšanga jinÿanÿiyama ndegombre bëtsemnana ntšamo Bëngbe Bëtsá chabe entšangbiana tojanašebuachenacá nÿetsca tescama jamama.

²¹ Cha sëntseimpadana chaoma tšëngaftanga chašmotsebonnana nÿetsca tšabe soyënga ntšamo cmojtsëjabotcá, chca, lempe ntšamo cha yobošcá tšëngaftanga chašmotsamama; y cha Jesucrístoftaca chaboma bëngaftaca ntšamo cha tšabá tbojtsinÿancá. ¡Nÿetscanga nÿetsca tescama Cristo chamotsatschuaná! Chca chaotsemna.

²² Jesucrístbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nÿe básefta palabréngaca chama tcbonjubaábiana.

²³ Atše sëntseboše tšëngaftanga chašmotsetátšëmbo, Timoteo Jesucrístbeyeca bëngbe catšata, ya ndoñe utamená yontsemnana, y cha betscó átšbiye chaojtabëse, átseftaca chanjëtšbetše tšëngaftanga jányama chajá ora.

²⁴ Tšëngaftanga ošbuachiyëngbeñe nÿetsca amëndayënga šmochjácheuaye, y nÿetsca Bëngbe Bëtsabe entšangnaca choca. Chë Italia luaroquënga ošbuáchiyënga tšëngaftanga cmontsacheuaná.

²⁵ Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnana.

Santiago

Jacheuayama

¹ Atše Santiago, Bëngbe Bëtsá y Bëngbe Utabná Jesucristbe canye oservená, tšëngaftanga chbontsébuabiamná, tšëngaftanga chë bnëtsana uta Israeloca bëts pamíllangbioye nyets luarëjana ujqwëshenënga. Atše chbontsacheuaná.

Chë Bëngbe Bëtsábíocana osertánana

² Jesucristbeyeca atšbe catšátanga, tšëngaftanga ndaye padecena soyënguiñe chašmojtšiyena ora, chiñe šmochjájua boye mo chca tšëngaftangbe tšabíama cuaftsemncá y šmochjójeyuaye;

³ er tšëngaftanga šmondëtatšëmbo, chcañe chašmojtšajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtšebomñëse, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñëse.

⁴ Pero chca chašmojtsemñëse, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondëtsabuashebenëse.

⁵ Nderado nda tšëngaftanguentšana ndoñe tontsobena corente osertánana jtsebmomnana, cha bontsemna Bëngbe Bëtsá jaimpádana cha chaoma aíñe chana jtsebmomnana, y Bëngbe Bëtsá chana bochanjátsetaye; er Bëngbe Bëtsá nyetscanga bëtscá endbëtsatsatnaye y ndocnábioye jatáboyëñjana.

⁶ Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjójeyunayama ntjatatëmnancá. Nda mëntšá tojtsamëse, inye ora aíñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binjia nye cáatoye jtsambayana.

⁷ Chca ama entšá ndoñe chaondëtsejuabná, Bëngbe Utabnábentšana ndayánaca jatóyëngacñama.

⁸ Cha jtsemnana canye entšá, mora canye soye juabnayá, pero chentšana inyetšá jatójuabnañana. Chca, cha jtsiyenana nyetsca soyëngama uta soye jtsejuabnayëse, y chca cha ndoñe ntsobenana tondaye puerte tšabá jamama.

⁹ Chë Jesucristbeñe ošbuachiyá, ndbomñëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana;

¹⁰ y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaníñe uantšefjushacá, cha ndoñe nyets tempo quem luarentše ntjëftšiyenana.

¹¹ Shinjé tojábocna y becá tojojëñjana ora, chë shácuaña jtsebuashana, chë uantšefjúsha jtsátsatšana y chabe uabótamanana ya ndoñe más ntsebinjñana. Cachcá chë bomná, echanjóbana nye cachabíama más becá crocénana onguayíñe chaotjsemna ora.

Bacna soye ocochënguentšana tšabá jabocnana

¹² Oyejuayá chaotsemna chë entšá chë padecena soyënguentšana tšabá tojëtšbocná, cabá Jesucristbeñe ošbuachiyá; chama Bëngbe Bëtsá chabíama

oyejuayá echántsemna y echanjama chë nÿetsca tescama yomna tšabe vida cha chaotsebomnama, mo uacananancá chabe ošbuáchiyama. Chë soye Bëngbe Bëtsá tojašebuachená nÿetscanga cha imobobonshánëngbiøye.

¹³ Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana inÿenga bacna soye jamama chaócochënguama.

¹⁴ Inÿetšá endmëna, canÿa bacna soye jamama jócochënguana, bacna juabnënga tojtsebomna ora; cha chiñe nÿe jésejuabnayana y chë soye jtsasjayana cha chca jamama.

¹⁵ Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nÿetsca tescama bochanjacistá.

¹⁶ Atšbe bonshana catšátanga, ndoñe matenoíngñana, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca.

¹⁷ Nÿetsca tšabe soyënga y chë puerte tšabe soyënga tsbanánocana endobá, Bëngbe Bëtsá chë Taitábicana. Y cha chë shinÿe, juashcona, y nÿetsca chë celoca yobuashinÿinÿana soyënga tojamá, nÿets tempo nÿe cachá iuesomñe y ndoñe inÿa ntjátsmëna.

¹⁸ Cachá jamama tojánbošenayeca, bënga chábenga šojánabiama, bënga chabe ndegombre palabrënga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnama.

Ntšamo ndegombre yomna Bëngbe Bëtsábiøye tšabá jadórama

¹⁹ Atšbe bonshana catšátanga, quem soyama šmochtsenójuabnaye; nÿetsca tšëngaftanga cmontsamna sempre jtseprontánana jouenama; pero jóyebuambayamna jobátmana y inÿengaftaca jetnámnaca.

²⁰ Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nÿetsca soyënguñe tšabá jtsamana.

²¹ Chcasna, šmochtsajbaná bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjóyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnama.

²² Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aiñe jtsamana; ndoñe chca šmontsamëse, cach tšëngaftanga šmontsenoíngña.

²³ Nda nÿe chë buayenánana tojouena, pero betesco tbojtsebntjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubíá espejuñe tojtsenonÿacá:

²⁴ chana cachá jtsenónÿayana, pero chë espejo tojabuertaná ora, jtsebntjëmbana ntšamo cha bëtsemnama.

²⁵ Pero nda ntšamo tojouencá ndoñe tbonjebntjëmbe, y sempre tojtsejuabná chë entšanga játebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

²⁶ Nderado nda tojtsejuabná Bëngbe Bëtsábiøye ibojtsadorana ca y chë Bëngbe Bëtsábiøye adorayá ntšamo ibomncá cha yojtsama ca, pero ndoñe

tontsobena bacna soye oyebuambnayana jtsajbanana, cachá yojtsenoíngña, y nyetsca soyënga ntšamo tojtsamcá Bëngbe Bëtsá jadórama, chabiana ton-daye ntsámanana.

²⁷ Bëngbe Bëtsá chë Taitabe bominyiñe, chë puerte tšabe y ndegombre soyënga, ndayá entsá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nyë quem luarama enójuabnayënga mondbetsamcá.

2

Nyetscanga tšabá jtsatenonÿayëngana

¹ Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nyetsca entsanga cachcá jtsatenonÿayëngana.

²⁻³ Nderado tšëngaftanga cánÿentšë šmojënefjna, y chora canÿe bomna entsá tojášhango castellano ntšabuchëtjonëfjangaca y uámana entsayëjuangaca bopormaná, cha botamana šmojúmashëngo y mëntšá šmojuayana: “Moca quëfseroca mabesótbema ca”. Pero cachca ora, canÿe ndbomnjema tojášhango uandocuenta entsayá uichëtjóna, y cha šmojuayana: “Acna choca tsanana cochtsemna o chafjoca mótbema ca”.

⁴ Chca tšëngaftanga ya šmontsama cach tšëngaftanguentšë báseftanga más uámanënga ínÿengbiana chamotsemnama, y chca šmojtsama, ana bacna juabnënga šmojtsebonna causa.

⁵ Atšbe bonshana catšátanga, quem soye šmochjouena: Bëngbe Bëtsá quem luarentšë ndbomnjënga imomnjënga tojabacacá, chënga canÿe puerte uámana soye chamotsebonna, Jesucristbeñe puerte chamotšošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbiye chë soye jatsatayama tojašebuachená;

⁶ pero tšëngaftanga chë cuenta, mo ndoñe cach tšëngaftangcá entsanga bendmëncá chëngbiye jtsëñÿayana. Ndegombre, chë bomnjënga mondmëna chë nyë sempre cmondbëtsamëndayënga y chë sjojonana chë pueblentša mandëngbiye cmondbáunatsënga.

⁷ Y cach bonnjëngnaca mondmëna chë Cristbiana podescá oyebuambnayënga, ndábenga tšëngaftanga šmondmëna, y chabe uabaina tšëngaftangbiana puerte enduámána.

⁸ Bëngbe Bëtsabe uabemana palabrënguiñe mëntšá endayana: “Ndëmua entsánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá šmochántsama.

⁹ Pero tšëngaftanga ndoñe cachcá šmontsenonÿase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesencancá.

¹⁰ Y mora, canÿe entsá nyetsca chë leyentša mandënga tojtsobedecena, pero ndoñe tontsama ntšamo nyë mo canÿe mando ntšamo iuayancá, cha Bëngbe Bëtsabiana jtsemnana canÿa ntšamo nyetsca chë leyentša mandënguiñe ndoñe yondëlesencancá amá.

¹¹ Cach Bëngbe Bëtsá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shëmbioye ínÿaftaca ndoñe tbonjaingñë, pero

aíñe ín̄yabioye tbojóba, chca, Běngbe Bětsabiana cha jtsemnana can̄ya n̄yetsca chě leyent̄sa manděnga ndocumpliná.

12 Tšěngaftanga cmontsamna jtsoyebuambnayana y jtsamana ndayá Cristo sojanaměndacá, atsebacana entšangcá, er Běngbe Bětsá echanjayana ntšamo tmojamcá aíñe o ndoñe tšabá bětsemnana.

13 Er chě ín̄yengbiana ndoñe ngmėnana bomnėngbiana, Běngbe Bětsá ntjongmiacá echanjayana ntšamo tmojamcá aíñe o ndoñe tšabá bětsemnana; pero chě ín̄yengbiana aíñe ngmėnana bomnėngbiana, ntšamo tmojamcá aíñe o ndoñe tšabá bětsemnana Běngbe Bětsá chaojayana ora, chěnga tšabá chentšana mochanjábocana.

Chě ndegombre ošbuáchiana, soyěngaca jin̄yan̄iyana

14 Atšbe catšátanga, ɳdayama cán̄yabioye buanjosėrvia jayanana aíñe Jesucristbeñe sěntsošbuaché ca, pero cha ín̄yengbiana tšabe soyěnga ndoñe tontsama, y chca, ntšamo cha tojtsamcá ndoñe tontsin̄yan̄ná cha Jesucristbeñe yošbuáchema? Ndegombre, cha n̄ye chca tojtsicháměse, ndoñe ntšopodėnana cha atsbočaná chaotsemnana.

15 Nderado can̄ye boyabása o shembása ošbuachiyá entšayá tbojtsabuáshbena y saná chě te jasámnaca tbojtsebuáshbena,

16 y can̄ya tšěngaftanguent̄sá tbojauyana: “Diošoftá, sěsnama ndoñe chacondětsepadecena y becá chacuatoshachá ca”, pero chca chaotsemnana chábioye tondaye tbonjatšetase, ɳdayama nantsoservena chca jayanana?

17 Cachcá, nda tojayana Jesucristbeñe yošbuaché ca, pero ndocna tšabe soyěnga tontsama, chě ošbuáchiana bomnana jin̄yan̄iyama, n̄ye chca ošbuáchiana jtsebomnana tondayama ntšoservėnana.

18 Pero nderado ndánaca měnt̄sá echanjayana: “Aca Jesucristbeñe icošbuaché, pero atšna ín̄yengbiana tšabe soyěnga sěntsama ca.” Chora atše stjojá: “Smin̄jin̄yé ntšamo can̄ya nantsobena Jesucristbeñe jtsošbuáchiana, chca chaotsin̄yana tondaye ntšamcá, y chora, ndayá tijamama atšbe ošbuáchiana cbochjin̄jin̄iyeye ca.”

19 Aca condošbuaché n̄ye can̄ye Běngbe Bětsá yomnana y chca tšabá contsama; pero chě bacna bayějėgnaca chiñe jtsošbuáchiana, y chě causa chěnga uatjana jtsebomnana y jtsangmėm̄nayana.

20 Ndoñe obějema cattsemna; ndegombre cbochanjin̄jin̄iyeye nderado nda Jesucristbeñe tojtsošbuaché, pero tondaye tontsama chca chaotsin̄yana, chca ošbuáchiana tondayama ntšoservėnana.

21 Běngbe Bětsá tojánayana chabe bomin̄yiñe Abraham, běngbe tempsca bėts taitá, tšabia yojamna ca; chca tojánayana, er Běngbe Bětsá tbojanmandá ora, yojtseprontana chabe uaquin̄á altariñe jóbama, cach Běngbe Bětsábioye jětschuayama.

22 Aca contsobena Abrahámbeñe jin̄yama, cha Běngbe Bětsábeñe yojanošbuáchema, y soyěnga yojánama chca chaotsin̄yana; y ndayá cha tojanmana entsin̄jin̄yana, cha ndegombre puerte bětscá yojanošbuáchema.

23 Chca tojanopasá ntšamo Běngbe Bětsabe uabemana palabrenguifė endayancá, měnt̄sá: “Abraham Běngbe Bětsábeñe yojtsošbuáchieye, y chama Běngbe Bětsá tojánayana chabe bomin̄yiñe cha tšabia yojamna ca.” Y Abraham entsanabaina Běngbe Bětsabe amigo ca.

²⁴ Y tsëngaftanga šmontsetátšëmbo, Bëngbe Bëtsá ináyana canye entsá chabe bominiñe tsabia yomna ca, chë entsá ndayá tojtsamama, chabe ošbuáchiyana chaotsinýnama, y ndoñe nye ošbuáchiyana tojtsebomnana.

²⁵ Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominiñe cha tsabia yojamna ca, er cha canye tsabe soye tojanma. Cha chë noticia uambaye judiënga posada tojanëyentsame, y chentsana tojanëjabuache inye benachëjana chamuáisebocanama, chë pueblentsa soldadëngbiama chamotsachetama.

²⁶ Lempe básefta palabrenguiñe jayanamna mëntsá entsemna: ntšamo canye cuerpo, espíritu ndbomna cuerpo, pronto jóbanana, cachcá chë ošbuáchiyana, ndocna soyëngaca tontsemna, chca chaotsinýnama, tondayama ntsoservénana.

3

Bichtájaca tsabá jóyebuambayama endmëna

¹ Jesucristbeyeca atsbe catsátanga, ndoñe yapa buátëmbayënga tsëngaftangbeñe chamondëtsemna; er tsëngaftanga ya šmondëtatšëmbo, bënga, chë entsanga abuatambayëngbiama, chë castigo más bëtscá yochtsemnana, Bëngbe Bëtsá ndoñe tmonjóyeunase, ntšamo entsanga tmojamama aife o ndoñe tsabá bëtsemnana cha chaojayana ora.

² Bënga nyetscanga nyetsca bacna soyënga mondbëtsama. Nderado nda oyebuambanyiñe ni mo canye bacna soye tonjama, chë entsá puerte tsabia jtsemnana, ntšamo Bëngbe Bëtsá yobošcá jtsiyenëse, y cha yojtsobena cachá sempre jtsenomándayama.

³ Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nyets chëngbe cuépoca tmojtsamcá jtsemándayana, y ndoñe nye chëngbe bestšaese.

⁴ Barquëshamnaca smochjenójuaboye. Masque tša bëtsëtsacuemëngá y tša jabuache binýiënga chë barco jtsëjuatsëntšnayana, chë uamanëjayënga chë barco juyambana ndayëjana tmojtsebošcá, y chca, nye canye base soyetëmaca, timón ca uabainëtëmaca.

⁵ Cachcá, chë bichtaja cuerpiñe canye base soyetema endmëna, pero chë bichtájaca entsanga jtsenábotamnayana bëts soyënga tmojamama. Smochjouena, canye base íñeshe jtsobenana canye bëts tjañe juangbotjuama.

⁶ Y chë bichtaja endmëna mo canye íñeshcá, mo canye luare ndayentse puerte bacna soyënga tobinýncá. Chë bichtaja jtsobenana bëngbe cuerpentse puerte bacna soyënga bëngbiama jamama. Mo canye íñeshe becá tojtsebdiamnacá, chë bichtájaca tcojtsichamo ndoñe tsabe soye, jtsobenana bacna soyënga bëngbiama jamama nyets tempo quem luarentse tmuet-siyenëntscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

⁷ Entsá endobena jtsamëndayana nyetsca tjoica bayënga, shloftšënga, osjonnayënga y buyeshiñe oyena bayënga; y ndegombre mora entsamënda;

⁸ pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtscá bacna soyënga cada te chauëtsebinýnama, y mo canye mëtscuaycá veneno jtsebomnana jóbama, chë bichtájaca cachcá endmëna.

⁹ Bichtájaca bēnga puerte tšabá Bēngbe Bětsá y Taitabiana jtsichámuana, y cach bichtájaca bēnga puerte bacá entšangbiana mondbětsichamo, masque Bēngbe Bětsá cachacá enoparecēnēnga chēnga tojábiana.

¹⁰ Cach uayásentšana jtsóbocanana Bēngbe Bětsabiana tšabe palabrenga y entšangbiana bacna palabrenga. Jesucristbeyeca atšbe catšátanga, chca ndoñe chaondětsemna.

¹¹ Canye bėjaye obocantšana ndoñe ntsopodénana tšabe búyeshe chaóboचना y cachentšana untja búyeshnaca.

¹² Ntsamo canye higo betiyentšana ndoñe ntsopodénana olivosěšēnga jashacama, y canye uvas betiyentšana ndoñe ntsopodénana higuēbēnga jashacama, cachcá, atšbe catšátanga, tamona búyeshentšana ndoñe ntsopodénana tšabe búyeshe chaóboचना.

Bēngbe Bětsábicana óbocana osertánana

¹³ Nderado tšēngaftanguentše tojtsemna canye puerte tatšēmbuá y osertaná, cha bontsemna, chca yomnana entšanga jinŷanŷiyana, tšabe soyēnga amana jtsiyeně y chē ntjatosoberbnaycá tojama soyēngaca; y cha chca jamana, puerte osertaná bětsemnana.

¹⁴ Pero tšēngaftangbe ainaniñe yapa ínŷabioye šmojtsántšaboše y nŷe ínŷēnga chamotjáyana soyēnga šmojtsama, as ndoñe šmattsenábotamnaye osertánēnga y tšábēnga šmornnana, er ndegombre Bēngbe Bětsabe osertánana tšēngaftanga ndoñe šmontsebonna.

¹⁵ Er chca osertánana, Bēngbe Bětsábicana ndoñe ntsóbocanana, ndayá nŷe quem luarama enójuabnayēngbentšana, nŷe entšangbe juabnentšana, y canye bacna bayějbentšana.

¹⁶ Ndayentše entšanga yapa tmojtsenántšaboše, y nŷe ínŷēnga chamotjáyana soyēnga tmojtsama, chentše tondayama quemochátenēyeunana y nŷetsca bacna soyēnga mochántsama.

¹⁷ Pero chē Bēngbe Bětsábicana óbocana osertánana bomnēnga, nŷetsca soamna, natsana puerte tšabe vídaca jtsiyenana, bacna soyēngaca ndēmandánēnga; y chēnga jtsemnana chē ínŷēnga ndoñe chamondětsentsjanama amēnga, tšábēnga y sempre jtseprontánana ínŷēnga joyaunayama. Y cach quemēnga jtsemnana ínŷēngbiana ngménana bomnēnga, siempre tšabe soyēnga jtsamana, cachcá nŷetsca entšangbiōye jtsēnŷayana, y ntsamo ndegombre tojtsemncá jtsichámuana y jtsamana.

¹⁸ Ntsamo canye jená, botamana shajuana jtsebonnana tšabe jénaye jájena, cachcá, sempre natjēmbana jtsiyenama bošēngna, natjēmbana ínŷēngaftaca jtsiyenana, chca, nŷetsca entšanga chamotsamama ntsamo Bēngbe Bětsabe bominiñe tšabá yomncá.

4

Smochtsiyena Bēngbe Bětsá tšēngaftangbeñe jtsemándayěse

¹ ¿Ndayentšana chē tšēngaftanga jtsentsjanayama y jtsenpenzéntsiayama yóbocana? Endóbocana chē tšēngaftangbe bacna juabnēnguentšana, nŷe cach tšēngaftanga tšabá jtsomñana, y chē soyēnga tšēngaftangbe ainaniñe siempre chē tšabe juabnēngama contra jésemnana.

² Tšēngaftanga ndayánaca jtsebonnana šmojtseboše, pero chca jtsebonnana ndoñe šmontsobena, as jtseprontánana ínŷēngbiōye jtsēbáyama. Inŷa ntsamo tobomncá tšēngaftanga tša jtsántšabošana, y chē soye jashjáchama

ndoñe šmontsobena ora, ínÿengaftaca jentjáyanangana y jtsepenzéntsiayana. Ntšamo šmojtsebošcá ndoñe ntjobenayana jtsebomnama, Bèngbe Bètsá chama ndoñe šmondbotjañe causa;

³ y chë soye šmojtjañe ora, tšëngaftanga ndoñe ntjójyëngacñana, ndoñe botamana chë soye šmondbotjañe causa, er tšëngaftanga chë soye jtsebošana nÿe chaoservema oyejuayënga bacna soyënguiñe jtsomñama.

⁴ ¡Tšëngaftanga, Bèngbe Bètsá hobonshánana šmojtsajbananga! ¿Ndoñe šmondétatšëmbo, chë jtsebošana nÿe quem luarama enójuabnayëngbe amigo jtsemnama y nÿe quem luarentša soyënga jtsebomnama, chca, canÿe entšá Bèngbe Bètsabe uayayá jtsemnana? Ndánaca tojajuabó nÿe quem luarama enójuabnayëngbe amigo jtsemnama, chca, canÿe Bèngbe Bètsábioye uayayá jóbemana.

⁵ Ndoñe nÿe bonamente Bèngbe Bètsabe uabemana palabrénguiñe mëntšá endayana: “Chë Bèngbe Bètsá tbojanichmó bèngbe ainaniñe chaotsiyenama Uámana Espíritu, puerte entseboše nÿe Bèngbe Bètsá canÿa bèngbe amëndayá chaotsemnama ca.”

⁶ Pero Bèngbe Bètsá, bèngbe tšabiamna jtsejuabnayëse bënga jtsëjabuáchanana, chíyeca Bèngbe Bètsabe uabemana palabrénguiñe mëntšá endayana:

Bèngbe Bètsá chë nÿe cachënga uámanënga tmojtsenobiamnangbe contra entsemna,
y chë ndoñe uámanënga montsenobiamnangbiamna, Bèngbe Bètsá más tšabe juabna entsebomna ca.

⁷ Asna, tšëngaftanga šmochtseprontana nÿe Bèngbe Bètsá chacmotsamëndama; ntšamo Satanás tmojtsamëndacá ndoñe šmattsama, y cha cachora tšëngaftangbentšana echantsachá.

⁸ Bèngbe Bètsábioye šmochtoconá, y cha echanjama tšëngaftanga ntšamo cha yomnama chacmotsésertánama. Tšëngaftanga bacna soye amënga, cach tšëngaftangbe cucuatšëngaca tšabe soyënga šmochtsama, bacna soyënga ndoñe. Tšëngaftanga chë inÿe ora jtsejuabnayana Bèngbe Bètsá jtsebobonshánama, y inÿe orna, nÿe quem luarentša soyënga jtsebomnama, šmochtsajbaná bacna soyënga jamama bošana, chca, nÿe tšabe juabnënga tšëngaftangbe ainaniñe chašmotsebomnama.

⁹ Tšëngaftangbe bacna soyëngama ngmënaca šmochtsemna, šmochjenóbošachna y cochtsetšenánënga šmochjójyebuambaye. Jatenbiajuayamna, šmochjenóbošachna; y joyejuayëngamna, ngmënaca šmochtsemna.

¹⁰ Bèngbe Bètsabe delante bètsétsanga ndoñe šmattsenobiamnaye, y cha más uámanënga cmochanjábiamna.

Inÿengbiamna ndoñe ntsichámuana ndoñe tšabá tmonjama ca

¹¹ Jesucristbeyeca catšátanga, inÿengbiamna bacna soyënga ndoñe šmattsójyebuambaye. Nda cachabe catšatbiama bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsocumplínana y jtsichámuana chë leyentša mandënga tondayama yontsoservena ca. Y chë leyama chca tcojtsichámëse, cach ley jocúmplia cuenta, contsobiamná canÿe ichamuá chë ley aiñe o ndoñe yondoservénama, y chca ndoñe quecmátsmëna jtsamana.

¹² Chë ley tojuapormá cha nÿe canÿa endmëna, Bèngbe Bètsá, y cachá endmëna ntšamo entšanga tmojamcá aiñe o ndoñe tšabá bétsemnama ichamuá, y cachánaca entsobena entšanga játsebacama o nÿetsca tescama

jácastigama. Y acna, ¿ndase cmëna ndëmua entšabiámnaca jobenayama jatichámuama ntšamo tojamcá aíñe o ndoñe tšabá bétsemnama?

Ndayá yěfse yochjatëchnënguama ndoñe ntsótatsëmbuana

¹³ Y mora quem soye šmochjouena, tšëngaftanga chë šmondbétsichamo: “Mënté o yěfse quemoye o chë inye bëts puebloye fchanjanga, y chentše canye uata fchanjëftsemna ba soyënguifne trabájayifne, y ndegombre becá fchanjónyena ca.”

¹⁴ ¡Pero ni mo ndayá yěfse tšëngaftangaftaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebonna, y chca, tšëngaftanga šmondmëna mo canye jantšetëshcá, chëshe mora jónynana y nye ndeolpe jatenatjëmbana. Tšëngaftangaftaca cachcá echanjopása.

¹⁵ Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.”

¹⁶ Pero chë cuenta, tšëngaftanga bëts soyënga šmochjamama sempre jt-senábotalmnyana, ndayá tšëngaftanga chašmomama Bëngbe Bëtsá yochjalesencia cá ntsetatšëmbcá; y chca jtsamana ndoñe tšabá quenátsmëna.

¹⁷ Nda tojtsobena ntšamo tšabá yomncá jamama, pero ndoñe chca tonjama, cha canye bacna soye jtsamana.

5

Chë bomnënga jábuayenama

¹ ¡Quem soye šmochjouena, tšëngaftanga chë bomnënga! ¡Chë tšëngaftanga šmochtseufrínama šmochjenóbošachna y uatjananënga šmochtseyoye!

² Tšëngaftangbe bomnana buajónana janguánana entsemna, tondayama quenátoservena, y chë entšayëjuangá mejëjonga montsasá.

³ Tšëngaftangbe castellano y midio tojtsengúsheshe; y chë ngúsheshna echántsinýinýnaye tšëngaftanga chë crocenanaca ndoñe šmonjanmama ntšamo ínýenga jujabuáchama yojamncá; chë causa, nyetsca tescama cmochántsapochocaye, ntšamo chë íñeshe canye soye endbetsepochoacá. Tšëngaftanga quem tempo bomnana šmojtsejubá, y mora quem luare jopochócama ya entsobeco.

⁴ Tšëngaftanga chë tšëngaftangbe fshantsënguifne tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuana. Bëngbe Útabná nyets obenana bomná, chë trabajayëngbe chembuana y tojouena.

⁵ Quem luarentše tšëngaftanga šmondoyena ba botamana soyëngaca y nye ntšamo cach tšëngaftanga šmobošcá jtsamëse. Ntšamo canye uacná jobana, minýicá tojtsemna ora, cachcá tšëngaftangbiama entsobeco chë te, ndaye ora Bëngbe Bëtsá echanjama castigánënga chašmotsemnama, er puerta bacna soyënga šmojama. ¡Chë castigo jtsebinýnana tempo ya entsobeco!

⁶ Tšëngaftanga, chë puerta tšabá amëngbiama šmojayana jóbanama yojtsamna ca y šmojtsëbaye, chca ndoñe chaondëtsemnama chënga ndocá jamama ntsobercá.

Chë uantado jtsemnana y chë Bëngbe Bëtsáftaca jencuéntama ora

7 Pero tšəngaftanga, catšátanga, uantádoca šmochjobátma Bəngbe Utabná yochjésabo orscama. Chə jajañe trabajayá tojtsobátmana bətsćá tšabe shajuanənga jobuátbanama, jtsotocánana natsana uantádoca jobátmana chə jajañama uaftena tempo chaóshjanguama.

8 Tšəngaftəngnaca uantadənga šmochtsemna, y tšəngaftangbe ainaniñe añemo chaotsemna, er Bəngbe Utabná mēntescana ndoñe bən y moye echanjésabo.

9 Jesucristbeyeca catšátanga, ntšamo ínɣənga tmojtsamama ndoñe nɣe šmatsoquejana, Bəngbe Bətsá tšəngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entsānga tmojamcá añe o ndoñe tšabá bətsemnana, ya entsebeconá.

10 Atšbe catšátanga, chə tempsquənga Bəngbe Bətsabe juabna oyeuambnayənga, ndəmuanyənga entsānga tmonjanabuayená Bəngbe Utabná jótšəmbonəse, chənga bəngbioye šonjéftsaninɣanɣiye ntšamo tmojansufri, ntšamo šojtsamna uantadənga jtsemnana tmojtsesufri ora; y chca tšəngaftanga cmontsamna jtsamana.

11 Bənga chəngbiana fsəndbətsejuabnaye oyejuayənga imojamna ca, chə tmojansufri ora Bəngbe Bətsabeñe imojanobátmana ainaniñe añemo jtsebonnəse. Tšəngaftanga šmojouena ntšamo Job ainaniñe añémoca Bəngbe Bətsabeñe yojanobátmana, puerte padecena soyənguiñe yojasufri ora; y šmondətatsəmo ntšamo Bəngbe Bətsá cabana chábioye tbojancuedama, y chca yojamna Bəngbe Utabná entsāngbiana puerte ngmená yómnayeca.

12 Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inɣe soyama. Tšəngaftanga añe ca jayanama šmojtsebošəse, nɣe añe ca šmochjayana, y ndoñe casna nɣe ndoñe; chca, Bəngbe Bətsá ndoñe chaodayana ndoñe tšabá šmonjama ca júraye causa.

13 Nderado nda tšəngaftanguentsá puerte ngménaca tojtsemna, cha tojtsemna Bəngbe Bətsá chama jaimpádama. Y nderado nda oyejuayá tojtsemna, cha bontsemna jacántana Bəngbe Bətsá jətschuayama.

14 Nderado nda šocá tojtsemna, cha bontsemna chentša ošbuachiyəngcá enefjuanəngbeñe bətsəjeməngcá aməndayənga jáchembuana, chənga Bəngbe Bətsá chabiana chamoimpadama, y Bəngbe Utabná jótšəmbonəse aceitiye chamuanətjuama.

15 Y tšəngaftanga, puerte jtsošbuáchiyəse Bəngbe Bətsá chašmojaimpadá ora, chə šocá salud echántinɣəna, y Bəngbe Utabná echanjama cha tšabá cachiñe chaotsatmənama; y nderado cha bacna soyənga tojaməse, Bəngbe Bətsá bochantseperdóna.

16 Chíyecna, chə bacna soyənga šmojtsamama šmochjobuambaye, y Bəngbe Bətsá nɣetscangbiana šmochtseimpadana, chca, tšabá mo shnanəngcá chašmotsemnana. Canɣa ndabiana Bəngbe Bətsá tojayana chabe bominɣiñe tšabia yomna ca, cháftaca tbojencuentá ora, chánaca ba tšabe soyənga jəyəngacñana, y jobenayana bəts soyənga jamama.

17 Bəngbe Bətsabe juabna oyeuambnayá Elías, mo cach bəngcá canɣe entsá inamna, y puerte jtsošbuáchiyəse ndoñe chaonduaftema Bəngbe Bətsábioye tbojanimpadá ora, quem luariñe mo unga uata y tsəntsəñe ndoñe tonjanafte.

18 Chentšana, Bəngbe Bətsábioye cachiñe tbojtanimpadá ora, quem luariñe tojanafte y cachiñe chə jajañenache bətsćá saná yojtsatsbinɣna.

¹⁹ Atšbe catsátanga, nderado nda tšëngaftanguentsá tojtsajbaná chë ndegombre soyënga jtsamana, pero inÿa chábioye tbojuájabuache cachiñe chë tšabe benache cháuatishachama,

²⁰ tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nÿetsca tescama castigüentsana chábioye jatsbocana, y jamana ba bacna soyëngama cha perdonaná chaotsemnama.

1 San Pedro

Jacheuayama

¹ Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mondoyenëngbiama, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiama.

² Sentsabiamná chë Bëngbe Bëtsá Bëngbe Taitá tojánabacangbiama, ntšamo cachá jamama yojanjuabnacá y ntsamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tsabá chašmotsatsemnana, bacna soyënga abua-juánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnama, y chaoma tsëngaftangbe ainaniñe tsabe ebionana chašmotsebonnama.

*Bëngbe Bëtsábeñe jtsošbuáchiyëse vida jtsebonnana, atsebácanënga jtse-
nama*

³ Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado ínÿengaftaca yómnayeca, tojanma bënga tsëm juábnaca vida chamotsebonnama, bëngbioye bacna soyënga jabuajuánase, Jesucristo cháuatayenama tonjánmayeca. Chiyeca bënga montsobena chábeñe jt-sobátmanana sempre y nyetsca tescama, ndayá cha šochjátšatayama.

⁴ Ndayá bënga šochjátšataycá ndoñe quenátsmëna jëftsopochóca opodena soyënga, ndayá nyetsca tsabe soyënga. Y bënga mondobátmana jóyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiama cha yojtsinÿena.

⁵ Chë soyënga tsëngaftangbiama entsemna, Bëngbe Bëtsábeñe šmošbuáchema; cha chabe obenánaca cmondánÿena, tsëngaftanga játsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

⁶ Chiyeca tsëngaftanga tša oyejuayënga šmojtsemna, masque nderado jtseytana inÿe ora, nyetsca padecena soyënguñe jasúfriase chašmuachnënguama.

⁷ Mo chë castellanama jtsetatšëmbuama aiñe o ndoñe tsabe castellano tomnama iñiñe fjuchnëngcá, padecena soyënguñe tsabá chašmojachnënguse, Bëngbe Bëtsá echanjínÿanÿiye tsëngaftanga ndegombre taišmošbuáchema. Chë castellano pronto endbetsopochóca, masque chca, chana puerte endbetsámana. Y tsëngaftangbe ošbuáchiyana chë castellanama puerte más enduámana. Tsëngaftanga padecena soyënguentšana bëtš ošbuachiyánaca chašmojáboçnëse, Jesucristo chaojésabo ora, entšanga mochanjinÿe tsëngaftanga šmojtsomerecena chacmotsatacheuanama, más bëtšétsanga y obenënga chácmbiamama y uámanëngnaca.

⁸ Tsëngaftanga Jesucristo šmondobobonshana, y chábioye ndoñe chešmátaninÿe; masque mora cha ndoñe quešmatonÿá, tsëngaftanga chábeñe šmontsošbuaché, y šmontsebonna canÿe puerte tsabe oyejuayana, y ntsachetšá chana yomnana ndoñe quešmátobena jayanama, tša bëtscá causa.

9 Chca oyejuayana tsëngaftanga šmontsebmoma, er ndayá tsëngaftanga jtsošbuáchiyëse šmobatmancá, ya šmojtsošháchichana, chë Bëngbe Bëtsá tsëngaftanga jtsatsebacyana.

10 Bëngbe Bëtsabe juabna oyebuambnayënga ya imojanatsjendá y imojanguá jtsetatšëmbuama, ntšamo Bëngbe Bëtsá entsanga játsebacama, y tmojanoyebuambá ndayá Bëngbe Bëtsá tsëngaftanga jatšatayama, tsëngaftangbiana tsabe juabna cha yobómnayeca.

11 Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochñëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtsá bochjánbemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnama.

12 Pero tempo Bëngbe Bëtsá chëngbioye tojaninñanýé, chca jtsamana ndoñe cachëngbe tsábiana yonjamnama, ndayá chca jtsamana yojamna tsëngaftangbe tsábiana. Chënga tmojanoyebuambá, ntšamo chë tsabe noticiënga oyebuambnayënga tsëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tsabá jinýama, chënga chaósertama.

Bëngbe Bëtsá entsanga jtsachembuanana chabe entsangcá chamotsiyenama

13 Chíyeca, botamana jtsejuabnayëse tsabá jatrabájama, y cach tsëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjátšatayama tsëngaftangbe tsábiana jtsejuabnayëse, Jesucristo quem luaroye yochjésabo ora.

14 Tsëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tsëngaftangbe bacna juabnënga yomncá nýe tsabá jtsoññama, ntšamo Bëngbe Bëtsábioye cabá nduabatma ora šmonjanbomncá.

15 Chamna, šmochtsiyena mo chë Bëngbe Bëtsabe entsangcá, puerte tsabe entsangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna.

16 Er Bëngbe Bëtsabe uabemana palabrenguiñe mëntšá endayana: “Tsëngaftanga Bëngbe Bëtsabeñe uamanënga šmochtsemna, er atse uamaná sëndmëna ca.”

17 Tsëngaftanga Bëngbe Bëtsábioye šmondbuyana “Taita ca”, šmondbótsëmbona ora. Bëngbe Bëtsábiana nýetscanga cachcá mondmëna. Chíyeca, ntšamo nýetscanga tmojamama tsabá o ndoñe tsabá yontsemna ca cha yochjayana ora, cha chca echanjama nýe ntšamo chënga tmojamcá jtsonýayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nýetscangbiana más bëtsá yomnama, chë šmojtsama sóyeca chca jtsinñanýayëse.

18 Tsëngaftanga šmondétatšëmbo, Jesucristo, mo nda ínñengbioye játsebacama crocénana cuafjëtsajocá, tonjanóbana tsëngaftanga játsebacama, chë nýetsca soyënga nýe bonamente jtsamëse oyenentšana, ntšamo jtsiyenama tsëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jtsopochócama soyënga jëtsjájuase, mo crocénana o castellaná,

¹⁹ ndayá cachá jóbanëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canye ove-shatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaroca obaná.

²⁰ Chama Bëngbe Bëtsá Cristbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entšángbeñe tonjábocna tšëngaftangbe tšabiama.

²¹ Cristbeyeca, tšëngaftanga šmondosbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjánbema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

²² Tšëngaftanga šmojama ndocna bacna soyënga ainaniñe ntsebmnama, Jesucristbeyeca catšátangbioye ndegombre jtsababuánjeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nyets ainánaca nyetscanga šmochtsenbobonshana.

²³ Bëngbe Bëtsá tojama tšëngaftanga tsëm vida chašmotsebmnama; pero tšëngaftanga tsëm vida šmontsebmna, ndoñe nye quem luarentša entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebmnama y chë palabra ndocna te queochaisopochóca.

²⁴ Ntšamo Bëngbe Bëtsabe uabemana palabrënguiñe endayancá: Njyetsca entšanga mondmëna mo shacuanacá, y chënga imobomna tšabe soyënga, endmëna mo chë shacuanentša uantšefjushangacá.

Chë shácuaana jtsanctana y chë uantšefjushangá jtsatquécjanana; entšanga cachcá, nyets tempo quem luarentše ndoñe quemochátiyena;

²⁵ pero Bëngbe Bëtsabe palabra nyets tempo echanjesomñe ca –chiñe endayana.

Y chë palabra endmëna chë Jesucristbe tšabe noticiënga, chë buayenánana ntšamo ínÿenga tcmojabuayenacá.

2

¹ Chcáyecna, njyetsca tescama šmochtsajbaná njyetsca bacna soyënga amana, ínÿengbioye áingñayana, bacna entšanga chë ntšamo ndegombre šmojuabnacá ndinÿinÿnayënga ntsemnana, ínÿengbioye untšabošana, y ínÿengbiama uayátsenayana.

² Mo cabá mora onÿnana šešoncá, tša jtsebošana chabe mamabe létsiye, cachcá tšëngaftanga cmontsamna puerte jtsebošana nyets tempo Bëngbe Bëtsabe soyënga jtsebmnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsebmnama;

³ ntšamo Bëngbe Bëtsabe uabemana palabrënguiñe endayancá: “Tšëngaftanga šmojátatšëmbona Bëngbe Utabná puerte tšabia nyetscángaftaca yomnama ca.”

Cristo, chë mo aina ndëšbecá endmëná

⁴ Bëngbe Utabnábioye šmochtobeconá, nda endmëna mo canye aina ndëšbecá, ndëmuanÿëse tojtsama entšanga tšabe vida chamotsebmnama.

Báseftanga cha tmojtsaboté, mo ntšamo chë ndëtsbéngaca canye yebna tmojtsejebuana ora, luaroca tmojtsejajó ndëtsbecá; pero Bëngbe Bëtsá chábioye tbojuábuayana, y chabe bominiñe cha puerte uamaná endmëna.

⁵ Chábioye šmochtoconá, tšëngaftanga chë tšabe vida šmojóyëngacñënga, cányiñe mo aina ndëtsbéngcá, Bëngbe Bëtsabiana jajebuama canye yebnentsama chašmotsemnama; mo Bëngbe Bëtsabiana bachnangcá chašmotsemnama, nye Bëngbe Bëtsábioye jtseservénama jtsentsénëse, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinñanana, ndayá Jesucristo tojanmama.

⁶ Chca ndegombre endmëna, er Bëngbe Bëtsabe uabemana palabrënguñe, Bëngbe Bëtsá Jesucristbiana mëntšá tojánayana:

Smochjinñe, atše sënjama Jerusalenentše canya chaotsemna,

y cha endmëna mo chë canye yebna jajebuamentše chë más bëts uashacuanësentše jajona ndëtsbecá.

Cha atšbe Uabuayaná endmëna, y atšbiana puerte enduámama.

Nda chábeñe tojtsošbuaché, ndocna te nye bonamente chábeñe queochátobatmana ca.

⁷ Tšëngaftanga, chábeñe ošbuáchiyëngbiana, nda endmëna mo chë yebna jajebuamentše más bëts uashacuanësentše jajona ndëtsbecá, cha puerte enduámama; pero chábeñe ndošbuáchiyëngbiamna, entsopasana ntšamo Bëngbe Bëtsabe uabemana palabrënguñe Cristbiana endayanácá:

Chë yebna jebuanënga tmonsanaboté ndëtsbé,

mora chë más bëts uashacuanësentše entsejájona ca.

⁸ Inyoca, Bëngbe Bëtsabe uabemana palabrënguñe mëntšánaca chabiana endayana:

Cha endmëna mo ndëtsbé ndayentše jtsojestjiyamcá;

y mo peñëscá yomna chënga chamotsótsatsama ca.

Chënga Jesucristo jtsabotena, chabe buayenánana ndoñe ntjeyeunaycá; Bëngbe Bëtsá cabá chca ndopása ora tojanjubó chca chaotsemnama.

⁹ Pero tšëngaftanga šmondmëna Bëngbe Bëtsábeyeca bocacánënga, y mo canye rey tmojtseserverna bachnangcá, y šmondmëna Bëngbe Bëtsabe entsanga nye chabiana jtsetrabájayama, y chë nye Bëngbe Bëtsábënga šmommënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayinama. Cha endmëna nda tcmojáchembo chašmotsajbanama oyanana mo ndoñe binñiñcá jtsejubnayëse y jtsamëse, cháftaca jtsemnama chašmotsobenama, chë tšëngaftangbe juabnënga puerte binñayáftaca.

¹⁰ Tempo tšëngaftanga ni mo cányëntša entsangcá ndoñe quešmënjatsmëna, nye ujquëshenënga; pero mora, Bëngbe Bëtsabe entsanga šmontsemna; tempo šmonjamna entsanga ndocná tonjánalastemanga, pero mora, Bëngbe Bëtsá aiñe lastemado tšëngaftangaftaca entsemna.

Bëngbe Bëtsá jtseservénama jtsiyenana

¹¹ Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo inyoicana ashjajnëngcá, y mo canye luarëjana nye achñëjuanëngcá, cach tšëngaftangbe luaroye átayiñe. Chíyeca cbontsaïmpadana, ndoñe chašmondëtsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe

jtsepenzétsiyana, chentše jtsemándayama y Uámana Espiritu ndoñe chaondětsemándama.

¹² Chê Bèngbe Bètsábioye nduabuatoméngbeñe sempre smochtsiyena tšabá jtsamése; chca chēnga, masque mora tšēngaftangbe contra imojtsoyebuamná, tšēngaftanga mo bacá uamana entšanga cuaftsemnēngcá, chē tšabe soyēnga ntšamo tšēngaftanga šmojtsamcá chamuñyama, y chca, Bèngbe Bètsá chēngbioye chaojenonjinyé te, chábioye chēnga chamotsatschuanama.

¹³ Bèngbe Bètsá šmoyeunanama, nýetsca entšanga mando bomnēngbioye smochtsobedecena; chē Romoca bēts mandádbioye, cha chē quem luarentša más uámana puesto jtsemándayama endbómnyeca;

¹⁴ y chē tšēngaftangbeñe mandadēngbióynaca, ndēmuanýenga cha jíchamuana chē bacna soyēnga amēnga jácastigama, y chē tšabe soyēnga amēngbiama tšabá imojtsama ca chamuayanama.

¹⁵ Chē mando bomnēngbioye smochtsobedecena, er Bèngbe Bètsá endboše tšēngaftanga tšabe soyēnga chašmotsamama, chca, chē ndosertánēnga chē tšēngaftangbiama podesca ichámēnga, ntšamo ndegombre yomncá ntsetatšēmbcá, tondaye chamondětsebomna tšēngaftangbe contra jayanama.

¹⁶ Smochtsiyena tšabá jtsamése, mo chē ya ndoñe más bacna soyēngaca y bacna juabnēngaca ndēmandanēngcá; pero chca šmojtsemnana ndoñe šmattsejuabnaye nýe ndaye bacna soye jamama šmojtsobena ca, y nýe chca smochjátama. Más tšabá endmēna jtsiyenana, mo chē Bèngbe Bètsá imoservenēngcá.

¹⁷ Nýetscangbiama respeto smochtsebomna, chē Jesucristbeyeca catšátangbioye smochtsababuánjeshana, sempre smochtsiyena Bèngbe Bètsabiama jtsejuabnayése cha chē más bētsá yomnana, y chē Romoca bēts mandado smochtserrespetana.

Cristo chabe entšanga tojinjanýé ntšamo yomna jasúfriana

¹⁸ Tšēngaftanga, chē nýets tempo inýabiama canýe yebnentše oservénēnga, tšēngaftangbe nduiñēngbioye smochtsayaunana, puerte respeto chēngbiama jtsebomnése; y ndoñe nýe chē tšábēngbioye y nýe tšabá mandbomnēngbioye, ndayá chē bacá mandbomnēngbióynaca.

¹⁹ Nderado nda, ntšamo Bèngbe Bètsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmēna, chca jamése, Bèngbe Bètsá corente tšabá jtsinýanana.

²⁰ Er nderado tcmojtsacastigá ndaye bacna soye šmojama causa, y chora tša uantadēnga chiñe šmojachnēngo, chē soye ndoñe yapa ntšámanana. Pero tšabe soyēnga šmojtsama y chē causa šmojtsesufrina, y tša uantadēnga chiñe šmojachnēngo, chē soye cocayé Bèngbe Bètsá corente tšabá jtsinýanana.

²¹ Chca cmontsamna, er Bèngbe Bètsá tcmojánachembo tšabe soyēnga jamama y chca jasúfriama; chca ndegombre endmēna, er Cristo tšēngaftangbiama tonjansufrí, y chca cha tcmonjaninýanýé, ntšamo jamama cmojtsamna, tšēngaftanga chca chašmotsamama.

²² Cristo ndocna te ndocna bacna soye chenáisema, ni ndocnábioye chebnaiseingñé.

²³ Chábioye tmojtsoyenguá ora, chēngbioye ndoñe ntēyánguanguana. Cha chaosufrima tmonjanma ora, cha ndocá ntjatětšetsnayana jaútatjayama, ndayá Bèngbe Bètsábeñe jtošbuáchiyése, chábeñe yojanobátmana. Bèngbe Bètsá

ntšamo nyetscanga tmojamama tšabá o ndoñe tšabá yonjamna ca yochjayana ora, chca echanjama nýe ntšamo chénga tmojamcá jtsonýayése.

²⁴ Cristo cruciñe tonjanóbana ora, cha tonjansufrí chë castigo, chë bēngbe bacna soyēngama cach bēnga šojánamna jasúfriama castigo, bēnga chë bacna soyēnga jamama juabnēngaca ndoñe más mandánēnga chamondētsemnana, y bēnga ntšamo Bēngbe Bētsabe bominyíñe tšabá yomncá jtsamēse chamotsiyenama. Er Crístbioye chēnga tmonjanlisiá chaóbanama y tonjansufrí jobanēntscuana, y chca, bēnga šonjanatsebacá.

²⁵ Er tsēngaftanga, tempo Bēngbe Bētsábentšana bēnoca šmonjamna, mo ótsena oveshēngcá; pero mora Cristbe benache šmojtishache, y cha cmontsanýena, mo oveshēngbe canýe abujājēnyácá, y cha entsantješna tsēngaftanga tšabá chašmotsemnana.

3

Ntšamo iuamna chë bouamnēngbioye jtsiyenana

¹ Cachcá mo chë oservenēngcá, tsēngaftángnaca shémanga, tsēngaftangbe boyángbioye šmochtsayaunana, chca, chë Bēngbe Bētsabe buayenana soyēnguiñe ndošbuáchiye boyángbioye chašmobená jáyējanama, Jesucristbeñe chamotšošbuáchema, ntšamo tsēngaftanga šmojtsiyenama. Ndoñe queochátsiyta chë buayenánama chēnga jatētsētsnayana,

² er chēnga mochanjinýe tsēngaftanga šmojtsiyena, Bēngbe Bētsá nyētsangbiana más bētsá yomnana sempre jtsejuabnayése, y ntšamo šmojtsamcá chca yojtsinýinýnáyeca.

³ Cach tsēngaftangbiana ndoñe mēntšá šmattsejuabnaye: “Entšanga atše botamaná tsmēna ca chamotsejuabnana atše nýa mo chca chantenochquēca, chantenóbotamaye ba castellano soyēngaca o ba uámana entšayangá chantichētjo ca”;

⁴ ndayá chca chaotsemna, ntšamo tsēngaftanga chë Uámana Espíritbeyeca mandánēnga jtsemnēse ainaniñe šmojuabnana, cmēbionama y šmobošama; ndocna te ndopochócaye botamanana jtsebojnana, ainaniñe nýe cach tsēngaftanga uámanēnga jenobiamama juabnēnga ntsebojnncá, pero añe ainaniñe tšabe ebionana jtsebojnēse. Chë soyēnga Bēngbe Bētsabe bominyíñe puerte enduámana.

⁵ Tempo chca, chë puerte tšabe shembásenga, chë Bēngbe Bētsabe bocacanēnguentšēnga, imojanamana jtenóbotamayana; chēnga Bēngbe Bētsabeñe imojtsanošbuaché y chábeñe imojanobátmana, y nyētscanga chēngbe boyángbioye imojánayaunana.

⁶ Chca yojamna Sara, Abrahámbioye ibnayeunana y chábioye “Taita ca” ibojanábobuatma. Tsēngaftanga Sarabe bembangcá jtsemnana, tšabe soyēnga šmojtsamēse, y tondayama uatjana šmontsebojnēse.

⁷ Cachcá, tsēngaftanga boyanga, cada ona cachabe shémaftaca chaotsiyena, tšabá jtšenēyeunanēse, y cha respeto buajoná chaotsemnana jtsamēse; pero chca, ndoñe nýe cha acbiana más batšá obenana bomná bētsemnana, ndayá Bēngbe Bētsá chabiana tšabe juabna yobómnyayeca, ntšamo cach aca tšabe vida tmojašbuachenacá chábioynaca tbojašbuáchenama. Chca šmochtsama, Bēngbe Bētsáftaca jencuéntama totcá chaondētsemnana.

Chë tšabe soyēnga amama jasúfriama yojtsamnēnga

8 Y morna, n̄yetsca t̄šēngaftanga cachcá šmochtsejuabnaye, ín̄yenga šmochtsalastemana, chē Jesucristbeyeca catšátangbioye šmochtsababuán̄yeshana, ín̄yengbiana chacmóngmiaye, y cada ona chaotsejuabná chē ín̄yenga chabiana más uámanēnga imomna ca.

9 In̄yenga t̄šēngaftangbiana nt̄šamo tcmojaborlá ora, ndoñe šmat̄tēchenanguaye; n̄i chacmojt̄s̄yanguá ora, chēngbioye ndoñe šmattoyánguango. Chca játamama cuentna, Bēngbe Bētsá šmochjaimpáda, chēngbeñe t̄šabe bendicionēnga chaotsemnama cha chaomama, er Bēngbe Bētsá tcmojáchembo chca chašmotsamama, y Bēngbe Bētsábíocana t̄šabe bendicionēnga chašmosháchiñama.

10 Nt̄šamo Bēngbe Bētsabe uabemana palabreñguiñe endayancá: Nda toboše t̄šabe vida jēttsebonnama y puerte oyejuayá tempēnga jtsebonnama, yejuana chaochtsenojuabná bacna soyēngama ndoñe chaondētsóyebuambnama, y ndoñe chaondētsebosterama.

11 Bacna soyēnguentšana chaotsojuánañe y t̄šabe soyēnga chaotsama, natjēmbana n̄yetscángaftaca jtsiyenama chaotseboše, y chca chaotsemnama sempre chaotsentšena.

12 Chca bontsemna jamana, er Bēngbe Utabná, chabe bominyiñe t̄šabe soyēnga amēngbioye jtsanyenana, chēngbiana sempre jtsantješnēse; y sempre chēngbioye jtsayaunanana, chábioye ndayámnaca tmojtsotjanañe ora; pero chē bacna soyēnga jamana uamanēngbe contra cha jtsemnana ca — chiñe endayana.

13 ¿Nda nanjobenaye t̄šēngaftangbiana bacna soyēnga jamama, t̄šēngaftanga chē t̄šabe soyēnga jamama sempre šmojtsentšēnēse?

14 Pero masque t̄šēngaftanga cmojtsamna jasúfriama t̄šabe soyēnga šmojtsamama, Bēngbe Bētsá chama t̄šabe soyēnga cmochántatšataye. Chē t̄šēngaftanga chašmosufrima amēngbiana ndoñe matauatjēngana, n̄i ainana tsetšenánēnga ndoñe matsmēnēngana,

15 ndayá ainaniñe sempre šmochtsejuabnaye Cristbiana mo Bēngbe Utabná y chabiana respeto šmochtsebonna; y sempre šmochtseprontana jojuama ndēmuan̄yenga tcmojtsatjaná ndáyeca t̄šēngaftanga Bēngbe Bētsábeñe jtsošbuáchiyēse, chabiana ainaniñe šmobátmanama.

16 Pero chca šmochjama t̄šabe ainánaca jtsēn̄yayēse y Bēngbe Bētsabiana respeto jtsebonnēse. Smochtsiyena t̄šabá jtsamēse, y chama ainaniñe ndoñe chašmondētsebonna juabnēnga y chamuayana chca ndegombre ndoñe t̄šabá šmontsana ca, chca, ín̄yenga t̄šēngaftangbiana podesa chamojtsoyebuambná ora, t̄šēngaftanga Cristbeñe ošbuáchiyēnga quetsomñecá t̄šabe soyēnga šmojtsamama, chēnga chamotsēuatja chca tmojtsóyebuambnama.

17 Más t̄šabá endmēna jasúfriana t̄šabe soyēnga tcojamama, nderado Bēngbe Bētsá chca chaotsemnama tojtsebošēse, y ndoñe chē jasúfriana ndaye bacna soye tcojamama.

18 Er Cristo n̄ye can̄ye tonjanóbana bēnga bacna soyēngama jáperdonama; chē n̄yetsca soyēnguiñe t̄šabá amá, chē Bēngbe Bētsabe bominyiñe ndoñe t̄šabá yondmēna soyēnga amēngbiana, t̄šēngaftanga Bēngbe Bētsáftaca chašmotsatsmēnama. Entšacá, Cristo tonjanóbana, pero Bēngbe Bētsá tonjanma, cha cachiñe vida chabe espiritiñe chaotsatsbonnama.

19 Pero Cristo cháuatayenama Bëngbe Bëtsá cabá ndëma ora, chabe espírituñe cha tojána chë ndoñe tsabe entsanga imonjamnëngbe espírituñga utámenënga imojamnoye, chëngbiama castigo tojtsemnëntscuana; y cha tojanayénjanama chënga tojanabuayená.

20 Quem espírituñga bayté entsemna, Bëngbe Bëtsábioye ndoñe monjánëyeunana, Noebe yojéftsiyena ora, chë bacna soyënga amënga chca amama chamotsajbanama y tsabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentšana chë barquëshañe báseftanga tmojanotsbocá, posufta entsanga, búyeshe juatsbuacá chë barquësha yojtsámmayeca.

21 Chë chënga chamótsbocama tojanéjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiama, ndayá bëngbe ainaniñe ndocna bacna juabnënga ntsebomnama Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca.

22 Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiama y espírituñga mando y obenana bomnëngbiama.

4

Entsanga entsamna jtsiyenana ntšamo Bëngbe Bëtsá yobošcá

1 Chcasna, ntšamo Cristo tojansufricá, chabe cuerpiñe mo entsacá játsetšenëse, tsëngaftangnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe,

2 chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nÿe entsangbe bacna juabnëngaca, nÿe quem luarentše tsabá jëftsemnana.

3 Tempo, bayté enjamna, ndayëntscuana tsëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tsëngaftanga šmonjaniyena nÿetsca bacna soyënga jtsamëse, jenomándama ntsobencá; tsëngaftanga šmonjánama soyënga nÿe ntšamo šmojanbošcá, nÿe tsëngaftanga tsabá jtšomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórana.

4 Morna, chë Bëngbe Bëtsábioye nduabuátmënga montsenjananá, tsëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntsobencá; y chë causa, chënga bacna soyënga tsëngaftangbiama jtsóyebuambnayana.

5 Pero chënga echanjótocaye jayanama ndáyeca chca tmojamama, chë entsangbiama, chë ainënga y chë ya mojhóbanëngbiama, ntšamo tmojamama, añe o ndoñe tsabá bëtsemnana jayanama entseprontanabe delante.

6 Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿenga chë tsabe noticiëngama chëngbioye monjanabuayiyiná, chënga chamobenama chë nÿetsca tescama yomna tsabe vida

chëngbe espíritoftaca jtsebomnana, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nyetsca entsanga yojsamna jóbanama ca.

⁷ Ndoñe bayté y nyetsca soyënga echanjopochóca. Chíyeca, tsëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuéntama chašmotsobenama.

⁸ Nyetsca soyëngama, masna, sempre nyetscanga puerte šmochtsenbobonshana, er nda ínÿenga puerte tojtsababuanÿeshaná, sempre jtseprontánana ínÿenga jáperdonama, chëngbiama bacna soyënga tmojamama.

⁹ Nyetscanga šmochtsamana tsëngaftangbe yebniñe jenofjana, chca jamama totcá yojtsemna ntjatichamcá.

¹⁰ Nyetsca tsëngaftanga Bëngbe Bëtsá tcmojatšatá obenana tsabe soyënga jamama; chca, chë obenánaca cmontsamna jtsamana soyënga chë ínÿengbe tsabiama, chë Bëngbe Bëtsá cmojatšatá nyets obenánaca ínÿengbioye jubabuáchama, nyets tempo tsabe soyënga jtsamëse.

¹¹ Nda tojtsabuayiná, Bëngbe Bëtsabe palabra chaotsabuayiná mo Bëngbe Bëtsá chabijana cuaftsoyebuambnacá; nda ínÿenga tojtsaservena, chca chaotsama chë Bëngbe Bëtsá yojsama cha chaotsebomnana obenánaca. Nyetsca soyënga ntšamo šmojtsamcá chaotsinÿanÿná Bëngbe Bëtsá puerte uamaná y obená bëtsemnana, Jesucristbeyeca. Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

Puerte tsabá endmëna, Crístbeñe tcošbuáchema, jasúfriama tbojtsemnëse

¹² Atšbe bonshana entsanga, ndoñe šmattsenjnanaye padecena soyënguiñe šmojtseufrinana; chiñe jtsinÿnana ntsachetšá ošbuáchiyana šmobomnana. Chca ora ndoñe šmatsejuabnaye, tsëngaftanga ndoñe cmondamna chca soyiñe jtsachñëjuanana ca;

¹³ chamna, šmochjóyejuaye chë ntšamo Cristo tojansufricá šmojtseufrina ora, chca, Cristo corente obenánaca y uamanacá entsángbeñe chaojtonÿná te, tsëngaftanga puerte chašmotsóyejuama.

¹⁴ Puerte šmochtsóyejuaye, nderado nda tcmojoyánguango Crístbiama bëtsosevenayeca, er Bëngbe Bëtsabe Espíritu, chë corente bëtšá endmëná, sempre tsëngaftangbe ainaniñe iuëtsemna.

¹⁵ Tsëngaftanguentše ndocná chabondëtsemna jasúfriama inÿa óbanaye causa, atbëbanama, bacna soyënga ínÿengbiama amama, o ínÿengbe soyënguiñe ontremetënama.

¹⁶ Pero Crístbe ustoná tomnana tojasufrí, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Crístbe ustoná bëtsemnana.

¹⁷ Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiama, chabe entsangbiama, tsabá o ndoñe tsabá tmonjamama. Cha chca bëngbiama jayanama tojontsese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiama chca chaojayana ora.

¹⁸ Y chca, chë Bëngbe Bëtsabe bominÿiñe tsabá amabiama ndoñe paselo atsbocaná jtsemnana tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca?

¹⁹ Chcasna, chë imosufrínëngaftaca Bëngbe Bëtsá chca yobóseyeca, entsamna chë tsabe soyënga jtsamana y Bëngbe Bëtsabe cucuatšifne chëngbe

espíritu chamoboshjona cha chaotsinjenama, er cha chënga tojánabiamá, y nyetsca soyënguiñe tšabe palabra bomná cha endmëna.

5

Cristbeñe ošbuáchiyënga jábuayenama

1 Y mora, chë tšëngaftangbentše ošbuachiyëngcá enefjuanëngbeñe bëtsëjemëngcá amëndayënga chanjabuayená, atše cach tšëngaftangcá bëtsëjema, canya ntšamo Cristo tonjansufricá tonjaninýa y chama inyënga tonjanëyana, y canya ndábioye cach tšëngaftangcá Bëngbe Bëtsá bochjábema más uámana y bëtsá, Cristo entšángbeñe chaojtonýná ora; tšëngaftanga cbabuayená.

2 Ošbuáchiyënga šmochtsanýena; chënga chašotsanýenama Bëngbe Bëtsá chca tcmojábiamá. Chca, chentša ošbuachiyëngbeñe šmochtsama ntšamo canye tšabe abuañëña chabe oveshëngaftaca endbetsamcá. Bëngbe Bëtsabe trabajo ndoñe šmattsama, nye cmojtsétocanama, ndayá chca jamama šmojtsebóseyeca. Chca ndoñe šmatjama nye paselo crocénana juácanama, ndayá inyëngbioye jujabuáchama tša šmobóseyeca.

3 Chë cmojtsamna jtsanýenama ošbuáchiyënga ndoñe nye bëtscá šmattsamëndaye, mo chëngbe nduiñënga cuafjatsmënëngcá, ndayá ntšamo tšëngaftanga šmojtsiyenama, chënga šmochjínyanýiye ntšamo yojtsamna jtsiyenana.

4 Chca, chë bënga nyetscanga, mo chë tšabe abuañëñacá suanýená, quem luaroye yochjésabo ora, mo canye uabuashinýinýana coronëshana ndocna te tontsandbemëshacá, tšëngaftanga canye bëts uacanana soye šmochanjóyëngacñe, y chë soye endmëna nyetsca tescama; Bëngbe Bëtsá uámanënga y bëtsëtsanga cmochanjábiamá, cháftaca nyets tempo oyejuayënga jtsemnëse.

5 Cachcá, tšëngaftanga chë bobontsëngnaca cbabuayená, sempre šmochtsejuabnaye chë bëtsëjemënga tšëngaftangbe amëndayënga imomnana, y chca šmochtsama. Cada ona tšëngaftanguentsá bontsemna jtsejuabnayana chë inyënga tšëngaftangbiamá más uámanënga cuaftsemncá, inyëngbioye šmojtsaserverna ora; er ntšamo Bëngbe Bëtsabe uabemana palabrënguiñe endayancá:

Bëngbe Bëtsá chë nye cachënga uámanënga tmojtsenobiamnangbe contra entsemna,

y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmna ca.

6 Sempre šmochtsejuabnaye Bëngbe Bëtsá chë más bëtsá nyetscangbiamá yomnana, y nyets mando y obenana bomná yomnana, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora.

7 Nyetsca soyënga ndayama šmuenócochinýenama Bëngbe Bëtsabe cucuatšinë šmochjáboshjona, er cha tšëngaftanga yejuana cmondánýena.

8 Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canye león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama.

⁹ Puerte šmochtomorócha, Jesucristbeñe bětscá jtsošbuáchiyěse, chě uayayá tondaye chaondobená tšěngaftangaftaca jamama, cach tšěngaftangcá Jesucristbeñe ošbuáchiyěnga nýets luarěnguenache cachcá jasúfriama yojtsamnama jtstatšěmběse.

¹⁰ Pero tšěngaftanga baseftayté chašmojasufří chentšana, Běngbe Bětšá cmochanjábíama nýetsca soyěnguiñe puerte tšábenga, puerte chašmotsemorochama, bětscá ošbuáchiyana y bonshánana bomněnga jtsemněse, y ainaniñe corente añemo bomněnga chašmotsemnama; Běngbe Bětšá, chě běngbiama tšabe juabna bomná, běnga nýetsca tšabe soyěnga šonjatšatá, y nda běnga šojáchembo nýetsca tescama bětšětsanga jtsemnama, chca echanjama.

¹¹ Cha nýets obenana nýets tempo y nýetsca tescama chaotsebomna. Chca chaotsemna.

Jtadiósoftanama

¹² Silvano, ndabiama sěndějuabná atšbiama canye tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábíama. Atše sěntseboše tšěngaftanga añemo jatšatayana y jáuyanana, ndegombre ntšamo tcbonjubuabíamcá yojtsoyebuambná ntšamo Běngbe Bětšá tšabe bendicioněnga cmatsatnama. Chíyeca, sempre šmochjěftsiyena jtšaměse ntšamo chabe tšabe juabna tšěngaftangbiama yomncá.

¹³ Ošbuáchiyěnga muentše átšeftaca montsemněnga cmontsacheuaná. Chěnga quem bětš pueblentše mondoyena bacá uamana entšángaftaca, mo chě tempo, Babilonia bětš pueblaca imojoyena entšangcá, pero Běngbe Bětšá muentša ošbuáchiyěnga tojabacacá cach tšěngaftangbioycá. Marcos, chě atšbiama mo uaquiñacá endměná, chánaca cmontsacheuaná.

¹⁴ Nýetscanga Jesucristbeyeca catšatangcá šmochjenchuae, jtenámochěse tša šmojtšenbobonshánama.

Atše, Běngbe Bětšá sěntseimpadana cha chaoma tšěngaftanga chě Jesucristoftaca cányiñe mo canyěcá šmogněnga, nýetscanga ainaniñe tšabe ebionana chašmotsebomnama.

2 San Pedro

Jacheuayama

1 Atše Simón Pedro, Jesucristbe oservená y chabe ichmoná, quem tsuanácha sěntsabiamná tšěngaftangbiama, ndēmuanŷenga šmojashjache jtsebomnama canŷe ošbuáchiyana Jesucristbeñe, cach bēngbe ošbuachiyancá uámanana, er Bēngbe Bětsá y Atsebacyá Jesucristo, jtsebošana ndánaca y nŷetscanga chábeñe chamotsošbuáchemá.

2 Atše sěntseimpadana, tšěngaftanga Bēngbe Bětsabiama y Bēngbe Utabná Jesusbiamá cada te más jtsetatšěmběse, Bēngbe Bětsá chaoma tšabe ben-dicionēnga tšěngaftangbeñe chaotsemnnama y chaoma tšěngaftanga ainaniñe tšabe ebionana chašmotsebomnama.

Chē Jesucristbeñe ošbuáchiyēngbe tšabe soyēnga

3 Bēngbe Bětsá chabe obenánaca tojama bēnga chamobená jtsebomnama, lempe ntšamo tmojtšějbotcá tšabe vida jtsebomnama y jtšiyenama, Bēngbe Bětsá jadórama soyēnga jtšaměse. Cha chca tojama bēnga chábiyoe chamotšábuatmama tojanma ora. Cha bēnga šojáchembo, cachá obená y uamaná bětsemnnama y běts soyēnga jaměse, chabe entšanga chamotsemnnama.

4 Chca, Bēngbe Bětsá šojatšatá ntšamo bēnga jatšatayama tojanašebuachenacá, běts y uámana soyēnga, chca, quem luarentša bacna soyēnguentšana chašmotsojuánañama. Chē bacna soyēnga quem luarentše jtsebínŷnana, entšanga nŷe cachēngbe bacna juabnēngaca jtšiyenama yapa boše causa. Chánaca chē tšabe soyēnga šojatšatá, tšěngaftanga cháftaca cánŷiñe mo canŷacá chašmotsemnnama, cachacá jtsemnnama jashjáchěse.

5 Chca, ndoñe quenátsměna nŷe Jesucristbeñe ošbuáchiyana jtsebomnana; chiñe šmochjenobuáshjache, bětscá tšabe soyēnga jtšaměse; chora bětscá šmochtsama Bēngbe Bětsabe soyēngama chacmotsěsertánama;

6 chora bětscá šmochtsama cach tšěngaftanga jenomándama chašmotsobenama; y chca, tšěngaftanga masque padecena soyēnguñe chašmojtšachnējuana, ainaniñe puerte añemo jtsebomnēse, puerte uantadēnga chašmotsemnnama; y chentšana bětscá šmochtsama, tšěngaftanga Bēngbe Bětsá šmojtšadoránama jinŷanŷiyama; y

7 chca, nŷetsca tšěngaftanga ošbuáchiyēnga chašmotsenbobonshana; y chca, nŷetsca entšanga chašmotsababuánŷeshana.

8 Tšěngaftanga lempe chē soyēnga šmojtsebomna, y bětscá chca šmojtšaměse, šmochantsiyena becá oservena soyēnga jtšaměse, y chentšana puerte tšabe soyēnga echantsóbocana, corente tšabá Bēngbe Utabná Jesucristo chašmotsábuatmama.

9 Pero nda quem soyēnga ndoñe tontsama, Bēngbe Bětsabe soyēngama ndoñe ntosertánana; y chca, cha mo canŷe jtaná o nduabinŷnacá jtsemnana; cha tbojtsebnatjěmba Bēngbe Bětsá chabe tempsca bacna soyēnga tbojtsebojuána, y Bēngbe Bětsabe delante cachiñe tšabá chaotsatsměnama tojamama.

10 Chíyeca, Jesucristbeyeca atšbe catsátanga, nŷa šmochtsentšena chca tšabe soyēnga jtšamama, y chca, corente tšabá šmochanjátatšěmbona, Bēngbe Bětsá chabe entšanga chašmotsemnnama tcmojáchembuama y tcmojábacacama; y chca jtšaměse, Jesucristbeñe ošbuáchiyana ndocna te quešmochatajbaná.

11 Chca, Bëngbe Bëtsá oyejuayá tšëngaftangbiamama echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

12 Chcáyecna, atše sëntsejuabná tšëngaftangbiyoye sempre chë soyëngama jtsabuayinyayana, masque chë soyëngama ya šmotátšëmbo, y tša šmojšošbuaché Bëngbe Bëtsabe ndegombre soyënguife y chca šmojšiyena, chë mora šmojšetátšëmbo soyënguife.

13 Sëntsejuabná, chajjéftsainëntscuana tšabá yojtsemna jamana, ainaniñe bëtscá añemo chašmotsebonnama chë soyënga jtsamama, ntšamo tijayancá jtsabuayinyayese.

14 Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjëftsanbuayenacá;

15 pero bëtscá chanjëftsema, atše chajjóbana chentšánënaca tšëngaftanga nyets tempo chë soyëngama chašmotsenójuabnama.

Cristo corente uamaná y obená yojannama tmojáninye ora

16 Bëngbe Utabnabe obenanama y cha yochjésabama ntšamo tchbonjanabatambacá, ndoñe quenjatsmëna entsangbe osertanánaca pormana cuentëngaca, er cach bënga botamana fsënjáninye chabe uámanana y obenana.

17 Bëngbe Bëtsá chë Taitá, Jesucristo puerte obenana bomná bëtsemnama y cha corente bëtscá y uamaná bëtsemnama tonjaninýinye ora, bënga fsënjáninye. Chca fsënjáninye Bëngbe Bëtsá, chë puerte uámana y bëtscábíocana oyebuambnayana Jesúsbioye mëntšá tbonjanianyana ora: “Mua atšbe bonshana Uaquiñá endmëna, atše chabiamama sëntsoyejuá ca.”

18 Cach bënga chë oyebuambnayana fsënjanuena, chë celocana tonjanóbocnana, er bënga Bëngbe Utabnáftaca fsënjannmëna, chë uámana tjoca.

19 Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabréngaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canye uajuinýanësha canye ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjínýanýiye, mo tšëngaftangbiamama canye tsëm te cuafjabinýncá, y chë jabinýnama ora bínýnaye estrella tojábocna tšëngaftanga jabuabinýnamcá.

20 Pero natsana chacmësertá, ndocna palabra Bëngbe Bëtsabe uabemana palabrénguife tojayana canye soye yochjopása ca, cabá chca ndopása ora, nye cach Bëngbe Bëtsabe juabna oyebuambnayëngbe juabnentšana tonjanóbocnana;

21 er Bëngbe Bëtsabe juabna oyebuambnayënga ndoñe monjanoyebuambná nye chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espiritu chënga chca chamóyeuambama tojánmayeca.

2

*Chë ndoñe ndegombre soyënga buátëmbayënga
(Jud 4-13)*

1 Chë Bëngbe Bëtsabe juabna oyebuambnayëngbe tempo, Israeloca entsángbeñe baseftángnaca imojamna, ndëmuanyënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tsëngaftangbeñe abuatambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cán'yíñe, chca, chënga chca imojtsabuátambama entsanga ndoñe chamondétatsëmbonama. Chë buatëmbana soyënga echanjama, entsanga ndoñe ndegombre soyënga y bacna soyënga chamotsamama. Ntsamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnana, cha nda chënga tojatsëbacá, mo nda ín'yënga játsëbacama crocénana cuafjëtšajocá. Y chca, n'ye ndeolpe, chë Bëngbe Bëtsábíocana uabouana castigo n'yetsca tescama mochántsebonna.

2 Banga chëngbioye mochantsësetona, n'yetscna bacna soye, jenomándama ntsobencá jtsamëse; y chëngbe causa, ín'yënga ndoñe tsabá quemochátoyebuambnaye chë tsabe benachama, chë ndegombre soyëngaca benache jtishachama.

3 Chënga bëtscá crocénana jtsebonnana yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tsabá imojtsamama y chëngbiana castigo n'yetsca tescama chaotsemnánaca.

4 Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infernoye tojtsanatsatše y puerte ibetiñe tojtsanabáshejuana, chë uabouana tboca chamoquedama, Bëngbe Bëtsá chëngbiana n'yetsca tescama castigo chamotsebonnana yochjayana orscama.

5 Y cach ndoñe quem luarentša entsángbioye tonjanaperdoná Noé yojëtšiyena ora, y chënga jácastigama aíñe tojanma chë uabouana uafena chëngbeñe chaotsemnana, chë nduauenana y bacna entsanga jtsapochócama. Chentsana, n'ye Noébioye, tbojanatsbocá, nda entsanga yojanabuayíyná ntsamo jtsiyenana, Bëngbe Bëtsabe bominyíñe tsabá yomncá jtsamëse; cha y in'ye can'yëftangnaca tojanatsebacá.

6 Bayté entsemna, Bëngbe Bëtsánaca tojánayana chë Sodoma y Gomorra bëtš pueblentša entsanga, yapa bacna entsanga imojamnama, bëtš castigo jtsebonnana yojánamnama; y íñeshëca tojtsanapochocá, chë pueblënga y chentša entsanga jatinyá jtsabiamëntscuana. Y chë sóyeca Bëngbe Bëtsá tojaninyän'yé ntsamo bacna entsángaftaca yochjama, chë chentšana mochtsiyena bacna entsangbiana.

7 Pero Bëngbe Bëtsá Lótbioye tbojanatsbocá, chë bëtš pueblënga pochócyentšana. Cha yojamna Bëngbe Bëtsabe bominyíñe tsabá amá, y ntsamo chë luarentša entsanga imojaniyenama, n'yetscna bacna soye jtsamëse, jenomándama ntsobencá, cha puerte ngménana inabomna.

8 Er quem tsabe entsá, chëngbeñe oyená, chë entsanga imojtsama bacna soyënga cada te yojanon'yaye y yojanuenana ora, puerte chabe tsabe ainaniñe inasufrina.

9 Chca, Bëngbe Utabná endobena chë Bëngbe Bëtsábíoye adórayënga játsëbacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntsamo chënga imojaniyenëntscuana imojanamcá ndoñe

tšabá yonjamna ca Bëngbe Bëtsá yochjayana tescama, y chënga nyetsca tescama chë bëts castigo chamotsebomnama jamándama.

¹⁰ Chca ndegombre endmëna, y más chë ndëmuanyënga nÿe cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana. Chënga bacá buátseanënga mondmëna y jtsebošana nÿe ntšamo cachënga tmojtsejuabnacá chaotsemnama, y ndoñe ntsauatjana chë espíritënga obenana bomnëngbiana puerte bacna soyënga jtsóyebuambnayama.

¹¹ Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiana chca jayanama, chëngbiana ndoñe tšabe soyënga jtsóyebuambnayëse, Bëngbe Utabnabe delante.

¹² Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga chëngamondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

¹³ Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangftaca cánÿiñe mo ošbuachiyëngcá tmojttesá ora, tšëngaftangbiana ouatjá jtsemnana y chëngbe causa, ínÿenga tšëngaftangbiana podësca mochántschamo, er chënga chentse oyejuayënga jtsemnana, nÿe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtšaíngñase.

¹⁴ Chënga ndoñe ntsoobenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batsá ošbuáchiyana bomnënga jtšaíngñayana, y siempre jtsentšénana nÿe más soyënga jésebošama y jésebomnama, ínÿenga tmobomnama más soyënga jashjáchama; chënga montsemna pochocánënga jtsemnana.

¹⁵ Chënga chë tšabe benachentsana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyeambuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juácánama ínÿengbiana bacna soyënga jtsamëse;

¹⁶ y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

¹⁷ Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntsošervënana, y chca, chënga jtsemnana mo búyeshe obocantse tojtsebuashjácá; y chënga mora canÿe soye jtsejuabnayana y chentšana ínÿetsá; chca chënga jtsemnana mo jantšetëshënga bëts binÿiaca bonjnëshëngcá. Chëngbiana Bëngbe Bëtsá tojayana castigo chamotsebomnama, chë más ibetoca, tondaye binÿiñe luarentse.

¹⁸ Chënga ba botamana palabréngaca jtšenábotamayana, pero tondayama ntsošervënana; y chë cabá mora Jesucristbeñe tmojtsošbuachëngbioye jtšaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë

soye jtsamana, chëngbioye jáyëjanase, nÿe cachënga tšabá jtsomñama bacna juabnëngaca soyënga chamotsamama, cachënga jenomándama ntosobená.

¹⁹ Chë abuatambayënga jašebuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nÿets tempo tobedecena sóyeca.

²⁰ Er ndëmuanyënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana.

²¹ Chëngbiamá más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominiñe tšabá yomncá inétsamama, chë soye jatabuátmanana y chentšana játajbanana chë buatëmbana soyënga y chë abuayiyayëngaftaca chëngbioye Bëngbe Bëtsá tojanoyé mandënga jtsobedecénana.

²² Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jeshšeconana ca” y “chë cotše cabá chora bebená, ngüichetsoye jana jetsójanduouoyama ca”.

3

Jesucristo quem luaroye jésabama ora

¹ Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama tšëngaftangbe juabna nÿe ena tšabe soyëngaca chaotsemnana, y chca chaotsemnamna atše jtsabuayiyayëse chë tcmojanabuatambá soyëngama.

² Atše sëntseboše tšëngaftanga chašmotsenujuabná, ntšamo chë inÿe tempënga ora, chë nÿe Bëngbe Bëtsábioye jtsoservënëse, chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

³ Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nÿe cachënga tšabá jtsomñama bacna juabnëngaca, y mochantsëbuayajuana, chë Cristo yochjésabama šmošbuáchema.

⁴ Chënga mëntšá mochántsihamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtšëtšanga, ndëmuanyëngbioye cha tojanašebuachená quem luaroye jésabama, ya tmonjóbana, y quem luarentše lempe cachcá endesomñe, ntšamo quem luare tojanobojatšë orscana enjamncá ca.”

⁵ Chë entšanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnana. Cha quem luare tojanma búyeshentšana y búyesheca;

⁶ y cach búyeshecnaca, chë uabouana uaftenentša béjayeca, ya bayté yojtsemna, cha lempe quem luarentše yojanbinÿncá tojtsanpochocá.

7 Pero chë mora entsemna celoca y quem luare, cach Bëngbe Bëtsabe mándoca, ndoñe quenátópodena chamotseepochocama, chë Bëngbe Bëtsá jayanama chábiöye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nyëtsca tescama castigo chamotsebomnama jamándama tempo candóshjanguëntscuana. Chora Bëngbe Bëtsá, celoca y quem luare íñeshca echantsepochoáca.

8 Pero, atšbe bonshánënga, canye soye endmëna y chë soye ndoñe chacmondébnëtjomba: Bëngbe Utabnabe juabnama, canye te endmëna mo canye uaranga uatcá, y canye uaranga uata mo canye tecá.

9 Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betscó yochanjama ca, chë cha quem luaroye jésabama, ndayá chana puerte uantado tšëngaftangaftaca comna; er cha jtsebošana ndocná nyëtsca tescama castigo chaondëtsebomnama, ndayá nyëtscanga bacna soyënga amana jtsajbanase, Bëngbe Bëtsabe tšabe benache chamuashjáchama.

10 Pero Bëngbe Utabná echanjésabo ndocná chama chaondëtsejuabná ora, mo canye atbëbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanáncá, y quem luare ndaye soyënguentšana yomnana íñeshca echántseftatëjo, y ndayá Bëngbe Bëtsá y entšanga quem luarentše tmojamcá, lempe echántsejuinýe.

11 Lempe chca japochócama entsémnyeca, ndegombre tšëngaftanga cmontsamna jtseyenana ntšamo chë Bëngbe Bëtsabe entšanga jtseyenana entsamncá, y nyëts tempo jtsamëse chë Bëngbe Bëtsábiöye jtsatschuanayama yomna soyënga,

12 tšëngaftanga chë Jesucristo quem luaroye jésabama chaóshjanguama šmojtšobátmanëntscuana; y nýa šmochtsentšena cha más betscó cháuesabama. Chë te íñeshca celoca echántsejuinýe, y ndaye soyënguentšana quem luare yomnana cach íñeshca echántseftatëjo.

13 Pero bënga mondobátmana ntšamo cha šojašebuachenacá: canye tsëm luare, mo canye tsëm celoca y tsëm fshantscá, y chentše nyëtscanga mochantsiyena ntšamo Bëngbe Bëtsabe bominyíñe tšabá yomncá jtsamëse.

14 Chíyeca, atšbe bonshánënga, chë soyënga chaotsemnama šmojtšobátmanëntscuana, nýa chiñe šmochtsentšena, chca, cha yochjésabo ora, chacmanýena oyeniñe tšabá Bëngbe Bëtsáftaca jtsatsmënëse, ínýengaftaca natjëmbana jtseyenëse; chacmanýena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca.

15 Quem soye šmochtsejuabnaye: Bëngbe Atsebacayá ndoñe yapa betscó tonjésabësna, chca jtsemnana cha puerte uantado nyëtscángaftaca yómnyayeca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácanënga chamotsebomnama. Cach quem soyëngámncá, Jesucristbeyeca bëngbe bonshana catšata Pablo tcomjanëbuábiamá, chë Bëngbe Bëtsá tojanma cha chaotsebomnama osertanáncá.

16 Chë soyëngama, Pablo nyëtsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínýënga, y chë mora canye soye jtsejuabnayana y chentšana ínýtšá juabnayënga, jtsejuabnayana y ínýengbiöye jtsejuabnayana ndoñe ndegombre yondmëna ca. Y cachcá jtsamana ínýe

soyëngaca, Bëngbe Bëtsabe uabemana palabrënguiñe. Chca chënga montsajna pochocánënga jtsemnama.

¹⁷ Chiyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínÿenga jáingñama, tšëngaftanga ndoñe chašmondëtsemna mo uambanëngcá, ndoñe chašmondëtsajbanama jtsebo mnana chë Bëngbe Bëtsabe soyënga ntšamo šmojashjachcá.

¹⁸ Pero atšna, Bëngbe Utabná y Atsebacayá Jesucristo sëntseimpadana, tšëngaftanga chašmotsiyena jtsamëse, chë chá bentšana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nÿetscanga cha chamotsatschuaná, mora y nÿetsca tescama! Chca chaotsemna.

1 San Juan

Cristo, chë nyetsca tescama yomna tšabe vida entsanga chamotseboamna amá

¹ Bënga cbontsëbuabiamná chë Bëngbe Bëtsá ndabijana inëtsoyebuambnabiamna, chë nyetsca tescama yomna tšabe vida entsanga chamotseboamna iuamabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašëngaca chabe oyeuambnayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátšeca fsënjábojajo.

² Cha bëngbentse tonjanonýná y fsënjáninyë; chíyeca bënga chabiamna cbontsëtsësná y cbontsabuayiyná, nda sempre vida yobomna y nda chë nyetsca tescama yomna tšabe vida entsanga chamotseboamna iuama. Chana, chë Taitá Bëngbe Bëtsáftaca inamna, pero mora bëngbioye šojinýanjé.

³ Bënga tšëngaftanga cbontsabuayiyná ntšamo tifjinýe y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaqiñá Jesucristoftaca.

⁴ Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

Bëngbe Bëtsá endmëna chë entsangbiamna binýnayá

⁵ Mëntsá entsemna ntšamo Jesucristbentšana tifjouencá y chca tšëngaftanga cbontsabuayiyná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna.

⁶ Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtseboestero y ndoñe montsama ntšamo ndegombre yomncá.

⁷ Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaqiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabuanayey, y echanjama bënga chabe delante tšabá chamotsatsmënama.

⁸ Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjóyëngacñe;

⁹ pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyíye cachá chë ntšamo šojiytsašëbuachecá amá y nyetsca soyënguñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye.

¹⁰ Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe boestero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjóyëngacñe.

2

Cristo, bēngbe obuauyayá

1 Tšēngaftanga mo atšbe basengcá, er atše tcbonjanējabuache Jesucristbe tšabe noticiēnguiñe chašmotsošbuáchemá, quem soyēnga cbontsēbuabiamná bacna soyēnga ndoñe chašmondétsamama. Pero ndánaca Cristbeñe ošbuachiyēnguentšá bacna soye tojamēse, bēnga canye obuauyayá Bēngbe Bētsabe delante montsebomna, y cha endmēna Jesucristo, chē nyētsca soyēnguiñe tšabá amá.

2 Jesucristo tonjanóbana ndoñe nye Bēngbe Bētsá bēnga chášuaperdonama bēngbe bacna soyēngama, ndayá quem luarentša nyētsca entšágnaca chēngbe bacna soyēngama cháuaperdonama.

3 Bēnga ntšamo Bēngbe Bētsá šojtsamēndacá tmojtsamēse, ndegombre mochántsetatšēmo bēnga cha imuábuatmama.

4 Pero nda tojayana: “Atše Bēngbe Bētsá sēnduábuatma ca”, pero ndoñe tontsama ntšamo Bēngbe Bētsá ibeamēndacá, cha canye bostero jtsemnana y ainaniñe chē Bēngbe Bētsabe ndegombre soyēnga ndoñe tonjójyēngacñe.

5 Pero nda ntšamo Bēngbe Bētsá ibeamēndacá tojtsama, jtsinjanýnáyana chabe ainaniñe Bēngbe Bētsabiama corente bonshánana yomnana, y chca, mochántsetatšēmo bēnga sempre cánýiñe mo canýacá cháftaca imomnana.

6 Nda tojtsichamo Bēngbe Bētsáftaca cánýiñe mo canýacá yojtsemna ca, bontsemna jtsiyenana soyēnga jtsamēse ntšamo Jesucristo yojétsiyencá.

Canye tsēm mando

7 Atšbe bonshana entšanga, ntšamo mora cbontsēbuabiamnacá, ndoñe canye tsēm mando quenátsmēna, pero aiñe canye tempsca mando; entsemna cach tšēngaftanga Cristbe ústonēnga šmonjanobiama ora šmonjanóyēngacñe mando. Quem tempsca mando entsemna ntšamo tšēngaftanga bēngbentšana šmonjouencá.

8 Pero masque chca endmēnēse, quem cbontsēbuabiamná soye tšēngaftangbiana echántsemna mo canye tsēm mandcá. Cristo enjétsiyena ntšamo quem Bēngbe Bētsabe mando ndegombre yomncá y tšēngaftágnaca cachcá šmondoyena, er chē bacna juabnēnga jtsebonnēse mo ibetiñcá jtsiyenana tempo ya echanjochnēngo, y chē entšangbe juabna ndegombre binýnáyá ya entsebuashinýnáyana.

9 Nda tojayana chē binýnáyáftaca yojtsemna ca, pero cha chabe catsátbioye tbojtsáboyēnja, cha cabá tempcá, bacna juabnēnga jtsebonnēse yojtsiyena, mo ibetiñcá.

10 Nda chabe catsátbioye tbojtsebobonshana, cha chē binýnáyáftaca jtsiyenana, y tondaye queochátsmēna cha bacna soye chaotsamama.

11 Pero nda chabe catsátbioye tbojtsáboyēnja, cha bacna juabnēnga jtsebonnēse jtsiyenana, mo canya ibetiñe oyenacá. Cha ndoñe ntsetatšēmbuana chē ndayá tojamama ntšamo chentšana yochjopása, er chē bacna juabnēnga jtsebonnēse jtsiyenana chábioye ndoñe ntjalesénciana ntšamo tšabá yomncá chaotsamama.

12 Básenga, atše cbontsēbuabiamná Bēngbe Bētsá tšēngaftangbe bacna soyēnga tcmojáperdonama, ndayá Jesús tojanma sóyeca.

13 Taitanga, tšēngaftanga cbontsēbuabiamná, er tšēngaftanga ya šmonjuábuatmana chē quem luare jobojátšama orscana ya inamná.

Tšëngaftanga bobontšëngnaca cbontšëbuabiamná, er tšëngaftanga ya chë nyetsca bacna soyënga mandayá Satanás šmonjayënjana.

14 Bäsenga, tšëngaftanga tcbonjubaábiam, er tšëngaftanga chë Taitá ya šmonjuábuatmana. Taitanga, tšëngaftanga tcbonjubaábiam, er tšëngaftanga ya šmonjuábuatmana chë quem luare jobojátšama orscana ya inamná. Bobontšënga, tšëngaftágnaca tcbonjubaábiam, er tšëngaftanga bëtscá aňemo ainaniňe šmambá, y Bëngbe Bëtsabe palabrama sempre tšëngaftangbe ainaniňe šmondëjuabná, y chë nyetsca bacna soyënga mandayá šmonjayënjana.

15 Ndoňe matsbošana oyejuayënga jtsemnana nýe quem luarentša soyëngaca, ni nýe chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoňe chë Taitábiye bondbobonšana.

16 Er chë nýe quem luarama enójuabnayënga mëntšá juabnënga mondbomna: yapa jtsebošana jtsebomnama ntšamo chë ainaniňe bacna juabnënga bomnënga mondbetsebošcá; yapa jtsebošana nýe ndayá tmojátinýe soye; y yapa jtsenábotamnayana chë tmobomna soyëngama. Chë juabnënga Bëngbe Bëtsábiocana ndoňe ntsóbocana, ndayá nýe chë quem luarama enójuabnayëngbentsana.

17 Pero quem luare echanjopochóca y nyetsca chentša soyënga, chë entšanga bacna juabnëngaca yapa imoboše jtsebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebmoma.

Chë Cristbe contra yomná

18 Bäsenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsebucaama.

19 Chënga cach bëngbentsana tmonjábocana. Pero chënga Jesucristbeňe ndoňe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeňe mondošbuachecá, chënga nyetscanga ndoňe mondošbuáchema.

20 Pero Cristo, chë Uamaná, tšëngaftanga tcmonjabacacá, y cha tonjama chë Uámana Espíritu tšëngaftangbe ainaniňe cháumashënguama; y nyetsca tšëngaftanga chë ndegombre soyënga šmondëtátšëmbo.

21 Atše cbontšëbuabiamná, ndoňe chë ndegombre soyëngama ndoňe šmondëtátšëmbuama, ndayá aňe šmotatšëmbuama; er tšëngaftanga šmondëtátšëmbo chë ndegombre soyënga y ndoňe ndegombre soyënga cánýiňe jtsemnana ndoňe yondopodénama.

22 Nda tojayana Jesús chë Bëngbe Bëtsabe Uámana Uabuayana, chë Cristo ndoňe yondmëna ca, chana jtsebošterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiňá ndoňe yondmëna ca, y chca, cha Bëngbe Bëtsabiam ndoňe ntsejuabnayana cha chë Taitá bëtsemnana.

23 Nda tojtsichamo Cristo Bëngbe Bëtsabe Uaquiňá ndoňe yondmëna ca, cha chë Taitáftaca cánýiňe mo canýacá ndoňe ntsemnana. Pero nda entšangbeňe

tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cánÿiñe mo canÿacá jtsemnana.

²⁴ Tšëngaftanga, chë Cristbe ústonënga šmojanóbiamá orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánÿiñe mo canÿacá šmochántsemna.

²⁵ Y quem soye entsemna ntšamo Cristo šojëftsäsebuachená: chë nÿetsca tescama yomna tšabe vida jtsebmomna.

²⁶ Atše chca chbontsëbuabiamná, chë tšëngaftanga jáingñayama imojtsebošëngbiamá chašmotsetatšëmbuama.

²⁷ Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebmomna, y ndoñe quenátšiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntšá, ntšamo chë Uámana Espíritu tcmojabuatambacá jtšiyenëse, Cristoftaca cánÿiñe mo canÿacá šmochtsemna.

²⁸ Y mora básënga, Cristoftaca cánÿiñe mo canÿacá šmochtsemna, chca, cha chaojabáisebocna ora, chábeñe jtsošbuáchiyëse, bënga añëmoca chamotsemnama y ndoñe chamondëtsëuatjama, bënga chabe delante chamojtsemna ora.

²⁹ Tšëngaftanga šmontsetatšëmbo Jesucristo nÿetsca soyënguiñe tšabá amá yomnama. Chcasna, cmontsamna jtsetatšëmbuana, nÿetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básënga imomnama.

3

Cristbeñe ošbuáchiyënga, Bëngbe Bëtsabe básënga

¹ Menójuabonga, ntsachetšá Bëngbe Bëtsá chë Taitá šondábabuanÿeshanama. Chabe bonshánana tša bëtscá endmënayeca, bënga šondëububuatma chabe básënga ca, y ndegombre bënga chca mondmëna. Chë causa chë nÿe quem luarama enójuabnayënga ndoñe quenátësertana ntšamo bënga imomnama, er chënga cha ndoñe tmonjanábuatmana.

² Atšbe bonshana entšanga, mora bënga ya Bëngbe Bëtsabe básënga montsemna. Y masque cabá ndoñe quemuátstatšëmbo ntšamo más chcoye bënga mochjamnama, aíñe mondëtatšëmbo, Jesucristo chaojabáisebocna ora bënga cachacá mochtsemnama, er bënga mochanjobenaye jinÿyama ntšamo cha ndegombre yomncá.

³ Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnama, ntšamo cach Cristo yomncá, lema tšabia y bacna soye ndbomná.

⁴ Pero nda bacna soye tojama, chana ntšamo Bëngbe Bëtsá tojëftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemandacá.

⁵ Tšëngaftanga ya šmondëtatšëmbo Jesucristo quem luaroye tojánabo bëngbe bacna soyënga jabëtsabuajuanama, y cha ni mo canÿe bacna soye ndoñe yondbomnama.

⁶ Chcasna, nda cánÿiñe mo canÿacá cháftaca nÿets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiamá ndoñe tbonjosertá y ndoñe yondëtatšëmbo ntšamo cha bëtsemnama.

⁷ Atšbe básenga, ndocná chacmondaingñé: nda nyetsca soyënguiñe tšabá tojtsama, cha canye tšabá mándbomna entsá jtsemnana, ntšamo Jesucristo yomncá;

⁸ pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuétšama. Bëngbe Bëtsabe Uaquiñá nya quem soyama tojabo: chë Satanásbe soyënga jabëtsepochochama.

⁹ Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse.

¹⁰ Corente jtsotatšëmbuana ndëmuanyënga Bëngbe Bëtsabe básenga imomnana y ndëmuanyënga Satanásbe básenga; ndëmuanyëngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

Nyetscanga jtsenbobonshánana

¹¹ Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiana orscana: nyetscanga šontsamna jtsenbobonshánama.

¹² Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yojánama; chabe uabentsana aiñe; chíyeca tbojtsanóba.

¹³ Jesucristbeyeca atšbe catšátanga, ndoñe šmattsenjanay chë nye quem luarama enójuabnayënga cmojtsëbuayënjama.

¹⁴ Bënga mondétatšëmbo, bënga tempo monjanियena chë nye quem luarama enójuabnayënga mondoyencá, y chca, Bëngbe Bëtsabiana mo obanëngcá monjamna, er bënga monjanियena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondétatšëmbo, er bënga bëngbe catšátangbioye mondábabuanyëshana. Nda chabe catšátbioye ndoñe tbontsebobonshana, cha cabá mo obanacá jtsiyenana.

¹⁵ Nda cachabe catšátbioye tbojtsáboyënja, cha jtsemnana mo entsanga obanayacá. Y tšëngaftanga šmondétatšëmbo entsanga obanayá ndoñe ntsoberana jtsiyenana, chë nyetsca tescama yomna tšabe vida chabe ainaniñe jtsemnëse.

¹⁶ Ndayá chë jtsenbobonshánana bëtsemnana mëntšá montsetátšëmbo: Jesucristo chabe derecho vida jtsobomñama cachcá tojanonyá y bëngbiana tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catšátangbiana jóbanama.

¹⁷ Canya bomnana tojtsebomna y catšátbioye uajabotá tbojtsonyá, pero chabiana ndoñe tbonjome y ndoñe tbonjuájabuache, cha ndoñe ntsoberana Bëngbe Bëtsabiana ainaniñe bonshánana jtsebomnana.

¹⁸ Atšbe básenga, ndoñe quešnátamna nye bëngbe catšátanga imuababuányëshana ca jatichámuana, y nye chë bonshánama jatóyebuambayana; pero ndegombre šontsamna ndayánaca jamana, chca, jinyan'yiyama, bënga ndegombre ín'yëngbiana imuababuányëshana.

Bëngbe Bëtsabe delante natjëmbana ainánaca entsanga

19 Chcase bēnga mochántsetatsēmo, ntšamo chē Bēngbe Bētsabe ndegombre soyēnga yomncá bēnga imojtsamama. Y bēnga ndoñe quemochátenocochinýena, Bēngbe Bētsábioca jtsemnana merecido ndoñe mond-
buájona ca tmojtsejuabná ora; y bēngbe ainana natjēmbana Bēngbe Bētsabe
delante echántsemna.

20 Bēnga chca bēngbe ainaniñe tmojtsejuabná ora, bēnga montsobena
natjēmbana ainana jtsebomnana, er Bēngbe Bētsá corente jtsoatatsēmbñana
ntšamo bēngbe ainana yomnana, y cha lempe yotátšēmo.

21 Atšbe bonshana entšanga, bēnga ndoñe bacna soye tmonjama ca bēngbe
ainaniñe tmojtsejuabnase, jtsoebenana añémoca jtsemnana y tondayama
ntsauatjácá Bēngbe Bētsabe delante jtsemnana.

22 Y cha lempe ntšamo chamojtañcá sochanjátataye, er bēnga montsama
ntšamo Bēngbe Bētsá ibuamandacá y ndayá chabe bominýiñe tšabá yomncá.

23 Y chabe mando endmēna: bēnga chabe Uaquiñá Jesucristbeñe
jtsošbuáchiyana, y bēnga nyētsanga jtsebomshánana ntšamo Jesús
sojéftsamēndacá.

24 Ntšamo Bēngbe Bētsá tojéftsemandacá amēnga, Bēngbe Bētsáftaca cánýiñe
mo canýacá jtsemnana, y cha sempre chēngaftaca cánýiñe mo canýacá
echanjéftsemna. Y quem sóyeca bēnga montsobena jtsetatsēmbuana cha
bēngaftaca iuéftsemnana: Uámana Espiritu bēngbe ainaniñe cháumashēnguama
cha tojama.

4

Chē Bēngbe Bētsabe Espiritu y chē Cristbe uayayabe espíritu

1 Atšbe bonshana entšanga, nyētsanga chē Bēngbe Bētsabe juábnaca
imoyebuambná ca ichámēngbiyoe ndoñe šmattsayaunana; botamana
šmochjuarrepára corente jtsetatsēmbuama chēnga aiñe o ndoñe chē Bēngbe
Bētsabe juábnaca imóyebuambnana. Quem tempo banga Bēngbe Bētsabe ndoñe
ndegombre juabna oyebuambnayēnga quem luarējana mondajna. Chē causa
tšēngaftanga cmontsamna botamana chēngbiama juarrepárana.

2 Chē Bēngbe Bētsabe Espiritu ndegombre imobomnēngbiama tšēngaftanga
mēntšá šmontsobena jtsetatsēmbuana: nda tojayana Jesucristo quem luaroye
aiñe entšacá tojánabo ca, cha ndegombre chē Bēngbe Bētsabe Espiritu yojtse-
bomna.

3 Pero nda ndoñe chca Jesucristbiama tonjayana, cha Bēngbe Bētsabe
Espiritu ndoñe yontsebomna; inýetšá, chana chē Cristbe contra yomnabe
espíritu yojtsebomna. Tšēngaftanga šmojouena chē espíritu yochjabama; pero
ndegombre cha ya quem luarentše entsemna.

4 Atšbe básenga, tšēngaftanga Bēngbe Bētsábenga šmondmēna y ndoñe
šmonjalesenciá chē Bēngbe Bētsabe ndoñe ndegombre juabna oyebuamb-
nayēnga tšēngaftangbiyoe chacmaingñema, er chē nyēts tempo tšēngaftangbe
ainaniñe vida endbomná, chē nye quem luarama enójuabnayēngbe ainaniñe
mándayabiama más obená endmēna.

5 Chē Bēngbe Bētsabe ndoñe ndegombre juabna oyebuambnayēngna chē
nye quem luarama enójuabnayēnguentšana mondmēna, chíyeca chēnga nye
quem luarentša soyēngama jtsoyebuambnayana, y chē nye quem luarama
enójuabnayēnga chēnga jtsayaunanana.

6 Pero bēnga Bēngbe Bētsábenga mondmēna. Nda Bēngbe Bētsábiyoe
tbojtsabuatma, bēngbiyoe jtsayaunanana; pero nda Bēngbe Bētsábiyoe

ndoñe tbontsabuatma, cha bēnga ndoñe ntsayaunanana. Chiñe bēnga montsobena jtsetatsēmbuana nda chē ndegombre soyēnga jóyebuambayama ama espíritu yobomnabiama, y nda chē ín̄yengbiōye jáingñama ama espíritu yobomnabiám̄naca.

Chē bonshánana Bēngbe Bētsábiocana yóbocana

7 Atsbe bonshana entsanga, chē bonshánana Bēngbe Bētsábiocana endóbocana; chcase, bēnga šontsamna nyetscanga jtsenbobonshánana. Nda Bēngbe Bētsábiōye y chē ín̄ye entsángbiōye tojtsababuán̄yeshana, cha Bēngbe Bētsabe uaquiñá jtsemnana y Bēngbe Bētsábiōye jtsabuatmana.

8 Nda ndoñe chca tontsebobonshana, cha Bēngbe Bētsábiōye ndoñe ntsábuatmana, er Bēngbe Bētsá bonshanánaca nyetsca soyēnga jamana.

9 Bēngbe Bētsá šonjin̄yan̄yé bēnga šuababuán̄yeshanana, cha chē n̄ye can̄ye Uaquiñá ibobomná quem luaroye jíchmuase; cha tbojanichmó, bēnga chábeyeca chē n̄yetsca tescama yomna tsabe vida chamotsebonnana.

10 Bēngbe Bētsabe bonshánana mēntśá endmēna: ndoñe quenátsmēna bēnga Bēngbe Bētsá imobobonshánayeca, ndayá cha bēnga šojánababuan̄yeshanayeca, y chabe Uaquiñá tbojanichmó, cha jóbānēse, bēnga bēngbe bacna soyēngama perdonánēnga chamotsebnana.

11 Atsbe bonshana entsanga, Bēngbe Bētsá chca šuababuán̄yeshana; chcasna, bēngnaca šontsamna nyetscanga jtsenbobonshánana.

12 Ndocná ndocna te Bēngbe Bētsábiōye tbonjin̄ye. Bēnga nyetscanga tmojtsenbobonshánēse, Bēngbe Bētsá n̄yets tempo bēngaftaca echántsemna, y chabe bonshánana puerte bētscá bēngbeñe echántsemna.

13 Bēnga mēntśá montsobena ndegombre jtsetatsēmbuana bēnga Bēngbe Bētsáftaca imomnana y cha bēngaftaca: cha tonjanma chabe Espíritu bēngbe ainaniñe cháumashēnguama.

14 Y cach bēnga fsēnjim̄ye y entsanga fsēntsētsētsná, chē Taitá chabe Uaquiñá tbojichmoma, quem luarentša entsanga jabátsebacama.

15 Ndánaca tojayana Jesús Bēngbe Bētsabe Uaquiñá yomna ca, cha Bēngbe Bētsáftaca cán̄yiñe echántsemna y Bēngbe Bētsánaca sempre cháftaca cán̄yiñe mo can̄yáca.

16 Chcase bēnga montsetátśēmo y montsošbuaché ndegombre Bēngbe Bētsá bēnga šuababuán̄yeshanama. Bēngbe Bētsá nyetsca soyēnga bonshánánaca jamana y nda Bēngbe Bētsá y chē ín̄ye entsanga sempre tojtsababuán̄yeshana, cha Bēngbe Bētsáftaca cán̄yiñe mo can̄yáca jtsemnana y Bēngbe Bētsánaca sempre cháftaca cán̄yiñe mo can̄yáca.

17 Chca, Bēngbe Bētsabe bonshánana puerte bētscá bēngbeñe echántsemna, bēnga bēts añēmoca y tondayama ntsauatjca chamotsebnana, chē tsabá o ndoñe tsabá tmonjamama entsangbiama jayanama Cristo yochjésabo orscama; er bēnga Jesucristoftaca cán̄yiñe mo can̄yáca jtsemnēse, quem luarentše mondmēna ntšamo Jesucristo endmēncá.

18 Nda Bēngbe Bētsá y chē ín̄ye entsanga tojtsababuán̄yeshana, tondayama ntsauatjana; bēnga corente tmojtsebobonshana ora, ndoñe ntsopodénana uatjana jtsebonnana. Can̄ye entśá tojtsauatja ora, jtsemnana mo chabe castigo ya cuafjobjatšecá. Chca, nda uatjana tojtsebonna, Bēngbe Bētsábiōye y chē ín̄ye entsanga cha ndoñe corente yondábabuan̄yeshana, ntšamo Bēngbe Bētsá bēnga šuababuan̄yeshancá.

¹⁹ Natsana Bëngbe Bëtsá šojánabuanÿeshana, y chíyeca bënga, cha y chë inÿe entšanga imuababuánÿeshana.

²⁰ Nda tojajana: “Atše Bëngbe Bëtsábioye sëndbobonshana ca”, pero cachca ora cachabe catsátbioye tbojtsáboyënja, cha canÿe bostero jtsemnana. Canÿa aíñe jtsobenana chabe catsáta jinÿama; y cha chë catsátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinÿama ndoñe ntsohenana.

²¹ Y bënga quem mando chábentšana tmonjanóyëngacñe: nda Bëngbe Bëtsábioye tbojtsebobonshana, cachabe catsátbioynaca chabotsebobonshana ca.

5

Chë Jesucristbeñe ošbuachiyá endobena Satanasbe soyënga jayënjanana

¹ Nda tojtsošbuaché Jesús chë Uámana Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canÿe taitábioye tbojtsebobonshana, chë taitabe uaquiñábioynaca cha jtsebobonshánana.

² Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuánÿeshanama.

³ Bënga Bëngbe Bëtsábioye imobobonshánama quem soyiñe jtsinÿnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama.

⁴ Nda Bëngbe Bëtsabe uaquiñá tomna, chana jáyënjanana quem luarentša entšanga y soyënga ntšamo Satanas yomandacá. Quem luarentša entšanga y soyënga ntšamo Satanas yomandacá, Cristbeñe bënga imošbuachéyeca montsobena bënga jayënjanana.

⁵ Nÿe nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entšanga y soyënga ntšamo Satanas yomandacá jayënjanana; ndocná más.

Bëngbe Bëtsá tojinÿanyé ntšamo chabe Uaquiñabiana ndegombre yomncá

⁶ Cach Jesucristo endmëna nda quem luaroye tojánabo y mëntšá tojanenonÿinÿé: búyeshca cha tmojanabayé ora, y buiñe juabuáshanëse cha tonjanóbana ora. Cha ndoñe tonjanenonÿinÿé nÿe búyeshca, ndayá búyeshca y buiñeca. Cach Uámana Espiritu entsobena jayanana chca ndegombre bëtsemnama Jesusbiana, er chë Espiritu endmëna chë sempre ndegombre oyebuambnayá.

⁷ Endmëna unga soyënga, ndayá iuinÿanÿná ntšamo ndegombre yomncá Jesusbiana:

⁸ Espiritu, búyeshca y buiñe; y chë unga soyënga lempe cachcá Jesusbiana jtsinÿanÿnayana.

⁹ Bënga mondbëtsejuabnaye, ndayá entšanga tmojinÿe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiana iuichamcá.

¹⁰ Nda Bëngbe Bëtsabe Uaquiñábeñe tojtsošbuaché, cha chca nÿets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canÿe bostero cuaftsemncá, er chë

Bëngbe Bëtsá chabe Uaquiñabiana tojayana soyama cha jtsejubnayana ndoñe ndegombre yontsemna ca.

¹¹ Ntšamo Bëngbe Bëtsá chabe Uaquiñabiana tojayancá mëntšá entsemna: Bëngbe Bëtsá bëngbiana tojama chë nyetsca tescama yomna tšabe vida chamotsebonnama; y quem vida chabe Uaquiñábeñe entsemna.

¹² Nda Bëngbe Bëtsabe Uaquiñáftaca cánýiñe mo canýacá tojtsemna, cha chë tšabe vídnaca jtsebonnana; pero nda chë Bëngbe Bëtsabe Uaquiñáftaca cánýiñe mo canýacá ndoñe tontsemna, cha chë nyetsca tescama yomna tšabe vida ndoñe ntsebonnana ca.

Inýe soyëngama jábuayenama y jtadiósoftanama

¹³ Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nyetsca tescama yomna tšabe vida šmojtsebonnama.

¹⁴ Bënga bëts añémoca y ndauatjá Bëngbe Bëtsabe delante mondmëna, er bënga mondétatšëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama.

¹⁵ Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondétatšëmbo chca ndegombre yomnana, y chca, bëngnaca montsetatšëmbo, ndayánaca chábioye bënga chamojtjañcá cha šochjátsatayama.

¹⁶ Nda chahabe catšátbioye tbojinýe canýe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénese, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catsata chë nyetsca tescama yomna tšabe vida chaotsebonnama, cha chca tojamentšana perdonaná jtsemnana cabá tojtsopodénese. Pero canýe bacna soye endmëna, y chca tojamama canýa ndoñe ntsoobenana perdonaná jtsemnana, y chca, cha jabocnana canýa nyetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca.

¹⁷ Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canýa tojtsamcá, ndoñe ntjamana cha ndëperdonaná chaotsemnana.

¹⁸ Bënga mondétatšëmbo, nda Bëngbe Bëtsábioye mo taitacá tbojtsebonna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onýnaná chábioye jtšinýenana, y Satanás, chë nyetsca bacna soyënga amëndayá, tondaye ntsobenana chábioye jabórlana.

¹⁹ Bënga mondétatšëmbo, bënga chë Crístbeñe ošbuáchiyënga Bëngbe Bëtsábënga imomnana, y chë quem luarentša inýe entšanga Satanasbe cucuatšine imomnana.

²⁰ Bëngnaca mondétatšëmbo Bëngbe Bëtsabe Uaquiñá tojabama, y cha iuama bënga osertánana chamotsebonnama, chë ndegombre Bëngbe Bëtsá yomná jtsabaatmama. Bënga chë ndegombráftaca cánýiñe mo canýacá mondmëna, bënga chabe Uaquiñáftaca cánýiñe bëtsemnayeca. Cha chë ndegombre Bëngbe Bëtsá endmëna, y nda chë nyetsca tescama yomna tšabe vida entšanga chamotsebonnama iuamá.

²¹ Atšbe básënga, ndoñe šmattsadorana cach entšangbe pormana soyënga, chë ndayama inýënga mondbëtsejubnaye diosënga yomna ca.

2 San Juan

Jtsiyenana ndegombre soyëngaca y nyëtscanga jtsenbobonshánëse

¹ Atše chë bëtsëjema, quem tsbuanácha sentsabiamná, chë uamana mamá, chë Bëngbe Bëtsabe bocacaná y chabe basengbiámnaca, ndëmuanyënga atše ndegombre sëndábabuanyëshana. Y ndoñe nyë atše chënga quetsátababuanyëshana, ndayá nyëtscanga chë Bëngbe Bëtsabe ndegombre soyënga uabuátmëngaca.

² Atše cbontsababuanyëshana, chë ndegombre soyënga bëngbe ainaniñe mondbómnayeca, y chë soyënga bëngbe ainaniñe sempre echántsemna.

³ Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnama, chata tsëngaftangbiye chácmalastemama, y chaboma tsëngaftangbe ainaniñe tsabe ebionana chašmotsebonnama. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

⁴ Puerte sënjoyejuá, er atše acbe básenguentše básëftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse.

⁵ Y mora, uamana mamá, cbontseimpadana Diosmanda nyëtscanga chamotsebobonshana. Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando.

⁶ Bënga, Bëngbe Bëtsá y chë inýe entšanga imababuanyëshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inýe entšanga jtsababuányëshanëse.

Chë entšángbiye áingñayënga

⁷ Quem luarëjana banga entšángbiye áingñayënga mondayna, y chënga jtsejuabnayana Jesucristo quem luaroye ndoñe mo canýe ndegombre entšacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná.

⁸ Chëngbiana cuedado šmochtsebonna. Ndoñe chcase, tsëngaftanga ndoñe quešmochátsbonna chë Cristbiana cach tsëngaftangbe trabajuentšana tojóbcna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbiye jatšatayama yojtsebošcá.

⁹ Ndánaca chë Cristo tojanabuatambá soyëngama inýe soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsabuatambá, cha añe chë Taitáftaca y chabe Uaquiñáftaca cánýiñe mo canýacá jtsemnana.

¹⁰ Ndánaca tsëngaftangbiye tojá jabuátambama, pero ndoñe ndayá Cristo tojanabuatambacá tojtsebuatëmbase, cha ndoñe šmatjofja, ni mo šmatjachuaye.

¹¹ Er nda chábiye tbojachuase, chábiye jtsajabuáchanana chë bacna soye chaomama.

Jtadiósoftanama

¹² Atše ba soyënga sëntsebonna tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná añe chjobenaye

tšëngaftangbioye jama, jobenayama nyetscángaftaca jencuéntama, chca, bëngbe oyejuayana puerte bëtská chaotsemnama.

¹³ Crístbeyeca acbe quenata, chë Bëngbe Bëtsabe bocacaná, chabe básenga cmontsacheuaná.

3 San Juan

Juan Gaybiama puerte tšabá tojanoyebuambá

¹ Atše chë bëtšëjema, quem tsbuanácha atšbe bonshana amigo Gaybiama sentsabiamná. Chábioye atše ndegombre sëndbobonshana.

² Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nyetsca soyënguñe chacotsemnana y salud bomnánaca. Atše sëntsetatšëmbo aca ainaniñe tšabá cotsomñama, Bëngbe Bëtsabiana bëtscá tšabe juabnënga chentše jtsebomnëse.

³ Er báseftanga Jesucristbeñe ošbuáchiyënga átšbioye tmonjabo y smonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtscá sëntsoyejuá.

⁴ Tondaye jamana atše nyetsá oyejuayá chaitsemnana, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

⁵ Atšbe bonshaná, aca contsama ntšamo Jesucristo tonjanbuatëmbacá, aca chë ínÿenga Jesucristbeñe ošbuáchiyënga jujabuáchama ndayánaca tcojama ora, y masna, chë ínÿe luaroquëngocana ashjajnëngbiana ndayánaca tcoj-sama ora.

⁶ Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefnëngbe delante, aca tša chënga icuababuánÿeshanama. Diosmanda, ntšamo tojtsëjbotcá chënga cochjújabuache, chca, chënga chamobená tšabá ínÿe luarëngoye játama. Chënga mondmëna Bëngbe Bëtsabiana trabájayënga; chcasna, chëngaftaca cochjama ntšamo chënga chama merecido imobuajoncá.

⁷ Chca cochjama, er chënga chëngbe pueblënguentshana tmojëftsebocana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentšana.

⁸ Chíyeca bënga šontsamna chëngbiana jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

Diótfes ndoñe tšabá tonjanma; Demetrio aiñe

⁹ Atše canÿe tsbuanácha chë Jesucristbeñe ošbuáchiyënga chentše mondbenenefnëngbioye sënjubuábiana, pero Diótfes ndoñe yontsuenana ntšamo atše sentsichamcá, er cha yojtseboše chë ínÿëngbioye nye jtsamëndayana.

¹⁰ Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe pueblöye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnana imnëtsenefjuana luarentšana yojtsatëbuacana.

¹¹ Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá

tojtsama, cha Běngbe Bětsábia jtsemnana; pero nda ndoñe chca tontsama, cha cabá ndoñe yondétatšẽmbo ntšamo Běngbe Bětsá yomnama.

¹² Jesucristbeñe ošbuáchiyěnga nyetscanga tšabe soyěnga Demetriëbiamá montsichamo, y Jesucristbe ndegombre soyěnga entsinŷna ntšamo cha soyěnga yojtsiyenama. Běgnaca chabiamá tšabá fsěntsichamo, y aca condétatšẽmbo ntšamo běnga fsěntsichamcá, ndegombre yomnama.

Jadiósoftanama

¹³ Atše ba soyěnga sěntsebmna aca jauyanama, pero ndoñe quetsátsboše tsbuanáchañe juábobemana.

¹⁴ Atše sěntsejuabná betscó chjobenaye ácbioye jama jauatsětsayama y jobenayana ácaftaca jencuéntama.

¹⁵ Puerte tšabe ebionana ainaniñe chacotsebmna. Quem luarentša amiguěnga cmontsechuaná. Diosmanda, běngbe amiguěngbioye choca cada ona cochjácheuaye.

San Judas

Jacheuayama

¹ Atše Judas, Jesucristbe oservená y Santiagbe catšata, quem tsbuanácha sentsabiamná, ndémuanýengbioye Bèngbe Bètsá, chë Taitá chabe entšanga chamotsemnana tojáchembo, chabe bonshánënga, y ndémuanýenga Jesucristo endánýena.

² Atše, Bèngbe Bètsá sëntseimpadana, cha puerte lastemado tsëngaftangaftaca chaotsemnana, cha chaoma tsëngaftanga ainaniñe tsabe ebionana chašmotsebomnana, y chaoma tsëngaftanga cada te más Bèngbe Bètsábioye y ínýengbioye chašmotsababuánýeshanama.

Chë ndoñe ndegombre soyënga buátëmbayënga

³ Atšbe bonshánënga, atše tša sëndboše tsëngaftanga jubuábiamama, ntšamo Jesucristo bèngbe bacna soyënguentsana šojátsebacama, tsëngaftangbioye y bèngbiounaca; pero atše sëntsejuabná atše šojtsemna tsëngaftanga jubuábiamana, jáimpadama bëtscá chašmotsama Jesucristbe soyëngama, chë mondošbuachë soyëngama jenuéřzama, ndoñe chaondopochocama. Chë soyënga Bèngbe Bètsá chabe entšanga canýe tojatšatá, y nyetsca tescama.

⁴ Er tsëngaftanga ntšamo ínýenga imomnana ntjatatsëmbonca, básefta entšanga tsëngaftangaftaca tmojenutaná. Chënga mondmëna Bèngbe Bètsá ndoñe adórayënga, y chë buátëmbana soyënga tmojtsetrocá. Bèngbe Bètsá bèngbe tsábiamu juabna yobómnayeca, chënga jtsichámuana tsëngaftanga šmojtsobena nyetsca bacna soyënga jtsamëse jtsiyenana, jenomándama ntobencá ca; y chca, chënga montseboše jinýanýiyama, Jesucristo ndoñe bèngbe canýe Nduiño y Bèngbe Utabná chëngbiamu yondmëna ca. Y bayté, Bèngbe Bètsabe uabemana palabrénguine tmojanábema, chë chca amëngna jtsamnana nyetsca tescama castigánënga jtsemnana ca.

⁵ Masque tsëngaftanga lempe quem soyama ya šmondëtatšëmbo, atše sëntseboše jamama tsëngaftanga chašmotsenuabná, Bèngbe Utabná, Israeloca entšanga Egiptoquëngbe cucuatšentsana tojanatsebacá chentšana, cachá chë Israeloquënguentse chábeñe ndošbuáchiyënga tojánapochocama;

⁶ y cachcá chë angelëngbiámna, ndémuanýenga ndoñe tmonjanoquedá chë tmojanóyëngacñe mândoca, pero añe chëngbe luarënga cachcá imojéftsonýaye. Chë causa, Bèngbe Bètsá tojanmandá cadenëjuangaca nyetsca tescama chamoquedama, chë más ibetiñe, tondaye binýiñe luarentse, chënga bacna soyënga tmojanmama nyetsca tescama castigánënga jtsemnana yojtsamna ca, cha jayanama tescama.

⁷ Y chë Sodoma y Gomorra, y chë béconana pueblënguentse entšangbiámna; chëngnaca cach angelëngcá ndoñe tsabá monjánama, y nyetsca bacna soyënga imojánama boyabása o shembásaftaca, y ínýengaftaca y bayëngaftácnaca. Chíyeca chënga tmonjansufrí chë ññesheca castigo nyetsca tescama, y chca, nyetsca entšangbioye tmojaninýanýa, ndayá yochjopása chë chca Bèngbe Bètsábioye ndoñe thontsobedecenáftaca.

⁸ Cachcá, chë ndoñe ndegombre soyënga buátëmbayëngnaca chë mo otjenayoquécá tmojáninýe soyëngama jtsichámuana, y chë causa cachëngbe cuerpëngama bacna soyënga jtsamana, chë mando bomnëngbioye

jtsëbátanana, y chë espíritënga obenana bomnëngbiana ndoñe tšabá ntsichámuana, mo chëngbioye cuafjoyanguangcá.

9 Pero ni mo chë angelëngbe mandayá Miguel quem buatëmbayëngcá tojanma. Cha chë diabloftaca ibojentsjaná ora, Moisesbe cuerpama cháftaca jabuachana ibojanenatsësnaye ora, ndoñe tonjanenñemó jayanama chë diablëbiana podessa soyënga, jóyenguanguse, ndayá nÿe mëntšá ibojauyana: “Bëngbe Utabná chacmácacana ca.”

10 Pero quem buátëmbayëngna, chë ndoñe tontsësertana soyëngama podessa jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tšabá josértama juabna ndbomnënga, ndayá chentsana tmojtsësertancá jtsamëse, jamana chënga nÿetsca tescama castigánënga jtsemnana chamotsajnama.

11 ¡Tša lastema quem buátëmbayëngbiana! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catšátbioye tbojanóba. Chënga crocénana juácánama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

12 Chëngna tšëngaftangbiana jtsemnana mo canÿe ndëtsenga luarentše canÿe bëts tsengacá, tšëngaftangtaftaca tmojenutaná ora, cánÿiñe jasama mo Jesucristëñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nÿe chënga tšabá jtsomñama soyënga jtsamëse, y chënga chama ndoñe ntsëuatjana. Chënga nÿe cachëngbiana jtsantješnana, inÿëngbiana ndoñe. Chënga tša jtsašebuachiyana, pero chëngbe buátëmbana soyënga inÿëngbiana tondayama ntsoservénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshënga y buashanëshëngcá, chë jashacama tojtsemna ora tondaye shajuana causa.

13 Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga imobomnana. Chca, chënga jtsemnana mo mar béjayoca oleshëngcá, chentsana espumushënga bëtscá tsenguësheca jtsóocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentsana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿiñe luarentše nÿetsca tescama chënga chamoquedama.

14 Adánbentšana chnënguana pamillo entšanga tmojánachnëjna chentsana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiana, mëntšá tojánayana ora: “Smochjinÿe, Bëngbe Utabná echanjabo bëtscá uaranga angelëngtaftaca,

15 nÿetsca entšangbiana jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nÿetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” —tojánayana.

16 Chënga mondmëna chë tšabe soyëngama nyëts tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nyë cachënga tšabá jtsomñama, y puerte botamana palabrënga jtsichámuana uámanënga jtsenobiamnyëse, y tšabe soyënga inyëngbioye jtsëtsënyana, chënga tšabá joquédama y chëngbentšana ndayánaca josháchiñama.

Ošbuáchiyënga jábuayenama

17 Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tcmojanëyanama, mëntšá:

18 “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nyë cachënga tšabá jtsomñama bacna juabnëngaca, y tšëngaftanga cmochantsëbuayajuana ca.”

19 Chënga mondmëna chë ošbuáchiyënguentšë nyëtscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

20 Pero tšëngaftanga, atšbe bonshánënga, nyëts tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá.

21 Yejuana šmochtsantješna tšëngaftanga nyëts tempo chašmotsiyenama, Bëngbe Bëtsá cmababuánjeshanama jtsejuabnyëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nyëtsca tescama yomna tšabe vida chašmotsebonnama.

22 Chë inyë ora aiñe y inyë ora ndoñe Jesucristbeñe ošbuáchiyana bomnënga šmochtsalastemana.

23 Bëtscá šmochtsama, báseftanga chë uabouana castigüentšana atsebácanënga chamotsemnana, mo chënga iñeshentšana cuaftëbuacancá. Inyëngbiama chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nýa tondaye chacmondëtsogusetana.

Judas, Bëngbe Bëtsá jëtschuyayama

24-25 Chë nyë canyë Bëngbe Bëtsá, bëngbe Atsebacayá obenana endbomna tšëngaftanga jtsanýenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canyë puerte uamaná y obená bëtsemnana chaojinýanyé ora. Bëngbe Utabná Jesucristbeyeca, nyëtscanga Bëngbe Bëtsá chamotsatschuaná; y cha puerte bëtsá chausomñe, nyëts obenana bomná y nyëts mando bomná, nyëts tempscana, tempo, mora y nyëtsca tescama. Chca chaotsemna.

Apocalipsis

Ndayá quem librésañe yomna

¹ Quemuentse entsábemana ndayá Bëngbe Bëtsá Jesucristbiye tojanin'yinë, chë Bëngbe Bëtsabe oservénënga cha cháuin'yän'yema, ndayá jopásama yojtsobecuama chënga chamotsetatšëmbuama. Jesucristo chama chabe ángel tojichmó, chë soyëngama atše, Juan, chë Jesucristbe oservenábioye chašuin'yän'yema.

² Y atše sënjayana lempe ntšamo ndegombre yomncá lempe chë tijinye soyëngama, chë Bëngbe Bëtsabe buayenana soyëngama y chë Jesucristo šonjanianana ndegombre bëtsemna soyëngama.

³ Oyejuayá nda tojtsalía, y oyejuayënga ndëmuan'yënga botamana tmojtsuanana quem yochjopása soyëngama, chë muentše entsabemancá ndegombre tmojóyeunanga, er chca jopasa tempo entsobeco.

Asia luaroca osbuachiyëngcá enefjuanënga jacheuayama

⁴ Atše Juan, sentsabiamná chë Asia luaroca cany'sëftañe osbuachiyëngcá enefjuanëngbiama. Atše, Bëngbe Bëtsá sëntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebonna, Bëngbe Bëtsábentsana, chë cany'sëfta espíritëngbentsana y Jesucristbentsana. Bëngbe Bëtsá, chë mora endmëná, enjamná y sempre echantsemná; chë cany'sëfta espíritënga, chabe uámana puesto natsanoica mondmënënga;

⁵⁻⁶ y Jesucristo, chë ntšamo Bëngbe Bëtsabiama yotatšëmbcá ndegombre oyebuambnayá, chë natsaná ndabiama Bëngbe Bëtsá tojama obanënguentšana cháuatayenama, y n'yetsca quem luarentša mandadëngbe amëndayá. Cristo šondábabuan'yëshana y bëngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservënana. ¡N'yetscanga n'yets tempo chamotsin'yän'yá Cristo puerte bëtšá y uamaná bëtsemnama y obenana n'yetsca tescama yobomnama! Chca chaotsemna.

⁷ Mouenënga. Cristo jantšetëshënguiñe echanjésabo.

Chábioye n'yetscanga mochanjin'yë,

chë tmonjanrucificágnaca;

y quem luarentša n'yetsca entšanga puerte ngmënaca mochántsemna

y mochantsošachna chábeyeca.

Ndegombre, chca chaotsemna.

⁸ "Atše sëndmëna chë n'yetsca soyënga bojatšayá y pochocayá ca," Bëngbe Utabná Bëngbe Bëtsá tojayana. Cha chë sempre endmëná, enjamná, n'yets tempo echantsemná, chë n'yets obenana bomná.

Juan mo otjenayoquëcá Cristbiama tojánin'yë

⁹ Atše Juan, Jesucristbeyeca tšëngaftangbe catšata, cháftaca cán'yinë mo canyácá bëtsemnama, cach tšëngaftangcá sëndëpadecena, tšëngaftangcá chanjéftsashjache Bëngbe Bëtsabe amëndayoye jamashënguama, y tšëngaftangcá Bëngbe Bëtsábeñe jtsobátmanëse, uantado sëndmëna chë padecena soyënguiñe. Bëngbe Bëtsabe palabra sënjánabuayinmana y

Jesusbiana ntšamo ndegombre endmëncá sënjanóyebuambnama, atše šmonjetsanëtsëna mar béjayoca canýe fshantsentše, Patmos ca uabáinoca.

10 Y tonjanopasá, canýe tmengo, chë ošbuachiyënga Bëngbe Utabnábioye cánýiñe jëtschuayama te, atše sënjanoquedá chë Uámana Espiritbeyeca corente mandaná, mo otjenayoquécá soyënga sënjëtsonýaye, y atšbe stëtsoica canýe jabuache oyebuambnayana sënjanuena, mo canýe trompetëfjua cuafjuajatëcá;

11 Mëntšá šontsanatsëtsná: “Canýe librëšañe mábema lempe ntšamo consonýacá y cochjuíchmua chë Asia luaroca canýsëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

12 Sënjanobuértana jinýama nda chca šojtsanatsëtsná, y chca sënjanma ora, sënjáninýe canýsëfta castellano candelerëšënga;

13 y chë canýsëfta castellano candelerëšënguiñe tsëntsaca canýa sënjáninýe, mo entšacá inýná, canýe bën entšayá uichëtjoná, y cochóntscoca canýe tëntša castellano uasnanëjaca.

14 Chabe stjënashana uafjantsësha, puerte uafjantsësha mo canýe oveshabe boboshëshacá, y chabe fšñëbenga mo iñeshcá enjëtsinýna.

15 Chabe shecuatsënga enjëtsëbuashinýinýana mo bronscá, ndaybé natana iñëjana tcojuchnëngo enabé chaotsemnana y chentsana entšëjuaca becá tcojajojó corente chaotsebuashinýinýanama; y chabe oyebuambnayana jabuache enjëtsenana mo bëtscá béjaye cuaftsebuachquëcjancá.

16 Chabe catšbioica cucuatšifne enjëtsatbëna canýsëfta estrellënga, y chabe uayoicana enjëtsobocana canýe espadëja, nyëts utoicajana puerte efsánëja, y chabe jubíá tša enjëtsëbuashinýinýana, mo chë shinýe corente, lempe ntšamo tojobenacá tojtsebuashinýinýana orcá.

17 Cha sënjáninýe ora, chabe shecuatšentše mo obanacá sënjánshajaye. Pero cha, chabe catšbioica cucuatše átšbeñe jajájuase, šonjanianana: “Ndoñe matauatjana; atše sëndmëna chë nyëtsca soyënga bojatsayá y pochocayá,

18 chë sempre vida bomná. Atše obaná sënjamna, pero mora nyëtsca tescama vida sëntsebomna. Atše obenana sëndbomna, y chë obenánaca entšángbioye ndoñe quenátamna infernoca nyëtsca tescama castigánënga jtsemnana, mo nyëts tempo cuaftsobancá.

19 Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama.

20 Mëntšá endmëna chë atšbe catšbioica cucuatšifne tconjinýe canýsëfta estrellëngaca y chë canýsëfta castellano candelerëšëngaca: chë canýsëfta estrellënga montsinýinýná chë canýsëftañe ošbuachiyëngcá enefjuanëngbeñe chamotsemándama uámana ichmónënga, y chë canýsëfta candelerëšëngna chë canýsëftañe ošbuachiyëngcá enefjuanënga.”

2

Efesoca ošbuachiyëngcá enefjuanënga jábuayenama

1 Mëntšánaca cha šonjanianana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Měntšá entsichamo chë chabe catsbioica cucuatšĩne canÿsëfta es-trellënga entsatbëná y chë canÿsëfta castellano candelersënga luarëjana entsaná:

² Atše lempe sëndëtatšëmbo ntšamo tsëngaftanga šmoyenana; atše corente sëndëtatšëmbo tsëngaftanga jabuache šmotrabájama, y ntšamo tsëngaftanga Bëngbe Bëtsábeñe jtsobátmanëse šmnëtsauantana padecena soyënguĩne šmojtsemna ora. Y átšnaca sëndëtatšëmbo tsëngaftanga ndoñe šmontsobena jtsëuantánana ntšamo bacna entsanga tmojtšamcá. Atšnaca sëndëtatšëmbo tsëngaftanga yejuana šmojarrepará y becá šmojenojuabó jinÿyama chë Jesucristbe ichmónënga imomna ca tmojtšichamëngbiama; pero ndegombre chënga ndoñe chca quemátsmëna; y chca šmojamayeca, tsëngaftanga mora šmontsetátšëmbo chënga bosterënga imomnama.

³ Padecena soyënguĩne becá šmojoboyá y chca ora, Bëngbe Bëtsábeñe šmobátmana. Chë soyënguĩne šmojasufrí, tsëngaftanga atše šmoservënama; y tsëngaftanga chca šmondëserveda, ainaniñe añemo jtsebomnama ntjajbanacá.

⁴ Pero canÿe soye sëntsebomna tsëngaftangbe contra jayanama: Tsëngaftanga mora ya ndoñe cachca bonshánana quešmátsbomna ni atšbiana ni nyetsca entsangbiama, ntšamo átšbeñe jtsošbuáchiyama šmonjanbojatsé orcá.

⁵ Menójuabonga ntšamo chë tempo šmonjábobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tsëngaftangbiyoe chanjá jabuache jetsacastígama, jtsapochócantscuana, mo chë tsëngaftangbe cuenta entsemna candelersë chabe puestentšana cuaftsejuanacá. Chca chanjama, tsëngaftanga juabnayana ndoñe chašmonjatrocasa.

⁶ Pero tsëngaftangbe pavor quem tsábe soye šmontsebomna: Tsëngaftanga šmonduábotena lempe ntšamo chë nicolaíta ca uabaina entsanga tmojtšamcá, ndayá átšnaca sënduábotena.

⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentsana tsábá chamojábocana mo ayënjanayëngcá, chëngbiama chanjama chë nyetsca tescama yomna tsábe vida chamotsebomnama, y chca chënga mochántsemna mo chë nyetsca tescama yomna tsábe vida jtsebomnama betiyeshentšana cuaftsesacá, chë entsanga sempre oyejuayënga mondbetsemno ca” —cha šonjaniyana.

Esmirnoca ošbuachiyëngcá enefjuanënga jábuayenama

⁸ Měntšánaca cha šonjaniyana: “Esmirna bëts pueblentse ošbuachiyëngcá enefjuanëngbeñe chaotsemándama uámana ichmonábioynaca mēntšá mabobema:

Měntšá entsichamo chë nyetsca soyënga bojatsayá y pochocayá, chë tonjanobaná y ndabiana Bëngbe Bëtsá tonjama cháuatayenama:

⁹ Atše sëndëtatšëmbo tsëngaftanga tša jabuache šmojasufrima y ndbomnjémënga šmomnama, pero ndegombre Bëngbe Bëtsábíocana bëtscá tsábe soyënga šmondëtsóbonñe. Y sëndëtatšëmbo tša bacá tsëngaftangbiama mondoyebuambná chë judiënga imomna ca ichámënga, pero ndoñe ntšamana mo chë Bëngbe Bëtsábe bocacana entsangcá; chca, chënga mondmëna mo Satanasbe entsangcá, nÿe chábíoye jtseservëne y jtsatschuanayëse.

10 Ndoñe matauatjengana chë ndoñe yapa bën y tšëngaftanga šmochjasufrima, er Satanás echanjama tšëngaftanguentšënga báseftanga cárceloye ínÿenga chacmëtámíama, jinÿama ntsachetšá Crístbeñe ošbuáchiyana šmobomnama, padecena soyënguñe šmojtsemna ora; y entsamna baseftayté jasúfríana. Sempre bëtscá ošbuáchiyana, y ainaniñe bëtš añemo šmochtsebomna, masque jobanámnaca chacmotsamna, Crístbíama trabájaye causa. Chca chašmojtsamëse, atše chanjama tšëngaftanga chašmotsebomnama mo canÿe uacanana soycá, chë nÿetsca tescama yomna tšabe vida.

11 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentšana tšabá chamojábocana mo ayëñjanayëngcá, ndegombre chënga ndoñe queochátamna játauatjana nÿetsca tescama castigánënga jatsmënama ca” —cha šonjaniyana.

Pérgamoca ošbuachiyëngcá enefjuanënga jábuayenama

12 Mëntšánaca cha šonjaniyana: “Pérgamo bëtš pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nÿets utoicajana puerte efsana espadëja entsatbëná:

13 Atše sëndëtatšëmbo ntšamo yomna tšëngaftangbe oyenentše, canÿe luare ndayentše Satanás entšángbioye puerte uamënda. Masque chca, tšëngaftanga sempre nÿe atše šmondëtšeserverna, y ndocna te chešmáisayana átšbeñe ndoñe šmondošbuaché ca, ni mo Antipas, chë canÿe nÿets tempo atšbe ustoná y atšbíama ndegombre oyebuambnayá, ínÿenga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

14 Pero básefta soyënga sëntsebomna tšëngaftangbe contra jayanama:

Chentše tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿenga diosënga yojamna ca imojanajuabná soyënga jadórama uátšëmbona saná chë Israeloca entšanga chamosama, y shembása o boyabáaftaca bacna soyënga chamotsamama.

15 Chëntšnaca ínÿenga montsemna, y chëngna chë nicolaitëngbe buatëmbana soyënguñe mondošbuaché, y chca buatëmbana soyënga ndoñe tšabá quenátsmëna.

16 Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndoñese, atše betscó tšëngaftangbioye chanjá, y chë chca buatëmbana soyënguñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadëjaca.

17 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentšana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëse, ndayá Bëngbe Bëtšá tempo entšángbioye ndoñe tonjinÿanÿé; y canÿe fjantse ndëtšëtëma chanjáyentsbuachiye, chënga oyejuayënga šmojábemama. Chiñe canÿe tsëm

uabaina echantsábemana; ndocná chë uabaina quenátabatma, ndayá nÿe chë chamojóyëngacñënga ca” —cha šonjanaryana.

Tiatiroca ošbuachiyëngcá enefjuanënga jábuayenama

¹⁸ Mëntsánaca cha šonjanaryana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronce shecuatšënga bomná:

¹⁹ Atše sëndëtatšëmbo ntšamo tšëngaftanga šmoyenama; sëndëtatšëmbo ntsachetšá tšëngaftanga Bëngbe Bëtsábioye y nÿetscángbioye šmababuánÿeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservénama, ntšamo tšëngaftanga ínÿenga šmojuabuache y ntšamo Bëngbe Bëtsábeñe jtsobátmanëse becá šmojoboyá padecena soyënguiñe; y sëntsetatšëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatsé orscama.

²⁰ Pero canÿe soye sëntsebomna tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservénënga entsaíngña, shembása o boyabásaftaca bacna soyënga chënga chamotsamama, y chë ínÿenga diosënga yojamna ca imojanajuabná soyënga jadórana uátšëmbona saná chamosama.

²¹ Cha sënjuená atše chjacastíga ca, chca juabnayana ndoñe tonjatrocasa, y canÿe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošena.

²² Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiama chanjama puerte chamosufrima;

²³ y chë shembásabe básënga chantsébaye. Chca, nÿetsquénache ošbuachiyëngcá enefjuanënga mochántsetatšëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentšá, chca bacna soye cháftaca tojamá, ntšamo ibojtsomerecencá chanjacastíga.

²⁴ Pero tšëngaftangbentše, ínÿenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachënga, y chë ínÿenga imuábuatma Satanabe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inÿe más toto soye chašmotsamama.

²⁵ Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábocana šmojóyëngacñe soyënga yomncá, atše quem luaroye jesabámëntscuana.

²⁶ Chë padecena soyënguentsána tšabá chamojábocana mo ayënjanyëngcá y ntšamo atše sëndëmandacá chamojtsamënga, chë quem luarentse ya ndoñe más vida jesebomnámëntscuana, atšbe obenana chanjátšataye nÿetsca mándayëngbentšá entšángbeñe jtsëmándayama,

²⁷ ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canÿe hierro varëfjaquécá, y

chëngbe contra chamojtsemnëngbioye mochántsapochocaye, mo nÿe matbajënga tmojtsëtsjanjnacá.

²⁸ Y chë jabínÿnama ora bínÿnaye estrélnaca chanjátšataye.

²⁹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

3

Sardisoca ošbuachiyëngcá enefjuanënga jábuayenama

¹ Mëntsánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë Bëngbe Bëtsabe canÿsëfta espíritënga y chë canÿsëfta estrellënga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiana ínÿyenga tša jtsichámuana Bëngbe Bëtsá jasérviana bëtscá šmojtsama ca, pero ndegombre tšëngaftanga nÿe batšatema šmontsama, y chca, chabiana mo obanëngcá šmondmëna.

² Botamana šmochjenóbobonÿe y más šmochtsama chë Bëngbe Bëtsá jasérviana cabá šmondama básefta soyënga. Ndoñe yapa quenatájamna chë tšabe soyëngnaca chašmotsajbanama, er atše sënjinÿe chë Bëngbe Bëtsábioye jasérviana ntšamo jtsamëse šmoyencá, atšbe Bëtsabiama ndoñe yapa tšabá quenátšmëna.

³ Asna, šmochtsenójuabnaye ndayá Bëngbe Bëtsábocana šmojóyëngacñama, y chabiana šmojouena soyënguínacá. Ntšamo chë soyënga yomncá šmochtsiyena, juabnayana šmochjatróca y šmochjónťša bëtscá jtsamana Bëngbe Bëtsá jasérviana. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocace, nÿe ndeolpe chanjá tšëngaftangbioye, mo canÿe atbëbanacá, chabiana ndocná tontsejuabná ora, y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

⁴ Masque chca, Sardisentše tšëngaftangbeñe básefta entšanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántšajna uafjantsëjuangá uichëtjonënga, chënga chca mercedo montsebuajónayeca.

⁵ Chë padecena soyënguentšana tšabá chamojábocana mo ayënjayanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochjónÿenëngbe uabaina enduábemana libréšentsana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

⁶ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

Filadelfioca ošbuachiyëngcá enefjuanënga jábuayenama

⁷ Mëntsánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Měntsá entsichamo chë uamaná y ndegombre oyebuambnayá, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntsoobenana jamama chca ndoñe chaondětsemnama, y ndayá ndoñe chaondětsemnama tojamandá ora, ndocná ntsoobenana jamama añe chaotsemnama:

⁸ Atše lempe sëndétatšëmbo ntšamo tsěngaftanga šmoyenama. Minyěnga, atše sěnjama tsěngaftanga bětscá tsábe soyěnga chašmotsebobmnama, y ndocná quenátobena jamama chca ndoñe chaondětsemnama; y chca entsemna mo atše tsěngaftangbiam canyě bēsáša cuafjatěfcá, y chěša jtatámiam ndocná quenátobena. Atše sëndétatšëmbo tsěngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entsānga ndoñe šmondmēna ca.

⁹ Atše chanjama, chë mo Satanásbe entsāngca imomnēnga, nyě chábioye jtseservénēse y jtsatschuanayēse, chë judiēnga imomna ca íchámēnga, pero chë Běngbe Bětsabe bocacana entsāngcá ndámēnga y bosterēnga, chēnga tsěngaftangbioye chamua y tsěngaftangbe delante chamoshamentšé, tsěngaftangbiam respeto jinŷanŷiyama, y chca, chēnga chamotsetátšēmbo atše sempre chababuánŷeshanama.

¹⁰ Atše tcbonjanamēndá, Běngbe Bětsábeñe jtsobátmanēse, lempe chašmotsoboyá padecena soyēnguiñe, y tsěngaftanga chca šmonjama. Chíyeca, atše puerte tsábá cbochántsanŷena, chë quem luarentše oyenēnga nyetscanga jasúfriama y padecena soyēnguiñe jtsemnama chaojtsemna ora, Běngbe Bětsábeñe añe o ndoñe mondošbuáchema jinŷanŷiyama.

¹¹ Cachiñe quem luaroye betscó chanjésabo. Sempre šmochtsama ntšamo mora šmondamcá, y Běngbe Bětsábíocana šmojóyēngacñe soyēnga šmochtsinŷena; chca ndocná chaondobená ndayá jamana, y chë sóyeca chaoma tsěngaftanga ndoñe chašmondóyēngacñe ndayá Běngbe Bětsá chë chábioye jtseservénama ndoñe tmontsajbanángbioye yochjatšataycá, chēngbe uacanana soye.

¹² Chë padecena soyēnguentšana tsábá chamojábocana mo ayējanayēngcá, chēngbiam atše chanjama sempre Běngbe Bětsabe delante chamuesomñama, y chca, chēnga mochántsemna mo chë Běngbe Bětsabe bětš yebnentša ucuatjoniñcá; ndocna te Běngbe Bětsábentšana quemocháisebocana; y chēngbeñe atšbe Bětsabe uabaina chanjuábema y atšbe Bětsabe bětš pueblentša uabaina, chë tsēm pueblo Jerusalén, chë celocana yobá pueblo, Běngbe Bětsábíocana. Y chēngbeñnaca chanjuábema atšbe tsēm uabaina. Lempe chca chanjama jinŷanŷiyama chēnga Běngbe Bětsábēnga mochtsemnama.

¹³ Chë jouenama tmojtsoebenēnga, chamouena ndayá Espiritu chë ndayenache ošbuachiyēngcá enefjuanēnga yojtsětsětsnacá ca” —cha šonjaniana.

Laodiceoca ošbuachiyēngcá enefjuanēnga jábuayenama

¹⁴ Měntsánaca cha šonjaniana: “Laodicea bětš puebloca ošbuachiyēngcá enefjuanēngbeñe chaotsemándama uámana ichmonábíoyenaca mēntsá mabobema:

Měntsá entsichamo chë sempre Ndegombrá endmēná, chë Běngbe Bětsabe soyēngama ndegombre oyebuambnayá, y chë ndábeyeca Běngbe Bětsá quem luare tojanmá:

15 Atše lempe sëndëtatšëmbo ntšamo šmoyenama. Atše sëntsetatšëmbo tšëngaftanga ndoñe yapa šmontseboše Bëngbe Bëtsá jaserviama, pero Bëngbe Bëtsabe buayenana soyënga ndoñe lempe šmontsaboté. Y chca, nÿe batšatema šmojtseboše Bëngbe Bëtsá jaserviama; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye!

16 Chca, tšëngaftanga tibiye buyeshcá šmondmëna, y ndoñe quešmátseboše bëtscá jamama, pero Bëngbe Bëtsabe soyënga ndoñe lempe šmontsaboté. Chíyeca atše sëntsejuabná jtsëbatena, mo nda tibiye búyeshe tojëtšbuashëtjácá, chcaye ndoñe bondogustana causa.

17 Er tšëngaftanga jtsichámuana bomnënga šmomna ca, puerte tšabá šmojábocana y tondaye cmontsabuáshebenana ca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebenama. Chca, tšëngaftanga šmontsemna nÿa ndoñe tšabá, inÿenga ngmënana chacmotsabamna, mo ndbomnjëmëngcá, mo jtanëngcá, Bëngbe Bëtsabe soyëngama ntsosertancá, y mo enašëngcá, bëtscá Bëngbe Bëtsabe soyënga ntsebonncá.

18 Chíyeca cbabuayená, átsbentšana chašmuatsjinÿe chë Bëngbe Bëtsabe soyënga y uámana soyënga, mo chë ena castellano jabemama, inëjana fjëchnënguëse castellano átsbioye šmojtsontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonÿá chë ba bacna soyënga ntšamo tšëngaftanga šmojtsamcá. Smochjaleséncia atše chacbëjabuache tšëngaftanga Bëngbe Bëtsabe bominiñi tšábenga chašmotsemnama, mo juichëtjuama uafjantse entšayá átsbioye šmojtsantšabuamnañcá. Chca smochjama, tšëngaftanga Bëngbe Bëtsabe delante ndoñe chašmondëtsëuatjama. Smochjaleséncia atše chacbëjabuache tšëngaftanga Bëngbe Bëtsabe soyëngama chacmósertama, mo tšëngaftanga bominiñe šocanama shnana átsbioye šmojtsontšabuamnañcá. Chca smochjama, Bëngbe Bëtsabe soyëngama puerte tšabá chacmósertama.

19 Atše chë sëndábabuanÿeshanënga sëndbaucácana y sëndbábuayenaye. Chíyeca, lempe ntšamo šmojobenacá smochtsama Bëngbe Bëtsá jaserviama, y juabnayana smochjatróca, y nÿets tempo puerte smochtseboše Bëngbe Bëtsá jtseservénana.

20 Nderado canÿe tšabe amigo yebnoye tojabo y tojachembo, tšëngaftanga smojouenëse y bësása šmojebiatëfjëse, cha jamashënguana, y cánÿiñe cháftaca joyejuayana y jasana. Cachcá, atše entšanga sëntsachembuana chašmolesenciá chëngbe ainaniñe jtsiyenama. Nderado nda šojóyunase, atše chanjámarshëngo chabe ainaniñe jtsiyenama, y nÿets tempo cháftaca cánÿiñe mo canÿacá chanjëftsemna.

21 Chë padecena soyënguentšana tšabá chamojábocana mo ayëñjanayëngcá, atše chanjama chënga puerte bëtsëtsanga chamotsemnama ntšamo atše sëndmëncá, y átšeftaca chamótbemama, atšbe uámana themanentšë jtsëmándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uámana themanentšë tijotbemcá.

22 Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá” —cha šonjaniana.

4

Chë Ainënga Bëngbe Utabnabe uámana tbemanentša natsana imojtsechuanaye

¹ Chentšana mo otjenayoquécá sënjáninÿe. Sënjanrrepará y sënjáninÿe celoca canÿe bësásha enjétsatëfjna, y chë natsana sënjanuena oyebuambnayana, chë enjamna mo canÿe trompetëfjua cuafjuajatëtcá, mëntšá šonjétsatsaye: “Moye másëngo, atše chochanjinÿinÿiye ntšamo más chcoye yochjopasacá ca.”

² Cachora, chë Uámana Espíritbeyeca, mo atšbe ainana celoca cuaftsemncá atše sënjanuquedá, y sënjáninÿe celoca enjëtsemna canÿe reybe uámana puesto, y chentše canÿa enjëtsetbemana.

³ Chentše enjëtsetbemaná enjamna, puerte tëshinÿná mo jaspe ndëtsbecá, puerte buanganá mo cornalina ndëtsbecá, y chë uámana puesto shëconana canÿe tsëcuacuato enjamna, y enjëtsebuashinÿinÿana mo canÿe esmeralda ndëtsbecá.

⁴ Chë reybe uámana puesto juachajana, inÿe uta bnëtsana y canta puesto sënjáninÿe, y chiñe uta bnëtsana y canta bëtsëjëmënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtsebestšajona.

⁵ Chë uámana puententšana enjëtsohocana tcuinÿëjënga, becá shauenanana y juesasanana; y chë uámana tbemaniñentša natsanoicna, canÿsëfta uajuinÿanësha enjëtšangbototjuana; chë uajuinÿanëshangá entsayana chë Bëngbe Bëtsabe canÿsëfta espíritënga.

⁶ Y chë uámana puententša natsanoica enjëtsemna mo canÿe mar bejaycá, tëshinÿniye mo canÿe cristal ca uabaina ndëtsbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nyëtsañe fšnëbéngaca, natsanoica y stëtsaica.

⁷ Chë natsana Ainá enjamna mo canÿe leoncá, chë inÿe Ainá mo canÿe torošcá, chë inÿe Ainá enjánbomna mo canÿe entsabe jubiacá, y chë inÿe Ainá mo canÿe águila tojtsongüefjnacá.

⁸ Chë canta Ainënga, cada ona chnënguana juatëngmiáša enjanábomna, y tsoicajana y shjoicajana nyëtsañe fšnëbénga monjánbomna. Y chënga nyëts tempo, ntjochnacá mëntšá monjánichamo:

¡Uamaná, Uamaná, Uamaná, Bëngbe Utabná,

Bëngbe Bëtsá nyëts obenana bomná,

nda enjamná, endmëná y sempre echanjëftsemná ca!

⁹⁻¹⁰ Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puententše tbemaná, chë nyëts tempo y nyëtsca tescama oyená. Chënga puerte respeto chabiana monjëtsebomna y bëtscá tmontanchuá. Cada ora chënga chca tmonjanma ora, chë uta bnëtsana y canta bëtsëjëmënga amëndayënga, chë uámana puententše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

¹¹ Aca nyëts mercedo condëtsobuájoñe, Bëngbe Utabná y Bëngbe Bëtsá, entšanga chamotsinÿanÿnama, aca puerte bëtsá comnama, y chamotsichamo

aca nyëts respeto buajoná comna, y nyëts obenana bomná comna ca, er aca nyëtsca soyënga tcojama;

aca icnabóseyeca chë soyënga yojtsemna y aca chca tcojanma ca.

5

Chë uabemana uándmanana tsbuanácha y chë Oveshatema

1 Chë uámana puestentše enjetsetbemanabe catsbioica cucuatšiñe canye uándmanana tsbuanáchanaca sënjáninýe, y nyétsañe enjétsabemana tsoicajana y shjoicajana, y canýsëfta tsengájase sellëngaca enjétsajandmanana.

2 Y canye ángel puerte obenana bomná sënjáninýe, y cha mëntśá enjétsayebuache: “¿Nda mercedo yobuájona, quem uándmanana tsbuanácha jutëfjonama y chë sellënga jutsécama ca?”

3 Pero, ni celoca, ni quem luarentše, ni quem luarentša jashenoye, ndocná quenjatsmëna obenánaca chë uándmanana tsbuanácha jutëfjonama, ni juinýama.

4 Y atše puerte sënjánenobošachna, er ndocná ntjónýnana mercedo buajoná chë uándmanana tsbuanácha chautëfjonama, ni chauinýama.

5 Pero canya chë bëtsëjemënguentsá sonjaníyana: “Ndoñe más matenóbošachena; mouena, chë Judabe pamillentsá, León ca uabobainá, mando y obenana bëtsebomnama, chë rey Davídbentsana Entśá, tonjayënjaná; cha entsobena chë uándmanana tsbuanácha jutëfjonama, y chë canýsëfta sellënga jutsécama ca.”

6 Chora sënjáninýe, chë uámana puesto y chë canta Ainënga y chë bëtsëjemëngbe tsëntsaca, canye Oveshatema tsanana, pero enjétsinýna mo cuafstobacá. Chë Oveshatema enjábomna canýsëfta tsëtjonëše y canýsëfta fšněbé. Chë canýsëfta fšněbé monjaninýinýná chë Bëngbe Bëtsabe canýsëfta espíritënga, chë Bëngbe Bëtsá nyets quem luarëjana tojánichamonga.

7 Chë Oveshatema tonjanobeconá y chë uándmanana tsbuanácha tonjanaca, chë uámana puestentše tbemanabe catsbioica cucuatšentsana;

8 y chabe cucuatšiñe tonjanaca ora, chë canta Ainënga y chë uta bnëtsana y canta bëtsëjemënga amëndayënga chë Oveshatembe shecuatšentše tmonjanoshamentśé. Nyetscanga monjétsëtbëna arpangá y castellano codbenga jútjena inciensiýeca; chë codbenga inciensiýeca enjamna chë Bëngbe Bëtsabe entsãnga tmojayana palabrënga, cháftaca jencuëntama ora.

9 Y quem tsëm canto montsancántaye:

Aca mercedo condëtsobuájoñe, chë uándmanana tsbuanácha chacuacama y chë sellënga chacutsécama;

er acbe buiñe juabuáshanëše tconjanóbana, y chca enjamna mo crocénana cuafjëtšajocá, Bëngbe Bëtsabíama chamotsemnana, entsãnga nyetsca cachca buiñe bomnënguentsana, nyetsca biyana bomnënguentsana, nyetsca canye entsanguentsana, y nyetsca mándayëngbentsã entsanguentsana.

10 Aca tcojama chënga chamotsobena ácaftaca jtsemándayama y uámanënga chamotsemnana, Bëngbe Bëtsábíoye mo bachnangcá chamot-seservénama,

y quem luarentše chënga montsemánda ca —chënga monjëtseversíaye.

11 Y chca sënjëtsonýaye ora, mallajta angelëngbe oyebuambayana sënjanuena, y chënga monjëtsemna chë uámana puestentše, chë Ainënga y chë bëtsëjemënga amëndayëngbe shëconana. Nyetsá bëtscá angelënga monjëtsemna, corente mallajta;

12 y chënga mëntśá monjétsayebuache:

¡Chë Oveshatema cuafjobacá endmëná, mercedo endëtsobuájoñe, nyets obenana, nyets bomnana,

nÿets osertánana y nÿets añemo chaotsebomnama,
y entsanga chabiama chamotsichamo cha nÿets respeto buajoná yomna ca,
y chamotsinÿanÿnama cha puerte bêtsá y uamaná yomnama,
y nÿetscanga chamotsatschuanama ca! —chênga monjétsayebuache.

¹³ Y sênjanuena, lempe ntšamo Bêngbe Bêtsá tojanmcá aina soyênga, celoca,
quem luarentše, quem luarentša jashenoye y chë mar béjayoca, chêngnaca
mêntšá monjétsichamo:

¡Chë uámana puestentše tbemanábioye y chë Oveshatema nÿetscanga nÿets
tempo y nÿetsca tescama chamótsatacheuanaye
y chamotsichamo chata puerte uámanata y nÿets respeto buajonata ibomna
ca,

y chamotsinÿanÿná chata puerte bêtsétsata y obenata bêtsemnama ca!

¹⁴ Y chë canta Ainêngna monjétsichamo: “Chca chaotsemna ca.”
Y chë bêtsêjémênga amëndayêngna tmonjanoshamentšé y chátbioye
monjétsatacheuanaye.

6

Chë Oveshatema chë canÿsêfta sellênga tonjanétsécá

¹ Chentšana más sênjáninÿe; chë Oveshatema chë canÿsêftentsana natsana
sello tonjanétsécá ora, sênjanuena canÿa chë canta Ainênguentšana puerte
jabuache, mo cuafjajuesascá, mēntšá enjétsichamo: “¡Mabo ca!”

² Sênjanrrepará y sênjáninÿe canÿe fiantse couaye, y chábeñe enjetsen-
jaquená canÿe arquêja enjétsatbēna. Chábioye canÿe coronêsha tmonjaníyé,
y mo canÿe ayênjanayacá tonjéftsanbocna, y cabá más jatsÿênjanámna.

³ Chë Oveshatema chë inÿe sello tonjanétsécá ora, sênjanuena chë inÿa chë
canta Ainênguentšana mēntšá enjétsichamo: “¡Mabo ca!”

⁴ Y inÿe couaye tonjánbocna, canÿe buanganá; y chë enjetsenjaquená
obenana tonjanóyêngacñe jamama chë fshantsentša natjêmbana vida chaot-
sopochocama, entsanga chamotsenóbama; y canÿe bêts espadêja tmon-
janoyé.

⁵ Chë Oveshatema chë inÿe sello tonjanétsécá ora, sênjanuena chë inÿa
chë canta Ainênguentšana mēntšá enjétsichamo: “¡Mabo ca!” Sênjanontješé y
canÿe ftsenga couaye sênjáninÿe, y chë enjetsenjaquená canÿe romanêša
enjétsêtbēna.

⁶ Y chë canta Ainêngbeñe canÿe oyebuambnayana mēntšá sênjanuena: “Nÿe
canÿe kilo trigo canÿe tesca trabajuama, y unga kilo cebadá canÿe tesca
trabajuama; pero chë aceitiye y chë vínoyna ndoñe cattsepochócaye ca.”

⁷ Chë Oveshatema chë inÿe sello tonjanétsécá ora, chë ústonoca Ainá
enjétsichamo: “¡Mabo ca!”

⁸ Sênjanontješé y canÿe shatsêsiye couaye sênjáninÿe; chë enjetsenjaquená
Obanana ca enjanabaina, y stêsoica bonjétséstona canÿa, Obanênga imomna
luare ca uabainá; y chátbioye obenana tmonjanatšatá cántañentšana
cánÿentše quem luarentše jtsepochócama, chentša entsanga jtsapochócaye,
entsanga tmojtsentsjanama, bêts shēntsanêngaca, šocanêngaca y quem
luarentša tsátjaye bayêngaca.

⁹ Chë inÿe sello tonjanétsécá ora, sênjáninÿe chë altarentša tajsoye chë
tmojanóbaniêngbe espíritênga, chë Bêngbe Bêtsabe palabra entsanga abuayiy-
nayama tmojanóbaniênga.

¹⁰ Chora chënga tmonjanontsé tša uayebuáchana: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entsangbiama cochjayana ndoñe tšabá tmonjamama, y chë bëngbioye obanayama cochjácastigaye ca?”

¹¹ Chentšana nyetscángbioye uafjantse entšayá tmonjaniyé y tmonjanýana batšatema más chamobatmá ca, chë cachëngcá Crístbeyeca catsátanga y oservénënga, chë cachëngcá mochjanóbanënga, nyetscanga choca chamojtsemnëntscuana.

¹² Y más sënjáninýe; chë inýe sello cha tonjanëtsécá ora, jabuache fshantse tontsanangmémana; shinýe tontsanftsénganga, mo chë obaná tojtsemnama juichëtjuama entšayacá, y nyets juashcona mo buiñcá enjétsinýna,

¹³ y estrellatémënga celocana fshantsoye tontsantquécjana, mo canýe higo betiye jabuache bínýiaca tojtseshatiyeyna ora, chë nguëfshna higuëbenga cuafjáquécjancá.

¹⁴ Y celoca luare tontsanenatjëmbe mo canýe tsbuanácha cuafjuandmanacá, y nyetsca tjañe y béjayoca fshantsënga, chë ndayentše enjamntšana tontsanouaná;

¹⁵ y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chë nyets tempo nýe inýabiama oservénënga y chë cachëngbiama trabájayëgnaca, chë cuevëshënguiñe y bëts ndëtsbenguenache tjañe tmonsanoítana;

¹⁶ y chë tjañëngoye y chë ndëtsbengoye montsanichamo: “¡Bëngbioye šmotsëtebuantsá y šmotsaitame, chë uámana puestentše tbemanabe bom-inýentsšana, y chë Oveshatembe uabouana castigo, cha bëngaftaca tbojetnana, bëngbeñe ndoñe chaondëtsemnna!”

¹⁷ Er chë uachuana te chabe castigo jtsebínýnama te tojóshjango; y mora ¿nda nanjobenaye chë sóyeca ndoñe chamondëtsepochocama ca?” —chënga montsanichamo.

7

Chë Bëngbe Bëtsábioye oservénënga chë uabouana castigüentsana mochántsatsebacana

¹ Chca tonjanopasá chentšana, canta angelënga sënjánanýe, monjétsatsana chë quem luarentša canta opochócayenache; chënga ndoñe quemënjatanleséncia chë canta binýiënga jtsebínýnama, ndoñe chaondëtsebinýiayama, ni fshantsentše, ni mar béjayoca, ni ndocna betiyeshënguiñe.

² Inýe ángelnaca sënjáninýe, shinýe bocana luaroicana enjtsabó, y chë Bëngbe Bëtsá Ainabe sello enjétsiyëboye. Chë ángelna chë inýe canta angelëngbioye, ndëmuanýëngbioye obenana tmojanatšatá chë fshantsentše y mar béjayoca lempe jtsepochócama, chëngbioye jabuache tonjánabachembo:

³ “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiama oservénëngbioye chë sélloca juentsaca fchayauínýnanantscuana, ndoñe chamondëtsepochocama ca!”

⁴ Y sënjanuena buétanga chë sélloca tmojánauinýnanayama: canýe patse, canta bnëtsana y canta uaranga entsanga uinýnanánënga nyetsca Israeloquentša bëts pamíllanguentsana.

⁵ Judabe pamillentsana, bnëtsana uta uaranga uinýnanánënga; Rubenbe pamillentsana, bnëtsana uta uaranga;

Gadbe pamillentšana, bnétsana uta uaranga;
⁶ Aserbe pamillentšana, bnétsana uta uaranga;
 Neftalibe pamillentšana, bnétsana uta uaranga;
 Manasesbe pamillentšana, bnétsana uta uaranga;
⁷ Simeonbe pamillentšana, bnétsana uta uaranga;
 Levibe pamillentšana, bnétsana uta uaranga;
 Isacarbe pamillentšana, bnétsana uta uaranga;
⁸ Zabulonbe pamillentšana, bnétsana uta uaranga;
 Josebe pamillentšana, bnétsana uta uaranga;
 y Benjaminbe pamillentšana, bnétsana uta uaranga entšanga.

Chë mallajta entsanga uafjantsëjuangá uichëtjonënga

⁹ Chentšana, sënjanrrepará y mallajta entsanga sënjánanÿe, ndocná quentaisobenaye jacúntana, nÿetsca mándayënguentsana, nÿetsca cachca buiñe bomñenguentsana, nÿetsca canÿe entsanguentsana, y nÿetsca biyana bomñenguentsana; chënga monjétsatsana chë uámana puesto chë Oveshatembe natsanentše, uafjantsëjuangá uichëtjonënga y ramëshangá monjétsëtbëna.

¹⁰ Nÿetscanga tša monjétsaye buache:
 ¡Bënga atsebacayana endobá, Bëngbe Bëtsá,
 chë uámana puestentše entsetbemanábentsana,
 y chë Oveshatémbentsana ca!

¹¹ Y nÿetsca angelënga, chë uámana puesto y chë bëtsëjemënga amëndayënga y chë canta ainëngbe shëconana monjétsatsanënga, chë uámana puestentša natsanoica tmonjanoshamentsé, fshantsóntsoñe jotsejbénase, y Bëngbe Bëtsá tmonjanadorá,

¹² mëntšá jayanëse:

¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana y nÿets ainánaca cha chamotsatschuaná.

Entšanga chamotsinÿanÿná cha puerte bëtsá y uamaná bëtsemnama; cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

¹³ Chentšana, canÿa chë bëtsëjemënguentsá tonjanoyebuambá y šonjantjá: “¿Ndëmuanÿenga imomna chë uafjantsëjuangá uichëtjonënga, y ndëmocana tmojabo ca?”

¹⁴ “Taita, aca chëngbiana cotátšëmbo ca” —atše sënjanjuá.

Y cha šonjaniyana: “Chënga montsemna chë jabuache ngmenënguentsana tsabá tmojábocanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buiñeca tmojtabofjantsé.

¹⁵ Chíyeca chënga chë Bëngbe Bëtsabe uámana puestentša natsanoica montsemna,

y chábioye nÿets tempo chabe delante mondëservena,
 y chë uámana puestentše entsetbemaná,
 chëngbenache jtsemnëse, chënga echántsanÿena, mo cuafjutsebotscá.

¹⁶ Ya ndoñe más shëntsana, ni uajuendayana quemochátsbomna;
 shinÿama, ni yapa jënÿama ya ndoñe más quemochátsuffrina;

¹⁷ er chë Oveshatema, chë uámana puestentša natsana tséntsaca entsemná,

chëngbioye mo oveshëngcá echantsabuajënÿa,
y echanjunatse béjaye vida bomniye yóbocana luaroye,
y Bëngbe Bëtsá echanjama ya ndoñe más ngmënana chamondëtsebomnama
ca” —cha sonjanjuá.

8

Chë ústonoca sello

¹ Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentëtsënëna mo tsëntsa hora nÿetsá.

² Chora sënjánanÿe chë canÿsëfta angelënga, chë Bëngbe Bëtsabe delante monjëtsatsanënga; chëngbioye canÿsëfta trompetëfjuangá tmonjanÿé.

³ Chentšana inÿe ángel tonjánashjango, canÿe castellano matbëtëmaca incienso jajuinÿiyama, y altar natsanoica tonjantsá; chábioye bëtscá incienso tmonjanoyé chaojuinÿema chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinÿé Bëngbe Utabná jëtschuayama, cánÿiñe nÿetsca chë Bëngbe Bëtsabe entšanga tmojoyebuambá palabréngaca, cháftaca jencuéntama ora.

⁴ Y chë incienso juinÿnentša ngona, chë ángelbe cucuatšentšana Bëngbe Bëtsabe delante tonjanótsjua, cánÿiñe chë Bëngbe Bëtsabe entšanga cháftaca jencuéntama palabréngaca.

⁵ Chentšana chë ángel chë incienso jajuinÿiyama matbëtëma tonjanca, chë altarentša chebánbengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëtscá tcuinÿënga, y quem luare tontsanangmëmana.

Chë trompetëfjuangá

⁶ Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

⁷ Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y iñeshe, cánÿiñe buñeca. Ungañentšana cánÿentše quem luarentše tontsanjuinÿe, úngañentšana cánÿentše betiyeshënguiñe y nÿetsca nguëfshna shacuanënguñnaca.

⁸ Chë inÿe ángel chabe trompetëfjua tonjanájatëto, y chora chë mar béjayoye tmonjanëtsana canÿe soye mo canÿe bëtš tjañe tojtsangbototjuancá, y chë mar béjayiñe úngañentšana cánÿentše buñe tontsanóbema.

⁹ Chë mar béjayiñe vida imobomnëngbeñe úngañentšana cánÿentše tontsanopochocá, y chë barquënguëntsna úngañentšana cánÿentše.

¹⁰ Chentšana chë inÿe ángel chabe trompetëfjua tonjanájatëto, y canÿe bëtš estrella, mo canÿe uajuinÿanëshacá enjëtšangbototjuana, celocana tonjanótsatse chë úngañentšana cánÿentše béjayënguiñe, y béjaye óbocanenache.

¹¹ Chë estrella enjanabaina Untjana ca; y chë úngañentšana cánÿentše buyeshënguiñe untjiye tontsanóbema, y chë untja búyeshe causa ba entšanga tmonjanóbana.

¹² Chë inÿe ángel chabe trompetëfjua tonjanájatëto, y chora tontsanóndbema chë úngañentšana cánÿentše shinÿiñe, y chë úngañentšana cánÿentše juashconÿe y chë estrellënguñnaca. Chca, nÿetsca chentša úngañentšana cánÿentše ibetiñe tonjanoquedá, y chë causa ndoñe quemëntëtsebinÿnaye posufta horëntscuana, bnëté canta hora y ibeta canta hora.

13 Chentshana, sēnjanrrepará y sēnjanuena canye águila, tsbanánoca celoca enjetsongüefjná, jabuache mēntśá enjétsichamo: “¡Tśa lastema, tśa lastema, tśa lastema quem luarentśa entśangbiama, chē inye trompetéjjuangá chē inye unga angelēnga chamojuátjēto ora ca!”

9

1 Chentshana chē inye ángel chabe trompetéjua tonjanájatēto, y sēnjáninye canye ángel quem luaroye jastjanguana y enjétsinýna mo canye estrella celocana quem luaroye cuaftsotsatśancá; y moye tonjánashjango ora, tmonjanoyé chē uabouana tboca atēfjntēśa llavēfja.

2 Chē uabouana tboca atēfjntēśe tonjánatēfjo, y chentshana becá ngona tonjanótsjua, mo bēts hornentśa ngoncá; y chē uabouana tboye atēfjntēśe ngona causa shinýe tontsanibétata y nýets celoca ena ngona enjétssemna.

3 Chē ngonentśana ba tsátjaye chapulinga tmonjánbocana, y nýets quem fshantsējana tmonjanáshana; y chēngbiroye obenana tmonjanatśatá, chánaca jándbemama, mo chē juetjuama alacranēngbe obenancá.

4 Chēngbiroye tmonjanamēndá tondaye ntjándbemana chē shacuanēnguiñe, ni ndocna nguēfshna matēnguiñe, ni ndocna betiyeshiñe; nýe chē juentsaca chē Bēngbe Bētsabe sēlloca nduinýnanana entśangna aifne.

5 Pero ndoñe chematanalesciá entśángbiroye jobáyana, ndayá nýe jamama chēnga shachna shinýēntscuana tsetśanana chamotsebomnama; y chē chēnga monjánama chamotsebomnama tsetśanana enjamna mo canye alacranbe uetjoniñca.

6 Chca tempo chaojtsemna ora, entśanga mochántseguaye ntśamo jtsóbanama, chē tsetśanēnga jauántama ndoñe quemochátobena causa, pero ndoñe quemochátinýena ntśamo jamēse jtsóbanama; y masque tśa mochántseboše jobanama, chora chēngaftaca ndoñe chca queochatopáśa, mo jobanama ndoñe tmontsobencá.

7 Chē tsátjaye chapulinga monjétsinýna mo couayēngcá prontánēnga jama entśángaftaca jétsjama; chēngbe bestśašifne monjanábomna mo castellano coronēshangacá, y chēngbe jubiá enjamna mo entśabe jubiácá.

8 Stjēnashe monjánbomna mo shembásabe stjēnashacá, y chēngbe juatsašēnga mo leonbe juatsašēngcá.

9 Chēngbe cuerpēnga jenēuyanama cochaca monjánbomna morocho soyēnga, mo hierro soyēngcá, y chēngbe juatēngmiashangá tmojtsabonjná ora, chē shauenanana bētscá enjamna, mo ba cochēshangá couayēnga cuaftsasjojnacá, chē inýengaftaca jétsjama tmojētsátjajo ora tojtseshauenancá.

10 Chēnga monjanábomna mo alacranbe uascuatśējuacá, ba uetotjēfjangaca, y chē uascuatśējuaca obenana monjánbomna shachna shinýēntscuana entśanga mal chamotsepasama.

11 Chē tsátjaye chapulinga canye amēndayá monjánbomna, chē uabouana tboca mándaye ángel; hebreo biyañna cha uabainá Abadón ca y grieguifna Apolión o pochocayá ca.

12 Chē natsana pochócyana ya tocjochnēngo, pero más hcroye cabá inye uta soyē más pochócyana cachcá echántsemna.

13 Chentshana chē inye ángel chabe trompetéjua tonjanájatēto, y canye oye-buambnayana sēnjanuena, chē Bēngbe Bētsabe delante enjétssemna castellano altarentśa juatsboíca lado sibienache obocanentśana enjétsobocana.

14 Y chë oyebuambnayana, chë trompetëfjua tonjanájetëto y enjétsëtbëna ángelbioye tbonjanianyana: “Chë canta angelënga chë Eufrates bëts fshájaye tsachoca utsbuanënga mëjafjoná ca.”

15 Y chë canta angelënga tmonjanëjafjoná; y nÿa chë ora, chë te, chë shinÿe y chë uatama chëngbioye tmojanaprontá, chë quem luarentša entšángbeñe úngañentšana cánÿentšënga jtsëbáyama.

16 Atše sënjanuena buëtanga imojamna chë angelëngaftaca tmojána soldadënga, couayënguiñe: uta patse millonënga ca.

17 Mëntšá sënjánanÿe mo otjenayoquëcá chë couayënga y chë chëngbeñe enjaquenënga: Chë enjaquenënga monjánbomna morochó soyënga cochaca, jenëuyanama, y chë soye buanganana enjáninÿna, mo iñcá, y fchendana mo chë uámana ndëtsbé jacintcá y tsësiyana inÿnana mo azufrcá; y chë couayënga monjánbomna mo leonbe bestšašcá, y chëngbe uayoicana enjétsobocana iñe, ngona y azufrana.

18 Y chë úngañentšana cánÿentše entšanga tmonjanóbana quem unga uabouana pochócaye soyëngaca, chë couayëngbe uayoicana enjétsobocanana: iñe, ngona y azufrana.

19 Er chëngbe obenana entšanga japochócama monjánbomna uayáshañe y uascuatšëjuañe; er chëngbe uascuatšëjua enjuamna mo mëtsçuayëngcá, bestšašëngaca, y chëjuanga causa entšanga mal montsanpásaye.

20 Pero chë inÿe entšanga, chë uabouana pochócaye soyëngaca ndoñe tmonjanopochocanga, juabna ndoñe chematanrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtsbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama.

21 Juabna ndoñe chematanrocá y ndoñe chematanajbaná entšanga obanayana, encjuanayana, bacna soyënga boyabása o shembásaftaca jtšamëse oyanana, ni atbëbanana.

10

Chë ángel base uándmanana tsbuanáchaca

1 Chentsana sënjáninÿe inÿe ángel, puerte obenana bomná; celocana enjétsastjajuana, y chabe shëconana canÿe jantšetëshe enjétsëmna; chabe bestšaše tatsëtsacá canÿe tsëfcuácuatjo. Chabe jubíá shinÿcá enjétsëbuashinÿinÿana, y chabe shecuatšënga mo úcuatjona niñëbenga cuaftsoiñcá.

2 Chabe cucuatšinë enjétsëtbëna canÿe base uándmanana y utëfjna tsbuanáchaca. Chabe catšbioica shecuátšëca chë mar bëjayoca tonjantsá, y chë uañicuayóicatšëcna, quem fshantsentše.

3 Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasanentša jabuache shauenanana sënjanuena.

4 Chë canÿsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canÿe oyebuambnayana celocana sënjanuena, mëntšá šonjétsatsaye: “Nÿe aca cochtsójuabnañe ntšamo chë canÿsëfta juesasana tmonjayancá, ndocnábioye catjuayana, y chë soye ndoñe catjuábema ca.”

⁵ Chora chë ángel, chë mar béjayoca y quem fshantsentše atsaná sënjaninjá, chabe catsbioica cucuatše celoye tonjanatsbaná,

⁶ y tonjanjurá Bëngbe Bëtsabiana, chë nyets tempo y nyetsca tescama oyenabiana, chë celoca, quem luare, chë mar béjaye, y lempe chë luarënguine yobinýncá tojanmabiana. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojasebuachenacá,

⁷ er chë tempo chaojóshjango, chë ústonoye ángel chabe trompetéjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nyetsca entšangbioye cha ndoñe chenatinýanýé, ntšamo tempo cha chabe oservëngbioye, chë chabe juabna oyebuambnayëngbioye tojanabuayenacá ca” —cha tonjánayana.

⁸ Chë atše sënjanuena oyebuambnayana celocana enjësobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catsbioica cucuatšiñe base uándmanana y utëfjna tsbuanácha ca.”

⁹ As atše chë ángelbioye sënjána; chë base uándmanana tsbuanácha chašuyema sënjaniyana, y cha šonjanjá: “Quemécha, motsásañe. Acbe uafoye uamešquëñécha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

¹⁰ As chë base uándmanana tsbuanácha chë ángelbe cucuatšentsana sënjanaca, y sentsanásañe; y atšbe uafoye meloycá enjësamna, pero sënjanabmuaná y atšbe uafsbioyna puerte uauntjécha tontsanábema.

¹¹ Chora šmonjaniyana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canýe luarëntša entšangaftaca, ba mándayëngbentša entšangaftaca, ba biyana bomna entšanguentšëngaftaca y quem luarentša reyëngaftaca ca.”

11

Chë útata Bëngbe Bëtsabe juabna oyebuambnayata

¹ Chentšana canýe medídaye niñëfja šmonjanoyé, mo jatšëmbonëfjá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entšanga chentše Bëngbe Bëtsábioye imojtsadorana.

² Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiana endmëna; y chënga, chë uámana ca uabaina bëts pueblama, canta bnëtsana y uta shinýentscuana soyënga mochántsama chiñe jtsepochócama, mo cuaftsebotajnacá.

³ Pero atše, útata atšbiana tatšëmbuata y oyebuambnayata chanjichamuá atšbe cuenta entšangbioye jábuayenama, canýe uaranga y uta patse y chnënguana bnëtsana tentscuana. Chatna uajojësha entšayangá uichëtjonata bochántsemna, chca, ngmena bomnama jinýanýiyama ca” —chata tbonjánayana.

⁴ Quem útata atšbiana tatšëmbuata y oyebuambnayata bontsinýinýena chë uta olivos betiyeca y chë uta candelerešeca, ntšamo Bëngbe Bëtsá, chë quem luarentše mandayabe delante endmëncá.

⁵ Nderado nda tojtseboše chatbiana bacna soye jamama, ndoñe quenatobenaye ntšámnaca jáborlana, er uayoicana iñeshe nanjóbcna y chë

uayayëngbioye nantsapochóca; nderado nda tojábošena chatbiama bacna soye jamama, cachcá cha buántsemna jóbanama.

⁶ Chë útata obenana bondbomna celoca jtsachtama, ndoñe chaondu-afteña, entsángbioye Bëngbe Bëtsabiama chabojsabuayiná tese; obenana béjayënga buiñe jtsebiamama, y jamama quem luarentše chaotsóndbemama, nyetscna pochóca soyëngaca, bueta sóynaca ntšamo chata tbojtsebošcá.

⁷ Pero ntšamo Bëngbe Bëtsabiama ibotatsëmbcá entsángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántatsajaye, echantsayëñaná y echantsëbaye.

⁸ Y chatbe óbana cuerpo, chë corente bëts pueblentša tsáshenañe echanjoquéda, chë chatbe Utabná tmojanrucificá luarentše, y chë bëts pueblo inyëtsá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entsanga yapa bacna soyënga jtsamana.

⁹ Y unga y tsëntsa tentscuana, chë obanatbe cuerpo mochantsonyaye, nyetsca canye luarentša entsanga, nyetsca cachca buiñe bomna entsanga, ba biyana bomna entsanguentšana y ba mándayëngbentša entsanga; ndoñe quenátslesenciana chata jutabuantsama.

¹⁰ Chata bochjóbanama, quem luarentše oyenënga mochanjóyejuaye; tša oyejuayënga mochántsemnana, ndayánaca mochanjénatšëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerta chamosufrima.

¹¹ Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantješnënga tša uatjana tonjanëbuache.

¹² Chora canye jabuache oyebuambnayana tbonjanuena, celocana mëntšá enjétsëtsësnaye: “Moye mašënguata ca.” Y chatna canye jantšëtëshiñe tbonjántsjua, y chatbe uayayënga chca monjétsonyaye.

¹³ Cachora quem fshantse jabuache tontsanangmëmëmana, y chë bëts pueblentše bnëtsanentšana cányëntše tontsanáshajaye, y canyësëfta uaranga entsanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábiyoye montsanadorana.

¹⁴ Chë inye uabouana soye quem luare japochócama, mora tojochnëngo, pero betesco chë ústonoye uabouana pochóca soye echanjóshjango!

Chë ústonoye ángelbe trompetëfjua

¹⁵ Chë ústonoye ángel chabe trompetëfjua tonjanájatëto ora, celoca tša monjétsayebuache, mëntšá monjétsichamo:

Ora tojjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnana,

y chë amëndayana echántsemna nyets tempo y nyetsca tescama ca.

¹⁶ Y chë uta bnëtsana y canta bëtsëjémënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentšë, fshantsóntscoñe jotsejbënase, y Bëngbe Bëtsá tmonjanadorá,

¹⁷ mëntšá jayanëse:

Bëngbe Utabná, Bëngbe Bëtsá nyets obenana bomná,

aca chë mora cha condmëná y chë tempo cha conjamná cbontsatschuaná, er nya mora acbe bëts obenánaca soyënga cochjama, acbe amëndayana jóntšama.

18 Ba luarentša entsanga ácaftaca tmonjanotšatjayená; pero chëngaftaca cmojetnama chë uabouana castigo jtsebínýnama te tocjóshjango,

chë tempo tmojanóbanëngbiana jayanama tšabá o ndoñe tšabá tmonjëftsemama.

Tonjóshjango chë hora, uacanánana jtatšatayama chë acbiana oservénëngbioye,

chë acbe juabna oyebuambnayëngbioye, chë acbe entsángbioye,

y chë acbe uabaina nyetscangbiana más bëts uabainana yomnama juabnayëngbioye,

uámanënga y nduámanënga;

y chë tempo tonjóshjango, quem luare pochocayënga jtsapochócyama ca — chënga tmonjánayana.

19 Chora, Bëngbe Bëtsabe bëts yebna celoca tonjantëfjo, y choye enjëtsebinýna chë cajontema, ndayëtema yojaninýanýná ntšamo Bëngbe Bëtsá chabe entsángbioye tojanašebuachenacá; y chora enjëtsemna tcuinýënga, tša shauenanana, juesasanana, quem fshantse tontsanangmëmëmana y bëtscá bëntstá tonjantquécjana.

12

Chë shembása y chë uabouana bayá

1 Chentšana, canýe bëts soye celoca tonjanonýná entsanga canýe soye jinýanýiyama: canýe shembása, shinýe mo chabe uichëtjoniacá, juashcona chabe shecuatšentša tajsoye, y chabe bestšašifne canýe coronësha bnëtsana uta estrellëngaca.

2 Chë shembása ngomamaná enjëtsemna, y chë šešona jónýnama yojëtsobecuama jabuache enjëtseyoye, chë šešona jónýnama cha puerte jasúfriama ibojamna causa.

3 Y chora inýe bëts soye celoca tonjanonýná, entsanga inýe soye jinýanýiyama: canýe uabouana dragón buanganá, canýsëfta bestšašëngaca y bnëtsana tsëtjonëšëngaca y chë bestšašënguiñe enjanábomna canýsëfta coronëshangá.

4 Chabe uascuatšëjuaca úngañentšana cánýentše chë estrellatëmënga celocana tontsansjojó, y quem fshantsoye chëtëmënga tontsanëtšana. Y chë dragón chë šešona jtsebomnama shembásabe delante tonjantsá, chë šešonatëmbioye jtsósañama, cha tojonýná ora.

5 Chora chë shembása canýe šešona boyabásetema bontsanbomna, nda nyets luarenache entsángbioye yochtsamëndaye mo canýe hierro varëfjaquécá. Pero chë šešona chábentšana tmontsanjuaná y Bëngbe Bëtsábioye, chabe uámana puestoye tmontsanámibañe.

6 Chë shembásana entsanga ndoyena luaroye tontsanachá, Bëngbe Bëtsá canýe luare ibojabopróna choye, chentše saná chamocaredadoma, canýe uaranga y uta patse y chnënguana bnëtsana tentscuana.

7 Chentšana celoca canýe entsjanayana enjëtsemna: Miguel, chë angelëngbe amëndayá, y chabe angelënga chë dragónaftaca monjëtsentsjanaye. Chë dragón y chabe angelënga monjëtsatsjanaye,

8 pero ndoñe chematanobená jáyënjanama, y chëngbiana ya ndoñe más luare celoca quentëtsemna.

⁹ Chcase, chë uabouana dragón chocana tmontanábocna, chë tempsca mëtscuaye, chë Diablo y Satanás ca uabainá, y chë bëtscá entsángbioye aingñayá; quem fshantsoye cha tmontsantsatše, y chë cha yojanamënda angelëgnaca.

¹⁰ Chora canyë jabuache oyebuambnyana celoca sënjanuena, mëntšá enjétsichamo:

Chë Bëngbe Bëtsá entsanga játsebacama tempo ya tonjóshjango.

Mora Bëngbe Bëtsá echanjínyanñiyë chabe obenana y mándayana,

y chabe Uámana Uabuayaná Jesucristbe obenana jtsemándayama; er chë Cristbe delante bëngbe catšátanga mal aquedayá ya tmontábocna, nda nyets tempo Bëngbe Bëtsabe delante mal enjanaquedayá.

¹¹ Bëngbe catšátanga cha tmonjayëñaná,

er Cristo, chë mo tmojóba Oveshatemcá, Bëngbe Bëtsá bacna soyëngama entsanga cháuperdonama,

tonjanóbana, chabe buiñe juabuáshanëse,

y chë ndegombre soyëngama chënga monjanóyebuambnáyeca;

er chëngbe vida chëngbiama ndoñe quenjatámana;

Jesucristo jaserviama jóbanama chënga monjanprontana.

¹² ¡Chcasna, celoca corente oyejuayana chaotsemna,

y tsëngaftanga chë choca oyenëngbeñnaca!

¡Pero tša lastema chë fshantsoca y mar béjayoca oyenëngbiama,

er chë diablo tsëngaftangbioye tonjástjango, corente tsatjayá,

er cha entsetátšëmbo ya nyë batšá yojtsábojamna chë chábioye mochjacastígama ca! —enjétsichamo.

¹³ Chë dragón quem fshantsoye tmojtsantsatsámana tonjáninñe ora, chë sešona boyabásetema tbonjanëshjango shembásabioye tbonstanacmé.

¹⁴ Pero uta jatëngmiášha, chë bëts aguilbeshá, chë shembásabioye tmonjaniyë, chabiama tmojanprontá luaroye chaongüefjoma, entsanga ndoyena luaroca, chë dragónbentšana bënoca; y chentše enjamna chë shembásabioye saná chamuájuatšema, unga y tsëntsa uatëntscuana.

¹⁵ Chora chë dragón, chabe uayoicana bëts béjaye tonjanbuashëtjo chë shembásabe stëtsoica, chaobuama y chabotsambama;

¹⁶ pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tontsanobmuánañe.

¹⁷ Y chë dragón chë shembásabioye tondaye jamana chenatanobená causa, corente cacháftaca tbonjánetna, y tonjána chë ínñenga, chë shembásabe basengcá mondmënënga játsjayama, ntšamo Bëngbe Bëtsá yomandacá imobedecënënga, y ntšamo Jesucristo tonjanabuayená ndegombre soyëngaca sempre imoyenënga.

¹⁸ Y chë dragón chë mar béjaye tsachañe tonjantsá.

13

Chë dragón tonjanma, chë mar béjayoca uabouana bayá chabe obenana chaotsebojnama

¹ Chentšana atše sënjáninñe, canyë uabouana bayá chë mar bejayoicana tonjánbocna; enjánbomna canyësëfta bestšašënga y bnëtsana tsëtjonëšënga, y chëšënguiñe bnëtsana coronëshangá, y chë bestšašënguiñe bañe enjétsabemana Bëngbe Bëtsabiama contra oyebuambnyane uabaina.

2 Chë uabouana bayá sënjaninýa enjamna mo canýe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando.

3 Canýe chabe bestšašenguentše enjétsinýna mo jóbana tëtšeniñcá; pero chentše tbonanóbema; y chora quem luarentša nyetsca entšanga ojnánánënga monjétsemma, y chë uabouana bayábioye montsanëyeunana.

4 Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayënjanama ca.”

5 Chë uabouana bayábioye tbonjanlesenciá corente podessa Bëngbe Bëtsabíama chaotsóyeuambnama, y obenana tbonjanatšetá, canta bnëtsana y uta shinýentscuana chaotsemándama.

6 Y podessa Bëngbe Bëtsabíama tonjánayana, soyënga chabe contra, chabe bëts yebnama y chë celoca oyenëngbe contra.

7 Chábíoynaca tbonjanlesenciá chë Bëngbe Bëtsábënga imomnënga játsjayama, jáyënjanantscuana; y obenana tbonjanatšetá chaotsemándama nyetsca cachca buiñe bomna entšángbeñe, nyetsca canýe entšángbeñe, nyetsca biyañe bomnëngbeñe, y nyetsca mándayëngbentša entšángbeñe.

8 Chë uabouana bayá nyetsca quem luarentša entšanga mochántadorana. Chë entšanga mondmëna ndëmuanýengbe uabaina ndoñe yontsábemana, chë Bëngbe Bëtsábíoye jëtschuayama mo canýe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nyetscanga chë tsabe vida mochjónýenëngbe uabaina.

9 Chë jouenama obenënga, chamouena.

10 Chë cárceloye jama ibomná, cárceloye bochanjotóca jama; chë espadějaca jobanamá, espadějaca echanjóbana.

Chíyeca quem luarentše entseyta, chë Bëngbe Bëtsábënga imomnënga padeceña soyënguiñe tmojtsemna ora, puerte uantadënga jtsemnana y Bëngbe Bëtsábíey jtsosbuáchíyana, mo chë Bëngbe Bëtsabe entšangcá.

11 Chentšana inýe uabouana bayá sënjáninýe, quem fshantsentšana enjëtsebocana; uta tsëtjonëse mo oveshabešcá enjánbomna, pero mo canýe dragoncá, mo canýa Satanásbeyeca mandanacá enjëtsoyebuambnaye.

12 Y enjánama soyënga chë natsana uabouana bayabe nyets obenánaca, chabe delante. Chë fshantsentša bayá tonjanma nyetsca luarentše oyenënga chamotsadoránama chë natsana uabouana bayábioye, chë jóbana tëtšeniñe tbonanobemá.

13 Cha ba bëts soyëngnaca enjánama chabe obenana entšanga jinýanýiyama, entšangbe delante jamana inë celocana fshantsoye chaótsatsamnaca.

14 Y cha tbonjanlesenciá chaoma chabe obenana jinýanýiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanëyana canýe soye chamopormá, y chë soye cháótsinýna mo chë natsana uabouana bayacá, chë espadějaca tëtšená enjamná, y chora tsábá enjetsatsmëná.

15 Y chë inýe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye

jóyebuambayama chaotsobenámnaca, y jamama chë chábioye ndoñe tmontsadoránënga chamóbanama.

¹⁶ Y tonjanma, nyetscángbioye, básenga y bëtsëtsanga, bomnënga y nd-bomnënga, cachëngbiama trabájayënga y nye ínÿabiama nyets tempo osv-ervénënga, catšbioica cucuatšinë o juentsaca chamuínÿnanama.

¹⁷ Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomñëse; chë uabouana bayabe uabaina o chë chabe uabainama yomna número.

¹⁸ Chë número jinÿenamna bëtscá osertánana jtseytana. Chë becá osertánana bomná cháuinÿena ntšamo chë uabouana bayabe número iuayancá, er canÿe entšabe número endmëna. Chë número endmëna chë chnënguana patse y chnënguana bnëtsana y chnënguana.

14

Chë canÿe patse y canta bnëtsana y canta uaranga entšangbe canto

¹ Y más sëntsanonÿá. Sënjáninÿe, chë Oveshatema, enjëtsatsjabna Sión ca uabaina tjoca, y cháftaca monjëtssemna canÿe patse y canta bnëtsana y canta uaranga entšanga, y chëngbe juentsaca enjëtsabemana chë Oveshatembe y chabe Taitabe uabaina.

² Chora sënjanuena celocana canÿe shauenanana, mo bëtscá béjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá.

³ Chënga canÿe tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjémënga amëndayëngbe natsanentše. Y ndocná quenjátanobena chë canto juat-sjínÿana, nye chë canÿe patse y canta bnëtsana y canta uaranga quem luarentšëngbentšana atsebácanënga aiñe.

⁴ Chënga monjanmëna chë shembásaftaca ndocna bacna soye tmon-janmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtsëstonana. Chënga imojamna chë natsanënga chë quem luarentša entšanguentše atsebácanënga jtsemnama, y chënga atsebácanënga imojtsemna Bëngbe Bëtsá y chë Oveshatema jtsaservënama.

⁵ Chënga ndocna te tmonjanobosteró; ndocná quenátobena jayanama chënga bacna soye tmojanma ca.

Ntšamo chë unga angelënga tmojánayana

⁶ Chentšana inÿe ángel sënjáninÿe, tsbanánoca celëjana enjëtsongüefnjaye. Cha enjábomna canÿe nyets tempscama oservena buayenana soye, entšángbioye jáuyanama, nyets quem luarentše oyenënga, nyetsca mándayëngbentša entšanga, nyetsca cachca buiñe bomna entšanga, nyetsca biyañe bomnëngbeñe y nyetsca canÿe entšangbiama.

⁷ Y jabuache mëntsá enjëtsichamo: “¡Bëngbe Bëtsabiama šmochjáuaboje cha nyetscangbiama chë más uamaná endmënama, y cha šmochtsatschuanaye, er ya tonjóshjango chë tempo ntšamo entšanga tmojamama tšabá o ndoñe tšabá bëtsëmnama cha cháuyanama! ¡Chë celoca y quem luare, chë mar béjaye y nyetsca chë fshantsentšana óbocana béjayënga tojamá šmochtsadorana ca!”

⁸ Chábentšana inÿe ángel mëntsá enjëtsichamo: “¡Ya bëts castigo, ya bëts castigo chë Babilonia bëts puebloca entšángbeñe echántsemna, ndëmuanÿenga

tmojin̄anyé ntšamo puerte bacna soyénga shembása o boyabásaftaca jt-samama y in̄ye corente bacna soyégnaca, y chentsana n̄yets quem luar-entša entšanga mo cach Babilonioquēngcá tmojama. Chē causa, Bēngbe Bētsá echanjama chēngbiámna chabe uabouana castigo chaotsemnama ca.”

⁹ Chē útatbentsana in̄ye ángel jabuache mēntšá enjétsichamo: “Nderado nda chē uabouana bayábioye y chē chábioye jadórama pormana soye tojtsadorana, y tojalesenciá chabe uin̄yanana soye juentsaca o cucuatšifne chamojajoma,

¹⁰ chánaca bontsemna, chē Bēngbe Bētsabe uabouana castigo jasúfriana. Entšanga puerte bacna soye tmojamama, Bēngbe Bētsá puerte tbojetna, y chē causa echanjama chē castigo chēngbeñe chaotsemnama. Y chē uámana angelēnga y chē Oveshatembe delante, chē bayá adorayábioye puerte mochanjatsetšená, íñeshe y azúfrecá.

¹¹ Chca chamojtsesufrina ora, becá ngona echantsóbocana, y chē ngona n̄yets tempo chca echantsótsjuaye; y chēnga, chē uabouana bayá y chábioye jadórana pormana soye adóreyēnga, y chabe uin̄yanana soye bomnēngbiama, nodna te chē tsetsanana queochatējbana ca” —cha enjétsichamo.

¹² Chíyeca quem luarentše entseyta, chē Bēngbe Bētsabe mandēnga obedecēnga y Jesúsbeñe puerte ošbuáchiyana bomnēnga, chē Bēngbe Bētsabe entšanga, padecena soyēnguiñe tmojtsemna ora, puerte uantana jtsemnana.

¹³ Chentsana can̄ye oyebuambnayana celocana sēnjanuena, mēntšá šonjétsatsaye: “Mēntšá mábema: ‘Tša oyejuayēnga mochántsemna chē mēntescana mochjóbanēnga, Bēngbe Utabnáftaca cán̄yifne mo can̄yacá jtsonñēse ca.’”

“Aíñe ca” —chē Uamana Espíritu tonjayana—, “chēnga ya ndoñe más queochátamna jatrabájana, ni jasúfriana, er chēnga tmojama tšabe soyēnga Jesús jasérviamá, y chē soyēngama chēnga tšabe bendicionēnga mo uacaná celoca mochanjójyēngacñe ca.”

Ndayá chē angelēnga quem luarentše tmojanatbaná

¹⁴ Chora más sēnjánin̄ye; sēnjánin̄ye can̄ye fjantse jantsetēshe, y chēshiñe can̄ya enjétsabemana. Cha enjamna mo can̄ye entšacá; chabe bestšašifne enjanábomna can̄ye castellano coronēsha, y cucuatšifne can̄ye puerte efsana mēntšá enjétsabēna.

¹⁵ Chentsana, chē celoca Bēngbe Bētsabe bēts yebnentsana in̄ye ángel tonjánbocna, y jabuache bonjétsatsaye chē jantsetēshiñe tbermanábioye: “¡Acbe mētstaca machbonja y shajuanēnga matbaná, er chē játbanama tempo ya tonjójshjango; chē quem luarentša shajuana ya tonjaboche ca!”

¹⁶ Y chē jantsetēshiñe enjantbemaná chabe mētstaca quem luariñe tonjánachbonja, y n̄yets quem luarentše atbanániñe tonjanoquedá.

¹⁷ Chentsana in̄ye ángel chē celoca Bēngbe Bētsabe bēts yebnentsana tonjánbocna; chánaca can̄ye puerte efsana mētstaca.

¹⁸ Y chē altarentšana in̄ye ángel tonjánbocna, chē mando bomná íñesheca castigo entsangbiama jamama; y chē puerte efsana mētstá bomna ángelbioye jabuache thonjanianyana: “¡Acbe mētstaca machbonja y chē fshantsoca n̄yetsca uvas betiyeshēnguentša uvasēsangá mátabe, er ya uabochenēsangá entsamna ca!”

19 Y chë ángelna chabe mëtstaca quem luariñe tonjánachbonja, y nÿetsca quem luarentša uvasësangá tonjanátabe, y lempe chë juantsëtetjama luaroje tonjanëtšana. Chë soye entsinÿinÿná ntšamo yochtsemnana Bëngbe Bëtsabe uabouana castigo.

20 Chë uvasësangana, chë bëts pueblentšana chaboye tmonjanantsëtetje, y chë luarentšana tša buiñe tonjanóbocna; tonjanojutjë couayëngbe uayashbenëshantscoñe y mo unga patse kilómetrënga tonjanábuashana.

15

Chë angelënga chë canÿsëfta pochócaye soyëngaca

1 Chentšana, inÿe bëts soye entsanga inÿe soyama jinÿanÿiyama, celoca sënjáninÿe, canÿe puerte bëts soye: canÿsëfta angelënga canÿsëfta pochócaye soyëngaca, chë ústonoye pochócaye soyënga. Chë soyënga chaotsemnëntšana ya ndoñe inÿe pochócaye soye yochántsemna, er chëntscoñe Bëngbe Bëtsá yochjacastíga, lempe ntšamo cha jamama tojanjuabocá.

2 Canÿe mar béjaynaca sënjáninÿe, mo cristalca enjétsinÿna íñeca enájuaabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórana pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nÿetscanga chënga monjétsabomna Bëngbe Bëtsá tojanëtšatá arpangá.

3 Chënga, canÿe canto monjétsacantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntšá monjétsacantaye:

Puerte bëts soyënga y tšabe soyënga entsemna lempe ntšamo aca tcojanmcá, Bëngbe Utabná Bëngbe Bëtsá nÿets obenana bomná;

lempe ntšamo jtsamëse aca icyoena, acbe bominÿiñe puerte tšabe y ndegom-bre soyënga yomna,

nÿets luarënguenache entsangbe Rey.

4 Bëngbe Utabná, ¿nda nanjájuaboye aca nÿetscangbiamana ndoñe más bëtsá condmëna ca,

o ndoñe cmantsatschuanaye?

Nÿe aca uamaná condmëna;

nÿetsca mándayëngbentša entsanga ácbioye mochanjabo,

ácbentše mochanjoshamentsiye aca jadórana,

er ntšamo tcojamcá lempe entsángbioye mora tcojinÿanÿé,

y lempe ntšamo aca tcojamcá tšabá jtsemnana ca —monjétsacantaye.

5 Chca chentšana sënjanontješé y sënjáninÿe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyë leyënga uajajóntëse.

6 Y Bëngbe Bëtsabe bëts yebnentšana tmonjánbocna chë canÿsëfta angelënga, chë canÿsëfta pochócaye soyënga uambayënga, uafjantse lino entsëjuangá uabuashinÿinÿanëjuangá uichëtjonënga, y tëntša castellano uasnanëjëngaca cochóntscoñe.

7 Chentšana, canÿa chë canta Ainënguentšá chë canÿsëfta angelëngbioye tonjanoyé canÿsëfta castellano copbenga jútjena chë Bëngbe Bëtsabe uabouana castígo; Bëngbe Bëtsá chë nÿets tempo y nÿetsca tescama vida bomná.

⁸ Chorna, chë Bëngbe Bëtsabe bëts yebna celoca beca ngónaca tonjanojutjé, y chë nгона enjétsobocana Bëngbe Bëtsábentsana, chabe buash-inyinyanana y obenana jtsinyanyayése; y Bëngbe Bëtsabe bëts yebnoye ndocná quenjátanobena jamashënguana, chë canyësëfta angelëngbe canyësëfta pochócaye soyënga candochnguentscuana.

16

Chë castígoca copbenga

¹ Chentšana, canye jabuache oyebuambnayana sënjanuena, chë celoca Bëngbe Bëtsabe bëts yebnentsana enjétsobocana, y chë canyësëfta angelëngbioye mëntšá enjétsëtsëtsnaye: “Motsajna y quem canyësëfta copbenga, chë Bëngbe Bëtsábicocana endóbocana uabouana castígoca, fshantsoca šmochjabuashcja ca.”

² Chora chë natsana ángel tonjána y chabe copbé quem luariñe tonjanbuashcja, y nyetsca entšanga chë uabouana bayabe uinynanana soye bomnënga y chë chábioye jadórana pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

³ Chentšana, chë inye ángel chabe copbé mar béjayoca tonjanbuashcja, y choca búyeshë buiñcá tontsanóbema, mo canye entšá obanabe buiñcá, y nyetscanga chë mar béjayoca vida bomnënga tmontsanóbana.

⁴ Chora chë inye ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiama.

⁵ Chentšana sënjanuena, chë béjayënguiñe mando bomna ángel mëntšá enjétsichamo:

Aca nyetsca soyënguiñe tšabá amá condmëna, er aca tcojyana chë quem luarentša entšanga chca castigánënga chamotsemnana.

Bëngbe Bëtsá, Uamaná, mora chca condmëna y chca conjamna;

⁶ er chënga tmonjama, chë acbe entšanga

y acbe juabna oyebuambnayëngbe buiñe chauábuashanama, jtsëbáyése;

y mora tconjama chënga buiñe chamofšema.

Nyets mercedo imobuájona chca japásama ca —cha enjétsichamo.

⁷ Altarocánënaca canye oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nyets obenana bomná condmëna, y ntšamo entšanga contsacastigacá, ndegombre y tšabá entsemna ca.”

⁸ Chentšana, chë inye ángel chabe copbé shinýiñe tonjanbuashcja; chë shinýe corente tontsanobonýaná y chíyeca entšángbioye íñeshëca tontsana-juinýe.

⁹ Y nyetscanga uabouancá juinýnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jichmuama, chënga chamosufrima.

¹⁰ Chentšana chë inye ángel chabe copbé chë uabouana bayabe uámana puestiñe tonjanbuashcja, y nyets chabe amëndayiñe ibetiñe tonjanoquedá. Chë entšanga bichtaja montsanenójantsnaye, yapa tsetše causa;

¹¹ pero ni chca, chë entšanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

12 Chentšana chë inÿe ángel chabe copbé chë bêts fshájaye Eufates ca uabáiniyiñe tonjanbuashcja y chë béjaye tontsanbuashjo, japróntama chë shinÿe bocanoica luarënguentsa reyënga y chëngbe soldadënga chëjana chámuachnëjnama.

13 Atše sënjáninÿe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuamb-nayabe uayoicana tmonjánbocna unga bacna espíritënga; mo sapošëngcá monjétsinÿna.

14 Chënga monjamna bayëjëngbe espíritënga; bêts soyënga monjánama obenana jinÿanÿiyama, y montsanbocana nÿets luarentša reyënga jáchembuama, chë uámana te, ndayté Bëngbe Bëtsá, chë nÿets obenana bomná yochjabo entšangbiama jabáyanama ntšamo chënga tmojamama, chë te chënga chabe contra chamotsetsjama.

15 Bëngbe Utabná Jesucristo mëntšá tojayana: “Smochjinÿe, atše nÿe ndeolpe chanjabo, mo canÿe atbëbanacá, chabiama ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefsna y chabe entsáyá totsaboprontañacá, nÿe enašá ndoñe chaondëtsemnama, y entšanga chca tmojinÿe ora ndoñe chaondëtseuatjama ca.”

16 Y chë bacna espíritëngna chë reyëngbioye tmonjanënatse canÿe luare, hebreuñe Armagedón ca uabáinoye.

17 Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bêts yebnentša uámana puestentsana canÿe jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tojochnëngo ca!”

18 Chora enjëtsemna tcuinÿënga, shauenanana y juesasanana, y quem luriñe tontsanangmëmmana, yapa jabuache quem luare tontsanëbanjó causa; quem luarentše entšanga imobinÿna orscana, ndocna te nÿa chca quem luare tontsanëbanjó.

19 Chë puerte bêts pueblo úngañe tontsanajatá, y nÿets luarentša bêts poblënga tontsanáshajaye, y Bëngbe Bëtsá tojanenojuabó chë puerte bêts pueblama, Babilonia ca uabaina pueblama, chentša entšanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bêts pueblo úngañe tontsanajatá ora, cha chënga tonjanacastigá.

20 Mar béjayoca nÿetsca fshantsënga y quem luarentša nÿetsca tjañe tontsanenatjëmba.

21 Celocana bêtsëtsa bëntstbenga entšángbeñe tonjantquécjana, chëbenga canta bnëtsana kilama más utbenga; y entšanga Bëngbe Bëtsabe contra ba soyënga tmonjánayana, er chënga tša montsansufrina chë bêts pochócaye bëntstá causa, y chë pochócaye bëntstá chëngbiama puerte jabuache castigo enjamnama.

17

Chë puerte bacna vida bomna shembásabe castigo

1 Canÿa chë canÿsëfta angelënguentsá, chë canÿsëfta copbenga monjanathëñënguentsá, tonjánabo y šonjaniyana: “Mabo; cbochanjinÿinÿiye ntšamo yochtsemna chë puerte bacna vida bomna shembása, chë béjayënguñe entsetbemanabe castigo.

2 Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjot-menangca ca.”

3 Chentšana chë ángel, atše chë Uámana Espíritbeyeca corente mandaná jtsemnëse, šonjanánatse entšanga ndoyena luaroye. Choca sënjáninÿe canÿe shembása, canÿe uabouana buángana bayábeñe enjaquená; chë bayabe cuerpiñe nÿetsañe Bëngbe Bëtsabiamana puerte bacá oyebuambnaye uabaina enjétsabemana, y enjánbomna canÿsëfta bestšaše y bnëtsana tsëtjonëse.

4 Chë shembása enjanichëtjona uámana shbuenda uafjatsenga y buángana entšayá, y entsanbotamana castellánoca, uámana botamana ndëtsëtémëngaca y pérlacá. Chabe cucuatsiñe canÿe castellano copbé enjétsatbëna, jútjena puerte uaboyëña soyëngaca, y chë boyabásengaftaca cha tojanma puerte bacna soyëngaca.

5 Y chabe jutsaca canÿe uabaina enjétsabemana, ndoñe josërta soye, mëntšá: “Chë puerte bëts pueblo Babilonia, tša bacna entšanga chentše, mo chë puerte bacna vida bomna shembásengbe bebmá cuaftsemncá; chentšana tojanóbocna quem luarentša nÿetsca puerte uaboyëña soyënga ca.”

6 Atše sënjáninÿe chë shembása tëmiá, er cha tojanofsé chë Bëngbe Bëtsábenga imojamnëngbe buiñe, ndëmuanÿengbioye tmojanëbaye Jesusbiamana oyebuambnaye causa.

Chca sënjáninÿe ora, tša sënjanenjananá.

7 Chora chë ángel šonjaniyana: “¿Ndáyeca tcojenjananá ca? Atše cbochanjauyana ntšamo yojsayana chë shembása y chë chábioye bontsambá uabouana bayá, chë canÿsëfta bestšaše bomná y bnëtsana tsëtjonëse; chë soye ndocná quenátstatšëmbo.

8 Chë tconjinÿe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanÿengbe uabaina quem luare jobojátšama orscana ndoñe yonduábemana, chë tšabe vida mochjónÿenëngbe uabaina iuábemana libréšañe, chënga mochanjenjananá, chë bayá chë tempo enjaniená y mora ya ndoñe, pero cachiñe yochjésabama chamojinÿe ora.

9 “Muentše canÿe soye entsemna chë chca josértama chamojobenangbiamana: chë bayabe canÿsëfta bestšaše endmëna canÿsëfta tjañe ndayiñe chë shembása entsetbemana; chë bestšašëngnaca mondmëna canÿsëfta mandadënga.

10 Chentšana, shachnëngbe amëndayana ya tonjochnëngo, canÿa mora entsetbemana jtsamëndayama y chë inÿa cabá ndoñe tonjáshjango. Y cha chaojáshjango ora, ndoñe bënama cha queochaisemánda.

11 Chë tempo enjanienyena uabouana bayá pero mora ya ndoñe, endmëna chë canÿsëfta mandadënguentsana inÿe mandado, pero chánaca chë inÿe canÿsëftangcá endmëna y lempe pochocaná jtsemnama entsá.

12 “Chë tconjinÿe bnëtsana tsëtjonëse mondmëna bnëtsana mandadënga, jamëndama cabá ndoñe tmonjójayenga; pero básefta tescama cánÿiñe chë uabouana bayáftaca, mando mo reyëngcá mochanjóyëngacñe.

13 Quem bnëtsanënga nÿetscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye.

14 Chë Oveshatembe contra mochántsestsjanaye; pero chë Oveshatema echantsayëñaná, er chë Oveshatema endmëna nÿetsca amëndayëngbiana chë más uámana Utabná y nÿetsca reyëngbiana chë más uámana Rey. Chë bnëtsana mandadënga cháftaca mochántsestsjanaye ora, cha chentše chabe entsángaftaca cánÿiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniana.

15 Chë ángel mëntsánaca šonjaniana: “Chë tconjinÿe béjayënga, ndayïñe chë bacna vida bomna shembása entsetbemana, mondmëna nÿetsca canÿe luarentša entsanga, enutanana entsanga, nÿetsca biyañe oyebuambnayënga y nÿetsca mándayëngbentša entsanga.

16 Y chë uabouana bayábeñe tconjinÿe bnëtsana tsëtjonëše y chë uabouana bayá, chë bacna vida bomna shembásabioye mochantsáboyënja; enašá cachcá mochanjesonÿaye; chabe cuerptša mëntsena mochantsósañe y ñesheca mochántsejuinÿiye, chaopochocantscuana.

17 Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaopopasantscuana.

18 Chë tconjinÿe shembása chë puerte bëts pueblo endmëna, chë ndayentša mandadënga nÿets quem luarentša mandadëngbeñe mando mondbomna ca” —cha šonjaniana.

18

Babilonia japochócama

1 Chentšana inÿe ángel sënjaninÿe, celocana enjëtsastjajuana, puerte obenana bomná, y chabe buashinÿinÿanánaca nÿets quem luariñe entsanbinÿna.

2 Chë ángel jabuache mëntsá enjëtsichamo:

¡Ya mochantsepochóca, ya mochantsepochóca chë uámana pueblo Babilonia!
 ¡Chentše tojtsóbema diablëngbe oyeniñe,
 nÿetsca bacna espíritëngbe oyeniñe,
 y ndoñe tšabe y uaboyënja shloftšëngbe oyeniñe!

3 Er nÿetsca quem luariñe mándayëngbentša entsanga puerte bacna soyënga tmojama chentša entsangbe causa,

mo chë bacna vida bomna shembásaftaca bacna soyënga cuafjamcá,
 mo puerte cuafjotmenangcá chë bacna vida bomna shembásabe vínoyeca.

Nÿetsca luarënguentša mandadënga puerte bacna soyënga tmojama,
 mo chë shembásaftaca bacna soye cuafjamcá,
 y quem luarentša obuámnañënga y enënga, bomnënga tmojobiama chentša entsanga yapa crocénana nÿe ndayïñnaca ntsejuabnayscá gástaye causa ca —cha enjëtsichamo.

4 Chentšana, celocana inÿe oyebuambnayana sënjanuena, mëntsá enjëtsichamo:

¡Chë bëts pueblentšana maisebocana!, tsëngaftanga chë atšbe entsanga šmommënga,
 chë chentša entsanga mondbétsama bacna soyënga ndoñe chašmondëtsamama,
 ni chë chëngbioye japochócama soyënga tsëngaftangiama cach ndoñe chaondëtsemnama.

⁵ Chënga tša bacna soyënga tmojama, tša bëtscă nÿa mo celóntscoñe cuafjojut-jecá,

y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

⁶ Ntšamo chentša entšanga ínÿengbiama ndoñe tšabá tmonjamcá, chë entšangbiámna cachcá chaotsemna; ntšamo tmojamama, cabá uta soye más cachca soye chëngbiama chaotsemna; ntšamo chentša entšanga ínÿenga chamosufrima tmojamcá, chëngnaca cachcá uta soye más chamosufrí.

⁷ Chënga corente jtšenábotamnayana y yapa crocénana nÿe ndayíñnaca ntsejuabnycá jtsegástayana;

chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntšá jtsejuabnayana:

“Muentše mo reyëngcá mondëttiámna.

Viudacá ngmënaca ndoñe quemuátsmëna; tondayama quemochátssufrina ca.”

⁸ Chíyeca, canÿe ora pochócaye soyënga chëngbiama echanjóshjango:

jóbanama šocanënga, puerte ngmënana y jabuache shëntsana,

íñesheca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebomnama tojayaná ca —cha enjétsichamo.

⁹ Quem luarentša mandadënga, chentša entšangaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora.

¹⁰ Chentšana bënoca mochanjoquéda antješna, chë uabouana castiguama auatja causa, y chentša entšangbiama mochanjayana:

¡Tša lastema, tša lastema tšëngaftanga chë uámna bëts pueblo, Babilonientše oyenëngbiama, chë tša obenana binÿentše!

Canÿe ora tšëngaftangbe castigo tojóshjango ca —mochántsichamo.

¹¹ Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entšangbiama, er chora ya ndocná queochátsmëna chë chënga tmojúshjango soyënga chamobuámiñama:

¹² tmojúshjango castellano soyënga, midio soyënga, uámna y botamana ndëtsbënga, perlënga, uámna lino y shbuenda uafjatsenga entsáyá y sedëjua y uámna uabuánga entsáyá; nÿetsca botamana uanguëtše betiyënga, marfiloca pormana soyënga, uámna niñëšëngaca pormana soyënga, bronce soyënga, hierro y marmol soyënga;

¹³ bëtscă canela y inÿe botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámna arninÿá, trigo; bayënga ndayánaca uasmëmnyënga, oveshënga, couayënga, cochëshangá y entšanga nÿets tempo nÿe ínÿabiama oservenëngnaca.

¹⁴ Y chë pueblentša entšangbiama mochanjayana:

¡Chë tša cmonjanogúsetana jtsebomnama soyënga, mora ya ndoñe quemátsbomna;

chë uámna y buashinÿinÿana soyënga y tša bomnana lempe šmojobuetše, y ndocna te más cachca soye quemochátsbomna ca!

15 Chë soyënga enënga, chë bëts pueblentsa entsángbeyeca bomnënga tmojanobiamënga, bënoca mochanjoquéda antjesna, chë bëts pueblentsa entsángbiama tsa bëts castiguama auatja causa; mochanjošachna, puerte ngmenánaca mochántsemna.

16 Y mëntśá chentsa entsángbiama mochanjayana:

¡Tśa lastema, tśa lastema tśëngaftanga chë uámana bëts pueblentsë oyenëngbiama!

Chë enjáninjna mo canye shembasacá, uámana lino entsëjua uichëtjoná, uámana shbuenda uafjatsenga y uabuángana entsáyá uichëtjoná, botamananá castellanoca, perlënga y uámana botamana ndëtsbéngaca.

17 ¡Y canye ora chabe tśa bomnana lempe tojtsoepochocá ca! —mochanjayana.

Nyetsca chë barquënguentśa mándayënga, chentsa entsanga inye luaroye ajnënga y chentsa trabájayënga, y nyetscanga chë vida onguayiñe mar béjayoca trabájayëngnaca, chentsana bënoca mochanjoquéda antjesna,

18 y chë bëts pueblo chaojtsangbototjuanentsa ngona chamojinye ora, jabuache mochanjayana: “¡Quem uámana bëts pueblécá ndocna inye pueblo cachcá quenátsmëna ca!”

19 Chca chamojinye ora, ngmënama bestśašinë polvëshe mochántsenotboto, y mëntśá mochántseyona ošachiyënga y puerte cochtsetšenánënga:

¡Tśa lastema, tśa lastema tśëngaftanga chë uámana bëts pueblentsë oyenëngbiama!

Chentsa bomnánaca bomnënga tmojanobiama nyetscanga chë mar béjayoca barco bomnënga.

¡Canye ora lempe tojtsoepochocá ca! —chënga mochántseyona.

Chora chë ángel tonjánayana:

20 ¡Celoca oyenënga móyejuanga chë pueblo chca tojapasama;

y tśëngaftángnaca móyejuanga, Bëngbe Bëtsabe entsanga, Jesucristbe ichmónënga y Bëngbe Bëtsabe juabna oyebuambnayënga, er chca jacastígase, Bëngbe Bëtsá tojama chënga chamosufrima, ntśamo tśëngaftanga chašmosufrima chënga tmojanmća ca! —cha tonjánayana.

21 Chentsana, canye ángel puerte obenana bomná, canye ndëtsbé tonjanatsbaná, mo canye bëts nantsnëbé ndëtsbecá, mar béjayoye tonjanashbuetşe y mëntśá tonjánayana:

Mëntśá, nye ndeolpe y jabuache, Babilonia chë uámana bëts pueblo mochántsetsatşe,

y ndocna te más quem pueblo queochátsmëna.

22 Chentşe, ndocna te más quemochátuenana

arpangá uabuástoyana, ni cantayana, flautëfjënga y trompetëfjuangá cach ndoñe;

ndocna te más quemochátsmëna obrerënga,

ni chë nantsnëbeñe trabájayana quemochátuenana.

23 Chentşe, ndocna te más ndocna uajuinyanësha queochátbinynaye,

ni casamento fiestentsa enbouenanana quemochátuenana.

Er chë bëts pueblo chca mochantseepochóca,

masque chentsa obuámnañënga y enënga nyets quem luarentşe chë más bomnënga monjamna,

y chentša bocjuaná naca n̄yetsca luarēnguentša entsānga ingñēnēnga monjamna ca —cha tonjánayana.

²⁴ Bēngbe Bētsá chca chē bēts pueblentse echanjama, er chentše tmojín̄yena chē Bēngbe Bētsabiama trabájaye causa tmojanóbanēngbe buiñe; chē chabe juabna oyebuambnayēnga, chabe entsānga, y chē chábioye oservénama n̄yets quem luarentse tmojtsēbayēngbe buiñe.

19

¹ Chentšana celoca sēnjanuena mo mallajta entsānga cuafsayebuachcá, mēntšá monjétsichamo:

¡Bēngbe Utabná matschuanga!

Bēngbe Bētsá endmēna nda chabe entsānga tojatsebacá; cha puerte uámanana, buashin̄yin̄yana y mando endbomna,

² er ndayama cha tojayancá ndegombre jtsemnana,

y ntšamo tšabá chama tojtsemncá.

Cha chē uachuana bacna vida bomna shembásabioye tbojacistigá.

Chē shembásabe puerte bacna soyēnga causa,

n̄yets luarentša entsāngnaca bacna soyēnga tmojama.

Chábioye chca jacastígase,

Bēngbe Bētsá tojama ntšamo jamama ibomerecencá,

chábioye oservénēnga chē shembásabeyeca tmojóbana causa ca —chēnga monjétsichamo.

³ Y cachiñe mēntšá tmonjánayana:

¡Bēngbe Utabná matschuanga!

¡Chē bēts pueblo japochócama uangbototjuanentša ngona n̄yetsca tescama chca echanjótjuaye ca!

⁴ Y chora, chē uta bnētsana y canta bētsējémēnga amēndayēnga y chē canta Ainēnga tmonjanoshamentšé, y Bēngbe Bētsá, chē uámana tbemanentse enjētsetbemanabioye tmonjanadorá, mēntšá jayanēse: “¡Chca chaotsemna! ¡Bēngbe Utabná matschuanga ca!”

⁵ Y chē uámana puestentšana can̄ye oyebuambnayana tonjanóbocna, mēntšá:

Bēngbe Bētsá matschuanga, n̄yetsca chabe oservénēnga

y chē n̄yetscangbiama cha chē más uamaná yomnama juabnayēnga,

básenga y bētsétsānga ca.

Chē Oveshatembe casamento fiesta

⁶ Y sēnjanuena mo mallajta entsāngbe oyebuambnayancá, mo bētscá bėjaye cuafsobonjnacá y mo bēts juesasanana shauenanancá; mēntšá monjétsichamo:

¡Bēngbe Utabná matschuanga!

Er Bēngbe Utabná, Bēngbe Bētsá n̄yets obenana bomná tojontšé jamándana.

⁷ Puerte móyejuanga y mochjín̄yan̄yie

Bēngbe Bētsá puerte bētsá y uamaná bétsemnana,

er mora entsemna mo chē Oveshatembe casamento te cuafjoshjangcá;

chabe shema yochjabocná puerte tojtenobotamá;

⁸ tmojalesenciá cha chauatichētjo uámana, nduatsenga uafjantse y uabuashin̄yin̄yana lino entsáyá.

Chē shema entsin̄yin̄ná chē Bēngbe Bētsabe entsānga;

y chē lino entsáyá jtsichētjonana entsin̄yin̄ná

chënga lempe ntšamo tšabá yomncá jtsamëse imoyena ca —chënga monjétsichamo.

⁹ Chentšana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama ófanënga ca.’” Y mëntšánaca šonjaniyana: “Chca, ndegombre Bëngbe Bëtsabe palabrénga endmëna ca.”

¹⁰ As chabe shecuatšentše sënjanoshamentšé cha jadórama, pero cha šonjaniyana: “Ndoñe, átšeftaca ndoñe chca mátamana, er atše Bëngbe Bëtsabe canye oservená sëndmëna, ntšamo aca condmëncá, y chë Crístbeyeca acbe catšátanga, ntšamo chabiama motatšëmbcá y chabe ndegombre palabrénga nýets tempo imabuayiyanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebomnama, chë soyëngama entšángbioye jábuayenama.

Chë fiantse couayiñe enjaquená

¹¹ Chora sënjáninýe celoca atëfñiñe; canye fiantse couaye enjésemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayëngaftaca monjánentsjanaye.

¹² Chabe fšñëbenga mo iñeshcá enjáninýna, bestšašifne ba uabuashinýinýna coronëshangá enjanábomna, y canye uabaina chábeñe enjanábemana; nýe cha chë uabaina yojanábuatma.

¹³ Cha enjanichëtjona buñeca unëtjona entšayá y chabe uabaina enjamna “Bëngbe Bëtsabe palabra ca”.

¹⁴ Y chabe ústonoye monjétsajna mallajta soldadënga celoquënga, nduat-senga uafjantse y uámana lino entšayá uichëtjonënga, fiantse couayënguifne enjaquenënga.

¹⁵ Chë enjésebnatsanabe uayoicana enjanóbocana canye puerta efsana espadëja, chë Bëngbe Bëtsabeñe ndošbuáchiyënga játatsetšama. Cha puerta obenánaca echántsamëndaye, mo canye hierro varëfjaquëcá. Cha echanjama entšángaftaca mo nda uvasëšangá juantšëtetjiamá tojtsabotajná ora cuafjamcá; y echanjama chënga chamotsebomnama chë puerta uabouana castigo, Bëngbe Bëtsá chë nýets obenana bomná tbojetna causa.

¹⁶ Chabe uabonjaníyañe y chabe mëntjoca canye uabaina enjanábemana: “Nýetsca reyëngbiama chë más uámana Rey, y nýetsca amëndayëngbiama chë más uámana Utabná ca”.

¹⁷ Chentšana canye ángel sënjáninýe, shinýiñe enjétsatsana, chë celoca tsbanánoca nýetsca monjanongüefjná shloftšënga jabuache mëntšá enjétsëtsëtsnaye: “¡Mabënga, menefjna chë Bëngbe Bëtsá tojaprontá bëts saná jasama;

¹⁸ chašmosama reyëngbe mëntšena, soldadënga amëndayëngbe mëntšena y valente entšangbe mëntšena, couayënga y chëngbeñe enjaquenëngbe mëntšena, y nýetsca entšangbe mëntšena, cachëngbiama trabájayënga y nýe ínýabiamá nýets tempo trabájayënga, básesenga y bëtsëtsanga ca!”

¹⁹ Chora atše sënjáninýe chë uabouana bayá y quem luarentša reyënga chëngbe soldadëngaftaca tmojánenefjna, chë fiantse couayiñe enjaquená y chabe soldadëngaftaca jëtsajama.

²⁰ Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmä obenana jinñanñiyama; y cha chë soyëngaca tojanaingñé chë uabouana bayabe uinñnanana soye chamuayentšajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmonsanatmetše chë iñesheca uafjajonayoye, chë azufre endëjuinñinñantše.

²¹ Chë ínñengbioyna tmonsanapochocá chë fñantse couayinñe enjaque-nabe uayoicana enjanóbocana espadéjaca, y nyetsca shloftšënga chëngbe mëntšënaca yapa tmontanoshachá.

20

Chë uaranga uata

¹ Chentšana canye ángel sënjáninñe celocana entsanastajuana chë corente asentoye tboca llavéffaca, y canye bëts cadenëjua entsanëtvena.

² Chë ángel tbontsanbtá chë dragónbioye, chë tempsca mëtscuaye, chë Diablo y Satanás endmëná, y canye uaranga uatama tbontsanbtásëca.

³ Chë corente asentoye tboye tbontsantsatše, chentše tbontsanëtame, y chentše bëšáša tsengájašëca tonjaninñnaná, ndotatšëmbcá jatëfjuama ndocná chaondobenama; y chca, chë dragón ndoñe chaondobená jabocnama bëšanga jáingñama, chë uaranga uata candochñënguëntscuana; y chora, básefta tescama chë dragón mochanjëtshojona.

⁴ Uámana puestënga sënjáninñe, y chiñe tmonjanotbiama chë entsanga tsabá o ndoñe tsabá tmonjamama jayanama obenana tmojanóyëngaciñënga. Chë bestšaše jtsëstjanguëse tmojanóbanëngbe espíritëngnaca sënjánanñe. Chënga chca tmojanóbana, Jesús tojánayana soyënguifñe y chë Bëngbe Bëtsabe buayenana soyënguifñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinñnanana soye juentsaca o cuuatšifñe chamuayentšajoma. Y sënjáninñe chëngna tmontanayena y Crístoftaca canye uaranga uatama montsanmánda.

⁵ Chë entsanga mondmëna chë natsanënga jtayenama, pero chë tempo chë inñe obanënga ndoñe chemëntëtanayena, ndayá nñe chë canye uaranga uata chentsana.

⁶ ¡Oyejuayënga y Bëngbe Bëtsabe entsanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nyetsca tescama castigo jtseboamnana, ndayá Bëngbe Bëtsá y Crístbioye mo bachnangcá chënga mochántseserverna, y Crístoftaca chë uaranga uatama mochántsemandaye.

Satanás japochócama

⁷ Chë uaranga uata chaojochñëngo ora, Satanás chabe utámenocana mochanjëtshojona;

⁸ y cha echanjábocna nyets luarentša entsángbioye, chë Bëngbe Bëtsabe soyëngama contra imomñëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomñënga. Satanás, chë entsanga echanjáchembo Bëngbe Bëtsabe contra jéntsama, y tša chëftanga cha echanjáchembo, nña mo chë mar béjaye chënyoca cascajca mochántsemna.

⁹ Chënga nyetscanga nyets luarëjana mochanjátsjua, y chë Bëngbe Bëtsabe entsanga oyenentše y chabe bonshana entsangbe bëts pueblo shëconana

mochanjotsaye. Pero celocana iñe echanjatquécjana y chë Bëngbe Bëtsabe contra imomnënga lempe echántsajuinÿe.

¹⁰ Y Satanás, chë aingñayá, mochántsatmetše chë iñeshe y azúfreca uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmontsanatmetše. Chentše bëts castigo nyets tempo, bnëté y ibeta mochanjasufrina.

Chë obanëngbiama tmonjánayana ntšamo chëngaftaca jamama yojtsemnana

¹¹ Chentšana sënjáninÿe canÿe bëts uámana fjantse puesto jamándama y nda chiñe enjsetsebemaná. Celoca y quem luare chabe delante lempe tonjanenatjëmbe, y ndócñentše más chenatanobinÿná.

¹² Y chë obanënga sënjánanÿe, bëtsëtsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inÿe librëšanaca, ndëmuanÿenga nyetsca tescama tšabe vida mochjónÿenëngbe uabaina uabemana librëša. Chë obanëngbiama tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá.

¹³ Chë mar béjayoye tmojanóbanënga choicana tmontanbocna, y chë obanënga tmojanoquedanga luarënguentsana tmontanbocna, y cada cánÿabiama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca.

¹⁴ Chentšana ya ndoñe más obenana quentëtsemna entšanga chamóbanama chaomama, mo chë obenana chë iñesheca uafjajónayoye cuaftsëtšencá; quem iñesheca uafjajónaye endmëna chë nyetsca tescama castigo jtsebomnana luare; chë choca castigánënga jtsamnana yojtsamnëngbiama entsemna mo chënga cachiñe cuafjatobancá;

¹⁵ y ndëmuanÿengbe uabaina chë tšabe vida mochjónÿenëngbe uabaina iuábemana librëšañe ndoñe yonjanabemana, chë iñesheca uafjajónayoye tmontsanatmetše.

21

Celoca tsmiñe y fshantse tsmiñe

¹ Chentšana atše sënjáninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentëtsemna, y chë mar béjaye chora cach tondaye.

² Sënjáninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjétsostjajuana, puerta botamaniñe, mo canÿe shembása puerta botamananacá, chabe boyá jábocnabiama.

³ Y chora canÿe jabuache oyebuambnayana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entšangaftaca echántsemna y cha chëngbeñe echantsiyena. Chënga chabe entšanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna.

⁴ Cha echanjama chënga ndocna te más ngmëñënga chamondëtsemnana, y ndoñe más chamondóbanama, ndoñe más chamondošachema, ni ngmëñaca ndoñe chamondëtšóyebuambnana y ndoñe más tsetšanana chamondëtsebomnana; er ntšamo chënga entšangcá fshantsoca tempo imojëtsiyena ora enjamncá, chora ya ndoñe chca queochátsmëna ca.”

5 Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntsánaca tonjánayana: “Chë soyënga mábema, er chë palabrenga endmëna ntšamo ndegombre yomncá, y nyetscanga mondobena chiñe corente jtsošbuáchiyana ca.”

6 Chentsana šonjaniyana: “Lempe tonjochnëgo. Atše sëndmëna chë nyetsca soyënga bojatsáy y pochocayá, chë natsaná y chë ustonoyá. Mo nda tša uajuendayana tojtsebonná canýe bëjaye fshantsiñe obocanentsana cuafjofšecá, cachcá nda tša tojtseboše atšbe soyënga jtsebonnama, atše chanjama cha chë soyënga chaotsebonnama, y chë nyetsca tescama yomna tšabe vídnaca, chca jtsebonnama chábiyoe tondaye ntsotjañcá.

7 Nda nyetsca soyënguentsana tšabá chaojabocná mo ayënjanyacá, lempe echanjóyëngacñe ntšamo atšbe entšángbiyoe jatšatayama tijašebuachenacá, y atše chabe Bëtsá chántsemna y cha atšbe uaquiñá.

8 Pero chë auatja causa Crístbiyoe ndoñe monðeservénënga, chábeñe ndošbuáchiyënga, chë bacna soyënga causa Bëngbe Bëtsabiana puerte uaboyënjánënga imomnënga, chë ínýëngbiyoe obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejubnayëse, y nyetscanga bošterënga imomnëngbiamna, chënga entsamna chë íñesheca uafjajónayoca jasúfriana, chë azufre yoiuñýinýanentše. Chentše puerte castigánënga sempre mochanjëftsemna, mo uta soyama cuafjobancá ca.”

Chë tsëm bëts pueblo Jerusalén

9 Chentsana canýa chë angelënguentsá, chë canýsëfta codbenga bomnënga jútjena chë canýsëfta ústonoye pochócaye soyëngaca, átšbiyoe tonjánabo y šonjaniyana: “Mabo, cbochanjýinýiye chë tojobouamá shembása, chë Oveshatembe shema ca.”

10 Y atše chë Uámana Espíritoftaca corente mandaná jtsemnëse, chë ángel šonjanánatse canýe bëts y tsbanana tjoye, y šonjaninýinýé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábicana enjëtsostjajuana.

11 Chë bëts pueblo enjëtsëbuashinýinýana Bëngbe Bëtsabe buashinýinýánaca; enjëtsëbuashinýinýana mo canýe uámana botamana ndëtsbecá, mo jaspe ndëtsbecá, pero mo cristalcá tëshínýiñe.

12 Chë bëts pueblo šheconana canýe bëts y tsbanana tapiëse enjamna, chë tapiësiñe bnëtsana uta bëshashangá y cada bëshashentse canýe ángel, y chë bëshashangañe enjanábemana chë Israeloca bnëtsana uta bëts pamíllangbe uabaina.

13 Shinýe bocanoica unga bëshashangá, shinýe uenatjëmbambanoica un-gashá, tsjuanoica unga bëshashangá, y tsmanoica un-gashá.

14 Chë tapiëse enjanëcuatjona bnëtsana uta ndëtsbënguiñe, y chëbënguiñe enjanábemana Jesucristo chë Oveshatembe bnëtsana uta ichmónëngbe uabaina.

15 Chë ángel átšeftaca oyebuambnayá canýe castellano juinýnanëšëfja enjánatbëna jamedídama chë bëts pueblo, chentša bëshashangá y chentša tapiëse.

16 Chë bëts pueblo cach medida enjánbomna nyets cantoica, cach medida tëntsoye y nyanëjoye. Chë ángel chabe juinýnanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nyanëjoye cach medida enjánbomna.

17 Chentšana chë tapiëse tonjanmedidá, enjánbomna chnënguana bnëtsana y shachna metrënga; ntšamo entsanga chca soyënga jamedídama mondëtatšëmbcá chë ángel tonjanmedidá.

18 Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nýa mo cristalcá tëshínýniñe enjáninýna.

19 Chë ndëtsbenga ndayíñe chë tapiëse enjanëcuatjona enjánbotamanana nýetsca uámana botamana ndëtsbéngaca: canýebé jaspe ndëtsbeca, chë inýebé zafíroca, chë inýebé ágata ndëtsbeca, chë inýebé esmeráldaca,

20 chë inýebé ónice ndëtsbeca, chë inýebé cornalina ndëtsbeca, chë inýebé crisólito ndëtsbeca, chë inýebé berilo ndëtsbeca, chë inýebé topácioca, chë inýebé crisoprassa ndëtsbeca, chë inýebé jacíntoca y chë inýebena amatista ndëtsbeca.

21 Chë bnëtsana uta bëshashangá enjuamna bnëtsana uta perlënga; cada bëshášha nýe canýe pérlica uapormanésha. Y chë más bëts tsáshenëjana enjamna ena castellánoca; mo cristalcá tëshínýniñe enjáninýna.

22 Chë bëts pueblentše ndocna Bëngbe Bëtsabe bëts yebna chiyátaninýe, er Bëngbe Utabná, chë Bëngbe Bëtsá nýets obenana bomná y chë Oveshatema chentše bonjamna, y chata nýetscangiama chë bëts pueblentše ndayéntšnaca adoránata bonjëtsemna.

23 Chë bëts pueblentše ndoñe quenjatsiyta shinýe o juashcona chaotsebínýnaye, er Bëngbe Bëtsabe buashinýinýanana chentše enjëtsebínýnaye, y chë Oveshatembe buashinýinýanana mo uajuinýanëshacá enjamna chë bëts pueblama.

24 Chentša binýnayánaca, entsanga nýetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo.

25 Chë bëts pueblentša bëshashangá ndocna te quemochtëtatame, y chentše ndocna ora íbeta queochátsmëna.

26 Chë bëts puebloye mochanjiyëbo chë nýetsca luarënguentsa entsangbe uámana y bëts soyënga, y chë nýetsca luarënguentsa entsángbeñe bëtsëtsanga y uámanënga iuabiamná soyëngnaca.

27 Pero ndocna te queochátómashëngo ndayánaca, y chë soye chaotsama entsanga ndoñe tšábenga chamotsemnana Bëngbe Bëtsá jadórama; ni ndocná queochátamashëngo, Bëngbe Bëtsabiamna nýa tondayama ogustana soyënga amá o inýëngbiye jáingñama soyënga amá. Choye mochanjámarshjna nýe chë ndëmuanýengbe uabaina yojtsábemana chë Oveshatembe libréšañe, chë nýetsca tescama tšabe vida mochjónýenëngbe uabaina uábemanentše.

22

1 Chë ángel šonjaninýinýe chë enjanobëjna bėjaye vida bomniye. Chë býyeshe enjamna ndëtsenguiye y tëshínýniye mo cristalcá. Enjanóbocana chë Bëngbe Bëtsá y chë Oveshatembe uámana puestocana,

2 y chë más bëts tsashená tsëntsajana enjanobëjna. Chë fshajayentša catoica lado enjanójuajna betiyeshënga chë nýetsca tescama yomna tšabe vida jtsebomnana, canýe uatiñe bnëtsana uta soye jashájonana, canýe cada shinýe; chë betiyeshentša tsbuanáchënga josérviana nýetsca mándayëngbentša entsanga jáshnama.

3 Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye.

Chë Bëngbe Bëtsá y chë Oveshatembe uámana puesto chë bëts pueblentse echántsemna, y chatbe oservénënga mochántsadórana.

⁴ Chënga mochanjinýe Bëngbe Bëtsabe jubíá, y chabe uabaina chëngbe juentsaca mochantsambaye.

⁵ Chentše ndocna ora ibeta queochátsmëna, y chentša oyenënga ndoñe queochátëjabeto canýe uajuinýanësha o shinýe chaotsebínýnaye, er Bëngbe Bëtsá Bëngbe Utabnabe buashinýinýanana chëngbiana echantsebínýnaye, y chënga mochántsemna mo reyëngcá uámanënga, y Bëngbe Bëtsáftaca nýetsca tescama mochántsemandaye.

Jesucristo jésabama entsobeco

⁶ Chentšana chë ángel šonjaniyana: “Quem palabrënga endmëna ntšamo ndegombre yomncá, y nýetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambayënga, chëngbe ainaniñe osertánana y añemo chamotsebomnana jóyebuambayama, chabe ángel tbojichmó chabe oservénëngbioye jinýanýiyama ndayá betscó yojtsemna jopásama ca.”

⁷ Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

⁸ Atše Juan, chë soyënga sënjanuena y sënjaninýe. Y chca sënjanuena y sënjaninýentsána, chë chca šonjaninýinýe ángelbe delante atše sënjanoshamentšé, cha jadórama.

⁹ Pero cha šonjaniyana: “Ndoñe, átšeftaca ndoñe chca mátamana, er atše canýe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambayënga y nýetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

¹⁰ Chora mëntšánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco.

¹¹ Cachcá monýá chë bacna entsá bacna soyënga chaotsama; chë puerte bacna soyënguiñe jtšiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nýets tempo nýets ainánaca chábioye chabotseservena ca” —cha šonjaniyana.

¹² Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjijyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomercencá.

¹³ Atše sëndmëna chë nýetsca soyënga bojatsáyá y pochocayá, chë natsaná y ustonoyá, chë ndábeyeca y ndabiama lempe yomna ca” —šonjaniyana.

¹⁴ Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nýetsca tescama yomna tšabe vida jtsebomnana uacanána jashjáchama, mo chë nýetsca tescama yomna tšabe vida jtsebomnana betiyeshentsána cuaftsescá, y mochanjobenaye chë tsëm bëts puebloye bësásajana tšabá jamashjnama.

15 Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga, chë soyënga adórayënga diosënga yomna ca jtsejuabnayëse, y nÿetscanga chë bostero soyënga ogusetánënga y chca jtsamëse oyenënga.

16 Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davidbentsana Entšá. Atše sëndmëna mo chë bínÿanoye puerte bínÿnaye estrellcá ca.”

17 Chë Uámána Espiritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá bėjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nÿetsca tescama yomna tšabe vídnaca, chca jtsebomnama tondaye ntsotjañcá.

18 Nÿetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga.

19 Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiyama yomncá chë nÿetsca tescama yomna tšabe vida jtsebomnama betiyeshentsana y chë tsëm bëtš pueblentsana, chë ndayama quem librëšañe entsábemana.

20 Quem soyënga oyebuambnayá, chë lempe ndegombre echantsemnama tonjayaná, atše, Jesús sëntsichamo: “Aíñe, betesco chanjésabo ca.”

Chca chaotsemna. ¡Cochjabo, Bëngbe Utabná Jesús!

21 Bëngbe Utabná Jesús chaoma tšabe bendicionënga tšëngaftangbeñe chaotsemnama.